



Teoso sãkire amaneri

Apurinã New Testament

Contents

Mateo	1
Marko	67
Arókasi	105
Xoão	174
Átosi	220
Homano	280
1 Korĩto	309
2 Korĩto	333
Karásia	350
Épeso	361
Piriposi	372
Koroso	379
1 Tesarónika	386
2 Tesarónika	391
1 Tximótxio	394
2 Tximótxio	403
Txito	409
Piremõ	413
Epireo	415
Txiako	435
1 Petro	442
2 Petro	450
1 Xoão	455
2 Xoão	462
3 Xoão	463
Xota	464
Apokorĩpisi	467



Teoso sãkire amaneri

New Testament in Apurinã (BR:apu:Apurinã)

Language: Apurinã

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2004 Wycliffe Bible Translators, Inc.

Copyright © 2004 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

f08532d3-0834-5132-90e6-1f54179b5f79

ISBN: 978-1-5313-0047-0

MATEO

Xesosi Nirimaneakori Iua Apisapanika Auakani

(Arókasi 3.23-38)

1 Xesosi Teoso mereēkiti itxaua. Uai aua Xesosi apika atokiriakorini uāka. Xosee inakori Xesosi iri atoko ikorapokoriti. Apraõni, Taviini pakini Xesosi apika atokiriakorini atoko. Ininiã Xesosi Taviini, Apraõni pakini imi atoko itxa.

² Ininiã ia atoko itxa:

Kitxakapirīka Apraõ, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auíte itxaua.

Tavii, Saromão iri. Saromão inoro mitxi

Oria itanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki ikorakanani kãkiti Isaeokini

maĩkaãka. Papirónia tixinimoni anikaãkana.

¹² Papirónia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiĩ iri.

Eriakiĩ, Asoo iri.

¹⁴ Asoo, Satoki iri.

Satoki, Akĩ iri.

Akĩ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria itaniri. Xesosi, iuara Teoso Mereēkiti itxaua. Inoro Maria.

¹⁷ Apraõ, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uāka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uāka. Iuasaakiika Xoteoakori anikaãka Papirónia tixinimoni. Ninoa mekaniriakori katosipeka inakasaaki, Xesosi iponaniãpeka.

Xesosi Iponaniini Pirena

(Arókasi 2.1-7)

¹⁸ Ia atoko itxapaniko Xesosi. Teoso mereēkiti iponaniãkasaaki, Maria ominapatari Xosee. Oitaniriuatini apisapanika, omotokiãri amarini Erekar Matamatakoti sikakiti. ¹⁹ Xosee uãkatari Maria kamari maerekati ãtikata. Atão inakarínoka kamakari iua, ininiã kona inirekari kãkiti imaropiretiniri oa kamixi onini. Kãkiti sauaki osiniã, Xosee inirekaro opêtauatini, kotxi erekari kamakari iua. Ininiã inirekari itakanapiniro oa, ixika kãkiti mimarotakaniã. ²⁰ Ikara atoko inini ixiniremoni, Teoso nitiri iaxitikiri apoka itaponemoni. Ininiã itxa:

—Xosee, Taviini apika mekaniri pite. Kona pipīkaperō Maria papakapini pītanoro ikapani, kotxi Erekarī Mata-matakoti, iuara kamixipeka txīkitakaro. ²¹ Auako oa ākiri. Pitakauākatariko Xesosi itxauako, kotxi imaktxakari kākiti maerekani —itxa Teoso nitiri.

“Xesosi” popīkari sākireē, iuatxikana, “Kākiti Maerekani Makatxakari,” itxa.

²² Apikomoni Teoso nitiri txari:

—Ikara atoko inakari auapeka, kotxi kitxakapirīka Teoso sākire sāpiretakari sāpiretāpekari ikara sākiretxi. ²³ Kitxakapirīka ia atoko itxa:

Hīkenakotari. Sito kikikata masirīkato mixiuatako. Auako oimi.

Itakauākataāka Emanoeo inakori

—itxa Teoso nitiri Xoseemoni. “Emanoeo” popīkari sākireē “Teoso atekata aua.”

²⁴ Xosee merēkasaaki, iua auikari Teoso nitiri sākire. Ininiā itanorouata Mariakata. ²⁵ Eereka amarini iponaniākasaaki, Xosee takauākatari Xesosi itxaua. Amarini iponaniini apisa iua !isirīka Mariakata.

Atokatxi Pokīkinimoni Auakani

2 Xesosi iponaniā Pereē inakori sitatxiti, Xotéia tōpa, Erotxi auītetxi inakasaakia. Iuasaaki atokatxi pokīkinimoni auakani sari Xerosareē sitatxiti-moni Pereē takote. Iōriki imarotakani ninoa.

² Ininiā itxana kākitimoni:

—Naniparari amarini Xoteo auīte inakariaua? Ate itikapekaro iōrikite atokatxi pokīkinimoni. Oa iōriki oerekaua auītetxi Apiananiri iponaniāpeka. Ininiā ate apoka uai akapotoreēkiniua iua apisatoō, kotxi Apiananiri itxaua —itxana ninoa.

³ Erotxi ikara ikenakoenetakasaaki, kona erekaxinireri. Kona inirekari āti auītetxi apokini. Ininiā ikinimane Xerosareē auakani kona erekaxinirena,

kotxi ninoa pīkari Erotxi. ⁴ Ininiā iua apotiitana sasetotxi auīteakori, kaiōkat-soparerini pakini. Ininiā Erotxi pimaāna:

—Nanipa Teoso Mereēkiti iponaniāko? —itxa.

⁵ Ninoa apakapapiretari:

—Pereē sitatxiti, Xotéia tōpa aua. Ia atoko itxapaniko Teoso sākire sāpiretakari iōkatsopatakiti kitxakapirīka:

⁶ Pereē sitatxiti auakani, Xotéia tōpa, hīte sitatxine poiāori, iuaritika kona hīpētāuatape, kotxi hīte sitatxineē iponaniāko Isaeokini auīte. Kākiti mīkiikakari itxauako

—itxa ninoa auītetxiakori Erotximoni.

⁷ Ininiā Erotxi akiritana ninoa iōriki imarotakani, ninoanani imisākiretini ikapani. Ininiā ipimaāna:

—Mitxipitipanika kirisaakipa hītīkataro oa iōriki? —itxa ninoamoni.

Ininiā ninoa sāpiretari. ⁸ Iposo atoko iokanatana Pereēmoni:

—Hīsako Pereēmoni amarini hinitini ikapani. Hāpokasaakiri, hīsāpiretano. Ininiā nota apaka sako, iua apisatoō nikapotoreēkiniua ikapani —itxa Erotxi.

Txamari inirekari okiniri Xesosi, kotxi linirekari āti auītetxi auini.

⁹ Erotxi sākire ikenakotakana atoko, ipotorikana. Iōriki atokatxi pokīkinimoni itikakitona ikiika. Anikana Xesosi auinimoni. Iuaātaā oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana. ¹¹ Ininiā apokana aapoko. Iōrōana. Apokarina amarini inoro Mariakata. Ininiā ikapotoreēkauana Xesosi apisatoō. Itxarina:

—Apiananiri pitxaua. Aāuīte pitxaua —itxana.

Iposo atoko itiina imaktxakana. Ininiā imaktxakarina erekari imikitina auītetximoni isikakitina ikapani. Isikarina oro, isēso inakori, miha inakori pakini. Isēso, miha pakini kamariāro peerekari. ¹² Ininiā eereka Teoso

sāpiretana iōriki imarotakanimoni itaponeēna:

—Kona hīkanapiriāpe Erotximoni — itxa Teoso ninoa taponemoni.

Ininiā ninoa kanapiriākasaaki auinimoni, āti kimaporitimoni isana.

Exitomoni Xosee, Maria Pakini Sini

¹³Iōriki imarotakani sipeka atoko, Teoso nitiri iaxitikiri sāpiretari Xosee itaponemoni:

—Paiamata. Pōkitikaua. Panikari amarini, inoro apaka Exito tixinimoni. Himiteka. Kona hīkanapiriāpe nota masāpiretakanisaakii, kotxi Erotxi nitari amarini okiniri ikapani —itxa Teoso Xoseemoni.

¹⁴Ininiā Xosee:

—Nisapitikako —itxa.

Ininiā iua ikanōkatika Xosee ōkitikaua. Aiamata Exito tōpamoni isini, amarini anikini ikapani. Ininiā imimitekari amarini inorokata Exitomoni. ¹⁵Erotxi ipinakasaaki, iusaaki ikanapiriāko. Kona ikanapiriā Erotxi ipinini apisa. Ia atoko itxapaniko kitxakapiriāka Teoso sākire sāpiretakari sāpiretakiti:

Nakiritariko namarite Exito tixini itakanapini.

Amarini Okiko Pirena

¹⁶Erotxi imarotakasaakiri iōriki imarotakani sipe inakasaaki, !imisākiretaikarina iua, ininiā iua omanākarauata. Ininiā amarini ipikananipeka inakanuia, apaka axapitipanika inakanuia, imakinikana okākitaka Pereē sitatxitiā auakani. Ikara atoko itxa, kotxi iōriki imarotakani sāpiretari ipikananipeka oa iōriki tokiā. ¹⁷Kitxakapiriāka Teoso sākire sāpiretakari Xeremia inakori sāpiretakiti iaōka auape iusaaki. ¹⁸Iua txari:

Hamaa sitatxiti ikenakotaākako ātsaātxi. Hakeo atoko sitoakoro txiapatako

oimiakori matinani. !Onirekari kāk-iti mīkapiritiniro oa, kotxi oimiakori kona auaiaka.

Exito Tixini Ikanapiriinina

¹⁹Erotxi ipinaka atoko, Xosee Exito tixini auakasaaki, Teoso nitiri misākiretari iua itaponemoni. ²⁰Itxari:

—Pōkitikaua, pimikanapiriāri amarini, inorokata Isaeo tixinimoni. Amarini kinirāo okaka inakani kona auaiaka —itxari.

²¹Ininiā Xosee mikanapiriāri amarini, inorokata Xotéia tōpamoni, Isaeo tixinimoni. ²²Txamari imarotakasaakiri Aki-rao, Erotxi ākiri auītetxi ininiua irini tikini, Xosee pīkari Xotéia tōpa auini. Ininiā Teoso nitiri iuaīkana itaponemoni sāpiretari ātiātaā isini ikapani. Ininiā Xosee, Maria, Xesosi pakini sari Kariréia tōpamoni Isaeo tixini. ²³Nasaree sitatxiti kaikota itxana. Ia atoko itxa kitxakapiriāka Teoso sākire sāpiretakani sāpiretakiti iaōka inini. Ninoa txari: Nimereēkiti, Nasareekiri itxauako.

Xoão Kapatxisareri Sāpiretakiti

(*Marko 1.1-8; Arókasi 3.1-20; Xoão 1.19-28*)

3 Eereka Xesosi aneēpe. Iusaaki Xoão kapatxisareri, āparaā makipakaniātaā Xotéia tōpa aua. Iuaā iua oerekari Teoso sākire kākitemoni. ²Iua txa:

—Himaerekani hītakanapako, kotxi Teoso mereēkiti paītiki apokako iua ikinipoko auīte ininiua ikapani —itxari Xoão.

³Kitxakapiriāka Isaía inakori, Teoso sākire sāpiretakari, sāpiretapekari Xoão pirena. Itxari:

Auako kiki āparaā makipakaniātaā. Isāpirenauatako. Itxariko: “Hōeretariko kimapori Apiananiri apokini apisapanika. Itikaāpo erekari hīkamako iua napini ikapani,”

itxa Isaía kitxakapirīka.

⁴ Xoão takari mākatxi kamero piti kamakori. Kamero kākiti pira. Ipakiot-sere aamata kamakori. Inikari txītxiri. Itximari mapaā itopakero. ⁵ Kākiti Xerosareēkini, ikinimane Xotéia tōpakini, ikinimane Xotāo tinikata auakani pakini sari ikenakotinirina ikapani. ⁶ Iuaā ninoa sāpiretari Teosomoni maerekati ikamakitina, imaerekani imaktxakini ikapani. Eereka iua patxisatana Xotāo uiniti.

⁷ Txama Xoão atapakasaakina pariseoakori, satoseoakori pakini apokini iuamoni ipatxisatikona ikapani, iua txana:

—Imini katsiiri anaakorirai hīte. Teoso misiritapitikai himaerekani xika. Himitekini !auari. Hinirekari hīpatxisatiko, txamari !hinirekari hītakanapiniri himaerekani. ⁸ Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atāo hītakanapiniri himaerekani. ⁹ Hākixiniremoni !hīxinikapiri: “Teoso apakapapitikauako ate, kotxi ate atokirini Apraāoni txaua,” !hītxapeko. Ari, nota sāpiretai hīte, Teoso nirekiniāri, iposotari ia kai soroā Apraāoni mekaniriakori ikamini. Kona Apraāoni posotari anikinii Teosomoni. ¹⁰ Aamina maereka iriti atoko hītxa. Teoso iposopeka hīte ixipokini. Kākiti auari ikitaita kauanari aamina maereka iriti itokini ikapani. Ikinika aamina maereka iriti tokaākako. Xaminaā oka inaākanako. Teoso kamakiti iua atokokana itxa. Ininiā Teoso kitaite kauanapeka, aamina kotsa sauakiko tīkane. Iua atokokana ininiā, Teoso aiamatapeka hīte ixipokini ikapani.

¹¹ —Hīte nipatxisata āparaaā. Hīpatxisatiko oerekari maerekati hīkamakiti hītakanapapeka. Nota tikini apoākari patxisataiko hīte Erekari Matamatakotiā, xaminaā

pakini. Apiatakari itxaua iua. !Apakata iua takote napokini ikiti mata nimaktxakini ikapani, kotxi iua apiata. Nota poiāoka. Imaktxakari himaerekani, itxiko metao āki auakari arikini atoko. ¹² Katarakeri āpokari ahoisi otāta imaktxakini ikapani. Otāta arikaāka. Oki nīkataāka ikiena nīkatikoātaā. Iua atokokana Teoso nīkatariko kākiti erekarini. Maerekati kamakani arikaākako xamina maxipoākatīā —itxa Xoão.

Xesosi Patxisatiko Pirena

(Marko 1.9-11; Arókasi 3.21-22)

¹³ Iuasaaki Xesosi pitorika Kariréia tōpa. Isari Xotāo uinitimoni, Xoão patxisatiniri ikapani. ¹⁴ Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati !auari. Notara nirekari pite patxisatinino nota —itxa Xoão.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaākiti —itxa.

Ininiā Xoão:

—Ateeneka.

¹⁶ Eereka ipatxisataāka atoko ikanikiita imiriī. Iuasaakipeka iaxiti takaka. Ininiā kākiti atapari Erekari Matamatakoti katxakaāpotini kamao atoko inakari. Xesosimoni oāpoka. ¹⁷ Eereka Teoso sākirauata iaxiti:

—Pite namarite, nitiretakiti, napokaerekatai, kotxi ninirekakiti pikama —itxa Teoso.

Satanasi Nirekari Xesosi Kaminiri Maerekati

(Marko 1.12-13; Arókasi 4.1-13)

4 Erekari Matamatakoti anikari Xesosi āparaā makipakaniātaā Satanasi atamakaerekatiniri ikapani. ² Iuaā Xesosi takanapari inipokotini Teoso imisākire-

tini ikapani. Koarêta pokamara, koarêta ikanôkati pakini itakanapari inipokotini. Ininiã inatxikatani iuani.

³Ininiã iuaaakiika Satanasi apoka Xesosimoni. Iua katamakaerekareri itxaua. Itxari:

—Pite Teoso âkiri pininiãua, ininiã ere kai soro komiri pitxikitaka —Satanasi txari Xesosi.

⁴Xesosi apakapapiretari:

—Kona nikamari pite paniãtakiti, kotxi Teoso sâkire iôkatsopatakori txari: Kona komirinanini txikitakari kâkiti âtipirika auini tikane. Ikinika Teoso sâkirera txikitakari kâkiti âtipirika auini tikane

—itxa Xesosi Satanasiimoni.

⁵Eereka Satanasi anikari Xesosi Xerosareëmoni. Iua sitatxi akiritaãka Teoso nakiti. Satanasi anikari Xesosi Teoso misâkiretiko aikotimoni apiata ôtano tsokitiri nopini. ⁶Ininiã Satanasi txari Xesosi:

—Teoso âkiri pininiãua, pokaua xiti. Ininiã ikinipoko kâkiti imarotariko Teoso âkiri pininiãua, kotxi Teoso sâkire iôkatsopatakori txari:

Teoso iokanatanako initiriakori iaxitikini pite inikatinina tikane. Ninoa maikai pimapinakani tikane, ininiã pikarouatini !auari. Kona kai soro karotari pikiti,

—itxa Satanasi.

⁷Xesosi apakapapiretari:

—Teoso sâkire iôkatsopatakori apaka txari:

Kona patamakaerekatapiri Apiananiri piTeosone.

⁸Eereka Satanasi anikari Xesosi âtiãtaã iuaikana. Itano xiratarimoni anikari. Iuaã Satanasi oerekari ikini itixiti, ikinika tiitxiti iuaã auakari pakini. ⁹Ininiã itxa:

—Pikapotoreëkiniãua nota apisatoõ piteosonetinino, ininiã ikinika nisikaiko —itxa Satanasi.

¹⁰Xesosi apakapapiretari:

—Konapitini. Pisipeka Satanasi. Teoso sâkire iôkatsopatakori txari:

Apiananiri piTeosone, iuanokara piteosoneta. Iua ikapaninokara piparikauatako

—itxa Xesosi.

¹¹Ininiã Satanasi takanapa txari iua. Ininiã Teoso nitiriakori iaxitikini apoka Xesosimoni inikatinirina ikapani, kotxi itapara !auaika.

Xesosi Mipotorikari Iparika Kariréia Tôpa

(Marko 1.14-15; Arókasi 4.14-15)

¹²Xesosi kenakoenetakasaakiri Xoão kapatxisareri kateia âki takiko, isari Kariréia tōpamoni. Nasaree sitatxitimoni isa. ¹³Ininiã eereka itakanapari Nasaree sitatxiti.

Kapanaoõ sitatxitipeka aua itxa. Kapanaoõ, Kariréia poa takote, apaka Seporõ, Natarii pakini tōpati takote. ¹⁴Kitxakapirika Isaía, Teoso sâkire sâpiretakari sâpiretapekari, iuaã Xesosi auako. Ia atoko Teoso sâkire txapeka:

¹⁵Seporõ, Natarii pakini tōpati ipoa mitari takote, Xotão uiniti ipiniã. Kâkiti takauãkatari iua itixi, Kariréia tōpa. Xoteo minakanuia tixine itxaua. Iuaã Erekari apokako. ¹⁶Ninoa kâkiti, ipiã auakani, !imarotari Teoso. Iplikaniãtaã ninoa auanãta. Ninoa atamarariko tirikapi. Ikamara mitari. Iua tirikapi iopinipokotako ipiã auakani sauaki.

Ikara atoko itxa Isaía kitxakapirika.

¹⁷Xesosi apokasaaki Kapanaoõ sitatxiti, imipotorikari oerekarauatini. Ia atoko itxa:

—Himaerekani hītakanapa, kotxi iposope Teoso hīauite ininiua —Xesosi txana ikinipoko kâkiti.

Xesosi Akiritari Ipi Ipi Pakini Kokatsaãriti

(Marko 1.16-20; Arókasi 5.1-11)

¹⁸ Xesosi Kariréia poa tiniã itipokotakasaaki, itikari ipi kiki, Simão Petro inakori, itari Átree inakori pakini. Itakanátarina hetxi. Kokatsaãriti itxauana. ¹⁹ Ininiã Xesosi akiritana ninoa:

—Masa notakata. Hitakanapariko hókatsaãtini parikatxiti. Noerekaiko hite Teoso sákire hõerekini ikapani, kãkiti imarotini ikapani —itxa Xesosi.

²⁰ Ininiã iusaakiika ninoa takanapari okatsaãtinina. Xesosikata sa itxana.

²¹ Apikomoni itipokotakasaaki, atamatana Txiako, Xoão pakini. Sepeteo anaakori itxauana. Ninoa irikata kanauã auanãta. Ihetxina iotsaãnãtana. Ininiã Xesosi akiritana ninoa. ²² Iusaakipeka itakanaparina iri, kanaua pakini. Xesosikata sa itxana imoianatinirina ikapani.

Xesosi Amianatakani Imakananitini

(Arókasi 6.17-19)

²³ Xesosi sari ikini Kariréia tõpamoni. Aiko Xoteoakori apotiitiniãtaãua isa. Iuaã isãpiretana Teoso iokanapirena erekari, Teoso kãkiti auíte inini pirena. Apaka erekapeka itxikitakana amianatakani. ²⁴ Xesosi kamakiti, apaka isãpiretakiti, iaripiretapeka ikinika Síria tixini. Ininiã kãkiti minana itomaneri amianatakani iuamoni. Ikini sereti amianari auakini sari iuamoni. Kãkiti maerekati matamatakoti Satanasi nitiri auaãtotakiti apoka iuamoni. Apaka kãkiti mapitxiritakani apoka. Apaka titinanakakari amianariti auakini apoka. Apaka kãkiti maposota tãpokotakani pakini apoka Xesosimoni. Ikinikana erekape itxikitakana ninoa. ²⁵ Itomaneri sari iua tikini. Kãkiti Kariréiakini, tesi pakini sitatxitikini,

Xerosareẽkini, kãkiti Xotéia tõpakini, Xotão uiniti ipiniãkini pakini sari iua tikini.

Xesosi Sãkirauata Ixirata Auíte Nopini

(Kapítoro 5, 6, 7)

5 Xesosi itomaneri kãkiti atapakasaaki, ixirata nopini isa, topãka itxa oerekarauatini ikapani. Imoianariakori apotiitaua iuamoni. ² Iusaaki oerekana ia sãkiretxiti:

Kirimonipa Teoso Sikatari Erekarí?

(Arókasi 6.20-23)

³—Teoso takari erekari kãkitimoni, ia atoko inakanimoni. Ninoa nirekari Teoso nireekiti ikaminina, iuaritika imarotarina liposotarina Teoso nireekiti ikaminina, ininiã amanaãrina Teoso sikaposotiiretinina ninoa. Teoso takari erekari kãkiti ikara atoko inakanimoni. Ninoa sari Teoso auítetxi ininiãtaãua.

⁴—Teoso takari erekari kãkitimoni, ia atoko inakanimoni. Mítxi ninoa txiapata imaerekanina xika. Ininiã eereka Teoso mĩkapiritana ninoa, amarini mĩkapiritiko atoko.

⁵—Teoso takari erekari kãkitimoni, ia atoko inakanimoni. Pataparaxinirena ninoa, iuaritika !itxitarina äti. Iamonikaririna äti. Teoso sikapanikariko ikinika itixi ikara atoko inakanimoni.

⁶—Teoso takari erekari kãkitimoni, ia atoko inakanimoni. Ninoa iteene nirekari erekarinoka ikaminina. Nipokori inirekinina atoko, ãparaã inirekinina atoko, ninoa iteene nirekari erekari ikaminina. Ininiã Teoso sikana ninoa ikinipoko erekari inirekakitina.

⁷—Teoso takari erekari kãkitimoni, ia atoko inakanimoni. Ninoa amonĩkari ninoa misiritakani, ininiã iua atokotxikana Teoso amonĩkanako ninoa kaamonĩkarerini.

⁸—Teoso takari erekari kâkitimoni, ia atoko inakanimoni. Ninoa kamari Teoso nireêkitinoka, ininiâ ninoa aôkitariko Teoso.

⁹—Teoso takari erekari kâkitimoni, ia atoko inakanimoni, kauâirerinimoni. Ninoa parîkauata neenamati xipokini îkapani. Ininiâ ninoa akiritaâkako Teoso anaakori.

¹⁰—Teoso takari erekari kâkitimoni, ia atoko inakanimoni. Ninoa kamari erekari, ininiâkara apanakini kâkiti misiritana. Ninoa erekari kamakani auako Teoso auîtetxi ininiâtaâua.

¹¹—Teoso takari erekari hîtemoni, apanakini misiritakasaakii, imisâkirepiretakasaakii, aâpirena ikamakasaaki hîtemoni nota sâkire hâuikini xika. ¹²Poxokonoka hîtxako, kotxi Teoso sikai hîparîka îki ito, itixine hâpokasaaki. Hîte misiritiko atokokana Teoso sâkire sâpiretakani kitxakapirîka misiritaâka, ininiâ hîpoxokoniuatako —itxa Xesosi.

Iôkira Pirena

(*Marko 9.50; Arôkasi 14.34-35*)

¹³Iuaîkana Xesosi sâkirauata:

—Iôkira erekaro atoko hîtxaua ikini-mane îkapani. Iôkira matxoatapeka onakasaaki, ininiâ !apakata otxo kanapirini iuaîkana. Ininiâ oôkaâka. Kâkiti kitakaro, kotxi kona otxaika.

Tirikapi Pirena

¹⁴—Tirikapi atoko hîtxaua ikini-mane kâkiti îkapani. !Hîposotari hîkipatiniri sitatxi xirata nopini auakari, kotxi ikini-mane atamatari tirikapi. ¹⁵Kâkiti !itakari tirikapi kopiti âki. Itakarina itano ikini aapokotxiti iopinikini îkapani. ¹⁶Iua atokokanera hîtxako, kotxi erekari hîkamakiti tirikapi kamara atoko itxa. Erekarinokara hîkamako. Ininiâ apanakini atamatari erekari

hîkamakiti. Ininiâra itxarina âri iaxitikirimoni: “Peerekai pite.”

Teoso Sâkire Moisesi Apakapakiti

¹⁷Iuaîkana Xesosi sâkirauata:

—Kona hîtxape: “Xesosi xipokariko Teoso sâkire Moisesini apakapakiti,” kona hîtxape. Apaka, “Kitxakapirîka Teoso sâkire sâpiretakani sâpiretakiti Xesosi xipokako,” kona hîtxape. Kona ikara inakari !nixipoka. Nota ina ikinipoko ninoa sâpiretakiti nikamini îkapani. ¹⁸Atâopitika ikinika Teoso sâkire apokako. Kona xatiki Teoso sâkire iôkatsopatakori kona xipoka. Iaxiti, itixi pakini xipokini apisa Teoso sâkire !ixipoka. Apokapitikako imakinika isâkire. ¹⁹Teoso sâkire ipaniâtakiti apiari aua, apaka poiâori aua. Kâkiti makamakaniâri ikinika Teoso sâkire, oerekiniâri apanakini ikinika Teoso sâkire imakamakani îkapani, poiâori itxaua Teoso auîtetxi ininiâtaâua. Âti kâkitipekana, ikaminiâri ikinika Teoso sâkire, oerekiniâri apanakini ikinika Teoso sâkire ikamini îkapani, apiari itxaua Teoso auîtetxi ininiâtaâua. ²⁰Ia nisâpiretai. Kaiôkatsopareriakori, pariseokori pakini !ikamari atâo inakari Teoso nireêkiti. Ininiâ hîte kaminiâri ninoa atokotxikana, !hâuiritaâka hîiroini Teoso auîtetxi ininiâtaâua. Atâo inakari Teoso nireêkiti hîkaminiâ, hîroâpitika iuaâ.

Omanâkaretxi Pirena

²¹—Hîte imarotari kâkiti kitxakapirîka sâpiretaâka. Ia atoko inaâka: “Kona apanakini hîkape. Kokaniri anikaâkako imisiritikomoni,” inaâka kitxakapirîka. ²²Uatxa apikomoni nota sâpiretaiko hîte. Maxikatiîka pomanatiniâri pitari, panikaâkako pimisiritikomoni. Pite napetiniâri pitari, ininiâ auîtetxiakori misiritapitikai. Pakiritiniâri pitari: “Kiîketei,” ininiâ

pimisiritiko pañtiki apokako. Nota txai hñte, kona erekari kokaniri. Iua atokokana kona erekari hinaperauatini. Hinaperauatiniã, ininiã maerekani misiritikoãtaã hisapitikako.

²³—Ininiã hisikasaaki Teoso apisatoõ hisikakiti hisikini ikapani, iusaaki hixinikari hitari homanatakiti.

²⁴Iusaakiika hitakanapariko hisikakiti iuaã hisikiniri apisa. Hisako katimaritika homanatakitimoni. Himisãkiretari, homanãkare hixipokini ikapani. Iposo atoko kanapiriã, hisikakiti tikane sika hitxako Teosomoni —itxa Xesosi.

²⁵Iuaikana Xesosi sãkirauata:

—Kãkiti kinirão apoñtakiniãi, ininiã pimisiritiko mereẽkarimoni iua anikiniã apisapanika, katimariã pisa iuamoni. Pimisãkiretari iua, kotxi pimisiritiko mereẽkari sikaiko pite pimisiritakirimoni. Ininiã eereka iua takai kateia ãki. Iuaã pikaikotako. Ininiã apisapanika pimisãkiretariko iua pomanatakiri. ²⁶Atão nisãpiretai, kona posipikari kateia ikinika pimisiritiko mereẽkari paniãtakiti pimiikitxitakanisaaki —itxa Xesosi.

Kipa Txikitakai Maerekati Pikamini?

²⁷Xesosi apikomoni sãkirauata:

—Hñte imarotapekari kitxakapiriã sãpiretakori: “Pñtanoro minakotokatika kona pisirĩkape.” ²⁸Kitxakapiriã ikara atoko itxama. Nota sãpiretaiko hñte apikomoni. Sito atamatakari kinirão oakata sirĩkaka inakari, iuara kamapekari maerekati ãkixinireẽ. ²⁹Kona paupiritapiri maerekati pikamini txikitaãkari pitekata ikaiкотini. Patamatakiti txikitakiniãi maerekati pikamini, pimakatxakari poki, oka pitxari, kotxi maerekati pikaminiã, maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. ³⁰Piuako

pikikomoni auakari txikitakiniãi maerekati pikamini, ininiã pisauaka, oka pitxa, kotxi maerekati pikaminiã, maerekani misiritikoãtaã pokaãkako. Apiaerekata mauakotikai pauini ãtipirika Teosokata. Kona paupiritapiri maerekati kaikotini pitekata. Pitakanapariko maerekati.

Kiki Ñtanorokata Itakanapakakini

(Mateo 19.3-9; Marko 10.2-12; Arõkasi 16.18)

³¹—Kitxakapiriã ia atoko itxa sãkiretxi:

Pñtanoro pitakanapiniã, aãtsopa pisika oamoni ñtanorotxi takanapiko aãtsopati.

³²Iuaritika nota sãpiretaiko hñte, !hitakanapaperoko pñtanoro. Pitakanapiniãro, ininiã maerekati pikamapitika, kotxi eereka oa atxiiti nirekakari ãti kiki. Ininiã iusaaki oa kamari maerekati apaka pite xika. Apaka oa takakari kamari maerekati. Apakata pitakanapiniãro pñtanoro, ãtikata osirĩkiniã —itxa Xesosi sãkire.

Atãopitika Inakari Sãkiretxi

³³Iuaikana Xesosi sãkirauata:

—Hñte imarotapekari kitxakapiriã sãkiretxiti. Ia atoko itxapaniko: “Hikamariko imakinika hikamaenetakiti. Hikamariko hikamaenetakiti Teoso ikapani,” itxa. ³⁴Notara sãpiretai hñte apikomoni: “Nikamapitikariko,” pinakasaaki, !pakiriuaãkatapiri Teoso tixine uãka, kotxi iuaã Teoso auñtetxi ininiãtaãua. “Nikamapitikariko,” pinakasaaki, kona apikomoni pakiritape. ³⁵“Nikamapitikariko,” pinakasaaki, !pakiriuaãkatapiri itixi uãka, kotxi Teoso uai aua apaka. “Nikamapitikariko,” pinakasaaki, !pakiriuaãkatapiri Xerosareẽ uãka, kotxi auñtetxi Apiananiri sitatxine itxa. ³⁶“Nikamapitikariko,” pinakasaaki,

!pakiriuākatapiri pikii uāka, kotxi !apakata pitxīkitakiniri piāko pomama inini, kasarori inini. Ātika piāko kona piposotari pitxīkitakiniri kasarori inini, pomamari inini. ³⁷“Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona āti sākiretxi !pikamape. Maxikatiika kamakori sākiretxiti Satanasi sākire itxaua —itxa Xesosi.

Xikatxitakanuia Pirena

(*Arókasi 6.29-30*)

³⁸ Xesosi oerekarauatapanika:

—Ia atoko kitxakapirīka sākiretxiti: “Neenamatsisaaki āti makatxakinīari poki, pixikatzitariko. Iusaaki pimakatxakariko iua oki apaka. Pitsiriī pataka āti kākiti xika, pixikatzitariko. Iusaaki iua tsiriī apaka pimapatakako,” itxa sākiretxi kitxakapirīka. ³⁹ Txamari nota sāpiretaiko hīte apikomoni. Kona hīxikatxitapiri maerekati hītemoni auakasaaki. Āti aritiniāri pitoō, ininiā pikirioka ipinitoō iaritini ikapani. ⁴⁰ Atxiīti āti nirekari anikinii pimisiritiko mereēkarimoni, kotxi iua nirekari pite sakiniri pimāka iuamoni iua txineirote pimasikakani xika. Ininiā anikinii apisapanika, pisikariko pimāka inirekakiti, apaka apikomoni āti pimāka. Ikara atoko hīkamako. ⁴¹ Ia āti sākiretxiti: Āti paniātiniāi itii panikini āti ōti, ininiā ipi ōti panikari itii. Poerekariko pitiraōki. ⁴² Atxiīti āti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaikana !nisikai,” ininiā iusaaki pisikariko iuamoni —itxa Xesosi.

Pomanatakini Pitiretini

(*Arókasi 6.27-28, 32-36*)

⁴³ Iuaikana Xesosi sākirauata:

—Hīkenakotapekari ia sākiretxiti: “Hītiretariko hinirimane. Homanatariko

himokaiakari.” Ikara atoko kitxakapirīka auari. ⁴⁴ Ikara atoko itxama. Nota sāpiretaiko hīte ipinimoni. Kona homanatapiri himokaiakari. Hītiretariko iua apaka. Hamanaāri Teoso hīte omanatakani erekari isikini ikapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kākiti erekarini auiniātaā iopinikini ikapani, apaka maerekani auiniātaā iopinikini ikapani. Iua iokanatarī āparaā atāo inakari kamakanimoni, apaka atāo minakati kamakanimoni. ⁴⁶ Hīte tirketakaninani hītiretiniā, kinirepa Teoso sikari erekari hītemoni hinirimanenokara hītiretakasaaki? Kotxi kākiti maerekati kamakani apaka tirketari ninoa tirketakani. ⁴⁷ Hīte misākiretakaninani himisākiretiniā, kākiti Teoso mimarotakani atoko hītixa, kotxi ninoa misākiretakani imisākiretana. ⁴⁸ Ikinipoko hīri iaxiti auakari kamakiti erekari, ininiā iua atokokana hītixikitakariko ikinipoko hīte kamakiti erekari —itxa Xesosi.

Xesosi Oerekari Teoso Sikiko

6 Iuaikana Xesosi sākirauata: —Erepaniko. Erekarī pika-makasaaki, kona pikamapiri piuikiniua ikapani, erekari pikamakiti apanakini imarotini ikapani. Pikaminiāri erekari apanakini apokaerekatiniī ikapani, kona papakapari piparika īki iaxiti, āri iaxiti auakari sikakiti. ² Aua kākiti ia atoko inakari. Ikamakiti atxiīti erekari, txamari ixinikakiti kona erekari. Kākiti ikara atoko inakari sikarauatakasaaki minakati matiitimoni aiko Xoteo apotiitiniātaāua, apaka mapara kākiti napiniātaā, inirekarina ikinimane itikiniri erekari ikamakitina. Inirekarina kākiti iuikinina. Ikara atoko !pitxape minakati matiitimoni pisikarauatakasaaki. Pixinikariko

ia: Ninoa apakapapekari ikinika erekari kākiti sikakiti, txamari !apakaparina erekari Teoso sikakiti. ³Pisikarauatakasaaki minakati matiitimoni, kona paunitapiri piuako pisaneremoni auakari imarotini piuako pikikomoni auakari sikakiti. ⁴Ikara atoko ininiā, pitenani imarotari pisiākiti. Piri iaxitikiri, ikinipoko atamatakari, ikitxitaiko kākiti apisatoō —itxa Xesosi.

Teoso Misākiretiko Pirena

(*Arókasi 11.2-4*)

⁵Iuaikana Xesosi sākirauata:

—Teoso himisākiretakasaaki, kona hīkamapiri kamisirienereri atoko hinini. Ninoa potxitari itiminina aiko Xoteo apotiitiniātaāua, kimaporiā apaka, Teoso imisākiretini ikapani. Ininiā ikinimane itikana. Hixinikari. Ninoa apakapapekari poxokonitxi uai ikorapokoriti auakari. Txamari ninoamoni atāo poxokonitxi !auari. ⁶Teoso pimisākiretakasaaki, pisa pitenani auiniātaā. Kona paunitapiri āti kaikotini pitekata Teoso pimisākiretakasaaki. Iuaā pimisākiretari piri matamatakoti. Iuaā iua atamataiko pite. Eereka isikaiko erekari iaxitikiri.

⁷—Teoso pimisākiretakasaaki, pimixinikariko pisākire. Maxikatiika kona pisākirauatape iuakata. Teoso sākire mauiakati xinikari Teoso kenakotiniri isākire kotxi kaiāori isākire. ⁸Ikara atoko !pikamape pimisākiretakasaakiri iua, kotxi pisākirauatini apisapanika Teoso imarotapekari pinirekakiti. ⁹Ia atoko hītxako Teoso himisākiretakasaaki:

“Airi iaxiti auakari, ate nirekari piuāka paxitiko.

¹⁰Anirekari ikini itixiti auakani auitetinii pite. Pite tixine pinirekiki kamiko atokokana, anirekari pinirekiki kamiko ikorapokoriti,

¹¹Nipokori ikiniōtika pisikauako.

¹²Pimaxinikaretariko maerekati akamakiti. Maerekati atemoni kamakori amaxinikaretini atokokana pimaxinikaretariko.

¹³Kona panikapeua aā-taerekatikomoni. Pisikakauako ate, maerekati sauaki aauakasaaki. Ikara atoko piposota, kotxi pitenanira auitetxi txaua. Pitenanira kaposotiire. Ātipirika peerekai pite. Ameē.”

Ikara atoko hītxako Teosomoni.

¹⁴—Pimaxinikaretiniāri maerekati āti kamakiti pitemoni, ininiā piri iaxiti auakari maxinikaretari maerekati pite kamakiti apaka.

¹⁵Pimamaxinikaretakaniāri maerekati āti kamakiti pitemoni, ininiā piri iaxitikiri kona maxinikaretari maerekati pite kamakiti apaka —itxa Xesosi.

Nipokori Takanapiko Pirena

¹⁶Iuaikana Xesosi sākirauata:

—Aua kākiti ia atoko inakari. Ikamakiti atxiiti erekari, txamari ixinikakiti kona erekari. Kākiti ikara atoko inakari takanapari inipokotini Teosokata isākirauatini ikapani. Txamari ninoa nirekari ikinimane imarotini itakanapinirina inipokotinina, kākiti iuikinina ikapani. Ininiā ninoa matinaniuata itoōana ikara kākiti imarotini ikapani. Atāo nitxai, ninoa apakapapekari ikinika erekari kākiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisākiretini ikapani. ¹⁷Hīte ikara atoko !hīkamape. Hinipokotini hītakanapakasaaki Teoso himisākiretini ikapani, hārokatoōtaua. Hōeretari hiāko. ¹⁸Ininiākara apanakini !imarotari hītakanapiniri hinikini. Ininiā hīri matamatakoti, iuananira itikariko hīkamakiti, apanakini

mimarotakiniti, ininiã isikaiko hīparīka īki —itxa Xesosi.

Pitiretakiti

(Arókasi 12.33-34)

¹⁹ Iuaīkana Xesosi sākirauata:

—Maxikatiīka kona papotiitapiri pitiretakiti uai auakari, kotxi atxiīti kamara nikari pitii. Atxiīti oerēkata. Atxiīti kiitiriri itirīkari iua. ²⁰ Ikara atoko kona pikamape. Papotiitariko pitiretakiti Teoso tixineē, kotxi iuaā !uari kamara. Iuaā tiitxi !oerēkata. Kona ixipoka. Kiitiriri itirīkari iua. ²¹ Pitiretakiti auiniātaā, iuaā pixinikapika. Iuaā pinirekari pauini —itxa Xesosi.

Tirikapi Itotxiākiri Pirena

(Arókasi 11.34-36)

²²—Poki tirikapi atoko itxa piito ikapani. Poki ereka inakasaaki, ipinikare aua pākixinireē, ininiã pinireēk-iti imakinika erekari. Erekarinokara patamatiniã, erekari pixinire. ²³ Txamari poki oerekasaakii maerekati pikamini, ipiã apoka pākixiniremoni. Iuasaaki tirikapi kamara na xatiki !uari pitemoni —itxa Xesosi.

Ipi Auītetxi Pirena

(Arókasi 16.13; 12.22-31)

²⁴ Iuaīkana Xesosi sākirauata:

—!Apakata kākiti parīkauatini ipi iauītena ikapani, kotxi atxiīti āti omanata, āti itireta. Atxiīti āti apokaerekata, āti inorita. Iua atokokana kākiti kona posotari iparīkauatini tiitxi ikinipoko iamotini ikapani, Teoso ikapani iparīkauatakasaaki. !Apakata piauītetiniri Teoso, txineiro piauītetakasaaki.

Teoso Nīkatiniua Ate

(Arókasi 12.22-31)

²⁵—Ininiã nitxai: Pinirekari nipokori, iāriã pakini auāki pinini ikapani. Apaka pinirekari mākatxi piito ikapani. Ikara pinirekari mākatxi xika maerekaxiniretika kona pitxape. Erekeri nipokori. Apiaerekata pixinire. Erekeri mākatxi. Apiaerekata piito. Ininiã ātipirika !pixinikapiri nipokori, mākatxi pakini pinitini. ²⁶ Kona pipīkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori !ixipoka. Teoso apia xinikai hīte. Ininiã kona pipīkarauatape. ²⁷ Kinirepa maerekaxiniretinoka pitxa? Pimaerekaxinirene !itxikitakai apikomoni āti oara pauini.

²⁸—Kinirepa maerekaxiniretinoka pitxa pimāka pinirekari xika. Aāui pixinikako. Kona aāui parīkauata. !Ikamari imāka, iuaritika aāui peereri. ²⁹ Kitxakapirīka auītetxi Saromāo inakori, iteene katiiri itxaua. Kaiāori imāka ereri, iuaritika apia ereri ikinika aāui. ³⁰ Aāui !okanani aua. Uatxa aua. Katana ikatikata iotikaāka. Iuaritika Teoso nīkatari aāui. Ininiã apiata inīkakai hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītxa.

³¹—Ininiã maerekaxiniretinoka kona hītxape. “Kīpa ninika? Kīpa niāta? Nāpa napokari mākatxi?” kona hītxape. ³² Teoso sākire mauīākani maerekaxiniretinoka itxana ikara atoko. Piri iaxiti auakari imarotari pinirekaākiti. Ininiã maerekaxiniretika !pitxape. ³³ Merepitipanika pinirekariko Teoso piauīte ininiāua. Iua nireēkiti pinitako, ininiã atāo inakarinoka pikamako. Ikara atoko inakari

pikaminiã, pite nirekakiti apaka isikaiko. ³⁴Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari —itxa Xesosi.

Apoïretxi Pirena

(*Arókasi 6.37-38, 41-42*)

7 Iuaïkana Xesosi säkirauata: —“Kona erekari pikamakiti,” kona pitxape ätimoni, ininiäkara Teoso kona txai pite: “Kona erekari pite kamakiti,” !txai, ²kotxi Teoso misiritai pimaerekani xika, äti pite misiritini atokokana. Iteene pimisiritiniäri äti imaerekani xika, iteene Teoso misiritai pite, pite maerekani xika. ³Ikara ia atoko. Pisäpiretari äti: “Aäsoaro aua poki äki,” txamari kona pimaäkatari aätxirata pite oki äki auakari. Kinirepa ikara atoko inakari pikama? ⁴!Apakata pisäkire pitarimoni: “Pauiritano aäsoaro poki äki auakari nimaktxakini.” Ikara atoko pininiã !erekari, kotxi aätxirata aua pite oki äki. ⁵Maerekati kamakarii pite, kotxi pikamakiti erekari atxiiti, txamari maerekatinoka pixinikakiti. Pimaktxakariko aätxirata pite oki äki auakari merepanika, ininiã eereka apakata patamatiniri aäsoaro pitari oki äki auakari pimaktxakini. Ikara oerekaua piteka maerekani auakasaaki, pitakanapariko piteka maerekani, ininiã eereka apakata pimoianatiniri äti iua maerekani itakanapini ikapani.

⁶—Käkiti kona sikari Teoso nakiti anäpamoni, kotxi atxiiti iua anäpa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anäpa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratari.

Iua atokokanera Teoso mapaxitakani-moni kona hīsikari Teoso nakiti, kotxi eereka imisiritari Teoso nakiti noakit-satxi irari misiritini atoko —itxa Xesosi.

Kona Hītakanapapiri Teoso Himisäkiretini

(*Arókasi 11.9-13*)

⁷ Iuaïkana Xesosi säkirauata:

—Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireäkiti. Äiri iaxitikiri pakiritiniã, iua apakapapiretai. Ia atoko itxako: “Pikanikauata. Piïroã,” itxako. ⁸Ikinika amanarauatakari apakapariko inirekakiti. Nitarauatakari apokariko initakiti. Teoso akiritakari apakapaäkapitikako. ⁹Amarini amanainiäri iri komiri, atauako kai sorokani isikatarimi? ¹⁰Ximaki amanainiäri, atauako iminikani isikari? Konapitini. Irītxi kona kamari ikara atoko inakari. ¹¹Käkiti maerekani apaka imarotari erekari isikini amaritenamoni. Äiri iaxitikiri apiata imarotari isikiniri erekari iua anaakorimoni, ninoa amanaäkasaakiri.

Äti Pitiretini Pirena

¹²—Pixinikariko. Natokopa pinirekari apanakini tiretini pite? Ininiã iua atokokana pitiretariko apanakini. Ikara atoko itxa ikinika Teoso paniätakiti aätsopaä auakari, apaka Teoso säkire säpiretakani säpiretakiti kitxakapirīka —itxa Xesosi.

Ipi Kimapori Pirena

(*Arókasi 13.24*)

¹³ Iuaïkana Xesosi säkirauata:

—Teoso tixine hiïroã axapitiri ïronakikoätaã. Mitari ïronakikoätaã sikari sari maerekani misiritikoätaã. Iua kimapori mitari, kotxi itomaneri käkiti sari iuaã. ¹⁴Axapitiri ïronakikoätaã, kimapori axapitiri. Iua apo sari auapininiika

inini tixinemoni. Iua kimaporiti axapitiki, kotxi poiäoka käkiti sari iua kimaporiti —itxa Xesosi.

Omina, Ori Pakini Pirena

(Arókasi 6.43-44)

¹⁵ Iuaikana Xesosi säkirauata:

—Erepaniko. Auapitika Teoso säkire säpiretakari, txamari iua na atäo isäpireta, kotxi isäpiretari iua säkire Teoso säkirekata. Ikoketari. Atäo inakari ikoketa maerekatikata. Erepaniko. Pamonökoniri iua. Mapara patamatakasaakiri, soti auüte atoko itxa. Äkixiniremoni äkiti atoko itxa. ¹⁶ Pimarotari käkiti ikara atoko inakari, kotxi patamatari ninoa kamakiti maerekati. Inako mina kona iritari kïpaima. Aanaia kona iritari pama. Iua atoktxikana käkiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiä maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoäka, arika inaäka. ²⁰ Ininiä aamina iriära käkiti imarotari ereka inini. Iua atokokanera käkiti imarotaäka —itxa Xesosi.

Käkiti Teoso Tixine Ìroäkani

(Arókasi 13.25-27)

²¹ Iuaikana Xesosi säkirauata:

—Apanakini txano nota: “Pite niauüte” inakani, !isapanina Teoso auütetxi ininiätaäua. Niri iaxiti auakari nireëkiti kamakarinanira sapaniko iuaä. ²² Itixi xipokini ötisaaki, itomaneri käkiti maxikatiika akiritano: “Pite aäuüte apiatakari. Papakapaua. Aöerekapekari pisäkire apanakinimoni. Aömitikapekari maerekati matamatakoti piuäkaä. Akamapekari posotiiretxi kaiäopokori,” itxanako ninoa. ²³ Txamari nitxanako:

“Kona nimarotai hïte. Hisipiniikaua. Maerekatira hïkama.” Ikara atoko nisäpiretanako ninoa, kotxi maerekati kamakani itxauana —itxa Xesosi.

Aapokotxi Kamakari

(Arókasi 6.46-49)

²⁴ Iuaikana Xesosi säkirauata:

—Nisäkire kenakotakari, nisäkire nïkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiä äparaä kipakasaaki, uini apoätakasaaki, itima apisatakasaaki, aapoko kona irika, kotxi iua tsota itakapekari otsomori. Nisäkire kenakotakani nisäkire nïkaenetakani, iua kiki kimaroreri atoko itxana.

²⁶ —Nisäkire kenakotakari, nisäkire miinïkaenetakati, käkiti miïkiteti atoko itxa. Iua kamari aapoko ikipatxiteë. ²⁷ Ikipakasaaki, uini apoätakasaaki, itima apisatakasaakiri, aapoko irika. Irika, kotxi aapokotxi !otsomori. Poiäo tsoimikari. Irikasaaki, ikinika xipoka. Ikara atoko itxa nisäkire miinïkaenetakati. Iua imarotapitikamari, txamari !ikamari. Ikara atoko nisäkire mapaxitakani —itxa Xesosi.

Xesosi Posotiire Pirena

²⁸ Xesosi oerekarauatini xipoka atoko, käkiti xinikari: “Paimatireri Xesosi. Iua imarotari atäo.” ²⁹ Ikara atoko ixinikana, kotxi Xesosi imarotapitikari Teoso säkire oerekini. Kaposotiireri iua isäkirauatakasaaki. Kaiökatsoparerini atoko kona itxa. Ninoa kona imarotari Teoso säkire Xesosi imarotini atoko.

Kiki Maere Matati

(Marko 1.40-45; Arókasi 5.12-16)

8 Xesosi ixirata iokiriitaka atoko, itomaneri käkiti sari iua tikini. ² Iuasaaki amianatakari maere matati

apoka iuamoni. Ikapotoreēkaua iua apisatoō. Itxari:

—Nimarotari pinirekiniā, erekapeka pitxīkitakano nota —itxa.

³Xesosi maātakari iua. Ininiā itxa:

—Ari, ninirekapitikari. Erekapekai — itxari.

Iuasaakipeka erekapeka itxa. ⁴Ininiā Xesosi:

—Kona ikora !pisāpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniātakiti atoko pikama. Pikaminiāri ipaniātakiti atoko, ininiā ikinimane imarotari erekapeka pinini —itxa Xesosi.

Eereka isari Xesosi paniātakiti ikamini ikapani.

Sotato Auīte Nitiri Makananitiko

(Arókasi 7.1-10)

⁵Kapanaoō sitatxiti apokasaaki, sota-toakori auīte sari Xesosimoni. Homano itxaua. Iua iteene amanaāri Xesosi:

⁶—Xesosi, ninitiri iteene amianata naapoko. Ikikinanaka. !Itipokotaika. Inikoriātsiitari —itxari Xesosi.

⁷Ininiā Xesosi:

—Iuaā nisako erekape inini ikapani — itxa Xesosi.

⁸Ininiā iua Homano:

—Konapitini. Pite auītetxi apiatakari pitxaua. Nota poiāorino. !Apakata naapoko piīroini. Pisākirenani piokanata. Ininiā erekapeka itxako ninitiri. ⁹Nimarotari ikaranani apakatako, kotxi nota kamari nota auīte paniātakiti. Apaka sotato auīte nitxaua nota. Nisākirauatakasaaki, nisotatone kamapitikari nipaniātakiti. Nota txari: “Pisa.” Iuasaakipeka isa. Nitxari āti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiā pisākirenani apakatapitika —itxari Xesosi.

¹⁰Isākire Xesosi kenakotakasaaki, iteene ipotxitari isākire. Iposo atoko itxa:

—Atāo nitxai. Isaeo auakani poiāo auikari nisākire. Ia Homano itxaua, iuaritika apiata iua auikari nota posotiire. Kona nitikapanikari kākiti Isaeo auakari auikiniri nisākire ia kiki auikiniri atoko. ¹¹Nota sāpiretai hīte, itomaneri kākiti āti uāka atokatxi pokikini tixinimoni auakani, atokatxi ereēkokini tixinimoni auakani apaka, itomaneri itixi auakani kiiniritauatoko Teoso auītetxi ininiātaāua. Ninoa nipokotako anirimanekata kitxakapirīka auakanikata. Apraāo, Isaki, Xakoo pakinikata inipokotana. ¹²Iuasaaki apanakini Apraāo apika mekaniriakori kona sari iua Teoso kiiniritemoni, kotxi ninoa !auikari Teoso sākire. Piākatximoni iokanataākanako. Iuaā itxiapatanao, akatsakatsiriūtauanako imisiritikona xika —itxa Xesosi sākire.

¹³Ininiā Xesosi txari sotatoakori auīte:

—Pisa paapokomoni. Pite auikari ni-posotiire pinitiri erekape inini ikapani. Uatxa auape pinirekakiti —itxa Xesosi.

Ininiā initiri iuasaakipeka erekape itxa.

Simāo Petro Imakiro Makananitiko

(Marko 1.29-34; Arókasi 4.38-41)

¹⁴Iposo atoko Xesosi sari Petro aapokomoni. Iuaā apokasaaki, atamataro Petro imakiro. Osirimata nopini osirikanāta. Oāpoomata. ¹⁵Ininiā Xesosi takapiotaua ouako nopini. Iuasaakipeka apoomari xipoka. Ininiā oōkitikaua. Osikakienatana ninoa.

Xesosi Makananitana Amianatakani

¹⁶Mapiāpeka inakasaaki, kākiti anikana itomaneri maerekati matamatakoti auaiūtotakini iuamoni. Isākireē omitikana maerekani matamatakoni. Imakananitana

ikinikana amianatakani. ¹⁷ Ikara atoko itxa Xesosi, kotxi inirekari Isaía sākire iaōka apokini. Kitxakapirīka Teoso sākire sāpiretakari Isaía inakori txari: Iua tiretariko amianatakari. Imaktx-akariko aamianare. Imakananitaua. Iuaka atatsiirauata ate ikapani.

Kākiti Xesosi
Imoianatinina Nireēkani

(Arókasi 9.57-62)

¹⁸ Itomaneri kākiti iuakata auakasaaki, Xesosi txari imoianariakori: —Masa ipiniāmoni —itxana.

¹⁹ Iuasaakipeka āti kaiōkatsopareri apoka Xesosimoni. Itxa:

—Koerekareri, nota iposope nisini pite nirekinimoni —itxa.

²⁰ Ininiā Xesosi:

—Atauako pinirekatari pisini notakata? Aripa aua auini iriko. Araākani auari ikoa. Txamari nota kākiti itari iaxitikiri !auari nimakiniātaā —itxa Xesosi.

²¹ Ātipekana apoka Xesosimoni. Xesosi moianari iua. Itxari:

—Niaūite, pauiritano niri nikatanapini merepanika, kotxi kiomātxipekari iua. Eereka nisa pitekata —itxari.

Iteene iua !inirekari isini Xesosikata.

²² Xesosi apakapapiretari:

—Notakata pisa uatxa. Nisākire mauīakani ipīkani atoko itxana. Ininiā pauiritana ipīkani katiniri inirimane nisākire mauīakani —itxa Xesosi.

Xesosi Iotokakiniri Ītima Pirena

(Marko 4.35-41; Arókasi 8.22-25)

²³ Iposo atoko, Xesosi imoianariako-rikata iereētaua, ĩpiriātinina ikapani.

²⁴ Mokatanitika ĩtima kataparari apoākata. Tsakati okari āparaā kanaua āki. Iuasaaki Xesosi imakanāta.

²⁵ Imoianariakori sari iuamoni.

Ōpirīkarina. Akiripoakatana:

—Apiananiri, !pauiritapiri apinini. Apinanapanoka —itxana.

²⁶ Ininiā Xesosi:

—Kinirepa hīpīkarauata? Poiāonoka hāuikari niposotiire —itxa.

Iposo atoko ōkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiā imoianariakori tsoriāta. Itxana:

—Natokopa inakaripa ia kiki? Ītima, tsakati pakini kenakotari isākire —itxana imoianariakori.

Ipi Kiki Maerekani
Matamatakoni Auaĭtotakini

(Marko 5.1-20; Arókasi 8.26-39)

²⁸ Ipinia apokasaakina Xerasa tōpamoni, itaōkitarina ipi kiki itomane maerekani matamatakoni auaĭtotakini. Akauariā auanātana. Paneenamana. Ikara xika kākiti pīkari akauarimoni isinina. ²⁹ Xesosi inaāpotakasaaki, maerekani matamatakoni ĩtoāna auakani akiripoakata:

—Xesosi, Teoso ākiri pitxaua. Kiripa pinirekaka atemoni? Pite ina uaimoni amisiritiko ōti apisapanika pimisiritiniua ikapani atxiīti? —itxarina.

³⁰ Ikara ininiātaā takote auana itomane irariakori. Ikira atoko inipokonātana. ³¹ Ininiā maerekani matamatakoni txari:

—Ate pomitikiniā, irariakorimoni piokanataua —itxarina.

³² Ininiā Xesosi:

—Hīsipeka ninoamoni —itxa.

Iuasaakipeka irariakori ĩtoā ĩroāna. Ininiā imakinikana irariakori miteēkata. Iokiriikatana. Ipoamoni isana.

Iuaā ikomokana, axāpoāta itxana.

³³ Ninoa irariakori nīkatakani miteka sitatximoni. Iuaā ikinika isāpiretana irari ipinini pirena, kiki maerekani matamatakoni auaĭtotakini pirena apaka. ³⁴ Ininiā ikinimane sitatxikini sari Xesosi itaōkitinina ikapani. Iua

itaōkitakasaakina, amanaārina ninoa sitxine itakanapini ikapani.

Mateo Pirena

(Marko 2.1-12; Arókasi 5.17-26)

9 Ininiā Xesosi iereētaua kanauā. Ikanapiriā iua auinimoni Kapanaoō sitatxitimoni. ²Ātikaka kikiakori minari matipokotakati Xesosimoni. Xesosi imarotari ninoa auikiniri iua sākire. Ininiā itxari:

—Namarite, pipoxokoniuatako. Pimaerekani makatzakapeēkaika —itxa.

³Iusaaki aua ātikaka kaiōkat-soparerini iuaā. Ninoa ākixinireē itxana:

—Kona erekari isākire. Teosonanira posotari kākiti maerekani imakatzakini —itxana ninoa.

⁴Xesosi imarotari maerekati ixinikak-itina ākixinireēna. Ininiā iua txa:

—Kinirepa hūākatari nisākire maerekati inini? ⁵Nitxari iua imaerekani nimakatzakini, txamari !himarotari imaerekani atāo nimakatzakini. “Pōkitikaua. Pitipokota,” nininiā, himarotari nisākire atāo ininiāua, kotxi hītikari. Niposotiire imaerekani nimakatzakini ikapani, niposotiire iua nōkitikini ikapanitxikana.

⁶Ininiā uatxaika noerekai hīte, Teoso iokanatano nota hītari iaxitikiri ikorapokoritimoni kākiti maerekani nimakatzakini ikapani —itxa Xesosi.

Ininiā itxari matipokotakatimoni:

—Pōkitikaua. Pisirimata pikoseka, sipe pitxa paapokomoni —itxa Xesosi.

⁷Iusaakipeka iua ōkitikaua, aapokomoni sipe itxa. ⁸Ikara inakari apanakini itikasaaki, ipīkarauatana.

—Peerekari Teoso, kotxi iua oerekari iposotiire kākitimoni —itxana.

Mateo Pirena

(Marko 2.13-17; Arókasi 5.27-32)

⁹Ikara inakari oereka atoko Xesosi sipeka. Isikasaaki, itaōkitari Mateo inakori. Auītetxiakori txineirote apotiitakari iua. Xesosi napakasaaki, iitopākanāta txineiro apakapiniāta. Ininiā Xesosi txari:

—Masa notakata pimoianatinino ikapani.

Ininiā Mateo ōkitikaua, Xesosikata sa itxa. ¹⁰Eereka Xesosi imoianariakorikata nipokota Mateo aapoko. Txineiro apotiitakani, apanakini kākiti maerekati kamakani pakini apoka Xesosikata inikinina ikapani. Kākiti kona potxitari txineiro apotiitakani, kotxi ninoa sikaro oa txineiro āti uāka auīteakorimoni. !Neerekana ninoa. ¹¹Pariseoakori itikari ninoa nipokotini, ininiā itxana Xesosi moianariakorimoni:

—Kinirepa hīauīte nipokota txineiro apotiitakanikata, maerekanikata? —itxana.

¹²Ininiā Xesosi kenakotari ninoa sākire. Itxa:

—Maerekati kamakari amianatakari atoko itxa. Ninoa nirekari erekape ininina. Kākiti mamianatakani !nirekari ipini sikakarimoni isinina. Amianatakani-noka nirekari ipini sikakarimoni isinina. Hīte !nirekari nota makatzakiniri himaerekani, kotxi hīte uākatari !aui himaerekani. ¹³Hīxinikariko ia Teoso sākire iōkatsopatakori:

Hīsikarauata notamoni. Apiaerekata hī-amonīkiniri apanakini.

Nota ina ikorapokoriti kona kākiti “atāo inakarinoka kamakarino nota” inakani ikapanini, kotxi ninoa uākatari erekarini ininiāuana, txamari kona erekana. Kākiti maerekati kamakani ikapanira nina nota uai imaerekanina itakanapinina ikapani —itxa Xesosi.

Nipokori Takanapiko Teoso Misäkiretiko İkapani

(Marko 2.18-22; Arókasi 5.33-39)

¹⁴Eereka Xoão kapatxisareri moianariakori apoka Xesosimoni. Itxana:

—Ate, pariseoakori pakini atakanapari anipokotini itokata Teoso amisäkiretini İkapani. Kinirepa pite moianariakori İtakanapari inikinina Teoso imisäkiretinina İkapani? —itxana.

¹⁵Ininiä Xesosi apakapapiretana:

—Nota kiiniri kamakari atoko nitxa. Kiki nirekiniä İtanorouatini, ikamari kiiniri. Iusaaki imoianariakori kona nirekari imatinaniuatinina, iua ninoakata auakasaaki. Ininiä kona itakanaparina inikinina Teoso imisäkiretinina İkapani. Äti öti nimaİkaäkako. Nanikaäkako ninoa mauakaniätaä. Iusaakiko itakanaparina inikinina Teoso imisäkiretinina İkapani —itxa Xesosi.

Mäkatxi Tāpanatiko Pirena

¹⁶—Kiomätxiakori kitxakapirİka auakani säkirekata kona hİkokepapi nota säkire. Ikara hikaminiä, ininiä mäkatxi kitxakari amaneriä hitāpanatini atoko itxa. Mäkatxi kitxakari amaneriä kona hitāpanatape, kotxi parokasaakiri, amaneri txikika, ininiä ikatsoräkari mäkatxi kitxakari. Ininiä mitari itsoräkare. Mäkatxi amaneri nota oerekakiti atoko. Mäkatxi kitxakari, kākiti kitxakapirİka oerekakiti atoko itxa. Hikoketiniäri kitxakapirİka oerekakiti, amaneri oerekakitikata, imakinika xipoka.

Sako Aamata Kamakori

¹⁷—Kitxakapirİka kākiti takari İäriä sako aamata kamakori äki. Iusaaki kona kākiti takari amaneri İäriä kitxakari mata äki, kotxi

İäriä txiökaätakasaaki, itiäkaäpota. Ininiä omata kitxakari tsorakitako, kotxi paikori. Kona itiäka. Ininiä İäriä katxaka. İäriä, aamata pakini xipoka. Amaneri matariä itakaäka İäriä amaneri. Ikara atoko ininiä, erekapitikari. Kona ixipokapaniko. Iua atokokana kona hikoketapiriko kiomätxi kitxakapirİka oerekakiti nota oerekakitikata —itxa Xesosi säkire.

Xoteoakori Auİte Pirena

(Marko 5.21-43; Arókasi 8.40-56)

¹⁸Xesosi säkirauatapanika, inakasaaki Xoteoakori auİte apoka iuamoni. İkapo-toreäkaua Xesosi apisatoö. Itxa:

—Namarite opinanapanoka. Masa. Piuako pitaka oa nopini, ininiä kona opina —itxari Xesosi.

¹⁹Ininiä Xesosi imoianariakorikata ökitikaua, iuakata sa itxana.

Xesosi Mäka Maätakakaro

(Mateo 9.20-22; Arókasi 8.43-48)

²⁰İsikasaakina, sito apoka iua porikimoni. Oamianare oäreka İiotokiniäro. Tosikanani oamianatini. Oäpokasaaki, omaätakari imäka imapotomatare. ²¹Oäkixinireë otxa:

—Imäka nimaätakiniä, erekape nitxako —otxa.

Ininiä otikakari imäka. ²²Iusaakipeka Xesosi kirioka, atamata itxaro:

—Namarite, kataparaxinire pitxako. Pauikari niposotiire, ininiä erekapekai —itxaro.

Iusaakipeka oa erekape.

Xäiro Äkero Ökitikiko Pirena

(Marko 5.35-43; Arókasi 8.49-56)

²³İposo atoko Xesosi sari Xoteoakori auİte aapokomoni. Iuaä apokasaaki, İiroä. Itikari sokonaki xökakani, itomaneri kākiti txiapatakani apaka.

²⁴Ininiä Xesosi:

—Mapara hīsa, kotxi oa amarini kona opina. Omakanāta —itxa Xesosi.

Ininiā ninoa napetari Xesosi:

—!Omakanāta. Opīpe. Pite !imarotari —inapetarina.

²⁵ Ikinimane mapara isikasaakina, Xesosi sari oa ātokoromoni. Imaīkaro ouako. Iuasaakipeka oōkitikaua. ²⁶ Ikara ene iaripireta iua tōpa.

Xesosi Kōsiārepeka Txīkitakari Mōsiāreti

²⁷ Iposo atoko Xesosi sipe. Iuasaaki ipi mōsiāreni sari iua tikini. Iuasaaki ninoa akiripoakata:

—Tavii apika mekanirii, piamonīkaua ate —itxana.

²⁸ Aapokotxi Xesosi iroāksaaki, ninoa iroā apaka. Ininiā Xesosi:

—Hāuikatarī nipositiniri erekapeka nitxīkitakinii hīte? —itxa Xesosi.

Ininiā ninoa:

—Ari, Apiananiri —itxana.

²⁹ Ininiā itakapiotaua ninoa oki nopini. Ininiā itxa:

—Ari, hāuikakiti iaōka itxako —itxa Xesosi.

³⁰ Iuasaakipeka ninoa kōsiārepeka itxana. Ininiā Xesosi:

—Kona hisāpiretapiri nikamakiti apanakinimoni —itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tōpa.

Masākireti Pirena

³² Ninoa kiki potorikasaaki, masākireti anikaāka Xesosimoni. Iua kona kasākireri, maerekati matamatakoti auāitotakiti xika.

³³ Iuasaaki Xesosi omitikari iua maerekati matamatakoti. Iuasaakipeka iua kiki sākiraūata. Itomaneri kākiti itikari. Iuasaakiika ninoa tikoka. Ininiā itxana:

—Ikinika Isaeo tixiniā auakani, mitxi !itikapanikari iōka atoko inakari —itxana.

³⁴ Txamari pariseoakori txari:

—Xesosi omitikari maerekati mata-matakoti Satanasi posotiireē —itxana.

Na atāo ninoa sākire.

Xesosi Ikini Sitatxiti Sini

³⁵ Ininiā Xesosi sari ikini sitatxiti tōpa. Aapokotxi auiniātaā apaka isa. Oerekarauata aiko Xoteo apotiitiniā-taāua. Isāpiretari Teoso iokanapirena erekari, Teoso auītetxi ininiāua pirena. Apaka erekapeka itxīkitakana ikinipoko amianatakani. Ikini sereti amianari aua kākitimoni. Ikinika imakananita. ³⁶ Atamatakasaakina ninoa kākitipokoni, iamoniākana ninoa, kotxi soti auīte minīkatakoni atoko itxana, kotxi !imarotarina isinimonina. Imaākauana. ³⁷ Ininiā itxari imoianariakori:

—Kaiāori kākiti iposope auikiniri nisākire, txamari !imarotarina nisākire, kotxi !ikenakotapanirina. Ninoa kiki erekari atoko itxana. Imakinika iposope iuaā. Ininiā iposope auikinirina nisākire. Txamari, poiāoka parīkauatakani aua nisākire isāpiretinina iōkapani. ³⁸ Ininiākara himisākiretariko Apiananiri iaxitikiri iokanatinina parīkauatakani iua sākire auīākani apotiitina iōkapani. Ikara atoko hītxako Teosomoni —itxa Xesosi.

Xesosi Mereēna Tosi Imoianariakori

(Marko 3.13-19; Arōkasi 6.12-16)

10 Xesosi mereēna tosi imoianariakori. Isikari iposotiire ninoamoni maerekati matamatakoti omitikinina iōkapani. Isikari iposotiire ninoamoni amianatakani imakanatinina iōkapani, ikinika amianari inokasaakina ninoa amianatakani. ² Naia imoianariakori

uāka: Merepitipanika auari Simão Petro inakorima, apaka itari Ātree inakorima. Auari Txiakoma, apaka itari Xoāoma. Ninoa Sepeteo anaakori. ³Auari Piripima, Patoromeoma, Tomeema. Apaka auari Mateoma, txineiro apotiitakari. Apaka āti Txiakoma, Aopeo ākiri. Aua Tateoma. ⁴Aua Simāoma, Homano omanatakari. Apaka aua Xotasi Isikariotxi inakorima. Iua Xesosi mikapiritakari itxaua. Ninoa Xesosi moianariakori itxauana.

**Xesosi Iokanatana
Imoianariakori Kākitimoni**

(Marko 6.7-13; Arókasi 9.1-6)

⁵Ininiā Xesosi iokanatana ninoa isākire isāpiretinina. Ia atoko otākikana:

—Kona hīsipeko Xoteo minakoni-moni, apaka Samaria tōpa sitatxitimoni kona hīsipeko. ⁶Hīsako kākiti Isaeo tixinikinimoni. Hinirimanemoni,

Xoteoakorimoni hīsako. Ninoa soti auīte pīpinanaākani atoko itxana.

⁷Hāpokasaaki kākitimoni, hītxariko:

“Teoso ikinimane auīte ininiua manapi paītiki apokako.” ⁸Himakananitanako amianatakani. Maere matati erekapeka hītxikitakako apaka. Ipikani hōkitikako.

Homitikariko maerekati matamatakoti kākiti auāitotakini. Ikara atoko hīkamako. Kona hīte ikitxitari Teoso hāpakapakiti ikapani. Ininiā ikara atokokana hītxako. Kona hinirekapiri kākiti iikitxitinii hīte, hīte sikakiti ikapani. ⁹Kona hanikapero txineiro oro kamakoro. Pirata kamakoro, ātiāo txineiro apaka, kona hanikape.

¹⁰Uatxa hianaxititakasaaki, sako mata !hanikape. Āti himāka !hanikape. Āti hīkiti mata kona hanikape. Hītsonere !hanikape. Kona himaākapeua, kotxi parīkauatakani apakapariko nipokori. Hinirekakiti apokapitikako.

¹¹—Sitatxi hāpokasaaki, hinitari kākiti Teoso sākire kenakotakani, hīte

apakapakani. Hīkaikota ninoakata. Eereka kona hīsipe āti aapokomoni hīkaikotini ikapani. ¹²Aapokotxi āki hīroākasaaki, hītxako: “Erekari Teoso sikakiti kaikotako hītekata,” hītxako.

¹³Kākiti ipoxokoniritika apakapiniāi, hītxako: “Teoso takari erekari hītemoni,” hītxako. Imanirekakaniāi, hītxariko: “Teoso kona takari erekari hītemoni.” ¹⁴Atxiīti aapokotxi hāpokasaaki, kākiti iuaātaā !apakapai. Atxiīti !nirekarina hīsākire, ininiā iuasaaki hīsipeka. Hītakanapariko iuaātaā. Hīpotorikasaaki, himakatzakari kipatxi hīkiti mataā auakari. Ininiā iuasaaki ninoa imarotari Teoso kona apokaerekatana. ¹⁵Hīxinikariko ia nisākire. Kākiti misiritiko ōti apokasaaki, ninoa apiata misiritaāka. Sotoma sitatxiti auakani, Komoha sitatxiti auakani pakini misiritaāka poiāoka —itxa Xesosi.

Misirikaretxi Pirena

(Marko 13.9-13; Arókasi 21.12-19)

¹⁶Iuaīkana Xesosi sākirauata:

—Erepaniko, pamonōkoniri. Hīte soti auīte atoko hītxa, kotxi !kaposotiirei hīte, iuaritika niokanatai kākitimoni. Ninoa ākiti atoko, ininiā erepaniko. Ininiā kimarorei hītxako. Imini kimaroreri atoko hītxako. Ininiā maerekati ninoa auakiti kona misiritai. Iuasaaki-ika kamao atoko hītxako, kotxi kamao !misiritari kākiti.

¹⁷—Erepaniko. Araōkire hītxako. Auako kākiti kinirāo anikinii maxikatīka kākiti misiritiko mereēkanimoni. Apanakini xirokaiko hīte maxikatīka aiko āki Xoteo apotiitiniātaūa. ¹⁸Nota sākire hāuikini xika hanikaākako auītetxiakorimoni himisiritiko himarotini ikapani. Ikara atoko ininiā, iuasaaki erekapitikari, kotxi hīsāpiretariko nota sākire iuaā

auakanimoni, Xoteo minakonimoni apaka.

¹⁹—Kākiti misiritiko mereēkarimoni hanikikosaaki, kona himaākapeua hīsākirauatini apisa. Teoso sikaiko hīsāpirena tīkane. ²⁰Sākiretxi hīsāpiretakiti kona hīte sākireni. Erekarī Matamatakoti, iuarako sikariko sākiretxi hīsākirauatini ikapani iusaaki.

²¹—Āti ōti hītari sikaiko hīte homanatakinimoni okinii ikapani, kotxi hīte auikari nota sākire. Iua atokokanerako irītxi sikariko imi ātimoni okiniri ikapani, kotxi imi auikari nota sākire. Auako apaka imi omanatinina iri, inoro pakini, kotxi inoro, iri pakini auikari nota sākire. Iua sikanako ātimoni okinina ikapani. ²²Ikinimane omanataiko hīte nota sākire hāuikini xika, iuaritika hāuikiniāri nisākire ātipirika, nimaktxakai himapinakani ikapani. ²³Sitatxiā hāuakasaaki, himisiritikosaaki, āti sitatxitimoni himitekako. Atāo nota sāpiretai hīte. Kona hīte xipokapaniri hīparīka ikini sitatxiti Isaeo tixini hītari iaxitikiri kanapiriini apisa —itxa Xesosi sākire.

Apiatakari, Poiāori Pakini

²⁴Iuaīkana Xesosi sākirauata:

—Apaiaōkarauatakari poiāo. Koerekareri apiata. Apaka nitiritxi poiāo. Iauīte apiata. ²⁵Apakatapitika apaiaōkarauatakari koerekareri imarotakiti iaōka imarotini. Iua atokokanera nitiritxi iua auīte atoko inini. Apanakini akiritano nota “Peosepoo,” Satanasi inakori. Ininiā itakauākatai hīte hīuāka apia maerekati, kotxi nota anaakorirai hīte —itxa Xesosi.

Kipatakori !Auari

(Arókasi 12.1-3)

²⁶—Ininiā kona !hīpīkapena ninoa maerekati kamakani, kotxi nota kanapiriākasaaki, kona kipatakori auapanika. Ikinika imarotaākako. ²⁷Hītemoni ikanōka nimaasakapiretakiti, ikara nisākire hākiriopokatako aapokotxi nopini imakinika kākiti imarotini ikapani. Uatxa hītemoninani nisāpiretakiti āti ōti ikinimanemoni hīsāpiretako.

Kīpa Apīka?

(Arókasi 12.4-7)

²⁸Kona hīpīkapena hīito okakani, kotxi !posotarina hīxinire okinina. Hīpīkariko Teoso, kotxi iuanokara posotari iokanatinii hīte, hīito, hīxinire pakini maerekani misiritikoātaā. Iuara hīpīkako.

²⁹—Ipi kotipiriki īki poiāo, ātika txineiro otanoka. Iuaritika hīri iaxiti auakari taretana ninoa. Imauiritakaniāri, kona ātika ipina. ³⁰Kīpakinipa piāko pikiiā auakari aua? !Pimarotari. Teoso imarotapitikari, kotxi iteene inīkatai, ininiākara !hīpīkarauatape. ³¹Kotipiriki īki poiāo, iuaritika Teoso taretari kotipiriki. Ininiākara kona hīpīkarauatape. Kaiāopokori kotipiriki auiniā, iuaritika hīte īki apiata, ininiā Teoso taretapitikai hīte —itxa Xesosi.

Xesosi Tiretakani, Xesosi Manirekakani Pakini

(Arókasi 12.8-9)

³²Xesosi sākirauatapanika:

—Apanakini apisatoō hīsāpiretiniāri: “Xesosi nakiti nitxaua nota,” iua atokokanerako nitxariko niri iaxiti auakari apisatoō: “Nota nakitipitikara iua,” nitxako —itxa Xesosi. ³³Hīsāpiretiniāri apanakini: “Xesosi nakiti !nitxaua nota,” iusaaki

nisāpiretari niri iaxiti auakari: “Kona nota nakitini iua.”

Pinirekakiti Pirena

(*Marko 8.34-35; Arókasi 12.49-53; 14.26-27*)

³⁴—Kona hīxinikapiri nota ikorapokoriti napokini neenamatzixipokini ikapani. Kotxi kākiti auikari nisākire, ininiā eereka apanakini omanatana. Kona neenamatzixipokapanika, kotxi nota minari niposotiire maerekati nixipokini ikapani. ³⁵Nota apokini xika imi omanatana iri, inoro pakini, kotxi ninoa auikari nisākire. Tiīrotxi omanataro oimakiro, kotxi āto omanatano nota, āto tiretano nota. ³⁶Iuasaaki pinirimane pimokaiakarinikarako itxauanako.

³⁷—Poiāoka pitiretiniāno nota, apiata pitiretiniāna pinoro, piri pakini, kona erekari nimoianari pininiua. Apiata pitiretiniāna pamariteakori, kona erekari nimoianari pininiua. ³⁸Nota kinirāo moianataka hinakasaaki, notakata hīsa. Himamīteenekakanisaakiri himisiritiko nota ikapani, ininiā lapakata himoianatinino. ³⁹—Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata —itxa Xesosi.

Hīte Apakapakani Pirena

(*Marko 9.41*)

⁴⁰Iuaīkana Xesosi sākirauata:

—Kākiti hīte apakapakani, apakapano nota apaka. Nota apakapakari apakapari nota iokanatakari apaka. ⁴¹Papakapiniāri Teoso sākire sāpiretakari, kotxi iua sāpiretari Teoso sākire, ininiā papakapari erekari Teoso sikakiti iua apakapakiti iaōka. Papakapiniāri atāo inakari kamakari, kotxi iua kamari atāo inakari, ininiā papakapari erekari Teoso sikak-

iti iua apakapakiti iaōka. ⁴²Pisikiniāri āparaā nimoianari poiāorimoni iātini ikapani, kotxi nimoianari itxaua, Teoso iikitxitapitikai pite —itxa Xesosi.

Xoāo Kapatxisareri Tikini Sikani

(*Arókasi 7.18-35*)

11 Xesosi moianariakori tosi pakini isākire oerekini xipoka atoko, Xesosi sipe. Isa āti sitatxitimoni, eereka āti sitatxitimoni Kariréia tōpa itxaāpota oekarauatakasaaki. Teoso sākire isāpiretari kākiti.

²Xoāo kapatxisareri, kateia āki auakasaaki, ikenakoenetari Xesosi kamakiti, ininiā iokanataro ipi imoianariakori Xesosimonikari.

³Ininiā Xoāo txari imoianariakori:

—Hīpimaāri Xesosi: “Pitekani iaxiti ikari, kākiti iātapakiti pitxataua? Ātikani atxiīti aiātapakiti pitxataua?” hītxariko —itxa Xoāo.

Ininiā ninoa sipe. Ipimaārina Xesosi Xoāo sākire iaōka. ⁴Ininiā Xesosi apakapapiretana:

—Hīkanapiriā Xoāomoni. Hīsāpiretari hīkenakotakiti, hātamatakiti pakini. ⁵Hīte atamatapekari mōsiāreti kōsiārepeka inini. Matīpokotakati tīpokotapeka. Hātamatapekari maere matati erekapeka inini. Makenakokiti kakenakokipeka. Ipīkani ōkitikapekaua. Teoso iokanapirena erekari sāpiretapekaika minakati mauapikinitinimoni. Pakini hātamatapeka. Ikara hīsāpiretako Xoāomoni. ⁶Kākiti iteene auikiniāri nota sākire, Teoso takari erekari iuamoni. Ikara nisākire hīsāpiretari Xoāo —itxa Xesosi.

⁷Ininiā ninoa sipe. Isikasaakina, Xesosi sāpiretari Xoāo pirena itomaneri kākitimoni. Ia atoko itxa:

—Kīpa ikai hīte, Xoāo kapatxisarerimoni hīsikasaaki, āparaā makīpakaniātaā iua auakasaaki? Hīte sari iua-

moni, kotxi ātixika isākire aua. Teoso sākirenoka isāpireta. Ītima āpokaxitikasaaki, katsotati ipinimoni ipapīka, iuaikana ipinimoni ipapīka inini atoko kākiti, kotxi isākire kita āti, isākire uatxa ātiāo, isākire katana iuaikana ātiāo, itx-āāpota isākire. Ikara atoko !itxa Xoāo.

⁸—Kipa ikai hīte Xoāomoni hīsikasaaki? Hīte sari iuamoni, kotxi !nirekari tiitxi, txineiro pakini. !Kakaroneri imāka, kotxi !ikaikota auītetxi aapoko. Auītetxi aapoko peereri mākatxi.

⁹—Kipa ikai hīte iuamoni hīsikasaaki? Hīte sari iuamoni, kotxi iua Teoso sākire sāpiretakari itxaua. Atāopitika Teoso sākire sāpiretakari itxaua. Iua Xoāo Teoso sākire sāpiretakari apiari.

¹⁰—Teoso sākire iōkatsopatakori kitxakapirīka txari:

Niokanatariko nisākire sāpiretakari kāk-
itimoni pite apisa, papokini isāpire-
tini ikapani, kākiti iposope inini
ikapani.

¹¹ Atāopitikara. Ikinimane sauaki Xoāo kapatxisareri apiatakari itxaua. Iuaritika Teoso auītetakari poiāori inakari apia imarotariko Teoso kamakiti tīkane. ¹² Xoāo auakasaaki Teoso auītetani misiritaāka, kotxi kākiti kaneenamari naiatana ninoa. Ninoa nirekari ixipokinirina Teoso auītetxi ininiua ikorapokoriti. Uatxapiima auapanika ikara atoko inakari. ¹³ Xoāo apokini apisapanika, ikinika Teoso sākire sāpiretakani, ikinika Teoso sākire iōkatsopatakani, sāpiretari Teoso auītetxi ininiua pirena. Xoāo apokasaaki, iua apaka oerekari Teoso auītetxi ininiua pirena.

¹⁴—Kitxakapirīka Teoso sākire sāpire-
takani sāpiretaua:

Āti Teoso sākire sāpiretakari Erīasi atoko
inakari apokako,
itxana. Iuakara Xoāo. Hāuikiniāri
nisākire, hāuikariko iuara apokapeka.

¹⁵ Kakenakokii, ininiā hīkenakotariko
nisākire —itxa Xesosi.

¹⁶—Kanatokopa itxa kākiti ikorasaaki
auakani? Amarini sarauatini atoko
itxana ikorasaaki auakani. Ninoa
amarini topāka tiitxi amotikoātaā.
Apanakini amarini txitana apanakini
amarini. Itxana: ¹⁷“Ate xikarauata hīte
serenini ikapani, txamari !hiserena.
Kākiti pikasaaki xikariti axikareta,
txamari !hītxiapata.” Ninoa amarini
sarauatini atoko itxana ikorasaaki
auakani, ¹⁸ kotxi Xoāo kapatxisareri
apoka ikorapokoriti. Itakanapari
inikini Teoso imisākiretini ikapani.
!Īātari ovaā. Iuaritika hīte txari:
“Maerekati matamatakoti auāitotari
Xoāo,” hītxari. ¹⁹ Nota hītari iaxitikiri
apoka ikorapokoriti. !Nitakanapari
ninikini. Ikiniōtika ninipokota. Niātari
ovaā. Ininiā hīte txari: “Iua kiki
ixori. Poātakari iua. Iua moianatana
txineiro apakapakani, kākiti maerekati
kamakani,” himisākirepirenātano.
Kimaroreri atāo inakari kamari
erekarinani. Kākiti atamatakasaakiri
ikamakiti, imarotari kimaroreri atāo
inakari ininiua —itxa Xesosi.

Sitatxi Auakani Teoso
Sākire Mauiākani
(*Arókasi 10.13-15*)

²⁰ Ininiā Xesosi pinitana Korasi
sitatxiti auakani, Petsáita sitatxiti
auakani pakini, kotxi kaiāopokori
iposotiire ikamapeka iuaātaā, iuaritika
kona itakanaparina maerekati. ²¹ Xesosi
txana ninoa:

—Kākiti Korasi auakani
himsiritaākako. Kākiti Petsáita
auakani hīte apaka misiritaākako.
Kitxakapirīka Txiro, Sitoō pakini
sitatxitikini kamari maerekati, ininiā
Teoso xipokana ninoa arikatxiā. Ninoa
atamataākamariko nota posotiire hīte
atamatiniri atokokana, ininiā ninoa

mākatamariko sako mata. Itakamariko atapani iitoāna. Ikara atoko ininiā, ninoa oerekari maerekati itakanapinina. ²²Nisāpiretai hīte ia: “Kākiti misiritiko ōtisaaki, Txirokini, Sitoōkini pakini misiritaāka poiāo. Hīte apiata.” ²³Hīte Kapanaoōkinipekana, Teoso ākiri aua hītekata. Hīte itikapekari ito posotiiretxi iaxitikiri. Txamari hōkakatapeēkako maerekani misiritikoātaā. Nikamakiti hītemoni Sotoma auakani sauaki nikamaākamako, kona ninoa xipokamako. Auapanikamanako. ²⁴Ininiā nitxai hīte: “Himisiritikosaaki, apiata himisiritaāka. Poiāoka Sotomakini misiritaāka,” —itxa Xesosi.

Teoso Imarore Apakapakani

(Arókasi 10.21-22)

²⁵Iuasaaki Xesosi misākiretari iri:

—Niri, pitixine auakani auīte pitxaua. Uai ikini itixiti auakani auīte apaka pitxaua. Peerekai pite, kotxi na poerekari pimarore kākiti kimarorerinimoni, iuikakanimoni. Pite oerekari pimarore kākiti poiāorinimoni, miuikakanimoni. ²⁶Ari niri, ikara atoko pinireka. Ikara atoko papokaerekata —itxari iri.

²⁷Eereka imisākiretari kākiti:

—Niri sikapekano ikinika. Kākiti !imarotano nota Teoso ākiri nininiu. Nirinokara atāo imarotano nota. Apaka kākiti na atāo imarotari niri. Notanokara imarotari niri, kotxi iua ākiri nitxaua. Kākiti nirekiniāri imarotini niri, nota oerekari niri iuamoni.

²⁸—Iteene minari atoko itxa himaerekani. Hinireka hītakanapiniri iua, txama !hīposota hītakanapiniri. Hīsāpakiniā himaerekani xika, hina notamoni hītomatini ikapani. Iuasaaki nimakatzakari himaerekani. ²⁹Hītakariko nipaniātakiti hākixinireē. Hāpaiaōkariko nota pirena.

Erekapitikari hāpaiaōkiniri ninirekakiti, kotxi kona kaneenamano. Kona nota napetari kākiti. Niuikiniua !auari. Ikara atoko ininiā, hīxinire tomatapitika. ³⁰Hīposotapitikari nipaniātakiti hīkamini, notakata hīparikauatiniā. Nipaniātakiti !kasāpaniri. Kona kamimari. Peerekari nipaniātakiti —itxa Xesosi.

Tomatiko Ōti Pirena

(Marko 2.23-28; Arókasi 6.1-5)

12 Mapaōti atoko tomatiko ōtisaaki, Xesosi imoianariakorikata napaāpota triko takikoātaā. Inatxitana. Inapaāpotakasaakina, imakatzakarona triko iki mapaki inikinirona ikapani. ²Pariseoakori ikara itikasaaki, itxarina Xesosi:

—Patamata. Pimoianariakori kamari ate mauritakiniti. Ninoa parīkauata tomatiko ōtisaaki —itxana.

³Ininiā Xesosi:

—Atxiīti kona hātatsopatapanikari Taviini kamakiti imoianariakorikata kitxakapirīka inatxitakasaakina?

⁴Iua iroā Teoso misākiretikoātaā. Imoianariakorikata inikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵Atxiīti kona hātatsopatapanikari Moisesini iōkatsopatakiti. Iua auiritari sasetotxi parīkauatini tomatiko ōtisaaki, Teoso misākiretiko aikotiā. Iuasaaki ninoa !likamari maerekati, kotxi iparīkauatana Teoso misākiretiko aikotiā. ⁶Atāo nisāpiretai, hīte paniātakiti poiāori. Nota paniātakiti apiari. ⁷Teoso sākire iteene hāuikasaaki, kona hāpoitana kākiti maxikatīika, kotxi Teoso sākire txari:

Nota nirekari apanakini hītiretini. Pimatiretakanisaakiri āti, !apakata pisikarauatini notamoni. Iuasaaki kona ninirekari pisikakiti, itxa Teoso kitxakapirika.

⁸—Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

Motikauakotakari Pirena

(Marko 3.1-6; Arókasi 6.6-11)

⁹Xesosi ikara inaāka atoko, isa aiko Xoteoakori apotiitiniātaāua. ¹⁰Iuaā aua kiki motikauakotakari. Iuaā aua apaka pariseoakori Xesosi kinirāo apoītaka inakani tomatiko ōtisaaki iparikauatini xika. Ninoa amanaāri Xesosi:

—Atauako apakata atxiīti tomatiko ōtisaaki, erekape pitxikitakiniri kākiti? —itxarina.

¹¹Ininiā Xesosi pimaāna:

—Hīpira soti auīte tomatiko ōtisaaki aariko āki irikiniā, himakatzakatari? Atāopitikara Teoso sākire auiritapitikari kākiti makatzakiniri ipira tomatiko ōtisaaki. ¹²Soti auīte poiāori, kākiti apiari. Ininiā Teoso sākire auiritapitikari tomatiko ōti erekape nitxikitakiniri kākiti —itxa Xesosi.

¹³Ininiā itxari kiki motikauakotakarimoni:

—Poerekauakotauako —itxa.

Oerekauakotakasaakiaua, erekapeka itxa, ipini uako atokopeka itxa.

¹⁴Iuasaaki pariseoakori sipeka atoko, ninoakakarika misākiretakauana:

—Natokopa atxatari Xesosi aōkini? —itxakakana.

Nitiritxi Teoso Mereēkiti

¹⁵Xesosi imarotakasaakiri ninoa okaenetiniri iua, iuasaakipeka Xesosi sipeka. Itomaneri kākiti sa iuakata. Ikinika amianatakani

erekapeka itxikitaka. ¹⁶Xesosi !auiritana isāpiretinirina ikamakiti apanakinimoni. ¹⁷Ikara atoko itxa Xesosi, Teoso sākire sāpiretakari Isaía inakori sāpiretakiti iaōka apokini ikapani. Ia atoko itxa Teoso Isaíamoni:

¹⁸Ia ninitiri nimereēkiti. Ia nitiretakiti napokaerekatakiti. Nota sikariko Erekarī Matamatakoti iuamoni. Iua sāpiretariko nota sākire Xoteo minakonimoni.

¹⁹!Katapasākireri ahoa kimaporiti itiniāpo isākirauatakasaaki. !Ineenamauata. !Itxitakaka apanakinikata kākiti napiniātaā.

²⁰Apanakini Teoso sākire auīākani oiōkapeta ākixinireēna. Itapara !auari. Ninoa aanaia katxitoākori atoko itxana. Iuaritika kona imapirinikari iua aanaia katxitoākori. Iua atokokana kona ixipokari iua sākire auīākani mataparani. Itiretana. Apanakini Teoso sākire auīākani, kona iteene auikari Teoso sākire. Ininiā ninoa tirikapi iopinikare xapitikiri atoko itxana, iuaritika kona iua oakari. Iua atokokana kona ixipokana Teoso sākire auīākani. Ikamaāpotari erekari, erekarinoka kāiatini ikapani.

²¹Xoteo minakanuia auikariko iua sākire.

Itxa Isaía sāpirena kitxakapirika.

Maerekani Matamatakoni Omitikiko

(Marko 3.20-30; Arókasi 11.14-23)

²²Iuasaaki kākiti anikari kiki maerekati matamatakoti auāitotakiti Xesosimoni. !Isākirauata. Mōsiāreti itxaua iua, maerekati matamatakoti xika. Xesosi erekapeka txikitakari iua. Iuasaaki kōsiārepeka, kasākirepeka itxa. ²³Iuasaaki kaiāopokori kākiti iuaā tsorikaāta. Ininiā ipimaākakauana:

—Atauako ia kiki aāuīte Taviini apika mekanirikani? Atxiīti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati mata-matakoti aūite Peosepoo inakori sikari iposotiire Xesosimoni maerekati matamatakoti omitikini ikapani —itxana pariseoakori.

²⁵ Xesosi imarotari ikara ixinikakitina. Ininiā itxa Xesosi:

—Kākiti tixine auakani ninoakakarika inaiatakakiniāuana, ixipokakakauana. Iarikapenako. Iua atokokana kākiti aapokoā auakani inaiatakakiniāuana, ixipokakakauanako. ²⁶ Iua atokokana Satanasi nitiriakori, ninoakakarika inaiatakakiniāuana, ixipokako Satanasi tapara. ²⁷ Hīte sākire, Peosepoo sikari iposotiire notamoni maerekati matamatakoti nomitikini ikapani. Ininiā nota pimaāi: “Kipa sikari posotiiretxi hīte moianariakorimoni, maerekati matamatakoti omitikinina ikapani?” Himoianariakori sāpiretai: “Teosonoka sikari posotiiretxi maerekati matamatakoti omitikakanimoni.”

²⁸ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hītemoni hīaūite inini ikapani.

²⁹ —Kiki pataparari iua aapoko auiniā, kona kiītiriri iroā itiriuatini ikapani. Kiītiriri iaxirikiniāri iua kiki pataparari, iusaakiika apakata iītirikiniri iti.

³⁰ —Notakata maparīkauatakani omanatano nota. Imamoianatakaniāno, inirekari nipaṛika ixipokini.

³¹ —Ininiā nisāpiretai. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. Txamari Erekarī Matamatakoti misākirepiretakari maerekani makatxakiko kona auari. ³² Kākiti misākirepiretiniāno nota

hītari iaxitikiri, eereka amanainiāri Teoso ikara imaerekani imakatxakini, ininiā Teoso makatxakapitikari. Kākiti misākirepiretiniāri Erekarī Matamatakoti, !kimakatxakikori ikara maerekati ikamakiti —itxa Xesosi.

Aamina Iri Pirena

(*Arókasi 6.43-45*)

³³ Ininiā Xesosi sākirauata iuaīkana pariseoakorimoni:

—Aamina atoko hītxa. Aamina erekari ininiā, iri erekari apaka. Aamina maerekati ininiā, iri apaka !erekari. Patamatiniāri amātiiri, pimarotari imina. ³⁴ Nimarotai hīte. Imini katiiri atoko hītxa hīte. Hīte maerekati kamakanii. Ininiā !hīposotari erekari hīsāpiretini, kotxi hākixinire !erekari. Hinamaā hīsāpiretakiti hākixinireē potoriākari itxaua. ³⁵ Kākiti erekari ininiā, ekekarinoka isākire, kotxi iua ākixinireē ekekarinoka aua. Kākiti maerekati ininiā, isākire maerekati apaka, kotxi maerekinoka auari iua ākixinireē. ³⁶ Atāo nisāpiretai hīte. Ikinipoko kākiti sākire Teoso atamakaerekata xipokatxi ōtisaaki. Iusaaki Teoso mereēri kākiti misiritiko. Maxikatiīka hīsāpiretakiti kona apakata. Kona iua potxitari. Ininiā iusaaki iua pimaāi: “Kinirepa ikara atoko pisākire?” itxako. ³⁷ Pisākire ereka ininiā, ixika lauari Teoso misiritinii. Pisākire maerekati ininiā, pisākire maerekati xika Teoso misiritai —itxa Xesosi.

Pariseoakori Nirekari Xesosi Oerekiniri Iposotiire

(*Marko 8.11-12; Arókasi 11.29-32*)

³⁸ Ātikaka kaiōkatsoparerini, pariseoakori pakini txari:

—Koerekareri, takaōtxikari Teoso posotiire poerekaua ate, aātamatiniri ikapani, Teoso iokanatinii ikorapokoriti aimarotini ikapani —itxarina.

³⁹Xesosi apakapapiretana:

—Käkiti uatxarini !erekana. Itakanaparina Teoso. Hïte nirekari noerekini Teoso takaõtxikare, iposotiire. Konapitini. Kona noerekai hïte. Kitxakapirika Teoso säkire säpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, uaiäkana ikamapanikariko. Iua posotiiretxi Teoso takaõtxikare itxapanikaua hïte ikapani. Iua takaõtxikarinoka Teoso takaõtxikare hïte ikapani. ⁴⁰Xonasi kaikota ximaki mitari tikako äki ipi äti pakini õti. Iua atokokanerako hïtari iaxitikiri napako ipi äti pakini õti ipikani auiniätaä.

⁴¹—Itixi xipokini õtisaaki, käkiti Nïnivi sitatxiti auakani säkirauatapitikako. Ninoa txai hïte: “Kona erekai hïte, kotxi !hïtakanapari himaerekani. Ate takanapari amaerekani Xonasi säkire akenakotakasaaki,” itxanako ninoa. Uatxa uai aua hïte apisatoõ Xonasi apiatakari. Imisäkiretai hïte, iuaritika kona !hïtakanapari himaerekani.

⁴²—Xipokatxi õtisaaki, sito Sapaa auakani auïte säkirauatapitikako. Oa õtakoxiti auakaro, iuaritika osari Saromäomoni imatire okenakotini ikapani. Uatxa apopeka Saromäo apiatakari, iuaritika hïte !auikari nota säkire —itxa Xesosi.

Maerekati Matamatakoti Kanapiriini Pirena

(*Arókasi 11.24-26*)

⁴³Iuaikana Xesosi säkirauata:

—Maerekati matamatakoti kiki auaïtotakiti takanapakasaakiri iua kiki, iua maerekati matamatakoti saãpota äparaä makipakaniätaä, ikaikotiniätaä initini ikapani, txamari !apokari. ⁴⁴Ininiä itxa: “Nikanapiriäpiriko mitxi nauinimoni nipotorikinimonikari,”

itxa iua maerekati matamatakoti. Ininiä ikanapiriä. Apokasaaki, äti iuaä auakari !auari. Oeretapeëkaika. Iposope äti auini ikapani. ⁴⁵Ininiä apana apikomoni setxi pakini maerekani matamatakoni apia maerekanitakani. Imakinikana aua iua kiki itoä. Ininiä iua kiki mitxi poiäoka imaerekani, eereka apia maerekanita. Ikara atoko itxako käkiti uatxarini maerekani —itxa Xesosi.

Xesosi Inoro, Itariakori Pakini

(*Marko 3.31-35; Arókasi 8.19-21*)

⁴⁶Xesosi säkirauata itomane käkiti-moni, inakasaaki oãpoka inoro, itariakorikata. Iporikiti auana. Ipikapiretarina.

⁴⁷Ininiä äti txari Xesosi:

—Pinoro, pitariakori ikiraä iporikiti auana. Inirekakarina imisäkiretini pite —itxa.

⁴⁸Ininiä Xesosi:

—Keropa ninoro? Kiripa nitariakori? —itxa Xesosi.

⁴⁹Ininiä imioakari imoianariakori:

—Hätamata. Uai aua ninoro, nitariakori pakini. ⁵⁰Niri iaxitikiri nirekaäkiti kamakanira, ninoara nitariakori, nitaroakoro, ninoro txaua —itxa Xesosi.

Katakareri Pirena

(*Marko 4.1-9; Arókasi 8.4-8*)

13 Iua õtisaaki Xesosi takanapari iua aapokotxi. Ipoa tiniä isa. Iuaä ipoa tiniä iitopäka. ²Iuaä auana itomaneri käkiti. Apotiitauana iua takote. Ininiä kanaua äki iereëtaua, topäka itxa oerekarauatini ikapani. Ninoa kaikota imiriï. ³Ininiä itori säpirenatxi atão inakari oerekiko isäpiretana ninoa Teoso imarotnina ikapani.

Ia atoko itxa:

—Katakareri potorika itakarauatini ikapani. ⁴Takari iki itakaãpotakasaaki, okaãpotakasaaki, ätikaka irika kimapori tiniäpo. Kotipiriki apoka. Inikari

imakinika. ⁵Apanakini irika kai auiniätaä. Poiäoka kipatxi auari, ininiä mokatanitika ipitxaka. ⁶Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷Apanakinipekana irika aanaia auiniätaä. Ininiä aanaia aneë takari takote. Aäpitsa iapinokari takari, oka txari. ⁸Apanakinipekana irika kipatxi erekariätaä. Ininiä iriuata. Ätiätaä äti takari iriuata seï oki pakini. Ätiätaä takari iriuata sesëta oki pakini. Ätiätaä äti takari iriuata trïta oki pakini. ⁹Kakenakokii, ininiä hïkenakotariko nisäkire —itxa Xesosi.

**Käkiti Mimarotakiniti
Xesosi Säpiretini Pirena**

(Marko 4.10-12; Arókasi 8.9-10)

¹⁰Imoianariakori apoka Xesosimoni. Ipimaärina:

—Kinirepa säpirenatxi atão inakari oerekiko pisäpiretari käkiti? —itxarina.

¹¹Ininiä Xesosi:

—Käkiti xinikiniäri Teoso auütetxi ininiäua pirena, auapitika kaiäopokori ninoa mimarotakiniti, kotxi Teoso kona oerekana ninoa. Teoso oerekai hïte ninoa mimarotakiniti. ¹²Teoso säkire auakiti, iua säkire kïpitakari, Teoso sikari apikomoni imaroretxi iuamoni. Txamari Teoso säkire kenakotakari, isäkire makïpitakati, imarore xapiti iuamoni auakari makatxakaäkako.

¹³Nisäkirauatakasaaki käkitikata, nisäpiretana säpirenatxi atão inakari oerekiko, kotxi kokiri käkiti, iuaritika !atamatarari Teoso kamakiti. Kakenakokiri käkiti, iuaritika !imarotari Teoso säkire. ¹⁴Ininiä apokapeka Isaia säkire kitxakapirïka, kotxi iua säpiretari Teoso säkire:

Hïkenakotapiikamari nisäkire, iuaritika !himarotari. Hïtikapiikamari nika-makiti, iuaritika !himarotari,

¹⁵kotxi !hinirekari himarotiniiri atão inakari. !Hinirekaikari nisäkire hïkenakotini. !Hinirekaikari nikamakiti hätamatini. Hinirekaäka-mariko, hätamatamariko nikamakiti. Hinirekaäka-mariko, hïkenakotamariko nisäkire. Hinirekaäkamariko, himarotamariko nisäkire. Hïkanapirïaäkamako notamoni, nimakatzakamariko himaerekani, itxa Teoso.

¹⁶—Hïtepekana, Teoso sikari erekari hïtemoni, kotxi hïki atamatapitikari iua kamakiti. Hïkenakoki kenakotapitikari iua säkire. ¹⁷Atão nisäpiretai. Itomaneri Teoso säkire säpiretakani, apanakini kiki atão inakari kamakani pakini kitxakapirïka nirekari atamatiniri hïte atamatakiti, txamari kona atamatarina. Inirekarina ikenakotininirina hïte kenakotakiti, txamari kona ikenakotarina —itxa Xesosi.

Katakareri Pirena Oerekiko

(Marko 4.13-20; Arókasi 8.11-15)

¹⁸Xesosi säkirauanätapanika:

—Hïtakaötxikari ikara säpirenatxi atão inakari oerekiko, katakareri pirena. Noerekai ikara. ¹⁹Käkiti kenakotakasaakiri Teoso auütetxi ininiua pirena, imimarotakaniäri ikenakotakiti, kimapori käkiti katxaratakiti ikotaxiti atoko itxa iua äkixinire, kotxi Satanasi apoka iuamoni. Imakatzakari Teoso säkire iua äkixinireë apokakari. Teoso säkire takariki atoko itxa.

²⁰—Takariki kai auiniätaä iriäkari, Teoso säkire ipoxokoniritika apakapakari atoko itxa. ²¹Itxama kona okanani aua, kotxi kona kakotsari. Omanatiko inakasaaki, inapetiko inakasaaki, Teoso säkire auikini xika, itakanapari Teoso säkire auikini.

²²—Āti kākityepkana kenakotari Teoso sākire, txamari ixinikapikari tiitxi, nipokori, iparīka pakini. Ikinipoko ixinikapika, ininiā maerekaxiniretinoka itxa. Txineiro ipotxitini xika !nirekaikari Teoso sākire. Takariki aanaia auiniātaā iriākari atoko itxa iua. Takari mariti atoko itxa iua ākixinire.

²³—Āti kākityepkana ikenakotakasaakiri Teoso sākire, atāo iua auikari. Iua ākixinire kipatxi erekari atoko itxa. Takari mininiua atoko, iua kākiti minari atxiiti seī pakini kākiti Teosomoni isākire auikinina ikapani. Atxiiti iminari sesēta pakini kākiti. Atxiiti iminari trīta pakini kākiti Teosomoni isākire auikinina ikapani —itxa Xesosi.

Katsotati Ahoisi Atoko Inakaro

²⁴ Iuaikana Xesosi sāpiretari āti sāpirenatxi atāo inakari oerekiko. Ininiā ia atoko itxa:

—Teoso auītetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteē. ²⁵ Āti ikanōkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ikorape itxa. ²⁶ Takari aneēka atoko, oriuata. Iuasaaki kākiti imarotapekari katsotati ahoisi atoko inakaro auapeka. Kona otxa. ²⁷ Ininiā katakareri nitiriakori apoka iauītemonina. “Auītetxi, pite takaro takariki erekaro. Nanipa oina katsotati?” itxana ninoa.

²⁸ —“Amokaiakari takari,” itxa.

—“Pinirekatari amaporokiniri?” itxana initiriakori.

²⁹ —“Kona. Katsotati himaporokiniā, atxiiti himaporokaro nitakare apaka. ³⁰ Hītakanapari imakinika aneinina ikapani. Oamikosaakirako, omaktxakaāka. Ininiā iuasaakiko

nipaniātaiko hīte: ‘Merepanika himaktxakaroko katsotati. Hāpotiitaro. Xaminamoni oka inaākako. Iposo atoko hāpotiitari ahoisi. Hitakari nikiena nīkatiko aikoti āki.’”

Mostata Pirena

(*Marko 4.30-32; Arókasi 13.18-19*)

³¹ Iuaikana Xesosi oerekari āti sāpirenatxi atāo inakari oerekiko. Ininiā ia atoko itxa:

—Teoso auītetxi ininiua, kiki takiniro mostata iki ikikioteē atoko itxa. ³² Mostata iki axapitiki. Apanakini takariki apiata, iuaritika oaneēka atoko amananiikaro. Aamina otxaua. Ininiā kotipiriki ina. Ikamari ikoa okatiā —itxa Xesosi.

Tirekakari Pani

(*Arókasi 13.20-21*)

³³ Xesosi iuaikana sāpiretari sāpirenatxi atāo inakari oerekiko. Ininiā ia atoko itxa Xesosi:

—Teoso auītetxi ininiātaāua ikorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiāopokori triko panikata, āparaākata. Eereka ikinika ipe tirekaāpota otxa.

Sākiretxi Atāo Inakari Oerekiko

(*Marko 4.33-34*)

³⁴ Xesosi sākirauatakasaaki kākitekata, isāpiretari sāpirenatxi atāo inakari oerekiko. Ikara sāpirenatxinokara isāpiretari kākiti. ³⁵ Ininiā kitxakapirīka Teoso sākire sāpiretakari sāpiretakiti apokapeka, kotxi iua txari:

Nisākirauatakasaaki kākitekata, nisāpiretari sāpirenatxi atāo inakari oerekiko. Itixi kamikosaakipanika aua kākiti mimarotakiniti. Ikara noerekako kākitimoni, itxa Teoso sākire.

Xesosi Sāpiretari Katsotati Pirena

³⁶Eereka Xesosi takanapana ninoa kākitipokoni. Iiroā aapokotxi. Imoianariakori apoka iuamoni. Itxana:

—Poerekaua ate ikara sāpirenatxi atāo inakari oerekiko, katsotati pirena, mixikanani sāsāpiretakiti. Ate !imarotari —itxana.

³⁷Ininiā Xesosi:

—Hītari iaxitikiri, iua erekari oki taākari itxaua. ³⁸Itixi iua kikio atoko itxa. Teoso auītetakani takariki erekari atoko itxana. Kākiti Satanasi nakitiakori iua katsotati atoko itxana. ³⁹Katsotati takakari Teoso nakitiakori mokaiakari itxaua. Satanasi itxaua. Itixi xipokini ōti iua takari amiko ōti atoko itxa. Teoso nitiriakori iaxitikini ninoa takari amakani atoko itxana. ⁴⁰Iua katsotati apotiitaāka, xaminamoni oka inaāka. Iua atokotxikana inaāka itixi xipokini ōti. ⁴¹Hītari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴²Iposo atoko Teoso nitiriakori okana ninoa xaminamoni. Iuaā iteene itxiapatana. Akatsatsiriūtauana. ⁴³Iuasaaki atāo inakarinoka kamakani aua iotximerena Teoso auītetxi ininiātaāua. Atokatxi iotximere atoko itxa ninoa iotximere. Kakenakokii, ininiā hīkenakotariko nisākire —itxa Xesosi.

Txineiro Kipatakoru Pirena

⁴⁴—Teoso auītetxi ininiua, txineiro itomanero kipatakoru atoko itxa. Oa txineiro kipataāka kikio. Āti ōti kiki napaāpotakasaaki, apokaro, ininiā iuaīkana ikipataro. Iteene ipoxokoniua, ininiā ivētxitari ikinika itii, iua kikio iamotini ikapani. Eereka sa itxa iua kikio iamotini ikapani. Ikara atoko itxa Teoso auītetxi ininiua.

Pérora Inakori Pirena

⁴⁵—Teoso auītetxi ininiua, pérora iamotakari atoko itxa. Iua nitari pérora apia erekari. ⁴⁶Pérora iteene erekari apokiniā, ikinika itii ivētxita iua pérora iamotini ikapani.

Hetxi Pirena

⁴⁷—Teoso auītetxi ininiua hetxi ipoaā taākori atoko itxa. Ikini sereti ximaki apotiita hetxi. ⁴⁸Ixāpokasaaki kaiotarorititi kosekaāpotari itakoāmoni. Iuaā kaiotarorititi iitopāka. Imereřina ximaki. Ximaki erekari kotariā itaka. Kākiti maniākiniti mapara oka. ⁴⁹Xipokatxi ōtisaaki ikara atoko itxa. Teoso nitiriakori mereēriko kākiti. Mapara itakarina erekarini. Mapara itakarina maerekani. ⁵⁰Ininiā xaminamoni okanako kākiti maerekati kamakani. Iuaā itxiitana. Akerakitatsiriūtauana, kotxi patsiiri.

Kitxakapirika Oerekakori, Amaneri Oerekakori Pakini

⁵¹Xesosi pimaāna imoianariakori:

—Hīte imarotatari ikara atoko inakari nisāpiretakiti? —itxa.

—Ari, aimarotapitikari —itxarina.

⁵²Ininiā Xesosi:

—Kaiōkatsopareri oerekikosaaki Teoso auītetxi ininiua imarotini ikapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta āki inīkatakiti. Amaneri, kitxakari apaka imakatxaka.

Nasree Auakani Kona Auakari Xesosi Sākire

(Marko 6.1-6; Arókasi 4.16-30)

⁵³Ikara sāpirenatxi atāo inakari oerekiko ixipokapiretaka atoko, Xesosi sipe. ⁵⁴Ikanapiriā Nasree sitatxitimoni. Ininiā oerekarauata aiko Xoteoakori

apotiitiniātaāua. Ininiā kākiti tsorikaāta isākire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵Aapokotxi kamakari ākiri iua. Inoro Maria. Itariakori Txiako, Xoão, Simão, Xotasi pakini. ⁵⁶Itaroakoro uai apaka aua. Nanipa apaiaōkari ikinika imarore? —itxana.

⁵⁷Ininiā kona inirekarina iua. Ininiā Xesosi txari:

—Teoso sākire sāpiretakari paxitaāka, txamari Teoso sākire sāpiretakari itixineē auakasaaki, inirimane sauaki auakasaaki, !ipaxitaāka. Isākire !auikaāka —itxa Xesosi.

⁵⁸Ininiā Xesosi kona kamari itori Teoso posotiire iuaā Nasaree sitatxiti auakani ikapani, kotxi kākiti iuaākini !auikari isākire.

Xoão Kapatxisareri Ipinini Pirena

(*Marko 6.14-29; Arókasi 9.7-9*)

14 Iuasaaki Erotxi Kariréia auakani auite txaua. Iuasaaki ikenakopiretari Xesosi pirena. ²Iuasaaki itxana initiriakori:

—Iua Xoão kapatxisareri ipipekari-ika okitapekaua. Iuakara Xesosi txaua. Ininiā uatxa apiata iposota ikamini —itxa Erotxi.

Txamari Xesosipitikara. Kona Xoõoni iua. ³Mitxi Erotxi paniātari Xoão kapatxisareri iaxirikiko, itari Piripi itanoro xika. Ouāka Erotxia. Oomanatari Xoão, ininiā itakaāka kateia āki. ⁴Mitxi Xoão kapatxisareri txari Erotximoni:

—Kona erekari pitari itanorokata pisirikini. !Apakata pikamakiti —itxa.

⁵Ininiā Erotxi nirekamari okiniri Xoão, iuaritika kona okari, kotxi ipikana Xoão sākire auiaākani. Ninoa uākatari Xoão, Teoso sākire sāpiretakari ininiua. ⁶Erotxi kamari kiiniri auini ōti pirena. Erotxia ākero serena iua Erotxi apisatoō, ikemaixitakini

apisatoō pakini. Ininiā oserenini kamari ninoa poxokoniuatini. ⁷Ininiā Erotxi poxokoniuatakasaaki itxa:

—Nisikai imakinika pinireēkiti pite-moni —itxaro oa.

Ininiā osari onoromoni. ⁸Onoro nirekari Xoão okiko, ininiākara oamanaāri Xoão kii prato nopini. Ininiā otxari Erotximoni:

—Xoão kapatxisareri kii ninireka prato nopini.

⁹Ininiā Erotxi kona erekaxinireri. Kipa ikama? Kotxi ikinimane ikemaixitakini kenakotari isikaenetiniri oa nirekakiti oamoni. Ininiā iua paniātari oa nirekakiti sikiko oamoni. ¹⁰Ininiā iua iokanatari sotatoakori kateiamoni Xoão kii tso-takiko ikapani. ¹¹Ininiā ninoa minari ikii prato nopini. Isikarina oamoni. Oa sikari onoromoni. ¹²Eereka Xoão moianariakori sari kateiamoni. Ninoa anikari iito akauarimoni. Iuaā ikatarina. Eereka ninoa sari Xesosimoni. Isāpiretarina Xesosi Xoão ipinini pirena.

Sīko Mio Kākiti Xesosi Sikakienatini

(*Marko 6.30-44; Arókasi 9.10-17; Xoão 6.1-14*)

¹³Xesosi kenakopiretakasaakiri Xoão okiko, ipotorika kanauaā. Ātiātaā iuanani auini nire isa, txamari itomaneri kākiti imarotari Xesosi sinimoni. Ininiā itakanaparina sitatxi. Isana imiri iua sinimoni. ¹⁴Iua kanikiitakasaaki, atapari kākiti apokaāpotini. Ininiā iua amonikana ninoa. Imakananitana amianatakani.

¹⁵Mapiāpeka inakasaaki, imoianariakori apoka iuamoni. Itxarina:

—Mapiāpeka. Uai aapokotxi mauakaniātaā, ininiā uai nipokori !uari. Piokanatari kākiti aapokotximoni, ininiā iamotarina nipokori iuaātaā —itxana imoianariakori.

¹⁶Xesosi apakapapiretana:

—Nota kona iokanatana isinina. Hītekarako sikakienatana ninoa —itxa Xesosi.

¹⁷ Ininiā ninoa:

—Komiri ipi ipi āti pakininokara aua atemoni. Ipi ximaki apaka aua. !Apakata —itxana.

¹⁸ Ininiā Xesosi:

—Himina uai notamoni —itxa.

Ininiā imoianariakori minari Xesosi-moni. ¹⁹ Eereka iua paniātari kākiti xiti topākini. Eereka ikosekari komiri sīko, ximaki ipi pakini. Ininiā iua ionakaāta iaxiti. Itxari:

—Niri pisikakiti peerekari —itxa.

Ininiā imaxinikaāpotari. Isikaāpotana imoianariakori. Ninoa sikaāpotana kākiti. ²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiā xāpokaka itxarina tosi kotari. ²¹ Iuasaaki sīko mio kikiākini nipokota. Sitoākini, amarini pakini nipokota apaka.

Xesosi Ipoa Nopini Itīpokotini

(Marko 6.45-52; Xoāo 6.15-21)

²² Eereka ipaniātana imoianariakori kanauaā iereētiniua iua apisa ipiriātiniua ikapani. Ninoa sipeka. Iua kaikota kākiti itakapiretini nire. ²³ Kākiti itakapiretanapaka atoko, Xesosi sari oxiratarimoni, Teoso imisākiretini nire. Īkanōkapeka inakasaaki, iuanani iuaā aua. ²⁴ Iuasaaki kanaua ipoa apanīkakiāpeka. Ītima apiākatara kanaua. Ininiā tsakati iteene apoākata.

²⁵ Imaropirīkatapeka inakasaaki Xesosi sari ninoamoni. Itīpokota ipoa nopini. ²⁶ Imoianariakori atapakasaakiri Xesosi ipoa nopini itīpokotini, ninoa pīkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hītxako. Notara. Kona hīpīkarauatape —itxa.

²⁸ Ininiā Petro sākirauata:

—Apiananiri. Xesosi pininiāua, pipaniātano pitemoni napokini ipoa nopini —itxa Petro.

²⁹ Ininiā Xesosi:

—Uai pina —itxari.

Ininiā Petro katxaka. Ipotorika ianini ipoa nopini Xesosimoni isini. ³⁰ Txamari kataparari ĩtimati itikasaaki, ipīkarauata, ininiā ipatapiā itairakaāpota. Ininiā iua akirikata:

—Apiananiri. Pimaīkano.

³¹ Iuasaakipeka Xesosi maīkari iua. Itxari:

—Poiāoka pauikari niposotiire. Kinirepa kona atāo pauikari? —itxa Xesosi.

³² Iuaīkana morōkoka itxauana kanaua āki. Iuasaaki ĩtima iotoka.

³³ Imoianariakori kapotoreēkaua Xesosi apisatoō:

—Apiananiri pitxaua. Atāopitikara Teoso ākiripitikarai —itxana.

Xesosi Makananitana Amianatakani Xenesareekini

(Marko 6.53-56)

³⁴ Ipoa ipiriātana, Xenesaree tōpamoni apoka itxana. ³⁵ Iuaā kākiti imarotari Xesosi, ininiā iokanapireta kākiti ninoa tixine takote auakanimoni:

—Amianatakani himina.

Ininiā kākiti minari itomane amianatakani Xesosimoni. ³⁶ Amianatakani amanaāri Xesosi:

—Pauiritaua pimāka mapotomatara atakapiotini —itxana.

Ikinimane imāka takapiotakani makananitaāka.

Xoteoakori Īkrite Pirena

(Marko 7.1-13)

15 Iuasaaki pariseoakori, kaiōkatso-pareriakori pakini apoka Xesosi-

moni. Xerosareēkini ninoa. Ipimaārina Xesosi:

²—Kinirepa pimoianariakori kona kamari aātokiriakorini sākire iaōka, kotxi inipokotakasaakina, kona arokauakotauana —itxana.

³Ininiā Xesosi apakapapiretana:

—Hītepekana, kinirepa kona hīte kamari Teoso sākire iaōka? Hīte kamari hōereēkitinokara, ⁴kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisākirepiretiniā, pokaākako.”

⁵Txamari hīte oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakiti nisika Teosomoni.’” Ininiā !isikari ninoa nirekakiti ninoamoni. ⁶Ininiā hīte oerekari kākiti mapaxitakanina iri, inoro pakini. Ininiākara hīte sākire hōereēkiti kipatari Teoso sākire. ⁷Hīte txari: “Akamapitikari Teoso sākire iaōka,” txamari kona hīte kamari. Atāopitikara Isaía sākire kitxakapirīka. Iua sāpiretari Teoso sākire hīte pirena. Teoso txari:

⁸Kamisirienererini ninoa kākiti.

Ninoa sākireēnanira ipaxitanona. Ākixinireēna !nirekanona.

⁹Maxikatiika ninoa kapotoreēkaua nota apisatoō. Maxikatiika ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Itxa Teoso Isaíamoni kitxakapirīka — itxa Xesosi.

Ākixiniretxi Txiko Pirena

(Marko 7.14-23)

¹⁰Xesosi akiritana kākiti, ininiā itxana:

—Hīkenakota himarotini ikapani.

¹¹Nipokori, piixirākakiti kona kamatxikotari pākixinire. Pisākire

maerekati, pinamaā potoriākari, iuara txikotapitikari pākixinire —itxa Xesosi.

¹²Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisākire ninoamoni?

¹³Ininiā Xesosi:

—Kākiti takari atoko itxa. Ininiā ikinika takari niri iaxitikiri mataākiniti maporoakaākako. ¹⁴Kona himaākatapena pariseoakori. Īkiikakani mōsiāreni atoko itxana. Mōsiāreti mīkiikiniāri mōsiāreti, ikinipoko irikako aariko āki. Iua atokokana maerekati ōtākikiniāri maerekati, imakinika ninoa sari imisiritikoātaā —itxa Xesosi.

¹⁵Ininiā Petro:

—Poerekaua ate ikara sāpirenatxi atōo inakari oerekiko. Ate !imarotari —itxa.

¹⁶Ininiā Xesosi:

—Hīte apanakini atoko hītxa atxiiti? Kona himarotapanikari?

¹⁷Himarotari. Nipokori hinamaā hīixirākakiti hītikakomoni isa. Eereka hītikatakasaaki, inapa.

¹⁸Hisākire hinamaā pokīkakari potorika hākixinireē. Iuara txikotari kākiti ākixinire. ¹⁹Kotxi hākixinireē hixinikakiti maerekati potorika. Okaniuatakatxi, āti kākiti itanorokata sirīkiko nire, anokaretxi, itriuatakatxi, misirieneretxi, āti misākirepiretiko pakini potorika hākixinireē. ²⁰Ikara atoko inakarinanira txikotari kākiti ākixinire. Kākiti marokauakotakanuia kona txikotari ākixinire —itxa Xesosi.

Xoteo Minakatoua

Auikiniri Xesosi Sākire

(Marko 7.24-30)

²¹Ikara atoko inaāka atoko Xesosi sipe. Isipeka Txiro, Sitoō pakini tōpamoni. ²²Iuasaaki sito Kanaaākero, iuaā auakaro, apoka Xesosimoni. Iteene oamanaāri:

—Apiananiri, Tavii apika mekaniri, piamonikano. Maerekati matamatakoti auañtotaro namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ātipirika oākiripoanāta —itxana. ²⁴ Xesosi apakapapiretaro oa:

—Niokanataāka Isaeokini ninīkatini ikapani. Ninoa soti auñte pīpinanaākani atoko itxana. Txamari pite kona Isaeokero. Pite āto uāka —itxa.

²⁵ Iuaritika oa sito apoka iuamoni. Okapotoreēkaua iua apisatoō. Ininiā oa:

—Apiananiri, pimakananitaro namarite —otxari.

²⁶ Ininiā Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anāpamoni nisikini ikapani —itxaro.

²⁷ Ininiā oa:

—Ari, atāopitikara pisākire. Anāpa atoko nitxaua, iuaritika anāpa nikari nipokori iriākari kaapokori patapi koa —otxa.

²⁸ Ininiā Xesosi:

—Atāopitikara. Sito, pite iteene auikari niposotiire. Pinirekakiti nikamapitikako —itxaro.

Iuasaakipeka oimi erekapeka otxa.

Xesosi Erekapeka Txīkitakari Kākiti

²⁹ Eereka Xesosi sari Kariréia poatimoni. Iuañ oxiratari nopini topāka itxa. ³⁰ Itomane kākiti iuamoni apoka. Ninoa minari iuamoni kākiti mōsiāreni, masākireni, matīpokotakani, apanakini amianatakani itomaneri pakini. Xesosi makananitanana ninoa. ³¹ Kākiti iuañ auakani tsorīkaāta, kotxi itikarina Xesosi makananitinina amianatakani. Kākiti masākireti sākirauatapeka. Kākiti

matīpokotakati tīpokotapeka. Mōsiāreti, kōsiārepeka itxapeka. Ikinimane txari:

—Peerekari Teoso, Isaeo auakani Teosone —itxana.

Xesosi Sikakienatana Ipi

Ipi Pakini Mio Kākiti

(Marko 8.1-10)

³² Xesosi akiritana imoianariakori. Itxana:

—Nota amonikana naia kākiti. Ipi ōti, āti ōti pakini notakata auana. Uatxa kona minakati kona auari inikinina ikapani. Kona nota iokanatanana ninoa natxiritika, kotxi arikama ipītaxititama, irika itxamana —itxa Xesosi.

³³ Ininiā imoianariakori txari:

—Nanipa ate apokari nipokori komiri naia kākiti asikakienatini? —itxana.

³⁴ Ininiā Xesosi:

—Kipakinipa komiri aua hītemoni? —itxa Xesosi.

Ininiā ninoa:

—Setxi komiri, ātikaka ximaki axapitiri pakini —itxana.

³⁵ Ininiā Xesosi:

—Hīpaniātana kākiti xiti topākini —itxa Xesosi.

³⁶ Eereka imaikari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaāpota itxari imoianariakorimoni. Ininiā ninoa xanakaāpotari kākitimoni. ³⁷ Ikinika nipokota. Kamitopeka itxana. Imoianariakori xāpokakari setxi kotari nipokori itetakori. ³⁸ Ipi ipi pakini mio kikiākini nipokotapeka, apaka sitoākini, amarini pakini. ³⁹ Eereka Xesosi iokanatanana kākiti aapokomonina. Iposo atoko iereētaua kanaua āki. Makataā tōpamoni isa.

Teoso Takaõtxikare

(Marko 8.11-13; Arókasi 12.54-56)

16 Pariseoakori, satoseoakori pakini sari Xesosimoni. Inirekarina Xesosari kerokiniri, ininiã itxarina Xesosari:

—Takaõtxikari, Teoso posotiire poterekaue ate, aãtamatini ikapani, Teoso iokanatinii ikorapokoriti aimarotini ikapani —itxarina.

²Txamari Xesosari txana:

—Na noerekai. Mapiãnikata iaxiti pøkamarari inakasaaki: “Peereõtiri katana,” hĩtxa. ³Iua atokokana iãanõkapanika iaxiti pøkamarari, piãkaxitita inakasaaki: “ãparaãnapani. Kataparari itimatipani,” hĩtxa. Himarotapitikari takaõtxikari iaxiti auakari. Txamari kona himarotari Teoso kamanãtakiti ikorakanani. Hĩsãkirauatakasaaki, kãkiti erekarini atoko hĩtxa, txamari maerekati hĩkama. ⁴Kãkiti uatxarini !erekana. Itakanaparina Teoso. Hĩte nirekari noerekini Teoso takaõtxikare, iposotiire. Konapitini. Kona noerekai hĩte. Kitxakapĩrika Teoso sãkire sãpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaĩkana ikamapanikariko. Iua posotiiretxi Teoso takaõtxikare itxapanikaua hĩte ikapani. Iua takaõtxikarinoka Teoso takaõtxikare hĩte ikapani —itxa Xesosari.

Iposo atoko Xesosari takanapana, sipe itxa.

Pão Tireẽkari Pirena

(Marko 8.14-21)

⁵Xesosari imoianariakorikata ipiriãtari ipoa. Ipinia apokasaakina, imoianariakori xinikaro pão imaxinĩkaretakitona.

⁶Iuasaaki Xesosari õtãkikana ninoa:

—Erepaniko. Pariseoakori, satoseoakori pakini pãote tireẽkari pamonõkoniri —itxana imoianariakori.

⁷Ininia imoianariakori misãkiretakakaua:

—Pão amaxinĩkaretini xika Xesosari ikara atoko txaua ate —itxana imoianariakori.

⁸Xesosari imarotari imisãkiretakakinuana, ininia iua:

—Kinirepa himisãkiretakakaua, pão himaxinĩkaretini xika? Kona iteene hãuikari ninikatinii. ⁹Atuauko kona kiikitepanikai hĩte? Atuauko himaxinĩkaretapekari pão sikonoka siko mio kãkiti nisikakienatini? Hĩxinikariko kipakinipa kotari hĩxãpokaka pão itetakoro? ¹⁰Atuauko kona hĩxinikatari ãti õti ipi ipi pakini mio kãkiti setxinoka pãoã nisikakienatini? Hĩxinikariko kipakinipa kotari hĩxãpokaka pão itetakoro? ¹¹Hĩte nõtãkikasaaki: “Erepaniko. Pariseoakori, satoseoakori pakini pãote tireẽkari pamonõkoniri,” ninakasaakii, kinirepa kona himarotatari kona pãoni ikara atoko nitxai hĩte? —itxa Xesosari ninoamoni.

¹²Iuasaakiika imarotarina kona pão tireẽkarini monõkori txaua. Imarotarina pariseoakori, satoseoakori pakini sãkירה, ninoa oereẽkitira, monõkori txaua.

Petro Auikari Xesosari

Teoso ãkiri Ininiaua

(Marko 8.27-30; Arókasi 9.18-21)

¹³Xesosari sari Sesarẽa-Piripi sitatxiti takote. Iuaã ipimaãna imoianariakori:

—Kipa kãkiti uãkatano nota hĩtari iaxitikiri?

¹⁴Ininia imoianariakori:

—ãtikaka uãkatai Xoãoni kapatxisarerini iuaĩkana õkitikaua inakarii. Apanakini uãkatai Erĩasini iuaĩkana õkitikaua inakarii. Apanakinipekana uãkatai Xeremiani iuaĩkana õkitikaua inakarii. Minakanisaaki ãtikaka: “ãti

Teoso sākire sāpiretakarini iuaikana ōkitikaua inakari,” itxaina —itxarina.

¹⁵ Ininiā Xesosi:

—Hītepekana, kipa hīte uākatano nota? —itxana ninoa.

¹⁶ Simāo Petro apakapapiretari:

—Teoso mereēkitirai pite. Teoso mapikati ākirirai pite —itxari iua.

¹⁷ Ininiā Xesosi:

—Simāo Petro, Xoāo ākiri, Teoso takari erekari pitemoni, kotxi kona kākitini sāpiretai Teoso ākiri nininiu. Niri iaxitikirira sāpiretai.

¹⁸ Nisāpirenauatapanika pitemoni.

Piuāka Petro. Kai sorotxikana piuāka. Kai aapokotxiti kamakari mereēri kai kaikori xiti itakini ikapani, aapokotxi iua kai nopini ikamini ikapani, ininiā aapokotxi lirika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sākire, isāpiretakiti pitemoni. Kākiti nota nakitiakori naapoko atoko, ninoa sauaki nauini ikapani. Napotiinātapanikari kākiti naapoko ikapani. Satanasi tapara kona posotapaniri ixipokiniri ia naapoko.

¹⁹ Nipaniātai Teoso sākire pisāpiretini kākitimoni. Xavi nisikinii atoko itxa ikara, kotxi kākiti auikasaakiri Teoso sākire iiroā Teoso auītetxi ininiātaāua. Īkorapokoriti kākiti kamakiti pimaūiritakaniā, Teoso tixine apaka !auritaāka. Īkorapokoriti kākiti kamakiti pauiritiniā, apaka auiritaāka Teoso tixine —Xesosi txari Petro.

²⁰ Iposo atoko Xesosi:

—Teoso mereēkiti nininiu, apanakinimoni !kasāpirena hītxapeko —itxana imoianariakori.

Xesosi Sāpiretari Ipinini

(Marko 8.31–9.1; Arókasi 9.22–27)

²¹ Iua ōtisaaki Xesosi poterika isāpiretinina imoianariakori:

—Nisako Xerosareēmoni. Iuaā kiomātxiakori, kaiōkatsoparerini, sasetotxi auīteakori pakini misiritanoko. Iposo atoko oka ninaākako. Ipi āti ōtisaaki iuaikana nōkitikaākako. Iuaikana aua nitxako —itxana.

²² Ininiā Petro misākiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Api-ananiri. Kona Teoso auritapaniri ikara atoko piniko —itxari.

²³ Ininiā Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxari.

Xesosi Moianari Atāo Inakari

(Marko 8.34–38; Arókasi 9.23–27)

²⁴ Iposo atoko Xesosi misākiretana imoianariakori:

—Notakata kinirāo sika pinakasaaki, piteka nireēkiti kona pinirekape. Notakata kinirāo sika pinakasaaki, nota misiritiko atokokana pimisiritaākako. Ia atoko pinirekiniā, notakata pisapitikako. ²⁵ Pite ātipirika kaminiāri pite nireēkitinoka, ininiā pinireēkiti xipokapitikako pitekata. Pite nireēkiti pimanirekakaniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁶ Atxiīti papakapari ikinipoko tiitxi, ikini itixiti auakani tii, pinakiti ikapani. Atxiīti iua tiitxi xika kona pikāpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini. !Apakata kākiti iikitxitiniri Teoso, iuamoni isini ikapani. ²⁷ Nota hītari iaxitikiri apokako ninitiriakorikata. Iuasaaki niri iotximeretxikana

nota iotximeretako. Iuusaakirako erekari isika erekari kamakanimoni. Iparikana iki isika iparikana iaōka. Txamari imisiritanako maerekati kamakani. ²⁸Atāopitikara nisāpiretai hīte. Uai uatxa aua kākiti, ninoa imarotapanikariko nota hītari iaxitikiri auītetxi nininiua. Ikara imarotinina apisa kona ipinapanikana —itxa Xesosi.

Moisesi, Eríasi Pakini

(Marko 9.2-13; Arókasi 9.28-36)

17 Seisi ōti napaka atoko Xesosi anikana Petro, Txiako, Xoão pakini. Xoão Txiako itari. Ikanīkana oxiratarari nopinixiti. Ninoanani anika iuaā. ²Iuaā ninoa atamatari iua. Ipinimonipo itxapeka. Itoō iotximere atokatxi iotximere atoko itxa. Imāka serōka ipinikare atoko itxa. ³Iuusaakipeka Moisesi, Eríasi pakini tokiā iuaā, misākireta itxarina Xesosi. ⁴Ininiā Petro akiritari Xesosi:

—Apiananiri, erekapitikari uai aūuini. Pinirekiniāri, nota kamari ipi āti pakini papiri uai. Pite nakiti ikapani, Moisesi nakiti ikapani, Eríasi nakiti ikapani nikama.

⁵Petro sākiranātakasaaki, katxiāri pomēkoriri ninoa nopini apoka. Katxiāri āki Teoso txari:

—Ere namarite, nitiretakiti. Napokaerekatari iua, kotxi ikamari ninirekakiti. Hīkenakotariko iua sākire.

⁶Xesosi moianariakori ikara atoko inakari ikenakotakasaakina, iteene ipīkarauatana, ininiā iriākatana xitipe. Itoōna ikipatana. ⁷Xesosi sari ninoamoni. Itakauakotaua ninoa nopini. —Hōkitikaua. Kona hīpīkarauatape —itxana.

⁸Ininiā itikapokotana. Xesosinoka aua.

⁹Oxiratarari xirata iokiriiāpotakasaakina, Xesosi txana ninoa:

—Kona hīsāpiretapiri apanakinimoni hītikakiti. Nota hītari iaxitikiri nipina iuaikana naua ninaka atokoikarako hītikakiti mixikanani hīsāpiretako —itxana.

—Ateeneka —itxarina.

¹⁰Xesosi moianariakori pimaāri iua:

—Kinirepa kaiōkatsoparerini oerekaua: “Eríasi apokako Teoso mereēkiti apokini apisa?”

¹¹Ininiā Xesosi apakapapiretana ninoa:

—Ari, atāopitikara ninoa sākire. Merepitipanika Eríasi apokapitika. Iua kamari imakinika iposope inini ikapani. ¹²Ari, nisāpiretai, Eríasi apokaepka. Txamari kākiti limarotari iua. Imisiritarina iua inireēkitina iaōka. Iua atokotxikana itxanonako nota hītari iaxitikiri. Imisiritanona —Xesosi txana Petro, Txiako, Xoão pakini.

¹³Ininiā imoianariakori imarotari Xesosi sākire. Eríasi, Xoão kapatxisareri itxaua.

Amarini, Maerekati Matamatakoti Auaitotakiti Pirena

(Marko 9.14-29; Arókasi 9.37-43)

¹⁴Ikanapiriākana atoko, itomaneri kākiti apotiitiiniātaāua apokasaakina, kiki apoka Xesosimoni. Ikapotoreēkaua iua apisatoō. ¹⁵Itxari:

—Apiananiri, piamonīkari namarite. Maerekati matamatakoti auaitotari iua. Atatsiirauata. Xaminaā irikapika. Kāuaāriā ikomokapika. ¹⁶Niminamari namarite pimoianariakorimoni. Ninoa kona posotari erekaepka itxikitakinirina.

¹⁷Ininiā Xesosi txari:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? Himinari amarini notamoni —itxana.

¹⁸ Apokaāka atoko, Xesosi txitari iua maerekati matamatakoti:

—Pisipe.

Ininiā iua maerekati sipe. Iuasaakipeka iua amarini erekapeka itxa.

¹⁹ Eereka imoianariakori apoka Xesosimoni. Iuasaaki ninoanoka aua iuakata. Imisäkiretarina:

—Kanatokopa ininiāpa ate kona posotari maerekati matamatakoti aomitikini?

²⁰ Ininiā Xesosi:

—Kona atāoni hāuikari nisäkire, ininiā kona hīposotari homitikiniri iua. Atāoenepitikara nisāpiretai hīte. Mostata iki axapitikiri. Axapitipitika nisäkire hāuikiniā, mostata iki atoko nisäkire hāuikiniā, hīposotari ia ōtanoxiratarari hīpaniātini: “Pite oxiratarari, uai posipika, ikaimoni pisa,” ininiā oxiratarari sapitikamako. Hīte posotari ikinipoko hinireēkiti hīkamini.

²¹ Txamari himamisäkiretakaniāri Teoso, hinipokotini himatakanapakaniā Teoso himisäkiretini ikapani, ininiāra kona hīposotari maerekati matamatakoti homitikini —itxa Xesosi.

Xesosi Iuaikana Sāpiretari Ipinini

(*Marko 9.30-32; Arókasi 9.43-45*)

²² Karirēia tōpa apokasaakina, Xesosi misäkiretana imoianariakori:

—Nota, hītari iaxitikirino mīkapiritaākako. Nisikaākako kikiakorimoni inirekaākitina ikaminina tīkane. ²³ Ninoa okano nota. Ipi āti pakini ōtisaaki iuaikana nōkitikauako, iuaikana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misäkiretiko Aikoti Īkapani

²⁴ Kapanaoō sitatxiti apokasaakina, kikiakori sari Petromoni. Ninoa kiki apakaparo txineiro Teoso misäkiretiko

aikoti nīkatakani amanaākito. Ipimaārina Petro:

—Hīte oerekakari sikataro txineiro Teoso misäkiretiko aikoti nīkatakani amanaākito? —itxarina iua Petro.

²⁵ Ininiā Petro:

—Ari, isikapitikaro —itxa.

Eereka Petro ūroā aapokotxi āki ikara sākiretixiti Xesosi isāpiretini ikapani. Xesosi sākirauata, Petro masākirauatakani apisa:

—Petro, ikini itixiti kipa sikataro txineiro auītetxiakorimoni? Atauako auītetxi nirimane sikataro? Atauako kākiti ātiātaā īkanikani sikataro? —itxari.

²⁶ —Kākiti ātiātaā īkani sikaro txineiro auītetximoni —itxa Petro.

—Ari atāopitikara. Ininiā kona auītetxi nirimaneni sikaro txineiro iuamoni. Iuaritika asikapitikaro.

²⁷ Txineiro amasikakaniā, txineiro apotiitakani !apokaerekataua. !Anirekari ikara atoko inakari. Ininiā ipoa pisa. Pokatsaāta. Pimanamākaro ximaki merepitipanika pimaikakito. Onamaā papokaro txineiro ota aikixirauatini ikapani. Oa txineiro ota apakata nota sikakito ikapani, pite sikakito ikapani apaka. Panika. Pisikaro oa txineiro Teoso misäkiretiko aikoti nīkatakanimoni —itxa Xesosi.

Ininiā Petro kamari Xesosi sākire iaōka.

Kiripa Kākiti Apiatakari Txataua?

(*Marko 9.33-37; Arókasi 9.46-48*)

18 Iuasaaki Xesosi moianariakori apoka iuamoni.

—Teoso auītetxi ininiātaāua, kipa kākiti apiatakari txataua? —itxana.

² Xesosi akiritari amarini axapitiri. Ninoa apisatoō taka itxari.

³ —Atāopitikara nota sākire. Himaerekani himatakanapanakaniisaaki, Teoso nireēkiti himakamakananiisaaki,

amarini axapitiri atoko himi-nakanisaaki, kona hīsapani Teoso auītetxi ininiātaāua. ⁴Ia amarini axapitiri liulikaua. Kākiti ia amarini atoko inakarira, iuaka poiāotakiniāua, iuara apiatakari itxaua Teoso auītetxi ininiātaāua. ⁵Nota nireēkiti pikamakasaaki, pipoxokoniritika papakapiniāri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶Xesosi sāpirenauatapanika:

—Kākiti txīkitakiniāri amarini, nota sākire auīākari, maerekati ikamini, !apakata. Erekamariko kai mitari iua kākiti maerekati oerekakari iaxirikanokitaākamako, iposo atoko ipoa apanīkakiā okaākamako ipinini ikapani. ⁷Kākiti ikini itixiti auakani misiritaākako, kotxi auari kākiti maerekati apanakini kamini txīkitakakani. Auapika kākiti ikara atoko inakani. Ninoa misiritaākako. ⁸Piuako txīkitakiniāi maerekati pikamini, ininiā pitsotakari, oka pitxariko. Pikiti txīkitakiniāi maerekati pikamini, ininiā pitsotakari, oka pitxariko. Kotxi maerekati pikaminiā arikatxi maxipokatimoni pokaākako. Apiaerekata mauakotikai pauini ātipirika Teosokata. Apiaerekata makititikai pauini ātipirika Teosokata. Pauiritiniāri maerekati pikamini txīkitaākari pitekata ikaikotiniā, ininiā pite kamari maerekati apaka, ininiā arikatxi maxipokatimoni pokaākako. ⁹Iua atokokana poki txīkitakiniāi maerekati pikamini, pimaporoka, oka pitxariko. Kotxi maerekati pikaminiā, arikatximoni maerekani misiritikoātaā pokaākako. Apiaerekata Teosokata ātipirika pauini āti pokinoka pauini. Kona pauiritapiri maerekati pikamini

txīkitaākari pitekata ikaikotini —itxa Xesosi sākire.

Soti Auīte Pīpinanaākari

(Arókasi 15.3-7)

¹⁰—Ikinipoko amarini pipaxitako, kotxi niri tixine aua niri nitiriakori. Ninoa nīkatarī amarini. Niri apisatoō ātipirika nitiriakori auapika, ininiā kākiti mapaxitakaniāri amarini, isāpiretarina niri. ¹¹Nota hītari iaxitiki napoka ikorapokoriti kākiti pīpinanaākani atoko inakani napokini ikapani, kotxi !imarotarina Teoso kimapore.

¹²—Kiātokopa itxa hīxinikakiti? Kiki aua ipiraakori soti auīte seī pakini. Txamari ātika pīpinanaka. Kiātokopa itxa? Itakanapari ipiraakori novēta novi pakini. Isari oxiratarimoni. Initari iua pīpinanaākari. ¹³Ipiraakori novēta novi na pīpinanaka, ininiā ipoxokoniua. Apokasaakiri iua pīpinanaākari, iteene ipoxokoniua. ¹⁴Iua atokokana hīri iaxitiki kona nirekari amarini ātika pīpinanakini. Hīri nirekari imakinika amarini imarotini ikuamapore iuamoni sikari apo —itxa Xesosi sākire.

Maerekati Pitemoni Kamakari

¹⁵—Pitari nisākire auīākari kaminiāri maerekati pitemoni, ininiā pisa iuamoni. Pitenoka pisa iuamoni. Iuanani pimisākiretako. Pōtākikiniri ikīpitakasaaki, pimoianari iuaīkana itxapekaua. ¹⁶Pōtākikiniri imakīpitakanisaaki, ipi kākiti panikako iuamoni. Ipi minakanisaaki ātika panika iuamoni. Ininiā iuaīkana pōtākikari iua maerekati kamakari. Iuasaaki pitekata sikani apaka ōtākikari. Kotxi Teoso sākire iōkatsopatakori oerekaua kākiti sākire kenakotakani, kākiti kamakiti itikakani ipi āti pakini auiniā, apakata apanakini atāo inakari imarotini ikapani. Ipi āti minakanisaaki, ipi

apakata. ¹⁷ Ninoa pitekata sikani sākire imakīpitakanisaaki, pisāpiretana kākiti Teoso misākiretikoātaā apotiitakaniua. Ninoa ikinipoko Teoso sākire auīākani ōtākikariko iua. Imakīpitakanisaakiri ninoa sākire, himarotari atāo maerekati kamakari itxaua iua. Teoso sākire mauīākati atoko itxaua iua, kotxi kona inirekari ōtākikiko. Ate mokaiakari moianari atoko itxaua —itxa Xesosi sākire.

Pauiritakiti, Pimauiritakiniti Pakini

¹⁸—Atāopitikara nitxai hīte. Īkorapokoriti kākiti kamakiti himauiritakiniti, Teoso tixine apaka !auritaāka. Īkorapokoriti kākiti kamakiti hāuiritakiti, apaka auiritaāka Teoso tixineē.

¹⁹—Apikomoni ia nisāpiretai. Pite xinikakititixikana āti xinikiniā apaka, hinirekakiti hamanainiāri Teoso, niri iaxitikiri sikapitikai hamanaākiti. ²⁰ Kākiti apotiitakasaakiua nota ixinikinina ikapani, nota ninoakata aua. Atxiīti ipi ātinoka aua. Atxiīti ipinoka aua. Iuaritika nota aua ninoakata —itxa Xesosi.

Nitiritxi Āti Matiretakati

²¹ Petro sari Xesosimoni, pimaā itxari Xesosi:

—Apiananiri, kipakinikatapa napakapari nitari, maerekati ikaminano ātipirika inakasaaki? Setxikata atxiīti?

²² Ininiā Xesosi:

—Kona, kona setxikatani papakapari iua. Setxikata setēta papakapari iua, ininiā ātipirika papakapariko.

²³—Apikomoni noerekai papakapiniri kākiti, maerekati ikamakasaaki pite-moni. Teoso auītetxi ininiua patrāo ia atoko inakari itxa. Ia patrāo nirekari iniritiakori iikixititini iua. ²⁴ Ininiā iua iaō-taro txineiro isikakitopeka. Iuasaaki iniriti minaāka iuamoni. Mitxipeka iua pa-

trāo sikari tesi mirāo txineiro ota iua iniritimoni. Txineiropokoni. Oa txineiro isikasaaki, itxari iniriti: “Āti ōti iuaīkana pisikano oia nitxineirote,” itxari iniritimoni. Txamari, !sikaro, kotxi !oāuaika. ²⁵ Kona katxineiroteri. Ininiā ipatrāote paniātari ivētxitiko iua, itanoro, imiakori, itii ikinipoko, ipatrāote iikixititini ikapani. ²⁶ Iua iniriti ikara inakari sākiretxiti ikenakotakasaaki, ipatrāote apisatoō ikapotoreēkaua. Itxari iua: “Piātaparoko. Ikinika pitxineirote nisikaiko,” itxari ipatrāotemoni.

²⁷—Ininiā ipatrāote amonikari. “Kona ninirekaikaro nitxineirote pisikinino.” Ininiā auiritari isini.

²⁸—Ininiā sipe itxa. Iua nitiritxi mitxi sikapekaro txineiro iua inakito seī ota āti ipatrāote nitirimoni. Poiāonoka oa txineiro. Iuasaaki, aapokomoni isikasaaki, aōkitari iua āti nitiritxi ipatrāote nitiri. Imaikari inoakiā. “Uatxa pisikano nitxineirote,” itxari.

²⁹—Ininiā imoianari kapotoreēkaua iua apisatoō. “Piātaparoko. Ikinika pitxineirote nisikaiko,” itxari.

³⁰—Txamari mitxiri nitiritxi: “!Niātapakaroko,” itxari. Ininiā kateiamoni ieretakakitākari imoianari txineiro xika. “Ikinika nitxineirote pisikasaakiikanoko, pikatxakako,” itxari. ³¹ Ikara inakari ene apanakini iua patrāo nitiriakori kenakotakasaaki, ninoa naiataua. Ininiā isana ipatrāotemonina. Isāpiretarina iniriti iokanatiniri āti iniriti kateiamoni. ³² Ininiā iua patrāo akiritari iua iniriti: “Pite maerekati pitxaua, kotxi kita pite amanaāno nota niamonikinii, ininiā piikixititinino !ninarekaika. ³³ Kinirepa kona pite amonikari pimoianari nota amonikinii atokokana? Kona erekai,” itxari.

³⁴—Ininiā ipatrāote iteene naiataua. Iokanataro iua kateiamoni

imisiritikomoni ipatrāote txineirote okinika imasikakanisaaki.

³⁵ Ininiā Xesosi xipokapiretari ia isāpirena:

—Niri iaxitikiri iua atokokana tx-aiko hīte, maerekati āti kamakasaakii hītemoni himamaxinīkaretakaniā hāxix-nireē —itxa Xesosi.

Kiki Ītanorokata Itakanapakakini

(Mateo 5.31-32; Marko 10.1-12; Arókasi 16.18)

19 Ikara inaka atoko Xesosi poterika Kariréia tōpa. Isa Xotéia tōpamoni uini Xotāo ipiniā. ² Iuaā itomaneri kākiti sari iuamoni. Erekapeka itxikitakana amianatakani.

³ Pariseokori apaka sari iuamoni. Inirekarina Xesosi kerokiniri isākire. Ininiā ipimaārina Xesosi:

—Auiritaāka atxiīti kiki takanapiniro ĩtanoro, itakanapiniro inirekasaaki? —itxarina.

⁴ Ininiā Xesosi:

—Hīte imarotapekari ia Teoso sākire iōkatsopatakori:

Kitxakapirīka merepitipanika ikinipoko Kamakari kamari kākiti, kiki inini, sito onini apaka ikamari kākiti.

⁵ Ikara atoko ininiā, kiki takanapari iri, inoro pakini, ĩtanorokata auini ĩkapani, ininiā ninoa ātika atoko itxauana,

itxa Teoso sākire iōkatsopatakori.

⁶ Ininiā kona ipi !itxaikauana. Ātika itxauana. Ikara atoko ininiā, !erekari kākiti kaiarikiniri Teoso apotiitakini —Xesosi txana ninoa.

⁷ Ininiā ninoa pariseokori pimaāri:

—Ikara atoko ininiā, kinirepa Moisesi paniātari kiki iōkatsopatiniri aātsopa, ĩtanoro itakanapini aātsopate, ininiā eereka auiritari iua iokanatiniro oa?

⁸ Ininiā Xesosi apakapapiretana:

—Moisesi auiritai hītanoro hītakanapini, kotxi paikori hīxinire.

Teoso nireēkiti himanirekakani xikara, Moisesi auiritai hītanoro hītakanapini. Txamari kitxakapirīka merepitipanika kona kiki takanaparo ĩtanoro. ⁹ Ininiā nitxai hīte, kiki takanapiniāro ĩtanoro, ātikata masirīkatoka, iua kamari maerekati. Itakiniāro āto sito, maerekati apiata ikama, kotxi !imaākatari Teoso paniātakiti. Oa itakanapakito taākari apaka kamari maerekati —Xesosi txana ninoa.

¹⁰ Ininiā imoianariakori ikara ike-nakotakasaakina, itxarina Xesosi:

—Ītaniritxi, ĩtanorotxi !auritaāka itakanapakakinina, ininiā erekapiimana imītaniriuatakanina —itxarina.

¹¹ Ininiā Xesosi:

—Erekapitikari kākiti ĩtanorouatini. Ātikakanoka Teoso kona nirekari ĩtanorouatinina. ¹² Ixika auapitika kākiti mītanorouatakani. Kotxi ātikaka kiki auakasaaki, iītona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ĩtanorouatini Teoso auītetxi ininiāua ātipirika isāpiretini ĩkapani. Teoso manirekakaniāri pite ĩtanorouatini, ininiā kona pītanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kākiti minana amarini Xesosimoni. Inirekarina ninoa kii nopini iuako itakini. Inirekarina Xesosi mis-ākiretiniri Teoso amarini ĩkapani. Txamari imoianariakori txitana. !Auiritana amarini anikinina Xesosimoni. ¹⁴ Ininiā Xesosi txana imoianariakori:

—Hāuiritanako amarini notamoni apokini. Kona hītokakapena notamoni apokinina. Kotxi kākiti Teoso auītetakani amarini atoko itxauana —itxana.

¹⁵ Ininiã iuako itaka ninoa kii nopini. Iposo atoko ãkorape itxa.

Ãtokori Ito Txineiroteri

(Marko 10.17-31; Arókasi 18.18-30)

¹⁶ Ãtokori apoka Xesosimoni.

—Koerekareri erekarii, kiripa erekari nikama átipirika Teosokata nauini ãkapani? —itxari.

¹⁷ Ininiã Xesosi:

—Kininiãpa “erekari” pitxano? Kãk-iti erekari !auari. Teosonanira erekari. Teosokata átipirika pauini pinirekiniã, pikamariko Teoso paniãtakiti.

¹⁸ —Ãkiripa? —itxa.

Ininiã Xesosi:

—!Pokaniuatape. !Pisirikape áti ãtanorokata. !Piitiriuatape. Poxiene !pikamape. ¹⁹ Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaã Teosokata átipirika nauini ãkapani? —itxari.

²¹ —Ikinika kinirão kamaka pinakasaaki, ikinika pitii pivãtxitako. Txineiro papakapakito pisika kãkiti matxineirotenimoni. Ikara atoko inakari pikaminiã, Teoso tixine papokasaaki ikinipoko erekari auiniiko pite. Pitii pivãtxitaka atoko, notakata sa pitxako —Xesosi txari.

²² Iua átokori ikara ikenakotakasaaki, isipe. Imatinaninoka itxari átokori, kotxi kaiãori itii. !Inirekari itii ivãtxitini.

²³ Ininiã Xesosi txana imoianariakori:

—Atãopitikara ia nitxai hãte. Pamimari katxineiroterini auãtetiniri Teoso. ²⁴ Apikomoni nisãpiretai. Atauako kamero napatari ákorike sonakiã? Apia mimari kãkiti katxineiroterini auãtetiniri Teoso —itxana.

²⁵ Xesosi moianariakori ikara ikenakotakasaakina, itsorãkaãtana. Ninoa uãkatari katxineiroterinimoni txineiro aua, kotxi Teoso apokaerekatana ninoa, ininiã txineiro isika ninoamoni, ninoa uãkatakiti. Ininiã ninoa pimaãri:

—Katxineiroteri maposotakaniãri Teoso tixinemoni isini, kipa posotari iuaã isini? —itxanãtana.

²⁶ Xesosi atamatana. Apakapapiretana:

—Kãkitika kona posotari. Teoso posotari ikinipoko ikamini.

²⁷ Petro misãkiretari Xesosi:

—Atepekana, ate takanapapekari ikinipoko pitekata asini ãkapani. Ikara atoko aniniã, kiripa ate apakapako? —itxari.

²⁸ Ininiã Xesosi:

—Atãopitikara nitxai hãte. Nota, hãtari iaxitikiri niitopãkako auãtetxi itopanere nopini. Iuusaaki ikini itixiti amaneri itxauako. Ikinipoko atamatanoko nota hãtari iaxitikiri iotximere. Iuusaaki hãte nisãkire kãpitakanii apaka topãkako auãtetxi itopanere nopini. Iua iitopaneretxi tosi pakini. Tosi nirimantxi Isaeo tixine auakani auãteakori hãtxauako. ²⁹ Atxiiti nota ãkapani pitakanapari paapoko, pitariakori, pitaroakoro. Atxiiti nota ãkapani pitakanapari piri, pinoro, pamarite. Atxiiti pitakanapari pikikiote nota ãkapani. Ikara pitakanapakasaaki nota ãkapani, apiata papakapariko. Itori papakapariko. Ikara atoko pininiã nota ãkapani, átipirika paua Teosokata. ³⁰ Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki —itxa Xesosi sãkire.

Ova Takakoriätaã Parikauatakani

20 Xesosi txari: —Teoso auñttxi ininiua ia kakikioteri atoko itxa. Ia kakikioteri takapekari txipokori ova inakoro ikikioteë. Ovanoka itaka. Oiõpeka onakasaaki, iua kakikioteri potorika ñkanõkapanika. Initari parikauatakani ova amakani ñkapani. ²Aõkitakasaakina, ipimaãna: “Hinarekatari parikatxi?” itxa.

—“Ari, anirekapitikari,” itxana.

—“Atauako ätoka txineiro ota pirata kamakori apakata äti õti pokamara piparika ñki ñkapani?” itxana.

—“Ari, apakatapitika,” itxana. Kotxi ätoka ota pirata kamakori iuasaaki atão parikatxi ñki äti õti pokamara kãkiti parikauatini ñki. Ininiã itakaremoni iokanatana iparikauatinina ñkapani.

³—Novi oarape inakasaaki iuañkana ipotorika. Nipokori vëtxitikoãtaãmoni isa. Iuaã atamatana kãkiti maparikauatakani. ⁴Ininiã imisãkiretana: “Hñte apaka atxiiti nirekatari hñparikauatini nitakareãtaã, ininiã niñkitxitai atão inakari hñparika ñki,” itxa. Ininiã ninoa apaka sari.

⁵—Apaniãxitipeka inakasaaki iuañkana iokanatana apanakini parikauatakani itakaremoni. Itinñtikitakasaaki iuañkana iokanatana apanakini parikauatakani itakaremoni. Mitxi isãkire atokokana itxa isãkire ninoamoni. ⁶Mapiãnikata takotepeka inakasaaki iuañkana isa parikauatakani initini. Apokapanikana maparikauatakani. Ipimaãna: “Kinirepa ia õti maparikauatanika hñtxa?” itxana.

⁷—“Kotxi kona kãkiti sikaua parikatxi,” itxarina.

—“Nitakareãtaã hñsa. Iuaã hñparikauata. Hñte apakapariko hñparika ñki erekari,” itxana.

⁸—Ñkanõkapeka inakasaaki kakikioteri akiritari initiri apiari: “Parikauatakani pakirita. Piñkitxitana. Merepanika piñkitxitana kikata parikauatakani. Eereka piñkitxitana tinñtikita parikauatakani, pitxaãpotako,” itxari.

⁹—Kikata parikauatakani imakinikana apakapari ätoka txineiro ota pirata kamakori. ¹⁰Kikiãkini ñkanõkapanika parikauatakani ikara itikasaakina, oãkatarina: “Ate apakaparo ko apiatako aparika ñki,” itxamana. Ätoka txineiro ota pirata kamakoro imakinikana apakapana. ¹¹Txineiro apakapakana atoko, omanãkaruatana. “!Erekari kakikioteri,” itxanãtana. ¹²Ininiã ninoa txari iua: “Naia kikata parikauatakani poiãoka iparikauatana. Äto oaranoka iparikauanãtana. Ate parikauata ikiniõtika kapatakariã. Ate parikauatapitipo, txamari pite ñkitxitaua ate naia piñkitxitini atokokana. Kona erekai,” itxarina.

¹³—Iua kakikioteri apakapapiretana: “Nitiretakini, kona nota misirienetai hñte. Ñkanõkapanika nipimaãi: ‘Atauako ätoka txineiro ota pirata kamakori apakata äti õti pokamara piparika ñki ñkapani?’ nitxai mixikanani. Ininiã hñte: ‘Ari, apakatapitika,’ hñtxa. Ininiã na nimisirienetai hñte. ¹⁴Ininiã txineiro nisikakito hanikaika. Haãpokomoni hñsipeka. Nota nirekari niñkitxitinina hñte tikini parikauatakani hñte niñkitxitini iaõka. ¹⁵Atauako kona erekari nota txineirote ninirekakitimoni nisikini? Hñte xikotano, erekari nikamini xika,” itxana ninoa.

¹⁶Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina

ikapani, txamari poiäonoka iua mereë
—itxa Xesosi.

Iuaïkana Xesosi Säpiretari Ipinini

(Marko 10.32-34; Arókasi 18.31-34)

¹⁷ Xesosi Xerosareëmoni ikimapori-
takasaaki, akiritana imoianariakori. Ni-
noanoka imisäkireta.

¹⁸ —Hikenakotari nisëkire.
Xerosareëmoni asako. Iuaä nota
hītari iaxitikiri mīkapiritaākako.
Sasetotxi auiteakori, kaiökatsoparerini
paknimoni nisikaākako, ininiä ninoa
apotiitaua. Iuasaakiko ninoa txari:
“Okaākapitikako.” ¹⁹ Eereka ninoa
sikano Xoteo minakonimoni. Ninoa
napetano. Ixirokitatanona aāpitsaä.
Iposo atoko aamina ĩpiriāmitakariä
tokakita ninaākako, oka itxanonako. Ipi
äti ötisaaki nökitikauako, iuaïkana aua
nitxako —itxa imoianariakorimoni.

Txiako, Xoäo Pakini Amanaäkiti

(Marko 10.35-45)

²⁰ Eereka Sepeteo ĩtanoro apoka Xe-
sosimoni. Ominana imi Txiako, Xoäo
pakini. Ninoa Txiako, Xoäo pakini Xe-
sosi moianariakori. Okapotoreëkaua iua
apisatoö.

—Atauako ninirekakiti pikaminano?
—otxari.

²¹ —Kipa pinireka? —itxaro.

—Ikinimane auite pinakasaakiaua,
ninierekari naia ipi namariteni
auitetxiakori ininiäuana pitekata.
Pauiritatana pitekata iitopäkinina, äti
pikikomoni inini, äti pisaneremoni
inini? —otxari.

²² Ininiä Xesosi apakapapiretana
ninoa:

—!Himarotari hamanaäkiti. Mapaöti
napa atoko iteene nimisiritaākako.
Atauako hīposotatari hātatsiitini
notakata? —itxana ninoa.

—Aposotapitika —itxarina.

²³ —Atäopitikara hātatsiirauata
notakata, txamari kona notani mereëna
käkiti nikipikomoni, nisanaremoni
topäkakani ikapani. Nirira mereëpekana
ninoa käkiti notakata topäkini ikapani
—itxana.

²⁴ Apanakini Xesosi moianariakori
kenakoenetari Txiako, Xoäo pakini
amanaäri Xesosi auitetxi ininiuana
ikapani, ininiä omanatana. ²⁵ Ininiä
Xesosi akiritana ninoa imakinikana
iuamoni.

—Himarotari Xoteo minakanua
auiteakori paniätari käkiti ikinika
auiteakori nireëkiti ikaminina ikapani.
Kona atäo itiretana käkiti. Käkiti kona
kamari auitetxiakori mauiritakiniti.

²⁶ Kona ninoa auitetxiakori atoko
!hīt_xape. Atäo apiari pininiua
pinirekiniä, pimoianatariko apanakini.

²⁷ Apanakini auite pininiä pinirekiniä,
nitiritxi pitxauako merepanika. ²⁸ Ikara
atoko nitxa nota hītari iaxitikiri
ïkorapokoriti napokasaaki. Ninitiri
!auari. ïkorapokoriti napoka, käkiti
nitiri nininiua ikapani, käkiti nitiretini
ikapani. ïkorapokoriti napoka nipinini
ikapani, kaiäopokori käkiti mapinakani
ikapani, kotxi nota iiktxirauata ninoa
mapinakani ikapani —itxana ninoa.

Ipi Mösiäreni Xesosi Makananitini

(Marko 10.46-52; Arókasi 18.35-43)

²⁹ Xerikoo sitatxiti ipotorikasaakina,
itomaneri käkiti sari Xesosikata,
imoianariakori pakinikata. ³⁰ Iuasaaki
ipi mösiäreni topäkanäta kimapori
tiniäpo. Xesosi napaäpotini
ikenakotakasaakina, akiritana:

—Apiananiri, aäuite Taviini apika
mekanirii, piamonikaua ate —itxarina.

³¹ Käkiti iuaä pinitana:

—Himaätako —itxana.

Txamari apiata akirikatana:

—Apiananiri, aäuite Taviini apika
mekanirii, piamonikaua ate —itxarina.

³²Ininiã Xesosi iotoka. Akiritana ninoa mōsiãreni. Apokana iuamoni.

—Kipa hinireka nikaminii hīte? — itxa.

³³—Apiananiri, aītikapokotini anireka.

³⁴Ininiã Xesosi amonikana. Okina nopini itakari iuako. Iuasaakipeka kōsiãrepekana, sa itxana Xesosikata.

Xesosi Xerosareē Apokaāpotini

(Marko 11.1-11; Arókasi 19.28-40; Xoão 12.12-19)

21 Xesosi imoianariakorikata imatokoāpotari Xerosareē. Apokana Petxipaxee inakori aapokotxiti, õtanoxiratarari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

²—Hīsa ikiraã kaixiti auakari aapokotxitiã. Iuaxiti hāpokasaaki, hāpokaroko xomēta iaxiriãkoro oimikata. Hīkoxirikana. Uaimoni mina hītxanako. ³Āti misākiretakasaakii: “Kinirepa hīkaxirikatarari pirātxi?” Ininiã hīte: “Apiananiri nirekana,” hītxako. Ininiã iua auiritai himininina —itxana ninoa.

⁴Kitxakapirīka Teoso sākire sāpiretakari sāpiretakekari ikara atoko inakari. Ininiã iua sāpiretakiti kitxakapirīka atāo inakari apokapeka. ⁵Iua txari:

Hītxariko Xerosareē auakanimoni: “Hātamata. Hīauīte apokaāpota hītemoni. !Kaneenamari. Xomēta nopini iitopākanāta. Xomēta ākiri nopini isaāpota,” hītxako ninoamoni, itxa Teoso sākire sāpiretakari kitxakapirīkapeka.

⁶Ininiã Xesosi moianariakori sari. Ipaniātakiti iaōka ikamana. ⁷Ininiã iminaro xomēta oimikata. Itakarina imākana inopinina Xesosi topākini īkapani. Ininiã Xesosi topāka xomēta ākiri nopini. ⁸Itomaneri kākiti katamēkari

imākana kimapori āpo. Apanakini sauakari aāxike. Ikasirīkaxikeāpotarina aāxike kimapori āpo. Ikara atoko ikamana, Xesosi paxitiko oerekinina īkapani. Imākana nopini, aāxike nopini, xomēta napaāpota. ⁹Kākitipokoni īkiikakani. Kākitipokoni Xesosi tikini īkani. Imakinika saāpotakasaakina, akirikatana:

—Peerekari Tavii apika mekaniri. Teoso posotiirekata īkari, Teoso nireēkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua — itxaāpokatana.

¹⁰Ininiã Xesosi apokapeka Xerosareē. Iuasaaki ikinimane Xerosareē auakani tsorikaāta.

—Kirinapanipa ikira kiki inatarī? — itxanātakakana.

¹¹Kākiti Xesosikata īkani sāpiretana: —Xesosikara ikira. Teoso sākire sāpiretakari, ikira. Nasaree sitatxitikiri, Kariréia tōpa auakari ikira —itxana.

Pirātxi Vētxitakani Omitikiko

(Marko 11.15-19; Arókasi 19.45-48; Xoão 2.13-22)

¹²Xesosi iroã aiko āki Teoso misākiretikoātaã. Omitikenatana tiitxi vētxitakani. Amotiitakani Teoso misākiretikoātaã auakani omitikenata. Ikitakari txineiro vētxitakani mesate. Kamoã vētxitakani topākini apaka ikitaka. ¹³Xesosi misākiretana:

—Teoso sākire iōkatsopatakori txari: Ia naapoko, “Teoso misākiretiko aikoti” akiritaākako,

itxa. Txamari hīte txīkitakari ia aiko kītiririni iomaātiniãtaã ininiua —itxa Xesosi.

¹⁴Mokirini, kākiti matīpokotakani pakini apoka Xesosimoni Teoso misākiretiko aikotiã. Erekepeka itxīkitakana ninoã. ¹⁵Iuasaaki amarini

Teoso misäkiretikoã auakani iteene akirikata:

—Peerekari aãuïte Taviini apika mekaniri —itxanātana.

Sasetotxi aũiteakori, kaiõkatso-parerini pakini itikari Xesosi posotiire, kãkiti erekapeka itxikitakini. Ninoa kenakotari amarini akiritakiti:

—Peerekari aãuïte Taviini apika mekaniri.

Ininiãkara ninoa omanãkarauata.

¹⁶ Ininiã imisäkiretarina Xesosi:

—Pikenakotatari ikara amarini akiritakiti? —itxana.

—Nikenakotapitikari. Hïte atatsopat-apekari ia Teoso sãkire iõkatsopatakori: Åtokoriakori, amarini pakini, ninoapeka apaka txariko: “Peerekari iua,” itxanako,

itxa Teoso sãkire iõkatsopatakori. Ininiã Teoso sãkire iaõka ninoa kamanãta. Ininiã erekapitikari ninoa akiritakiti —itxa Xesosi.

¹⁷ Iposo atoko itakanapana. Ìkorape itxa. Itakanapari Xerosareë. Isa aapokotximoni Petãnia inakorimoni. Iuaã itxiaka.

Piko Mina Marito Pirena

(*Marko 11.12-14, 20-25*)

¹⁸ Katimatinïkata iuaïkana Xesosi sari sitatximoni. Ipxinipokoriti inatxita.

¹⁹ Atamataro piko mina kimapori itiniãpo. Isa oamoni txipokori itximini ikapani. Txamari otsopanani auaro. Iuusaaki itxa:

—Kona kariikaiko —itxaro.

Iuusaakipeka otxiaroka.

²⁰ Imoianariakori ikara itikasaakina, itsorikitaãtana.

—Ii natokopa otxape katimari otxiarokini? —itxanãtana ninoa.

²¹ Ininiã Xesosi:

—Atão nisãpiretai. Teoso sãkire hãuikiniã, hïte posotari hïkaminiri

mixikanani nikamakiti atoko inakari. Piko mina txiarokini nitxikitakini atoko, hïposota hïkamini. Teoso sãkire iteene hãuikiniã, apiata hïkamako. Hïposotamariko hïpaniãtiniri ikira ixirata: “Põkitikaua. Ipoamoni oka pitxaua.” Iuusaakipekamako ixirata ipoamoni oka itxamauako. ²² Pite atão pauikiniãri Teoso sãkire, iua pimisäkiretakasaaki, ikinipoko pamanaãkiti Teoso sikai —itxa Xesosi.

Xesosi Paniãtakari Moerekakoni

(*Marko 11.27-33; Arõkasi 20.1-8*)

²³ Xesosi ïroã Teoso misäkiretiko aikotiã. Kãkiti oerekasaaki, sasetotxi aũiteakori, kiomãtxiakori pakini apoka iuaã. Ipimaãrina Xesosi:

—Kipaniãpa pikamari ïkora pikamakiti? Kipa paniãtai? —itxarina.

²⁴ Ininiã Xesosi:

—Nota apaka pimarauatako hïtemoni. Åtinoka nipimaãiko hïte. Nota pimaãkitiko hïtemoni hïsãpiretiniãno, nota apaka sãpiretai hïte hïpimaãkiti notamoni, ininiã nisãpiretai nota paniãtakari uãka apaka.

²⁵ Ia nipimaãi hïte: “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” —itxana.

Ininiã ninoa misäkiretakakaua:

—“Teoso paniãtari,” aniniã, “Kinirepa kona hãuikatari isãkire?” Xesosi txamaua eereka. ²⁶ “Kãkitira paniãtari Xoão,” aniniã, apanakini omanatamaua, kotxi ninoa uãkatari Xoão Teoso sãkire sãpiretakari ininiua.

Ikara atoko itxana imisäkiretakakini-uana. ²⁷ Ininiã apakapapiretana:

—!Aimarotari iua paniãtakari.

Ininiã Xesosi:

—Nota apaka kona sãpiretai nota paniãtakari uãka.

Iri Säkire Kīpitakari, Iri Säkire Makīpitakati Pakini

²⁸—Hixinikariko ia nisāpiretakitiko: Kiki auari ipi imi. Akiritari anakari. “Namarite uatxa piparīkauata nitakare ova auiniātaā,” itxari imi.

²⁹—Ininiā imi anakari: “!Nisapani. !Ninirekari niparīkauatini,” itxari. Eereka ixinikaxitināta. “Ari, nisapitikako,” ininiā isa iri takaremoni.

³⁰—Iua kiki akiritari imi maneritakari. Ipaniātari iua atokokana. Iua imi: “Ari, nisapitikako.” Txamari, !isari.

³¹—Ininiā ikiripa kamatari iri paniātakiti? —itxa Xesosi.

Ininiā ninoa kiomātxiakori, sasetotxi auiteakori pakini apakapapiretari:

—Anekarira.

Ininiā Xesosi:

—Atāopitika nisāpiretai hīte. Kiītiriri apokako Teoso auītetxi ininiātaāua hīte apisapanika. Kanokarero apokako Teoso auītetxi ininiātaāua hīte apisapanika. ³²Kotxi Xoāo kapatxisarerini apoka hītemoni. Oerekai erekari kimaporiti. Txamari kona hīte auikari isäkire. Kiītiriri, kanokarero pakini auikari isäkire. Iuasaaki himarotari ninoa maerekati kamakani takanapiniri imaerekanina. Ikamarina erekarinoka. Hīte itikapekari. Txamari hīte kona takanapari himaerekani. Kona hāuikari Xoāo säkire, ininiā iua kiki säkire makīpitakati atoko hītxa, kotxi hīsäkire: “Akīpitapitikari Teoso säkire,” txamari kona hīkīpitari —itxa Xesosi.

Parīkauatakani Maerekani

(Marko 12.1-12; Arókasi 20.9-19)

³³—Āti sāpirenatxi atāo inakari oerekiko nisāpiretai. Hīkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipiriketaro. Eereka iuaātaā

ikamari ova katsonakiko. Iposo atoko ikamari aapokotxi ōtanori, ikinipoko itakare atamatini ikapani. Iposo atoko iikitxitana kikiākini itakare nīkatakani ikapani. Ininiā ninoa nīkatari itakare. Eereka kakikioteri sari āti itixiti. ³⁴Ova manapi inakasaaki, iokanatanana initiriakori itakare nīkatakanimoni, ova apakapinina ikapani.

³⁵—Txamari, ninoa maikapena initiriakori. Ixirokitatarina āti. Okapirina āti. Āti kai soroā ikiporonakana. ³⁶Iuaikana iua kakikioteri iokanatanana initiriakori. Iuasaaki ito iokanata. Mitxirini atokokana itakare nīkatakani txapena ninoani. ³⁷Eereka imapotōkire iokanatarini imi ninoamoni. Iuākatari: “Namarite iua, ininiā ninoa paxitari iua,” itxa.

³⁸—Txamari, imi atapakasaakina, imisäkiretakakana: “Erepani imi. Maōkari, ininiā okinika itakare kaikotinaua atemoni.” ³⁹Ininiā imaikarina imi. Kikio xiripirexiti anikarina. Iuaā oka itxapirina.

Ininiā Xesosi pimaāri kākiti iua takote auakani:

⁴⁰—Ininiā iua kakikioteri ikasaaki, kiātokopa itxatanako ninoa kikiākini? —itxa Xesosi.

⁴¹Ininiā ninoa iua takote auakani apakapapiretari:

—Kakikioteri okanako ninoa maerekati kamakani. Ikitxitanako apanakini itakare nīkatakani ikapani, ininiā ninoa sikapitikaroko ova oiōkasaaki —itxarina Xesosi.

⁴²Ininiā Xesosi:

—Hīte atatsopatapekari ia iōkatsopatakori Teoso säkire:

Kai aapokotxi kamakani kona nirekari āti kai soro. Iua kai imanirekakiniti kai apiari itxapekaua. Apanakini kai soro maīkakari itxaua. Teosokara txīkitakari ikara atoko inini. Ikara peerekari atemoni.

Nota hītari iaxitikiri iua kai atoko nitx-
aua. Peerekari Teoso, kotxi nota hītari
iaxitikiri kākiti manirekakiniti. Teoso
txīkitakano nota apiananiri nininiāua.

⁴³—Ininiā nisāpiretai hīte, Teoso
kona hīauīte !itxaukauako. Iua
mereērīko apanakini kākiti inakitiakori
īkapani. Ninoa kamapitikari Teoso
nirēēkiti. ⁴⁴Apikomoni Teoso sākire
iōkatsopatakori sāpiretaua iua kai
apiari atoko inakari. Itxari:

Kākiti iua kai nopini irikasaaki,
ikarouata iua. Kai kākiti nopini
irikiniā, !auaika kākiti,
—Xesosi txana ninoa.

⁴⁵Sasetotxi auīteakori, pariseoakori
pakini kenakotakasaakiri ikara
sāpirenatxi atāo inakari oerekiko Xesosi
sāpiretakiti, ninoa !apokaerekatarina
isāpirena, kotxi imarotarina ninoa
takari nīkatakani maerekani atoko
inakani itxauana. ⁴⁶Ininiā ia xika
inirekarina imaīkinirina. Txamari
!imaīkarina, kotxi ipīkarina kākiti iuaā
apotiitakaniua. Kākitimoni Xesosi atāo
Teoso sākire sāpiretakari itxaua.

Kiiniri Ītanorouatiko Pirena

(Arókasi 14.15-24)

22 Iuaīkana Xesosi sākīrau-
atakasaaki kākītikata, isāpiretari
sāpirenatxi atāo inakari oerekiko. Itxari:

²—Teoso auītetxi ininiāua ia auītetxi
atokokana. Ia auītetxi kamari kiiniri
imi ĩtanorouatini īkapani. ³Ipaniātari
initiriakori akiritinina ikemaītxitakini
kiiniriā ininina īkapani. Txamari ike-
maītxitakini !inirekari ikiiniriteē isinina.
⁴Iuaīkana iokanatarī apanakini initiri-
akori ikemaītxitakinimoni. “Hītchanako:
‘Nīpokori iposopeka. Nokapekari kema
auīte, kema auīte ākiri pakini. Paīpe-
pokori. Imakinika niposotapekari. Hīs-

apoka kiinirimoni,’ hītchanako.” Ininiā
ninoa kamari isākire iaōka.

⁵—Txamari ikemaītxitakini
!imaākapiretarina. Iparīkamoni isana.
Ātikaka sari kikiomoni. Apanakini
sari ātiātaā tiitxi ivētxitinimoni.
⁶Apanakinipekana maīkapena
initiriakori, noropata, oka itxapena.
⁷Iua auītetxi ikara inakariene
ikenakotakasaaki, iteene inaiataua.
Iokanatarī isotatoneakori ninoamoni.
Ininiā okapena ninoa kokanirini.
Iotikapirina ninoa aapoko.

⁸—Eereka iua auītetxi akiritana
apanakini initiriakori: “Kiiniri namarite
ītanorouatini pirena iposopeka. Txamari
merepitipanika nikemaītxitakini
!erekana. ⁹Iua atoko ininiā, hīsa
ahoaātaā, kākiti napanakiniātaā.
Hīkemaītxitana ikinimane haōkitakini,”
itxana ninoa.

¹⁰—Ininiā isana ahoaātaā. Ikemaītxi-
tana ikinimane aōkitakini. Apotiitarina
kākiti itanapoko. Maerekani, erekarini
pakini apotiitana. Anikana kiinirimoni,
ininiā kākītipokoni xāpoākata.

¹¹—Iua auītetxi atamatana
ikemaītxitakini. Atamatari kiki
mākatxi ĩtanorouatikosaaki ieretaākori
mieretaākati. ¹²Ininiā akiritari iua:
“Nimoianari, kiātokopa piīroā naapoko,
kotxi mākatxi ĩtanorouatikosaaki
ieretaākori kona pieretaka?” Iua kona
kasākireri.

¹³—Ininiā iua auītetxi paniātari ini-
tiriakori: “Himaīkariko. Hīaxirikariko
iuako, ikitinota pakini, anika hītchariko
mapara. Piākatximoni hōkariko,” itxana
initiriakori. Iuaātaā kākiti txiapatiniā-
taā, kākiti akerakitatsirītiniātaā.

¹⁴Xesosi xipokapiretari isāpirena.

—Itomaneri kemaītxitakoni. Txamari
poiāoka mereēkoni —itxana ninoamoni.

Homano Auïte Ìkitxitiko Pirena

(Marko 12.13-17; Arókasi 20.19-26)

¹⁵ Ninoa pariseoakori sipeka. Eereka apotiitauana. Imisäkiretakakana. Ixinikaxitinātarina:

—Anirekari Xesosi kerokiniri isäkire, aāpoitiniri ikapani. Ininiā kiätokopa atxatari apimainiri ikerokiniri ikapani? — itxanātakakana.

¹⁶ Ininiā ninoa pariseoakori paniātana ātikaka ninoa oerekakini, apaka ātikaka Erotxi sākire auiākani, Xesosimoni isinina ikapani. Ininiā isana iuamoni. Imisäkiretarina. Pariseo sākire iaōka isāpiretana.

—Koerekareri, aimarotari atāoenepitikara pisäkire. Atāoenepitikara pisāpiretari Teoso nireēkiti akamini ikapani. Pite na pīkarauata xatiki kākiti sākire xika. Ātinoka pisäkire pisāpireta ikinakariti kākitimoni. Apanakinimoni pisāpiretakiti iuatxikana pisāpiretari apanakininapemoni.

¹⁷ Ininiā pisāpiretaua. Atāokani txineiro asikini Homanoakori auïtemoni, Sesa inakorimoni? Apakata amasikakaniri iuamoni? —itxarina iua.

¹⁸ Xesosi imarotari ninoa nirekari ikerokiniri isäkire. Ininiākara itxana:

—Kinirepa hinirekari nikerokiniri nisäkire? Kona erekai hïte. Hīsākirauatakasaaki, kākiti erekarini atoko hïtxa, txamari maerekati hïkama.

¹⁹ Hōerekano txineiro ota Homano auïte asikini ikapani.

Ininiā iminarona txineiro ota.

²⁰ —Kisanōkapa ia? Kiuākapa aua uai? —itxana ninoa.

²¹ —Ari, Homano auïte —itxana.

—Ininiākara hīsikariko Sesamoni iua nakiti. Hīsikariko Teosomoni iua nakiti —Xesosi txana ninoa.

²² Ikara apakapapirenatxi ikenakotakasaakina itsoriākaātana.

—Paimatireri iua —itxanātakakana.

Ininiā itakanaparina, sipeka itxana.

Ipīkari Ōkitikiniua Mauikakoni

(Marko 12.18-27; Arókasi 20.27-40)

²³ Iua ōtisaakipeka ātikaka satoseo apoka Xesosimoni. Satoseo inakoni !auikari ipīkani iuaikana ōkitikiniua.

²⁴ —Koerekareri, Moisesinira oerekari ia sākiretxiti: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipīpekarini uāka,” itxa Moisesini. ²⁵ Setxi itaritxiakori aua mitxi ĩkorapokoriti. Apia anekatakari ĩtaniriuata. Eereka ipīpe meenetika, ininiā itari takaro iuani tikinitakito. ²⁶ Iua atokokana iua itari ipīpe meenetika. Āti itari iuaikana takaro iuani tikinitakito. Txamari iua atokokana ipīpe meenetika. Iua atokokana txaāpota ikinika itariakori. ²⁷ Eereka oa sito apaka opīpe. ²⁸ Ininiā ipīkani iuaikana ōkitikasaakiaua iuaikana auāki ininina, ĩkiripa oĩtaniri aua oakata iuasaaki? Kotxi ikinimane ninoa setxi itariakori takapekaro oa —itxarina iua.

²⁹ Ininiā Xesosi:

—Hïte kerokari, kotxi !himarotari Teoso sākire iōkatsopatakori. !Himarotari Teoso posotiire apaka.

³⁰ Ipīkani iuaikana aua inakasaaki, kona ninoa ĩtaniriuataika. Teoso nitiriakori iaxitikini atokopeka itxanako.

³¹ Hïte !auikari ipīkani ōkitikiniua iuaikana auāki inini. Atauako kona hātatsopatapanikari Teoso sāpiretakiti hïtemoni? Iara isāpiretai:

³² Apraão, Isaki, Xakoo pakini

Teosonekarano nota, itxa Teoso. Ininiā Apraão, Isaki, Xakoo pakini auākipanika itxana, kotxi auāki inakani Teosonera iua. Ninoa uatxa auāki inakani, kotxi kona ipīkani Teosoneni Teoso —itxa Xesosi.

Iuasaaki kăkitipokoni kenakotari ikara Xesosi săkire. ³³Xesosi săkire ikenakotakasaakina, itsorikaătana, kotxi paimatireri Xesosi apakapapiretakiti satoseoakorimoni.

Teoso Paniătakiti Apiari Akamini

(Marko 12.28-34)

³⁴Xesosi iikiteritika apakapapiretari satoseo pimainiri, ininiă satoseo !ip-imarauataika. Pariseoakori kenakotari ikara, ininiă apotiitauana. ³⁵Pariseo, Moisesi săkire oerekakari, iua nirekamari Xesosi kerokiniri isăkire. Ininiă ipimaări:

³⁶—Koerekareri, ikiripa Teoso paniătakiti apiari txataua? Kipa apiaerekata Teoso nireėkiti akamini? —itxa.

³⁷Ininiă Xesosi apakapapiretari:

—“Pitiretariko Apiananiri piTeosone, ikinipoko pinireėkitiă, ikini păkixinireė, ikinipoko pixinikakitiă pakini.” ³⁸Ikara atoko inakari Teoso merepitipanika paniătaua akamini. Ia ipaniătakiti akamini apiari itxaua. ³⁹Iuaikana Teoso paniătaua. Ia ipaniătakiti apaka apiari. Merepanika ipaniătakiti akamini atoko itxa. “Piteka pitiretiniăua atokotxikana, pitiretariko äti.” ⁴⁰Iteene atiretiniări Teoso, iteene atiretiniări äti, ininiă akamapitikari apanakini Teoso paniătakiti, Moisesinimoni isăpiretakiti. Itene atiretiniări Teoso, iteene atiretiniări äti, ininiă akamapitikari Teoso săkire săpiretakani paniătakiti apaka —Xesosi txari iua.

Teoso Mereėkiti Tavii Apika Mekaniri

(Marko 12.35-37; Arókasi 20.41-44)

⁴¹Pariseoakori apotiitapanikaua inakasaaki, Xesosi pimaăna ninoa:

⁴²—Teoso mereėkiti pisăpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³Ininiă Xesosi:

—Ikara atoko ininiă, kinirepa Erekar Matamatakoti kamasăkiretari Tavii: “Teoso mereėkiti niauıte itxaua,” ina săkiretini? ⁴⁴Kotxi Tavii txari:

Apiananiri misăkiretari niauıte: “Nota kikomoni piitopăkiniritika nixipokariko pimokaiakariakori. Nikamariko ninoa pikiti pitakiniătă atoko ininiua,” Apiananiri txari niauıte,

itxa Taviini. ⁴⁵Ininiă Tavii akiritari Teoso mereėkiti “niauıte.” Ikara atoko ininiă, kiătokopa itxa Teoso mereėkiti Tavii apika mekaniri ininiăua? —Xesosi txari pariseoakori.

⁴⁶Kona imarotarina, ininiă kona kasăkirena ninoa. Ikara eereka kona kăkiti pimarauataika Xesosimoni, kotxi ipıkarina Xesosi imarore.

Xoteo Auıteakori Maerekani

(Marko 12.38-40; Arókasi 11.37-54; 20.45-46)

23 Ininiă Xesosi misăkiretana imoianariakori, itomaneri kăkiti iuaă auakani apaka. ²Ia atoko isăpiretana:

—Kaiökatsoparerini, pariseoakori pakini, Moisesini săkire oerekakani itxauana. ³Ininiära ikinika kaiökatsoparerini, pariseoakori pakini paniătakiti hıkamako, kotxi ninoa săpiretari Moisesini săkire Teoso oerekakiti. Ikara erekari. Txamari kona ninoa kamari Moisesini paniătakiti. Ikara !erekari. Ininiă ninoa kamakiti atoko !hıkamape. Kotxi isăkirena erekari, txamari ikamakitina !erekari. ⁴Ninoa kaiökatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiă, txamari iuaka na xatiki nirekari iporikitiniri. Kaiökatsoparerini, pariseoakori

pakini, ikara kiki atoko itxana. Ninoa paniātakititi iua iminani atoko itxa.

⁵—Pariseoakori kamari erekari apanakini atamatini ikapaninoka, ereka ininina apanakini uākatini ikapaninoka. Himarotari kākiti ieretakari Teoso sākire iōkatsopatakori aākoana xapitiki āki. Eereka iaxirikarina iteētaāna, iuakonotaāna pakini. Ninoa kaiōkatsoparerini, pariseoakori pakini takari aākoana mitari apanakini atamatini ikapaninoka. Paītanori itsarāpe imākana apanakini atamatini ikapani. ⁶Kiinirisaaki ninoa nirekari kākiti potxitiniātaā iitopākinina. Aiko āki Xoteoakori apotiitiniātaāua inirekarina kākiti potxitiniātaā iitopākinina.

⁷Apokaerekatarina okapiretikona ipaxitikona kienatxi vēxtitikoātaā. Apokaerekatarina kākiti akiritinina: “Koerekareri” inikona.

⁸—Txamari, ātinani hīte oereēkari txaua, Teoso mereēkitira iua. Koerekareri hiniko !hāuiritapeko, kotxi himakinikara hītaritakakaua. ⁹Kona ikorapokoriti auakari “niri,” !hītxape, kotxi ātinani aīri auari iaxiti auakari. ¹⁰Apaka apanakini akiritinini “aāuīte,” !hāuiritapeko, kotxi ātinani hīauīte. Teoso mereēkititi itxaua. ¹¹Auītetxi pininiua pinirekiniā, apanakini nitiri atoko pitxauako. ¹²Iua “Auītetxi nitxaua,” inakari, Teoso txīkitakariko nitiritxi itxauako. Iua “Nitiritxi nitxaua,” inakari, Teoso txīkitakariko auītetxi itxauako.

Xoteo Auīteakori Misiritaākako

(Marko 12.40; Arókasi 11.37-44, 52; 20.47)

¹³Iuaīkana Xesosi sākirauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kinirāo iroākari apisapanika aapokotxi tore totakani atoko hītxa,

kotxi hīte iotokakari kākiti Teoso sākire atāo auikini, ininiākara hīte iotokakari kākiti iroini Teoso auītetxi ininiātaāua. Hīte kona iroā. Apaka kona hīte auiritana kinirāo iroākani. ¹⁴Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīte mixirikari tikinitakoro aapoko. Himisirienetana. Teosokata hīsākirauatakasaaki, itori sākiretxi hīkama apanakini, “paimatirena” inini ikapaninokara. Ikara xika himisiritiko apiatako.

¹⁵—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīte sari ōtakoxiti. Hīpiriātari kāuaāri. Imiriī ōtakoxiti hīsa, hīsākire auikakari hinitini ikapani. Ātinoka hīsākire auikakari auiniā, iuaritika hīsa iuaxiti. Eereka hōerekari iua ikinipoko himarotakititi. Eereka hīte maerekani xika, iua kiki maerekani apiatako. Isapitika hītekata maerekani misiritikoātaā.

¹⁶—Erepaniko hīte. Mōsiāreni atoko hītxa, iuaritika hinirekari hōerekiniri Teoso kimapore apanakinimoni. !Hīposotari. Hīte oerekari apanakini ia hīsākire: “‘Ia nikamapitikako’ pinakasaaki, Teoso misākiretiko aikoti pakiriuākatakasaaki, pimakamakaniāri, kona pimisiritaākako,” itxa hīte sākire. Iuaīkana hīte sākire: “‘Nikamapititariko,’ pinakasaaki, Teoso misākiretiko aikoti āki auakaro oro pakiriuākatakasaaki, pikamapititariko pikamaenetakititi. Ikara pimakananisaaki, pimisiritaākako,” itxa hīte sākire.

¹⁷—Hīte mōsiāreni atoko. Kona kiīketei hīte. Īkiripa apiari? Orokani? Teoso misākiretiko aikotikani? Teoso misākiretiko aikoti apiari, kotxi oa oro

aiko āki aua, ininiā aiko txikitakaro oro Teoso nakito oniniāua.

¹⁸—Hīte oerekari apanakini ia hīsākire apaka: “Nikamapitikariko’ pinakasaaki, Teosomoni sikakori takikoātaā pakiriūākatakasaaki, pikamaenetakiti pimakamakaniā, kona pimisiritaākako. ‘Nikamapitikako’, pinakasaaki, Teosomoni sikakori takikoātaā nopini takakori pakiriūākatakasaaki, pikamapitikariko pikamaenetakiti. Pimakamakanisaakiri, pimisiritaākako,” itxa hīte sākire.

¹⁹Hīte mōsiāreni atoko hītxa. !Kīikitei hīte. Īkiripa apiata? Sikakorikani? Sikakori takikoātaākani? Sikakori takikoātaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoātaā txikitakari sikakori Teoso nakiti ininiāua. ²⁰Ininiā pisāpiretakasaakiri Teoso pikamaenetakiti, Teoso sikakori takikoātaā pakiriūākatiniā, iuatxikana iua nopini auakari pakiriūākata. ²¹Pakiriūākatakasaakiri Teoso misākiretiko aikoti, iua atokotxikana pakiriūākatari Teoso, kotxi iua aiko āki aua. ²²Pakiriūākatakasaakiri Teoso tixine, ininiā iua atokotxikana pakiriūākatari Teoso topākini. Iua atokotxikana pakiriūākatari Teoso, kotxi Teoso topākini nopini iitopāka Teoso.

²³—Erepaniko hīte kaiōkatso-parerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hīti auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, komínio, axapitikiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi

!hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. ²⁴Mōsiāreni atoko hītxaua, iuaritika hinirekari hōerekiniri Teoso kimapore apanakinimoni. !Hīposotari. Himakatzakaro xikiri iāriā āki komokakaro, txamari hūixirapoatara kamero, kotxi Teoso paniātakiti poiāori hīkama, txamari ipaniātakiti apiari kona hīkama.

²⁵—Erepaniko hīte kaiōkatso-parerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hōeretari hīto maparakiri, txamari hāxixinireē !erekari. Papatxinanii, patirenanii, paītirii. ²⁶Hīte pariseoakorii, mōsiāreni atoko hītxa. Merepitipanika himakatzakariko maerekati hāxixinire auakari, ininiā hīto erekatxikana. Hāxixinire ereka ininiā, hīkamakiti ereka apaka.

²⁷—Erepaniko hīte kaiōkatso-parerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kai auīte iriko, ipīkari takikoātaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. ²⁸Iua atokokanera hītxa. Kākiti uākatai hīte atāo inakarínoka kamakani hininiua, kotxi hinopini ererini hītxaua. Txamari, hāxixinire !ereri, kotxi maerekatínoka hīkama. Hīsākire atxiīti erekari, txamari kona hīkamari hīsākire iaōka —itxa Xesosi sākire.

Xoteo Auīteakori Misiritiko

(*Arókasi 11.47-51*)

²⁹Iuaīkana Xesosi sākirauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīkamari akauari Teoso sākire

sāpiretakanini īkapani. Peereri akauari hīkama. Hīkamari akauari ipīkani atāo inakarinoka kamakani īkapani. Txīta himinapa akauariā. Aāui hītaka iuaātaā. ³⁰Hītixari: “Kitxakapirīka aātokiriakorini okana Teoso sākire sāpiretakani. Atepitika auaākamako iusaaki, konimako ate okana ninoa,” hītxa. ³¹Teoso sākire sāpiretakanini okakani mekaniriakori hītixaua hīte. Kotxi hītekara txari: “Aātokiriakorini okana Teoso sākire sāpiretakani.” Hīte maerekati kamakani ninoa atokokana hītxa. ³²Hātokiriakorini mipotorikari Teoso sākire sāpiretakani okinina. Hīte xipokapanikanako ātikaka kaikotakani Teoso sākire sāpiretakani.

³³—Imini atoko hītxa. Imini anaakori atoko hītxa hīte. Himisiritaākapitīkako maerekani misiritikoātaā. Himitekini lauari. ³⁴Ininiā nisāpiretai hīte. Niokanatanapanikari hītemoni Teoso sākire sāpiretakani, Teoso iokanapirena imarotakani, koerekarerini pakini niokanata hītemoni. Txamari ātikaka hōka, aamina ipiriāmitakari nopini hītōkakitana apanakini. Apanakinipekana hīxirokitata aiko Xoteo apotiitiniātaāua. Eereka hāsikatikinitana ninoa āti sitatxitimoni sikani, eereka āti sitatxitimoni, eereka āti sitatxitimoni hītxaāponāta ninoa hāsikatikinitini. ³⁵Ininiā hīte misiritaākako ikinika atāo inakari kamakani okiko xika. Kitxakapirīka Apeo inakorini okapeēka. Atāo inakari kamakari iua. Ikinimane okapekoni tikinimoni okapeēka Sakariani, Parakia ākiri. Iua Sakariani okapeēka sikakori takikoātaā takote Teoso misākiretiko aikoti āki. ³⁶Atāopitikara nisāpiretai hīte. Kākiti uatxa auakani apakapariko misirikaretxi ninoa erekarini okapekoni xika —itxa Xesosi sākire.

Xerosareē Xesosi Tiretini

(Arókasi 13.31-35)

³⁷Iuaīkana Xesosi sākirauata:

—Xerosareē auakanii, Xerosareē auakanii, hīte okapekana Teoso sākire sāpiretakani. Kai soroā hīkiporonakana ninoa hītemoni Teoso iokanatakini. Kaiāokatanii ninirekamari ninikatini, patari oimiakori omīkita patapi otakini atokokana nitxanakamaiko hīte. Txamari !hāuiritano nota nīkatini. ³⁸Ikara atoko inakari xika haāpoko asikaākako. Teoso !uaika hītekata. ³⁹Nisāpiretai. Ia ōti hātamatano, eereka !hātamataikano. “Teoso takari erekari uaimoni īkarimoni, Apiananiri posotiireē īkarimoni,” hinakasaaki, iusaakinanirako hātamatanoko nota —itxa Xesosi.

Teoso Misākiretiko Aikoti Irikiko

(Marko 13.1-2; Arókasi 21.5-6)

24 Teoso misākiretiko aikoti Xesosi potorikasaakipeka, imoianariakori apoka iuamoni.

—Patamata. Peerepokori aikoniri — itxarina.

²Ininiā Xesosi:

—Ari, hātamatatari ere aikoniri? Atāopitikara nisāpiretai hīte. Koniko kai kaikotapani āti kai nopini. Imakinika kai irikaākako —itxana.

Misirikaretxi Apokaenetini

(Marko 13.3-13; Arókasi 21.7-19)

³Iposo atoko Xesosi sari oxiratari-moni, Oriva inakorimoni. Iuaā topāka itxa. Imoianariakori sari iuamoni. Ni-noanoka auari iuaātaā.

—Pisāpiretaua kirisaakiparako aiko Teoso misākiretiko irikataākako. Natokopa ininiāparako ate imarotatari pite kaiama kanapirikape pinini? Natokopa ininiāparako aimarotatari itixi xipokini

ōti kaiamapeka inini ōti? —itxarina Xesosi.

⁴Ininiā Xesosi:

—Erepaniko. !Hāuiritapena apanakini misirienetini. ⁵Kotxi apokako kākiti itomaneri “Teoso mereēkiti nitxaua nota,” inakani. Ninoa misirienetana itomaneri. ⁶Hikenakopiretariko neenamatzixi ene uaimoni, ōtakoxiti apaka. Iuaritika !hīpikarauatape. Kotxi auapitakako neenamatzixi. Txamari itixi xipokini ōti !apokapanika.

⁷Ikara inakari apisapanika, āti uāka neenamauatoko āti uākakata. Apanakini auīte inirimane kata neenamauatoko apanakini auītekata inirimane pakinikata. Ātiātaā kākiti inikoriāriko natxi. Ātiātaā amianari inokanako kākiti. Ātiātaā itixi iakeēkatakako. ⁸Ikara atoko itxako misirikaretxi potorikini. Sito amarini tsi atoko itxako iusaaki.

⁹—Iusaaki hīte maīkaākakako, himisiritiko ikapani. Iposo atoko oka hinaākakako. Nisākire hāuikini xika ikinimane omanataiko hīte.

¹⁰Iusaaki itomaneri !auikaikari Teoso sākire. Itakanapapekarina Teoso kimapore. Imikapiritakakanako. Omanatakakanako. ¹¹Apokako kākiti “Nota Teoso sākire sāpiretakari nitxaua,” inakari. Txamari kona atāo. Ninoa misirienetanako itomaneri kākiti.

¹²Kākiti tiritiko poiāotako, kotxi maerekanitxi iarikako ikini itixitimoni.

¹³Iusaaki kākiti mīteenekiniāri misirikaretxi, imatakanapakanianāri Teoso sākire, auapikako ātipirika Teosokata. ¹⁴Teoso iokanapirena erekari, Teoso auītetxi ininiāua, sāpiretaākakako ikini itixiti auakani, ikini kākītiti imarotiniri ikapani. Ikara inakari auāka atokoikarako itixi xipokini ōti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵Xesosi sāpirenauatapanika:

—Hīte itikariko iteene maerekati kamakari timini aiko Teoso misākiretiko āki. Kitxakapirika Tanieo inakori, Teoso sākire sāpiretakari, sāpiretapekari ikara ene. Hīte ia atatsopatakani, himarotariko ikara.

¹⁶Ikara atoko inakari hītikasaaki hīte ikorapokoriti Xotēia auakani, oxiratarimoni himitekako. ¹⁷Ikara ōti apokasaaki haāpoko nopini hāuiniā, katima hītixako himitekini. !Apakata haāpoko āki hītii himakatzakini.

¹⁸Kikio hīparikauanātakasaaki, hāapokomoni !hīkanapiripe himāka hāpini ikapani. ¹⁹Ikara ōti apokasaaki, kamixironi, kaxitakareroni pakini iteene atatsiitariko. Pasāpaniri ninoa mitekini.

²⁰Hamanaāriko Teoso katxīkareri mauakani himitekini ōtisaaki. Hamanaāriko tomatiko ōtisaaki ikara inakari mauakani ikapani.

²¹Kotxi ikara mitekatxi ōtisaaki kākiti iteene atatsiitariko imisiritiko. Ikara ōti apisa kākiti !imarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekatxi ōti napaāka atoko kākiti !imarotaikari iteene imisiritiko. Ikara ōti apiatakako kākiti misiritiko. ²²Teoso poiāotakari iua ōti ikinipoko kākiti mapinakani ikapani. Ito ōti ininiā, kākiti !auaika. Ipoiāotakari iua ōti, kotxi itiretana kākiti imereēkini.

²³—Iusaakiko āti: “Ia kiki Teoso mereēkiti aiātapakiti inakari,” inakasaakii, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko

posotiiiretxi kākiti tsorikitaātini ikapani. Inirekarina kākiti Teoso mereēkini imisrienetinina.

²⁵ Hikenakota. Nōtākikai hīte ikara inakari apokini ōti apisa.

²⁶ —Hīte sāpiretikosaaki: “Hikenakota. Teoso mereēkiti aiātapakiti āparaā makipakaniā-taāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri maiori apotiitiniua, aimarotari ipikari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini

(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatako. ³⁰ Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini ikapani. Ikara atoko inakasaaki, ikini kākītiti itixi auakani txiapatako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napoākatako, kotxi ikinimane auīte nitxauako iuasaaki. Niotximerekata nikatxakaāpota. ³¹ Okenakotaākako koitxi mitaro, trōpeta inakoro. Iuasaakipekako

niokanataka ninitiriakori itixi iaōka kākiti Teoso mereēkini apotiitakani ikapani.

Piko Mina Pirena

(Marko 13.28-31; Arókasi 21.29-33)

³² Xesosi sāpirenauatapanika:

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ikapani. Pooōporipeka onakasaaki, otomorekasaaki, “Kamoī apokanapanoka,” hītxa. ³³ Iua atokokana, ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁴ Ia nisāpiretai atāo. Itixi auakani !ixipoka ikinipoko nisāpiretakiti mapokakani apisa. ³⁵ Iaxiti xipokapitikako. Īkoraxiti apaka xipokapitikako. Iuaritika nota sākire !ixipoka.

Kākiti !Imarotari Xesosi Apokini Manapi

(Marko 13.32-37; Arókasi 17.20-37)

³⁶ Xesosi sāpirenauatapanika:

—Kākiti !imarotari ikara ōti, nota hītari iaxitikiri nikanapiriini ōti. Teoso niritiriakori iaxitikini apaka !imarotari ikara ōti. Nirinanira imarotari. ³⁷ Nota hītari iaxitikiri nikanapiriākasaaki, kitxakapiriika Noee auakasaaki atoko itxako. ³⁸ Xirataātxi apisa ikinimane nipokota, iāta itxa. Kiki, sito itaniriuata. Ikara atokokanera itxa Noee maporo āki iereētini ōti. ³⁹ Ikara apisa !imarotarina ipininina tīkane. Mokatanitika xirataātxi apoka, ikinikana xipoka itxana. Nota hītari iaxitikiri nikanapiriākasaaki, iua atokokanerako itxa, ininiā iposope hīttxako.

⁴⁰ —Iuasaaki nikanapiriini ōtisaaki, ipi kiki parikauanāta kikio. Teoso niritiri iaxitikiri anikariko āti, āti kaikota itxako. ⁴¹ Ipi sito atarokiri kamakani, āto anikaākako, āto takanapaākako.

⁴² Ininiã iposope h̄txako, kotxi kona hi-marotari h̄iaūite kanapiriini õti. ⁴³ H̄ix-inikariko. Kaapokori imarotaãkamariko kīitiriri apokini õti, limakamako. !Auiritamariko kīitiriri anikiniri itii. ⁴⁴ Kīitiriri apoka kãkiti miãtapakinitipanika. Iua atokokanerako nota apokako himimaro-takinitipanikarako. Ininiã iposope h̄txako nota h̄itari iaxitikiri hiãtapini —itxa Xesosi sãkire.

**Nitiritxi Erekar, Nitiritxi
Maerekati Pakini
(Arókasi 12.41-48)**

⁴⁵ —Ininiã Teoso nitiriakori erekarini h̄txauako. Nisãpiretai nitiritxi kimaroreri inakari, kotxi iua k̄ipitari ipatrãote sãkire. Iuakara ipatrãote paniãta, apanakini initiriakori in̄ikatini ìkapani. Isikakienatana ipatrãote nitiriakori, nipokori sikiko manapi. ⁴⁶ Iua initiri poxokoniuata ipatrãote paniãtakiti iaõka ikaminiã, ipatrãote apokasaaki iposope itxa. ⁴⁷ Atãopitikara nitxai h̄ite. Iua patrão paniãtariko iua initiri ikinika inakiti in̄ikatini ìkapani. ⁴⁸ Nitiritxi maerekatipekana xinikari: “!Katimari ikanapiriã nipatrãote,” itxa. ⁴⁹ Ininiã apanakini nitiritxi ixiroka. Inipokota, iãta poãtakanikata. ⁵⁰ Ininiã ipatrãote kanapiriãko imiãtapakinitipanika. Ikanapiriãko initiri mimarotakinitipanika. ⁵¹ Ininiã ipatrãote xirokitatariko aãpitsã. Iposo atoko imisiritaãkako maerekanikata, “Erekapitikaua ate,” inakanikata. Iuaã kãkiti txiapata, akatsatsiriãtaua ãtipirika. Ininiã ikara nitiritxi maerekati atoko kona h̄txape —itxa Xesosi sãkire.

Tesi ãtokoroakoro Pirena

25 Xesosi sãpirenauatapanika: —Ia nisãpirena oerekai Teoso aūitexi ininiãua. Tesi ãtokoroakoro kosekari tirikapi. Isana kimaporiã. Iãtaparina ipatrãotena. Iua inapanikako

kiinirimoni ìtanorouatini ìkapani. ² Siko ãtokoro kīikiterini, siko mīkiteni. ³ Mīkiteni anikari tirikapi koana, txamari !anikarina tirikapiã. ⁴ Kīikiterini anikari tirikapi koana. Apaka anikarina tirikapiã. ⁵ Ipatrãotena !katimari apokini. Ininiã itaponoka ininiãna, imakanãtana.

⁶ —Apanikanõka ikenakotarina: “Apokanapanoka. Hisapoka. Hãpiãkatari.”

⁷ —Ininiã ãtokoroakoro õkitikaua, tirikapi iopotokaka, sa itxana. ⁸ Ninoa mīkiteni amanaãri kīikiterini tirikapiãte, kotxi mīkiteni tirikapite oakaarita.

⁹ —Kīikiterini apakapapiretana: “Kona. Tirikapiã ate nakiti !apakata h̄ite ìkapani. Ate ìkapaninokara apakata. H̄isa tirikapiã v̄txitakarimoni. Hiamotariko.”

¹⁰ —Ininiã ninoa mīkiteni sari tirikapiã iamotinina. Ninoa sikasaaki, ipatrãotena apoka. ãtokoroakoro iposope inakani iroã iuakata aapokotxi ãki ìtanorouatakari kiiniritiã. Itore totaãka.

¹¹ —Ereka ãtokoroakoro tirikapiã amotakani kanapiriã. Ninoa akirita: “Patrão, patrão, pimatakakinua itore aïroni ìkapani,” itxana.

¹² —Ipatrãotena apakapapireta: “H̄isipeka. Atão nisãpiretai. !Nimarotai h̄ite.”

¹³ Xesosi sãkirauata: —Erepaniko. Iposope h̄txako, kotxi !himarotari nota h̄itari iaxitikiri kanapiriini õti. !Himarotari amonikitauako napokini —itxa Xesosi.

Ipi ãti Pakini Nitiritxiakori

(Arókasi 19.11-27)

¹⁴ Xesosi sãpirenauatapanika: —Nikanapiriini ia atoko itxapaniko. Kiki aiamatapeka õtakoxiti ãti itixitimoni isini ìkapani. Ininiã akiritari ini-

tiriakori. “Hinikatariko ikini nitii,” itxana. ¹⁵Isikari initiri apia imaroretakari txineiro ota siko mio. Äti initiri isika txineiro ota ipi mio. Äti initiri poiäoka imarotakari ätika mio txineiro ota isikari iua. Eereka sipe itxa.

¹⁶—Sïko mio apakapakari amotari titixi, eereka vëtxita itxari. Ikara atoko ininiä apakaparo txineiro ota tesi mio. ¹⁷Iua ipi äti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸Iua ätika mio txineiro ota apakapakari, ikisakari kipatxi, taka itxaro txineiro iua aariko äki. Ikataro ipaträote txineirote.

¹⁹—Eereka okananixiti inaka atoko ipaträotena kanapiriä. Akiritana: “Kiätokopa hïtxataro nitxineirote?” itxana. ²⁰Iua sïko mio apakapakari minari tesi mio. Iua säpiretari ipaträote: “Patrão, pite sikano sïko mio txineiro ota. Patamata. Napakapari apikomoni sïko mio txineiro ota pite ikapani,” itxa.

²¹—Ipaträote apakapapiretari: “Erekapitikai pite. Erekarini nitiritxi pitxaua. Erekarini pinikatiniro nitxineirote. Erekapitikari pinikatiniri poiäoka nisikinii. Ininiä nauritaiko itomaneri pinikatini. Ininiä pipoxokoniuatoko notakata,” itxa.

²²—Iua ipi mio ota apakapakari apoka. Iminaro ipi ipi pakini mio. Isäpiretari ipaträote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ikapani,” itxa.

²³—“Erekapitikai pite. Erekarini nitiritxi pitxaua. Erekapitikari nitxineirote pinikatini. Erekarini poiäoka pinikatini. Ininiä itomane nitakanapakari pinikatini ikapani. Ininiä pipoxokoniuatoko notakata,” itxa.

²⁴—Eereka iua ätika mio txineiro ota apakapakari apoka. Iua säpiretari ipaträote: “Patrão, nimarotai pite. Pataparaxinirei pite. Pite amotari

pikiena, kotxi kona pite takarauata. Pite apari pikiena pimaparïkauatakaniätaä. ²⁵Nipïkarauatiniä, nikipataro pitxineirote kipatxi äki. Patamata. Oia pitxineirote,” itxa.

²⁶—“Nitiritxi maerekati iareri pitxaua pite. Pimarotari niamotiniri nikiena, kotxi ñitakarauata. Pimarotari nota apari nikiena nimaparïkauatakaniätaä. ²⁷Ikara atoko ininiä, pimanirekakaniäri piparïkauatini, kinirepa kona pisikatari nitxineirote päkomoni? Pisikaäka-maroko, napakapamaroko apikomoni nitxineirote nikanapiriäkasaaki,” itxa.

²⁸Ininiä äti ipaniäta:

—“Pimakatzakariko iua mio ätika mio auakiti. Tesi mio txineiro ota auakiti-moni pisika. ²⁹Kotxi apikomoni isiäkako iua itomaneri auakiti, ininiä apiata auinariko iua. Iua poiäoka auakiti, inakito mixirikaäkako. ³⁰Ia ninitiri iareri hōka mapara piäkatximoni. Iuaä käkiti txiapata. Akerakitatsiriüta itsii xika.”

Ikinimane Apotiitaäkako Xesosi Apisatoõ

³¹Apikomoni Xesosi säpirenauata:

—Nota hïtari iaxitikiri nikanapiriäkasaaki auïtetxi ninakasaakiaua, ikinika Teoso nitiriakorikata, niitopäkako auïtetxi itopanere nopini. Peerekari iusaaki. Ikinimane paxitanoko nota. ³²Ikini uäkati käkiti apotiitaäkako nota apisatoõ. Iusaaki nikaiarikitanako ninoa. Soti auïte, kapra pakini piratakari ipiraakori koketaniua ikaiarikitatini atokokanera, nota hïtari iaxitikiri kaiarikitana ikinimane käkiti. ³³Pirätxi piratakari takiniri soti auïte ikikomoni, itakiniri kapra isanaremoni, iua atokokanera nota hïtari iaxitikiri takari käkiti erekarini nikikomoni. Käkiti maerekani nitaka nisanaremoni.

³⁴—Eereka nota käkiti auïte txanako ninoa käkiti erekarini nikikomoni

auakani: “Niri sikari erekari hītemoni. Hina. Hīroā auītetxi nininiātaāua. Ia auītetxi nininiātaāua maiamatapeēkaika hīte ikapani itixi kamikosaakipeka. ³⁵ Mitxipeka ninatxitakasaaki, hīte sikakienatapekano nota. Niposonatakasaaki, āparaā hīsikapekano. Āti itixiti nīkasaaki, hīte apakapapekano nota. ³⁶ Nimamākanisaaki, mākatxi hīsikapekano. Namianatakasaaki, hinīkatapekano. Kateia āki nauakasaaki, himotikaētapekano. Ininiā hīroā,” nota kākiti auīte txanako kākiti erekarini.

³⁷ —Ininiā kākiti atāo inakari kamakani apakapapiretariko: “Apiananiri, kirisaakipa pinatxitakasaaki, asikakientatai? Kirisaakipa piposonatakasaaki, āparaā asikai? ³⁸ Kirisaakipa āti itixiti pīkasaaki, aāpakapai? Kirisaakipa pīmamākanisaaki, mākatxi asikai? ³⁹ Kirisaakipa pamianatakasaaki, anīkatai? Kirisaakipa kateia āki pauakasaaki, amotikaētai?” itxanonako nota.

⁴⁰ —Ininiā nota kākiti auīte apakapapiretanako: “Atāopitikara nitxai hīte. Kākiti poiāori, nisākire auīākari, hītiretiniā, iuasaaki nota hītiretini atokokana hītiretari,” nitxanako ninoa.

⁴¹ —Iuasaaki nitxanako nisanaremoni auakani: “Hīsipeka. Teoso misiritaiko hīte, kotxi !hīkīpitari iua sākire. Hīsipeka arikatxi maxipokatimoni. Teoso kamari iua arikatxi, Satanasi misiritikoātaā tīkane, Satanasi nitirakori misiritikoātaā tīkane. Hīsipeka iuamoni. ⁴² Kotxi ninatxitakasaaki nipokori !hīsikano. Niposonatakasaaki, āparaā !hīsikano. ⁴³ Āti itixiti nīkasaaki, !hinirekano haāpoko napokini. Nimamākanisaaki, kona mākatxi !hīsikano. Namianatakasaaki, !hinīkatano. Kateia āki nauakasaaki, !himotikaētano,” itxanako kākiti maerekani.

⁴⁴ —Ininiā ninoa apakapapiretariko: “Apiananiri, pinatxitakasaaki, piposonatakasaaki, pamianatakasaaki, pīmamākanisaaki, kateia āki pauakasaaki, āti itixiti pīkasaaki, kirisaakipa ate !apakapai?” maerekani txanoko nota.

⁴⁵ —Ininiā nota kākiti auīte apakapapiretanako ninoa: “Atāopitikara nitxai hīte. Himanirekakanisaakiri hītiretiniri kākiti poiāori nisākire auīākari, iuasaaki !hinirekari nota hītiretini,” nitxanako ninoa.

⁴⁶ —Ininiā Teoso iokanatanako ninoa maerekani kamakani misiritikoātaā. Iuaātaā ninoa misiritaākapikako. Imisiritikona kona xipokaikako. Kākiti atāo inakarino kamakani auapininiika imaxipopekaniika Teosokata —itxa Xesosi.

Xesosi Okaenetiko Pirena

(Marko 14.1-2; Arókasi 22.1-2; Xoāo 11.45-57)

26 Ikara inakari isāpiretaka atoko, Xesosi misākiretana imoianariakori:

²—Hīte imarotari ipi ōti napaka atoko aua Pāscoa inakori kiiniriti. Iua kiiniriti auakasaaki nota hītari iaxitiki nisikaākako nimokaiakariakorimoni. Aamina ipiriāmitakari nopini nitakaākako. Iua atoko ipina nitxako —Xesosi txana imoianariakori.

³Iuasaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana. ⁴Imapapiretarina Xesosi imaīkinina ikapani. Inirekarina Xesosi imaīkinina apanakini mīmarotakinitika. Imisākiretakakana Xesosi okinina ikapani.

⁵—Kiinirisaaki !amaīkapaniri. Amaīkiniāri, apanakini kākiti naiatamaua ate —itxakakana.

Sito Kamariāro Mīkaro

(Marko 14.3-9; Xoāo 12.1-8)

⁶Xesosi auanāta aapokotxi Petánia inakoriātaā. Isari Simāo inakori aapokomoni. Iua Simāo mitxi amianatakari, maere matati. Eereka erekapekari. ⁷Simāo aapoko Xesosi auakasaaki, sito apoka iuamoni. Ominari kopitipaki kai kamakori, kai arapástiro inakori. Kopitipaki xāpoka kamariāro. Oa pakaronero. Xesosi nipokonātakasaaki, oa sito kitakaro kamariāro ikiiā.

⁸Imoianariakori itikari Xesosi kiiā okitakiniro, ininiā ninoa naiataua:

—Kinirepa oa ioanataro kamariāro?

⁹Kinirepa kona ovētxitataro? Ovēxtitaākamaroko oāpakapamaroko txineiro ito, matxineirotenimonikari osikini ĩkapani —itxakakana.

¹⁰Xesosi imarotari ninoa ikara atoko ininina.

—Kinirepa homanataro oia sito? Erekari okaminano notamoni.

¹¹Auapikanako matxineiroteni hitekata. Kona nota auapani hitekata. ¹²Oia kitakaro kamariāro nikiiā, nota iposope ninini nikatiko apisa. ¹³Atāo nisāpiretai hīte. Teoso iokanapirena erekari sāpiretikoātaā ikini itixiti, isāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —Xesosi txana ninoa.

Xotasi Sari Sasetotxi Auīteakorimoni

(Marko 14.10-11; Arókasi 22.3-6)

¹⁴Eereka Xesosi moianari Xotasi Isikariotxi inakori sari sasetotxi auīteakorimoni.

¹⁵—Xesosi nisikiniāi hītemoni, kiripa hīte sikano nota? —itxana ninoa.

Ininiā ninoa:

—Asikaiko trīta txineiro ota pirata kamakoro —itxana ninoa.

Ininiā ĩkitxtarina. ¹⁶Eereka Xotasi iātapari Xesosi poiāonoka kākītikata auakasaaki, imīkapiritiniri ĩkapani.

Páskoa Kiiniriti Kamiko

(Marko 14.12-21; Arókasi 22.7-13)

¹⁷Pāo miātiākati nikiko kiiniriti portorikini ōti, Xesosi moianariakori apoka iuamoni.

—Namonipa ate maiamatari Páskoa kiiniriti pite ĩkapani? —itxtarina iua.

¹⁸—Hīsa sitatximoni. Nisāpiretakiti iaōka hinitari kiki. Hāpokasaakiri, hītxariko iua: “Koerekareri txai, ipinini tīkane kaiamapeka. Ikamariko kiiniri Páskoa inakori pite aapoko imoianariakorikata,” hītxako.

¹⁹Ininiā imoianariakori kamari Xesosi paniātakiti iaōka. Imaiamatari ikinika kiiniri ĩkapani.

²⁰Īkanōkapeka inakasaaki, Xesosi imoianariakorikata topāka inipokotinina ĩkapani. ²¹Inipokotakasaakina, Xesosi txana:

—Atāo nisāpiretai hīte. Ātika hīte sauaki mīkapiritanoko nota.

²²Ininiā imoianariakori tsorīkaāta. Iteene imatinaniuatana. Āti pimaāri:

—Apiananiri, atauako notakani?

Iua atokokana ātipekana:

—Apiananiri, atauako notakani?

Ikara atoko itxanātana ikinikana, ipimaaāpotinirina Xesosi. ²³Ininiā Xesosi apakapapiretana:

—Ia tiitxiā notakata nikakari mīkapiritanoko. ²⁴Nota hītari iaxitikiri okaākako. Teoso sākire iōkatsopatakori sāpiretapekari nipinini tīkane. Nota hītari iaxitikiri mīkapiritakari iteene misiritaākako. Erekarariko maponaniākatika inaākamako.

²⁵Ininiā Xotasi kamīkapirireri misākiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Īto, Iarēka Pakini

(Marko 14.22-26; Arókasi
22.14-23; 1 Korīto 11.23-25)

²⁶ Inipokonātakasaakina, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxa.

Eereka imaxinīkitari, sika itxari imoianariakorimoni.

—Apakapa, nika hītxako. Ia niīto — itxana.

²⁷ Eereka ikosekari iākoanatzī iāriā auini. Imisākiretari Teoso:

—Erekapitikari ia iāriā pisikakiti atemoni —itxa.

Eereka sika itxari iākoanatzī ninoamoni:

—Hīkinika hiātariko. ²⁸ Ia niarēka xiketakarī makatxakariko kaiāopokori kākiti maerekani. Teoso sāpiretapekari kākiti ikamaenetakiti amaneri kākiti īkapani. Ia niarēka oerekari kākiti, Teoso kamapekari ikamaenetakiti. ²⁹ Atāo nisāpiretai. !Niātaikaroko ovapeē, Teoso auītetxi ininiātaāua nimapokakanisaaki. Iuaā napokasaaki niātari. Amaneri iāriāti niātako hītekata —itxana imoianariakori.

³⁰ Xipoka atoko ixikaretarina xikari Teoso īkapani. Eereka isana oxiratarimoni Oriva inakorimoni.

Xesosi Sāpiretari Petro Kīpatiniri Iua

(Marko 14.27-31; Arókasi
22.31-34; Xoāo 13.36-38)

³¹ Iuaā Xesosi misākiretana imoianariakori:

—Ia īkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraakori iarikitatoko,

itxa Teoso sākire iōkatsopatakori. ³² Ininiā eereka nota nipinaāka atoko,

iuaīkana nōkitikaākaua atoko, nisako hīte apisa Kariréiamoni —itxa.

³³ Ininiā Petro apakapapiretari:

—Nota !nitakanapai pite. Atxiīti ikinimane takanapai, iuaritika kona nota takanapai —itxa.

³⁴ Ininiā Xesosi:

—Atāo nisāpiretai. Ia īkanōkati patari sākirauatini apisapanikako, “!Nimartari iua,” pitxanoko ipi āti pakinikata.

³⁵ Ininiā Petro:

—Ikara atoko !nitxapanii pite. Nikipatinii apisapanikamako, nipinamako.

Ikinika Xesosi moianariakori ikara atoko itxana.

Xesosi Misākiretiniri Teoso Xetsémani Inakoriātaā

(Marko 14.32-42; Arókasi 22.39-46)

³⁶ Eereka Xesosi sari imoianariakorikata Xetsémani inakoriātaā. Xesosi:

—Uai hīitopāka. Ikiraā nisako Teoso nimisākiretini īkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaā Xesosi tsorīkaānāta, imaromaxiretari.

³⁸ Imisākiretana ninoa:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana ninoa.

³⁹ Apikomoni isa, pamaka itxa, misākireta itxari Teoso:

—Niri, atauako apakata pimakatxakiniri nimisiritiko akamoni īkari? Kona ninirekari natatsirauatini. Iuaritika pite nirekiniāri, ininiā nota apaka nirekari — itxari Teoso.

⁴⁰ Iuasaaki ikanapiriā ipi āti imoianariakori auiniātaā. Ninoa imkanāta:

—Petro, atauako kona hīte mīteenekari hītikapokotini āto oaranoka? ⁴¹ Erepaniko. Hinirekasaakiri maerekati hīkamini, !hīkamapiri. Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !nirekari maerekati

sosi, ininiāra isa Xesosi tikini imarotiniri ikapani.

⁵⁹ Kaipasi aapoko āki Sasetotxi auūteakori, kiomātxiakori, ikinika Xoteo auūteakori pakini nitana kākiti aāpirena kamakani Xesosi okinina ikapani. ⁶⁰ Itori kākiti sāpiretari aāpirena Xesosi ikamapiretinina. Txamari ixika !auari Xesosi okinina ikapani.

Eereka apokana ipi aāpirena kamakani. ⁶¹ Ninoa txari:

—Ia kiki txari: “Nota posotari aiko Teoso misākiretiko nirikini. Ipi āti ōtisaaki niposotari iuaikana nōkitikiniri,” itxa isākire.

Kona atāo ninoa sākire. ⁶² Sasetotxi auūte apiatakari ōkitikaua.

—Kona papakapapiretatari pitemoni apoīrauatakani? Atāokani piposotatari ikara atoko pikamini? —itxari Xesosi.

⁶³ Xesosi !kasākireri. Ininiā sasetotxi auūte apiatakari iuaikana misākiretari Xesosi:

—Uatxa nipimaāi Teoso mipikati apisatoō. Atāonani pisāpiretaua. Pite, Teoso mereēkiti pitxataua? Teoso ākirikai pite? —itxari Xesosi, kotxi inirekari Xesosi kerokiniri isākire.

⁶⁴ —Ari, iuapitikanano. Nisāpiretaiko hīte hīkinika. Hātamariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —Xesosi txana ninoa.

⁶⁵ Sasetotxi auūte apiatakari kenakotari ikara Xesosi sākire. Iuasaakipeka iua matsorākari imāka, kotxi kona xatiki ipotxitari Xesosi sākire.

—Maerekati isākire: “Teoso ākirirano,” itxa. !Anirekaikari apanakini kamapiretiniri Xesosi. Uatxaika hīkenakotapekari isākire maerekati. ⁶⁶ Kiātokopa atxatari Xesosi? —itxana ninoa.

—Ixika auapeka ipinini ikapani ininiā uatxa okaākapitikako —ninoa txari iua.

⁶⁷ Eereka ikiisokatoōtarina. Iāsokarina. Apanakini aritoōtari Xesosi.

⁶⁸ —Pite Teoso mereēkiti pininiāua, pisāpiretaua, kipa aritai? —itxarina iua. Inapetarina.

Petro Kipatari Xesosi Imarotini

(Marko 14.66-72; Arókasi 22.54-62;

Xoão 18.15-18, 25-27)

⁶⁹ Iuasaaki Petro topākanāta mapara pirikeri āki. Ātokoro Kaipasi nitero sari iuamoni.

—Pite Xesosi Kariréiakiri moianaripitikarai —otxari iua.

⁷⁰ Txamari iua kipatari ikinimane apisatoō.

—!Nimarotari ikara atoko pinanātakiti.

⁷¹ Ininiā isa pirikeri iroānakikomoni. Iuaā āto ātokoropekana Kaipasi nitero atamatari iua. Ininiā osāpiretana kākiti iuaā auakani:

—Xesosi Nasareekiri moianaripitikara ikira —otxa.

⁷² Iuaikana ikipatari:

—Teoso imarotari iua kiki nimimaro-takani —itxa.

⁷³ Eereka paītiki atoko kikiākini iuaā auakani sari Petromoni:

—Pite atāopitika iua moianaripitikarai, kotxi pisākire ipinimoni. Kākiti Kariréiakiri sākire atokokana, Xesosi sākire atokokana pitxa pite sākire —ninoa txari Petro.

⁷⁴ Ininiā Petro apakapapiretana:

—Atāo nisākire minakanāua Teoso misiritanoko. Nisākire atāopitika. !Nimarotari iua kiki —itxama.

Iuasaakipeka patari sākirauata.

⁷⁵ Ikara ikenakotakasaaki, Petro xinikari Xesosi sākire, kotxi mitxipe Xesosi txari iua: “Patari sākirauatini apisapanikako, ipi āti pakinikata, ‘!Nimarotari iua,’ pitxanoko.” Ininiā Petro sipeka. Itxiapakata.

Xesosi Pirato Apisatoõ

(Marko 15.1; Arókasi
23.1-2; Xoão 18.28-32)

27 Katimatiníkata sasetotxi auíteakori, kiomãtxiakori pakini apotiitaua. Imisäkiretakakana:

—Kiãtokopa atxatari Xesosi aõkini? — itxana.

²Eereka iaxirikãkitakarina Xesosi, anika itxarina Homano auíte Põsio Pirato inakorimoni, sikanapa itxarina.

Xotasi Ipinini

(Átosi 1.15-19)

³Xotasi, Xesosi mikapiritakari, kenakoenetakasaakiri Xesosi ipinini tíkane, maerekaxiniretinoka itxa, kotxi iuaka sikari Xesosi imokaiakariakorimoni okiko tíkane. Iuaikana isipikaro tríta txineiro ota pirata kamakoro sasetotxi auíteakori, kiomãtxiakori pakinimoni.

⁴—Nota kamari maerekati. Nimikapiritari Xesosi. Ixika !auari iua ipinini ikapani —itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

⁵Ininiã Xotasi okaro txineiro ota Teoso misäkiretiko aikoti åki, eereka isipe åtiãtaã. Iuaãtaã iuaka iaxirikanok-itapeua, aamina poria iaxirikaua, arõka, ipipe itxa.

⁶Teoso misäkiretiko aikoti åki sasetotxi auíteakori kosekaro oa txineiro.

—Oia txineiro kiki okiko iki. Ia xika ate !auritaãka aãpotiitiniro oia txineiro åto txineirotikata Teoso misäkiretiko aikotiãkero. ⁷Kiãtokopa atxataro oia txineiro? —itxakakana.

Eereka ninoa imarotape. Iamotarina kiki, tiitxi kamakari kikiote, Xoteo minakanuia ikatiko tíkane. ⁸Oa txineiro kiki okiko iki xika, Xesosi okiko iki xika, iua akauari takauãkataãka “Arëkatxi

Akauariti” inaãka. Uatxa akiritaãkapanika iuaãtaã “Arëkatxi Akauariti.” ⁹Iua atoko ininiã, kitxakapirika Teoso sãkire sãpiretakari Xeremia inakori atão txari:

Isaeo auakani iikitxitari tríta ota pirata kamakoro Teoso mereëkiti okiko ikapani.

¹⁰Eereka isikarona oa txineiro ota titxi kamakarimoni, ikikiote iamotina ina ikapani, kotxi Teoso nirekari ia atoko ikaminina,

itxa Xeremia kitxakapirika. Ininiã Xeremia sãkire iaõka apopeka iusaaki.

Xesosi Pirato Apisatoõ

(Marko 15.1-5; Arókasi
23.1-5; Xoão 18.28-38)

¹¹Iusaaki Xesosi tima Homano auíte Pirato inakori apisatoõ. Pirato pimaãri Xesosi:

—Pitekani Xoteoakori auíte txataua?

—Ari, iuapitikarano —itxari.

¹²Eereka sasetotxi auíteakori, kiomãtxiakori pakini apoõtari Xesosi. !Kasãkireri Xesosi iusaaki. ¹³Ininiã Pirato txari:

—Atauako kona pikenakotatari apoitiniina?

¹⁴Xesosi !kasãkireri, ininiã Pirato tsorikaãta. Åkixinireë iua:

—Kininiãpa !kasãkireri?

Xesosi Okiko Nirekiko

(Marko 15.6-15; Arókasi
23.13-25; Xoão 18.38–19.16)

¹⁵Ikini kiiniriti Pãskoã inakori, Homano auíte sikakari åtika kateia åki auakari kãkiti nirekakiti. ¹⁶Iusaaki aua kateia åki auakari Pahapasi inakori. Ikinimane imarotari iua. ¹⁷Itomaneri kãkiti apotiitakasaakiaua, Pirato pimaãna ninoa:

—Ìkiripa kateia åki auakari hinireka nisikakini? Pahapasikani? Xesosi Teoso mereëkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topākanāta kākiti misiritiko isāpiretini pakita āki. Iuasaaki itanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiā maerekaxiniretinoka nitxa —otxari.

²⁰ Mapara sasetotxi auiteakori, kiomātxiakori pakini misākiretana kākiti iuaātaā apotiitakanua:

—Piratomoni hītxako: “Pisikakariko Pahapasi. Pokākitakariko Xesosi,” hītxariko —itxana kākiti.

Ininiā ninoa auikari isākirena.

²¹ Eereka Pirato pimaāna kākiti iuaā apotiitakanua:

—Īkiripa kateia āki auakari hinireka nisikakini?

Ininiā ninoa akirikata:

—Pahapasira.

²² —Kiātokopa nitxatari Xesosi, Teoso mereēkiti inakorima? —itxa Pirato.

Ikinikana apakapapiretana:

—Aamina ĩpiriāmitakari nopini pitokakitariko.

²³ Ininiā Pirato:

—Kixikapa? Maerekati !ikama —itxa.

Iuasaakipeka ninoa iteene akiripoakatana:

—Aamina ĩpiriāmitakari nopini pitokakitariko.

²⁴ Ininiā Pirato kona sāpiretakari Xesosi isikakini, kotxi ninoa neenamauatanapanoka. Ikosekari āparaā. Arokauakotaua ninoa apisatoō.

—Na nota xikani ia kiki ipinako. Hīte xikakara ia kiki ipina —Pirato txana ninoa.

²⁵ Ikinimane apakapapiretari:

—Atāopitikara. Misirikaretxi auiniā okiko xika, ate, aamariteni pakini apakapariiko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniātari Xesosi

xirokitatiko aāpitsaā. Eereka isikari Xesosi isotatonemoni aamina ĩpiriāmitakari nopini itokakitinirina tīkane.

Sotatoakori Napetiniri Xesosi

(Marko 15.16-20; Arókasi 22.63-65; Xoão 19.2-3)

²⁷ Ininiā sotatoakori anikari Xesosi ninoa auite aapokomoni. Iuaā akiritarina apanakini sotatoakori, ininiā ikini-mane sotatoakori ākitari Xesosi. Inapetarina. ²⁸ Imaktxakarina Xesosi māka. Mākatxi pōkamarari ieretaka itxarina. ²⁹ Eereka itakarina saporietā kotipiaro kamakori ikiiā. Iuako ikikomoni taka itxari aāke. Ininiā itxīkitakarina Xesosi auitetxi atoko ininiāua. Eereka ikapoto-reēkauana iua apisatoō, napeta itxarina Xesosi:

—Aūiite —itxarina Xesosi inapetinina.

—Xoteo auitekai pite —itxarina.

³⁰ Ikiisokarina. Iua aāke ikosekana, arikiita itxapikarina. ³¹ Inapetarina, eereka imaktxakarina mākatxi pōkamarari. Iua nakiti imāka iuaikana ieretaka itxarina. Eereka mapara anika itxarina, aamina ĩpiriāmitakari nopini itokakitinirina ĩkapani.

Xesosi Tokakitaāka Aamina ĩpiriāmitakari Nopini

(Marko 15.21-32; Arókasi 23.26-43; Xoão 19.17-27)

³² Xesosi anikaāpotakasaakina, aōkitarina Sireni sitatxitikiri, Simão inakori. Ninoa paniātari iua, Xesosi anikakiti aamina ĩpiriāmitakari, anikini ĩkapani, kotxi Xesosi !iposotaikari anikiniri. Ininiā Simão anikari. ³³ Apokana Kóokota inakoriātaā. Apanakini akiritari “Kiitātatxi” inaāka akiritiko. ³⁴ Iuaā iāriāmoni ikoketarina pinītxi kīpixiāri, sika itxarina Xesosimoni, Xesosi iātini

ĭkapani, imakini ĭkapani. Atapixiātaāka atoko, !iātari. ³⁵Ininiā itokakitarina Xesosi aamina ĭpiriāmitakari nopini. Inaāka atoko ikamarina sarauatxi kai soroā. Sarauatxi kāiatakani apakapari Xesosi māka. Kitxakapirika Teoso sākire sāpiretakari sāpiretapekari ikara atoko inini tĭkane. Iua txari:

Ixanakarina nimāka. Sarauatxi ikamana nimāka apakapakani imarotinina ĭkapani.

Itxa Teoso sākire sāpiretakari kitxakapirika. ³⁶Sarauatxi xipoka atoko iitopākana. Imoiaārina Xesosi, kākiti manikakaniri ĭkapani. ³⁷Aamina ĭpiriāmitakariā ikii nopini itakarina iōkatsopatakori: “Xesosi, Xoteoakori Auĭte,” itxa iōkatsopatakori. Ikara xika okaāka Xesosi.

³⁸Xesosi takote itokakitarina ipi kiĭtiririni aamina ĭpiriāmitakari nopini, āti Xesosi kikomoni, āti Xesosi sanaremoni. ³⁹Kākiti iuaā napakani napetari, nokonoko itxa kiitana. Maerekaeneti isākirepiretarina Xesosi:

⁴⁰—Pite txari: “Aiko Teoso misākiretiko niriāka atoko, ipi āti ōtisaaki iuaĭkana nōkitikari,” pitxa. Piteka pimakatxakaua. Pite Teoso ākiri pinakasaakiua, pikatxaka. Ikara atoko itxa sākiretana kākiti iuaā napakani. ⁴¹Iua atokotxikana itxana sasetotxi auĭteakori, kaiōkatsoparerini, kiomātxiakori pakini ikara atoko inapetarina Xesosi:

⁴²—Iua makananitapekari apanakini. Txamari iuaka ĭposotari imakananitinia. Iua Isaeo auakani auĭte ininiāua, iuaka imakatxakamauako. Ikatxakiniā, ate auikari iua sākire. ⁴³Iua auikari Teoso sākire. Maiātapari. Atauako Teoso nirekari imakatxakiniri iua uatxa, kotxi iua txari: “Teoso ākirirano nota,” itxa — itxana.

⁴⁴Kiĭtiririni iuakata tokakitakoni apaka maerekaeneti isākirepiretarina Xesosimoni.

Xesosi Ipinini Pirena

(*Marko 15.33-41; Arókasi 23.44-49; Xoão 19.28-30*)

⁴⁵Apaniāxiti itixi piāka. Ipi āti pakini oara ipiāka. ⁴⁶Ipi āti pakini oarape kikatamonipeka Xesosi iteene akirikata: —Erii, Erii, aremaa sapakatani.

Ikara Epireo sākire. Ia atatsopatakari sākireē, “NiTeosone, niTeosone, kinirepa pitakanapano?”

⁴⁷Kākiti iuaā auakani kenakotari Xesosi sākire. Ninoa uākatari akirinātiniri Erĭasi.

⁴⁸Ininiā āti miteka, mapoa atoko inakari iāka itxari iāriā katxioārmoni. Aāke mapotōkire taka, isirika itxamari Xesosi iātini ĭkapani. ⁴⁹Txamari apanakini:

—Kona pisikapiri. Atxiĭti Erĭasi makatxakari iua —itxana.

⁵⁰Iuaĭkana Xesosi iteene akirikata. Eereka iokanatarari ixinire Teosomoni, eereka ipĭpe.

⁵¹Iuasaakipeka mākatxi mata Teoso misākiretiko aikoti āki arōkakari tsorakita. Itano itsorakita. Ixitipeka apoka. Mĭtxi iua mākatxi mata !auiritari kākiti ĭroini Teosonani Auini Pakitaātaā. Itsorakitakasaaki, itixi iakeēkata. Kai mitari xoreka iusaaki. ⁵²Apanakini akauari xoreka. Itomaneri kākiti ipĭkani Teoso nakitiakori iuaĭkana ōkitikapekaua. ⁵³Osipikarina akauari. Xesosi iuaĭkana ōkitikaākaua atoko, isana Xerosareēmoni, Teoso nakiti sitatxitimoni. Iuaā itomaneri kākiti itikana ninoa iuaĭkana ōkitikakaniaua.

⁵⁴Sotato auĭte, sotatoakori Xesosi moiaākani apaka, itikarina Xesosi ipinini. Imarotarina itixi iakeēkatini, ininiā iteene ipikarauatana.

—Atäopitikara Teoso äkiri itxaua — itxana.

⁵⁵Itoro sitoäkini ikira atoko atamanätari Xesosi. Kariréia tōpa Xesosi potorikasaaki ninoa sitoäkini moianatari iua. ⁵⁶Maria Matarena inakoro iuaä aamina ipiriämítakari ikira atoko auanäta apaka. Txiako, Xosee pakini inoro, Maria inakoro iuaä aua. Sepeteo anaakori inoro iuaä auanäta apaka.

Xesosi Ikatiko Pirena

(*Marko 15.42-47; Arókasi 23.50-56; Xoão 19.38-42*)

⁵⁷Íkanōka katxineiroteri Xosee inakori, Arimateia sitatxitikiri, apoka. Iua apaka Xesosi säkire auíäkari itxaua. ⁵⁸Isa Piratomoni. Xesosi ítō amanaä. Ininiä Pirato paniätari isikiko. ⁵⁹Ininiä Xosee anikari Xesosi ítō. Mäkatxi mataä iapirika itxari. Mäkatxi mata amaneri arínio inakoriä iapirikari. ⁶⁰Eereka taka itxari akauari äki. Iua akauari amaneri, Xosee kisakakiti kai auíte iriko. Ikamari iua akauari ipíkasaaki ikatiko íkapani. Xesosi ítō iriko äki itaka atoko ikakanapiritari kai meraminapoari, itota itxari akauari iriko, sipe itxa. ⁶¹Iuasaaki Maria Matarena inakoro, äto Maria inakoro apaka topäkanäta akauari apisatoö.

Imoiaärina Xesosi Akauari

⁶²Iua öti sesta veira, tomatiko öti apisa. Iua öti Xoteoakori paríkauatapi-tipo, tomatiko öti imaparíkauatakani íkapani. Katimatínikata sasetotxi auíteakori, pariseoakori pakini sari Piratomoni. ⁶³Ninoa txari:

—Ate xinikari iua kamisirienereri säkire. Iua txari: “Nipíkasaaki eereka ipi äti pakini ötisaaki iuaíkana nökítikauako.” ⁶⁴Pipaniätana pisotatoneakori ipi äti pakini öti akauari imoiaänina. Imamoiaäkaniärina,

imoianariakori íkanōka sari iuaä ítō ítírikinina. Ininiä eereka isäpiretarina käkiti: “Teoso ökitikapekari iua. Iuaíkana auäki itxapeka,” itxamana ninoa imoianariakori. Ininiä ikara misirieneretxi apiatama eereka. Mitxiri misirieneretxi poiäoka —itxarina Pirato.

⁶⁵—Ininiä hanikari sotatoakori akauari moiaäkani tíkane. Hísa. Hítotariko akauari sona —Pirato txana.

⁶⁶Ininiä isana iuaä. Akauari sona iteene itotinina íkapani. Itakarina Pirato takaötxikare itore nopini. Sotatoakori iuaä kaikota. Imoiaärina akauari.

Xesosi Iuaíkana Auäki Inini

(*Marko 16.1-8; Arókasi 24.1-12; Xoão 20.1-10*)

28 Tomatiko öti xipoka atoko, tomíko íkanökapanika Maria Matarena, oa äto Maria pakini sari akauarimoni.

²Ninoa saäpotakasaaki, katimaritika itixi iakeékata itapararitika. Iuasaaki Teoso nitiri iaxitikiri katxaka. Ikata-pakiritari kai akauari tore, topäka itxa iua kai nopini. ³Itöo atokatxi iotximere atoko itxa. Imäka mapoa saro atoko itxa. ⁴Sotatoakori, akauari moiaäkani, kiki-nanaäkata, ipíkarauatinina. Irikana xitipeka. Ipíkani atokopeka itxana.

⁵Eereka ninoa sitoakoro apoka akauari. Teoso nitiri misäkiretana:

—!Hípíkarauatape. Nimarotari híte nitanätiniri Xesosi, aamina ipiriämítakari nopini tokakitakori. ⁶!Auaika uai. Teoso ökitikapekari iua. Ikara iua säpiretapestakai híte. Uai hina. Hätamatari ítō mitxi auiniätaä.

Ininiä ninoa atamatari.

⁷—Katima hítxako imoianariakorimoni hísiní íkapani. Hísäpiretana: “Iuaíkana auapeka itxa Xesosi. Teoso ökitikapekari iua. Iua sari híte apisapanika Kariréiamoni. Iuaä

haõkitariko iua,” hĩtxako ninoamoni. Ikara atoko nitxa nisãpirena hĩtemoni —itxa Teoso nitiri.

⁸ Ininiã ninoa takanapari akauari. Ipĩkareritikana, ieneniritikana isana. Imitekana Xesosi moianariakorimoni õkitikiniua isãpiretini tĩkane. ⁹ Ninoa mitekaãpotakasaaki, ipixinipokoriti Xesosi tokiã ninoamoni:

—Hĩtepinini ina —itxana.

Ininiã ninoa kapotoreẽkaua iua apisatoõ, maĩkakitita itxarina.

—Peerekai. Apiananiri pitxaua — itxanãtana.

¹⁰ Ininiã Xesosi:

—Kona hĩpĩkarauatape. Nitariakori-moni hĩsa. Hĩsãpiretana Karirẽiamoni isinina. Iuaã aõkitanonako nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaãkani

¹¹ Sitoãkini sikasaaki, ãtikaka sotatoakori akauari moiaãkani kanapiriã sitatximoni. Isãpiretarina itikakitina sasetotxi auĩteakorimoni.

¹² Ininiã sasetotxi auĩteakori, kiomãtxiakori pakini apotiitaua ikara ene ixinikinina ikapani. Eereka isikarina itoro txineiro sotatomoni, atão imasãpiretakanina ikapani apanakinimoni. ¹³ Ininiã sasetotxi auĩteakori, kiomãtxiakori pakini txana:

—Hĩtxariko apanakinimoni: “Xesosi moianariakori apoka ikanõka aimakasaaki. Iĩtirĩkarina Xesosi iõto,” hĩtxako. ¹⁴ Hĩauĩte Pirato

imarotakasaakiri himakini, ininiã ate misãkiretariko iua, ininiã kona himisiritaãka himakini xika —itxarina sotatoakorimoni.

¹⁵ Ininiã sotatoakori apakaparo txineiro, sãpireta itxarina kãkiti Xesosi moianariakori itirĩkiniri Xesosi iõto. Ikara aãpirena iaripireta Xoteoakorimoni. Uatxa apaka ikara aãpirena auiãkapanika.

Xesosi Apoka Moianariakorimoni

(*Marko 16.14-18; Arõkasi 24.36-49; Xoão 20.19-23; Åtosi 1.6-8*)

¹⁶ Õsi pakini Xesosi moianariakori sari oxiratarimoni Xesosi paniãtinimoni Karirẽia tõpamoni. ¹⁷ Ninoa atamatari Xesosi. Ikapotoreẽkauana iua apisatoõ.

—Peerekai. Apiananiri pitxaua — itxanãtana.

Txamari ãtikaka kona iteene auikari iua Xesosi ininiãua. ¹⁸ Xesosi apoka nino takote, misãkireta itxana ninoa:

—Teoso txĩkitakano itixine auakani auĩte nininiãua. Itxĩkitakano ikoraxiti auakani auĩte apaka nininiãua. Ininiã ikinika posotiiretxi aua notamoni.

¹⁹ Ininiã nipaniãtai. Hĩsako ikini uãkati kãkitimoni ikini itixitika. Hõerekana ninoa nisãkire. Hĩpatxisatana nisãkire kĩpitakani niri uãkaã, imi uãkaã, Erekari Matamatakoti uãkaã pakini hĩpatxisatanako. ²⁰ Hõerekana ninoa ikinika nipaniãtakiti ikaminina ikapani. Hĩxinikariko ia. Nota ãtipirika auako hĩtekata. Hĩtekata nauiniritika itixi xipokako —itxa Xesosi sãkire.

MARKO

João Kapatxisareri Săpiretakiti

(Mateo 3.1-12; Arókasi 3.1-20; Xoão 1.19-28)

1 Ia Xesosi Kristo iokanapirena erekari. Teoso ākiri itxaua Xesosi.

²Teoso sākire săpiretakani iōkatsopataru ia:

Niokanatariko niokanapirena aniākari kăkitimoni kimapori oeretini ikapani pite uai apokini apisa.

³Iua auako āparaā makipakaniātaā. Isăpirenauatoko: “Hōeretariko kimapori Apiananiri apokini apisapanika. Itikaāpo erekari hīkamako iua napini ikapani,” itxa iua.

Itxa Teoso sākire iōkatsopatakori kixakapirika.

⁴Ikara atoko Xoão kapatxisareri āparaā makipakaniātaā auu. Ipatxisatakasaakiri kăkiti, isăpiretari ia pirena:

—Hītakanapariko maerekati hīkamakiti. Hīpatxisataākako. Ininiā Teoso makatxakariko maerekati hīkamakiti —itxa Xoão kapatxisareri.

⁵Ikinimane kăkiti Xotéia auakani Xerosareē sitatxiti auakani pakini sari Xoōmoni isākire ikenakotinina ikapani. Ninoo săpiretakasaakiri maerekati ikamakitina, ipatxisatana uini Xotão inakoriātaā.

⁶Xoão takari imăka kamero piti kamakori. Itakari ipakiomatare pirătxi mata kamakori. Inikari txıtxiri. Mapaā itxima. ⁷Iua txari kăkitimoni:

—Nota poiāori. Nota tikini apokako apiatakari. !Apakata nikapotareēkinia iua takote ikiti mata nimakatxakini ikapani, kotxi nota poiāoka. Iua apiata.

⁸Nota patxisatai āparaānokara. Iua patxisataiko Erekaru Matamatakotiā.

Iuasaaki hīte apakapariko Erekaru Matamatakoti.

Xesosi Patxisatiko Pirena

(Mateo 3.13-17; Arókasi 3.21-22)

⁹Iuasaaki Xesosi apoka Nasaree sitatxiti, Kariréia tōpamoni. Iuasaaki Xoão kapatxisareri patxisatari iua uini Xotão inakoriātaā. ¹⁰Xesosi kanikıtakasaaki, iua itikari iaxiti takakini. Iuasaaki Erekaru Matamatakoti katxaka kamo katxakini atoko. Iua nopini apoka. ¹¹Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatiniri Xesosi

(Mateo 4.1-11; Arókasi 4.1-13)

¹²Iuasaaki Erekaru Matamatakoti iokanataru Xesosi āparaā makipakaniātaā. ¹³Iuaātaā ikaikota koarēta ōti. Iuasaaki Satanasi atamakaerekataru iua. Iuaātaā auari kaxipirini kaneenamarini. Ininiā Teoso nitiriakori iaxitikini nıkataru Xesosi.

Xesosi Mipotorikini Iparika Kariréia Tōpa

(Mateo 4.12-22; Arókasi 4.14-15)

¹⁴Xoão kateia āki takikosaaki, Xesosi sari Kariréia tōpamoni. Iuaātaā isăpiretari Teoso iokanapirena erekari, Teoso auıtetxi ininiāu pirena. ¹⁵Itxari:

—Teoso keto apopeka. Iua auıtetxi ininiua apokaāpotapeka. Ininiā hītakanapariko himaerekani. Hăuikariko Teoso iokanapirena erekari —itxa Xesosi.

¹⁶Xesosi tıpokota Kariréia poati tiniā. Iuasaaki atamatana ipi hetxi takakani, Simăo Petro, itari Ātree pakini. Iua atamatana itakinirina hetxi. ¹⁷Ininiā Xesosi txana:

—Uatxa masa notakata. !Himaikaikariko ximaki. Ātiāo hıparika

auako. Nisäkire hīsāpiretako kākitemoni —itxa.

¹⁸ Ininiā iusaaki ninoa takanapari hetxi, sa itxana Xesosikata.

¹⁹ Apikomoni ninoa saāpota. Itikana Txiako, itari Xoāo pakini. Ninoa Sepe-teo anaakori. Kanaua miramaneri āki auanātana iusaaki. Hetxi iotsaānātana.

²⁰ Iusaaki iua akiritana ninoa. Ininiā nino takanapari iri, iri nitiriakori pakini kanaua āki. Eereka isana Xesosikata.

Kiki Maerekati Matamatakoti Auaītotakiti

(Arókasi 4.31-37)

²¹ Xesosi imoianariakorikata apoka Kapanaoō sitatxiti. Ininiā tomatiko ōtisaaki Xesosi sari aiko Xoteo apotiitiniātaāua oerekarauatini ikapani.

²² Iua sākire kenakotakani tsorikaāta, kotxi kona kaiōkatsoparerini atokoni litxa. Iua oerekakiti sākiretxiti pata-parari, kotxi lisāpiretari āti koekarareri sākire apanakini kaiōkatsoparerini atoko. Iuaka sākirekara isāpireta.

²³ Iusaaki aiko āki Xoteo apotiitiniā-taāua aua kiki maerekati matamatakoti auakiti. Iua akiripoakata:

²⁴ —Xesosi Nasree sitatxitikiri. Kipa pinireka atemoni? Pite ina ate pix-ipokini ikapanikani? Erekarinoka kamakarii. Teoso nakiti pitxaua —itxa.

Ikara atoko iua akiripoakata, kotxi iua maerekati matamatakoti pīkari Xesosi.

²⁵ Ininiā Xesosi itapararitika txari:

—Piotoka. Pitakanapariko ere kiki ito.

²⁶ Iusaaki maerekati matamatakoti iōkokaītotari. Ikatxakasaaki, akiripoakata.

²⁷ Kākiti iuaātaā auakani tsorikaāta. Iusaaki imisākiretakauana:

—Kiripa? Atxiiti oerekakori sākiretx-iti amaneri apopeka? Iua sākire kaposotiireri. Ipaniātakiti maerekati matamatakoti kamapeka —itxanātana.

²⁸ Ininiā ikara pirena iaripireta ikini Kariréia tōpati.

Xesosi Makananitiniro Simão Petro Imakiro

(Mateo 8.14-15; Arókasi 4.38-39)

²⁹ Ininiā Xesosi, Txiako, Xoāo pakini takanapakasaakiri aiko Xoteo apotiitiniātaāua, isana Simão, Ātree pakini aapokomoni. ³⁰ Iusaaki Simão imakiro apoomata. Osirikanāta. Ininiā ninoa sāpiretari Xesosi oamianare. ³¹ Ininiā Xesosi sari oamoni. Imaikaro ouako. Ōkitikaro. Iusaakipeka oāpoomare !auaika. Ininiā opotorika oparīkauatini, ninoa kiena okamini ikapani.

Xesosi Makananitinina Amianatakani

(Mateo 8.16-17; Arókasi 4.40-41)

³² Ininiā mapiānikata kākiti minana ikinipoko amianatakani, maerekati matamatakoti auaītotakini pakini iuamoni. ³³ Ininiā ikinimane iua sitatxi auakani apotiitaua aapokotxi tore takote. ³⁴ Ininiā Xesosi makananitana itomaneri amianatakani. Kaiāopokori amianari auakini imakananita. Apaka omitikana itomaneri maerekani matamatakoni. Iusaaki !auritana ninoa sākirauatini, kotxi ninoa imarotari Teoso ākiri ininiua Xesosi.

Xesosi Sāpiretiniri Teoso Sākire

(Arókasi 4.42-44)

³⁵ Īkanōkapanika mapiāpanika Xesosi ōkitikaua. Itakanapari aapokotxi. Iuanoka sari kākiti mauakaniātaā iri iaxitikiri imisākiretini ikapani. ³⁶ Eereka Simão imoianariakorikata sari Xesosi initinina ikapani. ³⁷ Ninoa apokasaakiri, itxana:

—Ikinimane nitai —itxarina.

³⁸ Xesosi apakapapiretana:

—Masa ātiātaā kākiti aapokomoni. Iuaā nisāpiretariko Teoso sākire, kotxi

ikara atoko itxa nipařka kăkitimoni.
³⁹Xesosi sari ikini Karirėia tōpa. Aiko Xoteo apotiitiniātaāua isăpiretari Teoso săkire. Apaka omitikana maerekani matamatakoni kăkiti itoă auakani.

Kiki Maere Matati

(Mateo 8.1-4; Arókasi 5.12-16)

⁴⁰Amianatakari maere matati apoka Xesosimoni. Ikapotoreėkua iua apisatoō. Iua iteene amanaari:

—Nimarotari, pinirekiniari piposotari erekape pitxikitakinino —itxa.

⁴¹Ininiā iusaaki Xesosi iteene turetari iua. Itakari iuako iua nopini. Itxari:

—Ari, ninirekapitikari. Erekapekai uatxa.

⁴²Iusaakipeka amianari !auaika. Erekapekari iua.

⁴³Xesosi iokanatarari iua. Iusaaki isăpiretari iua:

⁴⁴—Kona pisăpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piito ninoamoni. Eereka pikamariko Moisesini paniătakiti. Ikara atoko oerekari kăkiti atăo erekapeka pinini —itxari.

⁴⁵Iuaritika isăpiretapikari Xesosi kamakiti. Ininiā iaripireta ikara pirena. Ikara xika Xesosi !iposotaika isini aapokotximoni. Ikaikota kăkiti mauakaniătaă. Iuaritika kăkiti sari iuamoni.

Matĭpokotakati Pirena

(Mateo 9.1-8; Arókasi 5.17-26)

2 Eereka mapaōtipeka inaka atoko iuaikana Xesosi Kapanaoō sitatxiti apoka itxa. Iaripireta Xesosi inirimane aapoko apokini. ²Iusaakipeka mirikiniti kăkiti apoka iuamoni, ininiā iua aapokotxi xăpoka. Apotiitauana ĩronakikoătaă apaka. Ininiā !apakata apanakini kăkiti ĩroini aapokotxi āki. Iusaaki Xesosi săpiretari Teoso

săkire kăkitimoni. ³Iusaaki ipi ipi pakini kikiakori minari matĭpokotakati.

⁴Kăkiti itomaneri ĩronakikoătaă aua, ininiā kona iposotarina Xesosi takote apokinina. Ininiā aapokotxi nopini, Xesosi manapi ninoa sonatari iua matĭpokotakati iokatxakinina tĭkane Xesosimonikari. Iposo atoko isikakaăpotarina iua manapi. ⁵Xesosi imarotari ninoa atăo auikiniri iua săkire. Ininiā Xesosi txari matĭpokotakatimoni:

—Namarite, pimaerekani makatxakapeėkaika —itxa.

⁶Iusaaki ātikaka kaiōkatsopareriakori topăkanăta iuaă. Itsoriăkănătana. Iximorenonani:

⁷—Kinirepa ia kiki ikara atoko itxa? Maerekati isăpiretakiti, kotxi Teosonanira posotari imakatxakiniri kăkiti maerekani —itxa ninoa săkire.

⁸Iusaakipeka Xesosi imarotari ninoa xinikakiti ākixinireėna. Ininiā Xesosi txana ninoa:

—Kininiăpa ikara atoko hĭtxa xinireta? ⁹Nitxari iua imaerekani nimakatxakini, txamari !himarotari imaerekani atăo nimakatxakini. “Pōkitikaua. Pisirimata pikoseka, sipe pitxa,” nininiă, iusaaki himarotari nisăkire atăo ininiăua, kotxi hitikari. Niposotiire imaerekani nimakatxakini ĩkapani, niposotiire iua nōkitikini ĩkapanitxikana. ¹⁰Ininiā uatxaika noerekai hĭte, Teoso iokanatanano nota hĭtari iaxitikiri ĩkorapokoritimoni kăkiti maerekani nimakatxakini ĩkapani —itxana kaiōkatsopareriakori.

¹¹Ininiā matĭpokotakatimoni itxa:

—Pōkitikaua. Pisirimata pikoseka, sipe pitxa paapokomoni —itxa.

¹²Iusaakipeka iua ōkitikaua. Ikosekari isirimata. ĩkorape itxa ikinimane okiătaă. Imakinika kăkiti tikoka.

—Peerekari Teoso kamakiti. Kona mitxi ate itikari ikora atoko inakari — itxanātana kākiti.

Mateo Pirena

(Mateo 9.9-13; Arókasi 5.27-32)

¹³ Ininiā iuaikana isari ipoamoni. Kaiāopokori kākiti apotiitaua iuakata. Iusaaki oerekana ninoa. ¹⁴ Isaāpotakasaaki, atamatarī Arevii inakori. Āti iuāka Mateo inaāka. Aopeo inakori ākiri itxaua iua. Iitopākanāta auītetxiakori txineirote apakapiniātaā. Ininiā Xesosi txari:

—Masa notakata.

Iusaakipeka ōkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auītetxiakori txineirote apakapakani, itori apanakini maerekani, topākanāta Xesosi takote, imoianariakori takote pakini. Kaiāopokori kākiti aua iusaaki, kotxi kaiāopokori kākiti Xesosikata sikani.

¹⁶ Pariseoakori, kaiōkatsopareriakori pakini itikari Xesosi auītetxiakori txineirote apakapanikata, apanakini maerekanikata pakini inipokotini. Ininiā kaiōkatsopareriakori, pariseoakori pakini pimaāna Xesosi moianariakori:

—Kinirepa hinipokota auītetxiakori txineirote apakapanikata, maerekanikata? —itxana.

¹⁷ Xesosi ikara ikenakotakasaaki, itxana:

—Kākiti mamianatakani kona nirekari kākiti pinītxi imarotakari. Amianatakaninokara nirekari pinītxi imarotakari. Nota uai apoka maerekani nakiritini ikapani, imaerekanina itakanapinina ikapani. Kona nakiritari kākiti “atāo inakari kamakani” uākatakaniua —itxa Xesosi.

Nipokori Takanapiko Teoso Misākiretiko Īkapani

(Mateo 9.14-17; Arókasi 5.33-39)

¹⁸ Āti ōti Xoāo moianariakori, pariseoakori pakini takanapari inikinina Teoso imisākiretinina ikapani. Iusaaki kākiti pimaāri Xesosi:

—Kinirepa Xoāo moianariakori, pariseoakori pakini takanapari inikinina Teoso imisākiretinina ikapani, txamari pite moianariakori kona ikara atoko litxana.

¹⁹ Ininiā Xesosi:

—Kiiniri kākiti itanorouatakasaaki, itanorouatakari aua iuaā, ininiā kona kākiti takanapari inikini iusaaki. Kona iua itanorouatakari nirekari kākiti natx-itini. Ininiā iua auakasaaki ninoakata, ikinimane nipokota.

²⁰ Ininiā nota itanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisākiretinina ikapani. Āti ōti nota !auaika nimoianariakorikata. Iusaakiikarako itakanaparina inipokotinina Teoso imisākiretinina ikapani.

Amaneri Mākatxi Pirena

²¹ Kona kākiti tāpanetari mākatxi kitxakari mākatxi mata amaneriā. Mākatxi mata amaneri itxikika, ininiā kitxakari tsorakita.

Amaneri Sako Aamata Kamakori

²² Kona kākiti takari iāriā amaneri sako kitxakari aamata kamakori āki. Itakiniāri, koanatxi kitxakari aamata kamakori tsorakita, ininiā iāriā xikepoata, ininiā koanatxi !kikeikari. Sako amaneri āki itakaāka iāriā amaneri. Iua atokokana kona hīkoketari kitxakari sākiretxiti amaneri sākiretxitikata.

Tomatiko Ōti Pirena

(Mateo 12.1-8; Arókasi 6.1-5)

²³ Tomatiko ōti Xesosi imoianariakorikata napaāpota kikiō triko takikoātaā. Ininiā ninoa makatxakaro triko iki mapaki inikinirona ikapani. ²⁴ Pariseoakori atamatana, ininiā itxarina:

—Kinirepa ninoa parikauata tomatiko ōtisaaki? —itxana.

²⁵ Ininiā Xesosi apakapapiretana:

—Kona hātatsopatapanikari Taviini kamakiti? Iua, imoianariakorikata natx-itakasaaki, kona himarotatari ikamakiti? ²⁶ Iua iroā Teoso misākiretikoātaā. Apiataa inakori sasetotxi auīte apiatakari iusaaki. Iuaā Tavii nikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Txamari Tavii sikari imoianariakori inikinina ikapani.

²⁷ —Tomatiko ōti kamaāka, kākiti iō ereka inini ikapani. Kona kākiti kamaāka tomatiko ōti auini ikapani. ²⁸ Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

Motīkauakotakari Pirena

(Mateo 12.9-14; Arókasi 6.6-11)

3 Iuaikana Xesosi imoianariakorikata iroā aiko Xoteoakori apotiitiniātaāua. Iuaā apokari kiki motīkauakotakari. ² Ininiā iuaā auakani txari

—Atxiīti iua erekapeka txīkitakari motīkauakotakari uatxa tomatiko ōtisaaki?

Ninoa xinikari ikara atoko inini, kotxi ninoa kinirāo apoītaka txari Xesosi. ³ Ininiā Xesosi akiritari iua motīkauakotakari:

—Uaimoni pina —itxari.

⁴ Iposo atoko ipimaāna iuaā auakani:

—Kipa atāo Teoso paniātaua akamini tomatiko ōtisaaki? Maerekati akaminikani? Erekarī akaminikani? Ipaniātataua āti amakananitini? Ipaniātataua āti aōkini?

Txamari ninoa !kasākirena. ⁵ Xesosi atamatana. Iusaaki inaiataua, iuaritika imatinaniuata, kotxi ninoa !inirekarī atāo imarotininina. Ininiā Xesosi txari iua motīkauakotakari:

—Pisiriīkauakota —itxari.

Ininiā itamēkauakota. Erekarī itxa iuako. ⁶ Ininiā pariseoakori potorika iuaā. Isana Erotxi sākire auīākanimoni. Iuaātaā ninoa xinikari Xesosi okaenetinina.

Itori Amianatakani Sari Xesosimoni

⁷ Ininiā Xesosi sari Kariréia poamoni. Iusaaki itori kākiti Kariréia tixinikini, Xotéia tixinikini pakini sari iuamoni. ⁸ Xerosareē sitatxitikini, Itoméiakini, Xotāo ipiniākini, Txirokini, Sitoōkini pakini sari iuamoni. Ninoa kenakoenetari ikamakiti, ininiā iuamoni isana. ⁹ Ininiā ipaniātana imoianariakori:

—Kanaua himina, kotxi kaiāopokori kākiti katikaāpotano. Ininiā kanaua āki niereētaua —itxa Xesosi.

¹⁰ Iusaaki kaiāopokori kākiti erekapeka itxīkitakapeka. Apanakini amianatakani nirekakari imaātakinirina Xesosi, erekapeka ininina ikapani. Ininiā ikatikaāpotarina Xesosi, kotxi kaiāori kākiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoō. Akiripoatana:

—Teoso ākiripitikai pite.

¹² Ininiā Xesosi kona auiritana ninoa: “Teoso ākiripitikai,” ininina.

Xesosi Mereëna Tosi Imoianariakori*(Mateo 10.1-4; Arókasi 6.12-16)*

¹³ Iposo atoko Xesosi sari ōtanoxiratarimoni, akirita itxana inirekaäkini. Ininiã ninoa sari iuamoni. ¹⁴ Ininiã iua mereëna tosi kikiakori iuakata kaikotakani tikane, Teoso säkire säpiretakani ikapani. ¹⁵ Iua sikari iposotiire ninoamoni, amianatakani erekapeka itxikitakinina ikapani, apaka maerekati matamatakoti omitikinina ikapani. ¹⁶ Ininiã akiritari Simão. Xesosi takauäkatari Simão äti iuäka. Petro itxaua. ¹⁷ Akiritana Txiako, itari Xoão pakini. Sepeteo anaakori itxauana. Xesosi takauäkatana ninoa Poanexi. Poanexi Popikari säkireë “Ikarokirauari anaakori.” ¹⁸ Akiritana Átree, Piripi, Patoromeo, Mateo, Tomee, Txiako pakini. Aopeo äkiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹ Akiritari Xotasi Isikariotxi inakori apaka. Xesosi mikapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ikapani.

Maerekani Matamatakoni Omitikiko*(Mateo 12.22-32; Arókasi 11.14-23; 12.10)*

²⁰ Iuaïkana äti aapokotxitimoni isa Xesosi, imoianariakorikata. Iuasaaki mirikiniti käkiti iuaïkana apotiitaua. Ikara atoko ininiã kona ninoa nipokota. !Apakata inipokotininina, kotxi mirikiniti käkiti aua iuaã. ²¹ Xesosi nirimane kenakotari käkiti apotiitiniua iuakata. Ininiã isana iua apinina ikapani.

—Imapitxiritapeka —itxana.

²² Kaiökatsopareriakori Xerosareë ikani apoïtari Xesosi maerekati ikamini. Ninoa säkire:

—Peosepoo inakori auaitotari iua. Ininiã Peosepoora omitikari maerekati matamatakoti —itxana.

Peosepoo Satanasi itxaua. Apanakini säkire:

—Maerekani matamatakoni auïte sikaposotiiretari Xesosi maerekati matamatakoti omitikini.

²³ Ininiã Xesosi akiritari käkiti isäkire ikenakotinina ikapani. Säpirenatxi atão inakori oerekiko isäpiretana ninoa. Ipimaäna:

—Natokopa itxa Satanasika omitikiniua? ²⁴ Auïtetxi tixine auakani naiatakakiniäua, ixipokaäkanako. ²⁵ Käkiti aapoko äki auakani ninoakakarika neenamauatiniã, ixipokaäkanako apaka. ²⁶ Iua atokokana, Satanasi nitiriakori, ninoakakarika naiatakakiniäua, Satanasi tapara xipokako.

²⁷ —Kona käkiti iroã kiki mitapoari aapoko äki iitiriuatini ikapani. Kinirão iitiriuatana, ininiã iaxirikari mitari mitxi. Iposo atoko inirekaäkiti iitirika.

²⁸ —Ari, atäopitikara nota txai hïte. Apakata Teoso makatxakiniri ikinipoko maerekati käkiti kamakiti, imaerekani Teoso imisäkirepiretini pakini. ²⁹ Txamari ätipekana maerekati kamakari aua. Erekar Matamatakoti misäkirepiretakari maerekani makatxakiko kona auari. Ikara atoko inakani inikoriäriko imisiritiko maerekani misiritikoätaã —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati matamatakoti.”

Xesosi Inoro, Itariakori Pakini*(Mateo 12.46-50; Arókasi 8.19-21)*

³¹ Iuasaaki itariakori inorokata apoka porikiti. Ipaniätarina äti akiritiniri Xesosi. ³² Iuasaaki itori käkiti topäkakani äkitari Xesosi. Isäpiretarina:

—Pitariakori, pinoro apaka porikiti aua. Initanätai —itxarina.

³³ Ininiã Xesosi apakapapireta:

—Kiripa nitariakori, ninoro pakini?

³⁴Iua atamatana itakote topākakani:

—Hātamata, uai aua ninoro, nitariakori pakini. ³⁵Teoso nireēkiti kamakani nitariakori, nitaroakoro, ninoro pakini itxauana —itxa Xesosi.

Katakareri Pirena

(Mateo 13.1-9; Arókasi 8.4-8)

4 Iuaikana Xesosi oerekarauata ipoa takote. Kākiti mirikiniti, ininiā imorōkokaua kanaua āki. Itopāka. Ninoa aua imiriī, ininiā iua kanauaā oerekarauata. ²Itoiri Teoso sākire oerekana ninoa sāpirenatxi atāo inakari oerekikoā. Itxana:

³—Hīkenakota. Katakareri takarauata. ⁴Itakarauatakasaaki itakareki irika kimapori tiniāpo. Ininiā kotipiriki nikari itakareki.

⁵—Apanakini itakareki irika kai auiniātaā, kipatxi mauakaniātaā. Atāoka ipitxaka. ⁶Kipatxi poiāoka auiniā atokatxi pataka apokasaaki itxarika. Omakotsani xika osonāka. ⁷Apanakini irika inako sauaki. Inako aneēkasaaki, okari takari. !Iriuata. Ipinā.

⁸—Apanakini irika kipatxi auiniātaā. Ininiā iriuata. Āti poiāoka iriuata, trītakata. Āti apiata iriuata, sesētakata. Āti kaiāopoko iriuata, seīkata.

⁹—Kakenakokii, ininiā hīkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(Mateo 13.10-23; Arókasi 8.9-15)

¹⁰Iuanani imoianariakorikata auakasaaki, ipimaārina Xesosi:

—Poerekaua mixikanani sāpirenatxi atāo inakari oerekiko pisāpiretakiti? —itxarina.

¹¹Ininiā isāpiretana:

—Teoso sākire mauīākani limarotari Teoso auītetxi ininiua. Teoso oerekai hīte ninoa mimarotakiniti. Teoso

oerekana ninoa isākire sāpirenatxi atāo inakari oerekikoā. ¹²Atxiīti ninoa iteene atamatari Teoso oerekakiti, iuaritika limarotarina atamatakitina. Atxiīti iteene ikenakotarina Teoso sākire, iuaritika limarotarina ikenakotakitina. Imarotaākamariko, akiritaākamariko Teoso, ininiā Teoso makatxakamariko ninoa maerekani.

¹³Ininiā Xesosi txari:

—Himarotatari ikara sāpirenatxi atāo inakari oerekiko?

—!Aimarotari —itxana.

—Ininiā natokopa ininiāparako himarotatari apanakini sāpirenatxi atāo inakari oerekiko?

¹⁴Ininiā imimarotakinitina oerekana:

—Iua takarauatakari takari Teoso sākire. ¹⁵Aua kākiti kimapori tiniāpo takarekitxi irikiniātaā atoko inakani. Ininiā Teoso sākire ikenakotakasaaki Satanasi apoka. Ininiā imakatxakari Teoso sākire ākixinireēna apokakari.

¹⁶—Aua kākiti kai auiniātaā atoko inakani. Ninoa kenakotakasaakiri Teoso sākire, iusaakipeka apakaparina ipoxokoniritikana. ¹⁷Itxamana, kona kakotsari. Imaxikiko apokiniā, imisiritiko Teoso sākire auikinina xika apokiniā, iusaaki itakanaparina Teoso sākire.

¹⁸—Aua kākiti aanaia auiniātaā atoko inakani. Ninoa kenakotapitikari Teoso sākire. ¹⁹Txamari maerekaxiniretinoka itxana. Txineironoka inirekana, ininiā ikara misirienetana ninoa. Kaiāopokori inireēkitina, Teoso manirekakiniti. Maerekaxiniretinoka ininina, txineiro, inireēkitina pakini inako atoko itxa, ininiā !ixinikaikarina Teoso sākire, ininiā kona iriuata.

²⁰Aua kākiti kipatxi erekari auiniātaā atoko inakani. Ninoa aukari Teoso sākire. Iriuatana. Āti iriuata poiāoka, trītakata. Āti iriuata apiata, sesētakata. Āti iriuata ito, seīkata.

Tirikapi Pirena

(Arókasi 8.16-18)

²¹ Xesosi pimaána ninoa:

—Nanipa hítakari tirikapi? Kopiti ákikani hítakatari? Amesa patapikani hítakatari? Konapitini. Hítakari itano imakinika iopinikini ikapani. ²² Iomaãtakori áti ôti oerekaãkako. Kipatakori oerekaãkako, kotxi nota imarotapitikari híkamakiti. ²³ Kakenakokii, ininiã híkenakotariko nisãkire —itxa Xesosi.

²⁴ Xesosi sãkirauatapanika:

—Hítakaõtxikariko nisãkire. Imakinika híkenakotako. Erepaniko pikamakiti átimoni, kotxi pite kamakitixikana kamaãka pitemoni. Erepaniko, kotxi apiata ikamaãka pitemoni. ²⁵ Teoso sãkire auakiti, iua sãkire kípítakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makípítakati, imarore xapiti iuamoni auakari makatxakaãkako.

Takariki Pirena

²⁶ Apikomoni Xesosi txari:

—Teoso auítetxi ininiãua kiki takariki taãkari atoko itxa. ²⁷ Itakarauata. Imaka íkanõka. Áti iparíka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua. ²⁹ Oaneẽpeka onakasaaki katakareri makoapatáro, kotxi oamiko manapipeka itxa.

Ikara atoko itxa Teoso auítetxi ininiãua.

Mostata Pirena

(Mateo 13.31-32; Arókasi 13.18-19)

³⁰ Xesosi sãkirauatapanika. Itxari:

—Natokopa itxa Teoso auítetxi ininiãua? Íkiripa sãpirenatxi atão inakari oerekiko oerekaua? Ia atoko itxa: ³¹ Teoso auítetxi ininiãua

mostata oki atoko itxa. Axapitikiro oa. Apanakini iki apiata. ³² Otakaãka atoko opitxaka. Eereka oaneẽ. Apanakini takari ítano apiata oa. Amaripokoro okati. Kotipiriki takari okoa okatiã. Iua atokotxikana Teoso auítetxi ininiãtaãua.

Merepanika poião kãkiti. Eereka apiata. Eereka kaiãopokori kãkiti auítetxi Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiãopokori sãpirenatxi atão inakari oerekiko isãpiretana, Teoso sãkire imarotinina ikapani. Ninoa imarotakasaakiri isãkire, apiata isãpiretana. Imimarotakanisaakiri isãkire, poiãonoka isãpiretana. ³⁴ Teoso sãkire oerekasaakina ninoa, sãpirenatxi atão inakari oerekikonoka isãpireta. Eereka imoianariakorinoka auakasaaki iuakata, oerekana ikara imarotinina ikapani.

Xesosi Iotokakiniri Ítima

(Mateo 8.23-27; Arókasi 8.22-25)

³⁵ Iua õtipanika mapiãnikata itxana imoianariakori:

—Maípíriãta ipoa. Ipiniaãmoni masa — itxana.

³⁶ Ininiã itakanapana itomaneri kãkiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷ Ípiriãtakasaakina ítima kataparari apoka ninoamoni. Tsakati kataparari, ininiã ãparaã ierepeẽpokataua kanaua áki. Kanaua sakikaariãpotape.

³⁸ Iuasaaki Xesosi ikapokiãmoni imakanãta. Isirimata nopini imakanãta. Ninoa õpirikari iua:

—Kona pimaãkataua ate. Kona pitiretataua? Apinanapanoka —itxana.

³⁹ Ininiã imereka. Ipinitari ítima:

—Piotoka. Auapika pitxako —itxari ipoa.

Ininiã itsoríkaxitita. Ítima iotoka. Tsakati iotoka apaka. ⁴⁰ Ininiã Xesosi:

—Natokopa ininiāpa kapīkarei hīte? Kinirepa hīte kona auikano nota? — itxana ninoa.

⁴¹ Apiapīkareta ninoa. Ininiā ninoa:

—Kinakaripa ia kiki, kotxi itima, tsakati pakini auikari iua sākire — itxana.

Kiki Maerekani

Matamatakoni Auaītotakiti

(Mateo 8.28-34; Arókasi 8.26-39)

5 Xesosi imoianariakorikata apoka ātiātaā Xerasa tōpa, Kariréia poa ipiniā. ² Xesosi kanikīitakasaaki, kiki ina iuamoni. Iua akauariātaā auakari. ³ Iuaātaā iua auanāta. Kākiti !iposotari iitxikiniri iua. Iitxikare metao kamakori karakitapekata. ⁴ Kaiāokotani kākiti itxikari iuako, ikiti pakini metaoā, txamari ikakarakitsatari metao. !Apakata kākiti nīkatiniri iua. ⁵ Ikanōka, pokamara pakini ixirataātaā akiripoanāta akauari auiniātaā. Kai soroā iuaka ikisauakitataua. ⁶ Ōtakopanika atapari Xesosi inini. Ininiā imiteēkata iuamoni. Ikapotoreēkaua iua apisatoō.

—Apiananiri pitxaua —itxa.

⁷ Akiripoakata:

—Xesosi, Teoso ākiri pitxaua. Api-ananiri ākiri pitxaua. Kipa pinireka nota ikapani? Teoso uākaā namanaāi pite, kona pimisiritapeno —itxa maerekati matamatakoti. ⁸ Ikara atoko itxa kotxi Xesosi paniātari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaāri:

—Kipa piuāka? —itxari.

Iua apakapapiretari:

—“Itori” ninaāka niuāka. Kotxi itori maerekani matamatakoni ate.

¹⁰ Iteene iua amanaāpotari Xesosi:

—Kona piokanatapeua ātiātaā.

¹¹ Iuasaaki auari kaiāopokori irari ixi-ratamoni nipokonātakani. ¹² Maerekati matamatakoni iteene amanaāri Xesosi:

—Piokanataua ate irarimoni. Pauiri-taua ate sini ninoamoni —itxanātana.

¹³ Ininiā Xesosi iokanatanana. Iuasaakipeka maerekani matamatakoni takanapari iua kiki, iroā itxana irari itomoni. Iuaātaā auari ipi mio irari. Ninoa iroākasaaki, irari miteēkata oiokirīitini ipoamoni. Komoka, axāpoāta itxana iuasaaki.

¹⁴ Irari nīkatakani miteka sitatximoni, aapokotxi poiāo auinimoni pakini. Isāpiretana kākiti itikakitina. ¹⁵ Eereka isana Xesosimoni. Iuasaaki atamatarina kiki mitxi maerekati auaītotakiti. Iitopākanāta. Mākatxi auapekari. Atāo iikitapeka auari. Iuaritika ninoa pīkarauata. ¹⁶ Itikakani sāpiretari apanakini iua kiki pirena, irari pirena pakini. ¹⁷ Kākiti iuaātaā auakani paniātari Xesosi osipikiniri iuaātaā.

¹⁸ Xesosi iereētakasaakiua kanaua āki, iua kiki amanaāri iuakata isini ikapani.

¹⁹ Xesosi !auritari. Itxari:

—Pisa pinirimanemoni. Pisāpiretana Apiananiri kamakiti pite ikapani. Pisāpiretana iua iteene iamoniikai pite.

²⁰ Ininiā iua sipe. Iuaātaā auari sitatxi tesi pakini. Iua kiki sari ninoa tesi sitatxitimoni. Isāpiretari kākiti Xesosi kamakiti iua ikapani. Iuaātaā auakani tsorikaāta:

—Anekani, peerekari Teoso —itxana.

Xáiro Amanaākiti Pirena

(Mateo 9.18-19; Arókasi 8.40-42)

²¹ Ininiā eereka Xesosi ipiriāta ipoa. Ininiā ipoa itiniā kaiāopokori kākiti apotiitaua iuakata. ²² Aiko Xoteo apoti-itiniātaāua sikani auite apoka iuamoni. Akiritaāka Xáiro iua. Iua kapotoreēkaua Xesosi apisatoō. ²³ Iua iteene amanaāri Xesosi:

—Namarite opinanapanoka. Masa notakata. Pitakari piuako oa nopini erekape onini ikapani.

²⁴ Ininiā Xesosi sari iuakata. Kākiti kinapoko pe itxakata isinina.

Xesosi Māka Maātakakaro

(*Mateo 9.20-22; Arókasi 8.43-48*)

²⁵ Iuasaaki sito amianatakaro apoka. Tosikanani oa arēka !iotoka.

²⁶ Okinika otxineiroteē oīkitxitapekari oamianare imarotakani. Kaiāopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare.

²⁷ Okenakoenetakasaakiri Xesosi napini, osari iuamoni. Omaātakari imāka,

²⁸ kotxi oamoni: “Nimaātakiniāri imāka, iuasaakiika erekapekano,” otxanāta oxinikakiti. ²⁹ Ininiā omaātakasaakiri, oarēka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiā ikirioka kākiti sauaki. Eereka ipimaāna:

—Kipa maātakatari nimāka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kākiti kinapoko peka, iuaritika pite pimaāri kākiti: “Kipa maātakatano?” pitxa —itxana.

³² Iuaritika Xesosi nitari imāka maātakakari. ³³ Iuasaaki oa sito imarotari erekape onini, ininiā okapotoreēkaua iuamoni. Opīkarauata. Okikinanaka. Eereka osāpiretari ikinika oamianare iuamoni. ³⁴ Ininiā Xesosi txaro:

—Namarite, pite erekapekai uatxa, kotxi pauikari niposotiire. Pisipiniikaua, erekaxinirepekai —itxa Xesosi.

Xáiro Ākero Ōkitikiko

(*Mateo 9.23-26; Arókasi 8.49-56*)

³⁵ Xesosi sākiraumatasaaki oakata, apanakini Xáiro nitiriakori apoka. Itxari:

—Pamarite !auaika. Opīpeka. Pauiritari Xesosi kanapiriini.

³⁶ Ininiā Xesosi !imaākatari ikara pirena. Itxari Xáiro:

—Kona pipīkarauatape. Pauikano — itxari.

Ininiā ninoa sari Xáiro aapokomoni.

³⁷ Xesosi auiritana Petro, Txiaiko, Txiaiko itari Xoōo pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kākiti iuaātaā auakani !imarotarina ikamakitina. Ikinipoko kākiti txiapanāta, akiripoakanātana. ³⁹ Xesosi iroā. Itxana:

—Kinirepa iteene hītxiapanāta? Kinirepa hākiripoanāta? Amarini !ipina. Oimakanāta —itxa.

⁴⁰ Ininiā inapetarina iua. Ininiā iokanatana ninoa mapara. Oīri, onoro, Xesosi moianariakori pakini iroā amarini auiniātaā. ⁴¹ Imaikaro ouako. Iuasaaki isāpiretaro oa isākireē:

—Taritaa komii.

Popīkari sākireē: “Amarini pōkitikaua.” ⁴² Iuasaakipeka oōkitikaua. Ofīpokota. Oa amarini aua tosi anokanani. Iuasaaki ninoa iteene tsorikaāta. ⁴³ Ininiā Xesosi paniātana:

—!Hīsāpiretapiri apanakini nimakananitiniro oa.

Apaka ipaniātana isikakienatiniro oa.

Nasree Auakani Kona Auikari Xesosi Sākire

(*Mateo 13.53-58; Arókasi 4.16-30*)

6 Xesosi imoianariakorikata potorika iuaā. Nasree sitatxitimoni isana. Iuaātaā mitxi Xesosi aneē. ² Tomatiko otisaaki iua oerekari kākiti aiko Xoteo

apotiitiniātaāua. Xesosi sākire kenakotakanani tсорiĳkaāta. Itxana:

—Nanipa apaiaōkarauata, ikara atoko imarotini? Kĳpa oerekari imarore? Ika-makĳti oerekari apiata imarore aua. Kininiāpa ĳkora atoko itxa posotĳireta? ³Ate imarotari iua, kotxi aapokotxi kamakari itxaua iua. Maria ākiri iua. Iua itariakori Txiako, Xosee, Xota, Simāo pakini itariakori itxauana. Itaroakoro apaka aua uai, ininiā ate imarotari iua —itxana.

Ikara xika kona ninoa auikari isākire.

⁴Ininiā Xesosi txana ninoa:

—Teoso sākire sāpiretakari paxitaāka, txamari Teoso sākire sāpiretakari itix-ineē auakasaaki, iuaā auakani, iniri-mane, iua aapoko āki auakani pakini !ipaxitari. !Auikarina iua sākire —itxa.

⁵Ininiā iuaā kona ikamari iposoti-ire apiari. Iuako itaka ātikaka amianatakani nopini, ininiā amianatakani erekapeka itxĳkitaka. ⁶Itсорiĳkaāta, kotxi iuaā auakani !auikari isākire. Ininiā iua tōpa isari aapokotximoni. Oerekarauata iuaā. Eereka isari apanakini aapokotxiti-moni. Iuaĳkana oerekarauata. Itxaāpota iuaātaā.

Xesosi Iokanatana Imoianariakori Kākitimoni.

(*Mateo 10.5-15; Arōkasi 9.1-6*)

⁷Xesosi akiritana imoianariakori tosi pakini. Ipi iokanata ātiātaā, iuaĳkana ātiātaā iokanatana ipi. Ikara atoko iokanaāpotana imoianariakori. Iposotiire isikana ninoa maerekani matamatakoni omitikinina ĳkapani.

⁸Itxana:

—Kona minakati hanikape. Hĳtsonerenoka hanika. Kona hĳtii, kona auatxi, kona txineiro !hanikape. ⁹Hĳkiti mata hĳeretaka. Ātika kasipiri himāka hanika. ¹⁰Sitatxi hāpokasaaki, ātika aapokotxinanirako hāua. Iua sitatxi hāuakasaaki, hĳkaikota iua

kākiti aapoko. Kona hāuape āti kākiti aapoko. ¹¹Kākiti mapakapakanisaakĳi, hĳsākire imakenakotakanisaakina, ininiā hĳtakanapana. Hĳpotorikasaakĳi, hĳkaxipokari kipatxi hĳkiti mataā auakari, ininiā ikara atoko hōerekana ninoa maerekani ininiuana. Kākiti misiritiko sāpiretiko ōti apokasaakĳi, Sotoma sitatxiti auakani misiritiko auapitika. Iuasaakĳi Komoha sitatxiti auakani misiritiko auapitika. Iuaritika sitatxi auakani hĳte mapakapakanĳi misiritaākako apiata iuasaakĳi.

¹²Ininiā isana. Isāpiretari kākiti imaerekani itakanapini.

¹³Mirikiniti maerekati matamatakoti iokanatana. ĳtixiā itakana amianatakani nopini. Ininiā erekapeka itxĳkitakana amianatakani.

Xoō Kapatxisareri Ipinini

(*Mateo 14.1-12; Arōkasi 9.7-9*)

¹⁴Auĳtetxi Erotxi inakori kenakopiretari Xesosi pirena. Xesosi uāka iaripireta ĳkini tōpati. Ininiā Erotxi xinikanāta:

—Ikara Xesosi, Xoō kapatxisareri itx-aua. Uatxa iua ōkitikapekaua. Iuakara Xesosi itxa. Ininiākara iposotiire aua iuamoni.

¹⁵Ātikaka uākatari Xesosi Erĳasi ininiuua. Ātikaka uākatari Xesosi Teoso sākire sāpiretakari kitxakapiriĳka ininiuua.

¹⁶Ikara Erotxi kenakopiretakasaakĳi, itxari: —Xoōkara nitsotakakiitakitikara iua Xesosi txa. Ipĳpekariĳka iuaĳkana ōk-itikapekaua —itxa.

¹⁷Mĳtxi Erotxi takaro itari Piripi ĳtanoro. Ouāka Erotxia inakoro. Oa xika Erotxi maĳkari Xoō. Iaxiriĳtotari, kateia āki taka itxari. ¹⁸Xoō takaāka kateia āki, kotxi itxari Erotximoni:

—!Erekari pitari ĳtanoro pitakini —itxari.

¹⁹Ikara xika Erotxia apaka omanatari Xoō. Oa iteene kinirāo okaka otxam-

ari Xoão. Kona oposotari oõkiniri iua, ²⁰ kotxi Erotxi pïkari Xoão. Iua imarotari, atão inakarínoka kamakari, erekarínoka kamakari ininiua Xoão. Xoão sãkire ikenakotakasaaki, !iteene limarotari isãkire, iuaritika iua apokaerekatari ikenakotiniri isãkire.

²¹ Erotxi kamari isaiã kiiniriti. Iua kemaïtxitana sotato auíteakori, Kariréia auakani auíteakori, apanakini auíteakori pakini. ²² Ininiã Erotxia åkero apoka iua kiiniritiã. Iuasaaki oserenapiríkata Erotxi apisatoõ, ikemaïtxitakini apisatoõ pakini. Ninoa potxitari oserenini. Ininiã Erotxi txaro oa åtokoro:

—Pinirekakiti pamanaãno, ininiã nisikai. ²³ Atãopitikara nisikai pamanaãkiti. Nitixine pinirekiniã, ipixini nisikai —itxaro.

²⁴ Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵ Ininiã katimariã okanapiriã kiiniri auiniãtaã iuaïkana. Katimariã auítetximoni osa. Oamanaãri iua:

—Ninirekari Xoão kapatxisareri kii prato nopini —otxa.

²⁶ Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaïtxitakini apisatoõ. Ininiã !apakata imasikakaniãri isikaenetakiti. ²⁷ Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. ²⁸ Pirato nopini itakarina ikii, sika itxarona åtokoro. Ininiã oa sikari onoromoni.

²⁹ Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iïto. Itakarina iïto kai iriko åki.

Sïko Mio Kãkiti Xesosi Sikakienatini

(Mateo 14.13-21; Arókasi 9.10-17; Xoão 6.1-14)

³⁰ Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. ³¹ Iuasaaki kaiãopokori kãkiti aua iuaãtaã, ininiã !apakata inipokotinina. Ininiã:

—Amasipeka kãkiti mauakaniãtaã atomatini ïkapani —itxana.

³² Ininiã kanauãã iereẽtauana. ïpiriãtarina ipoa. Isana kãkiti mauakaniãtaã. ³³ Kãkiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika. ³⁴ Iua kanïkiïtakasaaki apisamoni mirikiniti kãkiti, ininiã iamoniãkana, kotxi soti auíte ipitikiri mauakiniti atoko itxana. Iuasaaki Xesosi oerekana kaiãori Teoso sãpiretakiti.

³⁵ Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kãkiti aapoko auari uai. Uatxa mapiaãpopeka. ³⁶ Ininiã pipaniãtana kãkiti isinina ïkapani nipokori iamotinina tïkane.

³⁷ Ininiã Xesosi:

—Hitekarako sikakienatana ninoa —itxana.

Ininiã ninoa:

—Pinirekatari asini komiri aamotini ïkapani? Oito kasiriti kãkiti parïkauatini ïki anireka komiri ïki naia kãkiti nikini ïkapani —itxana.

³⁸ Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sïko pakini komiri katari, ipi ximaki pakini aua —itxarina.

³⁹Xesosi paniātana ikinika kākiti topākini katsotati nopini. ⁴⁰Ātiātaā iitopākana sīkoēta, ipinimoni iitopākana seī. Imakinikana ikara atoko itxaāpotana iitopākinina.

⁴¹Ininiā Xesosi kosekari sīko pakini komiri, ipi ximaki pakini. Iuasaaki ionakaāta iaxiti:

—Erekapitikari pisikakiti —itxa.

Eereka imaxiōpekari komiri. Isikari imoianariakori. Imoianariakoripekana sikaāpotana apanakini. Iuaīkana imapirinikari ximaki, xanaka itxari imakinikana.

⁴²Ikinimanekana nipokota, kamitopeka itxana. ⁴³Ininiā imoianariakori apotiitari ximaki itetakori, komiri itetakori pakini. Tosi pakini kotari xāpoka itetakori. ⁴⁴Iuasaaki sīko mio kikiakori nipokotakani.

Xesosi Ipoa Nopini Itīpokotini

(Mateo 14.22-33; Xoāo 6.15-21)

⁴⁵Xesosi takapiretakasaakiri kākiti, iuasaaki iokanatana imoianariakori ipiriātina iua apisa, Petsáita tixinimoni isinina ikapani. ⁴⁶Xesosi takapiretanapaka atoko, mitaxiratari nopini isa Teoso imisākiretini ikapani. ⁴⁷Mapiāpe inakasaaki kanaua ipoa apanikakiāxiti-peka aua. Iuasaaki Xesosi imiriīpanika aua.

⁴⁸Xesosi atamatana ninoa, itapanoka itxana imekoātinina, kotxi itima, tsakati pakini anikaāpotana ninoa. Ininiā ikatimaāpotakasaaki, Xesosi apokaāpota ninoamoni. Itīpokota ipoa nopini. Inapaāpoaritana imoianariakori. ⁴⁹Ininiā ninoa atapakasaakiri ipoa nopini itīpokotini, ninoa uākatari kamiri. Ininiā ninoa akiripoakata. ⁵⁰Ininiā iua misākiretana:

—Kataparaxinire hītxako. Notakara. Na !hīpīkarauatape —itxana imoianariakori.

⁵¹Eereka kanauaā iereētaua. Iuasaaki itima iotoka itxa. Ininiā itikokitatana ninoa. Itsorikaātana:

—Kiripa atxiiti? —itxana.

⁵²Ikara atoko isākirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³Xesosi imoianariakorikata ipiriātari ipoa. Isari Xenesaree tixinimoni. ⁵⁴Ikanikiitakasaakina apanakini itikari Xesosi.

—Xesosira —itxana.

⁵⁵Ininiā imitekana kākiti auinimoni amianatakani apinina ikapani. Anikana isirimatana nopini Xesosimoni. ⁵⁶Ikini sitatxiti kākiti amianatakani sirīka kimapori tiniāpo. Amanaārina Xesosi auritininina ninoa imāka itikakinina. Ikinikana imāka tikakakani erekapeka itxikitaka.

Xoteoakori Iikite Pirena

(Mateo 15.1-9)

7 Ininiā pariseoakori, kaiōkatsoparererakori pakini, Xerosareē ikani, apotiitaua Xesosikata. ²Iuasaaki itikarina Xesosi moianariakori marokapiotakaniuana nipokori inikinina apisa. Ininiā itxana:

—!Erekari imarokapiotakaniuana —itxana.

³Pariseoakori, imakinikana Xoteoakori apaka kamari ikiomaneakori kitxakapiriīkarini sākire iaōka. Inipokotinina apisapanika arokapiotauana.

⁴Nipokori amotikoātaā Xoteoakori sikasaaki, eereka apokasaakina aapokona imarokapiotakaniāuana kona inipokotana. Tiitxi iākoanatxi, kopiti, apanakini itiina pakini arokasaakina

ikiomaneakorini oerekakiti iaōka arokana.

⁵ Ininiā pariseokori, kaiōkatsopareriakori pakini pimaāri Xesosi:

—Kinirepa pimoianariakori kona kamatari kitxakapirīka atoko ininina? Kinirepa marokapiotakanikaua inikarina nipokori? —itxarina.

⁶ Ininiā Xesosi apakapapireta:

—Mitxipitipanika Isaía säpiretai hīte. Atāo iua säkire, kotxi hīsäkire atxiiti erekari, txamari kona hīkamari hīsäkire iaōka. Iua txari:

Kamisirienrerini ninoa kākiti.

Ninoa säkireñanira ipaxitanona.

Ākixinireña !inirekanona.

⁷ Maxikatīika ninoa kapotoreēkaua nota apisatoō. Maxikatīika ninoa txano: “Ateosone pitxaua,” kotxi ninoa !oerekari nota säkire. Ninoaka säkire oerekana, txamari “Teoso säkire asäpiretai” itxana.

Ikara atoko Isaía iōkatsopatakiti Teoso säkire.

⁸ —Ininiā hītakanapapekari Teoso säkire, kākiti oereēkiti hīkamini ikapani. ⁹ Hītakanapapikari Teoso paniātakiti, hinirekaākiti hīkamini ikapani. ¹⁰ Kitxakapirīka Moisesi txari:

Pipaxitariko piri. Pipaxitaroko pinoro.

Piri, pinoro pimisäkirepiretiniā, pokaākako,

itxa Moisesi säkire. ¹¹ Txamari hīte oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isäpiretana: ‘Ia nota auakiti nisika Teosomoni.’” Ininiā !isikari ninoa nirekakiti ninoamoni. Ikara atoko inakari kākiti sikakiti Teosomoni, hīte takauākatari “Kopaā.” ¹² Ininiākara hōerekari kākiti imatiretakanina iri, inoro pakini. !Apakata hōerekakiti. ¹³ Ikara hōerekakiti xika kona hīte maākatari Teoso säkire. Apiata hinirekari kākiti oereēkiti. Auapanika itori hōereēkiti

säkiretxiti ikara atoko inakari —itxa Xesosi.

Ākixiniretxi Txiko Pirena

(Mateo 15.10-20)

¹⁴ Xesosi iuaikana akiritana ikinimane kākiti. Itxana:

—Hīkinika hīkenakota. Hī-takaōtxikariko nisäkire. ¹⁵ Imakinika hinikakiti, mapara auakari. !Ikamari ate maerekani. Hixinireē potoriākari kamari maerekanitxi. ¹⁶ Kakenakokii, ininiā hīkenakotariko nisäkire —itxa Xesosi.

¹⁷ Ikinimane kākiti itakanapaka atoko, aapokotxi āki iroā. Iuasaaki imoianariakori pimaāri:

—Pisäpiretaua mixikanani pisäpiretakiti —itxana.

¹⁸ Ininiā iua txari:

—!Kiikitei hīte. Kona hīte imarotatari hinamaā iroākari kona kamari maerekanitxi. ¹⁹ Kotxi iroākari !isari hixiniremoni. Hītikako āki isa. Iposo atoko hītikatakasaaki inapa. Ikara atoko ininiā, erekari ikinipoko kākiti niäkiti.

²⁰ —Ixinireē potoriākari iuara kamari kākiti maerekani. ²¹ Kākiti ākixinire ipotorika ixinikakiti maerekati, anokaretxi, itiriuatatxiti, okaniuatkatxiti, āti kākiti itanorokata isirīkini nire pakini. ²² Kākiti ākixinireē ipotorika itirenani, maerekati Satanasi oerekakiti, misirienertxi, pētauatkatxiti kamakari, xikotakatxiti, āti misäkirepiretiko, iuikiniua, miikitei inini pakini. ²³ Ikinika ikara maerekati kākiti ākixinire auakari txikotari kākiti xinire —itxa Xesosi.

Xoteo Minakatoua Auikiniri Xesosi Säkire

(Mateo 15.21-28)

²⁴ Xenesaree tixini Xesosi potorika. Txiro sitatxiti tōpa, Sitoō tixini pakini-moni isa. Iuaā kākiti aapoko iroā. Kona

inirekari kākiti imarotini iua auiniātaā. Txamari !iposotari iomaātiniua. Kākiti imaroāpotari iua auiniātaā. ²⁵ Sito apoka Xesosimoni, kotxi oa kenakopiretari Xesosi pirena. Maerekati matamatakoti auaītotaro oimi. Oāpokasaaki Xesosimoni, okapotoreēkaua iua apisatoō.

²⁶ Oa sito sākiretari Kreko sākire. Āto uāka oa. Siropenísia tixinikero oa. Okapotoreēkasaakiua Xesosi apisatoō, oamanaāri Xesosi:

—Pomitikenatariko maerekati matamatakoti namarite itoā auakari —otxari.

²⁷ Ininiā Xesosi:

—Xoteo !pitxaua. Maparakerorai. Pite nirekakari nisikini Xoteoakori nakiti. Amarini mitxi nikini atāo. !Erekari nokiniri amarini kiena anāpamoni —itxaro oa.

²⁸ Oa apakapapireta:

—Atāopitikara ikara atoko pitxa, kotxi nota maparakero, anāpa atoko Xoteoakorimoni. Iuaritika kākiti auiritari anāpapiki nikiniri nipokori katxakakari amarini nipokotiniātaā patapi —otxari Xesosi.

²⁹ Ininiā Xesosi apakapapireta:

—Erekari papakapapiretini, ininiā paapokomoni pisa. Maerekati matamatakoti !auaika pamarite itoā —itxaro.

³⁰ Oaāpoko oāpokasaaki, oāpokaro oamarite sirīkanāta. Erekapekaro oa. Maerekati matamatakoti asikapekaro.

Makenakoreti Pirena

³¹ Eereka Xesosi takanapari Txiro sitatxiti tōpa. Īpirixititari Sitoō tixini. Sitatxi tōpa tesi pakini Īpirixitita. Apoka Kariréia poamoni. ³² Ātikaka kākiti minari makenakoreti Xesosimoni. !Iposota atāo isākirauatini. Ninoa iteene amanaāri Xesosi:

—Piuako pitaka iua nopini kakenakorepeka inini ikapani —itxana.

³³ Xesosi anikari iua kiki kākiti mauakaniātaā. Itakari iuakoki ikīpita āki. Eereka ikiisoka, taka itxari ienemaā masākireti nini nopini. ³⁴ Eereka ionakaāta iaxiti, oōka itxa:

—Epataa —itxa.

Popīkari sākireē, “Piauāka.”

³⁵ Iuasaakipeka ikenakoki auāka, ininiā kakenakorepeka itxa. Iuasaaki inini poiōpeka apaka. Eereka erekapeka itxa isākirauatini. ³⁶ Ininiā Xesosi txana ninoa:

—Kona hīsāpiretapiri apanakini ni-makananitiniri iua.

Txamari apiata ninoa sāpirenauata.

³⁷ Kākiti tsorīkaāta:

—Ikinika ikamakiti peerekari. Makenakoreti kakenakorepeka itxa. Mimatasākiretakati, kasākirepeka itxa —itxana.

Xesosi Sikakienatana Ipi Ipi Pakini Mio Kākiti

(Mateo 15.32-39)

8 Eereka mapaōti itomaneri kākiti apotiitaua Xesosimoni. Nipokori xipokapeka, ininiā Xesosi akiritana imoianariakori. Itxana ninoa:

²—Nota amonīkana naia kākiti, kotxi ipi ōti, āti ōti pakini ōtipeka auana notakata. Ininiā uatxa nipokori !auaika. ³ Niokanatinīāna auinimoni manipokotakatipanikana, ininiā ipixiniāpo iōkapetana. Irikana. Ātikaka ōtako ikani kona apakata manipokotakanika isinina —Xesosi txana imoianariakori.

⁴ Imoianariakori apakapapireta:

—Uai aapokotxi mauakaniātaā, ininiākara nāpa aāpokari nipokori ito naia kākiti asikakienatini ikapani? —itxana.

⁵ Ininiā Xesosi:

—Kipakinipa komiri katari hītemoni aua?

—Setxinokara komiri aua atemoni — itxana.

⁶Ipaniātari kākiti topākini ixiti. Imaīkari iua komiri setxi.

—Erekari pisiākiti —itxari Teoso.

Iposo atoko imaxiōpekar komiri, sika itxana imoianariakori. Imoianariakori sika itxana apanakinimoni. ⁷Ninoamoni aua ātikaka ximaki axapitiri. Ininiā Xesosi txari:

—Ia erekari —itxa Teosomoni.

Ereka ipaniātana imoianariakori sikiniri kākitemoni. ⁸Ininiā ikinipoko kamitopeka itxana. Iposo atoko apotiita itxarina itetakori. Xāpokaka itxarina setxi kotarina. ⁹Ninoa komiri nikakani ipi ipi pakini mio kākiti. Kamitopeka itxana.

Ininiā itakapiretanapana ninoa. ¹⁰Iposo atoko imoianariakorikata iereētaua kanaua āki. Taomanota tōpamoni isana.

Pariseoakori Nirekari Xesosi Oerekiniri Iposotiire

(Mateo 12.38-42; 16.1-4;

Arókasi 11.29-32)

¹¹Pariseoakori apoka Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire p-erekaua ate, aātaminiri ikapani, Teoso iokanatinii ikorapokoriti aimarotini ikapani —itxarina. ¹²Ininiā Xesosi oōka. Itxari:

—Kinirepa kākiti uatxarini nirekari noerekiniri Teoso takaōtxikare, iposotiire? Atāopitikara nota txai hīte, kona noerekai hīte.

¹³Ininiā itakanapana. Iereētaua kanaua āki. Ikanapiriā ipoa ipiniāmōni iuaīkana.

Pāo Tireēkari Pirena

(Mateo 16.5-12)

¹⁴Xesosi moianariakori maxinīkaretari pāo. Ātika pāo porīi kanaua āki aua.

¹⁵Ininiā Xesosi ōtāikikana:

—Erepaniko, pamonōkoniri pariseoakori, Erotxi pakini pāote tireēkari —itxa Xesosi.

¹⁶Xesosi moianariakori misākiretakakaua:

—Ikara atoko itxaua, kotxi amaxinīkaretari pāo.

¹⁷Xesosi imarotari ninoa sākire, ininiā itxana:

—Kinirepa hīsākirauanāta pāo mauakani xika? Kona himarotatapanikari niposotiire? Kona hīikitetapanikari? Kona hinirekatari hāuikiniri nisākire? ¹⁸Kokimai, txamari, !hātamatari. Kakenakokimai, txamari !hīkenakotari nisākire.

¹⁹Kona hīxinikapanikari iusaaki nimaxiōpekitakiti siko komiri, siko mio kākiti nisikakienatini? Kipakinipa kotari itetakori hīxāpokaka? —ipimaāna.

Ininiā ninoa apakapapireta:

—Tosi kotari axāpokaka.

²⁰Xesosi txana ninoa:

—Ereka āti ōti nimaxiōpekar setxi komiri porīi. Nisikari ipi ipi pakini mio kākiti. Itetakori hāpotiitakiti, kipakinipa kotari hīxāpokaka? —ipimaāna.

Ininiā ninoa:

—Setxi kotari axāpokaka.

²¹Ininiā Xesosi:

—Ininiā kinirepa kona hīikitetapanikari?

Mōsiāreti Petsáita Aapokotxitikiri

²²Xesosi Petsáita aapokotxitimoni apoka. Iusaaki kākiti minari mōsiāreti iuamoni. Amanāarina Xesosi maātakiniri iua mōsiāreti.

²³Ininiā iua anikaāpotari iukoā kākiti mauakanimoni. Iuaā iminapari ienemaā

mōsiāreti okiā. Eereka taka itxari iuako iītoā. Ipimaāri iua:

—Kōsiārepekai? —itxari.

²⁴ Ininiā iua atamata.

—Nota itikapokotapeka, txamari nitikari kākiti tipokotakari aamina atoko —itxa.

²⁵ Iposo atoko Xesosi iuaikana takari iuako mōsiāreti nopini. Eereka mōsiāreti atāo itikapokotapeka. Ikinipoko atamata. ²⁶ Ininiā Xesosi iokanitari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisāpiretiniri nikamakiti kāk-
itimoni —itxa Xesosi.

Petro Auikari Xesosi Teoso Mereēkiti Ininiāua

(Mateo 16.13-20; Arókasi 9.18-20)

²⁷ Eereka Xesosi imoianariakorikata sari kākiti poiāoka auinimoni, Sesaréia-Piripi sitatxiti takote isana. Ipixiniāpo Xesosi pimaāna imoianariakori:

—Kiripa kākiti uākatano nota? —itxa.

²⁸ Ninoa apakapapireta:

—Xoāo kapatxisareri iuākataina. Apanakini “Eriási inakori” iuākataina. Ininiā apanakini “Teoso sākire sāpiretakari” iuākataina —itxana Xesosi moianariakori.

²⁹ Iuaikana Xesosi pimaāna:

—Hitepekana, kipa hite uākatano? —itxana.

Ininiā Petro apakapapiretari:

—Teoso mereēkiti, kākiti iāpapanātak-
iti pitxaua —itxari.

³⁰ Ininiā Xesosi txana imoianariakori:

—Teoso mereēkiti nininiua !hīsāpire-
tapiri apanakini —itxa.

Xesosi Sāpiretari Ipinini

(Mateo 16.21-28; Arókasi 9.22-27)

³¹ Ininiā ia atoko oerekarauata:

—Nota hītari iaxitikiri iteene atatsiirauatako. Kiomātxiakori, sasetotxi auíteakori, kaiōkatsoparerini

pakini kona nirekapanino nota. Nokaākako. Eereka ipi āti pakini ōtisaaki iuaikana nōkitikauako.

³² Ikara isāpireta ikinimane kākiti-
moni. Ininiā Petro anikari iua mapara-
moni. Itxari:

—Kona ikara atoko !pitxape. Kona erekari pisākire ikara atoko pinini —itxa Petro.

³³ Ininiā Xesosi kirioka imoianariako-
rimoni. Iua txitari Petro:

—Pisipiniikaua Satanasi. Pite nireēk-
iti kākiti nireēkiti atokotxikana. Pite
nireēkiti kona Teoso nireēkiti atokoni —
itxa Xesosi.

Xesosi Moianari Atāo Inakari

(Mateo 16.24-28; Arókasi 9.23-27)

³⁴ Xesosi akiritana kākiti imoianari-
akori apaka. Itxana ninoa:

—Notakata kinirāo sika pinakasaaki,
piteka pinireēkiti kona pixinikape. No-
takata kinirāo sika pinakasaaki, nota
misiritiko atokokana pimisiritaākako. Ia
atoko pinirekiniā, notakata pisapitikako.

³⁵ Pite ātipirika kaminiāri piteka nireēk-
itinoka, ininiā pinireēkiti xipokapitikako
pitekata. Pite nireēkiti xipokiniā, nota
sākire pauikini xika, Teoso iokanapirena
erekari pisāpiretini xika, pite auapinini-
ika txako Teosokata.

³⁶ Atxiīti papakapari ikinipoko tiitxi,
ikini itixiti auakani tii, pinakiti ikapani.
Atxiīti iua tiitxi xika kona pikipitari
Teoso sākire, ininiā kona pikaikota
ātipirika Teosokata. Ikara atoko ininiā,
erekari atxiīti ikinipoko tiitxi auinii?
Konapitini. Apiaerekata Teosokata
ātipirika pikaikotini, kotxi tiitxi iki
poiāoka, pixinire karone apiata.
³⁷ !Apakata kākiti iikitxitiniri Teoso,
iuamoni isini ikapani.

³⁸ Īkorsaaki kākiti !nirekari Teoso.
Inirekari maerekatnoka. Īkorsaaki
pipētatiniano nota, pipētatinia-
ri nota sākire, ininiākara nota kākiti

itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

9 Xesosi txana ninoa: —Hixinikariko ia nisākire. Apanakini hīte uatxa uai auakanii, hīpinini apisapanika himarotari Teoso auītetxi ininiāua. Auītetxi kaposotiireri itxaua —itxa Xesosi.

Moisesi, Eríasi Pakini

(Mateo 17.1-13; Arókasi 9.28-36)

²Seisi pakini ōti napaka atoko Xesosi anikana Petro, Txiako, Xoão pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi īto ipinipo itxa. ³Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. ⁴Iuasaaki Eríasi, Moisesi pakini tokiā iuaā. Isākirauatana Xesosikata. ⁵Ininiā Petro txari Xesosi:

—Koerekareri, erekapitikari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

⁶Ikara atoko itxa Petro, kotxi !imaro-taikari isākire, iteene ipikarauatiniā.

⁷Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hīkenakotariko iua sākire —itxa.

⁸Katimaritika Xesosi moianariakori saporitika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹Ōtanoxirataro iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaikana nōkitikaākaua atokoikarako, hīsāpiretariko mixikanani hītikakiti —itxana.

¹⁰Ininiā !isāpiretarina apanakini-moni. Ninoanoka isākirauanātana:

—Natokopa itxa kākiti ipikaripeka iuaikana ōkitikiniāua —itxanātana.

¹¹Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

¹²Ininiā Xesosi:

—Inipitikara Eríasi apoka merepanika, kākiti iposope inini ikapani. Teoso sākire iōkatsopatakori txari: “Kākiti itari iaxitikiri iteene atatsirauatako. !Inirekaākako.” Kinirepa ikara atoko itxa Teoso sākire iōkatsopatakori? ¹³Nisāpiretaiko Eríasi apokapeka. Kākiti misiritapekari iuani. Inireēka iaōka imisiritarina. Teoso sākire iōkatsopatakori sāpiretapekari ikara ene —itxa Xesosi.

Amarini Maerekati

Matamatakoti Auaītotakiti

(Mateo 17.14-21; Arókasi 9.37-43a)

¹⁴Ninoa apokaāpotakasaaki apanakini imoianariakorimoni, atamatana kākityipokoni. Ninoa ākitana Xesosi moianariakori. Iuasaaki kaiōkatsoparerini kākityikata itaparakienetakakaua. ¹⁵Iuasaaki kākiti atapari Xesosi. Ipoxokoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

¹⁶Ininiā Xesosi:

—Ari, notara.

Ipimaāna:

—Kininiāpa hītxitakakaua? —itxa.

¹⁷Ininiā kiki kākiti sauaki auakari apakapapiretari:

—Nota minamari namarite pitemoni. Maerekati matamatakoti auaītotari iua. !Auiritari namarite sākirauatini.

¹⁸Iua maĩkasaakiri, okaĩtotari iua xiti. Iuasaaki namarite sorikipeta. Akatsakatsiriĩtaua. Itorõkaĩtota. Ininiã nimisäkiretamana pimoianariakori omitikiniri maerekati matamatakoti, txamari ninoa liposotari.

¹⁹Xesosi txari:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

²⁰Ininiã ninoa anikari iua amarini Xesosimoni. Iuasaakipeka maerekati matamatakoti atamatari Xesosi. Iuasaakipeka maerekati matamatakoti txĩkitakari amarini okaratiniua. Ininiã iua amarini iriãkata. Ikanapirikata, isorikipekata, itxĩkitakari amarini.

²¹Xesosi pimaãri iri:

—Kirisaaƙipa ipotorika ĩkora atoko inini?

—Axapitipanikara ipotorika ĩkora atoko inini. ²²Itokata maerekati matamatakoti okaĩtotari xaminamoni. Itokata okaĩtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonĩkauako atepaniko —itxa iri sãkire.

²³Ininiã Xesosi:

—Nota posotatari? Teoso sãkire auĩakari posotari ikaminiri ikinika —itxari.

²⁴Iuasaaki iua kiki apakapapiretari iãsaritika:

—Nauikapitikari piposotiire. Axapitikinoka !nauikari, ininiã pisikaposotiiretano iteene pisãkire nauikini ĩkapani.

²⁵Isãkirauanãtakasaakina, kãkitipokoni miteẽkata ninoamoni Xesosi kamakiti imarotinina ĩkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxĩkitakari kãkiti masãkireti inini. Pitxĩkitakari kãkiti makenakokiti inini. Nota omitikai pite. Pipokĩka. Iuaĩkana !pĩroãpinikako iua ĩtoã —itxa Xesosi.

²⁶Iua maerekati matamatakoti akiripoakata. Okaraĩtokatari atoko, sipe itxa. Iua amarini ipĩkari ĩto atokoƙepa itxa. Ininiã apanakini kãkiti:

—Ipĩpeka —itxarina.

²⁷Ininiã Xesosi maĩkauakotari. Őkitikari iua, ininiã itima.

²⁸Xesosi aapokotxi āki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

²⁹Ininiã Xesosi:

—Teoso pimisãkiretakasaaki, iuasaaki pimanipokotakaniãra, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arõkasi 9.43b-45)

³⁰Iuaã ipotorikana. Īpirixititarina Karirẽia tõpa. Xesosi !nirekari apanakini kenakoenetiniri iua auiniãtaã. ³¹Kotxi inirekari oerekinina imoianariakorinoka ipinini pirena. Ininiã Xesosi:

—Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipĩ õti ãti õti inakasaaki iuaĩkana nõkitikauako —itxa.

³²Ninoa !imarotari Xesosi sãkire. Ninoa pĩkari ipimainirina iua.

Kiripa Kãkiti Apiatakari Txataua?

(Mateo 18.1-5; Arõkasi 9.46-48)

³³Kapanaoõ sitatxiti apokana. Aapokotxi āki auakasaakina, Xesosi pimaãna ninoa:

—Natokopa itxa hīsākire, uaimoni aīkasaaki hītaparakienatakakasaakia? —itxa.

³⁴ Masākirenika itxana, kotxi kimaporiāpo ninoa sākire: “Īkiripa ate apiatakari?” itxana. ³⁵ Xesosi, iitopāka atoko, akirita itxana imoianariakori tosi pakini.

—Hīkinika uaimoni hīitopāka. Apiatakari pininiāua pinirekiniā, piteka poiāotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ —Papakapiniāri amarini pipoxokoniritika, papakapano nota apaka. Papakapiniāno nota, na notananini papakapa. Iusaaki papakapari iua uaimoni niokanatakiri —itxa Xesosi.

Maerekani Matamatakoni Omitiākari

(Arókasi 9.49-50)

³⁸ Xoāo sāpiretari Xesosi:

—Koerekareri, ate kenakotari kiki omitikinina maerekani matamatakoni pite uākaā. Kona pimoianarini iua. Ininiā ate: “Ikara atoko !pitxape,” atxari.

³⁹ Ininiā Xesosi:

—!Hīotokakapiri ikara ikamini. Kākiti nota uākaā maerekati matamatakoti omitiākari, kona imisākirepiretano. ⁴⁰ Iua ate mokaiakari minakatiua. Atiretakiri itxaua. ⁴¹ Nota atāopitikara nitxai hīte. Atxiiti kākiti sikai āparaā, kotxi Teoso merekiti nakiti pitxaua. Iua kamakiti erekari, ininiā apakapapitikariko ikamakiti īki.

Maerekati Oerekakari

(Mateo 18.6-9; Arókasi 17.1-2)

⁴² !Erekari kākiti mitari oerekiniāri amarini nota sākire auīākari maerekati ikamini. !Erekari. Erekarariko kai mitari iaxirikaākamako iua kākiti mitari nokiā, eereka okaākamako ipoamoni ipinini ikapani. ⁴³ Piuako

maerekati ikamākitakiniāi, pitsotakari. Erekarariko ātinani piuako Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiiti piuako ipi aua, txamari pite sari iuaātaā. !Erekari. ⁴⁴ Iuaā kītxi piitoā auakaro !opina. Xamina !oakaāka. ⁴⁵ Pikiti maerekati ikamākitakiniāi, pitsotakari. Erekarariko ātinani pikiti Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiiti pikiti ipi aua, txamari pite sari iuaā. !Erekari. ⁴⁶ Iuaā kītxi piitoā auakaro !opina. Xamina !oakaāka. ⁴⁷ Poki maerekati ikamākitakiniāi, pimakatxakari. Erekarariko ātinoka poki auini Teoso auītetxi ininiātaāua pisini ikapani, kotxi maerekati pikaminiā pisa maerekani misiritikoātaā. Iuaā xamina tirinapika. !Oakaāka. Atxiiti poki ipi aua, txamari pite sari iuaā. !Erekari. ⁴⁸ Iuaā kītxi piitoā auakaro !opina. Xamina !oakaāka.

⁴⁹ Iōkira nipokorimoni takiko atokokana xamina tirinakari takaākako ikinimane kākitemoni. Ikara atokokana ikinimane ataerekataākako. ⁵⁰ Iōkira erekaro. Txamari iōkira koketikosaaki kipatxikata, !erekaikaro. !Apakata xinitxi piōkiratini ikapani. Atāo iōkira atoko hītxako. !Hītxitakakapeua.

Kiki Ītanorokata Itakanapakakini

(Mateo 5.31-32; 19.1-12; Arókasi 16.18)

10 Xesosi potorika iuaā. Xotēia tōpa isa. Īpiriākitari Xotāo kāuaāriri. Iuaīkana kākiti apotiitaua iuamoni. Kaiāopokori kākiti, ininiā oerekarauata, mitxi oerekarauanātini atokokana.

² Kikiakori, pariseo inakanuiua, apoka Xesosimoni. Ninoa nirekari Xesosi kerokiniri isākire, ininiā ipimaārina:

—Atāokani erekari kiki takanapiniro itanoro?

³ Ininiā Xesosi:

—Kiatokopa itxa Moisesi paniātakiti?

⁴ Ininiā ninoa:

—Moisesi paniātari kiki iōkatsopatiniri aātsopa, itanoro itakanapini aātsopate, ininiā eereka auiritari iua iokanatiniro oa —itxana.

⁵ Ininiā Xesosi:

—Moisesi auiritai hītanoro hītakanapini, kotxi paikori hīxinire. Teoso nireēkiti himanirekakani xikara, Moisesi auiritai hītanoro hītakanapini.

⁶ Kotxi merepitanika Teoso ikinipoko ikamakasaaki, ikamari kiki, sito pakini.

⁷ Ikara atoko ininiāpitikara, kiki takanapari iri, inoro pakini, itanorokata auini ikapani. ⁸ Ininiā ātika atoko itxauana. Ininiā ipi kākiti litxaikauana. Ātinokara itxapekauana. ⁹ Ikara atoko ininiā, lerekari kākiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriā aapokomonina. Iuaā apokasaakina, imoianariakori pimaāri iua ikara sākiretxiti iuaikana oerekinina ikapani. ¹¹ Ininiā isāpiretana:

—Kiki itanoro takanapakari, āto sito itaka inakari, maerekati ikaminaro itanoro. ¹² Iua atokokana sito ōtaniri takanapakaro, āti ōtanirita inakaro maerekati okaminiri ōtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ātikaka kākiti anikari amarini Xesosimoni. Inirekarina Xesosi misākiretiniri Teoso ninoa amarini ikapani. Txamari imoianariakori txitana. !Auiritana amarini anikinina Xesosimoni. ¹⁴ Xesosi ikara ikenakotakasaaki, !apokaerekatari. Ininiā iua:

—Hāuiritariko amarini notamoni apokini. !Hīotokakapiri, kotxi

kākiti Teoso auītetakani amarini atoko itxauana. ¹⁵ Ia atāo: Kākiti mapakapaniāri Teoso, amarini apakapiniri atoko iminakaniā, kona isa Teoso auītetxi ininiātaāua —itxa Xesosi.

¹⁶ Ininiā Xesosi kataratari amarini. Itakari iuako ikiina nopini. Amanaāri Teoso erekari itakini amarinimoni.

Ātokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaikana poterika. Iuasaaki ātokori miteka iuamoni. Ikapotoreēkaua Xesosi apisatoō.

—Koerekareri erekari, kiripa nikama Teosokata ātipirika nauini ikapani? —itxa.

¹⁸ Ininiā Xesosi:

—Kininiāpa “erekari” pitxano? Teosonanira erekari. ¹⁹ Pite imarotari Teoso paniātakiti. !Pokaniuatape. !Pisirikape āti itanorokata. !Piitiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ātokori txari:

—Noereēkiri, axapitipanikara ninakasaaki, nikīpitari ikara Teoso paniātakiti —itxari.

²¹ Ininiā Xesosi apokaerekatari iua.

—Auapanika ātinoka pikamini tīkane. Pisa. Tiitxi ikinika pinakiti pivētxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxari iua.

²² Ikara Xesosi sākire ikenakotakasaaki, imatinaniuata. Isipe. Maerekaxiniretinoka itxa, kotxi kaiāori itii.

²³ Xesosi sapotorika, misākireta itxana imoianariakori:

—Pamimapaniri katxineiroteri sini Teoso auītetxi ininiātaāua —itxa.

²⁴ Imoianariakori:

—Anekani? —itxana.

Iuaïkana Xesosi txari:

—Pamimapaniri katxineiroteri sini Teoso auïtetxi ininiätaãua. ²⁵ Atauako kamero napatari äkorike sonakiã? Apia mimari kãkiti katxineiroterini auïtetiniri Teoso —itxana.

²⁶ Imoianariakori iteene tsorïkaãnãta.

—Ininiã kipa sari Teoso auïtetxi ininiätaãua? —itxana imoianariakori.

²⁷ Ininiã Xesosi apakapiretana:

—Teoso posotari ikinipoko ikamini. Kãkiti !iposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini ikapani —itxari Xesosi.

²⁹ Ininiã Xesosi:

—Atão nitxai. Paapoko pitakanapiniã, pitariakori, pitaroakoro, piri, pinoro, pïtanoro, pamariteni, pikikiote, pitakanapiniã notakata pisini ikapani, Teoso iokanapirena erekari pisãpiretini ikapani, ³⁰ pitakanapakiti iua apiata nisikaiko. Ìkorsaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsitari pimisiritiko. Luaritika eereka Teosokata pauapika ätipirika. ³¹ Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi säkire.

Iuaïkana Xesosi Säpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareë kimaporite iãpotakasaakina, Xesosi ïkiika. Iusaaki ninoa maerekaxiniretinoka itxana. Apanakini ninoa tikini sikani pikarauata. Ininiã Xesosi iotoka. Akiritana imoianariakori

tosi pakini. Isãpiretana païtiki kãkiti kamakiti iuamoni tükane. ³³ Ininiã iua:

—Hïkenakota. Xerosareëmoni asa uatxa. Iuaã nota hïtari iaxitikiri sikaãkako sasetotxi auïteakorimoni, kaiökatsopareriakorimoni pakini. Ninoa paniätariko nota okiko. Iposo atoko Xote minakonimoni sika ninaãkako. ³⁴ Inapetanonako. Inoropatanonako aãpitsaã. Ikiïskanonako. Iposo atoko oka ninaãkako. Ipi äti pakini öti inakasaaki iuaïkana nökitekauako —itxa imoianariakorimoni.

Txiako Xoão Pakini Amanãkiti

(Mateo 20.20-28)

³⁵ Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaãk-iti pikamini —itxana.

³⁶ Ininiã Xesosi pimaãna:

—Kipa hinireka nikaminii hïte? —itxana.

³⁷ —Pite ikinimane auïte pinakasaak- iua, pauiritaua pitekata aïtopãkini, pikikomoni, pisaneremoni aïtopãkini —itxana.

³⁸ Ininiã Xesosi:

—!Himarotari hamanaãkiti, kotxi mapaöti napa atoko nota apakapariko iätatxi tsïitxiã niätini ikapani. Hiposotari ikara hiätini? Nipatxisataãkako tsïitxiã. Hïposotari ikara atoko hïpatxisatiko?

³⁹ —Aposotapitika —itxana ninoa.

Xesosi txana ninoa:

—Inipitikara hiätariko nota iätakiti. Inipitikara hïpatxisataãkako nota patxisatiko atokokana. ⁴⁰ Txamari !niposotari nauiritinii hïte nikikomoni, nisanaremoni hiïtopãkini, kotxi Teoso mereëpekana kãkiti nikikomoni, nisanaremoni topãkakani tükane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoão

pakini amanaäkiti, ininiä ninoa omanatana. ⁴²Ininiä Xesosi akirita txana imoianariakori:

—Uaimoni hina. Hiitopäka notakata —itxana ninoa.

—Hite imarotari Xoteo minakanuia auiteakori pataparana. Ninoa auiritari kākiti kaminiri ninoa paniätakitinoka.

⁴³Ninoa atoko !hïtxape. Apiari pininiua pinirekiniä, pimoianatana apanakini.

⁴⁴Apanakini auite pininiä pinirekiniä, nitritxi pitxauako merepanika. ⁴⁵Ikara atoko nitxa nota hitari iaxitikiri ïkorapokoriti napokasaaki. Ninitiri !auari. ïkorapokoriti napoka, kākiti nitiri nininiua ïkapani, kākiti nitiretini ïkapani. ïkorapokoriti napoka nipinini ïkapani, kaiäopokori kākiti mapinakani ïkapani, kotxi nota iikitxirauata ninoa mapinakani ïkapani —itxa Xesosi.

Mösiäreti Patximeo Inakori

(*Mateo 20.29-34; Arókasi 18.35-43*)

⁴⁶Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kākitikata, iusaaki mösiäreti Patximeo inakori kimapori itiniäpo iitopākanāta. Tximeo inakori ākiri iua. Iua mösiäreti amanaänātarō txineiro. ⁴⁷Iua kenakotari Xesosi Nasareekiri inapaenetini, ininiä akirināta:

—Xesosi, Taviini apika mekanirii, piamonīkanoko —itxa.

⁴⁸Ininiä apanakini kākiti pinitari:

—Maātako. !Pakirinātape —itxarina mösiäreti.

Iuaritika apiata akirinanikata:

—Taviini apika mekani.

Piamonīkanoko nota —itxanāta.

⁴⁹Ininiä Xesosi iotoka itxa.

—Hākiritari iua mösiäreti —itxa.

Ininiä ninoa:

—Pipoxokoniuatoko. Pōkitikaua.

Akiritapekai —itxarina iua mösiäreti.

⁵⁰Ininiä Patximeo okanapari imāka inopini auakari. Pakoteri ökitikaua, sa itxa Xesosi akiritiniri manapi.

⁵¹Ininiä Xesosi:

—Kipa pinireka nota kaminii pite? —itxari.

—Apiananiri, nōsiārera ninireka —itxari.

⁵²Ininiä Xesosi:

—Pisa. Erekapekai, kotxi pite auikari niposotiire —itxari.

Iusaakipeka Patximeo kōsiärepeka itxa. Xesosikata sa itxa kimaporiä.

Xesosi Xerosareë Apokaäpotini

(*Mateo 21.1-11; Arókasi*

19.28-40; Xoão 12.12-19)

11 Xesosi imoianariakorikata imatokoäpotari Xerosareë. Ötanoxiratarari, oriva mina takikoöatā takote apokana. Iuaā aua aapokotxi Petxipaxee inakori, Petānia inakori apaka. Iuaā Xesosi iokanatana ipi imoianariakori.

²—Hīsa ikiraā kaixiti auakari aapokotxiā. Iuaā hāpokasaaki, hāpokari xomēta ākiri iaxiriākori. Kākiti !iitopākapanika iua nopini. Hīkoxirikari. Uaimoni mina hitxari.

³Kākiti pimaākasaakii hite: “Kinirepa hīkoxirikatari xomēta ākiri?” hinikosaakiko: “Apiananiri nirekari iua. Iuaīkana akamoni aminariko,” hitxako.

⁴Ininiä eereka isana. Apokarina iua xomēta ākiri iaxiriākori kimaporiä aapokotxi tore takote. Ininiä ikoxirikarina. ⁵Ātikaka kākiti iuaā auakani:

—Kinirepa hīkoxirikatari xomēta ākiri? —itxana Xesosi moianariakorimoni.

⁶Ininiä Xesosi paniätini iaōka apaka-papiretana. Ininiä kākiti iuaā auakani:

—Ininiä hanikaikari —itxana.

⁷Ninoa anikari xomēta ākiri Xesosimoni. Ininiä imākana āti imākana nopini auakari itakarina xomēta

ākiri nopini Xesosi topākini ikapani.
⁸Apanakini kākiti matameekari imākana āti imākana nopini auakari kimaporiā Xesosi napini tikane. Apanakinipekana sauakari aāxike. Kimaporiā itakaāpotarina. ⁹Ninoa Xesosi tikini ikani, iua apisa sikani pakini akiriāpokatana ipoxokoniritikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰Peerekari Teoso, aātokirini Tavii aāuīte ininiua atokokana iuaikana apoka. Peerekari Teoso, iaxiti apiko nopinixiti auakari. Apiananiri itxaua —itxaāpokatana.

¹¹Xesosi apoka Xerosareē. Teoso misākiretiko aikotimoni isa. Iuaā iroā itxa. Ikinika iroko āki itikapokota. Iua atoko mapiāpe, ininiā isari Petánia aapokotx-itimoni tosi imoianariakorikata.

Piko Mina Marito Pirena

(Mateo 21.18-19)

¹²Ikatimatakasaaki ipotorikana Petánia. Iuasaaki Xesosi natxita. ¹³Ikira atoko atamataro piko mina. Ito otsopa aua. Isari oamoni kariro iuākatiniāro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴Ininiā Xesosi:

—Kākiti !itximaikaiko piri —itxari piko mina.

Imoianariakori kenakotari isākire.

Pirātxi Vētxitakani Omitikiko

(Mateo 21.12-17, 20-22; Arókasi 19.45-48; Xoão 2.13-22)

¹⁵Xesosi imoianariakorikata apoka Xerosareē. Xesosi iroā Teoso misākiretiko aikotiā. Omitikana kākiti iuaātaā amotiitakani, sikatiitakani. Ikapakitikari amesa ninoa txineiro apakapakani amesane. Ikapakitikari kamoā vētxitakani topākini apaka.

¹⁶Iua !auiritana kākiti anikiniri tiitxi aiko ipirikoatinina. ¹⁷Xesosi oerekana kākiti iuaā auakani:

—Teoso sākire iōkatsopatakori txari: Iua naapoko. “Teoso misākiretiko aikoti” akiritaākako, ikini itixiti auakani misākiretinino ikapani, itxa. Txamari hīte txikitakari ia aiko kiitiririni iomaātiniātaā ininiua —itxa Xesosi.

¹⁸Sasetotxi auīteakori, kaiōkatso- parerini pakini kenakotari Xesosi sākire. Ininiā ninoa tsorikaāta. Ixinikaxititana.

—Kanatokopa atxatari Xesosi aōkini? —itxanātana.

Ikinimane iteene apokaerekatari Xesosi sākire, ininiākara sasetotxi auīteakori, kaiōkatsoparerini pakini pīkari Xesosi.

¹⁹Ipiākapokotapeka Xesosi takanapari sitatxi imoianariakorikata.

²⁰Katimatinikata kimaporiā isaāpotakasaakina, atamatarona oa piko mina. Opīpe. Okotsapekara ipinakepeta apaka. ²¹Petro xinikari iua apisapanika Xesosi sākire, ininiā akiritari Xesosi:

—Koerekareri, patamataro piko mina. “Kākiti !itximaikaiko piri,” pinakito. Oa piko mina ipīpeka —itxari.

²²Ininiā Xesosi:

—Pauikapiretariko Teoso sākire. ²³Atāoenekara nisāpiretai. Pauikiniāri Teoso sākire, piposotari pipaniātiniri ikira ōtanoxiratari: “Pōkitikaua. Pokakataua potxoari uunitimoni.” Pākixinireē iteene pauikiniāri pisākire iaōka apokini, ininiā apokapitikako pamanaākiti. ²⁴Ikara atoko ininiā nota txai hīte, Teoso pimisākiretakasaaki, pamanaākasaakiri pinirekakiti, pauikariko iposope Teoso sikinii, ininiā papakapapanikariko. ²⁵Teoso pimisākiretakasaaki, āti pomanatiniā, pitakanapariko pomanākare. Pimaxinīkaretiniāri maerekati ikaminii, ininiā piri iaxitikiri

maxinīkaretari maerekati pite kamakiti.
²⁶ Pimamaxinīkaretakaniāri maerekati
 āti kamakiti pitemoni, ininiā piri
 iaxitiki kona maxinīkaretari maerekati
 pite kamakiti apaka.

Xesosi Paniātakari Moerekakoni

(Mateo 21.23-27; Arókasi 20.1-8)

²⁷ Iuaīkana apokana Xerosareē.
 Xesosi tipokota aiko Teoso misākiretiko
 pirikere āki tinikata. Itipokonā-
 takasaaki, sasetotxi auīteakori,
 kaiōkatsoparerini, kiomātxiakori pakini
 apoka iuamoni. ²⁸ Ininiā ninoa txari:

—Kipaniāpa pikamari ikora pikamak-
 iti? Kipa paniātai? —itxarina Xesosi.

²⁹ Ininiā Xesosi apakapapiretana:

—Nota apaka pimarauatako
 hītemoni. Ātinoka nipimaāiko hīte.
 Hīsāpiretiniāno, nota sāpiretai hīte
 niokanatakiri uāka apaka. ³⁰ Kipa
 paniātari Xoōni ipatxisarauatini?
 Teosokani paniātari Xoō? Kākitikani
 paniātari Xoō? Hīsāpiretano —itxana.

³¹ Ininiā ninoa xinikaxitināta.
 Imisākiretakakana. Ipimaākakana:

—Natokopa itxa aāpakapapiretiniri
 iua? Aāpakapapiretiniāri: “Teoso
 paniātari iua,” ininiā iua: “Kinirepa
 kona hāuikatari iuani sākire?”
 itxapemaua. ³² Aāpakapapiretiniāri:
 “Kākiti paniātari iua,” ikinimane
 omanataua —itxanātana.

Ninoa pīkari kākiti kotxi ikinimane
 auikari Xoōni atāo Teoso sākire sāpire-
 takari ininiua. ³³ Ikara atoko ininiā ni-
 noa apakapapiretari Xesosi:

—Ate !imarotari.

Ininiā Xesosi:

—Ikara atoko ininiā, nota !nisāpiretai
 hīte nipaniātakiri uāka.

Parīkauatakani Maerekani

(Mateo 21.33-46; Arókasi 20.9-19)

12 Eereka Xesosi sāpiretana
 ninoa sāpirenatxi atāo inakari
 oerekiko. Itxari:

—Kiki takarauata. Txipokori ova
 inakoronoka itaka. Ipiriketari. Ikamari
 ova maōkiko. Iposo atoko itakare
 apanīkakixitika ikamari aapokotxi
 axapitiri ōtanori ikikiote imakinetini
 ikapani. Iposo atoko ipaniātana
 ātikaka kikiakori itakare inīkatini
 ikapani, kotxi iua sariko ōtakoxiti.
 Ninoa apakapamaroko ipixini ova
 iparīkana iki. Iposo atoko katakareri
 sipe. ² Ova manapi, iua katakareri
 iokanitari initiri ninoa kikiakorimoni
 ova ipixini apakapini ikapani. ³ Txamari
 iua apokasaaki ninoa maīkari iua.
 Ixirokitatarina. “Pisipeka,” itxarina.
 Miketika ikanapiripe.

⁴—Iuaīkana katakareri iokanitari
 āti initiri ninoamonikana. Txamari
 ninoa kikiakori misiritari iua. Kai soroā
 ikiporonakarina, karota itxapirina ikiiā.

⁵ Iuaīkana katakareri iokanitari āti
 ninoamonikana, txamari ninoa okapiri
 iuani. Kaiāopokori initiriakori iokanata
 ninoamoni. Apanakini inoropatana.
 Apanakini okana. Itxaāpotana.

⁶—Iua katakareri auapanika ātinoka
 iokanitari ikapani, imi iteene itire-
 takiti. Imapotōkire iokanitari imi ni-
 noamonikana. “Notamoni ninoa paxi-
 tariko namarite” itxa. Ininiā imi apoka
 ninoamoni. ⁷ “Katakareri ākiri napani.
 Maōkari. Aōkiniāri, itakare imakinika
 kaikotināua ate,” itxakakana kikiakori.

⁸—Ininiā ninoa maīkari katakareri
 ākiri, oka itxapirina, kikio xiripire oka
 itxarina iīto.

⁹—Ininiā kiripa ikama katakareri? —
 itxa Xesosi.

—Iua kanapiriã. Okanako ninoa kikiakori. Ipaniãtana apanakini itakare imakinetinina ikapani —itxa Xesosi.

¹⁰Hïte atatsopatapekari ia Teoso sãkire iøkatsopatakori:

Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maïkakari itxaua.

¹¹Teosokara txïkitakari ikara atoko inini. Ikara peerekari atemoni, itxa Teoso sãkire iøkatsopatakori.

¹²Xoteo auïteakori imarotarina Xesosi sãkire. Ninoa imarotari ikamakitina takari makinetakani kamakiti atokokana, ininiã ninoa omanãkarauata Xesosi sãpiretakiti xika. Ninoa kinirão maïkaka itxarina Xesosi, txamari !imaïkarina iua, kotxi ipïkarina kãkiti. Ininiã itakanaparina Xesosi, sipe itxana.

Homano Auïte Ìkitxitiko

(Mateo 22.15-22; Arókasi 20.19-26)

¹³Eereka Xoteo auïteakori iokanatanana ãtikaka Erotxi sãkire auiãkani, ãtikaka pariseoakori pakini Xesosimoni. Inirekarina Xesosi kerokiniri isãkire, kotxi ninoa nirekari Xesosi kaminiri maerekati imaïkinirina ikapani.

¹⁴Ninoa apokasaaki, imisãkiretarina Xesosi:

—Koerekareri, ate imarotari pite sãkire atãonani ininiãua. Poerekari atãonani Teoso nireëkiti kãkiti kamini ikapani. !Pipïkari kãkiti. Kãkiti poiãori pimisãkiretini atokokana kãkiti apiari pimisãkireta apaka. Ikara atoko ininiã, pisãpiretaua. Atãokani txineiro asikini Homanoakori auïtemoni, Sesa inakorimoni? ¹⁵Atãokani asikiniri iuamoni? Apakata amasikakaniri iuamoni? —itxana.

Xesosi imarotari isãkirena. Imarotari ninoa pimarauatini isãkire ikerokini ìka-

pani. !Inirekarina atão inakari imarotina. Ininiã Xesosi txana ninoa:

—Kinirepa hãtamakaerekatano nota? Himinaro txineirota. Ninirekari natamatiniro —itxa.

¹⁶Ininiã iminarona.

—Kisanõkapa ia? Kiuãkapa aua uai? —itxana.

Ininiã ninoa:

—Sesa sanõka, iuãka pakini —itxana.

¹⁷Ininiã Xesosi:

—Ikara atoko ininiã, hïskariko Sesa- moni iua nakiti. Hïskariko Teosomoni iua nakiti —itxana.

Ininiã kasãkirena ninoa, kotxi peerekari Xesosi apakapapiretakiti.

Ipïkari Õkitikiniua Mauikakoni

(Mateo 22.23-33; Arókasi 20.27-40)

¹⁸Kikiakori satoseo inakoni, !auikari kãkiti ipïkaripeka iuaïkana õkitikiniua iuaïkana auãki inini ikapani. Ninoa satoseo apoka Xesosimoni.

¹⁹—Koerekareri, Moisesini iøkatsopataria ipaniãtakiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipïpekarini uãka,” itxa Moisesi. ²⁰Setxi itaritxiakori aua ìkorapokoriti. Apia kiomanetakari takaro sito. Txamari ipïkasaaki meenetopanika itikinitaro.

²¹Ininiã ãti itari takaro oakana. Ipïkasaaki !keenepanikaro oa. Iua atokokana itxape ãti itari. ²²Ininiã imakinikana ninoa takapiimaro oa. Ikinikana ninoa meenenipanika ipïpena. Eereka oanipekana apaka opïpe. ²³Ipïkani õkitikasaakiua, kiriïtanoropa otxatauako? Kotxi ikinikana setxi takapekaro oa —itxana.

²⁴Ininiã Xesosi:

—Hïte kerokari, kotxi !himarotari Teoso sãkire iøkatsopatakori. Teoso posotiire apaka !himarota. ²⁵Ipïkani iuaïkana õkitikasaakiua,

Teoso nitiriakori iaxitikini atoko itxapekauana. !Ītanorouataikako.

²⁶ Hīte !auikari ipīkani ōkitikiniua. Hīte atatsopatapekari Moisesi iōkatsopatakiti aanaia tirinakari pirena. Iuasaaki Teoso misākiretari Moisesi: “Apraō, Isaki, Xakoo pakini Teosonekarano nota,” itxari Moisesimoni. ²⁷ Ikara atoko ininiā Apraō, Isaki, Xakoo pakini ōkitikapekaua iuaikana, kotxi auāki inakani Teosonera iua. Kona ipīkani Teosoneni itxaua Teoso. Amananini hīkerokari —itxa Xesosi satoseoakorimoni.

Teoso Paniātakiti Apiari Akamini

(Mateo 22.34-40)

²⁸ Iuaātaā aua kaiōkatsopareri. Ikenakotana ninoa misākiretakakiniua. Ikenakotari Xesosi apakapapiretakiti erekari ene. Ininiā iua pimaāri Xesosi:

—Īkiripa Teoso paniātakiti apiari tx-ataua? Kipa apiaerekata Teoso nireēkiti akamini?

²⁹ Xesosi apakapapiretari:

—Teoso paniātakiti apiari ia: “Isaao tōpa auakani, hīkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri pīTeosone, ikinipoko pinireēkitiā, ikini pākixinireē, ikinipoko pixinikakitiā, ikini pitaparaxinireē pakini.” ³¹ Ātipekana Teoso paniātakiti apiari ia: “Piteka pitiretiniāua atokotxikana, pitiretariko āti.” Iuananira Teoso paniātakiti ipi apiari txaua —itxa Xesosi.

³² Ininiā iua kaiōkatsopareri apakapapiretari Xesosi:

—Inipitikara pisākire, koerekareri. !Auari āti Teoso. Iuanokara auari. ³³ Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini āitoka atiretini atokokana. Ikara Teoso paniātakiti ipi apiari txaua.

Teoso paniātakiti pirātxi aōkini iua ikapani poiāori —itxa Xesosimoni.

³⁴ Xesosi kenakotakasaakiri isākire ereka inini, itxari iua:

—Pite auītearitari Teoso.

Iposo atoko apanakini !kataparaxinireika apikomoni ipimainirina.

Teoso Mereēkiti Tavii Apika Mekaniri

(Mateo 22.41-46; Arókasi 20.41-44)

³⁵ Xesosi Teoso misākiretiko aikoti oerekaruanātakasaaki, ipimaāri:

—Kinirepa kaiōkatsoparerini sākire: “Tavii apika mekanirako Teoso mereēkiti txauako?” itxana. ³⁶ Erekari Mata-matakoti kamasāpirenatakari Tavii:

Apiananiri misākiretari niauīte:

“Nota kikomoni piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiua,”

Apiananiri txari niauīte,

itxa Taviini. ³⁷ Tavii akiritari iua Teoso mereēkiti “Niauīte.” Ikara atoko ininiā, natokopa itxa iua Tavii apika mekani ininiua? —itxa Xesosi.

Iuasaaki ikinimane kākiti iuaā apiti-itakaniua potxitari Xesosi sākire.

Kaiōkatsoparerini Maerekani Pirena

(Mateo 23.1-36; Arókasi 20.45-47)

³⁸ Xesosi oerekaruanātakasaaki, ōtākikana kākiti:

—Kaiōkatsoparerini moianari !hītxapeua. Ninoa potxitari mākatxi ereri ieretakinina kākiti apisatoō inapinina ikapani, kākiti atamatinina ikapani. Ninoa apokaerekatari imisākiretikona ipaxitikona nipokori sikikoātaā inapaāpotakasaakina. ³⁹ Ninoa potxitari kākiti topākini apiaerekatakari nopini iitopākinina aiko Xoteo apotiitiniātaāua. Kiiniriā ninoa potxitari kakiiniriteri topākinimoni iitopākinina. ⁴⁰ Ninoa mixirikari tikinitakoni aapoko, iuaritika okanani

imisäkiretarina Teoso käkiti apisatoõ, ininiã käkiti uãkatari ninoa erekarini atoko ininiãuana. Teoso iteene misiritanako käkiti ikara atoko inakani.

Tikinitakoro Matxineiro teto Sikakito

(Arókasi 21.1-4)

⁴¹ Xesosi topãka txineiro Teoso ikapani apakapikoãtaã. Xesosi itikari käkiti ieretakiniro txineiro kaixa äki. Itori katxineiroterini okaro txineiro mirikinito kaixa äki. ⁴² Eereka tikinitakoro matxineiro teto apoka iuaã. Otakaro ipi txineiro otaki kaixa äki. Poiãonoka txineiro. ⁴³ Ininiã Xesosi akiritana imoianariakori.

—Inipitikara nisãpiretai hïte. Õkora tikinitakoro matxineiro teto sikakito apiata. Apanakini sikakito poiãoka. ⁴⁴ Kotxi ninoa sikaro txineiro itetakoro. Oa matxineiro teto sikari okinika onakito —itxa Xesosi.

Teoso Misäkiretiko Aikoti Irikiko

(Mateo 24.1-2; Arókasi 21.5-6)

13 Teoso misäkiretiko aikoti Xesosi pokikasaaki, imoianari misäkiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misäkiretiko peerekari.

² Ininiã Xesosi:

—Hãtamatarì ia aiko mitari. Æti õti imakinika irikaãkako. Kona kai kaiko-taikako Æti kai nopini —itxa Xesosi.

Misirikaretxi Apokaenetini

(Mateo 24.3-14; Arókasi 21.7-19)

³ Xesosi topãka oxiratarì nopini Teoso misäkiretiko aikoti apisatoõ. Iuaã aua oriva minanape. Iuasaaki Petro, Txiaiko, Xoão, Ætree pakini apoka iuamoni. Ni-noanoka aua iuaã. ⁴ Ipimaãrina Xesosi:

—Kirisaaakipa aiko Teoso misäkiretiko irikaãka? Natokopa itxa aimarotiniiri ikara õti apisapanika?

⁵ Ininiã Xesosi:

—Erepaniko. !Hãuiritapiri apanakini misirienetini hïte. ⁶ Itopaniriko käkiti, “Xesosikarano,” inakanipaniko. Ninoa misirienetari kaiãopokori käkiti. ⁷ Neenamtxi hïkenakoenetakasaaki, neenamtxi ene hïkenakoenetakasaaki, !hïpikarauatape. Ikara auapitikako, iuaritika kona xipokatxi õtipanikani. ⁸ Æti uãka neenamauata Æti uãkakata. Æti tixini auakani neenamauatoko Æti tixini auakanikata. Ætikaka itixi iakeëkatakoko. Kaiãopokopaniri natxi. Amarini auini tsi atoko itxapaniko.

⁹ —Erepaniko hïte. Himaikaãkako, auïtetximoni hïsiãkako. Hinoropataãkako aãpitsaã aiko äki Xoteo apotiitiiniãtaãua. Nota sãkire hãuikini xika hïte anikaãkako poiãori auïtetximoni. Apiari auïtetximoni apaka hanikaãkako. Iuasaaki hïte sãpiretanako ninoa Teoso iokanapirena erekari.

¹⁰ Itixi xipokini apisapanika Teoso iokanapirena erekari sãpiretaãkako ikinimanemoni ikini itixitikinimoni.

¹¹ Käkiti maikasaakii hïte, anikasaakii hïte auïtetxiakorimoni, !hïxinikapiri hïsiãkire tïkane hïsiãkirauatini apisapanika. Hïsiãkirauatakasaaki, iuasaakipeka himarotari hïsiãkire. Erekarì Matamatakoti txikitakai iuasaaki hïsiãkire himarotini.

¹² Käkiti sikanapariko atão itariakori auïtetximoni okiko tïkane. Iriakoritxi sikanapanako imiakori auïtetximoni okiko tïkane. Eenetxiakori omanatana iriakori, inoroakoro pakini. Eenetxiakori xika ninoa okapeëka. ¹³ Nota sãkire hãuikini xika, ikinimane omanatai hïte, iuaritika himatakanapakaniãri nisãkire hãuikini, hanikaãkako Teoso tixinemoni —itxa Xesosi imoianariakorimoni.

Iteene Maerekanitxi Apokini

(Mateo 24.15-28; Arókasi 21.20-24)

¹⁴ Iuaikana Xesosi sãpiretana:

—Hītikariko Maerekati Apiatakari Teoso misākiretiko aikoti āki. Kitxakapirīka Teoso sākire sāpiretakari Tanieo inakori sāpiretapekari ikara pirena. (Ininiā hīte ia atatsopanātakanii, hīkenakotariko Xesosi otākikiniua.) Maerekati Apiatakari Teoso misākiretiko aikoti āki hītikasaaki, hīte Xotéia tōpa auakanii, himitekapoka mitaxiratarimoni. ¹⁵Iuasaaki hīte haāpoko nopini auakanii, katima hītxako hīkatxakini. Haāpoko !hīiroāpe hītii himaktxakini ikapani. ¹⁶Hīte kīkio auakanii, !hīkanapiripe haāpokomoni himāka hāpini ikapani. ¹⁷Ikarasaaki !erekapaniri sito kamixiromoni, sito kaxitakakareromoni. ¹⁸Teoso hamanaā himitekini kamoīsaaki, kotxi himitekini mitaāsaaki !erekari. ¹⁹Iuasaaki atatsiiri auakatapitikako. Ia atatsiiri apiata atatsiitaākako. Kitxakapirīka itixi Teoso kamakasaaki kākiti atatsiirauata poiāoka. Ikara atatsiiri ōti apisa kākiti atatsiirauata poiāoka. Ikara atatsiiri ōti napa atoko !ikara atoko inakari atatsiiri !auaikako. ²⁰Teoso mapoiāotakaniiāri iua ōti kākiti atatsiirauatini ōti, !auaikamako kākiti. Ikinipekamako ipīpemanako. Teoso iotokakariko ikora atatsiiretxi, imereēkini mapinakani ikapani.

²¹—Apanakini sāpiretiniāi hīte: “Xesosi Teoso mereēkiti ia,” hinikosaaki, !hāuikapiri. “Xesosi Teoso mereēkiti ikiraātaā,” hinikosaaki, !hāuikapiri. ²²Kotxi Teoso mereēkiti minakanīua apokapitikako, “Xesosikarano nota,” inakari. Apaka apanakini apokapitikako, “Teoso sākire sāpiretakarikarano nota,” inakari. Paxirari ninoa sākire. Kākiti ikara atoko inakani kamariko posotiiretxi, kākiti itikiniri ikapani. Ninoa nirekamari Teoso mereēkini imisirienetinina. ²³Erepaniko. Ikara ōti apokini

apisapanika nōtākikai hīte —itxa Xesosi imoianariakorimoni.

Kākiti Itari Iaxitikiri Kanapiriini

(Mateo 24.29-31; Arókasi 21.25-28)

²⁴—Iua misirikaretxi napa atoko atokatxi iuakapeka. Kasiri liponikaika. ²⁵Iōriki iaxitikero irikako. Ikinipoko kaikori iaxiti auakari ioīketaākako. ²⁶Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷Iuasaaki iokanatana initiriakori iaxitikini itinixitimoni, ipinimoni itinixitimoni, atokatxi pokīkinimoni, atokatxi ereēkokinimoni. Iokanatana initiriakori ikini itixitimoni kākiti imereēkini apitiitinina ikapani —itxa Xesosi imoianariakorimoni.

Piko Mina Pirena

(Mateo 24.32-35; Arókasi 21.29-33)

²⁸Iuaīkana Xesosi sākirauata. —Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ikapani. Pooīoporipeka onakasaaki, otomorekasaaki, “Kamoī apokanapanoka,” hītxa. ²⁹Iua atokokana ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁰Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³¹Iaxiti xipokapitikako. İkoraxiti apaka xipokapitikako. Iuaritika nota sākire !ixipoka —itxa Xesosi imoianariakorimoni.

Kākiti !Imarotari Xesosi Apokini Manapi

(Mateo 24.36-44)

³²Iuaīkana Xesosi sākirauata: —Kākiti !imarotari ikara ōti manapi apokini. Teoso nitiriakori iaxitikini

apaka !imarotari ikara ôti. Nota Teoso âkirikanera !imarotari ikara ôti. Nirinanira, Teosonanira, imarotari.³³ Hiâtapapikariko. Hîkoatapikako. Teoso himisâkiretapikako. Kotxi !himarotari ikara ôti apokini.

³⁴—Nikanapiriâkasaaki, kiki ôtake sikari kanapiriini atoko nitxa. Iua kiki potorikasaaki, ipaniâtana iniritiakori aapoko inîkatinina. Ikininape isikanapana parîkatxi ikaminina. Ipaniâtari iniriti aapoko toreâtaâ kaikotakari, “Araôkire pitxako,” itxari.³⁵ Nota hîtari iaxitikiri iua kiki ôtake sikari atoko nitxako. Âtipirika hiâtapapikanoko, kotxi !himarotari nota apokini ôti. !Himarotari mapiâtikikauako napoka. !Himarotari apanîkanôkauako napoka. Imapirîkatauako napoka. Îkanôkapanikauako napoka !himarotapaniri.³⁶ Atxiîti patimari napokini, ininiâ hîkoatapikako, mimakatika hinini îkapani nota apokasaaki.³⁷ Ininiâ âtipirika hiâtapapikanoko. Ikininapemoni apaka ikara nitxa —itxa Xesosi imoianariakorimoni.

Xesosi Okaenetiko Pirena

(Mateo 26.1-5; Arôkasi 22.1-2; Xoão 11.45-53)

14 Iuasaaki kâkiti apotiitaua ipi kiniriti auakasaaki. Pâskoâ kiiniriti, pâo miâtiâkati nikiko kiiniriti pakini aua. Ipi ôti kiiniri potorikini apisapanika sasetotxi auîteakori, kaiôkatsoparerini pakini xinikaxitita:

—Natokopa atxatariko Xesosi amaîkini aôkini îkapani? ²!Amaîkapaniri kiinirisaaki, kotxi amaîkiniâri, kâkiti naiatamaua eereka —itxanâtana.

Sito Kamariâro Mîkaro

(Mateo 26.6-13; Xoão 12.1-8)

³Xesosi auanâta Petânia aapokotxiti Simão inakori aapoko. Iua Simão

akiritaâka “Maere Matati.” Simão aapoko Xesosi nipokonâtakasaaki, sito apoka. Oa minari kopitipaki kai kamakori, kai arapâstiro inakoro. Kopitipaki âki aua kamariâro, nato inakoro. Pakaronepokoro. Oâpokasaaki Xesosimoni, opakauanakari kopitipaki. Okitakoro kamariâro Xesosi kiiâ.⁴ Iuasaakipeka apanakini iuaâ auakani omanâkarauata.

—Kinirepa oioanataâka kamariâro?⁵ Ovêxitamaroko, ininiâ kaiôpokomaniko txineiro oâpakapamako. Tresêtosi txineiro ota prata kamakori oâpakamako. Txineiro mauakinitimoni osikiniâ erekamariko —itxana.

Iteene ikapatitana.⁶ Ininiâ Xesosi:

—Ikara atoko !hîtxapero. !Homanatapero. Erekari okaminano.⁷ Kâkiti matxineiroteni auapikako hîtekata. Hinirekasaakiriko hîsikaro txineiro ninoamoni. Nota !auari âtipirika hîtekata.⁸ Oia sito kamari ikinipoko oimarotakiti nota îkapani. Nipinini apisapanika oina notamoni. Omaritari niîto, niîto iposope inini nikatiko îkapani.⁹ Atâo nisâpiretai hîte. Teoso iokanapirena erekari sâpiretikoâtaâ ikini itixiti, osâpiretaâkako apaka oia sito kitakiniro kamariâro nikiiâ, ininiâ kâkiti ikini itixiti auakani xinikapikaro oa —itxa Xesosi.

Xotasi Mîkapiritiniri Xesosi

(Mateo 26.14-16; Arôkasi 22.7-16, 21-23; Xoão 13.21-30)

¹⁰Tosi pakini Xesosi moianariakori. Imoianari Xotasi inakori sari sasetotxi auîteakorimoni. Imisâkiretana ninoa Xesosi imîkapiritini îkapani, ninoamoni isikiniri îkapani.¹¹ Ikenakotakasaakirina Xotasi sâkire, ipoxokoniuatana. Isikaenatarona txineiro iuamoni. Eereka Xotasi iâtapari Xesosi imîkapiritini ôti.

Páskoia Kiiniriti Kamiko

(Mateo 26.17-25; Arókasi 22.7-13)

¹² Páskoia kiiniriti potorikini õti, soti auíte anaakori okiko õti, Xesosi moianariakori misäkiretari iua:

—Namonipa pinirekatari Páskoia kiiniriti akamini?

¹³ Ininiã Xesosi iokanatana imoianariakori ipi.

—Hisa sitatximoni. Iuaã kiki āparaã kopitiã anikakari hāpiākata. Iua kikikata hīsa. ¹⁴ Iua sinimoni kaapokori himisäkireta. Hītchariko iua: “Korekereri nirekari imarotiniri, namonipa erekari imoianariakorikata inipokotini Páskoia kiiniriti ikamakasaakina?” hītchariko. ¹⁵ Ininiã iua oerekaiko hīte itanokiri koa mitapoari. Auapeka kākiti topākini. Imakinika oeretapeēkaika —itxana.

¹⁶ Ininiã imoianariakori sari. Sitatxi apokasaakina Xesosi sākire iaōka aua. Ininiã ninoa kamari nipokori Páskoia kiiniriti ikapani.

¹⁷ İkanōkapeka inakasaaki Xesosi apoka tosi imoianariakorikata.

¹⁸ Inipokonātakasaakina, Xesosi txana:

—Atāo nisāpiretai. Āti hīte notakata nipokotakari mīkapiritanoko nota —itxa.

¹⁹ Ininiākara Xesosi moianariakori matinaniuata. Ipimaärina Xesosi:

—Notakani atxiiti?

Ātipekana:

—Notakani atxiiti?

Ininiã imakinikana ikara atoko itxana.

²⁰ Ininiã Xesosi:

—Ātika hīte notakata auakari mīkapiritano. Notakata komiri iopitiātakarikaroko sikano nimokaiakariakorimoni. ²¹ Nota hītari iaxitikiri okaākako. Teoso sākire iōkatsopatakori sāpiretapekari nipinini tīkane. Nota hītari iaxitikiri mīkapiritakari

iteene misiritaākako. Erekarariko maponaniākatika inaākamako.

Xesosi İto, Iarēka Pakini

(Mateo 26.26-30; Arókasi 22.14-23; 1 Korīto 11.23-25)

²² Xesosi imoianariakorikata nipokonātakasaaki, Xesosi kosekari komiri. Imisäkiretari Teoso:

—Erekapitikari ia komiri pisikakiti atemoni —itxari.

Imapopeēri komiri, xanaka itxari imoianariakorimoni.

—Apakapa, nika hītchariko. Ia niito —itxana.

²³ Iposo atoko koseka itxaro iākoanatxi. Imisäkiretari Teoso:

—Erekapitikari ia iārīã pisikakiti atemoni.

Ininiã iākoanatxi isikana imoianariakori. İkinikana iātarina iārīã. ²⁴ Ininiã Xesosi:

—Ia niarēka xiketakari makatxakariko kaiāopokori kākiti maerekani. Teoso sāpiretapekari kākiti ikamaenetakiti amaneri kākiti ikapani. Ia niarēka oerekari kākiti, Teoso kamapekari ikamaenetakiti. ²⁵ Atāo nisāpiretai. İniātaikaroko ovapeē, Teoso auitetxi ininiātaāua nimapokakanisaaki. Iuaã napokasaaki niātari. Amaneri iārīãti niātako —itxa Xesosi.

²⁶ Eereka ninoa xikarauata Teoso ikapani. Iua atoko isana oriva mina auiniãtaã, oxiratari nopini.

Xesosi Sāpiretari Petro Kipatiniri Iua

(Mateo 26.31-35; Arókasi 22.31-34; Xoão 13.36-38)

²⁷ Xesosi misäkiretana imoianariakori: —Ia İkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auíte piratakari, ininiã İkinika ipiraakori iarikitatoko,

itxa Teoso sākire iōkatsopatakori.
²⁸ Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

²⁹ Ininiā Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

³⁰ Ininiā Xesosi:

—Atāo nisāpiretai. Ia ikanōkati patari ipikata sākirauatini apisapanikako, ipi āti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimirarotakanii pite.

Ikininape Xesosi moianariakori Petro sākire iaōka ikamana.

Xesosi Misākiretiniri Teoso Xetsémani Inakoriātaā

(Mateo 26.36-46; Arókasi 22.39-46)

³² Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hiūtopāka. Teoso nimisākiretako —itxa.

³³ Anikari Petro, Txiako, Xoāo pakini iuakata apikomoni. Iuaā Xesosi iteene matinaniuata. Maerekaxiniretinoka itxa.

³⁴ Ininiā iua:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana.

³⁵ Apikomoni isa. Ipamaka xitimoni, misākireta itxari Teoso. ³⁶ Itxari iri:

—Papai, pite posotari ikinipoko pikamini. !Pauiritapeno paītiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriā Petro, Txiako, Xoāo pakinimoni, txamari ninoa imakanāta. Xesosi akiritari Petro:

—Simāo, himakanāta? Kona hīposotatari āti oaranoka hīkoatini?

³⁸ Erepaniko. Hinirekasaakiri maerekati hīkamini, !hīkamapiri. Araōkire hītxako. Himisākiretariko Teoso, ininiā !hīkamari maerekati. Kākiti xinare atxiīti !nirekari maerekati ikamini. Txamari kākiti ito tapara poiāoka, ininiā ikamari maerekati. Ininiā erepaniko —itxana ninoa.

³⁹ Iuaīkana isa Teoso imisākiretini ikapani. Teoso imisākireta, mitxi isākire atokokana itxa. ⁴⁰ Iposo atoko ikanapiriā. Txamari iuaīkana ninoa imakanātapanika. !Iposotarina ikoatinina. Ipētauatana, ininiā !kasākirena.

⁴¹ Iuaīkana ikanapiriā Petro, Txiako, Xoāo pakinimoni.

—Himakanātapanika? Hītomanā-tapanika? Iaōpe. Hātapana. Hītari iaxitikiri uatxa sikaākako maerekati kamakanimoni. ⁴² Hōkitikaua.

Masa. Hātapana. Apokaāpota kiki nimīkapiritakiri —itxana.

Xesosi Maīkiko Pirena

(Mateo 26.47-56; Arókasi 22.47-53; Xoāo 18.1-11)

⁴³ Xesosi sākirauanātakasaaki, Xotasi apoka. Iua Xotasi Xesosi moianarikamara. Iminana ito kiki, saasara mīkani, piriri mīkani. Sasetotxi auīteakori, kaiōkatsoparerini, kiomātxiakori pakini iokanataro Xotasi kikiakorikata Xesosi imaīkinina ikapani. ⁴⁴ Xotasi mitxipeka sāpiretari kikiakori:

—Nota apitxokakiti Xesosipitikarako iua. Iuasaaki himaīkapekariko. Erepaniko hanikasaakiri, imamitekakani ikapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶Inakasaakipeka kikiakori maïka, anika itxarina Xesosi. ⁴⁷Kiki iuasaaki iuaã auakari kosekaro saasara. Iua sauaãkatari sasetotxi auïte apiatakari nitiri. Itsotakakïpitari. ⁴⁸Iuasaakipeka Xesosi:

—Hïte ina himaïkinino ïkapani, saasarakata, piririkata. Kiïtiriri atoko hïtxapeno nota himaïkinino. ⁴⁹Ikiniõtika nota auanãtari hïtekata Teoso misãkiretiko aikoti äki, noerekarauatakasaaki. Iuaã hïte ïmaïkano nota, kotxi Teoso säkire ïökatsopatapeëkaika hïte maïkinino kiïtiriri himaïkini atoko —itxana ninoa.

⁵⁰Iuasaakipeka ikinika Xesosi moianariakori miteka, asika itxarina iua. ⁵¹Iuasaaki ätokori sari Xesosi tikini. Iua mäka ätinoka aua iïtoã pirikakari. Kikiakori maïkamari iua. ⁵²Imãkanoka kaikota iuakoãna. Kasarapeka imiteka iua ätokori.

Xesosi Xoteo Auïteakori Apisatoõ

(Mateo 26.57-68; Arókasi 22.54a, 63-71; Xoão 18.12-14, 19-24)

⁵³Ninoa anikari Xesosi sasetotxi auïte apiatakari aapokomoni. Iuaã ikinika sasetotxi auïteakori, kiomãtxiakori, kaiökatsoparerini pakini apotiitaua. ⁵⁴Petro ikira atoko isaãpota Xesosi anikakani tikini. ïroã sasetotxi auïte aapoko piriketakorïä. Iuaã iitopãka sasetotxi auïte apiatakari nitiriakorikata. Iroka xamina tinipoki.

⁵⁵Aapokotxi äki sasetotxi auïteakori, ikinika Xoteo auïteakori pakini pimaãna kãkiti:

—Kipa imarotatari maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. ⁵⁶Kaiãopokori kãkiti

sãpiretari maerekati Xesosi kamakiti, txamari paxirari ninoa säkire, kotxi äti säpiretakiti ipinimoni, äti säpiretakiti ipinimoni, itxaãpotana.

⁵⁷Apanakini kiki ökitikaua, säpireta itxarina ia aãpirena Xesosi ikamapiretinina. ⁵⁸Ninoa:

—Ate kenakotari isãpiretiniri: “Nirikariko ia aiko Teoso misãkiretiko aikoti kãkiti kamakiti. Ipi äti pakini öti inakasaaki nikamariko äti aiko kãkiti makamakiniti,” itxa isãkire.

⁵⁹Txamari ikara säkiretxi äti säpiretakiti ipinimoni, äti säpiretakiti ipinimoni, itxaãpota.

⁶⁰Iposo atoko sasetotxi auïte apiatakari tima ikinimane apisatoõ. Iua pimaãri Xesosi:

—Kininiäpa na papakapapiretari ninoa säkire? Kixikapa ninoa ikara atoko txanãtai? —itxari.

⁶¹Txamari !kasãkireri Xesosi. !Apakapapiretari. Ininiã sasetotxi auïte apiatakari iuaïkana pimaãri:

—Pitekani Teoso mereëkiti txataua? Pitekani Teoso äkiri txataua? —itxari.

⁶²Ininiã Xesosi:

—Ari, iua äkiripitikanano. Hätamatariko kãkiti itari iaxitikiri topãkini Kaposotiireri kikomoni. Hätapariko kãkiti itari iaxitikiri uai apokaãpotini katxiãri äki —itxa.

⁶³Iuasaakipeka sasetotxi auïte apiatakari matsorãkari imãka, kotxi iuãkatari Xesosi säkire maerekati ininiua.

—!Anirekaikari Xesosi kamakiti säpiretakani. Atokopeka. ⁶⁴Kotxi hïte kenakotapekari isãkire maerekati, “Teoso äkirirano” inini. Natokopa atxtari iua? —itxana.

Ininiã ninoa apakapapiretari:

—Okaãkapitikako —itxarina.

⁶⁵Apanakini kiisokari Xesosi. Mãkatxi mataã iapirikarina ikiiã oki manapi

imatamatakani ikapani. Iposo atoko iāsokarina.

—Pisāpiretaua, kipa āsokai? —itxarina.

Sasetotxi auīte nitiriakori apaka āsokari iua iuakoāna.

Petro Kipatari Xesosi Imarotini

(*Mateo 26.69-75; Arókasi 22.54b-62; Xoão 18.15-18, 25-27*)

⁶⁶ Iuasaaki Petro ixiti aua aapokotxi piriketakori āki. Sasetotxi auīte apiatakari nitero ātokoro apoka iuaā.

⁶⁷ Oātamatari Petro irokanātini xamina tinipoki. Oa mixinitari iua. Ininiā oa:

—Xesosi Nasareekiri moianarikai pite apaka —otxa.

⁶⁸ Ininiā:

—Kona, nota !imarotari pisākire — itxaro.

Iuasaaki pirikere ironakikoātaā isari. Iuasaakipeka patari sākirauata. ⁶⁹ Oa sasetotxi auīte nitero atamatari iua iuaā.

—Ere kiki iua moianaripitikara — otxana ninoa Petro takote auakani.

⁷⁰ —Kona iuano nota —itxa.

Paītiki ninoa iuaā auakani:

—Iua moianaripitikarai. Pite Kariréi-akirikarai. Pisākireēra ate imarotai — itxarina.

⁷¹ Ininiā Petro:

—Nota !imarotari kiki ikara atoko hinanātakiti. Atāoene nimasāpiretakaniā, Teoso misiritamanoko. Teoso imarotari nota sākire atāoka nisāpiretinii —itxana.

⁷² Ikara atoko Petro inakasaaki, iuaikana patari sākirauata. Ininiā Petro xinikari Xesosi sāpiretakiti iuamoni. “Ipikata patari sākirauatini apisapanikako, ipi āti pakinikata, ‘!Nimarotari iua,’ pitxanoko.” Ikara inakari ixinikasaaki, itxiapata.

Xesosi Pirato Apisatoō

(*Mateo 27.1-2, 11-14; Arókasi 23.1-5; Xoão 18.28-38a*)

15 Katimatinikata sasetotxi auīteakori, kiomātxiakori, kaiōkatsoparerini, ikinimane Xoteo auīteakorikata xinikaxitināta. Ipaniatarina Xesosi iaxirikiko. Iposo atoko anika, sika itxarina Piratomoni.

² Pirato pimaāri Xesosi:

—Pitekani Xoteoakori auīte txataua? —itxari.

Ininiā Xesosi:

—Ari, pisākire atāopitikara.

³ Sasetotxi auīteakori apoiāpotari Xesosi, txamari Xesosi !kasākireri. ⁴ Ininiā Pirato:

—Na papakapapiretatari? Ninoa iteene misākirepiretai —itxari.

⁵ Iuaritika Xesosi !apakapapiretari. Ininiā Pirato ākixinireē:

—Kinirepa kona apakapapiretari? — itxa.

Xesosi Okiko Nirekiko

(*Mateo 27.15-26; Arókasi 23.13-25; Xoão 18.38b-19.16*)

⁶ Páskoa kiiniriti auakasaaki, Pirato itotari isikakiniri kateia āki auakari kākiti nireēkiti. ⁷ Iuasaaki Xesosi maīkikosaaki, Pahapasi inakori aua kateia āki. Iua Pahapasi apanakini kateia āki auakanikata okaniuatapeka Homanoakori inaiatakasaakina. ⁸ Pirato sākirauatakasaaiki Xesosikata, kākitypokoni apoka Piratomoni.

—Kateia āki auakari pisikaka — itxarina.

⁹ Ininiā Pirato pimaāna:

—Hinirekatari nisikakiniri Xoteo auīte hīte ikapani? —itxana.

¹⁰ Pirato iteene imarotari sasetotxi auīteakori sikari Xesosi iuamoni Xesosi ixikotinina xika. ¹¹ Sasetotxi auīteakori maasakana ninoa iuaā apotiitakaniaua:

—Hamanaāri Pirato Pahapasi isikakini ikapani —itxana kākitimoni.

¹² Pirato iuaikana pimaāna:

—Natokopa nitxatari ia kiki Xoteo auīte inakori? —itxa.

¹³ Akiripoakatana:

—Aamina ipiriāmitakari nopini hītokakitari —itxana.

¹⁴ Ininiā Pirato:

—Kixikapa? Maerekati likama —itxa.

Apiata akiripoakatana:

—Aamina ipiriāmitakari nopini hītokakitari —itxakatana.

¹⁵ Ininiā Pirato sikakari Pahapasi ninoa ikapani, kotxi inirekari ikamapoxokonitininina ninoa kākiti. Eereka ipaniātari Xesosi xirokitatiko aāpitsaā. Eereka Pirato paniātari sotatoakori tokakitiniri Xesosi aamina ipiriāmitakari nopini.

Sotatoakori Napetiniri Xesosi

(*Mateo 27.27-31; Arókasi 22.63-65; Xoāo 19.1-3*)

¹⁶ Ininiā sotatoakori anikari Xesosi Pirato aapoko āki. Akiritarina ikinika sotato. ¹⁷ Iposo atoko ieretakarina mākatxi pōkamarari Xesosi itoā. Ikamarina saporīeta kotipiaro kamakori, taka itxarina Xesosi kiiā.

¹⁸ —Aāuīte —itxarina Xesosi inapetinina.

—Xoteo auītekai pite —itxarina.

¹⁹ Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

²⁰ Inapetakarina atoko imakatzakarina mākatxi pōkamarari. Xesosi māka iuaikana ieretaka. Eereka anikarina Xesosi aamina ipiriāmitakari nopini itokakitinirina ikapani.

Xesosi Tokakitaāka Aamina Īpiriāmitakari Nopini

(*Mateo 27.32-44; Arókasi 23.26-43; Xoāo 19.17-27*)

²¹ Ipixinipokoriti itaōkitarina kiki Simāo inakori. Sireni sitatxitikiri iua. Iua anaakori Arexātri, Hopo pakini. Iuasaaki Simāo apoka Xerosareē. Sotatoakori paniātari iua:

—Ia aamina ipiriāmitakari panikinari —itxana.

²² Anikarina Xesosi ixirataā, Kóokota inakoriātaā. Xoteo sākire “Kóokota.” Apanakini akiritari iua oxiratari uāka “Kīitātatxi,” inaāka akiritiko. Iuaā apokana.

²³ Isikamarina iāriā pinītxikata, miha inakorokata, Xesosi iātini ikapani, itsii imimarotakani ikapani, txamari linirekaro iātiniro. ²⁴ Ininiā itokakitarina aamina ipiriāmitakari nopini. Eereka ikamarina sarauatxi, Xesosi māka apakapakani imarotininina ikapani. Ikara atoko apanakini anikari Xesosi māka. ²⁵ Īkanōkapanika novi oara itokakitapeēka Xesosi aamina ipiriāmitakari nopini. ²⁶ Aaminaā auari iōkatakītina, apoītiko pirena, “Xoteoakori Auīte” itxa. ²⁷ Ninoa tokakitana ipi kīitiririni apaka aamina ipiriāmitakari nopini, ikikomoni āti, isanaremoni āti. ²⁸ Kitxakapirīka Teoso sākire iōkatsopatakori txari:

Okapeēkako iua, kokaniri okiko atoko inapeēkako.

Ininiā Xesosi okikosaaki ia Teoso sākire iōkatsopatakori iaōka auapeka iuasaaki.

²⁹ Ninoa iuaā napakani misākirepiretapikari Xesosi:

—Kīikitei. Pite sākire: “Nirikariko Teoso misākiretiko aikoti. Ipi āti pakini ōti inakasaaki nikamari iuaikana,” pitxama. ³⁰ Ikara atoko piposotiniā, piteka pimakatxakauako, ininiā

pikatzaka aamina ĩpiriāmitakariā
—itxarina Xesosi inapetinina.

³¹ Sasetotxi auĩteakori,
kaiōkatsoparerini pakini napetari
Xesosi:

—Iua makananitapekari apanakini.
Txamari iuaka liposotari imakanani-
tiniua —itxakakana.

³² —Ikatzakiniārako ate auikari
Teoso mereēkiti ininiāua. Ikatzakiniā,
aāuikari Isaeo auakani auĩte ininiāua
—itxakakana.

Kiĩtiririni iuakata tokakitakoni apaka
misākirepiretari.

Xesosi Ipinini Pirena

(Mateo 27.45-56; Arókasi
23.44-49; Xoão 19.28-30)

³³ Iuasaaki apaniāxiti ipiāka. Ikini itix-
itika piāka. Ipi āti pakini oara ipiāka.
³⁴ Ipi āti pakini oara napa atoko Xesosi
akiripoakata:

—Erii, Erii, aremaa sapakatanii —itxa.

Ia atatsopatakari sākireē: “NiTeosone,
niTeosone, kinirepa pitakanapano?”
itxa.

³⁵ Kākiti iuaā auakani kenakotari
akirinātini.

—Hikenakota. Akirinātari Erási —
itxana.

³⁶ Iuasaakipeka kiki ina katimariā.
Iākari mapoa atoko inakari iariā katxioā-
rimoni, aāke mapotōkire taka itxari, sika
itxari Xesosi iātini ĩkapani.

—Mitxipanikako. Maiātapari.
Atauako Erási makatzakatapaniri
Xesosi —itxana.

³⁷ Xesosi itapararitika akiripoakata,
eereka ipĩpe itxa. ³⁸ Iuasaakipeka
mākatxi mata Teoso misākiretiko aikoti
āki arōkakari tsorakita. Itano itsorakita.
Ixitipeka apoka. Mitxi iua mākatxi
mata !auiritari kākiti ĩroini Teosonani
Auni Pakitaātaā. ³⁹ Sotatoakori auĩte
aua aamina ĩpiriāmitakari apisatoō.

Ikenakotari Xesosi akiritini. Itikari
ipinini.

—Atāopitikara Teoso ākiri itxaua ia
kiki —itxa.

⁴⁰ Ātokaka sitoakoro ikira atoko
atamanātarina Xesosi, Maria
Matarena, Saromeema, āto Mariama,
apanakini sitoakorokata. Xesosi,
Txiako pakini inoro oa Maria. Iua
Txiako maneripanika inakari. ⁴¹ Xesosi
Kariréia auakasaaki, ninoa sitoakoro
moianatari iua. Imiparĩkatarina. Xesosi
ipĩkasaakikanera apanakini sitoakoro
kaiāopokoro aua iuaātaā. Ninoa apoka
Xerosareē Xesosikata.

Xesosi Ikatiko Pirena

(Mateo 27.57-61; Arókasi
23.50-56; Xoão 19.38-42)

⁴² Ikara ōti, Xesosi ipinini ōti, kāk-
iti parĩkauatini ōti, kākiti tomatini
ōti apisapanika, iuasaaki kikatatikipeka.

⁴³ Iuasaaki Xosee inakori, Arimateia si-
tatxitikiri, sari Piratomoni. Iua Xosee Xo-
teo auĩte apanakinikata. Ikinimane pax-
itari iua. Iua apaka iātapari Teoso ikini-
mane auĩte ininiua ōti apokini. Itaparax-
iniriritika Piratomoni isa, amanaā itxari
Xesosi ĩto. ⁴⁴ Ininiā Pirato ākixinireē:

—Atauako patimari Xesosi ipinini? —
itxa.

Ininiā ipĩkapiretari sotatoakori auĩte.
Iua apokasaaki Pirato pimaāri:

—Atauako Xesosi ipĩpeka? —itxa.

⁴⁵ Ininiā iua:

—Ari, ipinapitipeka —itxari.

Ininiā Pirato:

—Panikaikari ĩto —itxari Xoseemoni.

⁴⁶ Iuasaaki Xosee amotari mākatxi
mata erekari, arńnio inakori. Eereka
imakatzakari Xesosi ĩto. Iapirikari ĩto
mākatxi mataā, anika itxari akauari
irikomoni. Kai kisakakori āki ieretakari
Xesosi ĩto. Eereka kai mitapoari ikatika,
tota itxari iriko. ⁴⁷ Ipi Maria itikanā-
tari Xesosi ĩto takikoātaā, Maria Matare-

nama, Maria, Xososi inakori inoroma pakini.

Xesosi Iuaīkana Auāki Inini

(Mateo 28.1-8; Arókasi 24.1-12; Xoão 20.1-10)

16 Tomatiko ōti xipoka atoko mapiānikata, ipi āto pakini sito amotaro kamariāro, Xesosi īto ikamamaritinina ikapani, Maria Matarenama, Saromeema, Maria Txiako inoroma pakini. ²Katimatinīkata, tomīkosaaki, īkanōkapanika, atokatxi pokīkasaaki, ninoa sari akaurimoni. ³Kimaporīā isikasaakina, isākirauaāpotana:

—Kipa makatxakinoua kai auīte iriko tore? —itxaāpotana.

Amaripokori iua kai. ⁴Iuaā apokasaakina, atamatarina. Kai makatxakapeēkaika. ⁵Ininiā īroāna iriko āki. Atamatarina ātokori topākanāta ikikomoni. Imāka ītanori, kasarori. Ininiā ninoa tikoka.

⁶Ininiā iua:

—!Hītikokape. Hīte nitanātari Xesosi Nasareekiri, aamina īpiriāmitakari nopini tokakitakori. Ōkitikapekaua iua. !Auaika uai. Hātamata. Mītxi itakarina iīto uai. ⁷Hīsipeka. Hīsāpiretari Petro, apanakini Xesosi moianariakori pakini: “Xesosi sapanikako hīte apisa Karirēiamoni. Iuaā hīte aōkitari iua, kotxi ipinaka apisapanika isāpiretapekari ikara hītemoni,” —itxana ninoa.

⁸Itimaritikana ninoa pokīka. Imitekana. Ikininanakana, ipikarena xika. !Isāpiretarina apanakini, kotxi ipīkarauatana.

Xesosi Oerekaua Maria Matarenamoni

(Mateo 28.9-10; Xoão 20.11-18)

⁹Xesosi ōkitikasaakiua ipinaka atoko īkanōkapanika semana potorikini ōti, tomīkosaaki, oerekaua

merepitipanika Maria Matarenamoni. Mītxipe Xesosi aōkitakasaakiro oa Maria, omitikari maerekani matamatakoni setxi pakini oa ītoā auakani. ¹⁰Xesosi ōkitikasaakiua, iua oaōkitaka atoko, osari merepanika Xesosi moianariakorimoni. Iuasaaki iteene imatinianuatana. Itxiapanātana. Osāpiretana ninoa:

¹¹—Xesosi iuaīkana auāki itxapeka. Nota aōkitari iua —otxana.

Txamari ninoa kona auikari osākire.

Xesosi Oerekaua Ipi Imoianariakorimoni

(Arókasi 24.13-35)

¹²Eereka iuaka oerekaua ipi imoianariakorimoni, kimaporīā isikasaakina aapokotxi mauakaniātaā. Iuasaaki itoō ipinipo itxa. ¹³Eereka ninoa kanapiriā. Isāpiretana apanakini imoianariakori, txamari !auikarina isākirena.

Xesosi Oerekaua Imoianariakorimoni

(Mateo 28.16-20; Arókasi 24.36-49; Xoão 20.19-23)

¹⁴Eereka Xesosi oerekaua ōsi imoianariakorimoni inipokotakasaakina. Xesosi ōtākikana:

—Kinirepa hīte !auikatari nota iuaīkana auāki ninini? Kinirepa !hāuikatari nota aōkitakani sākire? !Kaiokakarekii —itxa.

¹⁵Iposo atoko Xesosi txana:

—Ikini itixiti hīsako. Hīsāpiretariko Teoso iokanapirena erekari ikinimanemoni. ¹⁶Teoso sākire auīākari patxisatakori, iuarako sari Teoso tixinemoni. Teoso sākire mauikakati, Teoso misiritapikariko. ¹⁷Teoso sikaposotiiretanako isākire auīākani, ininiā apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uākaā. Isākirauatana imimarotakinitina

sākiretxitiā. ¹⁸Imaīkiniārina imini, !ipinana. Iātiniārina ikianari, !amianatana. !Ipinana. Itakauakotaua amianatakani nopini, ininiā amianatakani makananitaāka —itxa Xesosi sākire.

Xesosi Anikaāka Teoso Tixinemoni

(Arókasi 24.50-53; Átosi 1.6-11)

¹⁹Imoianariakori imisākiretanapaka atoko, Xesosi anikaāka Teoso

tixinemoni. Iuaā iua topāka Teoso kikomoni. ²⁰Xesosi moianariakori eereka isipekana, Teoso sākire ikini aapokotxiti auakani isāpiretinina ikapani. Apiananiri moianatana. Apiananiri sikaposotiiretana ninoa, ininiā apanakini imarotari ninoa sāpiretakiti atāo inini. Ameē.

ARÓKASI

Arókasi Iókatsopata Teópiro Inakorimoni

1 Nota Arókasi iókatsopata pite Teópiromoni. Iteene nipaxitai. Kákiti ito iókatsopatapekari ikinipoko Xesosi kamakiti Xoteoakori sauaki auakasaaki. ²Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isákire oerekakani, sápiretapekaua ate. ³Nota apaka apaiaókapekari ikinipoko Xesosi sákire, ikamakiti pakini. Ininiã nota apokaerekatari ikinipoko Xesosi pirena niókatsopatini pite Teópiromoni. Merepitipanika ikamakiti nisápiretai. Ininiã eereka ikamakiti nisápiretai. Ininiã eereka ikamakiti nisápiretai, nitxaãpotako. ⁴Koerekarerini oerekapekai Xesosi pirena, ininiã uatxa pimarotari ninoa oerekakiti atão inini.

Xoã Kapatxisareri Iponaniini Sápiretiko

⁵Erotxi inakori Xoteoakori auíte inakasaakia Xotéia tópa, iusaaki auanáta sasetotxi Sakaria inakori. Sakaria auíte, apanakini sasetotxiakori auíte apaka, Apia inakori. Sakaria tanoro ouãka Isapeo otxaua. Oíri, oátokiri, oátokiri iri imakinikana sasetotxi itxauana. Oátokiri kitxakapiríkari Moisesi itari Arão inakori. Iua apaka sasetotxi itxaua. ⁶Teoso nirekaákitinanira ikamana Sakaria, Isapeo pakini. Ninoa kamari ikinipoko iua paniátakiti, Apiananiri paniátakiti. Atão inakarinoka ikamana. !Ikerokarina ikamakitina. ⁷Txamari !keenena. Isapeo !oposotari kamixi onini. Iusaaki ikiomaneépekana.

⁸Áti óti Sakaria, apanakini sasetotxiakorikata, paríkauanáta Teoso misákiretiko aikoti áki. Iusaaki ninoatene iuaã paríkauata. ⁹Sasetotxiakori itotari sasetotxi imereinina Apiananiri misákiretiko aikoti íroini kamariáro arikini íkapani, ininiã iusaaki ninoa mereéeri Sakaria. Ininiã iua íroã. ¹⁰Sakaria aiko áki kamariáro arikanátakasaaki, mapara kákiti apotiitakaniua misákiretari Teoso.

¹¹Iusaakipeka Teoso nitiri iaxitikiri tokiã Sakariamoni kamariáro arikikoãtaã takote. ¹²Sakaria atamatakasaakiri, itikoákata, píkarauata itxa. ¹³Teoso nitiri misákiretari iua:

—Sakaria, kona pipíkarauatape. Teoso sikapitikaiko pamanaákiti. Ininiã pítanoro Isapeo keenepitikaroko. Pitakauákatari pamarite Xoã. ¹⁴Iua auakasaaki ikamapoxokonitaiko pite, itori kákiti apaka. ¹⁵Apiananirimoni apiari itxauako iua Xoã. Kona Xoã iátapaniroko kapoáro. Erekarí Matamatakoti auariko iua ákixinireë. Inoro irokota ákipanika auakasaaki, Erekarí Matamatakoti auako iua ákixinireë. ¹⁶Iua Xoã anikanako itomaneri kákiti Isaeo auakani Teosomoni. Apiananirimoni iua anikana. Ininiã iuaíkana ninoa kanapiriã íTeosonemonina, isákire auikinina íkapani. ¹⁷Xoã apokako Apiananiri apokini apisapanika. Erekarí Matamatakoti sikataparatarí Eríasi kitxakapiríka. Iuatxikana Erekarí Matamatakoti sikataparataríko Xoã. Ikara atoko ininiã, iua oerekaríko írítxi iuaíkana amaritena itiretinina íkapani. Iua Xoã oerekaríko kákiti Teoso paniátakiti makamakani, imaerekanina itakanapinina, erekarinoka ikaminina íkapani. Paimatirenako ninoa iusaakiko. Iua Xoã oerekaríko kákiti iposope ininina Apiananiri apokini apisapanika —itxa Teoso nitiri Sakariamoni.

¹⁸ Ininiã Sakaria pimaãri:

—Kiãtokopa nitxa uatxa keenepeka ninini, kotxi nota, nïtanoro apaka kiomaneëpeka —itxa.

¹⁹ Teoso nitiri apakapapireta:

—Niuãka Kapirio. Nota auari Teosokata ipaniãtakiti nikamini ikapani. Teoso iokanatanano pitemoni pite nimisãkiretini ikapani, ia erekari pirena niminapiretini ikapani. ²⁰ Txamari na pauikari nisãpiretakiti. Ia xika !kasãkireikaiko, kotxi nisãpiretakiti atãopitika. Teoso sikaenetakiti apokapitakako. Apokasaaki, pimarotariko nisãkire atão ininiua. Iuasaakiikarako piposotari pisãkirauatini —itxa Teoso nitiri Sakariamoni.

²¹ Iuasaaki kãkiti mapara auakani iã-tapanãtari Sakaria.

—Kiripa ikamanãta Sakaria aiko ãki? !Katimari —itxanãtana.

²² Ipokãkasaaki !kasãkireikari. Ninoa kãkiti imarotari Teoso misãkiretiniri iua aiko ãki itaponeë, kotxi !kasãkireikari. Iuakoãnokara imisãkiretana ninoa.

²³ Mapaõti iparika xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi ãti pakini kasiriti oaãpoko. !Osari atãiataã.

²⁵ —Apiananiri sikano namarite. Erekari ikaminano notamoni. Uatxa !nipëtauataika kãkiti apisatoõ. Keenepekanano —otxa.

Kapirioo Iokanataãka Mariamoni

²⁶ Isapeo seisi pakini kasiriti kamixi onakasaaki Teoso iokanatarini nitiri iax-itikiri Kapirioo Nasaree sitatxitimoni, Kariréia tãpamoni. ²⁷ Iuaã iokanatarini iua atãkoromoni Maria inakoromoni. Oa kona sirikapanika kikikata. Osãpiretapedekari atãkori Xosee inakori iuakata oitaniriuatini ikapani. Xosee atokiri kitxakapirika Xoteoakori auite Tavii inakori. ²⁸ Teoso nitiri apokasaaki oamoni, akiritaro Maria:

—Ereëkai. Apiananiri pitekata aua. Iua mereëi pite. Itooro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pãkarauata Teoso nitiri sãkire okenakotakasaaki.

—Kinirepa ikara atoko itxa sãkireta? —otxa oãkixinireë.

³⁰ Teoso nitiri txaro:

—!Pipãkarauatape, Maria. Teoso apokaerekatai pite. ³¹ Pimixiuatoko, keene pitxako. Pitakauãkatariko pamarite Xesosi. ³² Iua Apiatakari itxauako. Apiananiri ãkiri akiritaãkako. Teoso Apiananiri kamariko iua auitetxi ininiãua. Kitxakapirika Xoteoakori auite Taviini. Taviini auitetxi ininiua atokokana, Teoso txãkitakariko Xesosi Xoteoakori auite ininiua. ³³ Atãpirika Xoteoakori auite, Xakooni apiko mekaniriakori auite, itxauako. Iua auitetxi ininiua !ixipoka —itxaro oa.

³⁴ Ininiã oa:

—Kiãtokopa nitxa kikikata masirikatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pãkixinireë. Apiananiri posotiire ãkitaiko pite, ininiã amarini auakari Teoso ãkiri akiritaãkako. ³⁶ Pinoromane Isapeo kiomãtxipe, iuaritika kamixiro oa. Kãkiti sãkirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitikariko Apiananiri nirekaãkiti. Pisãpiretakiti iaõka ninirekapitika —otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaõti napa atoko Maria kati-mariã sari oxiratarimoni, Xotéia tãpamoni. Iuaã osari sitatximoni. ⁴⁰ Oïroã Sakaria aapoko. Oãkiritaro Isapeo:

—Ereëkai —otxa.

⁴¹ Isapeo kenakotakasaakiri Maria akiritiniro oa, iusaaki amarini otikakoākiri oākika. Iusaakipeka Erekarī Matamatakoti itapararitika apoka Isapeo ākixinireē. ⁴² Iusaaki otapararitika otxaro Maria:

—Kaiāopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekarī Teoso kaminano nota, kotxi niauīte inoro motikaētano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereēkai” pininino, namarite nitikakoākiri oākika, ipoxokoniuatiniā. ⁴⁵ Teoso sikari erekari pitemoni, kotxi pite auikari isākire. Pite auikari isikaenetakiti atāo isikinii —otxa Isapeo Mariamoni.

Maria Xikaretakiti

- ⁴⁶ Maria txari:
“Erekapitikari Apiananiri
notamonikari.
⁴⁷ Nipoxokoniyata, kotxi Teoso ni-
maerekani makatxaākari itxaua.
⁴⁸ Nipoxokoniyata, kotxi ixinikano
nota. Initero poiāoro nitxaua.
Īkorakanani eereka auakani kākiti
txanoko: ‘Teoso kamapoxokonitaro,
erekari isikiniro,’ txanoko nota.
⁴⁹ Nipoxokoniyata, kotxi Teoso
Apiananiri kaminano posotiiretxi.
Maerekati !auari iuamoni.
⁵⁰ Iua amonikari kākiti iua paxitakani,
kitxakapirīkarini, ĩkorakanani
auakani, eereka auakani apaka
iamonīka.
⁵¹ Pataparari iua, ininiā ikamari
posotiiretxi. Teoso txīkitakana
kākiti iuikakanua minakani
ininiāuana, kotxi ākixinireē
iuikauana.
⁵² Teoso makatxakapekari auītetxi
pataparari inakanua. Eereka
auītetxi litxaukauana ninoa. Kākiti

poiāorini inakanua Teoso kamari
auītetxi ininiāuana.

⁵³ Isikakienatari natxitakani.
Iokanatari katxineiroteri sini. Kona
xatiki isikari iuamoni.

⁵⁴ Imoianatapekana Xoteoakori,
iua ĩkapani parīkauatakani.
!Imaxinīkaretari iamoniĳinina
ninoa.

⁵⁵ Kitxakapirīka Teoso xinikari
Apraāni iamoniĳini. Apaka
iua tikini auakani ātipirika
iamoniĳika, kotxi: ‘Nimoianataiko
hīte,’ itxa anirimanemoni
kitxakapirīkarinimoni,”

otxa Maria.

⁵⁶ Okaikota ipi, āti pakini kasiriti
Isapeokata. Eereka oaāpokomoni
kanapiriā otxa Maria.

Xoāo Kapatxisareri Iponaniini

⁵⁷ Amarini auini ōti apopeka. Isapeo
auākitakari amarini kiki. ⁵⁸ Oaāpoko
takote auakani, onirimane pakini ke-
nakotari erekari Teoso kaminaro oa,
ininiā ninoa, Isapeo pakini poxokopeka
itxana ninoa.

⁵⁹ Oito ōtisaaki, onirimane motika
oamoni, Teoso takaōtxikare amarini-
imoni itakinina ĩkapani. Inirekarina
iuāka Sakaria itakauākatinirina, kotxi iri
uākatxikana ninoa nireka itakauākatini-
rina. ⁶⁰ Txamari inoro:

—Kona Sakariani iuāka. Xoāorako
akiritaākako —otxa.

⁶¹ Ininiā ninoa txaro:

—Pinirimane ātika kona Xoāo txa
uākataua.

⁶² Ninoa pimaāri amarini iri
Sakaria iuakoāna amarini uāka
inirekaākiti. ⁶³ Ininiā Sakaria amanaāri
iōkatsopatiko. Iōkatari: “Imi uāka
Xoāo.” Ininiā ikinimane tsorīkaāta.

⁶⁴ Iusaakipeka Teoso sikaposotiiretari
isākirauatini:

—Peerekari Teoso —itxa Sakaria.

⁶⁵ Kākiti iua aapoko takote auakani pīkarauata. Teoso posotiire ipīkana. Ikara inakariene Sakaria, Xoão pakini pirena iaripireta oxiratarari Xotéia tōpa, ininiā kākiti iuaātaā sāpirenauanāta ikara pirena. ⁶⁶ Kākiti ikara inakariene kenakotakani tsorīkaāta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nīkaniniri iua amarini.

Sakaria Xikaretakiti

⁶⁷ Iuasaaki Erekarari Matamatakoti sika-posotiiretari Xoão iri Sakaria, ininiā Sakaria sāpiretari Teoso sākire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imaktxakinina ikapani, imapinakanina ikapani.

⁶⁹ Teoso iokanatarari kākiti maerekani maktxakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirīka Teoso sākire sāpiretakani erekarini sāpiretari ikara Teoso sākire.

⁷¹ Teoso txari: ‘Nimaktxakaiko hīte himokaiakari mokakanii tīkane, homanatakini mokakanii tīkane.’

⁷² Isāpiretari aātokiriakorini kitxakapirīkarini:

‘Niamonīkai. Nikamariko nikamaenetakiti hīte ikapani,’ itxa ninoamoni. Ikara Teoso kamaenetakiti erekarari.

⁷³ Kitxakapirīka Teoso txari aātokiri Apraōni: ‘Kona nimaxinīkaretari nisikaenetakiti.

⁷⁴ Nimaktxakapitikaiko hīte himokaiakari mokakanii tīkane, ininiā hīparīkauata nota ikapani mapīkaretika.

⁷⁵ Ininiā hīte auini erekarari. Kona hīkamari maerekati hāuapanika hinakasaaki,’ Teoso txari Apraōni.

⁷⁶ Pitepekana namarite Xoão, Teoso sākire sāpiretakari pitxauako. Teoso Apiananiri iaxitikiri sākire sāpiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini ikapani.

⁷⁷ Pisāpiretariko kākiti Teoso nakitiakori, Teoso maktxakiniri maerekanitxi kākiti kamakiti. Ininiā ninoa imarotariko ikara.

⁷⁸ Katiraōkiri aTeosone. Kaa-monīkareri iua. Ininiā iua tixinekiri apokako atemoni. Atokatxi pokīkini atoko itxako. Iuasaaki ipī! auaika, kotxi iua maktxakari amaerekani.

⁷⁹ Ininiā iua iopinikari kākiti xinire, ipinini pīkakani xinire. Ipiaā auakani atoko ninoa. Ininiā iua iopinikari axinire Teoso kimapore aimarotini ikapani, aāuini ereka inini ikapani.”

Itxa Sakaria xikare.

⁸⁰ Iua amarini aneē. Teoso sākire iaōka ikamapika. Teoso sākire Xoteoakorimoni imasāpiretakani apisapanika āparaā makipakaniātaā aua Xoão.

Xesosī Iponaniini Pirena

(Mateo 1.1-25)

2 Iuasaaki Homanoakori auīte Sesa Akósito inakori. Iua paniātana initiriakori iaōtiniri ikininape kākiti iua auītetxi ininiātaāua tōpa auakani, ikini aapokotxitikini uāka imaktxakini ikapani. ² Mitxi Sesa Akósito !ikamapanikari kākiti iaōtiko. Iuasaaki Síria tixini auakani auīte Sirénio inakori. ³ Iuasaaki ikinimane sari sitatximoni iponaniiniātaāna. Iuaā isikarina iuākana.

⁴ Ininiā Xosee apaka sari iuāka isikini ikapani. Ininiā ipotorika Nasaree sitatxiti Kariréia tōpa. Xotéia tōpamoni isa, Pereē sitatxitimoni. Iuaā isa, kotxi iuaā

auĩtetxi Taviini kitxakapirĩka aua. Taviini nirimane itxaua Xosee. ⁵Isa Mariakata. Ītanoro tũkane oa. Iuasaaki !itakapanikaro. Kamixipeka otxa iuasaaki. ⁶Pereẽ apoka itxana. Iuaã auakasaakina, aua itxa amarini. ⁷Oãũakitakari merepitipanika oimi kiki. Ininiã mäkatzĩ mataã oiapirikari, pirãtxi nipokotini tiitxitiã taka otxari amarini, kotxi kãkiti imakanakiniãtaã imakinika xãpokapeka, ininiã ninoa auanãta pirãtxi auiniãtaã.

Soti Auĩte Piratakani Pirena

⁸Iuaãtaã Pereẽ sitatxiti mapotõkire ĩkanõka kikiakori soti auĩte piratakani nikanãtari ipiraakorina. ⁹Iuasaaki katimaritika Apiananiri nitiri iaxitikiri tokiã ninoamoni. Iuasaaki Apiananiri iotximere iopinikari ninoa auiniãtaã, ininiã imarotarina Teoso apokini iuaãtaã. Ininiã iteene ipĩkarauatana ninoa.

¹⁰Ininiã Teoso nitiri txana ninoa:

—!Hĩpĩkarauatape. Nota minapiretari erekari pirena ikinimane kãkiti enenĩkini ĩkapani, ¹¹kotxi ia õti kãkiti maerekani makatxaãkari iponaniãpeka Taviini auini sitatxitiã. Iua Teoso mereẽkiti. Apiananiri iua. ¹²Himarotariko nisãkire atão inini, kotxi hãpokariko ia amarini mäkatzĩ mataã iapirikiko pirãtxi nikini tiitxitiã —Teoso nitiri txana ninoa.

¹³Iuasaakipeka itomaneri Teoso nitiriakori iaxitikini tokiã iuaãtaã. Ninoa xikarauata Teoso ĩkapani.

¹⁴Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kãkiti iua apokaerekatakini —itxana ixikarena.

¹⁵Teoso nitiriakori kanapiriã itxana Teoso tixinemoni. Iuasaaki ninoa pirãtxi nĩkatakani misãkiretakakaua:

—Masa Pereẽmoni. Maãtamatarĩ ikara Apiananiri sãpiretakiti —itxana.

¹⁶Ininiã katimaritika isana Pereẽmoni. Iuaã apokasaakina, initarina amarini. Apokana Xosee, Maria pakini. Ininiã atamatarina amarini pirãtxi nikini tiitxitiã. ¹⁷Ikara atamataãkana atoko, isãpirenãtarina Teoso nitiri sãpiretakiti amarini pirena ikinimanemoni. ¹⁸Kãkiti kenakotakasaakiri soti auĩte nĩkatakani sãpiretakiti, ikinimane tsorikaãta iuasaaki. ¹⁹Maria kenakotakasaakiri soti auĩte nĩkatakani sãpiretakiti, oa ãkixinireẽ onĩkatarĩ ikara ene. !Omaxinĩkaretari ninoa sãpiretakiti. Oxinikapikari. ²⁰Eereka pirãtxi nĩkatakani kanapiriã ipiraakori auinimoni. Imisãkiretakakana:

—Peerekari Teoso. Apiananiri iua, kotxi erekapitikari aĩtikakiti. Erekapitikari iniriti iaxitikiri sãpiretakiti. Isãpiretakiti atãopitika, kotxi aãtamatarĩ isãpiretakiti iaõka —itxanãtana ninoa soti auĩte nĩkatakani.

Xesosi Takauãkatiko

²¹Xesosi oito õti auakasaaki, inirimane kamari Teoso takaõtxikare iĩtoã. Iuasaaki inirimane takauãkatarĩ Xesosi, kotxi iua iaõka Teoso nitiri iaxitikiri sãpiretapekaro Maria oa kamixi oinini apisapanika.

Xesosi Anikiko Teoso Misãkiretiko Aikotimoni

²²Moisesini ketotini manapi Xosee, Maria pakini kamari Moisesini paniãtakiti iaõka amarini auakasaaki, Xosee, Maria pakini maerekani Teoso makatxakini ĩkapani. Ikara xipoka atoko anikarina Xesosi Xerosareẽ sitatxitimoni Apiananirimoni isikinirina ĩkapani, ²³kotxi Apiananiri paniãtakiti iõkatsopatakori txari:

Merepitipanika iponaniãkari sikaãkako Teosomoni, kotxi Teoso nakiti iua.

²⁴ Apaka Apiananiri paniätakiti iökatsopatakori txari:

Amarini iponaniäkasaaki, ipi kamo pisika Teosomoni. Iminakaniä, ipi kamo äkiri pisika Teosomoni, itxa Teoso. Ininiä Xosee, Maria pakini sari Xerosareë kamo isikinina ikapani.

²⁵ Iusaaki kiki Simiäo inakori aua Xerosareë. Iua erekari kamakari. Ikinipoko Teoso paniätakiti ikama. Erekari Matamatakoti auari äkixinireë. Äkixinireë iätapanätapikari Teoso Mereëkiti apokini, kotxi Isaeo auakani maerekani makatxaäkari itxaua.

²⁶ Erekari Matamatakoti säpiretapekari iua: “Pipinini apisa paökkitapanikariko Apiananiri Mereëkiti,” itxari Simiäo.

²⁷ Erekari Matamatakoti sikanireötari Simiäo aiko Teoso misäkiretiko aikoti iroiini. Iusaaki Xosee, Maria pakini iroä iuaätaä, Apiananirimoni Xesosi isikinina ikapani, Teoso paniätakiti ikaminina ikapani. ²⁸ Iusaakipeka Simiäo apakapari Xesosi:

—Peerekari Teoso. ²⁹ Niauïte Apiananiri, uatxa apokapeka ia amarini pisikaenetakiti. Nota pite ikapani parikauatakarino. Uatxa niposotari nipinini erekaxinirepeka ninini, ³⁰ kotxi nota atamataria ia amarini piokanatakiti atemoni, amaerekani imakatzakini ikapani, amapinakani ikapani. ³¹ Pite iokanatapekari ia ikorapokoriti ikini itixiti auakani maerekani imakatzakini ikapani. ³² Ia amarini tirikapi atoko, kotxi iopinikariko pikimapore, pisäkire Xoteo minakaniua imarotini ikapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simiäo säkire Teosomoni.

³³ Xosee, Xesosi inoro apaka tsorikaänäta ikara Simiäo säkire ikenakotakasaakina. ³⁴ Simiäo amanaäri

Teoso ikinipoko erekari ninoamoni isikini ikapani. Eereka imisäkiretaro Maria, Xesosi inoro:

—Teoso mereëri ia amarini Xoteoakorimoni iokanatiniri ikapani. Ia apakapakari Teoso apakapa apaka. Ia mapakapakati Teoso !apakapari. Imisiritaäkako. Ia amarini oerekari Teoso käkitimoni, txamari itori käkiti !auikari isäkire.

³⁵ Ikara atoko ininiä, itori käkiti xiniäkiti kipatakori äkixinireë, imarotaäkako. Pitepekana pite matinaniuatako. Päkipa iouata iorotini tsii atoko itxako —itxa Simiäo säkire Mariamoni.

³⁶ Iusaaki oäua sito Teoso säkire säpiretakaro Ana inakoro. Panoeo äkero oa. Oätokiri kitxakapirika Asee inakori. Iusaaki kiomätxipekaro oa. Oäua setxi ano ötanirikata. Eereka ipïpe.

³⁷ !Oïtaniriuataika. Oitëta koatrokana-nipeka oäuiini. Oa auapika Teoso misäkiretiko aikoti äki. Iuaä ikini öti, ikini ikanökati pakini omisäkiretapikari Teoso. Itokata otakanapari onipokotini Teoso omisäkiretini ikapani. ³⁸ Xosee, Maria pakini Simiäo misäkiretaka atoko Ana apoka. Omisäkiretari Teoso:

—Erekapitikari ia amarini pimereëkiti käkiti iätapakiti piokanatini atemoni —otxa.

Eereka osäpirenauata Xesosi apokini pirena Xerosareë auakanimoni käkiti maerekani makatxaäkari iätapanimoni.

Nasaree Sitatxitimoni Ikanapiriinina

³⁹ Xosee, Maria pakini Apiananiri paniätakiti iökatsopatakori imakinika ikamaäkana atoko, kanapiriä itxana Kariréia töpamoni. Iuaä isana aapokomonina Nasaree sitatxitiä. ⁴⁰ Iua amarini aneë. Itapara auaäpotari. Kimaroreri itxaua. Teoso iteene tirtari iua Xesosi.

Xesosi Misākirenātari Koerekarerini

⁴¹ Ikinikanani Xosee, Maria pakini sari Páskoa kiiniritimoni Xerosareē sitatxitimoni. ⁴² Xesosi tosi anopeka inakasaaki, isana Xerosareē auakari kiiniritimoni mitxi isanātinina atokokana. ⁴³ Kiiniri xipoka atoko Xosee, Maria pakini potorika aapokomonina isinina ikapani. Iuasaaki Xesosi kaikota Xerosareē. Txamari ninoa !imarotari ikaikotini. ⁴⁴ Ninoa uākatamari apanakini inirimanekata isini. Ikara atoko ininiā, ikimaporitana āti ōtipeka. Mapiānikata ipixinipokoriti initamarina inirimanemoni, aōkimaneremoni. !Apokarina. ⁴⁵ Ininiā ikanapiriāna Xerosareēmoni iuaikana initinirina ikapani. ⁴⁶ Ipi, āti pakini ōti initapiimarina. !Apokarina Xesosi. Eereka apokarina Teoso misākiretiko aikoti āki. Moisesi sākire oerekakanikata iitopākanāta. Xesosi kenakonātari ninoa sākire. Apaka ipimarauata. ⁴⁷ Ninoa Xesosi sākire kenakotakani tsorikaānāta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parika. Inoro txari:

—Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aāpokai —otxari Xesosi.

⁴⁹ Ininiā Xesosi:

—Kinirepa hinitanātano? Kona himarotatari uai niri aapoko ninirekari nauini, ipaniātakiti nikamini ikapani — itxa.

⁵⁰ Txamari ninoa !imarotari Xesosi sākire.

⁵¹ Ikara atoko ininiā, Xesosi kanapiriā ninoakata Nasaree sitatxitimoni. Ikinika Xosee, Maria pakini sākire ikīpita. Inoro xinikapikari Xesosi sākire oākinireē. Opotxitari oxinikiniri Xesosi sākire. ⁵² Xesosi aneē. Imatire apaka

aneē. Teoso apokaerekatari Xesosi. Kākiti apaka apokaerekatari Xesosi.

Xoão Kapatxisareri Sāpiretakiti

(Mateo 3.1-12; Marko 1.1-8; Xoão 1.19-28)

3 Homa sitatxitiā Homanoakori auite Txipério inakori iua. Kisi anokananipeka iua auitetxi ininiua iuasaaki. Iuasaaki Xotéia tōpa auakani auite Pōsio Pirato inakori. Kariréia tōpa auakani auite Erotxi inakori. Erotxi itari Piripi inakori. Itoreia tixini auakani auite, Takonitxi tixini auakani auite apaka itxaua Piripi. Iuasaaki Apireni auakani auite Arisánia inakori. ² Iuasaaki Anasi inakori, Kaipasi inakori pakini sasetotxi auiteakori apiatakani itxauana ninoa. Iuasaaki Teoso sāpiretari isākire Xoōmoni Sakaria ākirimoni, āparaā makipakaniātaā auakasaaki. ³ Ininiā Xoão sari ikininape kākkitimoni, uini Xotáo takote auakanimoni. Isāpiretari Teoso sākire:

—Hítakanapariko himaerekani. Eereka patxisata hinaākako. Ikara atoko hininiā, Teoso makatxakinii himaerekani —itxanāta Xoão ikininape kākkitimoni.

⁴ Kitxakapirika Teoso sākire sāpiretakari Isafa inakori iōkatsopatar:

Auako kiki āparaā makipakaniātaā.

Isāpirenauatako. Itxariko:

“Hōeretariko kimapori Apiananiri apokini apisapanika. Itikaāpo erekari hīkamako iua napini ikapani.

⁵ Kipatxiā ixāpokakaākako ikini isauana. Ixirata miriī oerekataākako. Kimapori ikitokare oerekataākako. Kimapori pakota totaākako.

⁶ Ikinimane kākiti itixi auakani imarotariko Teoso makatxakiniri kākiti maerekani imapinakani ikapani,” itxanāta.

Ikara atoko itxa Isaía iōkatsopatak-
iti Xoão pirena. Kimapori kākiti oereka-
tini atokokana, auñtēxi apokini apisa,
iua atokokana Xoão nirekari kākiti
iposome inini Apiananiri apokini apisa,
imaerekanina itakanapinina ikapani.

⁷Itomaneri kākiti sari Xoãomoni
ipatxisatikona ikapani. Ininiã Xoão:

—Imini katsiiri anaakorirai hñte.
Teoso misiritapitikai himaerekani
xika. Himitekini !auari. Hinirekari
hñpatxisatiko, txamari !hinirekari
hñtakanapiniri himaerekani.

⁸Hinirekiniãri himaerekani
hñtakanapini, ininiã hñkamariko erekari.
Ikara atoko ininiã, hñerekari Teoso
atão hñtakanapiniri himaerekani.
Hñkixiniremoni !hñxinikapiri: “Teoso
apakapapitikauako ate, kotxi ate
atokirini Apraãoni txaua,” !hñtxapeko.

Ari, nota sñpiretai hñte, Teoso
nirekiniãri, iposotari ia kai soroã
Apraãoni mekaniriakori ikamini. Kona
Apraãoni posotari anikini Teosomoni.

⁹Aamina maereka iriti atoko hñtxa.
Teoso iposopeka hñte ixipokini. Kākiti
auari ikitaite kauanari aamina maereka
iriti itokini ikapani. Ikinika aamina
maereka iriti tokaãkako. Xaminaã
oka inaãkanako. Teoso kamakiti iua
atokokana itxa. Ininiã Teoso kitaite
kauanapeka, aamina kotsa sauakiko
tñkane. Iua atokokana ininiã, Teoso
aiamatapeka hñte ixipokini ikapani
—itxa Xoão ninoamoni.

¹⁰—Ikara atoko ininiã, kipa akama
Teoso mamisiritakaniua ikapani? —
itxarina.

¹¹Ininiã Xoão apakapapireta:

—Pimãka kauanata ipi auiniã, ãti
pisika mñkatxi kauanata mauakiniti-
moni. Nipokori auiniã, pisikari nipokori
mauakinitimoni —itxa Xoão sñkire.

¹²Kikiãkini, txineiro apakapakani
Homano auñte nitiriakori, apoka apaka
ipatxisatikona ikapani.

—Koerekareri, atepékana, kipa ate
kama Teoso mamisiritakaniua ikapani?
—itxarina.

¹³Ininiã Xoão:

—Kākiti txineirote himakatzakakito,
Homano auñte nireëkito iaõka himakatz-
akako. Apikomoni !himakatzakapero —
itxana.

¹⁴ãtikaka sotatoakori apaka pimaãri:

—Atepekana, kipa ate kama
amaerekani atakanapini ikapani?

Ininiã Xoão:

—!Himaïkapiri kākiti, itxineirote him-
ixirikini ikapani. Kona ãti maxikatitka
!hñpoñtape. Hñpokoniuatoko txineiro
hñpakapakitoã hñparika ãki. !Hinirekap-
ero apikomoni —itxa sotatoakorimoni.

¹⁵Iuasaaki kākiti iãtapanãtari Teoso
mereëkiti apokini. Ininiã Xoão sñpire-
takiti ikenakotakasaakina, ãkixinireña
ixinikarina:

—Xoãokani Teoso mereëkiti txataua
atxiñti? —itxanãtana ixinikanãtakitina.

¹⁶Ininiã Xoão:

—ãparaãnokara nipatxisatai hñte.
Nota tikini apoãkari patxisataiko
hñte Erekari Matamatakotiã, xaminaã
pakini. Apiatakari itxaua iua. !Apakata
iua takote napokini ikiti mata
nimakatzakini ikapani, kotxi iua
apiata. Nota poiãoka. Imakatzakari
himaerekani, itxiko metao ãki auakari
arikini atoko. ¹⁷Katakareri ãpokari
ahosi otãta imakatzakini ikapani.
Otãta arikaãka. Oki nñkataãka
ikiena nñkatikoãtaã. Iua atokokana
Teoso nñkatariko kākiti erekarini.
Maerekati kamakani arikaãkako xamina
maxipoãkatia.

¹⁸Ikara atokora itxa Xoão sñpirena
õtãkikinina kākiti. Isñpiretari erekari
pirena Teoso pirena kñkitimoni. ¹⁹ãti
õtã Xoão pinitari Erotxi, Karirãia auakani
auñte:

—Pitakiniãro pitari Piripi ãtanoro
Erotxia inakoro, maerekati pikama.

Apaka apikomoni maerekati
pikamapitipo —itxa Xoão.

²⁰ Ininiã iuasaaki iuaĩkana Erotxi ka-
mari maerekati, kotxi itakari Xoão
kateia āki isākire imapokaerekatakani
xika.

Xesosi Patxisatiko Pirena

(Mateo 3.13-17; Marko 1.9-11)

²¹ Xoão Erotxi maĩkini apisapanika
ikinimane kākiti ipatxisatakasaaki, Xe-
sosi apaka patxisataāka. Iuasaaki Xe-
sosi sākirauatakasaaki Teosokata, iaxiti
takaka. ²² Erekar Matamatakoti katxaka
Xesosi nopini. Kamo katxakini atoko
itxa ikatxakini. Iuasaaki ikenakotaāka
iaxitikiri sākire:

—Pite namarite, nitiretakiti,
napokaerekatai, kotxi ninirekakiti
pikama —itxa.

Xesosi Nirimaneakori Iua Apisapanika Auakani

(Mateo 1.1-17)

²³ Iuasaaki Xesosi potorika iparĩkaua-
tini Teoso ĩkapani. Trĩta anokananipeka
itxaua iuasaaki Xesosi. Kākiti uākatari
iua Xosee ākiri ininiãua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

²⁵ Xosee iri Matatxia.

Matatxia iri Amosi.

Amosi iri Naoõ.

Naoõ iri Esirii.

Esirii iri Nakai.

²⁶ Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

²⁷ Xota iri Xoanaã.

Xoanaã iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

²⁸ Nerii iri Meokii.

Meokii iri Atxii.

Atxii iri Kosaã.

Kosaã iri Eomataã.

Eomataã iri Eri.

²⁹ Eri iri Xosoee.

Xosoee iri Eriesa.

Eriesa iri Xoriĩ.

Xoriĩ iri Matatxi.

Matatxi iri Arevii.

³⁰ Arevii iri Simião.

Simião iri Xotaa.

Xotaa iri Xosee.

Xosee iri Xonaã.

Xonaã iri Eriakiĩ.

³¹ Eriakiĩ iri Mereaa.

Mereaa iri Mena.

Mena iri Matata.

Matata iri Nataã.

Nataã iri Tavii.

³² Tavii iri Xesee.

Xesee iri Opetxi.

Opetxi iri Póasi.

Póasi iri Sáomõ.

Sáomõ iri Nasoõ.

³³ Nasoõ iri Aminatapi.

Aminatapi iri Átximĩ.

Átximĩ iri Anii.

Anii iri Ésirõ.

Ésirõ iri Péresi.

Péresi iri Xotaa.

³⁴ Xotaa iri Xakoo.

Xakoo iri Isaki.

Isaki iri Apraão.

Apraão iri Tera.

Tera iri Nakoo.

³⁵ Nakoo iri Seroki.

Seroki iri Hakao.

Hakao iri Pareki.

Pareki iri Epi.

Epi iri Sara.

³⁶ Sara iri Kainaã.

Kainaã iri Apaxatxi.

Apaxatxi iri Seĩ.

Seĩ iri Noe.

Noe iri Arameki.

³⁷ Arameki iri Metosareẽ.

Metosareẽ iri Enoki.

Enoki iri Xaretxi.

Xaretxi iri Marereo.

Marereo iri Kainaã.

³⁸ Kainaã iri Enosi.

Enosi iri Setxi.

Setxi iri Adão.

Adão iri Teoso. Imapotõkirepe.

Satanasi Nirekari Xesosi Kaminiri Maerekati

(Mateo 4.1-11; Marko 1.12-13)

4 Xesosi ipatxisatiko atoko, Erekarı Matamatakoti iteene sikaposotiiretari iua. Erekarı Matamatakoti txikitakari Xesosi uini Xotão itakanapini, āparaã makipakaniātaã isini ĩkapani. ²Iuaã koarēta õti auakasaaki, Satanasi atamakaerekatari Xesosi. Koarēta õti manipokotakatinoka itxa Xesosi. Ininiã natxinoka itxa Xesosi.

³Ininiã Satanasi txari:

—Pite Teoso ākiri pitxaua, ininiã ia kai soro komiri pitxikitaka —itxari Xesosi.

⁴Ininiã Xesosi apakapapiretari:

—Kona, kotxi Teoso sākire iōkatsopatakori txari:

Kona komirinanini txikitakari kākiti ātipirika auini tĳkane. Ikinika Teoso sākirera txikitakari kākiti ātipirika auini tĳkane.

⁵Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶Ininiã Satanasi:

—Nota posotari nisikini ikinimane auĩtetxiakori posotiire. Ikinipoko ninoa txineirote apaka niposotari nisikini. Merepitipanika notamoni isikaāka ia posotiiretxi, ininiã nota sikari ninirekaākitimoni. ⁷Ikara atoko ininiã,

piteosonetiniāno, ia posotiiretxi nisikai pite —Satanasi txari Xesosi.

⁸Ininiã Xesosi:

—Konapitini. Pisipeka Satanasi. Teoso sākire iōkatsopatakori txari:

Apiananiri piTeosone. Iuanokara piteosoneta. Iua ĩkapaninokara piparĳkauatako.

⁹Eereka Satanasi anikari Xesosi Xerosareẽmoni, aiko Teoso misākiretiko nopinixiti. Itanoxiti paĩtanori. Pamonõkoniri. Iuaã itxari:

—Teoso ākiri pininiāua, pokaua xiti. Ininiã ikinipoko kākiti imarotariko Teoso ākiri pininiāua, ¹⁰kotxi Teoso sākire iōkatsopatakori txari:

Teoso iokanatanako initiriakori iaxitikini pite inikatinina tĳkane.

¹¹Ninoa maĩkai pimapinakani tĳkane, ininiã pikarouatini !uari. Kona kai soro karotari pikiti,

itxa Teoso sākire —Satanasi txari Xesosi.

¹²Ininiã Xesosi:

—Teoso sākire iōkatsopatakori apaka txari:

Kona patamakaerekatapiri Apiananiri piTeosone,

—itxari.

¹³Iuasaakipeka Satanasi atamakaerekatiniri Xesosi xipope. Ininiã itakanapari Xesosi āti õti iuaĩkana ikanapiriini iuamoni ĩkapani.

Xesosi Mipotorikari Iparĳka Karirėia Tõpa

(Mateo 4.12-17; Marko 1.14-15)

¹⁴Ikara inaāka atoko Xesosi kanapiriã Karirėia tõpa auakanimoni. Paposotireri, kotxi Erekarı Matamatakoti auari iuakata. Iua pirena iaripireta ikini Karirėia tõpa auakanimoni.

¹⁵Iua oerekarauata aiko āki Xoteo apotiitiniātaāua. Ininiã ikinimane txari:

—Peerekari iua, kotxi erekapitikari iua sāpiretakiti —itxana.

**Nasaree Auakani Kona
Auikari Xesosi Säkire**

(*Mateo 13.53-58; Marko 6.1-6*)

¹⁶ Eereka Xesosi sari Nasaree sitatx-
itimoni. Iuaã Xesosi aneë mitxi. Xoteo
tomatini õtisaaki Xesosi itotapekari
aiko Xoteo apotiitiniãtaãua isini. Ininiã
iuasaaki, Xoteo tomatini õtisaaki isari
iuaã. Iuaãtaã itima Teoso säkire iõkat-
sopatakori atatsopatini ikapani. ¹⁷ Teoso
säkire sãpiretakari Isafa iõkatsopatakiti
tsopa isikaãka. Ininiã imatakireëri aãt-
sopa. Ia Teoso säkire inita, atatsopata
itxa:

¹⁸—Erekari Matamatakoti notakata
aua, ininiã Apiananiri mereëno
nota matxineirotenimonikari
erekari pirena nisãpiretini
ikapani. Iokanatano kateia äki
auakani nisikakini ikapani.
Iokanatano mösiärenimoni
iuaikana atamarauatinina ikapani.
Iokanatano misiritakonimoni, ninoa
misiritakani nixipokini ikapani.

¹⁹ Ipaniãtano kãkiti nisãpiretini: “Ïko-
rakanani Teoso apokapeka kãk-
iti maerekani imaktxakini ikapani,
imapinakanina ðkane.”

Ikara atatsopata Xesosi.

²⁰ Aãtsopa iapirikaãka atoko, sika
itxari sasetotxi nitirimoni. Ikara in-
aãka atoko Xesosi topãka. Imakinika
kãkiti aiko Xoteo apotiitiniãtaãua äki
auakani, imakinikana atamatari Xesosi,
isãpiretakiti kinirão kenakotaka inakani.

²¹ Ininiã Xesosi sãpiretana:

—Ikara Teoso säkire hikenakotakiti
apokapeka uatxa —itxa ninoamoni.

²² Ikinimane kãkiti sãpirenauata Xe-
sosi ereka inini. Itsorikaãnãtana isäkire
erekari ikenakotakasaakina:

—Kiãtokopa ininiãpa imarotatari
ikara atoko inakari isãpiretini? Kotxi
Xosee äkirira iua, minakati äkirira iua
—itxanãtana.

²³ Ininiã Xesosi txana ninoa:

—Atxiiti hite txanoko nota imatiretxi
kitxakapirika kiomãtxiakori säkire.
Ninoa txari: “Pinïtxi imarotakari
pininiãua, piteka pipitaua.” Atxiiti
hixinikanãtari: Kapanaoõ sitatxiti
nauakasaaki, nikamari posotiiiretxi
iuaãtaã. Kinirepa na nikamatari
posotiiiretxi uai nauiniãtaã? Ikara atoko
atxiiti hixinikanãta. ²⁴ Atão nisãpiretai,
kãkiti Teoso säkire sãpiretakari
inirimane sauaki auakasaaki, inirimane
!auikari isäkire. Ia xika kona nikamari
posotiiiretxi uai. ²⁵ Atãopitika nisãpiretai
hite. Kitxakapirika Teoso säkire
sãpiretakari Erãsi inakori auakasaaki,
ipi äti pakini ano ipixini ano pakini
ãparaã !ikipa. Iuaã Isaeo tixini
natxinoka aua. Iuasaaki kaiãopokoro
sitoakoro tikinitakoro auari iuaãtaã.
²⁶ Iuaritika Teoso !iokanatari Erãsi
ninoa ikininapemoni. Iokanatari ätoka
sitomoni tikinitakoromoni, nipokori
isikiniro ikapani. Oa sito aua Sarepita
sitatxiti Sitoõ tõpa, Isaeo tixini takote.
Xoteo !otxaua oa.

²⁷—Ikara atokotxikana itxa Teoso
säkire sãpiretakari Eriseo inakori. Iua
auakasaaki, kaiãopokori amianatakani
maere matati Isaeo tixini auakani aua.
Kona imakinikani erekapeka inaãkana.
Kiki Naamaã inakori Sírĩa tixini auakari,
iuanokara erekapeka itxikitakaãka. Iua
Naamaã kona Xoteo !itxaua iua —itxa
Xesosi ninoamoni.

²⁸ Ikinimane aiko äki apotiitakaniua,
ikara ikenakotakasaakina, iteene ina-
iatauana. ²⁹ Ininiã ikosekaãtitarina Xe-
sosi sitatxi mapotõkiremoni. Anikarina
ixirata nopini sitatxi auiniãtaã. Iuaã
inirekarina Xesosi okinina ixiratamoni
ipinini ikapani. ³⁰ Txamari Xesosi napari
ninoa sauaki, ðkorape itxa.

Kiki Maerekati Matamatakoti Auaitotakiti

(Marko 1.21-28)

³¹ Eereka Xesosi sari Kapanaoõ sitatx-
itimoni Kariréia tōpa. Iuaã tomatiko
õtsaaki oerekana kākiti Teoso sākire.

³² Kākiti iuaã auakani tsorikaänäta
oerekakiti ikenakotakasaakina, kotxi
paimatireri iua. Isäpiretakiti atāonoka
itxa isākire. ³³ Iuusaaki aiko āki kākiti
apotiitiniātaāua, aua kiki maerekati
matamatakoti auaitotakiti.

³⁴ Iua kiki ākixinire auakari
akiripoakata:

—Xesosi Nasareekiri, kipa ikai uai?
Kīātokopa pitxataua ate? Atxiiti papoka
ate pixipokini ikapani? Nota imarotai
pite. Pite maerekati mauakiniti
pite. Teoso nakiti pitxaua pite —itxa
maerekati matamatakoti Xesosimoni.

³⁵ Ininiã Xesosi txitari iua. !Auiritari
isākirauatini:

—Maātako. Posipikari ere kiki —
itxari.

Ininiã maerekati matamatakoti
iriākatari iua kiki ikinimane okiātaã.
Ininiã itakanapari iua, makarotika itxa
kiki. ³⁶ Kākiti iuaātaã tsorikaänäta.
Imisākiretakakauana:

—Īkora kiki paposotiireri isākire. Ita-
pararitika ipaniātari maerekati mata-
matakoti sini, ininiã nākorape itxapena
maerekani matamatakoni.

³⁷ Ininiã Xesosi pirena iua tōpa
iaripireta.

Xesosi Makananitaro Simão Petro Imakiro

(Mateo 8.14-17; Marko 1.29-34)

³⁸ Eereka Xesosi potorika aiko
Xoteoakori apotiitiniātaāua. Simão
aapokomoni isa. Iuusaaki Simão imakiro
iteene oāpoomata. Ininiã amanaärina
Xesosi oa erekape inīkitakini. ³⁹ Ininiã
ipapika oamoni:

—Nipaniātari apoomari iotokini —
itxa.

Ininiã apoomari iotoka. Iuusaakipeka
oa õkitikaua, nipokori osikana ninoa.

Xesosi Makananitana Amianatakani

(Mateo 8.16-17; Marko 1.32-34)

⁴⁰ Atokatxi ereēkokaāpotapeka
inakasaaki, kākiti anikana amianatakani
ikinipoko amianari auakini, Xesosimoni.
Itakari iuako amianatakani nopini.
Iuusaakipeka ninoa erekapeka
itxana. ⁴¹ Omitikari maerekati
matamatakoti kākiti itōã auakari apaka.
Osipikasaakina, akiripoakatana:

—Pite Teoso ākiri pitxaua.

Ininiã Xesosi txitana ninoa. !Auri-
taikana akiritinina, kotxi ninoa imarotari
Teoso mereēkiti ininiãua Xesosi.

Xesosi Sāpiretari Erekaru Pirena

(Marko 1.35-39)

⁴² Katimatinīkata Xesosi sari kākiti
mauakaniātaã. Iuusaaki kākiti nitanātari
iua. Apokasaakirina, amanaärina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ātiā-
taã apaka nisāpiretariko erekari pirena
Teoso auitetxi ininiãua pirena. Ikini-
manemoni ikara nisāpiretini ikapanira,
Teoso iokanatanano kākitimoni.

⁴⁴ Ikara atoko ininiāra, isāpirenauata
ikininape aiko āki Xoteoakori apoti-
itiniātaāua ikinipoko Xoteoakori tixine.

Merepitipanika Xesosi Moianariakori

(Mateo 4.18-22; Marko 1.16-20)

5 Āti õti Xesosi auanāta Xenesaree in-
akori poa tinikata. Xenesareetxikana
Kariréia poa. Ipi iuāka aua. Iuusaaki kāk-
itipokoni ākitari iua Teoso sākire ike-
nakotinina ikapani. Iuakatapeka xāpoka
itxana. ² Iuusaaki Xesosi atamatari ipi
kanaua ioporoko. Kokatsaārity kanauate.

Ninoa imiriĩ arokanātari hetxi. ³Xesosi iereētaua Simão kanauate āki:

—Pikatika pikanauate amaātiki apanīkakiā —itxa Simāomoni.

Eereka iitopāka kanaua āki. Iuaātaā isāpiretari Teoso sākire kākītimoni imiriĩ apotiitakanimoni.

⁴Isāpirenauataka atoko itxari:

—Apanīkakiā pimekota. Iuaātaā pitakari hetxi kāuaāriā —Xesosi txari Simão.

⁵Ininiā Simão:

—Koerekareri, hetxi atakapikama ikanōka. Iteene aōkatsaākatapiikama. Txamari na xatiki ximaki amaīka. Kona ātika amaīka. Iuaritika pite paniātiniāno, iuaritika nitakapitikariko hetxi —itxa Simão.

⁶Hetxi ninoa takasaaki kāuaāriā, ximākipokoni imaīkana, ininiā hetxi tso-rakiarita. ⁷Ikara xika akiritana imoia-nariakori āti kanauate āki auakani:

—Āpina. Himoiannataua ate. Hetxi tsorakiāpotanapanoka.

Ininiā ninoa ina. Ikinimane kosekari hetxi. Ximākipokoni. Ipi kanaua xāpoākata ximakinoka. Ximaki xika kanaua sakikaarita. ⁸Simão Petro atamatakasaakiri ximākipokoni, ikapotoreēkaua Xesosi apisatoō:

—!Pikaikotape nota takote, kotxi erekai pite. Maerekati kamakarino nota —itxa.

⁹Ikara atoko itxa Simão sākire, kotxi iua, imoiannariakori apaka tsorikaāta kaiāopokori ximaki ninoa maīkakiti xika. ¹⁰Simão moianariakori Txiako, Xoāo pakini, ninoa apaka tsorikaāta. Txiako, Xoāo pakini Sepeteo anaakori. Ininiā Xesosi txari Simão:

—!Pipīkarauatape. !Pimaīkaikari ximaki. Ātiāo piparīka auako. Nisākire pisāpiretako kākītimoni —itxa.

¹¹Eereka ninoa apokitaāka atoko, ikinika itiina itakanapana, Xesosikata sa itxana imiparīkatinirina iġapani.

Kiki Maere Matati

(Mateo 8.1-4; Marko 1.40-45)

¹²Āti ōti Xesosi auanāta āti sitatx-itiā. Iuaā auakasaaki, aua kiki maere matati. Atamatakasaakiri Xesosi, ikapotoreēkaua, iāka Xesosi apisatoō. Iteene amanaāri Xesosi:

—Apiananiri, pinirekiniāri, piposotari nota ereka pitxīkitakini —itxari.

¹³Ininiā Xesosi maātakari iua:

—Ari ninirekapitikari. Erekepekai —itxari.

Iuasaakipeka erekepeka itxa. ¹⁴Ininiā Xesosi paniātari:

—!Pisāpiretapiri apanakini ereka nitxīkitakinii. Pisa sasetotximoni. Poerekari piīto iuamoni, ininiākara itxai: “Ātāopitika erekepekai pite.” Eereka pisikari Teosomoni Moisesi paniātakiti iaōka. Ikara atoko pikaminiā, ikinimane imarotari pite atāo ereka pininiāua —itxa Xesosi.

¹⁵Xesosi paniātari iua apanakini imasāpiretakani, iuaritika Xesosi pirena apikomoni iaripireta. Ininiā kākītipokoni sari iuamoni isākire ikenakotinina iġapani, amianari imaktxakini iġapani. ¹⁶Ininiākara Xesosi itotapekari iuanoka isini kākīti mauakaniātaā Teosokata isākirauatini iġapani.

Matīpokotakati Pirena

(Mateo 9.1-8; Marko 2.1-12)

¹⁷Āti ōti Xesosi sāpirenauata. Iua takote pariseoakori, kaiōkatsoparerini apaka topākanāta. Ninoa Kariréia tōpakini, Xotéia tōpakini, Xerosareē sitatx-itikini pakini. Iuasaaki Xesosi sāpirenau-atakasaaki, Apiananiri sikaposotiiretari Xesosi amianatakani erekepeka itxīkitakini iġapani.

¹⁸Iuasaaki kikiakori apoka iuaā. Iminarina kiki matīpokotakatinoka inakari. Isirimata nopini iminarina. Inirekarina

aapokotxi āki ĩroinina, Xesosi apisatoō iua matĭpokotakati itakinina ĩkapani. ¹⁹Txamari !apakata ninoa ĩroini, kotxi kākĭtipokoni xāpoka. Ininiā ikanĭkana kanikoatxiā aapokotxi nopini. Imakatzakarina itano auakari kĭpatxi kai kamakori, eereka isikakaāpotarina iua matĭpokotakati isirimata nopini Xesosi manapi kākĭti sauaki. Xesosi apisatoō apoka. ²⁰Ininiā Xesosi imarotari ninoa auĭkiniri iua posotiire. Ininiā itxari matĭpokotakati:

—Namarite, pimaerekani makatzakapeēkaika.

²¹Iuasaaki pariseoakori, kaiōkat-soparerini pakini tsorikaānāta. Ākixinireēna ninoa:

—Teosonokara posotari amaerekani imakatzakini. Maerekati Xesosi kama Teosomoni —itxana.

²²Xesosi imarotari ninoa xinĭkakiti ākixinireēna, ininiā Xesosi txana:

—!Erekari hākixinireē ikara hĭxinĭkakiti. ²³Nitxari iua imaerekani nimakatzakini, txamari !himarotari imaerekani atāo nimakatzakini. “Pōkitikaua. Pitĭpokota,” nininiā, ininiā himarotari nisākire atāo ininiāua, kotxi hĭtikari. Niposotiire imaerekani nimakatzakini ĩkapani, niposotiire iua nōkitikini ĩkapanitxikana. ²⁴Ininiā uatxaika noerekai hĭte. Teoso iokanatano nota hĭtari iaxitĭkirino ĩkorapokoritimoni kākĭti maerekani nimakatzakini ĩkapani.

Ininiā ipaniātari matĭpokotakati:

—Pōkitikaua. Pisirimata pikoseka, sipe pitxa paapokomoni —itxari.

²⁵Iuasaakipeka ōkitikaua. Ikinimane kākĭti okiātaā ōkitikaua. Ikosekari isirimata, sipe itxa aapokomoni. Isikasaaki ipoxokoniua.

—Peerekari Teoso —itxaāpota iua.

²⁶Ikinimane kākĭti tsorikaāta. Ipiĭkarauatana.

—Peerekari Teoso. Mitxi !aĭtikari matĭpokotakati erekapeka txĭkitaākari. Peerekari uatxa aĭtikakiti —itxanātana ninoa.

Mateo Pirena

(Mateo 9.9-13; Marko 2.13-17)

²⁷Eereka Xesosi tĭpokoāponā-takasaaki, atamatari kiki Arevii inakori. Iitopākanāta iparĭkauatiniātaā. Iuaā apakapari txineiro Homanoakori auĭte paniātakiti kākĭti ātiātaā tiitxi anikini ĩkapani. Xesosi akiritari Arevii:

—Āpina, uatxa nimoianari pitxaua —itxari.

²⁸Iuasaakipeka Arevii ōkitikaua. Ikinika itii itakanapa, Xesosikata sa itxa, Xesosi imiparĭkatini ĩkapani. ²⁹Eereka Arevii kamari kiiniri aapokoā Xesosi ĩkapani. Kiinirisaaki aua ĩkamanere kaiāopokori. Txineiro apakapakani aua kiiniriā. Ninoa apanakinikata nipokota Xesosikata Arevii aapokoā. ³⁰Pariseoakori, ninoakata parĭkau-atakani, kaiōkatsoparerini pakini txitana Xesosi moianariakori, Xesosi txineiro apakapakanikata nipokotini xika. Ininiā ninoa txari:

—Kinirepa hĭte nipokota txineiro apakapakanikata, maerekati kamakanikata? —itxana.

³¹Xesosi apakapapiretana:

—Kākĭti mamianatakani !inirekari pinĭtxi siākarimoni isinina. Amianatakarinoka nirekari pinĭtxi siākarimoni isini. ³²Iua atokokana, nota ina ĩkorapokoriti kona kākĭti “Atāo inakarinoka kamakarino” ĩkapanini, kotxi ninoa uākatari atāo inakarinoka ikaminina, txamari !ikamarina atāo. Kākĭti maerekati kamakani ĩkapanira nina nota uai imaerekani itakanapini ĩkapani. Nota pinĭtxi siākari atoko inakarino nota —itxa Xesosi sākire iuasaaki.

Nipokori Takanapiko Teoso Misäkiretiko İkapani

(Mateo 9.14-17; Marko 2.18-22)

³³ Käkiti txari Xesosi:

—Xoão kapatxisareri moianariakori itokata takanapari inikinina Teoso imisäkiretinina İkapani. Iua atokotxikana itxa pariseoakori moianariakori. Txamari pite moianariakori !itakanapari nipokori, İarıä, Teoso imisäkiretinina İkapani. Kinirepa? —itxana käkiti.

³⁴ İniniä Xesosi apakapapiretana:

—Kiki İtaniriuatini pirenasaaki erekari atxiiti kemaİtxitakoni manikaniİarı nipokori? !Erekari. Ninoa poxokoniuata imoianari İtaniriuatini, ininiä inipokotapitikana. ³⁵ Txamari äti öti ninoa moianari maİkaäkako, oka inaäkako. Iusaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Äti öti nokaäkako. Iusaakiko ninoa takanapari inipokotini Teoso imisäkiretinina İkapani —itxa Xesosi.

³⁶ Eereka Xesosi säpiretari säpirenatxi, atäo inakari oerekiko.

—!Pikitsoräkitari mäkaxi amaneri, kitxakari pitäpanetini İkapani. Ikara atoko pikaminiä, mäkaxi amaneri pioanata. Mäkaxi mata amaneri İsapekata piotsainiä, mäkaxi kitxakari tsorakita iuaİkana. ³⁷ Käkiti kitakari ovaä sako aamata kamakori äki. Ovaä amanero auiniä, !otakaäka aamata kitxakari äki. Pitakiniäro aamata kitxakari äki, aamata tsorakita. Ovaä xikepoatamako. Sako !otxaika. ³⁸ Ovaä amanero pikitakako aamata amanero äki. ³⁹ Ovaä kitxakaro auiniä, käkiti !inirekaro amanero, kotxi: “Ovaä kitxakaro apiaerekata,” itxa.

Ikara atoko Xesosi txari käkitimoni. Ikara säkiretxiti Xesosi säpireta, kotxi

apanakini käkiti itotapekari Moisesini säkire, Teoso säkire kitxakapirİka isäpiretakiti, ininiä !inirekari Xesosi säkire amaneri inakari. Ninoa mäkaxi kitxakari atoko. Sako kitxakari atoko ninoa. Ovaä kitxakaro atoko ninoa. Xesosi säkire mäkaxi amaneri atoko. Ovaä amanero atoko itxa Xesosi säkire.

Tomatiko Öti Pirena

(Mateo 12.1-8; Marko 2.23-28)

6 Xoteoakori tomatini ötisaaki Xesosi imoianariakorikata motipetari kiko takari triko auiniätaä. İpiripetakasaakirina, imoianariakori makatkakaäpotari triko oki. Iuakoä ikotxokarona, ixöka itxarona otäta katxakini İkapani, okinoka nika itxana. ² Ätikaka pariseoakori itikana imaktxakinirona:

—Kinirepa triko hİkotxoka tomatiko ötisaaki? !Auritaäka tomatiko ötisaaki parİkauatiko —itxana.

³ İniniä Xesosi apakapapiretana:

—Himarotari Taviini kamakiti kitxakapirİka, iua imoianariakorikata natxitakasaaki. ⁴ Iua İroä Teoso misäkiretikoätaä. Iusaaki imaktxakari komiri Teosomoni sikakori. İnikari, sika itxari imoianariakorimoni. Ninoa nikari apaka. Sasetotxinokara auritaäka iua komiri inikinina. Apanakini !auritaäka inikiniri. Iuaritika iua Taviini nikari. ⁵ Nota hİtari iaxitikiri posotari ikinipoko ninireökiti nikamini tomatiko ötisaaki, kotxi Apiananiri nitxaua —Xesosi txana ninoa pariseoakori.

Motikauakotakari Pirena

(Mateo 12.9-14; Marko 3.1-6)

⁶ Äti tomatiko ötisaaki Xesosi İroä aiko äki Xoteoakori apotiitiniätaäua. Oerekarauata. Iusaaki iuaätaä aua kiki iuako ikikomoni motikauakotakari. ⁷ Kaiökatsoparerini, pariseoakori apaka aua iuaä. Atamatapikarina Xesosi, atauako erekapeka itxİkitakapaniri

motíkauakotakari tomatiko òtisaaki. Inirekarina Xesosi kerokiniri. Tomatiko òtisaaki iparíkauatiniã, ninoa apoítari iua. ⁸Xesosi imarotari ãkixinireëna ixinikakitina, ininiã ipaniãtari kiki motíkauakotakari:

—Pòkitikaua. Æpina ikinimane okiãtaã.

Ininiã iua kiki òkitikaua, sa itxa Xesosimoni. ⁹Ininiã Xesosi pimaãna kaiòkatsoparerini, pariseokori pakini:

—Natokopa itxa Moisesini paniãtakiti iòkatsopatakiti tomatiko òtisaaki atão akamini? Ipaniãtataua maerekati akamini tomatiko òtisaaki? Ipaniãtataua erekari akamini tomatiko òtisaaki? Inirekatari amoiantaniniri ãti imapinakani ìkapani tomatiko òtisaaki? Inirekatari aòkaniuatini tomatiko òtisaaki? —itxa Xesosi ninoamoni.

¹⁰!Kasãkirena ninoa kaiòkatsoparerini, pariseokori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹Pariseokori, kaiòkatsoparerini pakini omanãkarauata. Imisãkiretakauana Xesosi okinina ìkapani.

Xesosi Mereëna Tosi Imoianariakori

(*Mateo 10.1-4; Marko 3.13-19*)

¹² Æti òti Xesosi kanika oxiratarini nopini, Teoso imisãkiretini ìkapani. Ìkanõka ikaikota iuaãtaã Teosokata isãkirusatini ìkapani. ¹³Katimatiniãkata akiritana itomaneri imoianariakori iuamoni apokinina ìkapani. Apokasaakina, imereëna kikiakori tosi pakini kãkitimoni iokanatakini tikane.

¹⁴Imereëna

Simãoma, (Iuãka Petro apaka.)

Ætreema, (Simão itari)

Txiakoma,

Xoãoma,

Piripima,

Patoromeoma,

¹⁵Mateoma,

Tomeema,

Txiakoma, (Aopeo ãkiri)

Simãoma, (Homano omanatakari)

¹⁶Xotasima, (Txiako ãkiri, ãti Txiakoti)

Xotasi Isikariotxima (Xesosi mìkapiritakari tikane) pakinima.

Ninoa kikiakori tosi pakini Xesosi mereëkini imoianariakori ìkapani.

Xesosi Amianatakani Imakananitini

(*Mateo 4.23-25*)

¹⁷Eereka oxiratarini iokiriãpotana. Ipitexitimoni apokana. Iuaã aua kaiãopokori imoianariakori. Apanakini kãkiti iuaãtaã aua apaka. Xotëia tõpa ìkani, Xerosareë sitatxiti ìkani pakini auari iuaã. Apaka auari Txiro sitatxiti ìkani, Sitoõ sitatxiti ìkani apaka. Txiro, Sitoõ pakini potxoari uiniti ìtinikata aua. ¹⁸Ninoa kãkitipokoni sari Xesosimoni isãkire ikenakotinina ìkapani, amianarena imakatzakini ìkapani. Ninoa maerekati matamatakoti auãitotakini sari Xesosimoni maerekati imakatzakini ìkapani. ¹⁹Ikinimane nirekari imaãtakiniri Xesosi, kotxi imaãtakiniaarina, apakapari Xesosi tapara amianarena sini ìkapani. Ininiã ikinimane amianatakani Xesosi maãtakakani iuaikana erekape itxana.

Kirimonipa Teoso Sikatari Erekari?

(*Mateo 5.1-12*)

²⁰Eereka Xesosi misãkiretana imoianariakori:

—Hite matxineiroteni Teoso sikai erekari. Teoso hãuãte itxaua. Iua naki-tiakori hãtxaua.

²¹—Hite ìkorapokoriti natx-itakani Teoso sikai erekari. Himittouatapanikako.

—Hite ìkorapokoriti txiapatakani Teoso sikai erekari. Hãpiapoxokonitapanikako. Hisiroatapanikako.

²²—Apanakini omanatiniāi hīte, hī-tari iaxitikiri sākire hāuikini xika, Teoso sikai erekari. Atxiīti apanakini !nirekai. Atxiīti apanakini misākirepiretai. Atxiīti ninoa akiritai “maerekati kamakari” nota hītari iaxitikiri sākire hāuikini xika. Ikara atoko hinaākako.

²³—Ninoa misiriāpotakasaakii, hīpoxokoniuatako. Himīteenekariko hīpoxokoniritika, kotxi erekari Teoso nīkatini iaxiti itixine. Inīkatakiti hīte ikapani peerekari. Apanakini misiritini atokokanera, ninoa atokiriakorini misiritari Teoso sākire sāpiretakani kītxakapirīka.

²⁴—Hīte ikorapokoriti katxineiro-terini misiritaākako. Mītxi papoxokonii hīte. Uatxa hīpoxokoni !auaika.

²⁵—Hīte ikorapokoriti ikiniōtika mitouanātakanii misiritaākako. Hinatxitapanikako.

—Hīte ikorapokoriti siroatakanii misiritaākako. Himatinaniuatapanikako. Hītxiapatapanikako.

²⁶—Ikinimane: “Peerekai pite,” ininiā, himisiritaākako, kotxi ninoa nirimane kītxakapirīkarini sāpiretari ikara atoko inakari Teoso sākire atāo masāpiretanimoni —itxa Xesosi.

Kākiti Mokaiakari Tiretiko

(Mateo 5.38-48)

²⁷ Iuaīkana Xesosi sāpirenauata:

—Nōtākikai hīte nisākire kenako-takanii. Hītiretanako himokaiakari. Erekari hīkaminana hīte omanatakani. ²⁸ Himisākiretariko Teoso erekari hīte misākirepiretakani isikini ikapani. Himisākiretariko Teoso hīte misiritakani ikapani. ²⁹ Kākiti aritiniāi pikakota, ipinimoni pikakota iuaīkana pisikana. Kākiti anikiniāri pimāka ōtanominari, pauiritari iua pimāka kauanata apaka anikini. ³⁰ Pitii amanaākarimoni pisika inirekakiti. Kākiti anikiniāri pitii, !pamanaāpiri

iuaīkana imikanapiriiniri. ³¹ Āti tiretinii pinirekini atokotxikana, pitiretari āti.

³²—Pite tiretakaninani pitiretiniā, kinirepa Teoso sikari erekari pitemoni, pinirimanenokara pitiretakasaaki? Kotxi kākiti maerekati kamakani apaka tiretari ninoa tiretakani. ³³ Pimoianatiniāna pite moianatakakaninani, !apakata, kotxi iua atokotxikana maerekati kamakari moianatana iua moianatakakaninani.

³⁴ Pisikiniāro pitxineirote, pitxineirote mikanapiriākarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni āti ōti iuaīkana imikanapiriiniro ikapani.

³⁵ Iua atokokana na pitxape. Pitiretariko pimokaiakari. Erekari pikaminariko. Inirekiniāri pitii iparīkauatini ikapani, pisika iuamoni. !Pimaākapeua, pitii iuaīkana imasikakaniāi. Iua atokokana hīkaminā, Teoso sikai hīte iteene erekari. Iua atokokana hīkaminā, Apiananiri iaxitikiri anaakori hītixauako, kotxi iua amonīkari kākiti maerekati kamakani. Ninoa !isāpiretari Teoso iua ereka inini, iuaritika Teoso amonīkana. ³⁶ Piamonīkariko āti, aīri Teoso amonīkarauatini atokokana —itxa Xesosi.

Apoiretxi Pirena

(Mateo 7.1-5)

³⁷—!Papoītapiri āti. Papoītiniāri āti, ininiā pite apaka apoītaākako. !Pisāpiretapiri āti ikamakiti maerekati inini, ininiākara Teoso !isāpiretai pite pikamakiti maerekati inini. !Pixinikapinikari maerekati āti kamakiti pitemoni, ininiā Teoso !lixinikaikari maerekati pite kamakiti. ³⁸ Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka

iuai kana atarokiri inopini takaāka. Xāpoākata, ininiā katxapoāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹Xesosi sāpiretari ia sāpirenatxi atāo inakari oerekiko:

—Apakata āti mōsiāreti anikiniri āti mōsiāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniri āti. Hōerekiniri āti, hīkerokari. Ninoa mōsiāreni aariko āki irikakani atoko hītxa. ⁴⁰Apaiāōkarauatakari !imarotari koerekareri imarotakiti atoko. Poiāonoka imarota. Apaiāōkarauatini ixipokasaaki, iusaaki koerekareri imarotakiti atoko imarotape.

⁴¹—Pisāpiretari āti: “AāSORO aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴²Kinirepa pitxari pitari? “Nitari, nota makatxakinii aāSORO pokiā auakari,” kotxi !piposotari patamatiniri aātxirata piteka pokiā auakari. Pisākire atxiīti erekari, txamari pikamakiti kona erekari. Merepiti-panika pimakatxakari aātxirata piteka pokiā auakari. Eereka piposotari patamatiniri aāSORO pitari okiā auakari pimakatxakini. Maerekati pite kamakiti apiata atxiīti iua aātxirata atoko. Maerekati āti kamakiti poiāoka atxiīti iua aāSORO atoko. Iuaritika !pimaākatari maerekati piteka kamakiti. Pōtākikari āti imaerekani itakanapini. Ikara atoko !apakata. Merepiti-panika pite takanapariko pite maerekani, eereka pōtākikari āti imaerekani itakanapini —itxa Xesosi sākire.

Amātiiri Pirena

(Mateo 7.15-20; 12.33-35)

⁴³—Amātiiri erekari kona iritari matximakoti. Amātiiri matximakoti kona iritari erekari. ⁴⁴Patamatiniri amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵Kākiti erekari amātiiri erekari atokokana itxa. Iua erekari, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati, ininiā ikamakiti maerekati apaka, kotxi maerekatinoka auari iua ākixinireē. Iua ākixinire ereka, ininiā isākire ereka apaka. Iua ākixinire maerekati, ininiā isākire maerekati apaka, kotxi isākire potorika ākixinireē —itxa Xesosi sākire.

Aapokotxi Kamakari

(Mateo 7.24-27)

⁴⁶Xesosi sākirauatapanika:
—Kinirepa pakiritano nota “Apiananiri,” nipaniātakiti pimakanakanisaaki? ⁴⁷Kākiti notamoni ikari, nisākire kenakotakari, nisākire kīpitakari, aapokotxi kamakari atoko itxa. ⁴⁸Iua kamari aapokotxi. Ikisakari kīpatxi. Otsomori aapoko tsota ikama. Iua apokari kai, ininiā iopitīkari aapoko tsota iua kai nopini. Ininiā aapokotxi ikamakiti paikori. Āparaā apoātakasaaki, itorōkani inokasaakiri iua aapoko, !iakeka, kotxi iua kiki atāo ikamari aapoko. Iua kiki atoko kākiti nisākire kīpitakari.

⁴⁹—Āti kiki aapokotxi kamakari, iua iopitīkari aapoko tsota motsomotika popaiape ininiātaā. Āparaā apoātakasaaki, itorōkani inokasaakiri iua aapoko pakitika. Xipoka itxa. Iua kiki atoko kākiti nisākire kenakotakari, nisākire mauiākati —itxa Xesosi.

Xesosi Makaanitini Sotato Auíte Nitiri

(Mateo 8.5-13)

7 Ikara sákiretxiti isápiretaka atoko, Kapanaoõ sitatxitimoni isa Xesosi. Iuaátaã apoka. ²Kapanaoõ auari kiki áti uáka Homano inakori. Sotatoakori auíte itxaua iua Homano. Ipaniátana sotatoakori seí pakini inireékiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³Iua Homano kenakopiretari Xesosi. Ininiã ipaniátari Xoteoakori kiomãtxiakori Xesosimoni isinina.

—Hítxariko: “Homano nirekai iuamoni pisini, initiri pimakananitini íkapani.”

⁴Ininiã ninoa sa itxana Xesosimoni, aókita itxarina.

—Masa sotatoakori auítemoni. Initiri amianata. Masa, pimakananitini íkapani. Iua Homano erekari itxaua, ininiã erekapitikari pimoianatiniri iua.

⁵Itiretari Xoteoakori. Aiko aápotiitiniã-taãua ikaminaua ate, ininiã iua Homano erekari itxaua —itxana ninoa.

⁶Ininiã Xesosi sari ninoakata. Iua Homano aapoko takote apokasaaki, iua Homano iokanitari imoianariakori Xesosimoni, isápiretinirina íkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniã naapoko áki !apakata. ⁷Nota pitemoni napokini !apakata, kotxi pite Apiananiri, nota poiãori. Ininiãkara ereẽ piotoka. Ereẽkarako pitxíkitakariko ninitiri ereka inini. ⁸Nota auíte paniãtiniãno nota ipaniãtakiti nikamini íkapani, ininiã nikamapitikariko. Nota auítetxi nitxaua apaka. Nota paniãtakiti sotatoakori kamapitika. Áti nipaniãta: “Pisa,” ininiã iua sa. Áti nipaniãta: “Uai pina,” ininiã iua ina. Ninitiri nipaniãta:

“Ia pikama,” ininiã iua kamari. Ininiã nimarotari ereẽ pite paniãtiniãri ninitiri ereka inini, ereẽkarako erekapeka pitxíkitakari ninitiri —itxa Homano sákire Xesosimoni.

⁹Iua Homano sákire ikenakotakasaaki, Xesosi tsoríkaãta. Isapotorika, misákireta itxana kákiti iuakata sikani.

—Iua Homano iteene auikari nisákire. Peerekari. Mitxi !naókítari nisákire auíakari iua Homano atoko inakari. Na naókítapanikari Xoteo iua Homano atoko inakari —itxa.

¹⁰Eereka ninoa Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekepeka itxa.

Xesosi Txíkitakari Ipíkari Iuaíkana Auáki Inini

¹¹Mapaõti napaãka atoko Xesosi sari Naií sitatxitimoni. Imoianariakori, kákitipokoni apaka sari iuakata.

¹²Iimatokoãpotakasaakiri sitatxi pirikere tore kákiti íronakikoãtaã, ipíkari impokíkaãka sitatxi mapara. Sito imatonókari oimi ipípe. Oa sito tikinitakoro. Kaiãopokori kákiti sitatxi auakani pokíka oakata sikani.

¹³Apiananiri atamatakasaakiro, iamoniãkaro oa, ininiã:

—!Pitxiapatape —itxaro.

¹⁴Isa ipíkarimoni. Imaãtakari ipíkari auini kaixati, ininiã iua kaixa anikakani iotoka. Iuusaaki iua akiritari:

—Átokori, nipaniãtai pókítikaua —itxa Xesosi.

¹⁵Iuusaakipeka iua átokori topãka, sákirauata itxa. Ininiã Xesosi sikari iua inoromoni.

¹⁶Ikinimane píkarauata.

—Peerekari Teoso. Teoso iokanitari isákire sápiretakari apiatakari atemoni. Teoso apokapeka íkorapokoriti ate

inakitiakori imoianatini ikapani
—itxanātana ninoa.

¹⁷ Ia Xesosi pirena iaripireta ikini tō-
pati Xotéia tōpa. Apaka apikoxiti Xesosi
pirena kenakopiretaāka.

Xoão Kapatxisareri Pimaākiti Sākirextiti

(Mateo 11.2-19)

¹⁸ Xoão kapatxisareri moianariakori
minapiretari Xesosi pirena Xoōmoni.
Eereka Xoão akiritari imoianariakori ipi:

¹⁹ —Hisa Xesosimoni. Hipimaāri:
“Teoso mereēkitikai pite? Kākiti
iātapanātakitikai pite? Kākiti
iātapanātakiti ātikani atxiīti?” Ikara
atoko hītxako Xesosimoni —Xoão txana
ninoa.

²⁰ Ininiā ninoa ipi sari Xesosimoni.
Iuamoni apoka itxana.

—Xoão kapatxisareri iokanataua ate
pitemoni. Ipimaāi: “Teoso mereēkitikai
pite? Kākiti iātapanātakitikai pite? Kāk-
iti iātapanātakiti ātikani atxiīti?” itxai —
itxana.

²¹ Iuasaaki ninoa Xesosimoni
apokasaaki, amianatakani kaiāopoko
erekapeka itxīkitaka Xesosi. Iua
omitikari maerekani matamatakoni
kākiti itotaā auakani. Mōsiāreni
kōsiārepeka itxīkitaka. ²² Ininiā Xesosi
apakapapiretana Xoão moianariakori:

—Hīkanapiriā Xoōmoni.
Hīsāpiretari mixikanani uai hītikakiti,
hīkenakotakiti pakini. Hīsāpiretari
mitxi mōsiāreni uatxa kōsiārepeka
nitxīkitakapeka. Hīsāpiretari mitxi
matīpokotakani tīpokotapeka uatxa.
Mitxi maere matati erekapeka
uatxa. Mitxi makenakokini uatxa
kakenakokipeka. Mitxi ipikani uaiākana
auāki itxapekana. Hīsāpiretari Xoão,
nota sāpiretari Teoso iokanapirena
erekari minakati mauakinimoni.
²³ Kākiti iteene auikiniāri nota sākire,

Teoso takari erekari iuamoni. Ikara
nisākire hīsāpiretari Xoão —itxa Xesosi.

Xoão Kapatxisareri Pirena

²⁴ Ininiā ninoa Xoão moianariakori
sipe. Eereka Xesosi sāpiretari Xoão
pirena kākiti iuamoni apotiitakanua.

—Kipa ikai hīte Xoão kapatxisareri-
moni hīsikasaaki āparaā makipakaniā-
taā iua auakasaaki? Hīte sari iuamoni,
kotxi isākire ātinoka, Teoso sākirenoka.
Kākiti katsotati itima anikakiti atoko
itxa. Isākire kita āti, isākire uatxa
ātiāo, isākire katana uaiākana ātiāo, itx-
aāpota isākire. Ikara atoko !itxa Xoão.

²⁵ Kipa ikai hīte Xoōmoni hīsikasaaki?
Hīte sari iuamoni, kotxi !inirekari ti-
itxi, txineiro pakini. !Kakaroneri imāka,
kotxi !ikaikota auītetxi aapoko. Auītetxi
auiniātaā kākiti māka peereri. ²⁶ Kipa
ikai hīte iuamoni hīsikasaaki? Hīte
sari iuamoni, kotxi iua Teoso sākire
sāpiretakari itxaua. Atāo inakari Teoso
sākire sāpiretakari itxaua. Apiata iua
Xoão. ²⁷ Apiata iua, kotxi kitxakapiriā
Teoso sākire iōkatsopatakori sāpire-
tapekari Xoão pirena:

Ia kiki nisākire sāpiretakari. Niokanatari
iua kākitimoni, pite nimereēkiti sini
apisa, papokini isāpiretini ikapani,
kākiti iposope inini ikapani,
itxa Teoso sākire iōkatsopatakori.

²⁸ Iuaiākana Xesosi txana kākiti:

—Atāo nisāpiretai, āti Xoão atoko in-
akari !uari. Xoão apiata. Iuaritika kāk-
iti Teoso auītetakari poiāori inakari apia
imarotariko Teoso kamakiti tīkane —
itxa Xesosi.

²⁹ Ikinimane kākiti, txineiro apaka-
pakani apaka kenakotakasaakiri Xesosi
sākire, imarotarina Teoso nireēkiti kāk-
iti kamini ikapani atāo inini, kotxi ninoa
sari Xoōmoni ipatxisatikona ikapani.
³⁰ Txamari pariseoakori, Teoso paniā-
takiti oerekakani pakini !inirekari Xoão

patxisatinina ninoa, ininiākara Teoso nireēkiti iaōka !inirekana ikaminina.

Kākiti Īkorasaaki Auakani

³¹ Xesosi sāpirenauatapanika:

—Kiātokopa itxana kākiti ĩkorasaaki auakani? ³² Amarini sarauatini atoko itxana ĩkorasaaki auakani. Ninoa amarini topākanāta tiitxi amotikoātaā. Ipixini amarini tsoanāta. Itxana apanakinimoni: “Ate xikarauata hīte serenini ĩkapani, txamari !hīserena. Kākiti ipíkasaaki xikariti axikareta, txamari !hītxiapata.” Ninoa amarini sarauatini atoko itxana ĩkorasaaki auakani, ³³ kotxi Xoāo kapatxisareri apoka ĩkorapokoriti. Itakanapari inikini Teoso imisākiretini ĩkapani. !Ītari ovaā. Iuaritika hīte txari: “Maerekati matamatakoti auāitotari Xoāo,” hīttxari. ³⁴ Nota hītari iaxitikiri apoka ĩkorapokoriti. !Nitakanapari ninikini. Ikiniōtika ninipokota. Niātari ovaā. Ininiā hīte txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākirepiretano.

³⁵ Paimatireri Teoso. Iua nakitiakori imarotari isākire atāo ininiua —itxa Xesosi.

Sito Arokari Xesosi Kiti Oātsaā

³⁶ Āti ōti pariseo Simāo inakori aiataru Xesosi inipokotini iuakata, ininiā Xesosi sari iua aapoko. Iuaā apoka atoko iitopāka inipokotini ĩkapani. ³⁷ Simāo auini sitatxiti oāua sito kanokarero. Oa kenakopiretari Xesosi iua pariseo aapoko inipokotini, ininiā oa anikaro kamariāro iuamoni. Kopitipaki kai arapástiro kamakori āki oāua kamariāro. Xāpoka. ³⁸ Otima Xesosi kiti takote. Otxiapanāta. Oātsaā oārokari ikiti. Okaxipokari oiākoā. Ikiti oāpitxoka. Eereka okitakari kamariāro ikiti nopini.

³⁹ Iua Simāo atamatakasaakiro Xesosi kiti oārokini, ākixinireē ixinikari:

—Xesosi atāo Teoso sākire sāpiretakari inaākamako, imarotamaroko oa sito iua maātakakaro. Imarotamaroko maerekati kamakaro oa —itxa ākixinireē.

⁴⁰ Ininiā Xesosi:

—Simāo, ninirekari nimisākiretinii —itxa.

—Ei, koerekareri, pisākirauata —itxa Simāo.

⁴¹ Ininiā Xesosi:

—Ipi kiki apakapari txineiro sikakari txineirote. Imikanapiriāpanikaroko txineiro isikakito. Āti apakapari isikakito txineiro kaiāopokoro, kiētosi txineirota. Ātipekana apakapari isikakito poiāonoka, sikoēta txineirota. ⁴² Ninoa ipi liposotaikarina iuaīkana txineiro isikininirina txineiro sikakarimoni, kotxi !oāuaika. Iuaritika iua xipokari ninoa kōtane. !Inirekaikaro itxineirote. Ininiākara ĩkiripa ninoa kiki ipi apia apokaerekatari iua txineiro sikakari? —Xesosi pimaāri Simāo.

⁴³ Ininiā Simāo:

—Niuākatari kiētosi txineirota apakapakari. Iua apia apokaerekatari txineiro sikakari, kotxi iua apakaparo kaiāopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi sapotorika sitomoni. Itxari Simāomoni:

—Patamatataro oia sito? Niūroā pite aapoko, txamari kona pite sikano āparaā nikiti narokini ĩkapani. Oia arokapekari nikiti oātsaā. Oiākoā okaxipokari. ⁴⁵ Uai napokasaaki kona pite apitxokano. Oia !iotoka nikiti oāpitxokini. ⁴⁶ Pite na takari iitxi nikiiā. Oia kitakari kamariāro nikitiā. ⁴⁷ Oia iteene turetano, ininiā aimarotari omaerekani kaiāopokori makatxakaākapeka. Kākiti poiāonoka turetakaasaakino, aimarotari imaerekani

poião inakari makatxakaãkapeka —itxa Xesosi.

⁴⁸ Iuasaaki Xesosi sãpiretaro:

—Nimakatxakapekari pimaerekani — itxaro oa sito.

⁴⁹ Xesosikata nipokonãtakani ãkixinireëna ixinikanãtarina:

—Kiripitipa ia kiki atxiĩti? Iua makatxakatarĩ kãkiti maerekani? —itxanãtana ninoa.

⁵⁰ Iuasaaki Xesosi txaro oa sito:

—Atão pauikari nisãkire, ininiãkara pimaerekani makatxakaãkapeka. Pisipiniikaua erekaxinirepeka pinini —itxaro oa.

Sitoãkini Xesosi Moianatakani

8 Mapaõti napaãka atoko Xesosi sari ãti sitatxitimoni, ininiã eereka ãti sitatxitimoni isa, itxaãpota. Isãpiretari erekari pirena Teoso auĩtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txĩkitakana ninoa sito. Mitxipe ãtikaka amianata. Mitxipe maerekati matamatakoti auãtotana ãtikaka. Maria Matarena inakoro sari iuakata. Mitxipe Xesosi omitekana maerekani matamatakoni setxi pakini oĩtoã auakani. ³ Xoana inakoro, Kosa inakori tanoro, oa apaka sari Xesosikata. Kosa parĩkauata auĩtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina ikapani.

Katakareri Pirena

(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaĩkana ãti sitatxitikini, iuaĩkana ãti sitatxitikini txaãpota apokinina Xesosimoni. Kãkitipokoni apotiitakasaakiaua

Xesosikata, Xesosi sãpiretana ninoa sãpirenatxi atão inakari oerekiko.

⁵—Kiki sari ikikiote itakarauatini ikapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipirikĩ nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masikaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneẽ takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneẽ otxa. Eereka ominaua kaiãopokori. Triko katiã seĩ oki aua.

Xesosi sãkirauata iuaĩkana:

—Kakenakokii, ininiã hĩkenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena

(Mateo 13.10-23; Marko 4.10-20)

⁹ Xesosi moianariakori pimaãri iua:

—Poerekaua ikara sãpirenatxi atão inakari oerekiko pisãpiretakiti. !Aimartari mixikanani pisãpiretakiti.

¹⁰ Ininiã Xesosi:

—Nisãpiretapitikaiko hĩte Teoso auĩtetxi ininiãua, ininiã hĩte imarotari. Apanakini !imarotari hĩte imarotakiti Teoso auĩtetxi ininiãua. Ninoa apanakinimoni nisãpiretari sãpirenatxi atão inakari oerekiko. Ninoa kenakotari, txamari !imarotarina nisãpiretakiti sãkiretxiti, kotxi kitxakapirĩka Teoso sãkire sãpiretakani sãpiretari:

Kokiri kãkiti, txamari !amatatari Teoso kamakiti. Karokokenakokiri kãkiti, txamari likenakotari Teoso sãkire.

¹¹—Noerekai hĩte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹²Apanakini kākiti kimapori atoko itxa. Ninoa kenakotari Teoso sākire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sākire ākixinireēna apokakari, ininiā ninoa !auikaikari Teoso sākire, ininiā Teoso !imaktxakari ninoa maerekani.

¹³—Apanakini kākiti kai auiniātaā atoko itxa. Ninoa kenakotari Teoso sākire, ininiā ipotxitarina. Txamari oki kpatxi poiōa nopini apokini atoko, Teoso sākire !īroā ninoa ākixinireē. Mapa kasiriti ninoa auikari Teoso sākire atxiīti. Eereka imisiritaākana Teoso sākire auikinina xika, ininiā itakanaparina Teoso sākire.

¹⁴—Apanakini kākiti inako auiniātaā atoko itxa. Ninoa kenakotari Teoso sākire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiā !ixinikaikarina Teoso. Oki inako sauaki pitxakakaro !ominaua. Iua atokokana, ninoa kākiti !ikamari erekari Teoso ikapani.

¹⁵—Apanakini kākiti kpatxi erekari atoko itxa. Ninoa kenakotari Teoso sākire. Teoso sākire īroā ninoa ākixinireē ikaikotini ikapani. Erekari ninoa ākixinire. Ninoa nirekari Teoso paniātakiti ikaminina ikiniōtika. Eereka ninoa kamapitikari erekari Teoso ikapani.

Tirikapi Pirena

(Marko 4.21-25)

¹⁶—Tirikapi iopotokaākari iomaātatarī tirikapi kopiti āki atxiīti? Isikatatxi patapi itakatari atxiīti? Konapitini. Itano itakari tirikapi, ininiā iopinikari aapokotxi āki īroākani atamarauatini ikapani. ¹⁷Ikinika iomaātakori atamataākako. Ikinika

ipatakori apokaākako, iopinikaremoni anikaākako.

¹⁸—Erepaniko. Iteene pikenakotariko Teoso sākire, kotxi isākire auakiti, Teoso sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari maktxakaākako —itxa Xesosi.

Xesosi Inoro, Itariakori Pakini

(Mateo 12.46; Marko 3.31-35)

¹⁹Xesosi sāpirenauanātakasaaki, inoro, itariakori pakini apoka iuaātaā. Inirekamarina Xesosimoni apokinina, txamari kākutipokoni ākitari iua. ²⁰Iuasaaki kākiti txari Xesosi:

—Pinoro, pitariakori porikiti auanāta. Inirekarina imisākiretinii —itxana.

²¹Ininiā Xesosi sāpiretari ikinimane: —Teoso sākire kenakotakani, isākire kīpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri Ītima

(Mateo 8.23-27; Marko 4.35-41)

²²Āti ōti Xesosi iereētaua kanaua āki imoianariakorikata. Aiatana:

—Masa ipoa ipiniā —itxana imoianariakori.

Ininiā ĩpiriātana. ²³Īpiriātakasaakina, Xesosi imaka. Mokatanitika ĩtima inataparata. Kataparari ĩtima apokasaaki, tsakati kataparari apaka, ininiā ierepeēpokataua. Iuasaaki kanaua āki āparaā xāpokaāpokata. Pamonōkoniri. ²⁴Xesosi moianariakori ōpirikari.

—Apiananiri, Apiananiri, pimereka. Apinanapanoka.

Ininiā Xesosi ōkitikaua. ĩpaniātari ĩtima, tsakati pakini iotokini:

—Hīotokako —itxa.

Iuasaakipeka ĩtima, tsakati pakini iotoka. Itsoriākaāta. ²⁵Iuasaaki Xesosi txari imoianariakori:

—Kinirepa hīte !auikano nota?

Itsorīkaākatana, ipikarauakatana. Ni-noakakarika isākirauatana:

—Kinakaripa ia kiki? Iua paniātari itima, tsakati pakini iotokini, ininiā ninoa kīpitari isākire —itxakakana.

Kiki Maerekani

Matamatakoni Auaītotakiti

(*Mateo 8.28-34; Marko 5.1-20*)

²⁶ Eereka ipoa ipiniā apokana Xesosi imoianariakorikata. Ninoa potorikiniātaā Kariréia tōpa. Ninoa apokiniātaā Xerasa tōpa. ²⁷ Xesosi kanīkīitakasaaki, kiki apoka iuamoni. Xerasa sitatxitikiri iua. Maerekani matamatakoni auaītotari iua. Okananipe !itakaikari imāka. !Inirekari aapoko āki ikaikotini. Akauariā auanāta. ²⁸ Atamatakasaakiri Xesosi, akiripoakata. Iriākata Xesosi apisatoō. Maerekati matamatakoti akiritari Xesosi:

—Xesosi, Teoso ākiri, Apiananiri ākiri, kiatokopa pitxanoko? Namanaāi !pimisiritapeno —itxa.

²⁹ Ikara atoko itxa isākire, kotxi Xesosi paniātana maerekani matamatakoni takanapiniri iua kiki. Mitxi inirimane iitxikapiimari iito imasikani ikapani. Iitxikarina iuako, ikiti kohētxiā. Txamari maerekati matamatakoti itotapekari imaīkiniri, ininiā iua kiki kapatakari kohētxi. Maerekati matamatakoti txīkitakari iua kiki mitekini kākiti mauakaniātaā.

³⁰ Xesosi aōkitakasaakiri iua kiki, ipimaāri:

—Kipa piuāka?

Ininiā maerekati matamatakoti txari:

—Nota uāka “Itori,” ninaāka —itxa.

Ikara atoko iuāka, kotxi itori maerekani matamatakoni auaītotari iua kiki. ³¹ Maerekati matamatakoti amanaāri Xesosi:

—Aariko mamapotōkire irikotimoni !piokanatapeua ate —itxa.

³² Iuaātaā auari kaiāopokori irariakori piratakoni. Inipokonātana oxiratarari nopini. Maerekati matamatakoni amanaāri Xesosi:

—Pauiritaua irariakori āki aīroini —itxana.

Ininiā Xesosi auiritana. ³³ Ininiā ninoa takanapari iua kiki. Irariakori ito āki iroāna. Iuasaakipeka ikinika irari miteēkata. Iokiriīkatana oxiratarari. Kāuaāriāmoni ikomoākatana, ipīpe itxana irariakori.

³⁴ Kikiakori irari piratakani itikari irari mitekini, ininiā imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka. ³⁵ Ininiākara kākiti sari Xesosimoni ikamakiti imarotinina ikapani. Ninoa apoka iuamoni. Atamatarina iua kiki mitxi maerekani matamatakoni auaītotakiti. Iitopākanāta Xesosi apisatoō. Kamākapekari. Kiikitepekari apaka. Ininiā iuasaaki ninoa kākiti pīkari Xesosi posotiire. ³⁶ Xesosi kamakiti itikakani sāpiretari ninoa kākiti, Xesosi erekapeka itxīkitakiniri iua kiki. ³⁷ Eereka ikinimane kākiti Xerasa tōpa auakani paniātari Xesosi ātiātaā isini ipīkarena xika. Ininiā Xesosi iereētaua kanaua āki ipoa iuaīkana ipiriātini ikapani. ³⁸ Iua kiki mitxi maerekani matamatakoni auaītotakiti amanaāri Xesosi:

—Pauiritano pitekata nisini.

Txamari Xesosi iokanatarari aapokomoni.

³⁹ —Pikanapiriā paapokomoni. Pisāpiretari kākiti Teoso kamakiti pitemoni —itxa Xesosi.

Ininiā iua sari ikini aapokotxitimoni. Isāpiretari ikinimane kākiti Xesosi kaminiri iua erekapeka inini.

Xáiro Amanaákiti Pirena

(Mateo 9.18-19; Marko 5.25-34)

⁴⁰ Xesosi kanapiripe, ipoa ĩpiriātini. Apokitakasaaki, kákitipokoni apakapari Xesosi ipoxokoniritikana. Ninoa iāta-panātari iua, ipiniā iua auakasaaki. ⁴¹ Iuasaaki kiki Xáiro inakori apoka iuaā. Iua auitexi itxaua aiko Xoteo apotiitiniātaāua. Apoka Xesosimoni. Ikapotoreēkaua Xesosi apisatoō.

—Masa naapoko. ⁴² Nota ākero imatonōkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kákitipokoni ákitari iua, ininiā ikaiarikaāpotana kákiti.

Xesosi Māka Maātakakaro

(Mateo 9.20-22; Marko 5.25-34)

⁴³ Kákiti sauaki oāua sito amianatakaro. Tosi ano oamianata oārēka liotokinaro. Otxineirote !auaika, kotxi okinika otxineiroteē oikitxitapekari pinĩtxi siákani, txamari erekapeka otxikitakakiri !auari. ⁴⁴ Kákiti sauaki oāpoka Xesosi porikimoni. Omaātakari imāka mapotomatare. Omaātakasaakipeka, oārēka iotoka.

⁴⁵ Ininiā Xesosi pimaāri kákiti:

—Kipa maātakano?

Ikinimane kákiti:

—!Ateni —itxana.

Ininiā Petro:

—Apiananiri, kákitipokoni ákitai. Ikinimane kákiti tikakai.

⁴⁶ Txamari Xesosi:

—Kákiti maātakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maātakiniri. Ininiā osa Xesosimoni otitinanakiniritika. Okapotoreēkaua iua apisatoō. Ikinimane okiātaā osāpiretari Xesosi:

—Notara maātakai namianatiniā. Nimaātakasaakii, iuasaakipeka erekapekano —otxari.

⁴⁸ Ininiā Xesosi:

—Namarite, pauikari niposotiire, ininiākara erekapekai. Pisipiniikaua erekaxinirepeka pinini —itxaro.

Xáiro Ākero Ōkitikiko

(Mateo 9.23-26; Marko 5.35-43)

⁴⁹ Xesosi sákiruanātakasaaki, Xáiro aapoko potoriākari apoka Xáiromoni.

—Pamarite !oāuaika. Pauiritari Xesosi kanapiriini —itxa.

⁵⁰ Xesosi kenakotari iminapiretakiti, ininiā Xesosi txari:

—!Pipikarauatape. Pauikari nisákiire, ininiā iuaikana oāuapanikako pamarite —Xesosi txari Xáiro.

⁵¹ Xesosi apokasaaki Xáiro aapoko, auiritana Petro, Xoāo, Txiako, Xáiro, Xáiro ĩtanoro pakini ĩroini iuakata.

⁵² Iuaātaā ikinimane kákiti txiapanāta. Imatinaniuatana amarini ipinini xika. Ininiā Xesosi:

—!Hitxiapatape. !Opina. Oimakanāta —itxa.

⁵³ Ininiā ninoa napetari Xesosi, kotxi imarotarina amarini ipinini. ⁵⁴ Ininiā Xesosi paniātana ninoa porikiti ipokikinina. Eereka Xesosi maikaro oa átokoro uako, akirita itxaro:

—Átokoro, pōkitikaua.

⁵⁵ Iuasaakipeka iuaikana oa auákipeka otxa. Oōkitikaua. Xesosi paniātana oĩri, onoro pakini nipokori isikinirona. ⁵⁶ Oĩri, onoro pakini tsorikaāta. Xesosi sāpiretana apanakini imasāpiretakanina ĩkapani.

Xesosi Iokanatana

Imoianariakori Kákitimoni

(Mateo 10.5-15; Marko 6.6-13)

9 Xesosi akiritana imoianariakori tosi apotiitiniuana ĩkapani. Iuasaaki isikataparatana. Isikaposotiiretana

maerekani matamatakoni iokanatinina ikapani, amianari imakatzakinina ikapani. ²Eereka iokanataka imoianariakori kākītimoni Teoso auītēxi ininiāua isāpiretinina ikapani, amianatakani erekepeka itxīkitakinina ikapani. ³Xesosi txana ninoa:

—Hīsikasaaki, !hanikapiri hīti. Na hītsonere !hanikape. Na sakora, na nipokori, na txineiro, na āti himāka, !hanikape. ⁴Kākīti apakapakasaakii, iuaā ninoa aapoko hīkaikota iua sitatxiti hāuakasaaki. ⁵Kākīti mapakapaniāi, hītakanapari iua sitatxiti. Hōsipikasaakiri, hīkaxipokariko kipatxi hīkītiākiri. Ikara oerekana iua sitatxiti auakani Teoso misiritanako ninoa, kotxi !nirekarina ikenakotinirina Teoso sākire —itxa Xesosi imoianariakorimoni.

⁶Eereka imoianariakori potorika. Ninoa sari ikinipoko aapokotxiti. Isāpiretarina Teoso iokanapirena erekari aapokotxiā auakanimoni. Erekepeka itxīkitakana amianatakani ikini aapokotxiti auakani.

Erōtxi Nirekari Xesosi Aōkitini

(Mateo 14.1-12; Marko 6.14-29)

⁷Erōtxi Karirēia tōpa auakani auīte kenakopiretari Xesosi pirena. Maerekaxiniretinoka itxa, kotxi kākīti sāpiretari:

—Xoāo kapatxisareri iuaīkana auāki itxapekaua. Iuara Xesosi txaua —itxana.

⁸Apanakini sāpiretari:

—Erfasi iuaīkana uatxa auāki itxapekaua. Iuara Xesosi txaua —itxana.

Apanakinipekana:

—Teoso sākire sāpiretakari kitxakapirīka auakari iuaīkana uatxa auāki itxapekaua. Iuara Xesosi txaua —itxana.

⁹Erōtxi txari:

—Notara paniātari Xoāo nopi tso-takiko, ininiā Xesosi kona Xoāoni. Kirip-

itipa Xesosi? Ātipirika nikenakopiretari iposotiire —itxa Erōtxi.

Kinirāo aōkitaka itxari Xesosi.

Sīko Mio Kākīti Xesosi Sikakienatini

(Mateo 14.13-21; Marko 6.30-44; Xoāo 6.1-14)

¹⁰Ninoa Xesosi iokanatakini kanapiripeka iuamoni. Ikinika ikamakitina isāpiretarina Xesosi. Eereka Xesosi anikana ninoa kākīti mauakaniātaā, Petsáita sitatxiti takote. Ninoanoka sari iuaā. ¹¹Txamari apanakini kenakopiretari Xesosi sinimoni, ininiā kākītipokoni sari iua tikini. Ninoa apokasaaki Xesosimoni, Xesosi apakapana ipoxokoniritika. Isāpiretana Teoso auītēxi ininiāua. Erekepeka itxīkitakana amianatakani.

¹²Tinītikita imoianariakori tosi pakini apoka iuamoni:

—Piokanataka kākīti aapokotxi imatokotinimoni inipokotinina ikapani, imakinina ikapani, kotxi uai aapokotxi mauakaniātaā —itxarina Xesosi.

¹³Txamari Xesosi txana:

—Hītekarako sikakienatana ninoa.

Ininiā ninoa:

—Poiāonoka nipokori aua atemoni, sikonoka komiri, ipinoka ximaki pakininokara aua. !Apakata aiamotiniri nipokori kaiāopokori kākīti asikakienatini ikapani —itxarina Xesosi.

¹⁴Iuaātaā kikiakorinoka sīko mio auakata. Xesosi paniātana imoianariakori:

—Hīpaniātari kākīti topākini, uai sīkoēta, apikomoni iuaīkana sīkoēta, apikomoni iuaīkana sīkoēta, txaāpokata kākīti —itxa. ¹⁵Ininiā imoianariakori paniātari kākīti ikara atoko iitopākinina. Ininiā ninoa topāka.

¹⁶Iuasaaki Xesosi kosekari komiri sīko, ximaki ipi pakini. Iaxiti ionakaāta, misākireta itxari Teoso:

—Peerekari ia nipokori pisikakiti — itxa.

Iuasaaki ixanakari komiri, ximaki pakini, sika itxari imoianariakorimoni, ininiã ninoa sikari kãkitimoni. ¹⁷ Ikini-mane nikari, kamitopeka itxana. Eereka Xesosi moianariakori amari nipokori itetakori. Ixãpokakarina kotari tosi pakini.

Petro Auikari Xesosi Teoso Mereëkiti Ininiãua

(Mateo 16.13-20; Marko 8.27-30)

¹⁸ Ñti òti Xesosi iuanani misãkiretari Teoso. Eereka imoianariakori apoka iuamoni. Ipimaãna:

—Kiripa kãkiti uãkatano nota? —itxa.

¹⁹ Ininiã ninoa:

—Apanakini xinikakiti pite Xoão kapatxisareri pitxaua. Apanakinipekana xinikakiti pite Erãsi pitxaua. Apanakinipekana xinikakiti pite Teoso sãkire sãpiretakari kitxakapirika auakari iuaikana auãki inakari pitxaua —itxarina Xesosi.

²⁰ Ininiã Xesosi:

—Hitepekana, kipa hite uãkatano nota? —itxa.

Petro apakapapiretari:

—Pite Teoso mereëkiti kãkiti iãtanãtakiti pitxaua —itxa.

²¹ Ininiã Xesosi iteene pinitari ikara apanakinimoni imasãpiretakani.

Xesosi Sãpiretari Ipinini

(Mateo 16.21-28; Marko 8.31-9.1)

²² Ininiã Xesosi:

—Nota hĩtari iaxitikiri iteene natat-siitariko nimisiritiko. Kiomãtxiakori, sasetotxi auĩteakori, kaiõkatsoparerini pakini linirekano nota, ininiã nokaãkako. Ipi ãti õtisaaki Teoso õkitikanoko nota iuaikana auãki ninini ikapani —itxari imoianariakori.

Xesosi Moianari Atão Inakari

(Mateo 16.24-28; Marko 8.34-38)

²³ Eereka isãpiretari ikinimane:

—Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã ikiniõtika, notakata pisapitikako. ²⁴ Pite ãtipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁵ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikipitari Teoso sãkire, ininiã kona pikaikota ãtipirika Teosokata. Ikara atoko ininiã, erekari atxiiti ikinipoko tiitxi auinii? Konapitini. Apiaerekata Teosokata ãtipirika pikaikotini. ²⁶ Pipëtatiniãno nota, pipëtatiniãri nisãkire, nota kãkiti itari iaxitikiri pëtataiko pite uai nikanapiriãkasaaki. Peerekari iuasaaki uai nikanapiriini òti. Iuasaaki kãkiti imarotariko niposotiire, niri posotiire, initiriakori iaxitikini posotiire apaka. Teoso nitiriakori erekarini itxauana. ²⁷ Atão nisãpiretai, apanakini hite uatxa uai auakanii, hĩpinini apisapanika himarotari Teoso auĩtetxi ininiãua —itxa Xesosi.

Moisesi, Erãsi Pakini Xesosi Aõkitini

(Mateo 17.1-3; Marko 9.2-13)

²⁸ Ñti semanati napaka atoko, Xesosi anikana Petro, Xoão, Txiako pakini. Ikanikana oxiratari nopini Teoso imisãkiretini ikapani. ²⁹ Teosokata isãkirauanãtakasaaki, itoõ ipinipo itxa, imãka ponika, kasarori. ³⁰ Iuasaaki ipi kiki tokiã iuaã, Moisesi, Erãsi pakini. Isãkirauatana Xesosikata. ³¹ Ninoa iotximere aua, kotxi ipotorikana Teoso

tixine. Isäkirauatana Xesosikata, Xesosi ipinini pirena, mapa semanati napaka atoko Xerosareë ipinini Teoso paniätakiti ikamini ikapani. ³²Iuasaaki Petro, Xoão, Txiako pakini imakanāta. Eereka imerekana. Atamatarina Xesosi iotximere. Atamatarina ninoa ipi kiki iuakata itimnina. ³³Moisesi, Eríasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi āti pakini, pite ikapani, Moisesi ikapani, Eríasi ikapani — itxa.

Txamari maxikatiika isäkirauata. !Imarotari amanaäkiti.

³⁴Petro säkirauanātakasaaki, katxiāri apoka. Xesosi moianariakori pīkarauata katxiāri āki auakasaakina. Katxiāri ākitana. ³⁵Katxiāri āki ikenakotaāka säkiretxi:

—Ere namarite, nitiretakiti. Hīkenakotariko iua säkire —itxa.

³⁶Isäkirauataka atoko Xesosi moianariakori atamatarina Xesosinani. Eereka lisäpiretarina itikakitina apanakinimoni. Masäkirenika itxana.

Amarini Maerekati Matamatakoti Auaitotakiti

(Mateo 17.14-20; Marko 9.14-29)

³⁷Katimatinikata iokiriütana. Iuasaaki kăkitipokoni apoka Xesosimoni. ³⁸Ninoa sauaki kiki akiritari Xesosi:

—Koerekareri, patamatarina nota äkiri imatonökari namarite. ³⁹Ätipirika maerekati matamatakoti mäikari iua. Iuasaaki akiripoakata, okarakataua. Isorikipokata inamamoni. Maerekati matamatakoti kamatsiitari namarite. Poiäonoka itakanapari. ⁴⁰Iteene namanaäpekari pimoianariakori omitikiniri, txamari !iposotarina —itxa Xesosimoni.

⁴¹Ininiä Xesosi txari kăkitimoni:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimiteenekini? —itxa.

Eereka ipaniätari iua kiki:

—Pamarite pimina uai.

⁴²Iua amarini apokaäpotakasaaki, maerekati matamatakoti irikari iixiti. Amarini okarakataua. Xesosi paniätari maerekati takanapiniri amarini. Erekapeka itxikitakari amarini, ininiä isika iua iuaikana irimoni. ⁴³Ikinimane tsorikaäta Teoso posotiire itikasaakina.

Xesosi Iuaikana Säpiretari Ipinini

(Mateo 17.22-23; Marko 9.30-32)

Ikinimane tsorikaätakasaaki, Xesosi misäkiretari imoianariakori.

⁴⁴—!Himaxinikaretapiri uatxa nisäpiretakiti. Nota hītari iaxitikiri mäkapiritaäkako. Nisikaäkako kăkitimoni ninoaka nirekakiti ikaminina ikapani —Xesosi txana ninoa.

⁴⁵Imoianariakori kenakotari Xesosi säkire, txamari !imarotarina isäpiretakiti. Teoso !nirekari ninoa imarotiniri Xesosi säpiretakiti iuasaaki. Ninoa pīkari Xesosi ipimainina isäkire oerekinina ikapani.

Kiripa Kăkiti Apiatakari Txataua?

(Mateo 18.1-5; Marko 9.33-37)

⁴⁶Äti öti Xesosi moianariakori !auikakauana isäkirena, kotxi inirekarina imarotinirina apiatakari ninoa sauaki auakari. ⁴⁷Xesosi imarotari ninoa xinikakiti, ininiä iminari amarini ninoamoni. Xesosikata tima itxa amarini. ⁴⁸Iuasaaki Xesosi txana:

—Papakapiniäri amarini ia atoko inakari, papakapano nota apaka. Papakapiniäno nota, papakapari niokanatakiri apaka. Iuaka

poiãotakakariua hïte sauaki, iuarako
apiatakari txauako —itxa Xesosi.

Kiki Maerekani
Matamatakoni Omitiãkari

(Marko 9.38-41)

⁴⁹ Xoão sãpiretari Xesosi:

—Koerekareri, ate kenakotari kiki
omitikinina maerekani matamatakoni
pite uãkaã. Ate sãpiretari iua kiki ikara
atoko inakari imakamakani, kotxi kona
pimoianarini iua —itxa.

⁵⁰ Ininiã Xesosi:

—!Hïotokakapiri ikara atoko inakari
ikamini, kotxi iua kiki !omanataua ate.
Iua apamonïkaua ate —itxa.

Samaria Auakani !Apakapari Xesosi

⁵¹ Teoso tixine iuaïkana Xesosi
kanapiriini õti apokaãpota, ininiã
Xesosi ãkixinireë txari:

—Nisapitikako Xerosareëmoni.

⁵² Iokanatari kãkiti iua apisa,
imakiniãtaã initinina ïkapani.
Ipixinipokoriti ninoa kãkiti nitari
imakiniãtaã aapokotxi Samaria auakani
auiniãtaã. ⁵³ Txamari kãkiti iuaãtaã
!nirekarina Xesosi apakapinina, kotxi
iua nirekari Xerosareëmoni isini.
Samaria auakani omanatana Xerosareë
auakani. ⁵⁴ Txiako, Xoão pakini
kenakopiretari ikara ene. Iuusaaki
ipimaãrina Xesosi:

—Apiananiri, pinirekatari
amanainiri Teoso xamina iaxitikiri
iokanatini ninoamoni ixipokinirina
ïkapani?

⁵⁵ Txamari Xesosi pinitana, isãkirena
maerekani xika.

⁵⁶ —Nota, hïtari iaxitikiri kona kãkiti
nixipokini ïkapanini napoka uai. Kãkiti
maerekani nimakatzakini ïkapanira uai-
moni nina —Xesosi txari Txiako, Xoão
pakini.

Eereka ninoa sari apikoxiti apanakini
kãkiti auiniãtaãmoni.

Kãkiti Xesosi
Imoianatinina Nireëkani

(Mateo 8.18-22)

⁵⁷ Xesosi imoianariakorikata
saãpotakasaaki kimaporiã, kiki txari
Xesosi:

—Apiananiri, pite sinimoni nota
apaka sako.

⁵⁸ Ininiã Xesosi:

—Karikori aripa auini. Kakoari
kotipiriki auini, txamari nota hïtari
iaxitikiri nimakiniãtaã !auari.
Pimoianatiniãno, ikara atoko
pimisiritiko pinireka atxiïti? —itxa
Xesosi.

⁵⁹ Xesosi txari äti kiki:

—Notakata pisako.

Txamari iua kiki:

—Koerekareri, merepanika ninirekari
niãtapiniri niri ipinini —itxa.

⁶⁰ Ininiã Xesosi:

—Ikara piparïka pauiritari äti kamini.
Piparïka apiari uatxa aua. Pite sari kãk-
itimoni. Pisãpiretanako Teoso auïtetxi
ininiãua —itxa Xesosi iuamoni.

⁶¹ Äti kikipekana txari Xesosi:

—Koerekareri, nota pimoianari nitxa-
mauako. Mitxi pauiritano nikanapiriini
nauinimoni. Nitakapiretanapana niniri-
mane —itxari.

⁶² Ininiã Xesosi:

—Teoso kimaporeë potoriãkari
nirekiniãri mitxi ikamakiti iuaïkana
ikamini, !apakata iparïkauatini aãuïte
Teoso ïkapani —itxa Xesosi.

Xesosi Iokanatana
Setëta Pakini Kãkiti

10 Ikara inaãka atoko Apiananiri
mereëna setëta pakini kãkiti.
Iokanatana ipi, iuaïkana ipi, iuaïkana
ipi, itxaãpotana iokanatinina.
Iokanatana iua sini apisapanika ikini
aapokotxitimoni. Ninoa ïkiika. Apokana
Xesosi apisa. ²Xesosi txana ninoa:

—Kaiāori kākiti iposope auikiniri nisākire, txamari !imarotarina nisākire, kotxi !ikenakotapanirina. Ninoa kikio erekari atoko itxana. Imakinika iposope iuaā. Txamari, poiāoka parīkauatakani aua nisākire isāpiretinina ikapani. Ininiākara himisākiretariko Apiananiri kakikioteri iokanatinina parīkauatakani iua sākire auākani apotiitinina ikapani. ³Hisa. Soti auite anaakori ākitimoni iokanatiko atoko, niokanatai hīte kākitimoni, kotxi pamonōkonina ninoa. ⁴Txineiro !hanikape. Tiitxi !hanikape. Āti hīkiti mata !hanikape. Kimaporiāpoā kākiti akiritakasaakii, !hītokaāpotape kākitikata hisākirauatini ikapani. Hīsapitiporiko niokanatinimoni. ⁵Kākiti aapoko hāpokasaaki, merepitipanika hītchariko: “Namanaāri Teoso, ikamaerekaxiniretinina kākiti uai auakani,” hītchako. ⁶Kaapokori nirekiniāri Teoso ikara atoko inakari ikaminana ninoa, Teoso kamapitikari hamanaākiti. Kaapokori manirekakaniāri, hīsāpiretana Teoso kona kamaerekaxiniretana ninoa. ⁷Kaapokori apakapiniāi hīte, hīkaikotako iua aapokonoka. Āti aapoko, eereka āti aapoko kona hītchaāpotapeko iua sitatxiti hāuakasaaki. Iuaā ninoa sikakiti hinikini ikapani, hiātini ikapani hāpakapariko. !Hīpētautape hāpakapiniri, kotxi hīte nota ikapani parīkauatakani hītchua. Apakatapitika hāpakapiniri hīparīka iki.

⁸—Aapokotxiātaā hāpokasaaki hāpakapikoā, iuaā hisikiko hinikako, hiāta hītchaāpotako. !Hīxinikapiri ninoa sikakiti mapitxiri ininiua. Hinikariko. ⁹Erekepeka hītchikitakanako amianatakani iuaā auakani. Hīsāpiretana ninoa, kaiamapekari Teoso ninoa auite ininiua tīkane. ¹⁰Aapokotxiātaā himapakapakoniā, hīsa kākiti napaāporetxiā. Hīsāpiretana kākiti iuaā auakani: ¹¹“Hāuiniākiri

pani akitiākiri akaxipoka, kotxi !erekari uai, kotxi maerekati hīkama ate himapakapakaniā. Hīxinikariko, ate apoka uai Teoso auītetxi ininiāua asāpiretinii ikapani, txamari !hinirekari.” Ikara atoko hītcha sākiretako ninoamoni. ¹²Kākiti misiritiko ōtisaaki Teoso misiritanako kākiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hīte mapakapakani, kotxi hīte sāpiretana Teoso sākire, iuaritika !auikarina. Kitxakapirīka Teoso sākire sāpiretakani !isana Sotoma sitatxitimoni —itxa Xesosi.

Kākiti Sitatxi Auakani Maerekati Matakanapakani

(Mateo 11.20-24)

¹³—Hīte Korasiī sitatxiti auakani inipitika atatsiitariko misirikaretxi. Hītepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hīte sauaki, txamari !hītakanapari himaerekani. Ikara posotiiretxi Sitoō sitatxiti, Txiro sitatxiti pakini auaākamako, kākiti iuaā auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iitoāna itakamanako, imaerekanina itakanapinina oerekinina. ¹⁴Kākiti misiritiko ōti apokasaaki, Teoso misiritariko Txiro sitatxiti auakani, Sitoō sitatxiti auakani pakini, txamari iua apia misiritaiko hīte Petsáita sitatxiti auakani, hīte Korasiī sitatxiti auakani apaka. ¹⁵Hītepekana Kapanaoō sitatxiti auakani apiarini hinireka hininiāua, txamari maerekani misiritikoātaā iuamoni-rako hōkapeēkako —itxa Xesosi.

¹⁶Xesosi misākiretana imoianariakori: —Hīte sākire kenakotakani kenakotari nota sākire apaka. Hīte mapakapakani !apakapano nota apaka. Nota mapakapakani !apakapari nota

uaimoni iokanatakari apaka —itxana imoianariakori.

Setêta Pakini Käkiti Kanapiriini

¹⁷ Ninoa setêta pakini käkiti kanapiriä. Poxokonoka itxakatana.

—Apiananiri, maerekani mata-matakani apaka kîpitari asäkire, pite uäkaä aiokanatakasaakina —itxarina Xesosi.

¹⁸ Ininiä Xesosi:

—Ari, nitikapekari Teoso patimari iokanatiniri Satanasi, okaratxirari patimari imëkokini atoko itxa.

¹⁹ Hikenakota. Nota sikaposotiiretai hîte imini, kaxipiro pakini hîkatxaratini. Kona ioäakai hîte. Amokaiakari Satanasi pataparari, iuaritika hîposota hîokanatiniri iua, kotxi nota sikataparatai hîte. !Auari hîte karotakani. ²⁰ Hîpoxokoniuaata, kotxi maerekani matamatakoni kamari hîpaniätakiti. Apia hîpoxokoniuaatako, kotxi hîuäka Teoso tixine aätsopateë iökatsopatapeëkaika iuaä hîsini ikapani —Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekarî Matamatakoti kamapoxokonitari Xesosi, ininiä Xesosi misäkiretari Teoso:

—Niri, pitixine auakani auîte pitxaua. Uai ikini itixiti auakani auîte apaka pitxaua. Peerekai pite, kotxi kimarorerini, iuikakaniua kona poereka pimarore. Poiäorini, miuikakaniua poereka pimarore. Ari niri, ikara atoko pinireka. Ikara atoko papokaerekata —itxari iri.

²² Eereka imisäkiretari käkiti:

—Niri sikapekano ikinika. Käkiti !imarotano nota Teoso äkiri nininiua. Nirinokara atäo imarotano nota. Apaka käkiti na atäo imarotari niri. Notanokara imarotari niri, kotxi

iua äkiri nitxaua. Käkiti nirekiniäri imarotiniri niri, nota oerekari niri iuamoni —itxa Xesosi.

²³ Eereka Xesosi aua imoianari-akorikata. Ninoanani aua iuakata. Imisäkiretana:

—Teoso sikari erekari hîtemoni, kotxi hîte atamatari nota kamakiti, hîte kenakotari nota säpiretakiti.

²⁴ Nota säpiretai hîte. Kitxakapiriä Teoso säkire säpiretakani, auütetxiakori pakini kiniräo atamataka txari hîte atamatakiti, txamari ninoa !atamatari. Ninoa nirekari hîte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵ Kiki Moisesi säkire oerekakari apoka Xesosimoni. Inirekamari Xesosi kerokiniri isäkire.

—Koerekareri, kiripa nikama Teosokata ätipirika nauini ikapani? —itxa.

²⁶ Ininiä Xesosi:

—Kiripa patatsopata Teoso aätsopateë? Pisäpiretano Teoso paniätakiti —itxari.

²⁷ Ininiä iua kiki apakapapireta:

—Teoso paniätaua: “Pitiretariko Apiananiri piTeosone, ikinipoko pinireëkitiä, ikini päkixinireë, ikini pitaparaxinireë, ikinipoko pixinikakitiä pakini.” Apaka Teoso paniätaua: “Piteka pitiretiniäua atokotxikana, pitiretariko äti,” itxa.

²⁸ —Atäopitikara papakapapiretano. Ikara pikaminiä, pauapika ätipirika Teosokata —itxa Xesosi.

²⁹ Txamari iua kiki !inirekari ikara atoko inakari ikamini, ininiä iua pimaäri Xesosi:

—Kiripa äti nitiretini ikapani?

³⁰ Xesosi apakapapiretari, ia säpirenatxi atäo inakari oerekiko isäpiretini:

—Kiki potorika Xerosareē. Inirekari Xerikoo sitatxitimoni isini. Ipixinipokoriti kiitiririni maikari iua. Iitirīkarina imāka, itii pakini, noropata, karota, itxarina. Mauākixiniretinoka itakanaparina iua kiki. ³¹Iuasaaki sasetotxi iāpota iua kimaporiti. Iua atamatari iua kiki karotakori, txamari !imaākatari. Iopiriāri, napa, ikorape itxa. ³²Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaākatari. Iopiriāri, napa, ikorape itxa. ³³Eereka kiki Samaria tōpakiri iāpota iua kimaporiti. Iua apoka iuaā. Atamatari iua kiki maikapekori, ininiā iua amonīkari. ³⁴Iuamoni isa. Arokari ikaro ipiniā. Ipitari ikaro iitxiā. Mākatxi mataā iapirika itxari ikaro. Eereka ōkitika itxari, ipira poho nopini taka itxari. Anikari kākiti imakiniātaā aikotimoni. Iuaā imoiaāri. ³⁵Katimatiniakata isikari txineiro kaapokorimoni. Ipi ota pirata kamakori isika. “Nisipekako. Pite moiaāriko ia kiki. Apikomonipanika txineiro pinirekiniā ikiena ikapani, nikanapiriākasaaki niikitxitai,” itxa Samariakiri, —itxa Xesosi Moisesi sākire oerekakarimoni.

³⁶Xesosi pimaāri iua:

—Ipi āti kikiakori iāpota iua kimaporiti. Īkiripa iua kiki kiitiririni maikakiti tiretakari? —itxa.

³⁷Ininiā iua Moisesi sākire oerekakari:

—Ari, Samariakirinokara tiretari iua —itxa.

Ininiā Xesosi:

—Pisipe. Samariakiri kamakiti atoko inakari pikamako, kotxi iua tiretari āti.

Xesosi Motikaētarō Mata, Maria Pakini

³⁸Xesosi imoianariakorikata sipeka. Apokana aapokotxiātaā. Iuaā sito Mata

inakoro apakapana oaāpoko. ³⁹Oītarō Maria inakoro topāka Apiananiri takote isākire okenakotini ikapani. ⁴⁰Mata maerekaxiniretonoka otxa oparīka ito inini xika. Ininiā osari Xesosimoni.

—Apiananiri, nitaro topākanāta ereē. Notanani parīkauanāta. Pitemoni erekari atxiīti? Pipaniātaroko notakata nipokori okamini —otxa.

⁴¹Ininiā Xesosi:

—Mata, Mata, maerekaxiniretonokai pitxa, kotxi piparīka ito inini xika. ⁴²Ātinoka pikamini tīkane ninireka. Maria mereēri ikara. Omereēri nota sākire okenakotini. Oa mereēkiti apiaerekata, ininiā !niotokakaro oa nisākire okenakotini —itxa Xesosi.

Teoso Misākiretiko Pirena

(Mateo 6.5-15; 7.7-11)

11 Āti ōti Xesosi misākiretari Teoso. Ixipoka atoko ātika imoianari txari:

—Apiananiri, Xoāo oerekari imoianariakori Teoso imisākiretinina. Iua atokokana poerekaua ate Teoso amisākiretini. Natokopa itxa Teoso amisākiretini?

²Xesosi apakapapireta:

—Teoso himisākiretakasaaki, ia atoko hītxako:

“Aīri, iaxiti auakari, ate nirekari piuāka paxitiko. Anirekari ikini itixiti auakani auītetini pite. Pite tixine pinireēkiti kamiko atokokana, anirekari pinireēkiti kamiko ikorapokoriti.

³Nipokori ikiniōtika pisikauako.

⁴Pimaxinīkaretariko maerekati akamakiti. Maerekati atemoni kamakori amaxinīkaretini atokokana, pimaxinīkaretariko. Kona panikapeua aātaerekatikomoni. Pisikakauako ate, maerekati sauaki aāuakasaaki.”

Ikara atoko hītako Teoso himisākiretini
—itxa Xesosi.

⁵ Eereka Xesosi oerekana
imoianariakori:

—Atxiīti apanīkanōka pisa
pimoianari aapokomoni nipokori
pamanaini ikapani. Ininiā pakiritari
iua: “Nimoianari, ipi āti pakini komiri
pisikano. ⁶ Naōkimanere iāpotakari
uatxaika apoka naapoko. Natxinoka
itxape. Nipokori !auari nisikiniri,”
atxiīti pitxari iua.

⁷ —Atxiīti pimoianari iroko āki apaka-
papiretai: “!Pakirinātapeno. Naapoko
tore katoreri. Nota, namariteni apaka
imakanātape. !Niposota nōkitikiniua,
nipokori nisikini.”

⁸ —Pimoianari itxaua iua, iuaritika
atxiīti !nirekari ōkitikiniua. Iuaikana,
iuaikana pakiritiniāri pimoianari,
iua ōkitikapitika. Ikini nipokoriti
pinirekakiti isikaiko, iuaikana
imakini ikapani. Iua pimoianari
na atoko itxa Teoso. ⁹ Ininiākara
pamanaāriko pinirekakiti, ininiā Teoso
sikapitikai. Pinitariko pinirekakiti,
ininiā papokapitikari. Pakiritariko
Teoso, ininiā iua apakapapiretai.
¹⁰ Amanarauatakari apakapapitikari
amanaākiti. Nitarauatakari
apokapitikari initakiti. Teoso akiritakari
apakapapiretaākapitika.

¹¹ —Hīte irītxiakori, hamariteni
amanainiāi komiri, kaikani hīsikatana
hamariteni? Ximaki amanainiāna,
iminikani hīsikatana hamariteni?
¹² Patari naki amanainiāna,
kaxipirokani hīsikatana hamariteni?
Konapitini. ¹³ Hīte maerekati kamakani
hītchaua, iuaritika himarotari erekari
hamaritenimoni hīsikini, ininiā hīri
iaxiti auakari, erekarinani kamakari,
iua sikapititariko Erekar Matamatakoti
hītemoni hamanainiāri iua —itxa
Xesosi.

Maerekani Matamatakoni Omitikiko

(Mateo 12.22-32; Marko 3.20-30)

¹⁴ Āti ōti Xesosi omitikari maerekati
matamatakoti masākireti. Iua maerekati
matamatakoti sipeka atoko, iua kiki
mitxi maerekati matamatakoti auai-
totakiti posotari iuaikana isākiraua-
tini. Kākiti Xesosi kamakiti itikakani
tsorīkaānāta. ¹⁵ Ātikaka ninoa txari:

—Satanasi, maerekani matamatakoni
auīte, iuakara sikataparitari Xesosi
maerekani matamatakoni omitikini.

¹⁶ Apanakinipekana nirekari Xesosi
kerokiniri, ininiā itxarina Xesosi:

—Takaōtxikari, Teoso posotiire po-
erekaua ate, aātamatiniri ikapani, Teoso
iokanatinii ikorapokoriti aimarotini ika-
pani —itxarina.

¹⁷ Xesosi imarotari ninoa xinikanātak-
iti, ininiā iua txana:

—Kākiti tixine auakani, ni-
noakakarika inaiatakiniāuana,
!apakata. Ixipokakauana. Iua
atokokana kākiti aapokoā auakani
inaiatakiniāuana, ninoakakarika
ixipokakauana. ¹⁸ Iua atokokana
Satanasi nitiriakori, ninoakakarika
inaiatakiniāuana, Satanasi tapara
xipokako. Ikara atoko ininiā, kona atāo
hīte sākire, nota iokanatinina Satanasi
nitiriakori, maerekani matamatakoni,
Satanasi taparaā. Ikara hīsākire kona
atāoni. ¹⁹ Hīte sāpiretano, maerekani
matamatakoni Satanasi taparaā
nomitika, ininiākara kitaparaāpa hīte
moianariakori omitikana maerekani
matamatakoni? Ninoa omitikana
maerekani matamatakoni Teoso
taparaā, ininiā ninoakara oerekari !atāo
hīsākire nota pirena. ²⁰ Teoso posotiireē
nomitikari maerekani matamatakoni.
Ikara atoko ininiā, Teoso oerekai iua
apokapeka hītemoni hīauīte inini
ikapani.

²¹—Kiki pataparari ikeeko iposope inakari moiainiári aapoko, kona kiitirikikori itii. ²²Txamari áti kiki apiataparata inaiatiniári, iriákata, ininiá anikapitikari kaapokori ikeeko. Mitxi iua kaapokori sákire: “Niikeeko auiniá, kona kamakaxakikori nitii,” itxama, iuaritika kiki apiataparatakari itirikari itii. Eereka imoianariakorimoni ixanakari tiitxi.

²³—Notakata maparíkauatakani omanatano nota. Imamoianatakaniáno, inirekari niparíka ixipokini —itxa Xesosi.

Maerekati Matamatakoti Kanapiriini Pirena

(Mateo 12.43-45)

²⁴Iuaíkana Xesosi sápirenauata:

—Maerekati matamatakoti omitikikosaaki, kákiti itakanapakasaaki, isaápota áparaá makipakaniátaá auiniá-taá initini íkapani. Imapokakaniári, “Iuaíkana nikanapiriáko mitxi nauinimoni,” itxa. ²⁵Iuaá apoka. Iua aapoko mitxi inakari iusaaki peereri. Oeretapeékaika. ²⁶Ininiá apana apikomoni setxi pakini maerekani matamatakoni, apia maerekanitakani. Ninoa ikinikana íroaitotari iua kiki. Iua ítoá aua itxana. Iusaaki oitope maerekani matamatakoni misiritari iua kiki, ininiá apiata itsii inikoriá. Mitxipe átinoka maerekati matamatakoti paniátari iua maerekati ikamini. Eereka oito paniátari iua —itxa Xesosi.

²⁷Xesosi sákirauataka atoko, sito iuaá kákiti sauaki auakaro txari Xesosi:

—Pite auákitakakaro, pite axitakakaro, poxokoniuaata, kotxi Teoso sikari erekari oamoni —otxa.

²⁸Xesosi apakapapiretaro oa:

—Ari, inipitikara. Iuaritika Teoso sákire kenakotakani, isákire auiákani, apia poxokoniuaata, kotxi Teoso sikari

apikomoni erekari ninoamoni —itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹Kaiáopokori kákiti apokaápota Xesosi takote. Iusaaki Xesosi txari:

—Kákiti uatxarini !erekana. Híte nirekari noerekinii Teoso takaótxikare, iposotiire. Konapitini. Kona noerekai híte. Kitxakapiríka Teoso sákire sápiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaíkana ikamapanikariko. Iua posotiiretxi Teoso takaótxikare itxapanikaua híte íkapani. Iua takaótxikarinoka Teoso takaótxikare híte íkapani. ³⁰Kitxakapiríka Nínivi sitatxiti auakani imarotari Teoso iokanatiniri Xonasi ninoamoni. Iua atokokana kákiti uatxa auakani imarotariko Teoso iokanatinino nota kákiti itari iaxitikiri ninoamoni.

³¹—Kitxakapiríka sito Sapaa auakani auíte sari ótakoxiti auítetxi Saromão inakorimoni imarore okenakotini íkapani. Kákiti misiritiko óti apokasaaki, oa sito txitanako kákiti uatxa auakani, kotxi uatxa uai aua Apiatakari. Iua Saromão auítetxi itxaua, iuaritika uatxa uai aua auítetxiakori auíte. Txamari kákiti uatxa auakani !inirekari ikenakotinirina nota sákire.

³²—Kákiti misiritiko óti apokasaaki, kákiti Nínivi sitatxiti auakani txitaiko híte íkorasaaki auakani, kotxi ninoa kenakotari Xonasi sákire. Iusaaki itakanaparina maerekati ikamakitina. Uatxa uai aua Apiatakari. Xonasi poiáoka. Híte kenakotapekari nota sákire, txamari hi-maerekani !hítakanapa —itxa Xesosi.

Tirikapi Ítotxiákiri Pirena

(Mateo 6.22-23)

³³Iuaíkana Xesosi sápirenauata:

—Käkiti iopotokakasaakiri tirikapi, itano itaka ikinimane iroäkani atamarauatini ikapani. !Ikipatari tirikapi. !Iomaätari tirikapi kopiti äki. ³⁴ Poki tirikapi atoko itxa piito ikapani. Poki ereka inakasaaki ipinikare aua päkixinireë. Poki maerekanisaaki, päkixinireë mapiäriko. ³⁵ Erepaniko. Atxiiti piuäkataro ipinikare päkixinireë auini, txamari atxiiti ipiänoka auari päkixinireë. ³⁶ Ipinikarenoka päkixinireë auiniä, ipiä na xatiki auini, tirikapi iopinikini atoko itxa —itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷ Xesosi säkirauataka atoko pariseo aiataro Xesosi:

—Manipokota naapoko —itxari.

Ininiä Xesosi sari iuakata. Apokaäka atoko, iitopäka inipokotini ikapani. ³⁸ Iua pariseo tsorikaänäta Xesosi marokauakotakaniäua inipokotini apisa, kotxi iuasaaki Xesosi likamari Xoteo kiomanekarini oerekakiti iaöka. ³⁹ Ininiä Xesosi:

—Hite pariseoakori arokari hiito, txamari häkixinire patxikopiiri, kotxi maerekatinoka hikama. Kapotxinaniri hitxaua. Iäkoanatxi inopininoka arokiko atoko hitxa. Pirato inopininoka arokiko atoko hitxa. ⁴⁰ !Kiikitei hite. Teoso hiito kamakari kamari häkixinire apaka. ⁴¹ Iäkoanatxi äki auakari iäriä hisikako matxineirotenimoni. Hiiratone äki auakari nipokori hisikako matxineirotenimoni. Hitiretariko apanakini. Ikara atoko hikaminia, Teoso atamatari häkixinire ereka inini.

⁴² —Hite pariseoakori misiritaäkako. Hite sikari ipixini hitakare kikio auakari Teosomoni Moisesi paniätakiti iaöka. Apikomoni hikama, kotxi ipixini takari kanaua äki hitakakiti apaka hisika Teosomoni, oteraä, seporia

hisika. Erekapitikamari hite sikakiti Teosomoni, txamari himisirienetari kakiti. Teoso hitireta. Erekaro ipixini hitii hisikiniri Teoso. Iuakatikana erekaro atao hikaminari kakiti. Erekaro atao hitiretiniri Teoso.

⁴³ —Hite pariseoakori misiritaäkako. Hite potxitari hiitopäkini kakiti apisatoö, aiko äki Xoteo apotiitiniätaäua kakiti atamatini ikapaninoka. Nipokori sikaretikoätaä häuakasaaki, hite apokaerekatari kakitipokoni paxitini hite koerekareri hininiäua.

⁴⁴ —Hite pariseoakori misiritaäkako. Akauari matakaotxiäkoti atoko hitxa. Iua nopini kakiti napa imimarotakoniä, kotxi hiito peerekarero, txamari häkixinire !erekarero. Akauari äki arakakarero atoko itxa häkixinire —itxa Xesosi.

Moisesi Paniätakiti Oereäkani Maerekani

⁴⁵ Ikara säkiretxiti kiki Moisesi paniätakiti oereäkari kenakotakasaaki, omanäkarauata. Itxari Xesosi:

—Koerekarero, ikara atoko pisäkirauatiniä, ate apaka “maerekati kamakani” pitxataua ate —itxari.

⁴⁶ Ininiä Xesosi:

—Hite Moisesi paniätakiti oereäkani hitekanerako misiritaäkako. Hite paniätari kakiti hiteka paniätakiti ikaminina. Ninoa liposotari ikinika hipaniätakiti ikaminina. Iminani ninoa porikiä hitakini atoko hikamanäta hite. Iposotarina anikinirina. Hite apaka !hikamaro hiteka paniätakiti. ⁴⁷ Hite misiritaäkako. Hite kamari takaotxikari peerero Teoso säkire säpiretakanini ikatikoätaä hitakini. Txamari hite atokiriakorinikara okapena ninoa Teoso säkire säpiretakanini. ⁴⁸ Iuaritika hite säpiretari ikinimane häpokaerekatini hite atokiriakorini kamakiti. Txamari ninoara okana Teoso säkire säpiretakanini. Hitera takari

takaõtxikari peereri ninoa Teoso sãkire sãpiretakanini akauariãtaã, ininiã kãkiti uãkatarì hìpaxitinina ninoani, txamari !hìkamari ninoani paniãtakiti.

⁴⁹—Paimatireri Teoso, kotxi mitxipe imarotari ninoa kamakiti tikane. Mitxipe iua txari: “Nota iokanatanako nisãkire sãpiretakani, niokanapirena aniãkani pakini ninoamoni, txamari ninoa okapanikana apanakini. Imisiritapanikana apanakini,” itxa Teoso. ⁵⁰Kãkiti uatxa auakani misiritaãkako, Teoso sãkire sãpiretakanini okiko xika. Teoso itixi ikamakasaakipeka ipotorika Teoso sãkire sãpiretakani okiko. ⁵¹Merepitipanika Apeo inakori okapeëka. Eereka apanakini okaãpotapeëka. Imapotõkire okakori Sakaria inakori. Teosomoni sikakori takikoãtaã takote, Teoso Auini Pakitaãtaã takote apaka, iuaã okapeëka Sakaria. Inipitikara nota sãpiretai hìte, uatxa auakani misiritaãkako ninoa Teoso sãkire sãpiretakani okiko xika.

⁵²—Hìte Moisesi paniãtakiti oereëkani misiritaãkako. Hìte kipatari atão inakari Teoso iokanapirena. Hìte apaka !auikari ikara. !Hãuiritari apanakini auikiniri —itxa Xesosi.

⁵³Ikara Xesosi sãkire xika, Moisesi paniãtakiti oereëkani, pariseoakori pakini tsoata, Xesosi omanatinina. Ætipirika ipimaãnatapikarina Xesosi. ⁵⁴Inirekarina Xesosi kerokiniri isãkire, imãkiko ìkapani.

Kipatakori !Auari

(Mateo 10.26-27)

12 Kãkitipokoni apotiitaua kinapokopeka, ininiã ikatxarakititakakauana. Iuusaaki Xesosi merepanika õtãkikana imoianariakori:

—Erepaniko pariseoakori sãkire. Pamonõkoniri isãkirena, kotxi !ikamarina isãkirena iaõka. Ikara imaerekanina kipataua pão tireëkari

pani koketakori atoko itxaua. Eereka imarotaãka imaerekani. ²Ìkinika seretakori oerekaãkako. Ìkinika kipatakori imarotaãkako. ³Ininiã ipiãpokoã pisãpiretakiti, pokamara imarotaãkako. Aapokotxi katoreri ãki pimaasakapiretakiti aapokotxi nopini akiritaãkako ìkinimane imarotiniri ìkapani.

Kipa Apïka?

(Mateo 10.28-31)

⁴—Nimoianariakori nõtãkikapanikai hìte. !Hìpìkapiri hìte okakani tikane. Hìitonanira iposotana okinina. Hìxinire !iposotana okinina. ⁵Nisãpiretai hìpìkakiti tikane. Teosora hìpìkako. Iuara posotari hìito okini, eereka iposotari iokanatinii maerekani misiritikoãtaã. Ari, iuara hìpìkako.

⁶—Kiripa ipi ipi ãti pakini kotipiriki karone? Poiãonoka txineiro, ota ipinoka. Iuaritika Teoso !imaxinìkaretari ãtika kotipiriki. ⁷Kipakinipa piãko pikiiã auakari aua? !Pimarotari. Teoso imarotapitikari, kotxi iteene inikatai, ininiãkara !hìpìkarauatape. Kotipiriki ìki poião, iuaritika Teoso tìretari kotipiriki. Kaiãopokori kotipiriki auiniã, iuaritika hìte ìki apiata, ininiã Teoso tìretapitikai hìte —itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

⁸Xesosi sãpirenauatapanika:

—Apikomoni nisãpiretai. Kãkiti ìkinimanemoni: “Xesosi nakiti nitxaua nota,” inakari, iua atokokana nota hìtari iaxitikiri txako Teoso nitiriakorimoni: “Nota nakitipitikara iua,” nitxako. ⁹Kãkiti ìkinimanemoni: “Xesosi nakiti !nitxaua nota,” inakari, iua atokokana nota hìtari iaxitikiri txako Teoso nitiriakorimoni: “Kona nota nakitini iua,” nitxako.

¹⁰—Kākiti misākirepiretiniāno nota hītari iaxitikiri, eereka amanainiāri Teoso ikara imaerekani imakatsakini, ininiā Teoso makatsakapitikari. Kākiti misākirepiretiniāri Erekarī Matamatakoti, !kimakatsakikori ikara maerekati ikamakiti.

¹¹—Hanikikosaaki aiko Xoteo apotiitiñiātaāua hāpoitikoā, hanikikosaaki auītetxiakorimoni hāpoitikoā, mitxi !hixinikapiri hīte apoitakani hāpakapapiretini. Maerekaxiniretinoka !hītšape.

¹²Iuasaaki ninoā apoitakasaakii, Erekarī Matamatakoti sāpiretaiko hīte hāpakapapiretini ikapani —itxa Xesosi sākire.

Kiki Katxineiroteri Miikiteti

¹³Kiki kākītipokoni sauaki misākiretari Xesosi:

—Koerekareri, pipaniātari nitari sikiñino nota ipixini aīrini tii ipīkasaaki itakanapakiti —itxa.

¹⁴Ininiā Xesosi:

—Naōkimanere, kona nota parīkani pirini tii nixanakini —itxa Xesosi.

¹⁵Ininiā Xesosi misākiretana ikinimane:

—Erepaniko. !Erekarī tiitxi iteene pinirekini. Kapotxinani !hītšape. Ito-maneri tiitxi !itxīkitakai okanani pauini —itxa Xesosi.

¹⁶Ininiā Xesosi sāpiretari ia sāpirenatxi atāo inakari oerekiko:

—Kiki katxineiroteri aua kikio mitari. Itakare peerekarī, kaiāopokori.

¹⁷Ixinikaxitita ākixinireē: “Nāpa ninīkatari nikiena? Nikiena nīkatikoātaā xapitikiri. !Apakata itomaneri nikiena ikapani. Kipa nikama? ¹⁸Ari, nimarotari nikamakiti tīkane. Nōtikariko nikiena nīkatikoātaā. Iuaīkana nikamari āti mitari. Iuaā ikinika nikiena, nitii apaka ninīkata. ¹⁹Eereka notaka nitxauako: ‘Peerekano nota. Kaiāopokori nikiena.

Kaiāopokori nitii. Apakatapitikako kaiāopokori anokanani ikapani. Ininiā !niparīkauataika. Ninipokotako,

niātako, nipoxokoniuatato nitxako,” itxa iua kiki. ²⁰Txamari Teoso misākiretari iua: “Kiīkitei pite. Uatxa ia ikanōkati pipinako, ininiā kipa apakapitari ikinipoko pikiena, pitii apaka?” itxa Teoso.

²¹—Ikara atoko itxa kākiti tiitxinoka xinikakari, Teoso maxinikati —itxa Xesosi ikara sākiretxiti ixipokini.

Teoso Nīkatiniua Ate

(Mateo 6.25-34)

²²Ininiā Xesosi misākiretari imoianariakori:

—Ininiākara nota sāpiretai hīte, maerekaxiniretinoka !hītšape, hiniākiti nire, mākatxi hīretaākiti nire.

²³Nipokori, mākatxi pakininoka kona txīkitakari pauini ereka inini. Nipokori, mākatxi pakini poiāoka.

²⁴Hātamatarī kotipiriki. Ninoā !itakarauata. !Amarina ikiena.

!Ipotetarina ikiena. Iuaritika Teoso sikakienatana ninoā. Teoso nīkatiniāri kotipiriki, inīkatapitikai hīte apaka. Hīte iki apiata. ²⁵Kinirepa maerekaxiniretinoka pitxa?

Pimaerekaxinirene !itxīkitakai apikomoni āti oara pauini. ²⁶Pimaerekaxinirene kona txīkitakai axapitiki apikomoni pauini, ininiā kinirepa maerekaxiniretika pitxa?

²⁷—Aāui pixinikako. Kona aāui parīkauata. !Ikamari imāka, iuaritika aāui peereri. Kitxakapirīka auītetxi Saromāo inakori, iteene katiiri itxaua. Kaiāori imāka ereri, iuaritika apia ereri ikinika aāui. ²⁸Aāui !okanani aua. Uatxa aua. Katana ikatikata iotikaāka. Iuaritika Teoso nīkatari aāui. Ininiā apiata inīkatari hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītšape.

²⁹ Ininiākara maerekaxiniretinoka !h̄txape. !H̄ixinikanātapiri nipokori mauakanisaaki, iāriā mauakanisaaki. ³⁰ Kākiti Teoso sākire mauiakani ikiniōtika maerekaxiniretinoka itxana imākana ixinikinina xika, inipokore ixinikinina xika. H̄iri imarotari himāka hinirekini, h̄ikiena hinirekini. ³¹ Merepitiapanika pinirekariko Teoso piauīte ininiāua. Iua nireēkiti pikamako, ininiā, himāka, h̄ikiena apaka Teoso sikaiko h̄ite —itxa Xesosi sākire.

H̄iparīka Īki Nikatiko

(Mateo 6.19-21)

³² —Ininiā h̄ite ninakitiakori !h̄ipikarauatape, kotxi h̄iri apokaerekatari isikinii ikinipoko erekari iua auītetxi ininiātaūakiri. ³³ Ikinika h̄itii h̄iv̄txitako. Txineiro h̄isikako matxineirotenimoni. Ikara atoko h̄ikaminiā, h̄iparīka ĩki auapitika Teoso tixine. Iuaā h̄iparīka ĩki lixipoka. Kiītiriri !t̄ir̄ikari. Kīiriki !inikari. Iuaā hin̄ikatariko h̄iparīka ĩki. ³⁴ Erekari h̄iparīka ĩki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi s̄apirenauatapanika:

—Himerekako, kamāka h̄txako. Tirikapi h̄iopotokakako. Iposope h̄txako n̄iparīka h̄ikamini ĩkapani. ³⁶ Nitiritxi ipatrāotena iātapakani atoko h̄txako. Ipatrāotena sari ĩtanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrāotena ĩroini ĩkapani. Ninoa nitiritxi atoko h̄txako. ³⁷ Patrāo apokasaaki initiriakori merekapanika inakasaaki, iātapanātakasaakiri iua, ininiākara erekapitikari. Himarotatari patrāo kamakiti? Iua ieretakari imāka

iparīkauatini ĩkapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrāotena apokasaaki imirekiniāna. Atxiīti apanīkanōka apoka ipatrāotena. Atxiīti imaropir̄ikata apoka ipatrāotena, iuaritika iposope itxana, ininiā erekapitikari.

³⁹ —H̄ixinikari ia. Kaapokori imarotaākamariko kiītiriri apokini, lauiritamariko iua aapoko ĩroini itii ĩtir̄ikini ĩkapani. ⁴⁰ H̄itepekana, h̄ite apaka iposope h̄txako, kotxi nota h̄itari iaxitikiri kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekari, Nitiritxi Maerekati Pakini

(Mateo 24.45-51)

⁴¹ Petro misākiretari Xesosi:

—Apiananiri, ikara s̄apirenatxi atāo inakari oerekiko pis̄apiretakiti, atenani poerekini ĩkapanikani? Ikinimane poerekini ĩkapanikani ikara pis̄apireta? — itxa Petro Xesosimoni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Luara apanakini nitiritxi auīte itxaua. Luara sikakienatana apanakini nitiritxi nipokotiko manapi. ⁴³ Nitiritxi ipatrāote paniātakiti iaōka kamakari poxokoniuata ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itii, aapoko, ikikiote pakini in̄ikatini.

⁴⁵ —Txamari atxiīti āti patrāo nitiri !inirekari ipatrāote paniātakiti iaōka ikamini, ipatrāote auapokotini xika. Atxiīti inoropatarī apanakini ipatrāote nitiriakori, apanakini ipatrāote niteroakoro apaka. Atxiīti inipokota, kapoāro iāta, ipoāta. ⁴⁶ Ipatrāote apoka initiri mimarotakanisaaki, ininiākara initiri !iposopanika ipatrāote apakapini.

Ikara xika ipatrāote misiritari iua. Eereka iokanataro iua Teoso sākire mauīākani misiritikoātaā.

⁴⁷—Nitiritxi ipatrāote nireēkiti imarotakari makamakaniāri ipatrāote paniātakitiki iposope inini ikapani, ixirokitataākako aāpitsaā. ⁴⁸Nitiritxi ipatrāote nireēkiti mimarotakati kaminiāri maerekati, ixirokitataākako, txamari poiāonoka. Teoso sikari parīkatxi, imaroretxi pakini kākitemoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua ikapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua ikapani —itxa Xesosi sākire.

Neenamatzxi Xesosi Sākire Auikiko Xika

(Mateo 10.34-36)

⁴⁹Xesosi sākirauatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitxīkitakini ikapani. Ninirekari ikara niparīka nixipokini. ⁵⁰Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹Kona neenamatzxi niotokakini ikapanini napoka ikorapokoriti. Nota sākire auikiko xika neenamatzxi auapitikako. ⁵²Aapokotxi āki auakani sīko. Atxiīti ipi āti pakini naiatari ipi, atxiīti ipi naiatari ipi āti pakini, nota sākire auikiko xika. ⁵³Irītxiakori omanatana ninoa ākiri nota sākire auikiko xika. Ninoa ākiri omanatana iriakori. Inorotxiakoro omanatana ninoa ākero. Ninoa ākero omanatana inoroakoro. Imakirotxiakoro omanatana otiroakoro. Otiroakoro omanatana

oimakiroakoro nota sākire auikiko xika —itxa Xesosi sākire.

Iaxiti Imarotiko

(Mateo 16.1-4)

⁵⁴Xesosi iuaīkana misākiretari kākiti:

—Atokatxi ereēkokinimoni ipiākaāpotakasaaki, “Āparaānapani,” hītxa. Ari, ikipapitikako. ⁵⁵Ītima ikiitaā ikari apokasaaki ikorapokoriti, hīte: “Kamoīpani,” hītxa. Ari, kapatakapatikariko. ⁵⁶Kamisirienererini hītxaua. Hātamatari iaxiti, itixi pakini, ininiā himarotapatikari āparaā, kamoī pakini. Kinirepa kona hātamatano nota? Kinirepa kona hīkenakotari nisākire Teoso kamaenetakitiki himarotini ikapani? —itxa Xesosi sākire.

Pimisiritiko Mereēkarimoni Pimasikani Ikapani

(Mateo 5.25-26)

⁵⁷—Kinirepa hīteka na xinikari atāo inakari hīkamini tūkane? ⁵⁸Maerekati pikamakasaaki, āti nirekari anikinii pimisiritiko mereēkarimoni. Iua anikinii apisapanika, pisākirauata iuakata atāo pikamini ikapani, ininiā iua !anikaikai pimisiritiko mereēkarimoni. Pimamisākiretaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹Atāo nisāpiretai, kona posipikari kateia ikinika pimisiritiko mereēkari paniātakitiki pimiīkitxitakanisaaki —itxa Xesosi.

Himatakanapakaniāri Himaerekani, Hīpinako

13 Xesosi sākirauatakasaaki, kāk-iti iuaā auakani sāpiretari iua Kariréia auakani okiko pirena. Ninoa Teoso misākiretiko aikotiā auakasaaki, ninoa okari ipirana imaerekanina Teoso makatxakini ikapani. Ininiā iuasaaki Pi-

rato sotatone apoka iuaã. Iuasaaki ninoa okana. ²Xesosi imarotari kãkiti ãkixinire xiniãkiti. Ininiã ia atoko itxa:

—Hĩte uãkatari ninoa Kariréia auakani maerekani apiata. Ininiã, “Ikara atoko inapeékana ninoani,” hĩtxa. ³Konapitini. Nota sãpiretai hĩte, himaerekani himatakanapakanisaaki, hĩpinako ninoa atokokana hinaãkako —itxa Xesosi.

⁴Ininiã Xesosi sãpiretana ninoa apanakini ipinini pirena:

—Xerosareẽ aua Siroee inakori aapokotxiti. Iua aapokotxi itanori irika. Irikasaaki, tesoito kikiakorini ipĩpe. Hĩte uãkatana iuaã auakani apia maerekani itxauana? ⁵Konapitini. Hĩtekanera himaerekani himatakanapakanisaaki, ninoa atokokanera hĩpina —itxa Xesosi.

Piko Mina Mariti Pirena

⁶Ininiã Xesosi sãpiretari ãti sãpirenatxi atão inakari oerekiko:

—Aua kiki. Initirikata isari ikikiote atini ikapani. Iuaãtaã aua amãtiiri piko inakori mina. Iuaã apokasaaki, maritoka otxa itakare. ⁷Ininiã itxari: “Ipikanani ãtikanani pakini ninapiima. !Kariro. Ininiã erekari otokiko, kotxi kona oĩriuata. Ininiã kona erekari uai okaikotini, kotxi oxipokari takari kiena kipatxi ãki auakari,” itxari initiri.

⁸Ininiã initiri: “Kona pitokapero. Nota oeretariko opatapi. ãti kipatxi erekari patari tikakata nitakapatapitaroko.

⁹ãtikanani inakasaakiaua karipeka oniniã, ereẽ oãua. Erekari okaikotini. Omiriuatakanisaaki, iuasaaki erekapekari otokiko,” itxa initiri —itxa Xesosi.

Tomatiko Õtisaaki Xesosi Makananitiniro Sito

¹⁰Tomatiko õtisaaki Xesosi auari aiko Xoteo apotiitiniãtaãua. ¹¹Iuasaaki sito apoka. Tesoito anokananipeka ina ami-

anaretakaro. Ia atoko otxa amianareta. Okomĩkaãpota, kotxi maerekati mata-matakoti amianari kamakari iroaĩtotaro. Kona oposota oõkitikaĩtotiniãua. ¹²Xesosi atamatakasaakiro, itxaro:

—Sito, erekapitikaiko uatxa —itxaro.

¹³Ininiã itakari iuako onopini. Iuasaakipeka oõkitikaĩtotaua. Ininiã iuasaaki otxa:

—Peerekari Teoso. Erekari imakinika ikamakiti —otxa.

¹⁴Iuasaakipeka Xoteo apotiitiniãtaãua aikotiã auakani auĩte naiataua, kotxi tomatiko õtisaaki Xesosi makananitaro amianatakaro. Ininiã iua txitari kãkiti:

—Auari seisi pakini õti kãkiti parikauatini ikapani. Ininiã ikora seisi õti hina iua makananitinii ikapani. Kona hinape tomatiko õti erekapeka hĩtxiki-takiko ikapani —itxana.

¹⁵Ininiã Xesosi txari iua:

—Hĩsãkire atxiĩti erekari, txamari kona hikamari hĩsãkire iaõka. Tomatiko õtisaaki hĩte tiretari hĩpiraakori, kotxi hanikari hĩpiraakori, kema auĩte iaãmoni ãparaã iãtinina ikapani. ¹⁶Oia sito Apraõni apika mekaniro otxaua. Satanasi kamaamianaretaro oa tesoito anokananipeka. Iaõpe. Apakatapitika tomatiko õtisaaki nitiretiniro oa, ni-makananitiniro oa —itxa Xesosi.

¹⁷Xesosi apakapapiretakasaakina, imokaiakariakori pẽtauata. Iuasaaki apanakini iuaã auakani poxokoniuata, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

¹⁸Ininiã Xesosi pimaãna:

—Natokopa itxa Teoso auĩtetxi ininiãua? Kiãtokopa itxa axinikiniri?

¹⁹Teoso auĩtetxi ininiãua mostata iki atoko itxa. Kiki takaro mostata ikikioteẽ. Oa aneẽ. Mitape onakasaaki kotipiriki kamari ikoa okatiã. Ikara

atoko itxa Teoso auítetxi ininiua —itxa Xesosi.

Merepanika poião kākiti auítetari Teoso. Eereka kaiāopokori kākiti auítetari iua. Txamari iuasaaki Satanasi apoka ninoamoni kotipiriki apokini atokokana.

Pão Tirekakari Pirena

(Mateo 13.33)

²⁰ Iuaĩkana Xesosi pimaãna:

—Natokopa itxa ikorapokoriti Teoso auítetxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiāopokori triko panikata, āparaākata. Eereka ikinika ipe tirekaāpota otxa.

Axapitiri Ironakikoãtaã

(Mateo 7.13-14, 21-23)

²² Ikara inaka atoko Xesosi potorika Xerosareẽ sitatxiti isini ĩkapani. Isaāpotakasaaki, isāpiretari Teoso sākire. Isāpiretari āti sitatxitiã, āti aapokotxitiã, āti sitatxitiã, itxaāpota isāpiretiniri Teoso sākire kākitimoni.

²³ Oerekarauanātakasaaki, kiki pimaãri:

—Niauĩte, poiãokani satako Teoso auiniãtaã?

²⁴ Ininiã Xesosi apakapapiretari:

—Teoso tixine ĩronakikoãtaã axapitiri. Hinirekariko iuaã hĩiroini. Kaiāopokori kākiti nirekari ĩroinina. Txamari, ĩposotarina. ²⁵ Kaapokori totiniri aapoko tore atoko itxa. Itotakasaakiri, kākiti iporikiti aritari itore: “Pimataakariko itore ate ĩkapani.” Iuasaaki iua kaapokori txako: “Kona nimarotai hĩte,” itxanako ninoamoni.

²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa.

²⁷ Ininiã iuaĩkana itxako ninoamoni: “!Nimarotai hĩte. Namonipa hãua hĩte? Hĩsipiniikaua. Imakinika hĩkamakiti ĩerekari.”

²⁸—Hātamatakasaakina Apraão, Isaki, Xakoo, ikinimane Teoso sākire sāpiretakani pakini Teoso auítetxi ininiãtaãua, iuasaaki hitxiapatapitikako. Apanakini ĩroãpeka. Txama hĩtenoka kaikotape iporikiti himaerekani xika. ²⁹ Teoso auítetxi ininiãtaãua apokako kaiāopokori kākiti, ikini itixiti ĩkani. Atokatxi pokĩkinimoni ĩkani, atokatxi ereẽkokinimoni ĩkani, atokatxi pokĩkini sanaremoni ĩkani, atokatxi pokĩkini kikomoni ĩkani pakini apokako Teoso kiiniritimoni. ³⁰ Merepitipanika

Xoteoakori kenakotari Teoso sākire, txamari ĩmaãkatari. Eereka Xoteo minakanuia kenakotari Teoso sākire, ininiã auikarina. Ininiã Xoteo minakanuia apokako Teoso auítetxi ininiãtaãua Xoteoakori apokini apisa —itxa Xesosi sākire.

Xesosi Tiretari Xerosareẽ Auakani

(Mateo 23.37-39)

³¹ Ikarasaakipeka ātikaka pariseoakori apoka. Itxarina Xesosi:

—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hĩsa iuamoni. Hĩtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxĩkitaka. Uatxa, katana pakini niparĩkauatako. Ipi āti õtisaaki nixipokariko niparĩka ĩkorapokoriti.” Ikara atoko hitxariko iua. ³³ Ininiã uatxa niparĩkauatako. Katana niparĩkauatako. Ininiã katana eereka nisa Xerosareẽmoni, kotxi ātiãtaã Teoso sākire sāpiretakani okikoãtaã !uari. Xerosareẽnanira ninoa ipina. Ininiã nota sako iuaã.

³⁴—Xerosareẽ auakanii, Xerosareẽ auakanii, hĩte okapekana Teoso sākire sāpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninikatinii,

patari oimiakori omíkita patapi otakini atokokana nitxanakamaiko híte. Txamari !háuiritano nota nĩkatinii. ³⁵Ikara atoko inakari xika haápoko asikaákako. Teoso !auaika hítekata. Nisápiretai. Ia óti hátamatano, eereka !hátamataikano. “Teoso takari erekari uaimoni íkarimoni, Apiananiri posotiireē íkarimoni,” hinakasaaki, iusaakinanirako hátamatanoko nota —itxa Xesosi.

Xesosi Erekapeka Txíkitakari Amianatakari

14 Tomatiko ótisaaki Xesosi sari pariseoakori auítemoni, iuakata inipokotini íkapani. Iuaā auakani mixinitari iua apoítinirina íkapani. ²Iusaakipeka apoka kiki amianatakari. Ikanoke, itapike, imakinika ananaítota. Iua apoka Xesosimoni. ³Ininiā Xesosi pimaāna Moisesini sákire oerekakani, pariseoakori pakini. Ipimaāna:

—Erekari atxiíti tomatiko ótisaaki amianatakari erekapeka nitxíkitakini? —itxa Xesosi.

⁴Ininiā ninoa tsoríkaānāta. !Apakapapiretarina. Ininiā iusaaki Xesosi erekapeka txíkitakari iua amianatakari.

—Pisipeka paapokomoni —itxa Xesosi.

⁵Eereka ipimaāna pariseoakori:

—Hípira kema auíte, hípira poho apaka aariko áki irikiniā tomatiko ótisaaki, iusaaki himaktxakatarari? Ari, himaktxakapitikari hípira tomatiko ótisaaki. Ininiā kinirepa kona hinirekatari erekari nikamini tomatiko ótisaaki? —itxa Xesosi.

⁶Txamari kona ninoa apakapapiretari, kotxi atāo Xesosi sákire.

Kiiniri Kamakari Pirena

⁷Iusaaki Xesosi itikana kákiti. Apanakini mereēri kákiti apiatakari

takote iitopákini. Ininiā isápiretari ia sápirenatxi atāo inakari oerekiko.

⁸Kákiti ítaniriuatini kiiniriti pirena isápireta:

—Kiiniriā hísikasaaki, kona himereēpiri kákiti apiatakari topákiniātaā hīitopákini, kotxi atxiíti eereka kemaítxitakori apiatakari apoka. ⁹Ininiā iua apiatakari apokasaaki, kakiiniriteri txaiko pite: “Íkíraā piitopáka. Ia kiki topáka nota takote.” Iusaaki pipétuata. Ininiā pitakanapari iuaā. Maparapeka apanakinikata topáka pitxa. ¹⁰Kiiniriā hísikasaaki, apanakinikata hīitopáka. Ikara atoko ininiā, kakiiniriteri akiritai: “Nitari uaimoni pina. Piitopáka uai. Uaira erekari.” Ikara atoko pininiā, apanakini iuaā auakani imarotariko pite apiatakari pininiāua. ¹¹Átikaka kákiti txari: “Nota apiari nitxaua.” Txamari Teoso txariko: “Poiāori itxaua.” Átipekana txari: “Nota poiāori nitxaua.” Txamari Teoso txariko: “Iua apiari itxaua.”

¹²Xesosi txari ikemaítxitakiri:

—Kiiniri pikamakasaaki, kona pikemaítxitapiri pinirimane, pitariakori, paókimaneri, paapoko takote auakani, katxineiroteni pakini, ninoa iuaíkana kemaítxitinii pite íkapani. Ininiā ikara atoko ninoa íkitxitai. ¹³Apiaerekata kiiniri pikamakasaaki, pikemaítxitari kákiti minakati mauakiniti, mokirini, matípokotakati pakini. ¹⁴Ikara atoko pininiā, Teoso sikari erekari pitemoni, kotxi ninoa !iposotari kiiniri ikaminina, uaritika kákiti erekarini iuaíkana ókitikasaakíua, iusaaki Teoso íkitxitaiko pite —itxa Xesosi sákire.

Kiiniri Mitari Pirena

(Mateo 22.1-14)

¹⁵Ininiā áti Xesosikata nipokotakari kenakotari ikara Xesosi sákire. Ininiā iua txari:

—Teoso auítetxi ininiãtaãua sikani nipokotako iuaã. Ininiã iusaaki Teoso sikapoxokonitana —itxari.

¹⁶Ininiã Xesosi apakapapireta. Ia atoko itxa:

—Kiki kiiniri kamakari kemaïtxitari itomaneri kãkiti. ¹⁷Nipokori iposopeka inakasaaki, iokanitari initiri ikemaïtxitakinimoni: “Masa kiinirimoni. Iposopekari imakinika nipokori,” itxa.

¹⁸—Txamari ikemaïtxitakini kamari ãti sãkiretxi kiinirimoni imasikanina ïkapani. Ininiã kemaïtxitakori txari: “Nota amotari itixi. Iua ninireka natini. Ininiã !niposotari nisini kiiniriã,” itxa.

¹⁹—Ininiã ãti: “Nota amotari tesi kema auíte parïkauatakani. Ininiã nota sari ninoamoni. Ninireka nimarotiniri ninoa parïka. Pauiritano nisini ninoamoni,” itxa.

²⁰—Ãtipekana: “Nota ïtanorouatape. Nïtanoro auano nota. Ininiã kona niposota nisini pikiiniritemoni,” itxa.

²¹—Ininiã initiri kanapiriã iauítemoni. Ikinipoko ikemaïtxitakini sãkire isãpireta iuamoni. Ininiã iusaaki iua auítetxi naiataua. Ininiã ipaniãtari initiri: “Sitatxi auakari kimaporitiã pisa. Katima pitxako. Piminana kãkiti minakati mauakini, matïpokotakani, mokirini pakini pimina,” itxari. ²²Ininiã katimaritika ikamari ikinika auítetxi paniãtakiti. “Nikamapekari ikinika pipaniãtakiti, txamari auapanika nipokori. Apakatapanika kãkiti nikini ïkapani,” itxa.

²³—Ininiã iuaïkana, iua auítetxi paniãtari sitatxi mapara òtako isini. “Iuaã pakiritana kãkiti inini, naapoko kãkiti xãpokini ïkapani. ²⁴Atãopitikara nitxai: ‘Mitxi nikemaïtxitakini !nikapaniri nikiena,’” itxa.

Xesosi Moianari Pininiua

(Mateo 10.37-39)

²⁵Ãti òti itomaneri kãkiti moianatari Xesosi. Ininiã ikirioka sãpireta itxana ia sãkiretxiti:

²⁶—Nota kinirão moianataka hinakasaaki, apiata hïtiretanoko nota. Merepanika hïtiretanoko nota, eereka hïtiretanoko hïri, hinoro, hïtaniri, hïtanoro, hïtari, hïtaro, hamarite pakini. Hïteka apaka poião hïtiretauako. ²⁷Nota kinirão moianataka hinakasaaki, notakata hïsa. Himamïteenekakanisaakiri himisiritiko nota ïkapani, ininiã !apakata himoianatinino.

²⁸—Hinirekiniãri aapokotxi mitari sitatxi auakari atoko hïkamini, merepanika hïxinikaroko txineiro aapokotxi kamiko karone. Atxiïti !apakata hïtxineirote. Atxiïti apakata. Ikara atoko hïxinika merepanika. ²⁹Ikara maxinikati merepanika !ixinikari, ininiã atxiïti itakari itsota, ininiã eereka txineiro !uaaika, ininiã kona apakata imakinika ikamini. Ininiã apanakini napetari iua. ³⁰Ininiã ninoa txari: “Hãtamatariko ikamakiti. Iua kiki potorikamari ïkora aapoko, txamari liposotari imakinika ikamini.” Ikara atoko itxanako. Ininiã pikamakiti apisapanika iteene hïxinikariko.

³¹Ininiã eereka Xesosi sãpiretari ãti sãkiretxi:

—Auítetxi auari tesi mio sotato. Iua nirekari neenamati ikamini ãti auítetxikata. Txamari ãti auítetxi auari vïtxi mio sotato. Iua tesi mio sotato auakiti merepanika xinikari, atxiïti iposota ineenamauatini vïtxi mio sotatokata? Atxiïti auítetxi vïtxi mio sotato auakiti xipokari iua? Ininiã apisapanika ixinikari. ³²Imaposotakaniãri, vïtxi mio sotato òtakapanika auakasaaki, iua auítetxi

tesi mio auakiti iokanapireta āti auītetximoni isākirauatinina īkapani, neenamatzki xipokini īkapani.

³³—Erekari iua auītetxi neenamatzki takanapakari atoko hinini. Ininiā merepanika hākixinireē hīxinikariko: “Nota nirekatari nimoianatiniri Xesosi, kotxi pasāpaniri?” hītxa. Atāo hinirekiniāri himoianatinino, ininiā imakinika hītakanapako notakata hīsini īkapani. Himanirekakaniāri hītakanapiniri imakinika, ininiā !apakata himoianatinino. Ininiā hīxinikariko merepanika —itxa Xesosi.

Iōkira Matxoato Pirena

(Mateo 5.13; Marko 9.50)

³⁴—Iōkira peerekaro. Omatxoaniā, !otxaika. Aua kākiti iōkira potxoaro atoko inakani, ininiā erekapitikana ninoa. Apanakini kākiti iōkira matxoato atoko itxana. !Kakamarena ninoa. ³⁵Iōkira matxoato ininiā, !apakata takari sikakienatiko īkapani. !Apakata hīkokeitiniri kipatxikata, pirātxi tikakata takari sikakienatiko īkapani. Kona erekaro. Maparamoni oōkapeēkaika. Ikara atoko itxa apanakini, kotxi ninoa !kakamarena.

—Kakenakokii hīte, ininiā hīkenakotariko ia nisākire.

Soti Auīte Ereēkokakari

(Mateo 18.10-14)

15 Āti ōti auītetxiakori txineirote apakapakani, apanakini maerekati kamakani apaka apotiitaua Xesosi sākire ikenakotinina īkapani. Ninoa kaiōpoko. ²Iuasaaki pariseoakori, kaiōkatsopareriakori pakini misākirepiretari Xesosi. Itxana:

—Iua apakapari maerekani. Maerekanikata inipokota —itxana.

³Ikara isākirena xika Xesosi sāpiretari ipi, āti pakini sāpirenatxi atāo inakari oerekiko. ⁴Ia atoko itxa Xesosi:

—Atxiīti pite aua seī soti auīte. Āti pīpinanakiniā, kipa pikama? Pitakanapari apanakini mapara inipokotiniātaā apanakini nīkatini īkapani. Ininiā eereka pisari pīpinanakakari pinitini īkapani. ⁵Papokasaakiri iua pīpinanakakari pipoxokoniuaata. Piporikiāpotari pipira paapokomoni. ⁶Papokaāka atoko pakiritana paōkimaneriakori, apanakini kākiti pakini. Pitxana ninoa: “Hīpoxokoniuaatako notakata, kotxi napokapekari nipira pīpinanakakari,” itxa soti auīte pitikiri.

⁷—Nisāpiretai hīte, ātika maerekati kamakari takanapakasaakiri imaerekani, iaxiti Teoso auiniātaā auakani poxokoniuatapitikako. Atxiīti novēta novi kākiti iuikakaniua txari: “Peerekaua ate. !Akamari maerekati,” itxana. Txama kona atāo isākirena. Ninoa sākire kona kamari iaxitikini poxokoniuatini —itxa Xesosi.

Ota Pirata Kamakoro Ereēkokakaro

⁸Apikomoni Xesosi txari:

—Sito aua tesi ota pirata kamakoro. Pakaronero. Āto ereēkokiniā, ininiā onitakasaakiro oiopotokakari tirikapi. Oiatīkaāpotari oaāpoko ota onitaāpotini īkapani. ⁹Oa apokasaakiro, apanakini oākirita: “Hīpoxokonuatako notakata. Napokapekaro ota ereēkokakaro,” otxa.

¹⁰—Kākiti poxokoniuaata ota pirata kamakoro apokikosaaki. Nisāpiretai, iaxiti Teoso nitiriakori apiapoxokoniuaata, āti maerekati kamakari imaerekani itakanapakasaaki —itxa Xesosi.

Imi Ereēkokakari Pirena

¹¹Apikomoni Xesosi txari:

—Aua kiki. Ipi imiakori. ¹²Maneri takari amanaāri iri. Itxari: “Ninirekari pitakanapakito pipīkasaaki pisikini no-

tamoni uatxa,” itxa. Ininiã iri xanakari inakiti imiakorimoni. ¹³Eereka mapaõti inaka atoko, iua ãtokori apotiitari iri sikakiti. Ininiã eereka isipeka. Ôtakoxiti ãti tixini isa. Iuaã maerekati ikama. Iuaã xipoka itxari iri sikiniri.

¹⁴—Ikinika ixipoka iuaã. Iuasaaki ãparaã !ikipa. Natxipokoni auari. Nipokori !auari. Ininiã iuasaaki iua minakati !auari. Imakinika xipope. ¹⁵Ininiã iuaxiti auakarimoni isa, parĩkatxi amanaini ĩkapani. Ininiã ipatrãote paniãtari iriakori isikakientatini. ¹⁶Irriakori isikakientakasaaki, natxinoka itxa. Iuasaaki iua nirekari irriakori kiena inikini, kotxi iua sikakientakari !auari.

¹⁷—Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸Nikanapiriãko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹Kona pamarite na pitxaikanoko, kotxi !erekano. Pitxĩkitakano pinitiri nininiua.’ Ikara atoko nitxariko niri,” itxa. ²⁰Ininiã iua aiamata, kanapiriã itxa iri aapokomoni. Iuasaaki iri iãtapanãtari iua ikiniõtika.

—Ininiã iua apokaãpotakasaaki, õtakopanika, iri atapari iua. Ininiã iri miteẽkata iuamoni. Ininiã iteene ipoxokoniuata. ²¹Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²²—Iuasaakipeka iri akiritari initiriakori: “Katima hĩtxako, mãkatxi ereri himinini. Aneo ereri hĩtakako iuakokimoni. Ikiti mata hĩtakako ikitiã. ²³Kema auĩte kiĩri hõkako. Kiiniri makamako. Manipokota. Mapoxokoniuata, ²⁴kotxi ia namarite ipĩkari atokopeka, uatxa iuaĩkana

ikanapiripeka. Mitxi pĩpinanakakari atoko itxa, uatxa apokapeẽkaika,” itxa.

—Ininiã iuasaaki ninoamoni ipoxokoniuatini apopeka.

²⁵Ninoa kiiniritauatakasaaki, imi aneẽkari tokoriã iparĩkauanãta. Ikanapiriãkasaaki aapokomoni, ikenakotari xikari, serẽkatxi ene pakini.

²⁶Ininiã akiritari iri nitiri: “Kiripa ikara?” itxari. ²⁷Iri nitiri apakapapireta: “Pitari apoka. Ininiã piri paniãtari kema auĩte okiko, kotxi erekapanikari pitari. Kona monõkori apoka iuamoni. Erekari ikanapiriini,” itxari.

²⁸—Ininiã ikara ikenakotakasaaki, inaiataua. Kona inirekari ĩroini kiiniriã. Ininiã iri iuamoni sa itxa. Akiritari: “Pĩroã,” itxari. ²⁹Ininiã iua apakapapiretari: “Itori mitaãti niparĩkauatinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorikata kiiniri nikamini ĩkapani. ³⁰Iua pamarite xipokari pitxineirote. Sitokata isirika. Txama ikanapiriãkasaaki, pokari kema auĩte. Kiiniri pikama iua ĩkapani.” Ikara atoko itxitari iri.

³¹—Iri apakapapireta: “Namarite, ãtipirika pauapika notakata. Ikinika nota nakiti pite nakiti txaua.

³²Erekapitĩkari kiiniri nikamini apoxokoniuatini ĩkapani, kotxi pitari ipĩkari atokopeka itxa. Uatxa auapanika. Pĩpinanakakari uatxa apokapeka,” itxari.

Nitiritxi Kamisirienereri

16 Xesosi sãpiretana imoianariakori:

—Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ²Ikara atoko ininiã, iua akiritari initiri: “Nikenakopiretari pite misirienetinino nota. Ininiã piminari tiitxi piamotiitini tsopa.

Ikara pisikasaakino, niokanatai pisini. Kona apikomoni piparíkauataika nota íkapani,” itxa.

³—Ininiã initiri ãkixinireë: “Kipa nikama uatxa, kotxi nipatrãote paítiki iokanatano. !Kataparano nota, ininiã !niposotari atokatxi patapi nipaříkauatini. Nipëtauata txineiro maxikatiika namanainiri kãkiti.

⁴Uatxaika nimarotari nikamakiti tíkane. Ininiã nipaříka xipokasaaki uai, kãkiti apakapapanikano nota ninoa aapokoã,” itxa.

⁵—Ininiã akiritana kãkiti ipatrãote maíkixitakani. Ininiã ipimaãri ãti: “Kipakinipa !piíkixitapanika nipaatrãotemoni?”

⁶—“Seí kopiti ítxi auakiti kona niík-ixitapanika,” itxari.

—Ininiã iua nitiritxi txari: “Pikosekari pimaíkixitakiniti tsopa. Pitakari sikoëta kopitinoka,” itxari.

⁷—Ininiã ãti ipatrãote maíkixitakari ipimaã: “Kipakinipa kona piíkixitapanika nipaatrãote?”

—Iua apakapapiretari: “Seí atarokiri kotarina,” itxa.

—Itxari iua: “Pimaíkixitakiniti tsopa pikoseka. Oitëta kotarinoka pitaka,” itxa. Ikara atoko ikama ninoa íkapani, ininiã ipaříka itakanapaka atoko, ninoa apakapari iua ninoa aapokoã.

⁸—Ininiã iua patrãote ikara imarotakasaaki, itsoríkaãta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.

—Teoso sãkire mauíãkani imarotapitikari ixinikinirina paríkaxi katana ikamakitina. Atxiíti Teoso sãkire auíãkani !imarotari ixinikinirina paríkaxi katana ikamakitina. ⁹Nisãpiretai híte, íkorapokoriti hãuakasaaki, híxinikari ikara nitiritxi. Hísikari hítii, hítxineirote pakini Teoso paříka íkapani, Teoso mimarotakani

atão inakari imarotininina íkapani. Eereka atxiíti Teoso mimarotakani moianatai. Eereka ninoa apaka imarotari aíri iaxitikiri. Eereka ãti ôti haókítana ninoa iaxiti.

¹⁰—Axapitiki paríkaxi atão pikaminiã, ininiã kãkiti auikariko piposotiniri paríkaxi apiatakari pikamini apaka. Axapitiki piítiriuata mitxi, ininiã eereka kaiãori piítiriuata.

¹¹Txineiro uaimonipokoriti auakari himimarotakaniãri hiníkatini, ininiã kona híposotari hiníkatiniri erekari Teoso sikakiti. ¹²Apanakini tii pimaníkatakaniã, ininiã kona kãkiti sikai tiitxi pinakiti inini íkapani.

¹³—!Apakata kãkiti paríkauatini ipi iauítëna íkapani, kotxi atxiíti ãti omanata, ãti itireta. Atxiíti ãti apokaerekata, ãti inorita. Iua atokokana kãkiti kona posotari ipaříkauatini tiitxi ikinipoko iamotini íkapani, Teoso íkapani ipaříkauatakasaaki. !Apakata piauítëtiniri Teoso, txineiro piauítëtakasaaki —itxa Xesosi.

Teoso Sãkire Maxipokakani

(Mateo 11.12-13; 5.31-32;

Marko 10.11-12)

¹⁴Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵Ininiã Xesosi sãkirauata ninoamoni:

—Híte txa apanakinimoni: “Ate !likeroka. Peerekaua ate,” hítxa híãkire. Txama Teoso imarotari hãkixinire. Kãkiti uãkatari erekari híkamini, txama Teoso omanatari híkamakiti.

¹⁶—Kítxakapiríka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisareri apoka. Iuasaaki Teoso iokanapirena erekari auítëtxi ininiãua sãpiretaãka. Itomaneri iteene nirekari isini Teoso auítëtxi ininiãtaãua íroini.

¹⁷—Teoso sākire lixipoka. !Ixipoka axapiti. Auapika imakinika isākire. Itixi, iaxiti pakini xipokapitikako, iuaritika Teoso sākire lixipoka.

¹⁸—Teoso sākire iōkatakori kitxakapirīkari auapanika uatxa. Ininiā itanorotxi asikakari āto itakini ikapani inakari, maerekati ikama. Apaka sito takanapakoro takakari maerekatikanera ikama. Ikara Teoso sākire auapanika. Kona ixipoka ikara —itxa Xesosi.

Katiiri, Arásaro Pakini

¹⁹ Xesosi sākiraumatapanika. Ia atoko itxa:

—Aua kiki katiiri. Peereri imāka. Pōkamarari imāka. Apiaerekata imāka. Ikiniōtika peerekari ikiena. Imakinika iua auakiti peerekari. Iua aapoko ikiniōtika kiinirisaaki auakari atoko itxapika ikiena.

²⁰—Āti kiki Arásaro inakori. Pamatinaniri. Minakati !auinari iua. Iua sirīka katiiri aapoko patapi koa. Amianari aua iuamoni. Ininiā iito imakinika kakaro.

²¹ Kinirāo nika inakasaaki, ixiti okakorinoka inika. Iuaā anāpa amerokari ikaro.

²²—Ikara atoko ininiā, eereka ipīpe. Ininiā eereka Teoso nitiriakori iaxitiki anikari iua Teoso auinimoni. Kitxakapirīka Apraāo sari iuaā. Iuaā iua Arásaro aōkitari Apraāo.

—Eereka iua katiiri apaka ipīpe. Ikataāka. Isari maerekani misiritikoātaā.

²³ Iuaā maerekani misiritikoātaā auakasaaki, ōtakoxiti atamatarari Apraāo, Arásaro pakini. ²⁴ Ininiā akiritari Apraāo: “Toti Apraāo, piamonikano. Pipaniātariko Arásaro iākiniri iuakoki iaā, tapikaka itxa ninamamoni. Ia xamina sikatsiitapitipono,” itxa.

²⁵—Apraāo apakapapireta: “Pixinikariko kākitekata pauakasaaki, kaiāori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani,

natxinani pakini auari. Uatxa iua poxokoniuātakasaaki, pite atatsiitari pimisiritiko. ²⁶ Patamata ereē sauana auite. Kona ate posotari hitemoni asini. Hite apaka kona posota uaimoni hāpokini,” itxa Apraāo.

²⁷—Iuaīkana katiiri: “Toti, pikenakotano. Pipaniātariko Arásaro niri aapokomoni isini. ²⁸ Iuaā aua siko nitariakori maneripanika inakanuia. Isāpiretanako: ‘Kona erekari uai. Erekari ia misirikaretxi auiniātaā imikanina. Ininiā uatxa ikamarinako Teoso sākire paniātakiti,” itxa katiiri.

²⁹—Ininiā Apraāo: “Ninoamoni auape Teoso sākire, Moisesini sāpiretakiti, apanakini Teoso sākire sāpiretakani sāpiretakiti apaka. Ininiā pitariakori posotari ikenakotinirina ninoa sākire,” itxa Apraāo.

³⁰—Ininiā katiiri txari: “Toti Apraāo, ikara atokonani !apakata. Ipīkari kanapiriiniā ninoamoni, iuasaakiikarako itakanaparina imaerekanina.”

³¹—Ininiā Apraāo: “Pitariakori !auikari Moisesini sākire, apanakini Teoso sākire sāpiretakani sākire pakini. Ipīkari kanapiriiniā ninoamoni, iuaritika ninoa !auikari Teoso sākire. Ikara atoko ininiā, kona nipaniātari Arásaro isini ninoamoni,” itxa Apraāo.

Ikara atoko itxa Xesosi sāpiretakiti.

Maerekati Oerekakari

(Mateo 18.6-7, 21-35; Marko 9.42)

17 Xesosi txari imoianariakorimoni: —Aua maerekati oerekakani. Ninoa kākiti kamari maerekati. Ikara atoko inakani apokapitikako. Ninoa xika kākiti kamari maerekati. Maerekati oerekakari misiritaākapitikako. ² Teoso omanatarari kākiti maerekati oerekakani. Kākiti txīkitakiniāri amarini nota sākire auīākari maerekati ikamini !apakata. Erekamariko iua

kákiti maerekati oerekakari kai mitariã iaxirikanokitaãkamako, ipoa apaníkakiã okaãkamako ipinini ìkapani. ³Erepaniko. !Pikamapiriko maerekati. Pitari Xesosi sãkire auiãkari kaminiãri maerekati pitemoni, põtãkikariko, imaerekani itakanapini ìkapani. Itakanapiniãri, !pixinikapinikari ikara maerekati ikamakiti. ⁴Atxiiti ãti õti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinikaretariko maerekati nikamakiti. !Nikamaikari,” itxa. Ininiã ìkora õti iuaikana maerekati ikama pitemoni. Iuaikana amanaãri imaerekani pimaxinikaretini tũkane. Atxiiti ìkora õti setxikata ikara atoko ikama pitemoni, ininiã pimaxinikaretariko ikinika maerekati ikamakiti —itxa Xesosi.

Xesosi Sãkire Auikiko

⁵Xesosi iokanatakini txari Xesosi:

—Pitxikitaakaua ate apikomoni aãuikiniri Teoso sãkire —itxana.

⁶Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, iuaritika hĩposotapitikari hĩpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapitikariko pisãkire iaõka —itxa Xesosi.

Nitiritxi Parĩka Pirena

⁷Xesosi txari:

—Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸Pitxari: “Auapanika parĩkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹Pipaniãtakitinanira ikama, ininiã kona

pitxa: “Erekapitikari piparĩka,” kotxi pipaniãtakitinani ikama.

¹⁰—Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niaũte paniãtakitinani nikama.”

Xesosi Makananitinina Paiaka Matatakani

¹¹Xerosareẽmoni Xesosi sikasaaki, inapari Samaria tõpa. Ipinimoni auari Karirẽia tõpa. ¹²ãti aapokotxi apokaãpotakasaaki, aõkitana tesi kikiakori amianatakani paiaka matatakani. ¹³Ikira atoko akiritarina:

—Xesosi, koerekareri, piamonĩkaua ate —itxana.

¹⁴Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iĩtona oerekinina ìkapani.

—Sasetotximoni hĩsako. Hõerekariko hĩito iuamoni —itxa Xesosi.

Iuamoni isaãpotakasaakina, ikinipoko ninoa erekapeka itxana. ¹⁵Ninoa amianatakani erekapeka, txamari ãtinani kanapiriã Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶Ininiã ikapotoreẽkaua Xesosi apisatoõ.

—Notamoni pikamakiti peerekari —itxa.

Samaria tõpakiri iua kiki. ¹⁷Ininiã Xesosi txari:

—Nota makananitana tesi kikiakori. Ìtapari apanakini? Auapanika novi kikiakori nimakananitakini. ¹⁸Ia kiki Samariakiri. Ianokara kanapiriã, “Peerekari Teoso,” inini ìkapani. Ninoa Xoteo iua atoko litxana —itxa Xesosi sãkire.

¹⁹ Ininiã itxari iua Samariakiri:

—Pökkitikauako. Pisako. Pite auikari nisäkire, ininiäkara erekapekai —itxa Xesosi.

**Kanatokopa Itxa Teoso
Auítetxi Ininiãtaãua?**

(Mateo 24.23-28, 35-44)

²⁰ Äti öti pariseoakori pimaãri Xesosi:

—Kirisaaakipa Teoso ikinimane auíte inini öti apokatako? —itxana.

Ininiã Xesosi apakapapiretana:

—Teoso auítetxi inakasaakiaua, kãk-iti !atamatari iua apokini. Teoso kãk-iti auíte inakasaaki, iua kãkiti äkix-inireẽ apoka. ²¹ Iuasaaki kãkiti !akiritari: “Uaikaarari Teoso auítetxi ininiãtaãua. Ikiraãrari Teoso auítetxi ininiãtaãua.” Ikara atoko !itxana, kotxi hïx-inire äkirari Teoso auítetxi ininiãtaãua —itxa Xesosi.

²² Ininiã itxa imoianariakorimoni:

—Apokako äti öti nota hïtari iaxitikiri iteene kinirão hãtamatini. Txamari !hãtamatano. ²³ Apanakini säpiretaiko hïte: “Ikiraãrari iua.” Äti säpiretari: “Uaikaarari iua.” Iuasaaki kona himaãkatapiri ikara atoko inakari säkiretxiti. !Hãuikapiri ikara atoko inakari. ²⁴ Hïtari iaxitikiri kanapiriãkasaaki, mëkokari ätiãtaã potoriikini, ätiãtaã apokini, iua atokokana nikanapiriini. Katimaritika napokako. Mëkokari atoko nitxako napokini. Iuasaakiika ikinimane kãkiti atamatano. ²⁵ Nikanapiriini apisapanika, nota hïtari iaxitikiri iteene ninikoriãriko nimisiritiko, kotxi kãkiti uatxa auakani kona nirekano. ²⁶ —Nota hïtari iaxitikiri kanapiriãkasaaki, Noe auakasaaki atokokana itxapaniko. ²⁷ Noe auakasaaki, ikinimane nipokota. Iãta. İtanorouata. Ikara atoko itxapikana. Äti öti Noe, inirimanekata maporo äki iïroãna. Eereka imaiãtapakinitipanika äparaã

kipakata. Xãpoãkata. Ininiã xirataãtxi xipopena ikinimane. Ikara atokotxikana itxako nota kanapiriãkasaaki.

²⁸ —Aroo inakori auakasaaki atokokana itxako nota kanapiriãkasaaki. Iuasaaki ikinimane nipokota. Iãtana. Iamotiitana. Isikatiitana. Itakarauatana. Aapokona ikamana. ²⁹ Sotoma sitatxiti Aroo potoriikini öti, iuasaakipeka xamina äparaã kipini atoko itxa ikatxakini. Xamina miniki katxaka. Ininiã ikinipoko iuaãtaã ariãkata.

³⁰ —Iuasaaki kãkiti !imarotari xamina katxakini öti. Iua atokokana kãkiti !imarotari nota hïtari iaxitikiri apokini öti. ³¹ Napokini öti haãpoko mapara hãuiniã, kona hïkanapiripe haãpokomoni hïtii hãpini ikapani. Tokoriã hãuiniã, kona !hïkanapiripe haãpokomoni. !Apakata hïkanapiriini iuaã. ³² Hïxinikaroko Aroo İtanoro. Kona oa atoko hïtxape, kotxi oa ipina, kotxi !onirekari otakanapiniri sitatxi maerekani auiniãtaã.

³³ —Pite ätipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota säkire pauikini xika, pite auapininiika txako Teosokata.

³⁴ —Nikanapiriãkasaaki, ia atoko itxako. Nikanapiriini İkanökati atxiiti ipi kãkiti imakanãta imakiniãtaãna. Iuasaaki Teoso säkire auiaãkari sari notakata. Teoso säkire mauiaãkati kaikota.

³⁵ —Iuasaakiko atxiiti ipi sito kamanãtari atarokiri. Teoso säkire auiaãkaro sari notakata. Teoso säkire mauiaãkato kaikota.

³⁶ —Iuasaakiko atxiiti ipi kiki kiki parikauata. Äti sa notakata, äti kaikota —itxa Xesosi.

³⁷ Ininiã imoianariakori pimaãri:

—Namoniparako? —itxana.

Ininiã iua apakapapiretana:

—Aátamatakasaakiri maiori apotiitiniátaáua, ikinimane imarotari ipíkari iuaátaá auini. Iua atokokana ikinimane atamatariko kákiti apotiitiniua notakata nikanapiriákasaaki —itxa Xesosi.

Sito, Kákiti Misiritiko Mereékari Pakini

18 Xesosi misákiretari imoianariakori áti sápirenatxi atão inakari oerekiko, Teoso misákiretiko pirena. Ikara inakari oerekari kákiti átipirika imisákiretiniri Teoso, Teoso misákiretiko imatakanapakani ikapani.
²Xesosi sápiretari ia sákiretxiti:

—Sitatxi auari kákiti misiritiko mereékari. Iua kona paxitari Teoso. Kona ipaxitari kákiti apaka. ³Iuaã sito apaka aua. Ótaniri ipípe. Tikinitakoro otxaua. Oa nirekari iua atão ikamini oa misiritakarimoni. Txamari iua kákiti misiritiko mereékari !ipotxitari omokaiakari pirena ikenakotini. Osápiretapikari iuamoni: “Pikenakotariko nisákire. Pikamariko atão nota misiritakarimoni. !Nimíteenekaikari nota misiritakari apikomoni misiritinino,” otxa.

⁴—Isápakapekari átipirika osákire ikenakotini. Ininiã eereka ixinikari: “Atáopitikara, kona nota paxitari Teoso, kákiti pakini. Iuaritika nikamariko onirekakiti, kotxi ⁵átipirika oa tikinitakoro amanaánatano, ininiã nikamaákaretxitaro. Ininiã nikamariko onirekakiti, kotxi nisápakapekaro osákire. Átipirika ikara atoko otxanátapikano. !Nimíteenekaikari,” itxa kákiti misiritiko mereékari.

⁶Ininiã Xesosi txana imoianariakori:

—Ikara kákiti misiritiko mereékari kona erekari, iuaritika ikamari osákire iaõka. ⁷Teoso apiaerekata. Ininiã ikenakotapitikari imereékini sákire pokamara, íkanõka. Ninoa amanaári Teoso imoianatinina. Ininiã

apiata Teoso kenakotari isákirena. Patimari Teoso kenakotiniri imereékini amanaákiti. ⁸Nisápiretai, patimari Teoso misiritinina ninoa misiritakani. Ia nipimaái. Nota hítari iaxitikiri iuaíkana nikanapiriákasaaki, atxiíti napokari nisákire auíákani íkorapokoriti? —itxa Xesosi.

Pariseo, Txineiro Apotiitakari Pakini

⁹Iuikakaníua !apokaerekatari apanakini. Ninoamoni, ninoanokara kamari atão. Áti óti Xesosi sápiretari ia sápirenatxi atão inakari oerekiko, kákiti ikara atoko inakanimoni atão imarotininina ikapani:

¹⁰—Ipi kiki sari Teoso misákiretiko aikotimoni. Áti kiki pariseo itxaua. Áti kiki auítetxiakori txineirote apakapakari itxaua. Iteene iua misiritari kákiti, kotxi kákitimoni imakatzakaro apikomoni txineiro. Kona atão imakatzaka. Imisiritari kákiti. ¹¹Iuaã pariseo tima Teoso imisákiretini ikapani. Txama iuaka imisákiretaua. Ia atoko itxa isákire: “Teoso, nota poxokopitikano, kotxi nota apanakini atoko kona nitxa. Kiítiriri !nitxaua. Kákiti misiritakari kona nitxaua. Kona nota siríka áti ítanorokata. Kona nota ia txineiro apakapakari atoko na nitxa. Konapitini. ¹²Ikini semanati, ipi óti nitakanapari ninikini pite nimisákiretini ikapani. Txineiro nisikai. Tesi txineirota auiniãno, átoka nisikai, ininiã pipaniátakiti iaõka nikama,” itxa iua pariseo.

¹³—Iuasaaki txineiro apakapakari ikira atoko itima. Kona ionakaáta iaxiti. Iaritari itorota imaerekani oerekini ikapani, kotxi maerekati ikamapeka. Itxari Teosomoni: “Teoso, piamoníkano. Kona erekano nota, kotxi maerekati kamakarino nota,” itxa txineiro apakapakari.

¹⁴Ininiã Xesosi txari:

—Atāopitikara nisākire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso !ikamaerekatari iua.

—Iuikakariua, poiāori itxauako. Poiāoripekana, apiatakari itxauako —itxa Xesosi.

Amarini Apokini Xesosimoni

(Mateo 19.13-15; Marko 10.13-16)

¹⁵ Āti ōti kākiti minari amarini Xesosimoni erekari ninoamoni itakini ikapani. Txamari Xesosi moianariakori atapakasaakiri kākiti imiakori mīkani, isipikapana.

—Hīkanapiripeka. Hīsipeka —itxana.

¹⁶ Txamari Xesosi txari imoianariakori:

—Hāuiritanako amarini notamoni apokini. !Hīsipikapapena amarini, kotxi nitiretapitikana ninoa. Nisākire auīākani auikari nisākire amarini auikini atoko. Kākiti nisākire amarini auikini atoko inakaninokara apoka Teoso auītetxi ininiātaāua. ¹⁷ Amarini auikari iri sākire. Ininiā hīxinikariko ia: Amarini atoko himinakaniā, Teoso sākire iteene himauikakaniā, ininiā Teoso auītetxi ininiātaāua !hīiroā —itxa Xesosi.

Kiki Katiiri Pirena

(Mateo 19.16-30; Marko 10.17-31)

¹⁸ Xoteo auīte pimaāri Xesosi:

—Koerekareri erekari, kiripa nikama Teosokata ātipirika nauini ikapani? —itxa.

¹⁹ Xesosi txari iua:

—Kininiāpa “erekari,” pitxano? Kākiti erekari !auari. Teosonanira erekari. ²⁰ Pite imarotapitikari Teoso paniātakiti: “!Pisirikape āti !tanorokata. !Pokaniuatape. !Pītiriuatape.

Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sākire.

²¹ Ininiā iua kiki apakapapiretari:

—Nota axapitipanika ninakasaaki, nikīpitari ikara atoko inakari sākiretxiti Teoso paniātakiti —itxa.

²² Xesosi kenakotakasaakiri iua kiki sākire, itxari:

—Auapanika ātinoka pikamini tīkane. Ikinika pitii pivētixitako, eereka oa txineiro pisikanako minakati mauakini-moni. Eereka pisa notakata. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxa Xesosi sākire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴ Xesosi atamatakasaakiri iua matiniatuatini, itxari:

—Pamimari katxineiroteri auītetiniri Teoso. ²⁵ Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxa Xesosi.

²⁶ Ikara inakari kenakotakani txari:

—Pamimari pisākire. Ininiā kiripa apoka Teoso auiniātaā? —itxana.

²⁷ Ininiā Xesosi txana:

—Kākiti maposotakiniti Teoso posota ikamini —itxa Xesosi.

²⁸ Ininiā Petro txari:

—Ate takanapapekari ikinipoko pitekata asini ikapani —itxa.

²⁹ Ininiā Xesosi txari:

—Atāopitikara, ininiā ia atoko nitxai hīte. Pauini pitakanapiniā, pītanoro, pitariakori, piri, pinoro, pamariteakori pakini pitakanapiniā, Teoso auītetxi ininiāua pirena pisāpiretini ikapani, ³⁰ ininiā ikorasaaki apiata erekari papakapa. Ininiā āti ōti pipīkasaaki iaxiti papokasaaki, pauapininiika pitxako —itxa Xesosi.

Iuaíkana Xesosi Sápíretari Ipinini*(Mateo 20.17-19; Marko 10.32-34)*

³¹ Áti ôti Xesosi anikari imoianariakori ikira atoko, misákireta itxana:

—Uatxa Xerosareēmoni asa. Kitxakapiríka Teoso sákire sápiretakani sápiretpekari nota hítari iaxitíkiri pírena. Ninoa sákire iókatsopatakítina paítiki apokapítikako, ³² kotxi nisikaākako Xoteo minakonimoni. Ninapetaākako. Nimisákirepíretaākako. Nikiisokaākako. ³³ Niaritaākako. Eereka nokaākako. Ipi, áti pakini ôtisaaki iuaíkana nókitikaua —itxa Xesosi.

³⁴ Xesosi moianariakori !imarotari isákire. Ikara sákiretxi kipatakori atoko itxa. Ininiā kona ninoa imarotari isákire.

Mōsiāreti Xesosi Makananitini*(Mateo 20.29-34; Marko 10.46-52)*

³⁵ Xesosi apokaāpota Xerikoo sitatxiti takote. Mōsiāreti kimapori tiniāpo iitopākanāta. Amanaānātaro txineiro. ³⁶ Ikenakotari kākíti kimaporiā napakani, ininiā:

—Kiripa ikara? —itxa.

³⁷ —Xesosi Nasaree sitatxitíkiri, iuara napaāpota —itxana apanakini.

³⁸ Ininiā iua mōsiāreti akirikata:

—Xesosi, Taviini apika mekanirii, piamoníkanoko —itxa.

³⁹ Ninoa íkiikakani txitari iua:

—!Pakiripoatape —itxana.

Txama iteene iua akirikata iuaíkana:

—Taviini apika mekanirii, piamoníkanoko —itxari.

⁴⁰ Ininiā Xesosi iotoka. Amanaāna kākíti:

—Ere kiki himina notamoni —itxa Xesosi.

⁴¹ Xesosi takote apokasaaki, Xesosi pimaāri:

—Kípa pinireka níkaminií pítemoni?

—Kōsiārepeka ninini ninireka —itxari.

⁴² Ininiā Xesosi txari:

—Kōsiārepekai uatxa, kotxi pauikari nisákire —itxa.

⁴³ Iuasaakipeka iua kiki kōsiārepeka itxa. Ininiā iua saāpota Xesosi tikini. Teoso ereka inini pírena isápireāpota. Ikinimane kākíti itikasaakiri Xesosi kamakíti iuamoni.

—Peerekari Teoso —itxana.

Sakeo Pirena

19 Xesosi Xerosareēmoni isikasaaki, Xerikoo sitatxiti apaníkaki inapaāpota. ² Iuaā aua kiki, Sakeo inakori. Iua katiiri. Iua kākíti txineirote apotitakari auítetxiakori íkapani. Apanakini txineiro apotiitakani auíte itxaua. Iua misirienetari kākíti. Imaktxakari txineiro auítetxiakori íkapani. Txamari apikomoni imaktxaka. Kona atāo ikamakíti. !Erekari iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniri, kotxi paítiri iua. Itomaneri kākíti Xesosi ítinikata auanāta. Ininiā !apakata mōtānoti atamatiniri iua. ⁴ Ininiā imiteka Xesosi apisa, aaminaā kaníka itxa. Xesosi iuaā napakasaaki, iposotari itikiniri. ⁵ Xesosi apoka iua aamina patapi. Ionakaāta itxa. Itxari:

—Sakeo pikatxaka, katima pitxa. Uatxa, paapokomoni nisako, nianapokotini íkapani —itxa Xesosi.

⁶ Ininiā katxaka katimapeka itxa. Ipoxononiritika iua apakapari Xesosi. ⁷ Ikinimane iuaā auakani misákirepíretari Xesosi. Itxana:

—Xesosi sari maerekati kamakari aapokomoni. Kininiāpa iua sa iua aapokomoni? —itxana.

⁸ Ininiā iua aapoko apoāka atoko, Sakeo tima isákirauatini íkapani. Ininiā itxari Xesosi:

—Ipixini ninakiti nisika matiinimoni. Niitirikakiti iuaikana nisikanako kākiti. Txineiro niitirikiniā, ininiā iuaikana ipi ipi pakinikata nisikariko nimisiritakini-moni —itxa Sakeo.

⁹Ininiā Xesosi:

—Ja kiki Apraão apika mekaniri apaka. Uatxa imaerekani makatx-akaāka, kotxi itakanapari maerekati ikamakiti. ¹⁰Kākiti itari iaxitikiri apoka ikorapokoriti kākiti pipinanaākani initini, imaerekani imaktxakini ikapani —itxa Xesosi.

Nitiritxi Erekarí, Nitiritxi Maerekati Pakini

(Mateo 25.14-30)

¹¹Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpota. Kākiti uãkatari paĩtiki Teoso ikinimane auĩte ininiua.

¹²Ia atoko itxa:

—Kiki aiamatapeka õtakoxiti isini, auĩtetxi ininiua ikapani. Iua nirekari isini, ininiā eereka inirekari ikanapiri-
ini. ¹³Ininiā isini apisapanika akiri-
tari tesi initiriakori. Isikanapana tx-
ineiro tesi ota oro kamakoro. Átoka
isikaãpotana initiriakori. Itxa: “Nota
ãtiãtaã nauakasaaki, hiamotari tiitxi.
Eereka pivẽxtitari apikomoni txineiro
hãpakapini ikapani. Ikara atoko hĩtx-
ako,” itxa.

¹⁴—Isipeka atoko kākiti iuaã auakani
!nirekari iua auĩtetxi ininiua, kotxi
omanatarina. Ininiā ninoa iokanapireta
iuamoni: “Ate !nirekai pite aãuĩte
pininiua,” itxana ninoa.

¹⁵—Iuasaaki iua ãtiãtaã auĩtetxipeka
itxaua. Ikanapiriãkasaaki akiritana ini-
tiriakori, txineiro isikanapakini. Ininiā
iua txana ninoa: “Hõerekano txineiro
apikomoni hãpakapakito,” itxa. ¹⁶Áti
initiri apoka iuamoni. “Nipatrãote, pite

sikanapano átoka ota. Uatxa tesipeka ota
aia notamoni,” itxa.

¹⁷—Iuasaaki auĩtetxi txari iua: “Pite
kamakiti peerekari. Pite ninitiri erekari.
Átonoka ota nisikapekai, iuaritika pi-
parĩka peerekari. Uatxa tesi pakini si-
tatxiti auakani auĩte pitxauako,” itxa.

¹⁸—Átipekana apoka auĩtetximoni:
“Áti ota pisikanapano nota. Uatxa
sikopekai ota aia notamoni,” itxa initiri.

¹⁹—Ininiā auĩtetxi txari: “Erekapi-
tikari. Ininiā siko pakini sitatxiti auakani
auĩte pitxauako,” itxari.

²⁰—Átipekana apoka auĩtetximoni:
“Oniã pinakito txineiro. Mãkatxi mataã
niapirikaro, poteta nitxaro pitxineirote.
²¹Nota pikai pite. Pataparaxinirei. Ni-
marotari pite amotari áti kamakiti. Pi-
amotari pikiena áti kākiti kiena,” itxa.

²²—Ininiā iua auĩtetxi apakapapire-
tari: “Pite ninitiri maerekati pitxaua.
Pite txano nota kiki kataparaxinireri
nitxaua. Pimarotari niamotiniri áti
kamakiti. Pimarotari niamotiniri áti
kākiti kiena. ²³Ikara atoko ininiā,
pimanirekakaniãri piparĩkauatini,
kinirepa kona pisikataro nitxineirote
pãkomoni? Pisikaãkamaroko,
napakapamaroko apikomoni
nitxineirote nikanapiriãkasaaki,” itxa
auĩtetxi.

²⁴—Ininiā iua paniãtana iuaã
auakani: “Himaktxakaroko nitxineirote
iuamoni nisikakito. Hsikaro tesi ota
auakitimoni,” itxa.

²⁵—“Auapeka tesi ota iuamoni,”
itxarina.

²⁶—Ininiā auĩtetxi apakapapiretana:
“Piparĩkauatiniã, ininiã pinakiti itori
aia, ininiã apikomoni papakapa. Pite
iarinouatiniã, ininiã ikara xika pinakito
poião. Áti õti piarini xika ikara poiãori
maktxakaãkako apaka. ²⁷Uatxa
himinana notamoni nimokaiakariakori,
kotxi ninoa !nirekano nota iauĩtena

nininiua. Hōkana ninoa nota apisatoō,” itxa auítetxi.

Xesosi Xerosareē Apokaāpotini

(Mateo 21.1-11; Marko 11.1-11; Xoão 12.12-19)

²⁸ Ikara inaāka atoko, Xesosi sari imoianariakori apisa Xerosareēmoni. ²⁹ Xerosareēmoni isikasaakina, apokaāpotana Petxipaxee, Petánia pakini aapokotxiti. Ninoa ipi aapokotxi Oriva inakori xirata takote. Iuaā auakasaaki, Xesosi iokanatana ipi imoianariakori aapokotximoni.

³⁰ —Ikira aapokotximoni hīsa. Iuaā hāpokariko xomēta ākiri, iaxiriākori. Iua xomēta ākiri kākiti maitopākakoti-panika inakori. Hīkoxiripatakariko iua. Himinari notamoni. ³¹ Ipitikiri akiritiniāi: “Kinirepa hīte koxiripatakarini nipira?” inakasaakii, ia atoko hītxariko: “Apiananiri nirekari iua,” hītxako —itxana.

³² Iuaā apokasaakina, ikinika Xesosi sākire iaōka auapeka. ³³ Ninoa koxiripatakasaakiri xomēta ākiri, ipitikiri apoka.

—Kinirepa nipira hīkoxirika? —itxa.

³⁴ Ininiā ninoa:

—Apiananiri nirekari iua —itxana.

³⁵ Ininiā anikarina xomēta ākiri Xesosimoni. Imoianariakori takari imākana xomēta nopini. Imoianatarina Xesosi xomēta nopini iitopākini ikapani.

³⁶ Xesosi saāpotakasaaki Xerosareēmoni, apanakini kākiti matameēkari imākana kimaporiāpo Xesosi napini ikapani. ³⁷ Ōtanoxiratarini Oriva inakori iokiriitakasaaki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

³⁸ —Peerekari auítetxi, Apiananiri iokanatakiti kākitimoni. Teoso takari erekari iuamoni. Ininiā Teoso !omanataikari kākiti. Peerekari Teoso, iaxiti apiko nopinixiti auakari.

Apiananiri itxaua —itxanātana ninoa iuasaaki.

³⁹ Iuaā kākiti itomaneri sauaki aua pariseoakori apaka. Ninoa txari Xesosi:

—Koerekareri, piotokakana pimoianariakori ikara isākirena.

⁴⁰ Ininiā Xesosi:

—Atāo ninoa akiritakiti. Ininiā !ninitana iotokakiniri. Nimauiritakaniāna isākirena nota Apiananiri nininiāua, ininiā Teoso txikitakari kai soro sākiraauatini ikara sākire isāpiretini —itxa Xesosi.

Xesosi Txiapata Xerosareēkini Itiretini

⁴¹ Ninoa apokaāpotakasaaki Xerosareē, Xesosi Xerosareē atamatakasaaki, iua txiapata, kotxi iuaā aua mirikiniti kākiti isākire mauikakani. ⁴² Ixinikasaakina Xerosareē auakani itxa:

—!Himarotari hīkamakiti tīkane hāuini ereka inini ikapani, neenamati mauakani ikapani. Ninirekari himarotiniri, txamari uatxa ikara himarotini kipataāka himimarotakaniri ikapani. ⁴³ Āti ōti himokaiakarini ākitai hīte. Ininiā kona kākiti pokika sitatxi, kona iroā. Iuasaaki himitekini !auari. Hākitapeēkaikako. ⁴⁴ Himokaiakarini xipokariko ia sitatxi. Ikinimaneko okaākako. Kai āti kai nopini auakari !ikaikotaika. Imakinika xipope. Iua atoko inakari auako, kotxi hīte !apakapari Teoso hītemoni apokasaaki.

Pirātxi Vētxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareē, isari Teoso misākiretiko aikotiā. Iuaā auari kākiti tiitxi vētxitakani, ininiā Xesosi omitikana. ⁴⁶ Xesosi txana ninoa:

—Teoso sākire iōkatsopatakarini txari:

Ia naapoko, “Teoso misäkiretiko aikoti” akiritaäkako,

itxa. Txamari hite txikitakari ia aiko kiitiririni iomaätiniätaä ininiua —itxa Xesosi.

⁴⁷Teoso misäkiretiko aikoti äki ikiniötika oerekarauata. Iuusaaki sasetotxi auiteakori, kaiökatsopareriakori, käkiti auiteakori pakini kiniräo okaka txari Xesosi. ⁴⁸Txamari itomaneri käkiti potxitari Xesosi oerekakiti säkiretxiti. Ininiä ninoa kaikotapika Xesosikata ikinika isäkire imarotinina ikapani. Ikara xika !iposotarina okiniri iua iuusaaki.

Xesosi Paniätakari Moerekakoni

(Mateo 21.23-27; Marko 11.27-33)

20 Xesosi Teoso iokanapirena erekari isäpiretakasaaki Teoso misäkiretiko aikoti äki, iuusaaki sasetotxi auiteakori, kaiökatsopareriakori, käkiti auiteakori pakini apoka. ²Ninoa pimaäri Xesosi:

—Pite omitikana tiitxi sikakani Teoso misäkiretiko aikotiä auakani. Kipaniäpa pikamari ikora pikamakiti? Kipa paniätai? —itxana.

³Ininiä Xesosi txana:

—Nota apaka pimarauatako hitemoni. Ätinoka nipimaäiko hite. Ininiä häpaka-papiretano. ⁴“Kipa paniätari Xoäoni ipatxisarauatini? Teosokani paniätari Xoäo? Käkitikani paniätari Xoäo?” —itxa Xesosi.

⁵Eereka ninoakakarinani isäkirauatana:

—Kanatokopa atxa? “Teosora,” aniniä, ininiä ipaniätamaua eereka: “Kinirepa kona häuikatarari Xoäo säkire?” itxamaua ate. ⁶“Käkitira paniätari Xoäo,” aniniä, ininiä käkiti kiporonakauako ate kai soroä, kotxi ninoamoni Xoäo Teoso säkire säpiretakari itxaua. Ininiä kanatokopa atxa? —itxakakauana.

⁷Ininiä eereka ninoa apakapapiretari Xesosi:

—Kona ate imarotari —itxana.

⁸Eereka Xesosi txana:

—Ininiä nota apaka kona nisäpiretai nipaniätakiri uäka —itxa Xesosi.

Parikauatakani Maerekani

(Mateo 21.33-46; Marko 12.1-12)

⁹Eereka Xesosi säpiretari käkiti ia säpirenatxi atäo inakari oerekiko. Ia atoko itxa:

—Aua kiki. Itakari amätiiri ova inakoro. Ovanoka itaka ikikioteë. Eereka iikitxitana käkiti itakare nıkatakani. Eereka isari äti tixini. Iuaä mapakanani ikaikota. ¹⁰Oamiko manapi iokanatarari initiri apakapiniri ipixini amätiiri. Txamari amätiiri nıkatakani noropatari iua nitiri. Ininiä eereka iokanatarina iua. Kona axapiti amätiiri anika ipaträotemoni.

¹¹Ininiä iuaikana äti initiri iokanata. Iuaikana ninoa noropatari iua initiri. Imisiritarina. Eereka iokanatarari iua. Kona axapiti amätiiri anika ipaträotemoni. ¹²Iuaikana äti initiri iokanata ikikiotemoni. Iuaikana ikarotarina, iokanata itxarina. Kona anikari axapiti amätiiri iuamoni. ¹³Iua katakareri txari: “Kipa nikamaä? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitikariko iua,” itxama.

¹⁴—Amätiiri nıkatakani atapari amätiiri takakari äkiri apokaäpotini. Ininiä itxana: “Katakareri äkiri ina. Katakareri ipıkasaaki, iua äkiri apakapari ikinika. Ininiä maökari iua. Ininiä ikinika itakare aua atemoni,” itxana.

¹⁵—Ininiä ninoa kosekaïtotari katakareri äkiri, mapara okaïtota itxarina. Ininiä okapirina.

Ininiä Xesosi pimaäri käkiti iuaä auakani:

—Kiripa iua katakareri kamaã?
¹⁶Iua okanako ikinipoko ninoa. Itakare apanakinimoni sika itxako —itxa Xesosi.

Käkiti kenakotakasaakiri ikara pirena itxana:

—Ikara atoko inakari !anireka — itxana ninoa.

¹⁷Ininiã Xesosi iteene atamatana.

—Ininiãkara natokopa itxa Teoso sãkire iökatsopatakori oerekiniua?

Aapokotxi kamakani kona nirekari ätita kai soro. Iua kai imanirekakiniti kai apiari itxapekautu. Apanakini kai soro maĩkakari itxautu.

Itxa Teoso sãkire iökatsopatakori.

¹⁸Käkiti mäkititiniã ikora kai xika, ikarotaãka. Ikora kai irikiniã käkiti nopini, pomaĩpeka itxana. Ininiã eereka aãpani itxautu —itxa Xesosi.

Homano Auĩte İkitxitiko

(Mateo 22.15-22; Marko 12.13-17)

¹⁹Iuasaaki Xesosi sãkirauatakasaaki, sasetotxi auĩteakori, kaiökatsopareriakori pakini, nirekari maĩkiniri Xesosi, okinirina ikapani, kotxi ninoamoni ikara Xesosi sãpiretakiti oerekari käkiti ninoa nirekiniri okiniri Xesosi. Txamari !imaĩkarina, kotxi ipĩkarina apanakini käkiti. ²⁰Ikiniõtika ninoa itikapikarina Xesosi sinimoni imarotinina ikapani. Ininiã ninoa ikitxitari kamĩkapirirerini Xesosi imisãkiretinina ikapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina ikapani. ²¹Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko käkiti atão Teoso nirekiti kamiko. Poerekakiti sãkiretxiti käkiti apiarinimoni, iuatxikana poerekari käkiti poiãorini. ²²Atãokani txineiro asikini Homanoakori auĩtemoni, Sesa

inakorimoni? Apakata amasikakaniro iuamoni? —itxana ninoa.

²³Xesosi imarotari ninoa nirekari ikerokiniri isãkire, ininiã iua txana:

—Kinirepa hãtamakaerekatano nota?

²⁴Poerekano txineiro ota. Kisanõkapa ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua — itxana.

²⁵Ininiã Xesosi:

—Hĩsakariko Sesamoni iua nakiti. Hĩsakariko Teosomoni iua nakiti —itxa Xesosi.

²⁶Ninoa nirekari Xesosi kerokiniri isãkire käkiti apisatoõ, txamari !ikerokari. Ininiã ninoa tsoriãkaãta Xesosi apakapapiretakiti ikenakotakasaakina. Apikomoni !isãkirauatakana.

İpĩkari Ökitikiniua Mauikakoni

(Mateo 22.23-33; Marko 12.18-27)

²⁷Ikara inaãka atoko, apoka satoseoakori inakoni. Satoseo kona auikari ipĩkari iuaikana ökitikiniua. Ninoa misãkiretari Xesosi. ²⁸Itxana:

—Koerekareri, kitxakapirĩka Moisesini iökatsopataria atoko inakari: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipĩpekarini uãka,” itxa Moisesini. ²⁹Setxi itaritxiakori aua mitxi ikorapokoriti. Apia kiomanetakari itaniriuata. Meenetipanika ipina.

³⁰Itari takaro iuani tikinitakito. Iua apaka ipina meenetipanika. ³¹Iuaikana äti itari takaro oa. Iuaikana ipina meenetipanika. Iua atokotxikana itxana imakinikana itariakori. ³²Eereka oanipekana opĩpe apaka. ³³İpĩkani ökitikasaakiaua, kiripa oĩtaniri? Kotxi ikinikana takapekaro oa —itxana.

³⁴Ininiã Xesosi:

—Uatxa ikorasaaki käkiti itaniriuata. ³⁵Teoso nakitiakori iuaikana

ōkitikasaakiua, !ītaniriuataikana.
³⁶Ninoa !ipinaika, kotxi Teoso nitiriakori iaxitikini atoko itxauanako. Iuasaaki Teoso anaakori atoko itxauana, kotxi Teoso ōkitikapekana ninoa.
³⁷Hite kerokari hīsākire. Hite sākire txari: “Ipīkani !ōkitikaikaua.” Moisesini oerekaua ipīkani iuaikana ōkitika-panikaua. Iua iōkatsopatakasaakiri aamina tirinakari pirena, isāpiretari Teoso sāpiretakiti. Ia atoko itxa Teoso iuasaaki: “Nota Apraño Teosone, Isaki Teosone, Xakoo Teosone pakini nitxaua,” itxa Teoso. ³⁸Ininiā ninoa Apraño, Isaki, Xakoo auapanika, kotxi Teoso !ipīkani Teosoneni. Auāki inakani Teosonera iua, kotxi iuamoni ikinimane auākipanika —itxa Xesosi.

³⁹Eereka ātikaka kaiōkatsopareriakori txari:

—Koerekareri, atāopitikara pisākire —itxana.

⁴⁰Ikara inaāka atoko kākiti pīkarauata apikomoni ipimarauatini.

Teoso Mereēkiti Tavi Apika Mekaniri Itxaua

(Mateo 22.41-46; Marko 12.35-37)

⁴¹Ininiā Xesosi pimaāna:

—Kinirepa isāpiretaāka Teoso mereēkiti Taviini apika mekaniri ininiua? ⁴²Kotxi Taviini iōkatsopata Xikari aātsopateē. Itxari:

Apiananiri txari niauītemoni: “Nota kikomoni piitopāka.

⁴³Piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiua.”

Itxa Taviini xikare. ⁴⁴Taviini akiritari Teoso Mereēkiti “Niauīte.” Ininiākara kanatokopa iua Tavii apika mekaniri? —itxa Xesosi.

Kaiōkatsoparerini Maerekani

(Mateo 23.1-36; Marko 12.38-40)

⁴⁵Eereka kākiti apisatoō Xesosi ōtākikana imoianariakori. ⁴⁶Ia atoko itxa:

—Erepaniko, kaiōkatsoparerini misirienetini. Ninoa ieretakari mākatxi ītanori, peereri, apanakini atamatinina ikapani. Tiitxi amotikoātaā ninoa potxitari kākiti ninoakata sākirauatini apanakini atamatinina ikapani. Ninoa potxitari iitopākinina auītetxi topākiniātaā aiko āki Xoteo apotiitiniātaāua. Kiinirisaaki ninoa nirekari apiari topākiniātaā iitopākinina. ⁴⁷Kiki ipīkasaaki, ninoa misiritaro tikinitakoro. Ninoa mixirikari oaāpoko, iuaritika imisākiretarina Teoso. Teoso imisākiretakasaakina, kaiāori sākiretxi isākiretana. Ininiā apanakini kenakotakasaakiri, ninoa xinikari: “Atāo iua imarotari Teosokata isākirauatini,” itxana. Txamari Teoso kamaākaretxitana, ininiā apiata imisiritaākanako.

Tikinitakoro Matxineiroto Sikakito

(Marko 12.41-44)

21 Xesosi sākirauatakasaaki Teoso misākiretiko aikoti āki, itikari katiirini takiniro itxineirotena kaixa āki Teoso ikapani. ²Iuasaaki oāua tikinitakoro matiito. Ōtaniri !uaika. Oa sikaro ipi txineiro ota okinika oamoni auakaro. ³Ininiā Xesosi txa:

—Atāopitikara, okira sito sikari apiata. ⁴Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misākiretiko Aikoti Irikiko

(Mateo 24.1-2; Marko 13.1-2)

⁵Āti ōti Teoso misākiretiko aikoti āki aua Xesosi imoianariakorikata. Aiko ereri pirena isākirenātana.

—Uai peereri. Ere kai sorokiniri paretxiã auakari pakaronepokori. Patamatarì kãkiti sikakiti Teosomoni —itxana.

⁶ Ininiã Xesosi txana:

—Ari atãopitikara peerekari. Txamari apokapitikako ãti õti ia aiko irikiko ikapani. Iuusaaki kai ãti kai nopini auakari !auaika. Ikinipoko irikaãkako — itxa Xesosi.

Misirikaretxi Apokaenetini

(Mateo 24.3-14; Marko 13.3-13)

⁷ Ininiã ninoa pimaãri:

—Koerekareri, kirisaakipa ikara atoko inakari auapani? Kiãtokopa itxa ia aiko Teoso misãkiretiko irikini õti manapi aimarotini ikapani —itxana.

⁸ Ininiã Xesosi apakapapiretana:

—Erepaniko, xipokatxi õti apokaãpotakasaaki, kãkiti nirekari imisrienetini hïte. Ito aãpirena auako. Kaiãopokori kiki sãkire: “Teoso mereëkitikarano nota. Nota apokapeka uai,” itxamana. Paxirari ninoa sãkire. !Himaãkatapena ninoa. !Himoianatapena ninoa.

⁹ Neenamatiene hïkenakoenetakasaaki, !hïpikarauatape. Iua atoko inakari merepanika auako. Iuusaaki xipokatxi õti !apokapanika —itxa Xesosi.

¹⁰ —Ãti uãka kamari neenamati ãti uãkakata. Ãti auïtetxi sotatoneakori neenamauata ãti auïtetxi sotatoneakorikata. ¹¹ Iuusaaki xipokatxi õti apisa, nota apokini apisa, itixi iakeëkatoko. Natxi auako. Itori amianari auako. Apaka kãkiti atamatakiti iaxiti kamapikaretana.

¹² —Ikara inakari apisa, apanakini maïkaiko hïte. Himisiritaãkako. Xoteoakori anikaiko aiko Xoteo apotiiniãtaãua Xoteoakori auïte apisatoõ apoïtiniina ikapani. Hïtakaãka kateia ãki. Ninoa anikaiko hïte itixi auakani auïteakorimoni hïte apoïtiniina

ikapani. Iua atokokanerako hinaãkako nisãkire hãuikini xika. ¹³ Iuusaaki auïtetxiakori apisatoõ hãuakasaaki, hïspïretariko Teoso iokanapirena erekari. ¹⁴ Ninoa himisãkiretini apisa, maerekaxiniretika !hïtxape. Kona hïpïkarauatape, ¹⁵ kotxi ninoa apisatoõ hãuakasaaki, nota sikaimaroretai hïte, ininiã himokaiakariakori liposotari apakapapiretiniina hïte. !Iposotarina isãpiretiniina: “Kona atão pisãkire,” !itxana. ¹⁶ Hinoroma, hïrima, hïtariakorima, apanakini hinirimanema, haõkimanerema pakini sikaiko hïte himokaiakariakorimoni. ãtikaka hïte okaãkako iuusaaki. ¹⁷ Ikinimane omanataiko hïte nisãkire hãuikini xika. ¹⁸ Iuaritika Teoso !auritari ãtika hiãko maporokiko, kotxi Teoso iteene nïkatapitikaiko hïte. ¹⁹ Himïteenekiniãri ikinika himisiritiko, ininiã Teoso txïkitakaiko ãtipirika iuakata hãuapiniiniika hinini ikapani —itxa Xesosi.

Xerosareë Xipokiko Pirena

(Mateo 24.15-28; Marko 13.14-23)

²⁰ Apikomoni Xesosi txari:

—Hãtamatakasaakiri sotatoakori ãkitiniri Xerosareë, iuusaaki himarotariko pakotapaniri sitatxi xipokini. ²¹ Iuusaaki hïte Xotëia tãpa auakani himitekako oxïtararimoni. Sitatxi hãuiniã, ininiã himitekako. Mapara hãuiniã, kona hïkanapiripe sitatximoni, ²² kotxi iuusaaki kãkiti misiritiko õti apoka. Teoso sãkire iõkatsopatakori sãpïretapekari ikara õti apokini. ²³ Iuusaaki !erekapaniri sito kamixiro ikapani, kaxitakarero ikapani, kotxi omitekini !apakata. Xoteo auiniãtaã auapitikako iteene imisiritikona tïkane, kotxi iuusaaki Teoso oerekari iua omanãkare Xoteoakorimoni. ²⁴ Itomaneri kãkiti okaãkako saasara atoko inakaroã.

Apanakini anikaākako ikini uāka tixinemoni. Xoteo minakanuia xipokariko sitatxi Xerosareē. Teoso auiritana ninoa kaikotini iuaā. Eereka Teoso xipokariko ninoa tapara. Eereka !auaikana —itxa Xesosi.

Kākiti Itari Iaxitikiri Kanapiriini

(Mateo 24.29-31; Marko 13.24-27)

²⁵ Apikomoni Xesosi txari:

—Nota uai apokini apisa, atokatxi, kasiri, iōriki pakini oerekariko kākiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kākiti ākipa iotokako ipīkare xika. Itixi misiritiko xika ipīkaruata, kotxi iōriki, ikinika iaxiti auakani iakeēkatakato. ²⁷ Iuasaaki nota, hītari iaxitikiri katxakaāpota katxiārikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaāpotakasaaki, haiamatakato. Hionakaātako, kotxi paītiki nota kanapiriā hīte napini ikapani. Iuasaaki nimakatzakai hīte ikinika maerekati auiniātaā —itxa Xesosi.

Piko Mīna Pirena

(Mateo 24.32-35; Marko 13.28-31)

²⁹ Xesosi sāpiretari āti sāpirenatxi atāo inakari oerekiko. Itxari:

—Hīxinikari aamina piko inakori. Apanakini ātiāo aamina apaka hīxinika. ³⁰ Pooioporipeka onakasaaki, otomorekasaaki, “Kamoī apokanapanoka,” hītxa. ³¹ Iua atokokana ikara misirikaretxi mixikanani nisāpiretakiti hītikasaaki, iuasaaki himarotariko paītiki Teoso ikinimane auīte itxauako.

³² —Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³³ Iaxiti xipokapi-

tikako. Īkoraxiti apaka xipokapitikako. Iuaritika nota sākire !ixipoka.

Iātapakori Ōti Pirena

³⁴ —Erepaniko, maerekaxiniretika kona hītẓape. !Hīsarauatape. !Hīpōatape. Hīparīkanoka !hīxinikapeko, kotxi hīsarauatiniā, hīpōātiniā, hīparīkanoka hīxinikiniā, !hīxinikari nikanapiriini ōti, kotxi ikora ōti himimarotakani ōtisaaki, napokako. Erepaniko, kotxi txikatoro atoko itxa napokini. Kākiti !imarotapaniri napokini ōti. ³⁵ Imakinika kākiti itixi auakani imarotariko napokini iuasaaki. ³⁶ Hīātapariko nikanapiriini. Ātipirika himisākiretariko Teoso. Hamanaāriko Teoso ikara inakari mamisiritakanii hīte. Hamanaāriko Teoso himapētauatakani ikapani hītari iaxitikiri apokasaaki iua apisatoō hītimakasaaki —itxa Xesosi.

³⁷ Ikinīōtika Xesosi sari Teoso misākiretiko aikotimoni Teoso sākire oerekini ikapani. Ikinīōtika mapiānikata Xesosi sari ōtanoxiratarimoni, Oriva inakorimoni. ³⁸ Īkanōkapanika kākiti apoka Teoso misākiretiko aikotiā Xesosi sākire ikenakotinina ikapani.

Satanasi Īroā Xotasi Xinireē

(Mateo 26.1-5, 14-16; Marko

14.1-2, 10-11; Xoāo 11.45-54)

22 Kaiamapeka Pāscoa inakori kiiniriti apokini. Iua kiiniriti Xoteoakori nikari pāo matireēkati. ² Iuasaaki sasetotxi auīteakori, kaiōkatsopareriakori pakini nirekari Xesosi okinina, txamari, ninoa pīkari apanakini kākiti, kotxi ninoa apokaerekatari Xesosi.

³ Iuasaaki Satanasi Īroāitotari Xotasi Isikariotxi inakori. Iua Xotasi Xesosi moianarikamara, apanakinikata. ⁴ Iuasaaki iua sari sasetotxi auīteakorimoni, Teoso misākiretiko

aikoti nīkatakani auīteakorimoni. Iuasaaki isākirauata ninoakata Xesosi imīkapiritini ikapani. Iuasaaki ninoa xinikaxitita:

—Kiātokopa itxatari Xesosi isikini atemoni?

⁵Sasetotxi auīteakori eneniika. Ninoa txari Xotasimoni:

—Pisikasaakiri Xesosi atemoni, aīkitx-itaiko pite —itxana Xotasimoni.

⁶—Ateeneka —itxa Xotasi.

Ikara atoko inaāka atoko Xotasi iāta- pari isikiniri ōti manapi. Inirekari kākiti mauakanisaaki, Xesosi imīkapiritini.

Páskoa Kiiniriti Kamiko

(Mateo 26.17-25; Marko 14.12-21)

⁷Iuasaaki kākiti parīkauata Páskoa kiiniriti ikaminina ikapani. Iua kiiniriti auakasaaki, itotarina pāo matireēkati inikinina. Iuasaaki okarina soti auīte ākiri kiinirisaaki iniākitina ikapani. ⁸Xesosi paniātana Xoão, Petro pakini:

—Hīsako. Hāpotiitariko nipokori Páskoa kiiniriti ikapani —itxa.

⁹Ininiā ninoa:

—Namonipa akamatari kiiniri? —itxana.

¹⁰Ininiā Xesosi:

—Xerosareēmoni hīsa. Iuaā hītikari kiki kaminiri sito parīka. Iua apaānātari āparaā. Kopiti ikiiā anikanāta. Iua aōkitaiko hīte. Iuakata sa hītxako. Hīiroā aapokotxi iua iroiniātaā. ¹¹Himisākiretari kauiniri. Hītxariko iua: “Koerekareri nirekari imarotiniri: ‘Namonipa ianapokotakani kaikotiniātaā iriko? Iuaā inirekari inapiniri Páskoa ōti imoianariakorikata,’ hītxariko iua.” ¹²Iuasaaki kauiniri oerekai itanokiri koa mitari iuaā kiiniri ikapani. Imakinika tiitxi iposope. Iuaārako hāpotiitari imakinika Páskoa kiiniriti ikapani —itxa Xesosi.

¹³Ininiā sa itxana. Apoka itxarina ikinika Xesosi sākire iaōka. Ininiā iuaā ninoa maiamatari kiiniri.

Xesosi Ito, Iarēka Pakini

(Mateo 26.26-30; Marko 14.22-26; 1 Korīto 11.23-25)

¹⁴Ininiā Páskoa kiiniriti portorikasaaki, Xesosi imoianariakorikata topāka. ¹⁵Ininiā Xesosi txana:

—Iteene ninirekari hītekata ninikiniri ia nipokori Páskoa kiiniritisaaki, natatsiirautini apisa. ¹⁶Ia atoko inakari nipokori !ninikaikariko hītekata. Teoso ikinimane auīte inakasaakiaua, iuasaaki-ikarako ninikapitikariko iuaikana.

¹⁷Eereka iua kosekari iātatxi koana ovaā iāriāti. Ininiā itxa:

—Niri, erekapitikari ia pisikakiti —itxari Teoso.

Eereka itxana imoianariakori:

—Ia iāriā hāpakapako. Hīkinika hiatariko. ¹⁸Atāo nisāpiretai. !Niātaikaroko ovaā, Teoso ikinimane auīte iminakanisaakiaua. Teoso ikinimane auīte inakasaakiaua, iuasaakiikarako iuaikana niātariko ovaā —itxa Xesosi.

¹⁹Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaāpotari, sikaāpota itxana imoianariakori:

—Ia niīto okaāka hīte ikapani. Ia komiri hinikasaaki, hīxinikanoko nota. Hīxinikari nipinini hīte ikapani.

²⁰Inikaākarina atoko, ikosekaro ovaā. Isikana imoianariakori. Ininiā itxa:

—Ia niarēka xiketakariki makatxakariko hīte maerekani. Teoso sāpiretapekari kākiti ikamaenetakiti amaneri kākiti ikapani. Ia niarēka oerekari kākiti, Teoso kamapekari ikamaenetakiti. ²¹Iua nimīkapiritakiri uatxa uai topāka notakata. ²²Nota hītari iaxitikiri okaākako. Teoso sākire iōkatsopatakori sāpire-

tapekari nipinini tūkane. Nota hītari iaxitikiri mīkapiritakari iteene misiri-taākako —itxa Xesosi.

²³ Xesosi moianariakori ninoakakarika isākirauatana:

—Kipa sikatari Xesosi imokaiakari-akorimoni? —itxanātana.

Kiripa Apiatakari?

²⁴ Ikara atoko inaāka atoko Xesosi moianariakori misākiretakakaua.

—Kiripa apiatakari txatapaniuako ate sauaki? —itxana.

²⁵ Ininiā Xesosi:

—Xoteo minakanua auñteakori itapasākireritika ipaniātana Xoteo minakanua iauñtena nireēkiti ikaminina ikapani, iuaritika ninoa sākire, “Peerekaua ate. Ate moianatari kākiti,” itxana. ²⁶ Hīte kona ninoa atoko kona hīt-xape. Atxiiti apiari pitxaua hīte sauaki, ininiā amarini atoko pitxauako. Auñtetxi pininiāua, nitiritxi atoko pitxauako. ²⁷ Kiripa apiatakari txataua? Auñtetxi nipokori nikakarikani, apiatakari txatauako? Initiri nipokori kamakarikani apiatakari txatauako? Ikinimane kākiti imarotari nipokori nikakari apiatakari itxaua. Txamari nota auakasaaki kākiti sauaki, nitiritxi atoko nitxaua, kotxi kākiti nimoianata.

²⁸ —Xoteoakori misiritakasaakino nota, kona hīte takanapano. Atāo nimoianariakori hīt-xaua. ²⁹ Niri, auñtetxi txikitakapekano nota. Ininiā iua atokokana nota txikitakai hīte auñtetxi hininiua. ³⁰ Nota auñtetxi ninakasaaki, hinipokota, hiāta hīt-xako notakata. Auako auñtetxi topākini hīte ikapani. Ininiā iusaaki hīpaniātana tosi nirimantxi Isaeo auakani ikamakitina tūkane —itxa Xesosi.

Xesosi Sāpiretari Petro Kipatiniri Iua

(Mateo 26.31-35; Marko 14.27-31; Xoão 13.36-38)

³¹ Xesosi sākirauata Simāo Petromoni: —Simāo, Simāo, Satanasi amanaāpekari Teoso pite, apanakini apaka atamakaerekatini ikapani. Ahoisi misiritiko atoko inirekari imisiritinii pite. ³² Iuaritika, nota misākiretapekari Teoso isikataparatiniri pixinire Simāo, nisākire atāo pauikini ikapani. Pikerokariko pikamakiti, iuaritika pikanapiriāpitika nota sākire iteene iuaīkana pauikini ikapani. Eereka pisikataparaxiniretanako pitariakori nota sākire auīākani —itxa Xesosi sākire.

³³ Petro txari Xesosi:

—Niauñte, nota iposope nitxa kateia-moni nisini pitekata. Pitekata iposope nitxa nipinini —itxa.

³⁴ Xesosi txari:

—Atāo nisāpiretai. Ia ikanōkati patari sākirauatini apisapanikako, ipi āti pakinikata, “!Nimarotari iua,” pitxanoko —itxa Xesosi.

Xesosi Ōtākikana Imoianariakori

³⁵ Eereka iuaīkana Xesosi sākirauata imoianariakorikata:

—Mitxi nota iokanatai kākitimoni. Iusaaki kona nisikai txineiro. Kona nisikai sako mata. Kona nisikai sapato, iuaritika minakati auinii atxiiti? Erekari hīsini ikinika hinirekakiti mauakanisaaki? —itxa Xesosi

—Minakati !auinua ate —itxana.

³⁶ Ininiā Xesosi txana:

—Txamari uatxa pitxineirote, sakora pakini auiniāi, panika. Iouata mitaro mauakanisaakii, pimāka inopinikiri pivēt-xitako iouata piamotini ikapani. ³⁷ Teoso sākire iōkatsopatakori kitxakapiriāka txari:

Imaïkaäka, kokaniri maïkiko atoko inaäkako.

Ininiä ikara nimaïkiko apokapitikako. Ikara nota pirena kitxakapirïka atäopitika —itxa.

³⁸ Imoianariakori txari:

—Apiananiri, patamata. Uai aua ipi iouata aneenamauatini ïkapani.

Xesosi txari:

—!Apakata ikara atoko inakari hïsäkire —itxa Xesosi.

Xesosi Misäkiretiniri Teoso

Xetsëmani Inakoriätaä

(*Mateo 26.36-46; Marko 14.32-42*)

³⁹ Eereka ixirata auïte Oriva inakorimoni isa, kotxi itotapekari iuaä isini. Imoianariakori sari iuakata.

⁴⁰ Iuaä apokasaakina, Xesosi txana:

—Satanasi nirekari maerekati hïkamini. Ininiä himisäkiretariko Teoso, iua sikataparatinii, Satanasi nirekakiti himakamakani ïkapani —itxa Xesosi.

⁴¹ Ininiä iuaä itakanapana imoianariakori. Apikoxäki axapiti sa itxa. Iuaä ikapotoreëkua, misäkireta itxari Teoso.

⁴² Itxari:

—Niri, !pauiritapeno païtiki natatsi-irauatini, iuaritika kona pikamapiri nota nirekaäkiti. Pite nirekaäkiti ninireka nikamini —itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ïkapani.

⁴⁴ Iuasaaki Xesosi xinire ka-maxirepeka. Äkixinireë apokapeka itsii. Ininiä iteene imisäkiretari Teoso. Ininiä iinïkakare arëkatxikata tapika ixitimoni.

⁴⁵ Teoso imisäkiretaka atoko, ökitikaua, imoianariakorimoni isa. Iua apoka ninoamoni. Imakapoanätana, kotxi isäpakapekana imatinaniuatinina xika. ⁴⁶ Ininiä akiritana:

—Kinirepa himakanäta? Hökitikaua. Himisäkiretari Teoso, Satanasi nirekëti himakamakani tïkane —itxa Xesosi.

Xesosi Maïkiko Pirena

(*Mateo 26.47-56; Marko 14.43-52; Xoão 18.1-11*)

⁴⁷ Xesosi säkirauatakasaaki imoianariakorikata, itomaneri käkiti Xotasikata apoka. Xotasi mïkiikana ninoa Xesosi oerekini ïkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiä Xesosi txari iua:

—Xotasi, pimïkapiritatari pitari iaxitikiri papitxokasaaki? —itxa Xesosi.

⁴⁹ Xesosi moianariakori imarotakasaakiri käkiti nirekiniri Xesosi imaïkini, itxana:

—Apiananiri, erekari atxiïti uatxa aneenamauatini, aiouataneë —itxana.

⁵⁰ Ininiä äti Xesosi moianari sauakari sasetotxi auïte apiatakari nitiri kïpita ikikomoni. ⁵¹ Ininiä Xesosi:

—Hiïtoka ikara. Iaöpe.

Eereka Xesosi takapiotaua ikïpitaä. Iuasaaki kakïpitapeka itxa iuaïkana. ⁵² Sasetotxi auïteakori, kiomätxiakori pakini ina Xesosi imaïkinina ïkapani. Xesosi txari ninoamoni:

—Kinirepa himinari iouata, piriri pakini himaïkinino ïkapani?

⁵³ Ikiniötika hïtekata naua aiko Teoso misäkiretikoä. Iuasaaki kona hïte maïkano. ïkanöka hina, kotxi ipiaä hïkamari maerekati —itxa Xesosi.

Petro Kipatari Xesosi Imarotini

(*Mateo 26.69-75; Marko 14.54, 66-72; Xoão 18.15-18, 25-27*)

⁵⁴ Ininiä ninoa maïkari Xesosi, anika itxarina sasetotxi auïte apiatakari aapokomoni. ïroäna aapoko äki. Ininiä Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Käkiti topäkanäta xamina takote. Irokanätana. Ininiä Petro topäka ninoa takote. ⁵⁶ Iuasaaki ätokoro atamatari iua

xamina kamaraã. Ininiã itakote oãpoka. Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Átokoro, kona nimarotari iua — itxa.

⁵⁸ Eereka áti atamatari iua. Itxari iua:

—Pite Xesosi moianarrikarai? —itxari.

Txamari Petro:

—Konapitini —itxa.

⁵⁹ Áti oara napa atoko áti txari:

—Atãopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisãpiretakiti.

Iuusaaki, isãkirauatakasaaki, patari sãkirauata. ⁶¹ Iuusaaki Xesosi sapotorika, atamata itxari Petro. Iuusaaki, Petro xinikari mitxi Xesosi sãpiretakiti: “Patari sãkirauatini apisapanikako, ipi áti pakinikata, ‘!Nimarotari iua,’ pitxanoko” ininiri iaõka aua. ⁶² Ininiã eereka Petro sipe. Itene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³ Xesosi nĩkatakani napetari, noropata itxarina Xesosi. ⁶⁴ Iuusaaki iaxirikaokitarina iua, ninoa imatamatakani ĩkapani. Iuusaaki noropata itxarina.

—Kimarorei pite. Kiripa noropatai? — itxana.

⁶⁵ Itomaneri maerekati sãkiretxitiã itxitarina Xesosi. Inapetiniri liotoka.

Xesosi Xoteo Auĩteakori Apisatoõ

(Mateo 26.57-68; Marko 14.53-65; Xoão 18.19-24)

⁶⁶ ĩkanõkapanika kiomãtxiakori, sasetotxi auĩteakori, kaiõkatsopareriakori pakini apotiitaua. Iuusaaki Xesosi mi-naãka ninoamoni.

⁶⁷ —Pisãpiretaua ate, Teoso mereẽkitikai pite? —itxarina.

Ininiã Xesosi apakapapiretana:

—Nisãpiretiniã, !hãuikari

nisãkire. ⁶⁸ Nipimarauatiniã, hĩte !apakapapiretano. Apaka !hãuiritari nisikakiko. ⁶⁹ Paĩtiki hĩtari iaxitikiri topãkako Teoso kaposotiireri kikomoni —itxa Xesosi.

⁷⁰ Ininiã iuaĩkana ninoa pimaãri:

—Teoso ãkirikai pite? —itxarina.

Ininiã Xesosi apakapapireta:

—Atãopitikara hĩsãkire. Iuapitikarano nota —itxa.

⁷¹ —Iaõpekara. Akenakotapekari isãkire. Ininiã apikomoni isãkire kenakotakani !anirekaika, kotxi ateka kenakotapekari iua sãkire maerekati —itxana.

Xesosi Pirato Apisatoõ

(Mateo 27.1-2, 11-14; Marko 15.1-5; Xoão 18.28-38)

23 Ininiã imakinika ninoa anikari Xesosi Piratomoni. ² Ininiã iuaã ikamarina aãpirena. Apoĩtarina Xesosi:

—Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti miĩkitxitakaniri Sesa, Homano auĩte apiari. Apaka itxa: “Teoso mereẽkitino nota. Auĩtetxi apiatakari nitxaua,” itxa iua sãkire.

Txamari na atãoni ikara atoko itxana ninoa. Ikara atoko ninoa apoĩtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auĩte txataua? —itxari Xesosi.

—Iuapitikarano nota —itxa Xesosi.

⁴ Ininiã Pirato txana sasetotxi auĩteakori, kãkiti pakini:

—!Napokari maerekati ikamakiti — itxa.

⁵ Iuaĩkana apoĩtarina:

—Iua oerekana kãkiti maerekati ikamini auĩtetxiakorimoni. Kariréia

tõpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isäkirena, ipimaäna:

—Ja kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarari Xesosi Erotximoni, kotxi Kariréia tõpa auakani auite itxaua Erotxi. Iuasaaki iua ianapokota Xerosareë. Ininiä Pirato iokanatarari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiä iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire.

⁹ Ininiä iteene ipimaäri Xesosi, ikamakiti imarotini ikapani. Txamari Xesosi !apakapapiretari iua. ¹⁰ Iuasaaki sasetotxi auiteakori, kaiõkatsoparerini pakini iteene apoõtari Xesosi. Ikinika ninoa säkire aäpirenanoka. ¹¹ Eereka Erotxi, isotatoneakori pakini napetari Xesosi. Ieretakarina auitetxi mäka maparakiri apiata inapetinirina ikapani.

—Hätamatari ere. Auitetxi itxaua — itxana.

Eereka iuaikana iokanatararina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoõo 18.39-19.16)

¹³ Ininiä eereka Pirato apotiitari sasetotxi auiteakori, Xoteo auiteakori, apanakini kãkiti pakini. ¹⁴ Ininiä itxa:

—Hite minari ia kiki notamoni. Hite apoõtari iua imisirienetiniiri kãkiti. Hite apisatoõ nipimaäpekari ikamakiti pirena. Notamoni kona maerekati !ikama. ¹⁵ Erotxipekana !apokari

maerekati ikamakiti, ininiä iokanatarari iua notamoni iuaikana. Inipitikara iua erekari, txamari hite nirekari okiko maxikatiika. ¹⁶ Ininiä nota paniätari inoropatiko aäpitsa aamata kamakoriä. Eereka niokanatarari isini.

¹⁷ Iuasaaki Páskoa kiiniritisaaki, auitetxiakori itotari isikakiniri ätika kateia äki auakari.

¹⁸ Ikara Pirato säkire ikenakotakasaakina, ninoa akirikata:

—Hõkariko ere kiki. Hõsakariko Pahapasi —itxana.

¹⁹ Pahapasi kateia äki aua, kotxi iua apanakinikata naiatarari auitetxiakori. Kokaniri apaka itxaua.

²⁰ Pirato nirekari Xesosi isikakini, ininiä iuaikana isäkirauata kãkitimoni.

²¹ Txamari ninoa akiripoakata:

—Aamina ipiriämitakari nopini hõtokakitariko. Hõkariko aamina ipiriämitakari nopini —itxakatana.

²² Pirato mitxi isäkirauata ipikata. Iuaikana isäkirauata:

—Kixikapa? Maerekati !ikama. Ixika !auari ipinini ikapani. Nipaniätariko inoropatiko, eereka nisikakariko —itxari.

²³ Txamari iuaikana akiripoakatana:

—Hõkariko aamina ipiriämitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiä Pirato:

—Xesosi ipinako hinirekakiti iaõka — itxa Pirato.

²⁵ Iuasaaki isikakari Pahapasi kateia äki auakari. Neenamtxi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ipiriämitakari nopini okiko ikapani.

Xesosi Tokakitaäka Aamina Ipiriämitakari Nopini

(Mateo 27.32-44, 11-14; Marko 15.21-32; Xoõo 19.17-27)

²⁶ Ininiä sotatoakori anikari Xesosi okiko ikapanimoni. Iuasaaki kimapor-

iāpo aōkitarina Simāo, Sireni sitatxi-tikiri. Iuasaaki iua apoka sitatximoni. Sotatoakori maīkari iua. Aamina ipiriāmitakari itakana Simāo tsotere nopini:

—Panika ia aamina ipiriāmitakari — itxarina.

Xesosi tikini sa itxa Simāo. ²⁷ Xesosi tikini isa mirikiniti kākiti. Ātokaka sitoakoro sari apaka. Imatinaniuatana, itxiapatana, kotxi imarotarina Xesosi paītiki ipinini. ²⁸ Xesosi kirioka ninoa sitoakoromoni. Itxana:

—Sitoākini Xerosareē auakani anaakoro. Kona notani !himariaka. Hītekara himariakaua. Hamariteni ikapani hītxiapata, ²⁹ kotxi āti ōti apokasaaki, kākiti sākire: “Apiaerekata sito meeneto oniniua,” kotxi iuasaaki misirikaretxi apokasaaki, pamonōkoniri. ³⁰ Iuasaakiikarako kākiti akiripoakatako ixirata auītemoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaāpota ninoa xipokini ikapani. ³¹ Nota aamina amaneri atoko nitxa. Hīte aamina isasaka atoko hītxa. Nota !ikamari maerekati, iuaritika ia atoko nota ipina. Erepaniko aamina isasaka atoko hītxa, ininiā āti ōtirako apiata himisiritiko —itxa Xesosi sākire.

³² Ninoa anikari ipi maerekati kamakani Xesosikata ipininina ikapani. ³³ Apokasaakina “Kiitātaxi” inakoriā-tā, itokakitarina Xesosi aamina ipiriāmitakari nopini. Iua atokokanera itxana maerekati kamakani. Āti maerekati kamakari itakana Xesosi kikomoni, āti isanaremoni.

³⁴ Iuasaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuasaaki sotatoakori kamari sarauatxi. Eereka imakatzakarina Xesosi māka. Sarauatxi káiatakari apakapari imāka.

³⁵ Kākiti iuaā auakani itikari Xesosi. Sasetotxi auīteakori napetari iua. Itxana:

—Iua makatzakapekari apanakini imapinakanina ikapani. Teoso mereēkiti ininiāua, kinirepa iuaka !imakatzakaua? —itxana.

³⁶ Iuasaaki sotatoakori apaka napetari iua. Katxioāri isikarina Xesosi iātinini ikapani, txamari !iātari. ³⁷ Itxana:

—Pite Xoteo auīte pininiāua, ininiā aamina ipiriāmitakariā pimakatzakaua. Piteka pimakatzakauako —itxarina.

³⁸ Iuasaaki iōkatakori takaāka ikii tanomoni:

—Xoteoakori Auīte —itxa iua iōkatakori. Homano sākireē aua. Kreko sākireē aua. Xoteo sākireē pakini aua iuaā iōkatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereēkiti pininiāua, iīteroa piposotiire? Piteka pimakatzakaua. Ate apaka pimakatzaka —itxa.

⁴⁰ Āti maerekati kamakari iuaā tokak-itakori ōtākikari iua:

—Kona pite pīkatari Teoso? Ate apaka apinako. ⁴¹ Atāopitikara ate misiritiko, kotxi maerekati akamapeka. Ere kiki !ikamari maerekati —itxa.

⁴² Eereka itxari Xesosi:

—Xesosi, auītetxi pininiātaāua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atāopitikara nitxai, uatxa ia ōti, pite sariko notakata iaxiti Erekariātaā.

Xesosi Ipinini Pirena

(Mateo 27.45-56; Marko 15.33-41; Xoāo 19.28-30)

⁴⁴ Ininiā apaniāxiti takote atokatxi piākapeka. Ipi āti pakini oara ipiāka.

⁴⁵ Atokatxi !liponikaika. Iuasaaki

mākatxi mata mitari Teoso misākiretiko aikotiā arōkakarī matsorakitaāka. Ipi matapeka itxa. ⁴⁶Iuasaaki Xesosi akirikata:

—Niri, nisikai nixinire pinīkatini ikapani.

Ikara atoko inaāka atoko, ipina. ⁴⁷Sotato auīte itikasaakiri, ikenakotakasaakiri, itxa:

—Atāopitikara ikira kiki atāo inakarinoka kamakarī iua. Maerekati !ikama — itxa sotato auīte.

⁴⁸Kākiti iuaā apotiitakaniua ikara atamatakasaakina, itorotana iaritana ipikarautini xika. Ininiā isipekana. ⁴⁹Ikinika Xesosi aōkimanere, sitoakoro Kariréiakini, iua tikini sikani pakini aua iuaā. Ikira atoko itikanātarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰Iuasaaki iuaā aua Xosee inakori. Xoteo auīteakori otākikakarī iua. Erekarī iua. Erekarinoka ikama. ⁵¹Arimateia sitatxitikiri iua. Arimateia sitatxiti, Xotéia tōpa aua. Iātapapikari Teoso ikinimane auīte ininiua. Mítxipe apanakini Xoteo auīteakori otākikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵²Xesosi ipinaka atoko, Xosee sari Piratomoni. Amanaaari Xesosi ito akaurimoni itakini ikapani. Ininiā Pirato sikari Xesosi ito iuamoni. ⁵³Ininiā iua makatxakarī Xesosi ito itokakitikoātaā. Iapirikari mākatxi mataā, kai iriko āki taka itxari. Mítxi ipikari !auapanika iua iriko āki. ⁵⁴Ikara oti sesta veira. Ikinika sesta veira, Xoteoakori tomatini oti apisa, Xoteoakori aiamata tomatiko oti ikapani.

⁵⁵Sitoakoro Kariréiakini Xesosikata ikani sari Xosee tikini kai irikomoni. Ninoa nirekari imarotini Xesosi ito

takikoātaā. ⁵⁶Eereka ninoa kanapiriā aapokomonina. Kamariāro, aātsopa ātiāo pakini apotiitana Xesosi itoā itakinina ikapani. Ininiā tomatiko oti tomatata itxana, kotxi Teoso paniātakiti iaōka ikamana.

Xesosi Iuaikana Auāki Inini

(Mateo 28.1-10; Marko 16.1-10; Xoão 20.1-10)

24 Tomīkosaaki ikanōkapanika, sitoakoro sari kai irikomoni, kamariāro Xesosi itoā itakinina ikapani. ²Ninoa apokasaaki iuaā, atamatarina. !Katoreikari kai iriko. Kai tore makatxakapeēkaika. ³Ininiā ninoa itoā, txama kona apokarina Xesosi ito. ⁴Ininiā sitoakoro:

—Itapari Xesosi ito? Kanatokopa itxa? —itxanātana.

Iuasaakipeka ipi kiki tokiā. Itimana sitoakoro apisatoō. Pomēkori mākarini ninoa. Mēkokari iotximere atoko itxa ninoa māka. ⁵Sitoakoro pikarauata, ininiā iākana. Ixitipeka auakiitana. Ininiā ninoa kiki txana:

—Kinirepa hinitanātari auāki inakarī ipīkani sauaki? ⁶!Uaiikari iua. Okitikapekaua. Hixinikari isākire Kariréia hitekata auakasaaki. ⁷Ia atoko itxa isākire: “Hītari iaxitikiri sikaākako maerekanimoni. Eereka nipinako aamina ipiriāmitakarī nopini. Eereka ipi āti otisaaki iuaikana nōkitikauako,” itxa Xesosi. Hixinikariko isākire —itxana.

⁸Ininiā ninoa sitoakoro:

—Ari ikara atokopitikara itxapeka isākire —itxana.

⁹Eereka ninoa sipeka. Ōsi Xesosi moianariakorimoni isana. Apanakini kākiti iuaā aua apaka. Iuaā ninoa sāpiretana ikinipoko itikakitina.

¹⁰Maria Matarenama, Xoanama, Maria Txiako inoroma, apanakini pakini sāpiretari Xesosi moianariakori itikakitina. ¹¹Txamari Xesosi

moianariakori kona auikari ninoa sákire.

—Paxirari hisákire —itxana.

¹²Petronoka auikari ninoa sákire, ininiã imiteékata kai irikomoni. Iãka, iriko áki atamatini íkapani. Mãkatxi matanoka, Xesosi ítoã Xosee iapirikakitinoka atamata. Eereka aapokomoni íkanapiriã. Isikasaaki, itsorikaãna, Atamatakiti ixinikanãta.

Emaoso Kimaporiti Sikani

(Marko 16.12-13)

¹³Ikara ôti ipi Xesosi sákire auiãkani iãpota Emaoso inakori aapokotxitimoni. Xerosareẽ pipotorikasaaki, ipi oara napa atoko papoka Emaoso. ¹⁴Ninoa ipi sãkirauanãta isaãpotakasaakina. Isãkiretarina, ixinikarina Xesosi ipinini pirena. ¹⁵Isãkirauanãtakasaakina, iuasaaki Xesosi ina ninoa tikini, ininiã iua sa ninoakata. ¹⁶Txamari ninoa kona imarotari iua Xesosi ininiua. ¹⁷Ininiã Xesosi:

—Kipa híte sãkirenãta? —itxa Xesosi.

Ininiã ninoa iotoka. Iuasaaki ninoa toõ oerekari imatinianiuatinina. ¹⁸Kiropasi inakori apakapapiretari:

—Ikinimane Xerosareẽ auakani imarotari Xesosi okiko pirena. Atxiiti pite átiãtaã íkarikai? —itxari.

¹⁹Ininiã Xesosi txari:

—Natokopa itxa iua? —itxa.

Ininiã ninoa:

—Xesosi Nasaree sitatxitikiri iua. Teoso sákire sãpiretakari itxaua. Teoso, kãkiti apaka apokaerekatari isákire, ikamakiti pakini, kotxi paposotiireri isákire, ikamakiti pakini. ²⁰Sasetotxi auíteakori, aãuíteakori apaka sikari iua okiko íkapani, aamina ípiriãmitakari nopini ipinini íkapani. ²¹Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²²Mixikanani sitoakoro iua sákire auiãkani sãkirauata atekata. Ininiã atsorikaãta. Isãpiretauana

íkanõkapanika akauarimoni isinina. ²³Txamari ninoa kona apokaikari Xesosi íto. Ninoa sákire, aõkitana Teoso nitiriakori iaxitikini iuaã. Ninoa sãpiretana sitoakoro Xesosi iuaikana õkitikapekaua. ²⁴Eereka átikaka imoianariakori sari iuaã atamatinirina íkapani. Sitoãkini sákire atãopitikara. Txamari !aõkitari Xesosi iuasaaki —itxa Kiropasi.

²⁵Ininiã Xesosi txana ninoa:

—Miikiteni hitxaua. !Hinirekari hãuikiniri Teoso sákire sãpiretakani sãpiretakiti imakinika Teoso sákire, ²⁶kotxi ninoa txari: “Teoso nirekari imereékiti atatsiirauatini, Teoso tixine íkanapiriini apisapanika,” itxa Teoso sákire —itxa Xesosi.

²⁷Iãpotakasaakina, Xesosi sãpiretana ninoa Teoso sákire iuaka pirena. Merepanika iuaka oerekaua Moisesi iõkatsopatakitiã, eereka Teoso sákire sãpiretakani iõkatsopatakitiã. Iuaka oerekaua imakinika Teoso sákire iõkatsopatakoriã auakariã.

²⁸Iuasaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹Ininiã itxana:

—Kona pisipe apikomoni. Mapiãnikata, ininiã atekata pikaikota —itxarina.

Ininiã Xesosi íroã aapokotxiã ninoakata ikaikotini íkapani. ³⁰Iitopãka ninoakata inipokotini íkapani. Iuasaaki Xesosi kosekari komiri.

—Teoso, erekapitikari pisikakiti atemoni —itxa.

Iuasaaki imapixinikari komiri, sika itxana ninoamoni. ³¹Iuasaakipeka ninoa imarotari Xesosi ininiua. Iuasaakipeka, ereékoka itxa. ³²Ininiã ninoa misãkiretakakaua:

—Atãopitikara, kimaporíã isãkirauaãpotakasaaki, Teoso sákire oerekarauaãpotakasaaki, axinire poxokoniuata iuasaaki —itxana.

³³Iuasaakipeka ninoa aiamata. Ikanapiriána Xerosareëmoni. Iuaã apokana ôsi Xesosi moianariakori, apanakinikata. ³⁴Isãpiretana:
—Xesosi auãki inini pirena atãopitikara. Apiananiri ôkitikapekaua. Petromoni oerekapekaua —itxana ninoa.

³⁵Ininiã eereka Kiropasi imoianarikata sãpiretana kimapori isinina pirena. Isãpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekaua Imoianariakorimoni

(Mateo 28.6-20; Marko 16.14-18; Xoaõ 20.19-23; Átosi 1.6-8)

³⁶Isãkirauatapanikana inakasaakina, Xesosi tokiã ninoa sauaki.

—Erekaxinire hĩtxako —itxa.

³⁷Itikoãkatana. Ipikarauatana. Kamiri iuãkatarina.

³⁸—Kinirepa hĩtikoka? Kinirepa kamaxirepeka hĩtxa iikiteta?

³⁹Hãtamariko niuako, nikiti pakini. Iuapitikarano nota. Himaãtakano. Kamiri !kaxiniri. Kamiri kona kapiri. Hãtamatano. Niũtokara. Kamiri !nitxaua —itxa Xesosi.

⁴⁰Ininiã oerekari iuako, ikiti pakini ninoamoni. ⁴¹Ninoa iteene poxokoni-uata, txamari !iteene !auikapanikarina atão Xesosi ininiua. Ininiã iuasaaki Xesosi pimaãna:

—Nipokori aua hĩtemoni? —itxa.

⁴²Ininiã ninoa sikari ipixini ximaki kimitakori. Mapaã apaka isikarina.

⁴³Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nipokori.

⁴⁴Eereka iua misãkiretana ninoa:

—Mitxi hĩtekata nauakasaaki, nisãpiretai ikinipoko nota pirena Teoso sãkire iõkatsopatakoriã. Noerekapekai hĩte Moisesini iõkatsopatakiti, Teoso sãkire sãpiretakani iõkatsopatakiti.

Xikari iõkatsopatakori apaka noerekapekai. Imakinika ninoa sãpiretakiti nota pirena apokapeka.

⁴⁵Iuasaaki isikaimaroretana ninoa Teoso sãkire iõkatsopatakori imarotinina ikapani, ininiã iuasaaki ninoa imarotari atão. ⁴⁶Itxari:

—Kitxakapiriãka iõkatsopatapeëkaika: Teoso mereëkiti atatsiirauatako. Okaãkako. Ipi äti õtisaaki õkitikauako.

⁴⁷Kãkiti nisãkire auiãkani iaripiretariko niokanapirena erekari ikini itixiti. Merepanika Xerosareë auakanimoni isãpiretaãkako, eereka ikini itixiti auakanimoni isãpiretaãkako. Ninoa oerekariko kãkiti takanapiniri imaerekanina, ininiã iuasaakipeka Teoso makatxakariko maerekati ikamakitina. ⁴⁸Hĩkinika hĩte itikapekari nipinini. Hãtamatano nota iuaãkana auãki ninini. Ininiã iteene himarotari nota pirena apanakini hĩsãpiretini ikapani. ⁴⁹Nota iokanatariko niri sikaenetakiti, Erekari Matamatakoti, hĩtemoni. Uai sitatxi hĩkaikotako. Hiãtapariko iua apokini. Ininiã hãpakapariko Teoso posotiire itano ikari —itxa Xesosi.

Xesosi Anikaãka Teoso Tixinemoni

(Marko 16.19-20; Átosi 1.9-11)

⁵⁰Xesosi anikari imoianariakori Petãnia sitatxitimoni. Iuaã apokasaakina, Xesosi õkitikauakotaua. Itxari Teoso:

—Niri, naia pinikata. Pitakari erekari naiamoni —itxa.

⁵¹Isãkirauatakasaaki, anikaãka Teoso tixinemoni. ⁵²Iuasaaki ninoa:

—Peerekari Xesosi. Iuanoka Apiananiri —itxanãtana.

Eereka Xerosareë ikanapiriãna ipoxokoniritikana. ⁵³Ikiniõtika isana Teoso misãkiretiko aikotimoni. Iuaã ninoa misãkiretari Teoso:

—Peerekai. Erekapitikari pikamakiti
ate ìkapani —itxanātana ikiniōtika.
Ameë.

XOÃO

Xesosi, “Teoso Säkire” Inakori

1 Itixi kamiko apisa iua “Teoso Säkire” inakori auapeka. Iua Teosokata aua. Iua Teoso txaua. ²Ikinipoko potorikikosaaki Teosokata auari iua “Teoso Säkire” inakori.

³Teoso paniätari iua ikinipoko ikamini. !Auari iua makamakiniti. ⁴Xesosi, “Teoso Säkire” inakori, kamari itanapokoka auäki inini. Iuanoka sikari ikinipoko auäki inini, kotxi iuanoka auapika. Iua tirikapi atoko itxa, kotxi iopinikari käkiti xiniremoni Teoso säkire imarotini ikapani, ätipirika auini ikapani. ⁵Iopinikari ipiä. Ipiä kona xipokari iua tirikapi kamara.

⁶Teoso iokanatari isäkire säpiretakari tükane kiki Xoã inakori. Iokanatari iua käkitimoni, käkiti xinire iopiniäkari isäpiretini ikapani. ⁷Isäpirenauata, Teoso säkire ikinimane imarotini ikapani, auikapiretinirina ikapani. ⁸Kona Xoãoni käkiti xinire iopiniäkari txaua. Xoã iokanataäka käkiti xinire iopiniäkari isäpiretini ikapani. ⁹Iua atão iopinikari käkiti xinire. Apoka ikoraxiti, ikinipoko käkiti xinire iopinikini ikapani.

¹⁰Iua “Teoso Säkire” inakori aua ikoraxiti. Iua kamari itixi, iuaritika ikoraxiti auakani kona auikapiretari iua säkire. ¹¹Iua apoka itixi ikamakitimoni, txamari käkiti ikamakini kona nirekari iua. ¹²Iuaritika apanakini nirekari iua, ininiä auikarina isäkire. Ininiä iua sikaposotiiretana ninoa Teoso anaakori ininiuana ikapani. ¹³Aponaniäkasaaki, Teoso anaakori !atxaua. Ateka Teoso anaakori akaminiua !aposota. Kona käkيتينi txikitakaua Teoso anaakori aniniäua. Teosora kamari iua anaakori aniniua.

¹⁴Käkiti itxapekaua iua “Teoso Säkire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isäkire atäonoka itxa. Ikara atoko itxa, kotxi iri Teoso. Teoso äkiri imatonökari itxaua Xesosi.

¹⁵Xoã säpiretari Xesosi käkitimoni. Ia atoko isäpirenauata:

—Iua, hitemoni nisäpiretakiti: “Nota tikinimoni apokakari, apiatako iua. Nota poiäoka, kotxi nota auini apisapanika auapeka iua.”

¹⁶Ikinipoko erekari aua iuamoni, ininiä amakinika ate apakapari ikinipoko erekari iuamonikiri. Isikaäpotari erekari atemoni. ¹⁷Aimartari Teoso paniätakiti säkirextiti, kotxi Moisesini oerekepekaua. Apiaerekata Xesosi Kristo oereëkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atão inakari aimarotini ikapani. ¹⁸Teoso atamatakari !auari. Imatonökari Teoso äkiri, irikata auakari, iuara oerekaua Teoso aimarotini ikapani, kotxi Teosotxikana iua.

Xoã Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹Xoteo auiteakori Xerosareë sitatxiti auakani iokanatana käkiti Xoãomoni. Iokanatana sasetotxiakori. Iokanatana sasetotxiakori moianatakani apaka Xoãomoni, ipimainirina ikapani: “Kinakariparai pite?” ²⁰Kona Xoã kipatari isäpiretinina. Atão isäpiretana:

—Teoso mereëkiti käkiti iätapakiti, kona nitxaua nota —itxa.

²¹Ininiä ipimaärina:

—Ikara atoko ininiä kiriparai? Eríasikani? —itxana.

—Kona iuano —itxa.

—Teoso sãkire sãpiretakari aiãtapakiti-
tikani atxiĩti? —itxana.

—Kona iuano —itxa.

²²—Ikara atoko ininiã, natokopa in-
akariparai pite? Ninoa ate iokanatakani
nirekari imarotiniina pite. Natokopa in-
akaripa pite? —itxana.

²³Ininiã Xoão:

—Teoso sãkire sãpiretakari Isaía in-
akori iökatsopatakiti txari:

Auako kiki ãparaã makipakaniãtaã.

Isãpirenauatako. Itxariko:

“Hõeratariko kimapori Apiananiri
apokini apisapanika. Itikaãpo
erekari hikamako iua napini
ikapani,”

itxa Isaía. Iua kiki ãparaã makipakaniã-
taã kasãpirenari, iuakarano nota. Iua
Isaía sãpiretakitkarano nota —itxa
Xoão.

²⁴Pariseoakorira iokanataka ninoa
kiki Xoãomoni. ²⁵Ipimaãrina Xoão:

—Iua Teoso mereẽkiti aiãtapakiti
piminakanisaakiaua, Eríasi inakori pimi-
nakanisaakiaua, Teoso sãkire sãpiretakari
aiãtapakiti piminakanisaakiaua, kinirepa
pite patxisatari kãkiti? Kipaniãpa pite
patxisarauata? —itxarina.

²⁶—Ãparaãnanira nota patx-
isarauata. Hĩte sauaki aua kiki
himimarotakiniti. ²⁷Iuara, nota tikini
apokakari, apiatakari iua. Minakati
nitxaua nota, ininiã kona apakata
napokini iua takote. Kona apakata
ikiti mata tsapitsa nikoxirikini, kotxi
minakati nitxaua —itxa Xoão.

²⁸Ikara atoko Xoão sãpiretana
ninoa Xotão ipiniã Petãnia sitatxiti,
ipatxisarauatiniãtaã.

Soti Auĩte ãkiri, Teoso Nakiti

²⁹Katimatinĩkata Xoão atapari Xe-
sosi, iuamoni inini. Xoão sãpiretana
apanakini itakote auakani:

—Hãtapari. Erenapani soti auĩte
ãkiri Teoso nakiti, kotxi ikinimane

maerekani makatxaãkari itxaua.

³⁰Mitxi nisãpiretakitikara ere. “Kiki
apokako nota tikini. Apiananiri iua,
kotxi nota mauakanisaakipanika
iua aua.” ³¹Mitxi nota apaka kona
nimarotari maerekanitxi makatxaãkari
uãka. Nota patxisatari kãkiti ãparaã,
kotxi iusaaki nisãpiretari iua pirena
Isaio tixini auakanimoni —Xoão txana
ninoa.

³²Xoão sãpiretana apanakini itikakiti:

—Nota itikari iua Erekari Mata-
matakoti Teoso tixinekiri katxakini.
Kamoa katxakini atoko itxa iua. Isari
Xesosimoni, kaikota itxa iuakata.

³³Ikara apisa kona nota imarotari
iuãka. ãparaã nipatxisarauatini
paniãtakari sãpiretano: “Pititariko
Erekari Matamatakoti katxakini.
Kikimoni apokini pititariko. Iua
kiki patxisarauatini ãtião, kotxi
isikari Erekari Matamatakoti
patxisatakonimoni,” itxano. ³⁴Notakara
itikari ikara. Nota sãpiretari nitikakiti,
ininiã nimarotapitikari ia kiki Teoso
ãkiri ininiua —itxa Xoão.

Merepitipanika Xesosi Moianariakori

³⁵Katimatinĩkata iuaĩkana Xoão
auanãta iuaã ipi imoianariakorikata.
³⁶Iusaaki itikari Xesosi inapaãpotini,
ininiã akiritari imoianariakori:

—Hãtapari. Ere kiki, soti auĩte ãkiri
Teoso nakiti itxaua —itxa.

³⁷Ikara ikenakotakana atoko ninoa
ipi imoianariakori sari Xesosi tikini.
³⁸Ininiã Xesosi sapotorika, atapana iua
tikini ikani.

—Kipa hinireka atxiĩti? —itxana
ninoa.

—Koerekareri, namonipa paua pite?
—itxarina.

³⁹—Masa, hãtamata —itxa.

Ininiã isana iuakata, atamata itxa-
rina iua auiniãtaã. Iusaaki kikatapeka.
Eereka ikanõkapeka ikanapiriãna.

⁴⁰ Ninoa Xoão moianariakori, Xesosikata sikani, Átree, Átree moianari pakini. Simão Petro itari itxaua iua Átree. ⁴¹ Eereka Átree sari katimariã itari Simãomoni.

—Ate aõkitari Teoso mereëkiti aiãta-pakiti —itxa.

⁴² Ininiã Átree anikari itari Simão Xesosimoni. Xesosi atamatari Simão.

—Pite Simão, Xoão inakori ãkiri. Uatxa pite Petro pinaãkako —itxa.

Kai sorotxikana iuãka Petro.

Piripi, Natanaeo Pakini Xesosi Akiritini

⁴³ Katimatinikata Xesosi nirekari Kariréia tõpamoni isini. Iuaã aõkitari Piripi inakori.

—Notakata masa. Nimoianari pitxapekauako —itxari.

⁴⁴ Iua Piripi aapoko Petsáita sitatxiti. Iuaã apaka aua Átree, Petro pakini aapoko. ⁴⁵ Iuasaaki Piripi nitari Natanaeo inakori. Apokasaakiri isãpiretari:

—Ate aõkitari kiki. Moisesini iõkat-sopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aaõkita. Iuakara Xesosi txaua. Nasaree sitatxitikiri iua. Xosee ãkiri iua Xesosi —itxari.

⁴⁶ —Nasaree sitatxitiã lauari erekari —itxa Natanaeo.

—Auapitika. Masa, maãpiãkatari iua —itxa Piripi.

⁴⁷ Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

⁴⁸ Ininiã iuasaaki Natanaeo kenakotari Xesosi sãkire. Ipimaãri Xesosi:

—Kiãtokopa ininiãpa pimarotano nota? —itxari.

Xesosi txari iua:

—Piripi akiritinii apisapanikara, ni-marotari piko kati patapi piitopãkanãta.

⁴⁹ Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auãte pitxaua —itxari Xesosi.

⁵⁰ Ininiã Xesosi:

—Pite auikari nisãkire, kotxi nimitakinitika nimarotari piko kati patapi piitopãkanãtini. Pite imarotapanikariko apia posotiiiretxi. ⁵¹ Pite itikariko Teoso tixine osereëkiko. Pitikariko Teoso nitiriakori kanikini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

Xesosi Inoãkari Áparaã, Iãriãpeka Itxikitakini

2 Ipi õti napaka atoko aua kiiniri tani-rauatiko pirena kiiniriti Kanaa sitatxiti Kariréia tõpa. Xesosi inoro aua kiiniriãtaã iuasaaki. ² Kakiiniriteri ke-mãitxitari Xesosi, imoianariakori pakini. ³ Iãriã xipoka atoko Xesosi inoro:

—!Auaika iãriã —otxari Xesosi.

⁴ Ininiã Xesosi:

—Kinirepa ikara atoko pitxano? Niposotiire manapi !apokapanika —itxaro inoro.

⁵ Ininiã Xesosi inoro txana kaapokori nitiriakori:

—Ipaniãtakiti iaõka hãkamako —otxa.

⁶ Iuaã kopiti aua, seisi pakini, mitari kopititi, kai kamakori. Naia kopiti ãki aua áparaã Xoteoakori arokiniua ikapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ikapani. Átika iua kopiti mãikari áparaã seã arãtro.

⁷ Xesosi paniãtana kaapokori nitiriakori:

—Hããpokakari naia kopiti ãki áparaã —itxana ninoa.

Ininiã ninoa xãpokakari kopiti ãki áparaã. Isonakatapeka apoka áparaã.

⁸ Ininiã Xesosi:

—Hisorokaātari āparaā, sika hītxari kakiiniriterimoni iātini ikapani.

Ininiā ninoa anikari āparaā kakiiniriterimoni. ⁹Iua kakiiniriteri iātari. Iuasaaki iāriāpeka itxapekaua āparaā.

—Amonipa ina ia iāriā? —itxa.

!Imarotari. Ninoa nitiritxi āparaā anikakari imarotari iua iāriā. Ininiā kakiiniriteri txari itanorouatakari:

¹⁰—Kinirepa mixikanani ia iāriā apia erekari na pisikaua? Apanakini sikari iāriā apia erekari kiiniri poterikasaaki. Kākiti kamitope inakasaakiika apanakini sikari iāriā poiāo erekari. Txamari uatx- aika pite sikari apia erekari —itxari.

¹¹Iuasaaki Xesosi mipotorikari iposotiire Kanaa sitatxiti Kariréia tōpa iua auakasaaki. Iposotiire oerekari Apiananiri ininiua. Ikara atoko ininiā, Xesosi moianariakori auikari Xesosi Teoso mereēkiti kākiti iātapakiti ininiua, kotxi ninoa itikari iposotiire.

¹²Ikara atoko inaāka atoko Xesosi, inoro, itariakori, imoianariakori pakini sari Kapanaoō sitatxitimoni. Iuaā ikaikotana mapaōtipeka.

Pirātxi Omitikiko Pirena

(*Mateo 21.12-13; Marko 11.15-17; Arókasi 19.45-46*)

¹³Xoteoakori kiinirite Páskoa inakori apisapanika, Xesosi sari Xerosareēmoni.

¹⁴Isa Teoso misākiretiko aikotimoni. Iuaā pirikeri āki itikari pirātxi vēxtitakani, kema auīte, soti auīte, kamao pakini vēxtitakani. Itikari txineirota sikakani apaka. Amesa takote ninoa topākanāta. Ivēxtitarona txineirota. Apakaparonā āti uāka txineirote, kotxi oa ātoiāo, ininiā Xoteo txineirote isikana. ¹⁵Ininiā Xesosi kosekari aāpitsa. Īpatari. Aāpitsaā omitikenatana ninoa pirātxi vēxtitakani. Omitikenatana kema auīte, soti auīte Teoso misākiretiko aikoti takote auakani. Ikakanapiriāri amesa

txineirota apakapikoātaā. Txineirota xikepoakatani. ¹⁶Ipaniātana kamao vēxtitakani:

—Himakatxakariko kamao. Hanikariko mapara. Niri aapoko āki hīvētxirauatini !apakata. Kona uaini pirātxi vēxtitiko —itxana ninoa.

¹⁷Iuasaakipeka imoianariakori xinikari Teoso sākire iōkatsopatakori:

Nota iteene tīretari paapoko pite misākiretiko aikoti. Iua xika nokaākako,

itxa Teoso sākire iōkatsopatakori.

¹⁸Eereka Xoteo auīteakori misākiretari Xesosi:

—Teoso paniātiniāi ninoa kākiti iua misākiretiko aikotiā auakani pomitikenatini, poerekaua posotiiretxi Teoso paniātiniā aūikini ikapani —itxana ninoa.

¹⁹Xesosi apakapapiretari:

—Hīrikariko ia Teoso aapoko. Ipi āti pakini ōtisaaki iuaīkana nōkitikariko ia Teoso aapoko —itxa Xesosi.

²⁰Ininiā ninoa:

—Anekani. Koarēta seisi anokanani iua aiko kamiko. Kiātokopa pitxari ipi āti pakini ōtisaaki pōkitikiniri iuaīkana? Kona kiikitei pite pisākire ikara atoko pinini —itxarina Xesosi.

²¹Txamari Xesosi sākire “Teoso aapoko” ixinikari iūto. !Ixinikari Teoso misākiretiko aikoti. ²²Xesosi ipinaāka atoko, ōkitikaākaua atoko, iuasaakipeka imoianariakori xinikari ikara Xesosi sākire. Iuasaaki ninoa auikari Xesosi sākire. Auikarina Teoso sākire iōkatsopatakori sāpiretiniri Xesosi atāo Teoso ākiri ininiua.

²³Xesosi Xerosareē auakasaaki, Páskoa kiiniriti auakasaaki, itomaneri kākiti auikari Xesosi Teoso mereēkiti ninoa iātapakiti ininiua. Ninoa itikari posotiiretxi ikamakiti, ininiā auikarina Xesosi sākire. ²⁴Txamari Xesosi !auikari kākiti sākire, kotxi imarotari

ikinimane ākixinire sākire. ²⁵ Kākiti ākixinire sākire !lipimaāri xatiki, kotxi imarotapekari kākiti ākixinire sākire.

Nikotemo Pirena

3 Āti ikanōkati Nikotemo inakori motika Xesosimoni. Iua Xoteoakori auīte itxaua. Pariseo itxaua apaka. ² Iua misākiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniā, kona piposotari posotiiretxi pikamini, ininiā ate imarotari Teoso iokanatai pite kākitemoni —itxa.

³ Ininiā Xesosi:

—Iuaīkana iponaniākarira sari Teoso auītetxi ininiātaāua. Iuananira sari iuaxiti. Atāopitikara ikara atoko nitxai pite —itxa.

⁴ —Kiātokopa pitxa auapekarikai iuaīkana piponaniini? Kona piposotari pinoro āko āki iuaīkana piiroini. Kona piposotari iuaīkana piponaniini —itxa Nikotemo.

⁵⁻⁶ Ininiā Xesosi:

—Atāopitikara ikara atoko nitxai. Piponaniākasaaki, piri, pinorokata ākirinanira pitxaua. Iua Erekareri Matamatakoti iponaniākitakiniāi, Teoso ākiri pitxaua. Kākiti, iua Erekareri Matamatakoti iuaīkana iponaniākitaākitinanira, sari Teoso auītetxi ininiātaāua. ⁷ Koniko pitsorikaātapeko. Piponaniāko ipikata. Ipikata pimiponaniākaniā, kona pisari Teoso auītetxi ininiātaāua. ⁸ Ītima xōkarauata inirekiniātaā. Pikenakotari ixōkarauatini, iuaritika na pimarotari ĩtima sinimoni. Na pimarotari ĩtima ininimoni. Iua atokokana !kimarotikori Erekareri Matamatakoti iuaīkana iponaniākitaākiniri kākiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisākire — itxa.

¹⁰ Ininiā Xesosi:

—Koerekareri apiari pitxaua. Kākiti Isaeo tixini auakani poereka. Txamari pite !imarotari ikara atoko nininii pite. ¹¹ Atāopitikara ikara atoko nitxanātai pite. Ate sāpiretari aimarotakiti, aītiākiti pakini. Txamari !hinirekari hāuikapiretiniri asāpiretakiti. ¹² Īkorapokoriti pirena nisāpiretakasaakii, !pauikari nisākire. Atauako pauikatari nisākire Teoso tixine pirena nisāpiretakasaakii? ¹³ Kona kākiti sapanika Teoso tixine. Ātinoka sari iuaā, Teoso tixine potorikakarinoa, kākiti itari iaxitikirinoka sari iuaā.

¹⁴ —Kitxakapirīka āparaā makipakaniātaā Moisesini ōkitikari imini metao kamakori aāke mapotōkireē. Itano itakari. Kākiti Teoso sākire auiākani imini akatsatakini atamatari Moisesini ōkitikakiti, ininiā kona ipinana. Iua atokokana kākiti itari iaxitikiri ōkitikaākako. ¹⁵ Ininiākara iua sākire auiākari kona ipinaika. Auapikako.

¹⁶ —Teoso iteene turetari ikini itixiti auakani, ininiā iokanataru imatonōkari imi kākitemoni. Ininiā iua sākire auiākanirako kona ipinaikako. Ātipirika auapikako. ¹⁷ Teoso iokanataru imi kākitemoni ikini itixiti auakanimoni kona imisiritinina ĩkapanini. Iua iokanataru imi kākiti maerekani imaktxakini ĩkapani, ninoa imapinakani ĩkapani.

¹⁸ —Teoso ākiri sākire auiākari kona iokanataāka kākiti misiritikomoni. Iua Teoso ākiri sākire mauīākati, iuarako sako kākiti misiritikomoni. Teoso ākiri sākire imauīākani xikara ikara atoko inaākanako. ¹⁹ Teoso ākiri sākire mauīākani misiritaākako, kotxi atāo inakari oerekakareri kākiti xinare iopiniākari apokapeka ĩkoraxiti. Iua

oerekari atão aimarotini ikapani. Tirikapi atoko itxa, kotxi oerekaua atão. Ninoa mauikareni kona nirekari tirikapi. Inirekarina ipiã, kotxi maerekati ikamanātana. ²⁰Maerekati kamakari kona nirekari tirikapi. Kona tirikapi takote kona aua, kotxi ipikari ikamara. Ipikari kākiti itikiniri maerekati ikamini. ²¹Teoso sākire iaōka kamakarira sari ikamaraã, kotxi ikamara oerekari apanakini iua kamakiti atão inini Teoso nirekiti iaōka inini —Xesosi txari Nikotemo.

Xesosi Apiari, Xoão Poiãori Inini

²²Ikara atoko inaka atoko Xesosi imoianariakorikata sari Xotéia tōpamoni. Mapaōti ikaikota imoianariakorikata iuaātaã. Imoianariakori patxisatari kākiti iuaã. ²³Xoão apaka patxisatari kākiti Enō inakoriātaã, Sarī inakoriātaã takote. Ipatxisarauata iuaātaã, kotxi iuaātaã āparaã kaiōpokori. Ikiniōtika kākiti sari iuamoni iuaātaã, ininiã Xoão patxisatana. ²⁴Iuasaaki Xoão kona takaākapanika kateia āki.

²⁵Iuasaaki Xoão moianariakori sākirauata apanakinikata kākiti arokiniua pirena, Teoso misākiretiko aikoti āki iiroinina apisa pirena. ²⁶Apokana Xoāomoni.

—Koerekareri, Xotão ipiniã iua kiki pite patxisatakiti, atemoni pisāpiretakiti, uatxa iua patxisarauatapeka. Ikinipoko kākiti sari iuamoni. Atemoni lerekari ipatxisarauatini —itxana.

²⁷Xoão apakapapiretana ninoa:

—Erekapitikari ipatxisarauatini, kotxi Teoso paniātari iua. Teoso masakaniāri posotiiretxi kākitimoni, kona xatiki iposotari iparikauatini Teoso ikapani. ²⁸Nota kona Teoso mereēkitino. Kākiti iātapakiti kona nitxaua nota. Teoso iokanatano nota Teoso mereēkiti apokini apisa. Ikara hīte imarotapeka. Ikara atoko

nitxapekai hīte. Hisāpiretari ikara apanakinimoni.

²⁹—Maxinikari kiki
 ĩtanorouatakasaaki. Sito
 amanaākito iua nakiti otxaua.
 Imoianari topāka iua takote.
 Ipoxoniuata ĩtanorouatakari sākire
 ikenakotakasaaki. Iua atokokana nota
 poxoniuata. Nota iua moianari atoko
 nitxaua. Xesosi iua ĩtanorouatakari
 atoko itxaua. Kākiti iua nakiti
 itxaua. ³⁰Xesosi apiaāpotako. Nota
 poiāōpotako.

³¹—Iaxiti ikari Apiananiri. Itixi
 auakani imarore poiāonoka, kotxi
 itixinoka imarotana. Teoso tixine ikari
 Apiananiri itxaua. ³²Iua sāpiretari
 itiākiti. Ikenakotakiti isāpireta. Txamari
 kākiti !auikari isāpirena. ³³Kākiti
 Apiananiri sāpirena auīākani, imarotari
 Teoso sākire atão inini, ininiã apanakini
 apaka imarotari Teoso sākire atão inini.
³⁴Iua Teoso iokanatakiti sāpiretari
 Teoso sākire, kotxi Teoso sikari Erekar
 Matamatakoti iuamoni, ininiã ikinipoko
 Erekar Matamatakoti posotiire aua
 iua Teoso iokanatakitimoni. ³⁵Airi
 Teoso turetari imi. Isikari imi ikinipoko
 imoiaini ikapani. ³⁶Teoso ākiri sākire
 auīākani auapikako Teosokata. Teoso
 ākiri sākire mauīākani kona auapanina
 Teosokata. Teoso omanatapikanako
 ninoa ātipirika —itxa Xoão ninoamoni.

Xesosi Misākiretaro Samariakero

4 Kākiti sāpiretari pariseoakori:
 —Xesosi sākire auīākani, iua patx-
 isatakini, itomaneri. Xoão patxisatakini
 poiāoka —itxana.

²(Ari, kona Xesosini patxisarauata.
 Imoianariakorira patxisatari kākiti.)
³Xesosi imarotakasaakiri pariseoakori
 kenakopiretiniri iua, iuasaaki iua
 osipikari Xotéia tōpa. Kinirāo
 kanapirikari Kariréia tōpamoni.

⁴Inirekari Samaria tōpa ĩpirixititini Kariréia tōpa apokini ĩkapani.

⁵Samaria tōpa ĩpirixititakasaaki, apoka Sikaa sitatxiti takote. Iuaã aua itixi Xoseeni nakiti, iri Xakooni sikakiti kitxakapirika. ⁶Iuaã aua aariko Xakooni kisakakiti āparaã apaātiko. Iuaã Xesosi apokasaaki, iotoka, kotxi isāpakapeka ōtakori ĩpirixititini xika. Ininiã iitopāka aariko takote. Iuasaaki apaniāxitipeka.

⁷Iuasaaki sito Samaria auakaro apoka iuaã, āparaã apaātakarō. Oāpokasaaki, Xesosi amanaãro āparaã:

—Āparaã pisikano —itxaro.

⁸Oa apokini apisapanika Xesosi moianariakori sari sitatximoni nipokori iamotinina ĩkapani.

⁹Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nāparaãte pamanaãno? —otxa.

Ikara atoko otxa, kotxi Xoteoakori kona sākirauata Samaria auakanikata.

¹⁰Ininiã Xesosi:

—Teoso sikakiti pimarotaākamako, pitemoni āparaã amanaākari pimarotaākamako, notamonimarako pamanaãri āparaã, kotxi piātiniãri āparaã nota sikakiti, pauapika ātipirika —itxaro.

¹¹—Kona katiui pite. Kiriāpa papaātari āparaã, kotxi paitanoirikori. Namonipa papokatari āparaã kākiti ātipirika auini inĩkitaākari?

¹²Kitxakapirika aātokirini Xakoo sikaua ate ia aariko. Iua, imiakori, ipiraakori pakini iātari ia āparaã ia aarikoākiri. Pite apiata atxiiti? —otxa.

¹³Ininiã Xesosi:

—Kākiti ia irikoākiri āparaã iātakari iuaikana iposonatapanika. ¹⁴Kākiti nota siākiti āparaã iātakari apikomoni !iposonataika. Ākixinire amomo atoko itxa āparaã nota siākiti. Iua āparaã txikitakari iua ātipirika auini Teosokata —itxaro.

¹⁵—Iua āparaã pisikano nima-pononatakani tīkane, ininiã uai kona ninaika āparaã napaātini —otxa.

¹⁶—Pakiritari pītaniri. Uai piminari —itxa.

¹⁷—Kona kītanirino —otxa.

—Atāopitikara, “Kona kītanirino,” pinini. ¹⁸Sīko pakinipekara pītaniri. Kiki uatxa pitekata auakari na atō pītanirini. Inipitikara pisākire —itxaro.

¹⁹Ininiã oa:

—Teoso sākire sāpiretakari pitxaua pite, kotxi pimarotari ikinipoko nika-makiti. ²⁰Kitxakapirika ate kiomaneakorini apotiitaua Teoso imisākiretinina ĩkapani ia oxiratari nopini. Txamari hīte Xoteoakori txari: “Xerosareēnanira aāpotiitauako Teosokata” —otxa.

²¹Ininiã Xesosi:

—Pauikariko nisākire. Āti ōti apokako. Iuasaaki kona uai oxiratariāni, kona Xerosareēni kākiti apotiitaua aīri Teoso imisākiretinina ĩkapani. ²²Hīte Samaria tōpa auakani apotiitaua Teoso himisākiretini ĩkapani. Txamari, kona atāo himarotari iua. Ate Xoteoakori aimarotapitikari Teoso, kotxi Teoso sikakiti kākiti maerekani makatxakakari Xoteo itxaua. ²³Teoso keto apokapanika, ari apopeka, ininiã aīri Teoso misākiretakani atāo inakani misākiretari iua ākixinireēna. Ninoa sāpiretari atāo inakaranoka iuamoni. Aīri nirekari kākiti ikara atoko inakani misākiretiniri iua. ²⁴Teoso nirekari amisākiretiniri iua aākixinireē, kotxi Teoso ĩto !auari. Inirekari kākiti sāpiretiniri atāo inakaranoka iuamoni —itxa Xesosi.

²⁵Ininiã oa:

—Nimarotapitikari iua Teoso mereēk-iti aiātapakiti, Kristo inakori, apokapitikako ĩkorapokoriti. Iua apokasaaki ikini sereti isāpiretauako —otxari.

²⁶—Nota pimisäkiretakiti Teoso mereëkiti hiätapakitikanano nota —itxaro.

Āti Takarauata, Āti Amarauata Inini Pirena

²⁷ Iuasaakipeka Xesosi moianariakori kanapiriā. Ākixinireēna ninoa tsoṛikaānāta:

—Kinirepa Xesosi sākirauata oa sitokata?

Kotxi oa Samaria auakaro. Iuaritika !pimaārona: “Kiripa ikai?” kona itxarona. Kona ipimaārina Xesosi: “Kinirepa pimisäkiretataro oa?” kona itxarina.

²⁸ Iuasaaki oa sito takanapari oti, sitatximoni kanapiriā otxa. Oākiritari kāk-iti iuaā auakani,

²⁹—Masa. Maāpiākatarī kiki ikinipoko nikamakiti imarotakari. Iua Teoso mereëkiti aiätapakiti atxiiti? —oa txana ninoa.

³⁰ Ininiā iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³²—Nipokori auape nota niākiti tīkane hīte mimarotakiniti —itxa Xesosi.

³³ Ininiā imoianariakori imisäkiretakakana:

—Kiripa sikatarī nipokori Xesosi nikakiti? —itxana.

³⁴ Ininiā Xesosi:

—Nota kamari iua niokanatakiri nirekaākiti. Ninirekari nikaminiri ikinipoko iua paniātakiti. Ia niparīka. Niparīka nikiena atoko itxa, kotxi niokanatakiri paniātakiti nikamini sikataparatanō, nipokori sikataparatinino atokotxikana. ³⁵ Kākiti txari: “Ipi ipi pakini kasiriti auapanika takari iposope inini tīkane, ininiā

uatxa kona niparīkauata.” Ia atoko kona hītxape hīsäkire. Himereka. Hātamatariko takari. Nisāpiretai hīte hītakare iposope haāpoko hanikini tīkane. ³⁶ Iua atokotxikana Teoso sākire takaāka kākiti ākixinireē. Katarereri miparīkatakari apakapari iparīka iki. Iua anikari kākiti Teoso aapokomoni, ātipirika Teosokata auini ikapani. Ininiākara katarereri, iua miparīkatakari apaka poxokoniuatoko. ³⁷ Aātokirini txari: “Āti takarauata, ātipekana apotiitari takari.” ³⁸ Ia sākiretxiti atāo, kotxi nota paniātai hīte mitxi himaparīkauatakaniātaā hamarauatini. Apanakini parīkauat-apeka iuaā. Ninoa takapekari Teoso sākire kākiti ākixinireē. Pasāpaniri ninoa parīka. Ninoa parīkauata mitxi, ininiā uatxa hīte parīka poiāo kākiti Teosomoni hanikini —itxa Xesosi.

Samaria Auakani Auikiniri Xesosi Säkire

³⁹ Kaiāopokori Samariakini iua sitatxi auakani auikari Xesosi sākire, kotxi oa sito mitxi sāpiretana:

—Nikamakiti ikinika isāpiretano —otxana.

⁴⁰ Ininiā ninoa Samaria auakani apoka Xesosimoni.

—Atekata paua —itxarina Xesosi.

Ininiā Xesosi kaikota ipi ōti ninoakata.

⁴¹ Xesosi sākire ikenakotakasaakina, apikomoni ninoa auikapiretari.

⁴² Ninoa misäkiretaro oa sito:

—Uatxa ate auikapiretari Xesosi sākire, kona pite sāpireaānanini, ate auikapiretari. Ateka kenakotapekari iua sākire, ininiākara ate auikapiretari iua sākire. Uatxa ate imarotari atāo inini Teoso mereëkiti ininiua Xesosi. Kākiti itixi auakani maerekani makatxaākari itxaua iua —itxarona.

Auítetxi Ākiri Xesosi Makananitini

⁴³Iuaã ipi ōti inapaka atoko Xesosi sipeka. Kariréia tōpa isa. ⁴⁴Mitxi Xesosi sākire: “Teoso sākire sāpiretakari paxitaāka, txamari Teoso sākire sāpiretakari itixineē auakasaaki, kākiti iuaātaā kona auikari iua sākire,” itxapeka Xesosi. ⁴⁵Iuaritika Kariréia tōpa apokasaaki, kākiti iuaā auakani ipoxokoniritika apakapari Xesosi, kotxi ninoa apaka sari iua Páskoa kiiniriti Xerosareē sitatxitiā. Iuaātaā itikarina Xesosi posotiire. Ininiākara ipoxokoniritikana apakaparina Xesosi.

⁴⁶Xesosi iuaīkana sari Kanaa sitatxitimoni, Kariréia tōpa. Mitxi Xesosi inoākapekari āparaā iāriā ininiua iuaā. Xesosi apokasaaki Kanaa, auítetxi ākiri amianata Kapanaoō sitatxitikiri. ⁴⁷Iua auítetxi kenakopiretari Xesosi Kariréia tōpa apokini, Xotéia tōpa osipikini. Inakasaaki Xesosimoni isa, aōkita itxari Xesosi. Aiatar:

—Masa Kapanaoōmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸Ininiā Xesosi:

—Nimakamakaniāri posotiiretxi, kona hīte nirekari auikiniri nisākire. Posotiiretxi hītikasaakinani, hīte nirekari nisākire hāuikini. Teoso takaōtxikare hītikasaakinani, hinirekari nisākire hāuikini —itxa Xesosi iuamoni.

⁴⁹—Masapoka naapoko. Pimasikanisaaki, namarite ipinapitikako —itxari.

⁵⁰—Pisa paapokomoni. Pamarite kona ipina —Xesosi txari iua.

Iua kiki auikari Xesosi sākire, ininiā isipeka. ⁵¹Ipixinipokoriti aōkitana initiriakori.

—Pamarite auapitikako —itxarina.

⁵²—Namonikitapa akananita? —itxana.

—Kita apaniāxiti apoomari iotoka —itxana.

⁵³Iuasaaki iua kiki imarotari kita Xesosi sākire manapikara: “Pamarite kona ipina,” ininiri manapikara iotoka apoomari. Ikara atoko ininiā, ikinimane iua aapoko auakani, iua pakini auikari Xesosi sākire.

⁵⁴Ininiā ipikatapeka Xesosi kamari posotiiretxi Kariréia tōpa auakasaaki, Xotéia tōpa osipikasaaki.

Matīpokotakati Xesosi Erekapeka Inīkitakini

5 Ikara atoko inaāka atoko Xesosi sari Xerosareē sitatxitimoni, kotxi Xoteo kiinirite Teoso īkapani aua iuasaaki. ²Xerosareē sitatxiti apanīkaki, soti auíte vētxitikoātaā takote aua ipoa xapitikiri. Sīko īronakiko aua iuaātaā. Xoteo sākire Epiráiko. Epiráiko sākireē iua ipoa uāka “Petésita.” ³Ironakikoātaā amianatakanipokoni sirīkanāta. Mōsiāreni, motīkakani, matīpokotakani pakini iuaā auanāta. Iātapanātarina āparaā tokīkaātini. ⁴Teoso nitiri apokanaka iuaātaā. Iua apokasaaki itokīkaātakari āparaā. Āparaā tokīkaātakasaaki, ātika amianatakari ikiika komokaātakari erekapeka itxa. ⁵Matīpokotakati iuaā auanātakari amiananātakari trīta oito pakini anokanani amianata. ⁶Xesosi atamatar iua iuaā isirīkanātini. Imarotari iua uatxakapokoni amiananāta. Ininiā Xesosi pimaāri:

—Ereka pinini pinireka? —itxari.

⁷Amianatakari apakapapiretari:

—Ari, ninirekapitīkamari, txamari kona kanikikono kāuaāriā āparaā tokīkaātakasaaki. Nikomokaaritakasaaki, āti komokape napisapanika —itxari Xesosi.

⁸—Pōkitikaua. Pisirimata pikoseka, sipeka pitxa —Xesosi txari.

⁹Iuasaakipeka erekapeka itxa iua amianatakari. Isirimata ikoseka, t̄ipokota itxapeka. Iua ōti kākiti tomatini ōti. ¹⁰Ininiākara Xoteo aūiteakori txitari amianatakari erekapeka inakari:

—Uatxa kākiti tomatini ōtisaaki pite anikanātari pisirimata. Īkora atoko ininiā, kākiti !auiritaāka —itxarina, kotxi ninoamoni ipar̄ikauata isirimata anikasaaki.

¹¹Ininiā iua kiki:

—Erekape ninikitaākirira paniātano: “Pisirimata pikoseka, sipeka pitxa,” itxano.

¹²Ininiā ninoa:

—Kiripa kiki paniātai pisirimata pikosekini pisini ikapani?

¹³—!Nimarotari iuāka —itxa.

Iuaātaā ipoa xapitikiri takote kaiāopokori kākiti auanāta, ininiā patimari Xesosi sipeka ninoa sauaki.

¹⁴Eereka Xesosi aōkitari iua kiki Teoso misākiretiko aikotiā.

—Uatxa pit̄ipokotapeka, ininiā maerekati pitakanapako. Iuaikana maerekati pikamakasaaki, atxiiti amianari apiatakari inokai —Xesosi txari iua.

¹⁵Eereka iua kiki sari Xoteo aūiteakorimoni.

—Xesosira erekapeka tx̄ikitakano nota —itxari.

Xoteo Omanatiniri Xesosi

¹⁶Tomatiko ōtisaaki Xesosi makananitari iua amianatakari. Ikara xika Xoteo aūiteakori kinirāo okaka txari Xesosi. ¹⁷Xesosi imarotari Xoteo aūiteakori sākire, ininiā itxana:

—Niri Teoso kamari erekari ikiniōtika. Iua atoktxikana nota. Kona niotoka erekari nikamini tomatiko ōtisaaki —itxa Xesosi.

¹⁸Ikara Xesosi sākire xika Xoteo aūiteakori apiata omanatari Xesosi. Ninoamoni Xesosi kamari maerekati

tomatiko ōtisaaki amianatakari imakananitinini. Xesosi sākire: “Niri Teoso,” inini xika, apiata omanatarina iua, kotxi iua: “Teosotxikana nota” itxanāta iua Xesosi.

Xesosi Irikata

¹⁹Ininiākara Xesosi misākiretana Xoteo aūiteakori:

—Atāopitikara nitxai h̄ite. Nota Teoso ākiri nitxaua. Notanani !kakamareno. Nitikari niri kamanātakiti, ininiā niri kamakiti iaōka nikama. Iuanokara nikama nota. Niri kamakitixikana nota kama apaka. ²⁰Niri tiretano nota, ininiā ikini sereti ikamanātakiti oerekano. Oereka-panikariko posotiiretxi apiatapanikako nota kamini ikapani, ininiākara h̄ite tsorikaātako h̄itikasaakiri. ²¹Niri ōkitikari ipikani, iuaikana aua inini t̄ikane. Iua atoktxikana nota tx̄ikitakana kākiti nirekaākini, iuaikana auini ikapani. ²²Teoso kona txari kākitemoni: “Kona erekai pite, ininiā kākiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiā uai pina notakata pauini ikapani,” kona itxa Teoso. Notakara iua ākirikara txari ikara atoko inakari kākitemoni, kotxi Teoso sikaposotiiretano nota ikara atoko inakari nisāpiretini kākitemoni. ²³Ikara atoko ininiākara, kākiti paxitano nota. Niri nirekari nota paxitiko, iua paxitiko atoktxikana. Nota mapaxitakani kona paxitari niri nota iokanatakari.

²⁴—Atāoenepitikara nitxai h̄ite. Nisākire k̄ipitakari, nota iokanatakari sākire aūiākari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵Atāoene nitxai h̄ite. Kākiti xinire ipikari atoko itxa maerekati ikamakiti xika. Teoso ākiri sākire kākiti k̄ipitini ōti apokapanikako. Ari iketo apokapeka. Nota sākire k̄ipitakani auapikako. ²⁶Āiri Teosonoka posotari itx̄ikitakiniri

ikinipoko auāki inini, kotxi iuanoka auapika. Isikaposotiiiretano nota apaka ikinipoko nitxikitakini auāki inini.

²⁷—Āiri Teoso txano nota: “Kākiti itari iaxitikiri pitxaua, ininiākara pitxariko nisākire mauīākani: ‘Kona hīte kīpitari Teoso sākire, ininiā kākiti misiritikomoni hīsa,’ pitxako. Pitxariko nisākire auīākani: ‘Hīte kīpitari Teoso sākire ininiā uai hina Teosokata hāuini ikapani.’ Ikara atoko pitxariko kākitimoni,” Teoso txano nota.

²⁸—Kona hītsorīkaātapeko, ikara sākiretxiti hīkenakotakasaaki. Āti ōti ipikani, katakoni, kenakotariko Teoso ākiri akiritinina. ²⁹Uusaaki ōkitikauanako. Ninoa erekari kamakani auapikako Teosokata. Ninoa maerekati kamakani misiritaākako.

³⁰—Notanani kona nitxari kākiti: “Pite sari kākiti misiritikomoni. Pitepekana inari uai Teosokata pauini ikapani.” Notanani kona ikara atoko nitxari kākiti. Teoso sāpiretakinokara nitxa kākitimoni, ininiākara nisākire kākitimoni atāonoka, kotxi kona nota nirekaākitini nikama. Niri nipaniātakiri nirekaākitinanira nikama —itxa Xesosi.

Xesosi Sākire Atāoene Sāpiretakani

³¹Apikomoni Xesosi sāpirenauata:

—Notaka sāpiretiniāua hītemoni, atx-īiti kona kauikikono. ³²Ātipekana nota sāpiretakari aua. Nīmarotari atāo inini iua sāpiretakiti. ³³Hīte iokanatapekari himoianariakori Xoāomoni nota himarotini ikapani. Iua sāpiretapekana ninoa atāoene nota sākire. ³⁴Kona ninitanātari kākiti nisākire atāo inini sāpiretakani. Nota sāpiretai hīte Xoão sāpiretakiti sākiretxiti, himaerekani Teoso makatxakini ikapani, himapinakani tīkane.

³⁵—Xoão tirikapi tirinakari poniākari atoko itxa. Tirikapi iopinikari ikinipoko, tirikapi takote auakari aātamatinī ikapani. Iua atokokana Xoão oerekari kāk-

iti atāo inakari. Mapaōtinokara hīte pox-okiniuata iua sākire hīkenakotakasaaki.

³⁶—Aua āti nota sāpiretakari. Iua Xoão poiāoka. Ātipekana apiata. Nota kamakitikara apiata. Nikamakiti sāpiretari nota sākire atāo inini. Nikamakiti, niri paniātakiti kākiti itikasaaki, imarotari niri uaimoni iokanatinino nota.

³⁷—Niri, nota iokanatakari kākitimoni, iua apaka nota sāpiretakari. Kona hīte kenakotari Teoso sākirauatini. Kona hīte atamatari itoō. ³⁸Isākire !auari hāixinireē, kotxi kona hāuikari nota sākire iua iokanatakiti sākire.

³⁹—Hīte atatsopatapikari Teoso sākire iōkatsopatakori, hāuini ātipirika Teosokata himarotini ikapani. Ia Teoso sākire iōkatsopatakori nota sāpiretakari apaka itxaua. ⁴⁰Txamari kona hinirekari nisākire hāuikini. Kona hinirekari notamoni hinini, ātipirika Teosokata hāuini ikapani.

⁴¹—!Ninitari niuikiko. ⁴²Iteene nīmarotai hīte. Kona xapiti hītiretari Teoso hāixinireē. ⁴³Niri iokanatanota uaimoni. Txamari kona hīte apakapano nota Teoso iokanatakītino. Teoso maiokanatakinitira hīte apakapa. ⁴⁴Hīte potxitari āti iuikinii. Txamari kona hīkamari erekari Teosonoka iuikinii ikapani, ininiā kona hāuikari iua sākire.

⁴⁵—Kona notani sāpiretapaniri niri hīte maerekani. Moisesira sāpiretariko himaerekani Teosomoni. Hīte uākatari iua sāpiretari hīte ereka hinini, txamari iua sāpiretariko niri himaerekani. ⁴⁶Moisesini sākire iōkatsopatakiti hāuikaākamako, nota sākire apaka hāuikamako, kotxi Moisesini nota sāpiretakari apaka. Iua iōkatsopatapekari nota sākire. ⁴⁷Hīte kona auikapiretari Moisesini iōkatsopatakiti. Isākire iōkatsopatakiti himauikakaniā, kiātokopa hītxa nota sākire hāuikini? —itxa Xesosi.

Síko Mio Kákiti Xesosi Sikakienatini

(Mateo 14.13-21; Marko 6.30-44; Arókasi 9.10-17)

6 Eereka áti öti Xesosi ípiriätari Kariréia poa. Ia ipoa uåka apaka Txiperiatxi poa inaåka. ²Kaiåopokori kákiti sari iua tikini, kotxi ninoa itikapekari Xesosi makananirauatini. ³Xesosi kanika mitaxiratarimoni. Iuaå iitopåka imoianariakorikata. ⁴Xoteoakori kiinirite, Påskoå inakori kiiniriti apisapanika Xesosi sari iuaåtaå. ⁵Iitopåkasaaki, Xesosi atapari itomaneri kákiti apokaåpotini iuamoni. Ininiå ipimaåri Piripi:

—Amonipa aiamotatariko komiri nakira kákiti asikakienatini íkapani?

⁶Xesosi ikara atoko txari Piripi, kotxi inirekari imarotiniri: “Atauako atxiiti Piripi auikari niposotiire?” Xesosi imarotapekari iuaka ikamakiti tåkane. ⁷Ininiå Piripi apakapapireta:

—Txineiropokoni, tosëtosi txineiro ota, kona apakata komiri aamotini, nakira kákiti asikakienatini íkapani. !Apakata —itxari.

⁸Iuasaaki áti Xesosi moianari Simåo Petro itari, Åtree inakori, txari Xesosi:

⁹—Uai aua amarini. Auari ikiena. Síko komiri sevata inakori kamakori auari iua. Ipi ximaki axapitiri apaka auari iuamoni. Txamari kákiti itomaneri sikakienatiko !apakata. Ia nipokori poiåoka —itxari.

¹⁰Xesosi paniätari imoianariakori:

—Nakira hípianiåta iitopåkinina — itxana.

Sotonaikiperi auari iuaåtaå. Iua nopini iitopåkana. Síko mio apikomoni kikiakori aua. ¹¹Xesosi kosekari komiri amarini nakiti. Iuasaakipeka imisåkiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kákiti topåkakanimoni. Iua

atokokanera itxarina ximaki. Ikinikana inirekaka iaõka auana ninoa.

¹²Ikinimane kamitopeka inakasaaki, ipaniätari imoianariakori:

—Itetakori komiri, ximaki pakini håpotiita. Kona hiomatapiriko —itxa.

¹³Ininiå apotiitarina komiri itetakori. Tosi kotarina ixåpokakana komiri itetakori.

¹⁴Xesosi posotiire ninoa kákiti itikasaaki, ninoakakarika isåkirauatana:

—Atåopitikara Xesosi aiåtapanåtakitikara, Teoso såkire såpiretakari inakorikara ere Xesosi —itxana.

¹⁵Xesosi imarotapekari ninoa nirekiniri iauütetinirina iua. Iua kona nirekari ninoa auütetiniri iua. Ninoa mamaikakaniri apisapanika, Xesosi sipeka iuanoka. Apikoxiti oxiratarimoni ikanika.

Xesosi Ipoa Nopini Inaåpotini

(Mateo 14.22-23; Marko 6.45-52)

¹⁶Kikatapeka imoianariakori iokiriåta ipoa tiniå. ¹⁷Iereåtauana kanaua åki. Ípiriaåpotarina ipoa Kapanaoõ sitatxiti manapi. Íkanõkapeka inakasaaki kona Xesosi apokapanika ninoamoni. ¹⁸Kataparari itimati apoka, ininiå tsakatipokoni. ¹⁹Iuasaaki imekoåpotana. Ipixiniåpeka apokasaakina, ataparina Xesosi ipoa nopini itipokotini. Kanauamoni isaåpota. Ninoa pïkarauata, kotxi ninoa uåkatari kamiri.

²⁰Xesosi akiritana:

—Notakara. Kona hípïkarauatape — itxana.

²¹Ininiå apakaparina Xesosi ipoxokoniritikana. Iua morõkokaua kanauaå. Iereåtakasaakiua,

iuasaakipeka kanaua apoka imiriipe Kapanaoõ manapi.

Kākiti Nitiniri Xesosi

²² Katimatinikata ipiniāmoni kaikotakani nitamari Xesosi. Ninoa imarotari ātoka kanaua mitxi iuaā auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³ Iuasaaki kanauaniri Txiperiatxi sitatxitikini apokita Xesosi merepani Teoso misākiretiniātaā takote merepani komiri nikikoātaā. ²⁴ Iuasaaki kona ninoa apokari Xesosi, imoianariakori apaka. Ininiā ninoa iereētaua kanaua āki. Iuaīkana ikanapiriāna. Ipoa ĩpiriātana Kapanaoō sitatxitimoni, Xesosi initinina ĩkapani.

Komiri Kākiti Auapininiika Inini Tĭkane

²⁵ Ninoa apokari Xesosi ipoa ipiniā. —Koerekareri, namonikitapa papoka uai? —itxarina.

²⁶ Ininiā Xesosi:

—Atāo nisāpiretai hĭte. Hĭte nikari komiri nisikakiti. Kamitopeka hĭtxa, ininiā nipokori ĩkapaninokara hinitanātano nota. Kona hāuikari Teoso posotiireē nikaminiri iua posotiiretxi.

²⁷ Xesosi pinitana:

—Nipokorinoka !hĭxinikape, kotxi nipokori okanani mauakati itxaua. Hĭxinikariko ātiāo nipokori, nota hĭtari iaxitikiri siākiti, kotxi nota sikari kākiti, kākiti auapininiika inini tĭkane. Teoso sikari ĩkinika iposotiire notamoni ninirekaākiti nikamini ĩkapani —Xesosi txana ninoa.

²⁸ —Kiātokopa atxtari Teoso nireēkiti akamini? —itxana ninoa.

²⁹ —Ianoka Teoso nirekari hĭkamini. Iua nirekari hāuikini iua iokanatakiti sākire —Xesosi txana ninoa.

³⁰ —Iuaīkana posotiiretxi apiari pikaminiā, ininiāra aāuikari Teoso iokanatakiti pininiāua. Kinakaripa

posotiiretxi pikamapanika?

³¹ Anirimaneni kitxakapirĭkarini āparaā makipakaniātaā auakasaakina, inikarina komiri iaxiti katxakakari. Teoso sākire iōkatsopatakori txari:

Isikari komiri Teoso tixinekiri ninoamoni,
—itxarina Xesosi.

³² Ininiā Xesosi:

—Atāo nisāpiretaiko hĭte. Kona Moisesini sikari komiri Teoso tixinekiri. Nirikara sikaātari atāo komiri iua tixinekiri kākitimoni. ³³ Teoso tixine ĩkari, iua ākiri, komiri atoko itxa, ĩkini itixiti auakani ĩkapani, kotxi iua sākire auīākani auapininiika Teosokata —itxana.

³⁴ —ĩkiniōtika pisikaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kākiti auini ĩkapani. Iua nisākire auīākari !inatxitaika. !posonataika.

³⁶ —Hĭte aōkitapekano nota, txamari kona hĭte aukapanikari nisākire. Ikara atoko nitxapekai hĭte. ³⁷ Imakinika kākiti notamoni Teoso siākini inapitĭkako notamoni. “Hĭsipeka,” kona nitxana notamoni apoākani. ³⁸ Nitakanapari Teoso tixine. ĩkorapokoriti napoka, nipaniātakiri nirekaākitinoka nikamini ĩkapani. Notaka nirekaākiti na nikama. ³⁹ Niri napaniātakiri !nirekari ātika kākiti notamoni isiākini ereēkokini. Itixi xipokini ōtisaaki, inirekari nota ōkitĭkinina ninoa auapininiika inini tĭkane. ⁴⁰ Iua napaniātakiri nirekari nota imarotakani, nisākire auīākani, auapininiika inini. Itixi xipokini ōtisaaki nōkitĭkana ninoa iuaīkana auāki inini —itxa Xesosi.

⁴¹ Ninoa Xoteoakori kona apokaerekatari Xesosi sākire, kotxi iua txari: “Nota iua komiri Teoso tixine ĩkari komiriti nitxaua,” ininiā ninoa tsoata. ⁴² Ininiā ninoa:

—Iua kiki Xesosi Xosee ākiri. Aaōk-itapekari iri, inoro pakini. Kinirepa “Teoso tixine ikarirano” itxape iua? — itxana, itsoatinina.

⁴³ Ininiā Xesosi txana:

—Kona himaxirauatape. Kona hitsoatape. ⁴⁴ Niri nipaniātakiri akiritakitinanira posotari inini notamoni. Niri makiritakinini kona posota inini notamoni. Itixi xipokini otisaaki nokitikana notamoni apoākani iuaikana auinina ikapani. ⁴⁵ Kitxakapirika Teoso sākire sāpiretakani iōkatsopataria ia Teoso sākire:

Teosorako oerekariko ikinipoko kākiti. Niri sākire kīpitakani, niri oereēkini, apoka notamoni. ⁴⁶ Kona aua kākiti niri atamatakari. Nota Teoso tixine ikari, notanokara atamatapekari niri.

⁴⁷ —Nota sākire auiaākari, iuara auapininiika Teosokata. Ia nisākire atāo. ⁴⁸ Nota iua komiri nitxaua kākiti auapininiika inīkitakakarino. ⁴⁹ Hinirimane kitxakapirīkarini nikari komiri iaxiti katxaākari āparaā makipakaniātaā. Iaxiti katxaākari inikanimana, txanima ipīpena. ⁵⁰ Kākiti nikiniāri atāo komiri Teoso tixine ikari kona ipina. ⁵¹ Iua komiri, Teoso tixine ikari nitxaua nota. Kākiti auapininiika inīkitakakarino nota. Ia komiri niākari auapininiika itxako. Ia komiri nisikakiti ia niitokara. Niito nisika kākiti ikini itixiti auakani auapininiika inini tīkane —itxa Xesosi.

⁵² Ikara atoko ininiā ninoa Xoteoakori taparakienatakakaua:

—Natokopa itxa ia kiki iito isikiniua ate, anikiniri ikapani? —itxana.

⁵³ Ininiā Xesosi:

—Atāoenepitikara ikara atoko nitxai hīte. Hītari iaxitikiri iito himanikakanisaaki, iarēka himiātakanisaaki, kona hīxinire auapani ātipirika. ⁵⁴ Iua niito niākari,

niarēka iātakari, auapikako Teosokata. Xipokatxi otisaaki nokitikariko iua iuaikana auini ikapani. ⁵⁵ Niito atāo komiri itxaua. Niarēka atāo iāriā itxaua. ⁵⁶ Niito niākari, niarēka iātakari, aua nākixinireē. Nota aua iua ākixinireē. ⁵⁷ Niri, ātipirika auapika inakari, iokanatano nota ikorapokoriti. Iuara sikano nota ātipirika nauini ikapani. Iua atokotxikana nota sikari nota niākari ātipirika auini ikapani. ⁵⁸ Nota iua komiri Teoso tixine ikari nitxaua. Komiri hīkiomaneakorini nikakiti ātiāo. Iua komiri nikakari ipīpe. Nota siākiti komiriti niākani, nisākire auiaākani auapininiika Teosokata itxanako.

⁵⁹ Ikara atoko itxa Xesosi sākire aiko āki Xoteo apotiitiniātaāua Kapanaoō sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isākire potxitakani, ikara isākire ikenakotakasaakina, ipimarauatakakana:

—Pamimari ikara isākire. Kipa imarotari ikara atoko inakari sākiretxiti? — itxana.

⁶¹ Masāpiretakotika Xesosi imarotari ikara atoko itsoatinina. Ininiā iua:

—Hinirekatari hitakanapinino nota ia nisākire xika? ⁶² Kiātokopa hīxinikakiti hitikiniāno nota hītari iaxitikirino kanīkini mitxi nauiniātaā? Atxiiti iusaaki hāuikatari nisākire?

⁶³ Iua Erekarī Matamatakotīnokara sikari kākiti auini tīkane. Kākiti iito tapara !uari. Ikara sākiretxi hītemoni nisāpiretakiti, iua Erekarī Matamatakoti sākiretxikana. Nisākire auikiko auākitakari kākiti, ātipirika Teosokata auini ikapani. ⁶⁴ Txamari auapitika hīte sauaki nisākire mauiaākani —itxa Xesosi.

Merepitipanika Xesosi imarotapekari iua sākire mauiaākani tīkane. Xesosi imarotari apaka imīkapiritakiri tīkane.

⁶⁵—Niri Teoso masikaposotiire-takiniti kona iposota apokini notamoni —itxa Xesosi.

⁶⁶Ikara isäkire xika itori Xesosikata sikani takanapari iua. Kona inirekaikarina iuakata isinina. ⁶⁷Ininiã Xesosi pimaãna imoianariakori tosi:

—Hítepekana, híte apaka nirekatari hitakanapinino? —itxa Xesosi.

⁶⁸Ininiã Simão Petro apakapapiretari: —Apiananiri, kironipapa asa atxiiti? Pitananira sãpiretari kãkiti auapininiika inini. ⁶⁹Ate imarotari Teoso merekiti pininiu. Teoso ãkiri, auapika inakari ãkiri pitxaua pite —Petro txari Xesosi.

⁷⁰Ininiã Xesosi:

—Nota merei híte tosi kikiakori. Txamari híte sauaki aua Satanasi nitiri —itxa Xesosi.

⁷¹Iuasaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imikapiritariko Xesosi.

Xesosi Itariakori Mauikakaniri Isäkire

7 Eereka Xesosi kaikotapanika Kariréia tōpa. Kona Xotéia tōpa !ikaikota iuasaaki, kotxi iuaã Xoteo auíteakori nirekari okiniri. ²Iuasaaki Xoteo kiinirite Papiri inakori kaiama atokopekari. ³Ininiã Xesosi itariakori misäkiretari iua:

—Posipika uai. Pisäkire auiãkanimoni Xotéia auakanimoni pisa. Ninoa apaka nirekari itikiniri pikamakiti. ⁴Kãkiti nirekiniãri iteene imarotaãka, !ikipatari ikamakiti. Pite kamanãtari posotiiretxi uai Kariréia tōpa. Pisa Xotéiamoni. Iuaã poerekari piposotiire ikinimane imarotiniã ikapani —itxana.

⁵Ikara atoko itxarina Xesosi, kotxi itariakori apaka iuasaaki kona auikapanikari isäkire.

⁶Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotéia tōpamoni híte sini, ⁷kotxi kãkiti !omanatai híte. Notananira omanataãka, kotxi nisãpiretari maerekati kãkiti kamakiti. ⁸Erekari híte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹Itariakorimoni ikara inaka atoko, ikaikotapanika Kariréia tōpa.

Xesosi Sari Papiri Kiiniritimoni

¹⁰Itariakori kiinirimoni ikiikapeka. Ninoa tikinimoni isa Xesosi. Iuasaaki !kasãpirenari kiinirimoni isini tãkane. Ininiã kãkiti mimarotakinittika isa.

¹¹Xoteo auíteakori nitapiimari Xesosi kiinirisaaki. Ipimaãri kãkiti:

—Itapari Xesosi?

¹²Kãkiti iuaã auakani sãkirauata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kãkiti —itxana.

¹³Kona kãkiti sãkirauata Xesosi uãka Xoteo auíteakori takote, kotxi ipikana.

¹⁴Mapaõtínoka kiiniri xipokini apisapanika, Xesosi sari Xotéia tōpamoni. Isari Teoso misäkiretiko aikotimoni. Iuaã oerekarauata.

¹⁵Xoteoakori tsorikaãnãta Xesosi sãkire ikenakotakasaakina:

—Kininiãpa ere kiki paimatireri. Kona apaiãõkarauata —itxanãtana.

¹⁶Ininiã Xesosi apakapapiretana:

—Na nota imaroreni noerekai híte. Iua niokanatakiri imarorera noerekai híte. ¹⁷Kãkiti Teoso nirekaãkiti nirekaãkani imarotari noerekiniri Teoso imarorenoka. Ninoa imarotari nimoerekakaniri notaka nimarore. ¹⁸Kãkiti iuaka isäkire sãpiretakari nirekari apanakini iuikiniri iua. Kãkiti Teoso sãkirenoka sãpiretakari nirekari iuikiniri Teoso ipaniãtakiri. Ikara

atoko inakari kākiti sākire atāonoka. !Ikamari maerekati. ¹⁹ Moisesini oerekai hīte Teoso sākire, ipaniātakiti iōkatsopatakori. Txamari kona hīte kamari Teoso paniātakiti. Kona ātika hīte kamari ipaniātakiti, kotxi hinirekari hōkinino nota —itxana ninoa.

²⁰ Ininiā ninoa apakapapiretari:

—Maerekati matamatakoti auāitotai pite. Kiripa kinirāo okaka txai pite? Iua maerekati matamatakoti xika ikara atoko pitxa pisākire —itxarina.

²¹ Ininiā Xesosi:

—Nota kamari posotiiretxi tomatikoōtxitisaaki, iua kiki matipokotakati nimakananitakasaaki, ininiākara hīte tsorikaāta. Hīuākatari nīparīkauatini. ²² Txamari hīte apaka parīkauata tomatiko ōtisaaki, kotxi hīkamari Teoso takaōtxikare hamarite ītoā tomatiko ōtisaaki. Moisesini paniātai Teoso takaōtxikare hīkamini hamarite ītoā oito ōti iua auakasaaki. Ari hinirimane kitxakapirīkarini, Moisesini apisapanika, oerekapekari ikara atoko inakari hīkamini. ²³ Ininiā hīte kamari Moisesi paniātakiti tomatikoōtxitisaaki. Ikara atoko ininiā, kinirepa hīte omanatano nota, iua kiki erekapeka nitxīkitakini xika tomatikoōtxitisaaki? ²⁴ Iteene pimimarotakanisaakiri āti kamakiti, kona pakiritapiri: “Iua kamari maerekati,” kona pitxape. !Papoītapiri āti. Atāo inakarīnoka pinita, atāo pimarotini ikapani —itxa Xesosi.

Xesosikani Teoso Mereēkiti Txataua?

²⁵ Apanakini kākiti Xerosareē auakani txanātari:

—Ere kikikani ninoa kinirāo okaenetakitikani? ²⁶ Hātamatarī. Iua sākirauanāta kākiti apisatoō. Kona kapīkareri iua. Auītetxiakori !kasākirena. Atauako aāuīteakori auikatari isākire atxiīti? Atxiīti

auikatarina Xesosi Teoso mereēkiti aiāpapanātakiti ininiāua? ²⁷ Atāo Teoso mereēkiti aiāpapanātakiti apokasaaki, kona kimarotikori iua ininimoni. Ate amakinika imarotapitīkari iua Xesosi ininimoni. Karirēiakiri iua, ininiā Xesosi Teoso mereēkiti aiātapakiti !itxaua —itxanātana.

²⁸ Teoso misākiretiko aikotiā Xesosi oerekarauanātakasaaki, itapasākireritika ipimaāna kākiti iuaā auakani:

—Atauako hīte imarotatano nota? Atauako himarotatari nota ininimoni? Kona notaka iokanataua kākitimoni. Niokanataāka. Nota paniātakari atāonoka isākire. Kona hīte imarotari iua. ²⁹ Nota imarotari iua, kotxi iua auiniātaākirīkarano nota. Iuara iokanatanano kākitimoni —itxa Xesosi.

³⁰ Iuasaaki auītetxiakori nirekamari imaīkinirina. Kona kamaīkikori, kotxi imaīkiko manapi kona apokapanika. ³¹ Ninoa auītetxiakori kona auikari Xesosi sākire, iuaritika itomaneri kākiti auikari Xesosi Teoso mereēkiti kākiti iātapakiti ininiua.

—Iua kiki inipitikara Teoso mereēkiti aiātapakiti itxaua, kotxi āti posotiiretxi apiari kamakari !auari —itxanātana.

Sotatoakori Iokanatiko Xesosimoni

³² Pariseoakori kenakotakasaakiri kākiti sākire ikara atoko inakari, ninoa, sasetotxi auīteakori pakini iokanatarī sotatoakori Xesosi imaīkinina ikapani.

³³ Sotatoakori apokasaaki iuamoni, Xesosi txari kākiti iuaātaā:

—Mapaōtinoka hītekata nauako. Eereka nisa nīpaniātakirimoni. ³⁴ Hīnitapiīkamano, !hāpokapanino. Nisinimoni kona hīte posotari hīsini —itxa Xesosi.

³⁵ Auītetxiakori ninoakakarika isākirauatana:

—Amonipa isa atxiīti, ate mapokakaniāri iua? Atauako ōtakoxiti

isatako Xoteoakori iarikakanimoni, āti uāka sauaki Xoteoakorimoni? Atauako oerekatari Xoteo minakaniua? ³⁶ Kotxi iua sākire: “Hinitanoko. !Hāpokano nota. Kona hīte posotari nota sinimoni hīsini,” itxa sākireta. Ate !imarotari isākire —itxanātakakana.

Āparaā Kākiti Auākitaākari

³⁷ Kiiniri mapotōkire ōti apiapox-okonita. Iua ōti Xesosi tima kākiti sauaki. Itapasākireritika isāpirenauata ikinimane kenakotiniri ikapani:

—Piposonatakasaaki, notamoni pinako piātini ikapani. ³⁸ Teoso sākire iōkatsopatakori txari:

Nota sākire auīākari ākixinireē aua amomo atoko inakari. Iua āparaā txīkitakari kākiti auāki inini. —itxa Xesosi.

³⁹ Iua Erekarī Matamatakoti amomo atoko itxa. Xesosi sākire auīākari apakapariko iua Erekarī Matamatakoti. Iuasaaki Xesosi sākirauatakasaaki, iua Erekarī Matamatakoti kona siākapanika kākitemoni, kotxi Xesosi kona kanapiriāpanika Teoso tixinemoni.

⁴⁰ Ikara Xesosi sākire ikenakotakasaaki itori kākiti txari:

—Atāopitikara ikira kiki Teoso sākire sāpiretakari aiātapakiti itxaua.

⁴¹ Apanakini txari:

—Iua Teoso mereēkiti aiātapakiti itxaua.

Apanakinipekana:

—Teoso mereēkiti aiātapakiti, Kariréiakiri !itxaua. ⁴² Teoso sākire iōkatsopatakori sāpiretari Teoso mereēkiti aiātapakiti, Taviini apika mekaniri itxaua. Iua iponaniāko Pereē sitatxiti Taviini auiniātaā —itxana.

Ikara atoko itxanātana, kotxi kona imarotarina Xesosi iponaniiniātaā Pereē sitatxiti.

⁴³ Iuasaaki apanakini auikari Xesosi sākire. Apanakinipekana !auikari

Xesosi sākire. ⁴⁴ Apanakini nirekamari imaikiniri Xesosi iuasaaki, iuaritika iua maīkakari !auari.

Sotatoakori Kanapiriā Xoteo Auīteakorimoni

⁴⁵ Ininiā sotatoakori kanapiriā sasetotxi auīteakorimoni, pariseoakori pakinimoni. Ininiā ipimaāna:

—Kinirepa kona himinari Xesosi uaimoni?

⁴⁶ —Apia imatiresākireta iua. !Auari kākiti iua atoko ina sākiretakari, ininiākara !apakata amaikiniri iua —itxana sotatoakori.

⁴⁷ Ininiā pariseoakori omanākarauata.

—Atauako iua misirienetai hīte apaka? Iua txīkitakai hīte isākire hāuikini. ⁴⁸ !Auari auītetxi iua sākire auīākari. !Auari pariseo iua sākire auīākari. ⁴⁹ Kākiti miīkitetinanira auikari Xesosi sākire. Xesosi sākire auīākari kona imarotari Moisesini paniātakiti. Ininiākara Teoso misiritanako ninoa —itxa pariseoakori sākire.

⁵⁰ Iuasaaki Nikotemo inakori iuaātaā aua. Pariseo itxaua. Iua ōti apisapanika iuara sari Xesosimoni ikanōka imisākiretiniri ikapani. Ninoa ikara atoko isākirauatakasaaki, Nikotemo misākiretana ninoa:

⁵¹ —Kākiti kamakiti isāpiretini apisapanika, “maerekati ikamakiti,” kona hītxape. Ikara atoko itxa Moisesini oerekasaakiua ate —itxana.

⁵² Ininiā ninoa pariseoakori:

—Atxiiti pite Kariréiakirikai apaka, Xesosi atoko? Iteene patatsopatariko Teoso sākire iōkatsopatakori. Iua iteene patatsopatakasaaki, iuasaakiikarako pimarotariko !auari Teoso sākire sāpiretakari, Kariréia tōpakiri —itxarina iua.

⁵³ Eereka ikinimane sari aapokomonina.

Sito Õtaniri Minakotikatika Sirĩkakaro

8 Iuasaaki Xesosi sari Orivanape Xiratamoni. Oriva txipokori. ²Katimatinĩkata ikanapiriã Teoso misãkiretiko aikotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini ikapani. ³Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakarona oa ikinimane apisatoõ.

⁴—Koerekareri, aãpokaro oia sito õtaniri minakotikatika osirĩkini. ⁵Moi-sesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

⁶Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. ⁷Ipimarauatapanikana, ininiã Xesosi õkaõkitaua.

—Maerekati makamakaturako iikiika kiporonakiniro aroa kai soroã —itxa Xesosi.

⁸Eereka Xesosi iuaĩkana iokirita, iõkata itxari kipatxi. ⁹Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰Xesosi õkaõkitaua, atamata itxaro oa sito. Oanoka kaikota iuaã.

—Itapari pimaerekani sãpiretakani? —itxaro.

¹¹—Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹²Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana !itipokota ipiaã. Nota sikana ninoa ätipirika auinina ikapani —itxa Xesosi.

¹³Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Äti sãpiretiniãri pite sãkire iaõka, aãuikari atxiiti —itxarina Xesosi.

¹⁴Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. ¹⁵Kãkiti hĩtxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. ¹⁶Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakititxikana nisãpireta. ¹⁷Kĩtxakapiriãka hĩteka kiomaneakorini sãkire iõkatsopatakori txari:

Kãkiti itikakititxikana äti itikakiti. Ninoa ipi sãkire ätinoka auiniã, ininiã ninoã sãkire atãonoka itxa, itxa hĩkiomane sãkire. ¹⁸Nota sãpiretari nota pirena. Niri niokanatakiri apaka

sãpiretari nota pirena nisãkiretxikana, ininiã ipi auape —itxa.

¹⁹—Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰Ikara atoko Xesosi sãkirauata. Txineiro Teoso ikapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaïkikori, kotxi imaïkiko manapi kona apokapanika.

Xesosi Sinimoni Kãkiti Masikani

²¹Iuaïkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hïsinì. Hïpinakasaaki, himaerekanikatika hïpinako —itxa Xesosi.

²²Xoteo auïteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka hïsinì” —itxana ninoa.

²³Iuaïkana Xesosi sãkirauata ninoamoni:

—Ìkoraxitikinirai hïte. Nota itanokiri. Hïte ìkora itixikinirai hïte. !Ìkoraxitikirino nota. ²⁴Ikara atoko ininiãkara, nota txai hïte: “Hïpinakasaaki himaerekanikatika hïpinako,” nitxai. Himauikakanisaakiri nisãkire nota pirena, hïpinakasaaki himaerekanikatika hïpinako. Kona Teoso makatxakinii himaerekani —Xesosi txana ninoa.

²⁵—Kiriparai pite? —itxarina Xesosi.

—Merepitipanika nisãpiretakitikara iuakarano nota. ²⁶Nisãpiretakiti tïkane hïte maerekani nisãpiretini tïkane kaiãopokori. Nota iokanatakari atãoenokara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷Ninoa !imarotari Xesosi iokanatakari aïri Teoso. ²⁸Ininiã Xesosi txana:

—Nota hïtari iaxitikiri hõkasaaki, niïto itano hõkitikasaaki, iuasaaki-ikarako himarotano kinakaripa nota. Iuasaaki himarotariko notaka sãkire !nisãpireta. Niri oereëkitinokara nisãpireta. ²⁹Iua niokanatakiri notakata aua. Niri !itakanapano nota, kotxi inireëkitinoka nikama —itxa Xesosi sãkire.

³⁰Xesosi ikara atoko ina sãkire-takasaaki, itomaneri kãkiti auikari isãkire.

Õpoïkakoni Pirena

³¹Ininiã Xesosi sãkirauata Xoteoakorimoni iua sãkire auïãkanimoni.

—Nisãkire iaõka hïkamakasaaki, atão nimoianariakori hïtxauako. ³²Atão nimoianariakori hinakasaakiaua, himarotari atãonoka inakari. Atãonoka inakari himarotakasaaki, õpoïkakoni atoko hïtxaua.

³³Ninoa apakapapireta:

—Apraõni apika mekanirireua ate, ininiã anirekinimoni asa. Nitiritxi iamotakoni !atxaua. Kinirepa õpoïkakoni atoko pitxïkitakaua? —itxana.

³⁴Ininiã Xesosi:

—Atãonoka nitxai hïte. Maerekanitxi nitiri atoko itxa kãkiti maerekati kamakari. ³⁵Nitiritxi iamotakori ãtipirika !auari ipatrãote aapoko. Patrão ãkiri auapika ãtipirika iri aapoko. ³⁶Nota Teoso ãkiri txïkitakasaakiri kãkiti õpoïkakori atoko ininiua, maerekanitxi nitiri !itxaïkauako. Iuasaaki iposotari erekari ikamini.

Apraõni Apika Mekaniriakori

³⁷—Nimarotari Apraõni apika mekaniriakori hininiua, txamari hinirekari hõkinino. Nisãkire himauïãkani xika hinirekari hõkinino. ³⁸Nota sãpiretai hïte nota iri oerekakiti. Hïte kamari hïte iri paniãtakiti —itxa Xesosi.

³⁹—Apraõoni ate iri —itxana ninoa.

Ininiã Xesosi:

—Apraõoni apika mekaniriakori hininiãua, Apraõoni kamakiti atoko hīkamamako. ⁴⁰Atāonoka nisāpiretai hīte. Teoso sāpiretakitinokara nisāpiretai, iuaritika hinirekari hōkinino. Apraõoni !ikamari ikara atoko inakari. ⁴¹Hīte kamari hīte iri kamakiti atoko inakari —itxa Xesosi.

—Teosonanira ate iri. Ate atāopitika iua anaakori atxaua —itxana.

⁴²—Teoso atāo hīri ininiãua, nota hītiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni. ⁴³Kininiãpa !hīkitetatarī ikara atoko nininii? !Himarotari nisākire, kotxi kona xatiki hinirekari nisākire iaōka hīkamini. ⁴⁴Satanasira hīri. Hīte nirekari maerekati, Satanasī nireēkiti iaōka hīkamini. Kitxakapirīka itixi kamiko atokopanika kokaniri itxaua Satanasī. Iua !nirekari atāoene isāpiretini. !Iposotari atāoene isāpiretini. Aāpirenanokara iua imarota, kotxi aāpirenaāri itxaua iua. Aāpirenaāri iri itxaua iua Satanasī. ⁴⁵Nisākire atāo, ininiākara hīte !auikari nisākire. ⁴⁶Hīte ātika itikatari maerekati nikamini? Ātika !itikari maerekati nikamini, kotxi kona maerekati kona nikama. Ininiã kinirepa kona hīte auikari nisākire? ⁴⁷Teoso anaakori kīpitari iua sākire. Hīte kona kīpitari iua sākire, kotxi iua anaakori !hīttxaua hīte —Xesosi txana ninoa.

Xesosi Apraõo Apisapanika Auini

⁴⁸Ininiã Xoteoakori txari Xesosi:

—Ate sākire atāo. Samariakiri pitxaua pite. Maerekati Matamatakoti auaiãtotai pite —itxana.

Ninoa akiriuākatari Xesosi “Samariakiri,” kotxi Xoteoakori

omanatana Samariakini. ⁴⁹Ininiã Xesosi:

—Maerekati Matamatakoti kona auaiãtotano nota. Nota paxitari niri, txamari hīte kona paxitano nota. ⁵⁰Kona notani nitari kākiti nota iuikakani tīkane. Nirira nirekari kākiti iuikinino nota. Nirira imarotari nisākire atāonoka inini. ⁵¹Nota sākire iaōka kamakari !ipina. Ikara atāoene.

⁵²Xoteoakori apakapiretari:

—Uatxa aimarotari maerekati matamatakoti auaiãtotai pite, kotxi Apraõoni ipīpe. Teoso sākire sāpiretakanini apaka ipīpe. Kinirepa pite sākire: “Nota sākire iaōka kamakari !ipina,” pitxa? ⁵³Aīrini Apraõoni ipīpe. Pite apiata atxiiti? Teoso sākire sāpiretakanini apaka ipīpe. Kiri-parai pite? —itxarina Xesosi.

⁵⁴Ininiã Xesosi:

—Notaka niuikiniua !apakata. Nirira iuikano nota. Hīte sākire: “Ateosone iua,” txamari nota irira iua. ⁵⁵Kona himarotari Teoso. Notananira imarotari Teoso. Nota “kona Teoso nimarota,” nininiã, hīte atokokamarako nitxamako. Aāpirenaāri nitxamauako. Nota imarotapitikari iua. Nota kīpitari isākire. ⁵⁶Hīri Apraõo poxokoniua, nota uai apokini ikenakoenetakasaaki. Iua itikari nota uai apokini, ininiã iua poxokoniua.

⁵⁷Ininiã ninoa Xoteoakori: —Pite sīkoēta anokanani !apokapanika, iuaritika paōkitatarī Apraõo? Paxirari pisākire —itxarina.

⁵⁸—Apraõo apisapanikara nota aua. Ikara atāoene nitxai hīte —itxa Xesosi.

⁵⁹Ikara isākire ikenakotakasaakina, ikosekarina kai soro Xesosi ikiporonakinina ikapani, okinina ikapani. Xesosi kipataua. Osipikari Teoso misākiretiko aikoti. Inapaāpota ninoa sauaki.

Mōsiāreti Xesosi Erekapeka Inīkitakini

9 Xesosi tīpokotakasaaki, itikari mōsiāreti. Iua ponaniākasaaki, mōsiāreti itxapekaua. ²Xesosi moianariakori pimaāri iua:

—Koerekareri, kiripa kamari maerekati iua mōsiāreti inini? Iuakani? Irikani? Inorokani?

³Ininiā Xesosi:

—Kona iua maerekani xikani mōsiāreti itxaua. Kona iri maerekani xikani, kona inoro maerekani xikani mōsiāreti itxaua. Kona maerekanitxi xikani mōsiāreti itxaua. Iua mōsiāreti Teoso posotiire kākiti imarotini ikapanira. ⁴Kākiti parīkauata pokamara. Mapiāpeka inakasaaki, kona kākiti posotaikari iparīkauatini. Iua atokokana akamariko niokanatakiri paniātakiti aūapanika anakasaaki. Apinaka atoko kona akamaikari Teoso paniātakiti ikorapokoriti. ⁵Ikorapokoriti nauakasaaki, niopinikana ikinimane ākixinire Teoso imarotinina ikapani —itxa Xesosi.

⁶Ikara inaāka atoko ienemaā ixiti oakaka Xesosi. Ikamari ākape, minapa itxari mōsiāreti oki nopini. ⁷Iokanatarī:

—Parokari poki Siroee poamoni — itxari mōsiāreti.

Iuaā auari ipoa xapitikiri kākiti kamakiti. Iua ipoa uāka “Siroee.” Iua uākatxikana “Iokanatakori” itxaua. Iua sari Siroeemoni. Arokatoōtaua. Iuasaakipeka kōsiārepeka itxa.

⁸Aapoko takote auakani, kākiti mitxi mōsiāreti itikakani pakini, ninoa misākiretakakaua:

—Ikira kiki mitxi iitopākanātapika inakarikani, kākiti txineirote amanaānātapika inakarikani, ikira kiki? —itxana.

⁹Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. Āti kiki iua mōsiāreti atoko inakarira.

Iua mitxi mōsiāreti apakapapiretari:

—Ari, iuapitikarano nota —itxa.

¹⁰Ininiā ninoa:

—Kiātokopa pitxa uatxa kōsiārepeka pitxapeka? —itxarina.

¹¹—Iua Xesosi inakori kamari ākape, nokiā minapa itxari. Ipaniātano: “Āparaā Siroee inakorimoni pisa. Iuaā parokatoōtaua,” itxano nota. Ininiā nisa. Narokatoōtaua. Iuasaakipeka nota kōsiārepekanō —itxa.

¹²—Namoniparari iua? —itxarina.

—A, meta —itxa iua mitxi mōsiāreti.

Pariseoakori Mitxi Mōsiāreti Inakarikata

¹³Ninoa anikari iua mitxi mōsiāreti pariseoakorimoni. ¹⁴Iua ōti Xesosi kamakasaakiri ākape mōsiāreti kōsiārepeka inīkitakini ikapani tomatiko ōtisaaki iuasaaki. ¹⁵Ninoa anikasaakiri iua mitxi mōsiāreti inakari pariseoakorimoni, pariseoakori apaka pimaāri iua:

—Kininiāpa uatxa kōsiārepeka pitxa? —itxana.

—Ākapeēra noki nopini iminapa. Eereka narokatoōtaua. Uatxa kōsiārepeka nitxa —itxa.

¹⁶Pariseoakori ātikaka txari:

—Iua kiki, ākape mōsiāreti oki nopini minapakari, kona iua kamari Teoso paniātakiti, kotxi iparīkauata tomatiko ōtisaaki. !Apakata ikamakiti.

Pariseoakori ātikakapekana sākirauata:

—Maerekati kamakari kona kamari ikara atoko inakari posotiiretxi, mōsiāreti kōsiārepeka inīkitakini.

Ininiā pariseoakori taparakien-atakakaua ikara xika. ¹⁷Iuaīkana pariseoakori misākiretari iua kiki:

—Kiātokopa inakaripa iua kiki pite makananitakari? —itxarina iua.

—Teoso sākire sāpiretakari itxaua iua.

¹⁸Xoteo auñteakori kona aukari isākire, mitxi mōsiāreti eereka kōsiārepeka inakari sākire. Ininiā ninoa akiritari iri, inoro pakini.

¹⁹—Hite sākire hamarite auakasaaki mōsiāreti itxapekaua. Hamaritekani ere? Kiātokopa uatxa kōsiārepeka itxa? —itxana.

²⁰—Ari, ate ākiripitikara. Iponaniākasaaki, mōsiāretepeka itxaua.

²¹Kona ate imarotari kiriāpareuako uatxa kōsiārepeka itxa. Kona ate imarotari kiriuako kamari kōsiārepeka inini. Hīpimaāri iua, kotxi mitapekari iua. Iuaka apakapapiretai hīte —iri, inoro pakini txana ninoa.

²²Iri, inoro pakini ikara atoko itxana Xoteo auñteakori ipīkinina xika. Xoteo auñteakori sāpiretakekari kākiti: “Kākiti Xesosi sākire auiākani, Teoso mereēk-iti ininiua auiākani, kākiti iātapakiti ininiua auiākani, kona auiritaākaikana iroinina aiko Xoteo apotiitiniātaāua.”

²³Ininiā pīkaretxi xika iri, inoro pakini txari: “Hīpimaāri iua. Mitapekari iua,” itxana ninoa.

²⁴Ininiā iuaikana pariseoakori akiritari iua kiki mitxi mōsiāreti inakari.

—Atāonanira pisāpiretako Teoso apisatoō. Ate imarotari maerekatinoka ikamini Xesosi, kotxi imakananirauata tomatiko ōtisaaki —itxarina.

²⁵Ininiā iua:

—Kona nimarotari maerekati ikamini. Kona nimarotari erekari ikamini. Mitxipeka mōsiāreti nitxaua. Uatxa kōsiārepeka nitxaua. Ikaranoka nimarota —itxana ninoa.

²⁶—Kiātokopa itxai kōsiārepeka inīkitakiniāi?

²⁷Iua mitxi mōsiāreti inakari apakapapiretari:

—Nisāpiretakekai hīte mixikanani, txamari !hāuikari nisākire. Kinirepa

hinirekatari iuaikana nisāpiretinii? Atauako hīte apaka nirekari iua sākire hāuikini? —itxana.

²⁸Ininiā itxitarina:

—Pitera aukari iua sākire. Ate aukari Moisesini sākire. ²⁹Aimarotari Teoso misākiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰Iua kiki apakapapiretari:

—Anekani. Kona hīte imarotari amonikiriuako iua ina. Iuara kamaōsiāretano nota. ³¹Teoso kona maākatari maerekati kamakari amanaākiti. Teoso teosonetakani amanaākiti imaākatapitika. Iua nirekaākiti kamakari amanaākiti imaākatapitika. ³²Mitxipeka mōsiāreti kōsiārepeka inīkitaākari kona auari. Itixi kamikosaakipanika !auari kōsiārepeka inīkitaākari. Uatxaikara auape. ³³Xesosi Teoso iokanatakiti iminakanimauako, !ikamamariko posotiiiretxi —itxa iua.

³⁴Ininiā pariseoakori:

—Pite maerekatipeka auakarikai. Ātipirika pite kamari maerekati. Maerekatinoka pīikiteta. Iuaritika pinirekatari ate poerekini? Konapitini. Kona ate nirekari ikara pisākire. Pispipiniikaua. Kona uai pikanapiripinika. Ate kona nirekari pite uai kākiti apotiitiniātaāua aikoti pinini —ninoa txari iua.

Ininiā aiko porikiti iokanatarina.

Mitxi Mōsiāreti Inakari Aukiniri Xesosi Sākire

³⁵Xesosi kenakopiretari iporikiti iokanatikoko mitxi mōsiāreti inakari, ininiā Xesosi nitari iua. Apokasaakiri, itxari:

—Atauako pauikatari Teoso ākiri sākire? —itxari.

³⁶—Kīpa iua? Nimarotiniāri, nauikapitkariko —itxa.

³⁷—Pite aõkitapekari Teoso ãkiri. Iuapitikara misãkirenãtai pite uatxa — itxa.

³⁸—Aþiananiri, nota auikari pite Teoso ãkiri pininiua.

Ininiã iua kapotoreëkaua Xesosi apisatoõ.

³⁹—Ïkorapokoriti napoka Teoso sãkire auiaãkani ipinimoni nitakinina ïkapani. Isãkire mauiaãkani ipinimoni nitakinina ïkapani napoka ïkorapokoriti. Apanakini nisikaposotiiireta, Teoso sãkire auikinina ïkapani. Mitxi ninoa mõiãreti atoko itxauana, kotxi mitxi !imarotarina Teoso. Ninoa auikapiretakasaakiri Teoso sãkire, kõiãreri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõiãreri atoko ininiuana. Txamari kona atão ninoa nirekari imarotiniri Teoso. !Nisikari posotiiiretxi ninoamoni, Teoso sãkire auikinina ïkapani. Kãkiti iua atoko inakari mõiãreti atoko itxaua —itxa Xesosi.

⁴⁰ Ætikaka pariseoakori Xesosi takote auakani kenakotari.

—Atauako atekani apaka mõiãreti atoko atxaua? —itxana.

⁴¹—“Mõiãreni atoko atxaua,” hininiã hisãkire, ininiã atão hisãkire. Txamari hite txari: “Kõiãreua ate,” hitxama. Iua atoko hininiã hikamapitikari maerekati, kotxi kona hãuikari Teoso sãkire — Xesosi txana ninoa.

Soti Auite Pitikiri

10 Xesosi sãkirauatakasaaki, ia atoko itxa isãpirena:

—Atãopitikara ia atoko nitxapaniiko hite. Soti auite ïroã pirikeri itoremoni. Itoremoni miïroãkani kiitiriri itxauana, kotxi ãtiãtaã ikanika ïroini ïkapani. ²Pirikeri toremoni ïroãkari soti auite pitikiri. ³Initiri osereeri pirikeri tore iua

ïkapani. Soti auite kenakotari ipitikiri sãkire. Ipitikiri imarotari ikinipoko ipiraakori uãka akiritinina ïkapani. Iuara anikana inipokotinina ïkapani. ⁴Porikiti auakasaakina, iua saãpota ninoa apisa. Iua tikini isana ninoa. Ninoa imarotari iua sãkire ene. ⁵Ninoa kona sari kãkiti imimarotakininitina tikini. Ipitikiri minakotika akiritakasaakina, imitekana. Kona imarotarina imapitikiritakininitina sãkire.

⁶Ikara sãpirenatxi atão inakari oerekiko Xesosi sãpiretari pariseoakori. Txamari ninoa kona imarotari Xesosi ikara atoko inakari isãpirena.

Xesosi Soti Auite Pitikiri Erekaritxaua

⁷Xesosi iuaikana sãkirauata.

—Inipitikara nota pirikeri tore nitxaua, soti auite ïroini ïkapani. ⁸Nota apisa apoãkani, atão minasãkiretakani kiitiririni itxauana. Soti auite kona maãkatari ninoa sãkire. ⁹Nota itore nitxaua. Kãkiti ïroiniãtaã tore nitxaua. Nota makatxakari uai ïroãkari maerekani, auapininiika inini ïkapani. ïroã, ipokika itxapika. Kona kapikareri. Natxi !auari. ¹⁰Kiitiriri apoka iitiriuatini ïkapani, okaniuatini ïkapani, imisirikarautatini ïkapani. Notapekana apoka kãkiti auapininiika inini ïkapani, kãkiti auini ereka inini ïkapani.

¹¹Pitikiritxi erekari nitxaua nota. Pitikiritxi erekari ipina ipiraakori mapinakani ïkapani. ¹²Nitiritxi soti auiteakori pitikiri !itxaua. Anãpa auite kaneenamari apokasaaki, iua miteka. Itakanapanako soti auiteakori. Ininiã anãpa maikari soti auite, oxikepoata itxana. ¹³Iua nitiritxi mitekako, kotxi txineiro ïkapaninokara iparïkauata. Kona atão itiretari soti auite.

¹⁴—Soti auite pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵Iua

atokokana niri imarotano nota. Nota apaka imarotari niri. Nota ipinako soti auíteakori nota nakiti mapinakani ikapani. ¹⁶Nota aua apanakini soti auíteakori apaka. Uatxa ia pirikeri āki !auapanikana. Niminanako ninoa apaka ia pirikeri āki auinina ikapani. Ninoa auikariko nisākire. Ininiā ninoa imakinika aua ātika pirikeri āki. Ātikarako ninoa pitikiri.

¹⁷—Niri turetano, kotxi nauiritari nipinini, iuaikana nōkitikiniua ikapani. ¹⁸Kākiti !liposotari okinino nota nimanirekasaakiri nokiko. Nota sikariko niito nokiko ikapani. Ninirekasaaki manapi nipina. Ninirekasaaki manapi nōkitikaua. Ikara atoko niri paniātano nota —itxa Xesosi.

¹⁹Ikara Xesosi sākire Xoteoakori kenakotakasaaki, itaparakienatakakauana. Apanakini potxitari Xesosi sākire. Apanakini kona potxitari.

²⁰Apanakini txari:

—Satanasi nitiri auāitotari iua.

Ātipekana txari:

—Imapitxirita. Kinirepa hīkenakotatari mapitxiritakari sākire? —itxana ninoa.

²¹Apanakini txari:

—Satanasi nitiri auāitotakiti !ikara atoko itxa sākireta. Satanasi nitiri kona kōsiārepeka txikitakari mōsiāreti — itxana.

Xoteoakori !Auikari Xesosi Sākire

²²Mitaāsaaki Xoteoakori kamari kiniri Xerosareē. Iuasaaki ixinikarina Teoso misākiretiko aikoti merepaniko kamiko. ²³Iuasaaki Xesosi tīpokota aiko Teoso misākiretikoātaā, Saromāoni inakoriātaā. ²⁴Iuaā Xoteoakori apotiitaua iuamoni. Iuasaaki ninoa txari iua:

—Pite Teoso mereēkiti pininiāua, pisāpiretaua. Akokaxiti anirekari aimarotiniri ikara —itxarina.

²⁵Xesosi apakapapiretana:

—Nisāpiretapekai hīte. Kona hāuikari nota sākire. Niposotiire nikamakiti niri uākaā oerekepekai hīte. ²⁶Nisāpiretapekai hīte, txamari kona hāuikari nota sākire, kotxi nisoti auītene kona hīttxaua. ²⁷Nisoti auītene imarotari nisākire. Nota imarotana ninoa. Ninoa kapokitano nota. ²⁸Nitxikitakana ninoa ātipirika auinina. Nota kamari ninoa imipikanina tīkane. Kona kamaktxakikona nota nīkatakini. ²⁹Niri sikana ninoa notamoni. Apiatakari itxaua iua. Ininiā āti kona posotari imaktxakinina niri nīkatakini. ³⁰Niri, nota pakini ātika atxaua.

³¹Ikara atoko Xesosi inakasaaki, Xoteoakori morōkari kai soro ikiporonakinirina ikapani. ³²Xesosi sākirauata ninoamoni:

—Kaiāopokori erekari niri nakiti noerekepekai hīte. Kinakarixikapa hinireka hīkiporonakinino nota? —itxa Xesosi.

³³Xoteoakori apakapapireta:

—Kona akiporonakai erekari pikaminiā. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiā maerekati pikamapeka Teosomonikari.

³⁴Xesosi apakapapiretana:

—Kitxakapirīka Teoso sākire iōkat-sopatakori txari:

Nitxai: “Teosoakori hīttxaua hīte.”

³⁵Aimarotari Teoso sākire iōkat-sopatakori ātipirika atāo inini. Teoso akiriuaakatana ninoa isākire apakapakani “teosoakori.” ³⁶Ininiā kinirepa hīte kamaākaretxitano. Niri mereēno nota inireēkiti nikamini ikapani. Iokanatanano ikorapokoritimoni. Ininiā kinirepa hāpoītano Teoso nimisākirepiretini, “Teoso ākirirano” ninakasaaki? ³⁷Nimakamaniāri niri nirekaākiti, iuasaaki kona hāuikari nota sākire. ³⁸Nikaminiāri inirekaākiti, iuaritika himaukakaniāri nisākire,

hãuikariko nivosotiire. Hítikakiti hãuika. Ininiã himarotariko, hãuikariko, niri, nota pakini átika aniniua —itxa Xesosi.

³⁹Iuasaakipeka pariseoakori omanãkaruata. Iuaĩkana inirekarina imaĩkinirina Xesosi. Txamari iuasaakipe isipe.

⁴⁰Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarinerini patxisarauatiniãtaã. ⁴¹Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirenataã inakarinoka isãpireta.

⁴²Ininiã itori kãkiti iuaãtaã auikari Xesosi sãkire.

Arásaro Ipinini

11 Kiki Arásaro inakori aua ipi itaro, Maria, Mata pakini. Ninoa aua Petánia aapokotxiti. Iuasaaki Arásaro amianata. ²Xesosi ipinini apisa, oa María arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³Iua amianatakasaaki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴Ninoa iokanapirena ikenakotakasaaki, iua txa:

—Amianari inokari Arásaro kona ipinini ikapanini. Teoso posotiire oerekini ikapanira iua amianari inokari iua. Kãkiti: “Teoso ãkiri peerekari” iniko ikapanira iua amianata.

⁵Xesosi tiretari Mata, oĩtaro Maria, Arásaro pakini. ⁶Ikenakotakasaakiri Arásaro amianatini, iua napapanikari ipi õti iuaxiti. ⁷Eereka itxana imoianariakori:

—Iuaĩkana Xotéia tõpa masa.

⁸Ininiã imoianariakori:

—Koerekareri, kitapani iuaã Xoteoakori nirekari kai soroã

ikiporonakinii pite. Iuaritika pisatapanikako iuaãtaã? —itxarina.

⁹Ininiã Xesosi:

—Pokamara tosi oara aua kãkiti parĩkauatini ikapani. Pokamara tipokotakari kona mãkitita, kotxi atokatxi iopinikari ikinipoko. ¹⁰Txamari ikanõka tipokotakari mãkitita, kotxi atokatxi kamara !auari.

¹¹Ininiã Xesosi:

—Amoianari Arásaro imakanãta. Nota õpirĩkariko iua —itxa Xesosi.

¹²Ininiã Xesosi moianariakori txa:

—Imakanãtiniã, erekaãpopekari uatxa —itxana.

¹³Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴Ininiã Xesosi txana ninoa atão imarotininia ikapani:

—Arásaro ipĩpe. ¹⁵Erekapitikari iuaã nimaauakani, kotxi eereka hĩte auikariko nota sãkire. Masa iuaxiti. Maõkitari iua —itxa Xesosi.

¹⁶Tomee Txítximo inakori misãkiretana apanakini Xesosi moianariakori:

—Masa iuakata apinini tĩkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inĩkitaãkari

¹⁷Xesosi apokasaaki iuaxiti ipi ipi pakini õti napapeka. Ininiã iuasaaki Arásaroni katapeẽkaika. ¹⁸Petánia Xerosareẽ takote. ¹⁹Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰Mata kenakopiretari Xesosi apokaãpotini. Ininiã oa sari oaõkitiniri ikapani. Maria kaikota oaãpoko ãki.

²¹Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako. ²²Iuaritika nimarotapitikari, pamanaãkiti Teoso sikapitikai —otxa.

²³ Ininiã Xesosi txaro:

—Pitari iuaĩkana auapanikako.

²⁴ Ininiã Mata:

—Nimarotari itixi xipokini õti nitari iuaĩkana auapanikako. Ipĩkani õkitikiniua õti, iua õkitikaua —otxa Mata.

²⁵ Ininiã Xesosi sãkirauata:

—Nota ipĩkari õkitikakarirano nota. Kãkiti auãki inikitaãkarirano nota. Nota sãkire auiaĩkari ipininiã, iuaritika iuaĩkana auapanikako. Kona ipinaika. ²⁶ Nota sãkire auiaĩkari auapanikako iuaĩkana. !Pinaikako. Pauikatari ikara atoko ninini? —itxa Xesosi.

²⁷ Ininiã Mata:

—Apiananiri, nauikapitikari. Teoso mereẽkiti pitxaua. Teoso ãkiri pitxaua. Teoso iokanatakiti itiximoni ikari pitxaua. Ikara nauikapitika —oa txari iua.

Xesosi Txiapatini

²⁸ Eereka Mata sari õitaromoni. Oãkiritaro oa, mapara omisãkiretini ikapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã õkitikaua, iuamoni sa otxa oa. ³⁰ Iuasaaki Xesosi !apokapanika aapokotxiãtaã. Ikaikotapanika mitxi Mata apokiniãtaã. ³¹ Maria katimaritika õkitikasaakiua, Xesosimoni osini ikapani, Xoteoakori, oaãpoko ãki auakani, oa mĩkapiritakani, sari oa tikini. Ninoa uãkatari akauarimoni osini otxiapatini ikapani.

³² Maria apoka Xesosimoni. Oãtamatakasaakiri iua, iua apisatoõ okapotoreẽkaua. Otxari:

—Uai pauaãkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matiniuaata ãkixinireẽ. ³⁴ Iua pimaãna:

—Nanipa hĩkatatari? —itxa.

Ininiã ninoa:

—Apiananiri, masa. Patariko iuaã —itxana.

³⁵ Iuasaaki Xesosi txiapata.

³⁶ —Hãtamataro Xesosi. Iua tirtapitikari Arásaroni —itxa Xoteoakori.

³⁷ Átikaka Xoteoakori txa:

—Mõsiãreti kõsiãrepeka itxĩkitakepeka. Atxiĩti iua uai apokaãkamako, kona Arásaro ipinamako —itxana.

Xesosi Õkitikiniri Arásaroni

³⁸ Ininiã Xesosi iteene matiniuaata ãkixinireẽ. Iuasaaki isa akauarimoni. Ninoa takari ipĩkari kai auĩte ãki. Kai auĩte itotaãka.

³⁹ Ininiã Xesosi txari:

—Himakatxakari akauari tore —itxa.

Mata, Arásaroni itaro txari Xesosi:

—Apiananiri, ipaiakepeka. Ipi ipi õti pakinipeka ikatiko, ininiã pataparasakari —otxari Xesosi.

⁴⁰ Ininiã Xesosi:

—Nota sãpiretapekai: “Nota sãkire pauikiniã, pitikariko Teoso posotiire” —itxaro.

⁴¹ Ininiã imakatzakarina kai. Iuasaakipeka Xesosi ionakaãta iaxiti.

—Niri. Erekai, kotxi pikenakotari nisãkire. ⁴² Nimarotari ãtipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ikapani, kotxi ninirekari ninoa auikiniri pite iokanatinino nota uaimoni —itxa.

⁴³ Ikara atoko inaãka atoko akirikatari:

—Arásaro, põkitikaua. Pipokĩka.

⁴⁴ Ininiã iuasaakipeka Arásaro pokĩka. Imakinika iĩto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

—Himakatxakari iapirikiko.

Xesosi Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni ikani itikari ikara atoko inakari, ininiã auikarina Xesosi Teoso akiri ininiua.

⁴⁶ Atikaka Xesosi kamakiti itikakani kanapiriã pariseoakorimoni. Isãpiretana Xesosi okitikiniri Arásaro. ⁴⁷ Ininiã pariseoakori, sasetotxi auiteakori pakini apotiitaua. Imisãkiretakakana:

—Kiripa ate kama? Ia kiki kamari itori posotiiiretxi. ⁴⁸ Aãuiritiniãri iua ikara atoko ikamini, ikinipoko kãkiti auikari iua sãkire. Ininiã iua tikini isana. Ikara atoko ininiã, Homanoakori xipokari Teoso misãkiretiko aikoti ate nakiti, ate tixine apaka —itxana.

⁴⁹ Iuasaaki Kaipasi inakori sasetotxi-iakori auite apiatakari inakari iua. Itxana:

—Hite kona kimarorepanikai. ⁵⁰ Erekari ati kiki ipinini ikinimane mapinakani ikapani. Ikara atoko ininiã, kona ikinipoko anirimane ipinako —itxa Kaipasi.

⁵¹ Ikorakanani sasetotxi auite apiatakari itxaua Kaipasi. Ia atoko itxa: “Xesosi ipinako Xoteoakori mapinakani ikapani. ⁵² Kona ninoa ikapaninanini ipinako. Teoso anaakori iarikakani ikapani apaka ipinako. Ininiã iuasaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi sãkire.

⁵³ Iuasaaki eereka imapapiretarina Xesosi okinina tikane. ⁵⁴ Ikara atoko ininiã, Xesosi kona saika Xotéia tãpamoni. Isari Eparaiã sitatxitimoni, aãparaã makipakaniãtaã takote. Iuaã ikaikota imoianariakorikata.

⁵⁵ Iuasaaki imatokoãpotarina Pãskoa kiiniriti. Iuasaaki itomaneri Xoteoakori Xerosareẽ tãpa auakani sari Xerosareẽ sitatxitimoni. Iua kiiniri apisapanika,

isana iuaã oerexiniretiniuana ikapani. Iuasaaki amanaãrina Teoso imakatz-akiniri maerekati ikamakitina. ⁵⁶ Iuaã Xoteoakori nitari Xesosi. Ninoakakarika ipimaãkakana:

—Atauako kiinirimoni inapani atxiiti?

⁵⁷ Sasetotxi auiteakori, pariseoakori pakini paniãtapekari kãkiti:

—Himarotakasaakiri Xesosi auiniãtaã, hisãpiretauako ate, ininiã amaãkariko iua.

Maria Takari Kamariãro Xesosi Kitiã

(Mateo 26.6-13; Marko 14.3-9)

12 Seisi õti Pãskoa kiiniriti apisa, Xesosi sari Petãnia sitatxitimoni. Iuaã aua Arásaro, Xesosi okitikakiti Arásaro ipikasaaki. ² Iuaã ikamaãka nipokori Xesosi ikapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³ Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi ãki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão akiri. Xesosi moianari itxaua, txamari imãkapiritariko Xesosi.

⁵ Ininiã Xotasi txari:

—Kãkiti parikauata tresãtosi pakini õti oia atoko inakaro kamariãro iamotiko ikapani. Kinirepa kona ovãtxitaãka? Kinirepa txineiro mauakinitimoni !osika? —itxa Xotasi.

⁶ Ikara atoko itxa, kotxi kiitiriri itxaua. Iua nãkataro ninoa txineirote. Iua itotapekari txineiro iitirikini. Iua !imaãkatana txineiro mauakiniti.

⁷ Xesosi apakapapiretari:

—Kona hitxitapero Mariapani. Onãkataro kamariãro ia õti notamoni

otakini ikapani, kotxi oxinikari nikatiko õti ikapani. ⁸Minakati mauinakini auapikako hitekata. Txama nota !auaikako hitekata —itxa Xesosi.

Xoteo Auíteakori Nirekari Okiniri Arásaro

⁹Itomaneri Xoteoakori kenakopiretakasaakiri Xesosi Petánia sitatxitiã auini, ininiã iuaã isana Xesosi aõkitinina ikapani. Kona iuananini ninoa nireka aõkitinina. Arásaro Xesosi õkitikakiti apaka ninoa nirekari atamatinina. ¹⁰Ininiã sasetotxi auíteakori nirekari Arásaro apaka okinina, kotxi kaiãopokori kãkiti auikari Xesosi sãkire Arásaro sãpiretakiti ikenakotakasaakina. Itakanaparina sasetotxiakori sãkire auikinina. ¹¹Arásaro iuaikana auiniã, ininiã itomaneri Xoteoakori asikaãpotari iauitena, Xesosi sãkire auikinina ikapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹²Katimatinikata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auitemoni, Apiananiri uãkaã ikarimoni —itxana.

¹⁴Mitxipe Xesosi iokanataro imoianariakori xomẽta ãkiri initinina. Ninoa apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirika Teoso sãkire iõkatsopatakoru txari:

¹⁵Kãkiti Xerosareẽkini kona hĩpikarauatape. Erepani hãuũte. Xomẽta nopini iitopãkako,

itxa Teoso sãkire kitxakapirika. Ikara iaõka apokaepka, kotxi Xesosi apoka xomẽta nopini.

¹⁶Iuasaaki imoianariakori kona xinikari Teoso sãpiretakiti kitxakapirika auakari. Xesosi ipinaka atoko, õkitikaãkaua atoko, iuasaakiika ninoa xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷Mitxi kãkiti akauari takote auakani, ninoa itikari Xesosi õkitikiniri Arásaro. Ninoa iaripiretari Xesosi kamakiti. ¹⁸Ininiã kãkiti apiãkatari Xesosi, kotxi ninoa kenakoenetapekari Arásaro õkitikini. ¹⁹Ininiã pariseoakori misãkiretakakaua:

—Hãtamata. Kiripa aposota akamini? Ikinimane kãkiti nirekari iua.

Ininiã pariseoakori xikotari Xesosi.

Ãtikaka Krekoakori Nitari Xesosi

²⁰Ãtikaka Krekoakori apoka Xerosareẽmoni Páskoa kiiniriti ikapani, kotxi ninoa nirekari Teoso imisãkiretinina. ²¹Apokasaakina iuaãtaã, isana Piripimoni. Iua Petsãita aapokotxitikiri, Karirẽia tõpa auakari. Ininiã apokasaakina Piripimoni, ipimaãrina:

—Ate nirekari Xesosi aãõkitini.

²²Ininiã Piripi sari ãtreemoni, isãpiretiniri ikapani. Eereka isana Xesosimoni. ²³Ininiã apokasaakina, Xesosi txana ninoa:

—Kaiamapekari nota hĩtari iaxitikiri sini niri tixinemoni ikinipoko erekari napakapini ikapani. ²⁴Atão nisãpiretai. Nota kimi oki atoko. Kãkiti matakakaniãro oa, ãtika okinoka auapika. Pitakiniãro, opitxaka. Ininiã kaiãori oki aua. Ikara atoko nota. Nimapikaniã, ininiã notanokara auari.

Nipininiã, ininiã itomaneri kãkiti sari niri tixinemoni. ²⁵Pite ãtipirika kaminiãri piteka nireëkitinoka, ininiã pinireëkiti xipokapitakako pitekata. Pite nireëkiti xipokiniã, nota sãkire pauikini xika, pite auapininiika txako Teosokata. ²⁶Kãkiti nirekiniãri iparĩkauatini nota ikapani, imoianatanoko. Iua atoko ininiã, nota auiniãtaã iua apaka auako. Kãkiti parĩkauatiniã nota ikapani, ininiã niri paxitariko iua.

Xesosi Sãpiretari Ipinini

²⁷Xesosi misãkiretari Teoso:

—Uatxa kona erekaxinireno, ininiã kiãtokopa nitxa nisãkire pitemoni? Atxiiti nipaniãtai: “Niri, pimakatzakinanoko nimapinakani ikapani.” Ikara atoko !nipaniãtai, kotxi nipinini ikapanira napoka ikorapokoritimoni. ²⁸Ininiã niri, poerekari kãkiti ikinimane auite pininiãua —itxa Xesosi.

Iuasaakipeka iaxitikiri txari:

—Noerekapekari kãkiti ikinimane auite nininiãua. Eereka iuaikana noerekapanikariko ikara —itxa Teoso.

²⁹Kãkiti iuaãtaã auakani kenakotari iaxitikiri sãkire. Txamari itxana:

—Ikarokirauata.

Apanakini txari:

—Teoso nitirira sãkirauata uakata — itxana.

³⁰Xesosi txana ninoa:

—Ikara sãkirauata kona nota ikapanini. Hite ikapanira isãkirauata.

³¹Iposope ikini itixiti auakani misiritiko imaerekanina xika. Iposope ikini itixiti auakani auite Satanasi inakori xipokiko.

³²Nota aamina ipiriãmitakari nopini nõkitikikosaaki, iuasaaki nikosekanako kãkiti notamonikari.

³³Ikara atoko itxa, kãkiti imarotiniiri aamina ipiriãmitakari nopini ipinini.

³⁴Apanakini kãkiti apakapiretari:

—Teoso sãkire kitxakapirĩka iõkat-sopatakori oerekaua Teoso mereëkiti ãtipirika auini. !Ipinã. Txamari pite sãpiretaua ipinini aamina ipiriãmitakari nopini? Kipa iua aitari iaxitikiri pisãpire-takiti? —itxana ninoa.

³⁵Ininiã Xesosi:

—Tirikapi kamara atoko nitxa. Hitekata nauakasaaki, noerekai hite atão inakari. Uatxa tirikapi kamara hitekata auapanika. Paĩtiki nota sipe. Tirikapi auakasaaki, pauapikako tirikapi kamaraã. Ininiã ipiã kona apoka hitemoni. Kãkiti mauikakaniãri nota sãkire, ikanõka tĩpokotakani atoko itxana. !Imarotarina isinimonina. ³⁶Tirikapi hitemoni auakasaaki, hãuikariko iua sãkire. Ikara atoko ininiã, “pokamarari anaakori” hĩtxaua —itxa Xesosi.

Ikara atoko inaka atoko isipeka. !Isãpiretari isinimoni.

Xoteoakori Kona Auikari Xesosi Sãkire

³⁷Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua sãkire. ³⁸Ikara atoko ininiã, kitxakapirĩka Teoso sãkire sãpiretakari Isaia inakori iõkatsopatakiti, iuasaaki apopeka. Isaia txari:

Apiananiri, kãkiti !auikapiretari asãkire ninoamoni asãpiretakiti. !Auikari piposotiire poereëkiti ninoamoni, itxa Isaia. ³⁹Iua atoko ininiã, Xoteoakori kona posotari auikiniri Xesosi sãkire, kotxi iuaikana Isaia txari:

⁴⁰Teoso mõsiãretakana ninoa. Kaikokii itxikitakana. Itikakitina kona iikite-tana ninoa. Ikiãna kona !imarotarina. Ininiã ninoa kona apokapaniko notamoni erekapeka ininina nitxĩki-takini ikapani,

itxa Teoso Isaia iõkatsopatakitiã.

⁴¹ Kitxakapirika Xesosi uai apokini apisa Isafa iökatsopatari ia säkiretx-iti. Iuasaaki Teoso oerekari Isafa Xesosi posotiire, apaka ikinika Xesosi kamakiti tükane.

⁴² Iuaritika itomaneri Xoteo auíteakori auikari Xesosi säkire. Txamari !isäpiretarina apanakini, kotxi ninoa pükari pariseoakori. Pariseoakori imarotakasaakiri Xesosi säkire auiakani ininiuana, !auritaikana ninoa !roiini aiko Xoteoakori apotiitiniätaäua. ⁴³ Iua atoko ininiä, ninoa apia nirekari käkiti iuikinina. Poiäoka ninoa nirekari Teoso iuikinina.

**Xesosi Iuaikana Säkirauata
Xoteoakorimoni**

⁴⁴ Xesosi itapasäkireritika txari:

—Käkiti auikiniäri nota säkire, kona nota säkirenanini ninoa auika. Niri säkire apaka auikana, kotxi iua iokanatano nota uaimoni. ⁴⁵ Natamatakiri apaka atamatari niri. ⁴⁶ Tirikapi atoko nitxa nükasaaki käkitimoni. Nota säkire auiakani kona kaikota ipiaä. ⁴⁷ Käkiti nisäkire kenakotakani mauikakaniäri nisäkire, kona nimisiritari iua imaerekani xika. Kona käkiti nimisiritini ikapanini nina uaimoni. Nina käkiti maerekani nimaktxakini ikapanira.

⁴⁸ —Nota manirekakati, nisäkire manirekakati apaka, auapeka imisiritiko mereëkari. Nisäpiretakiti, iuarako itixi xipokini ötisaaki säpiretari imisiritiko.

⁴⁹ —Notaka säkire !nisäpiretai. Niri säkirera nisäpiretai. Niri iokanatano nota uaimoni. Iua paniätakiti isäpiretakiti nisäpiretai hite. ⁵⁰ Nimarotari käkiti auikiniäri niri paniätakiti auapinini-ika itxako. Nota säpiretari niri sikapiretinino iaöka.

Xesosi Arokari Imoianariakori Kiti

13 Páskoa inakori kiiniriti apisapanika, Xesosi imarotari päitiki itixi itakanapini irimoni isini ikapani. Iua tiretapikana käkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireötapekari Xotasi Isikariotxi Xesosi imikapiritini ikapani. Iua Xotasi, Simäo äkiri. Eereka inirekari isikiniri Xesosi imokaiakarimoni.

³ Xesosi imarotapekari iri sikiniri ikinipoko posotiiretxi Xesosimoni. Imarotapekari Teosomoni ipotorikini. Imarotapekari iuamoni ikanapiriini.

⁴ Iuaritika inipokotaka atoko, ökitikaua. Imaktxakari imäka inopini auakari. Eereka ipomakitari mäkatxi mata nitiritxi parika atoko ikamini ikapani.

⁵ Eereka itakari äparaä tiitxi äki. Ininiä arokana imoianariakori kiti. Eereka mäkatxi mataä ikaxipokaäpotana.

⁶ Simäo Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiä kona parokapiri nikiti —itxari.

⁷ Ininiä Xesosi:

—Uatxa kona pimarotari nikamakiti. Pimarotariko äti öti.

⁸ —Koniko pite arokapaniri nota kiti —itxa Petro.

Ininiä Xesosi:

—Pimauiritakaniäno pikiti narokini, ininiä kona nimoianari pitxaikauako —itxa Xesosi.

⁹ —Ikara atoko ininiä, kona nikitinani paroka. Niuaako, nikii, imakinika paroka —itxa Petro.

¹⁰ Ininiä Xesosi:

—Käkiti kipaätakanuia poirepe itxana. Itüpokotakasaaki, iuaikana itxiko apoka iuamoni. Iuasaaki

ikitinokara arokaãka. Hīte himakinika poirepeka, kotxi nimakatsakapekari himaerekani. Ātinokara kona poireri, kotxi imaerekani auapanika.

¹¹Xesosi imarotapekari iua mīkapiritakari, ininiã itxa: “Himakinika poirepeka. Ātinokara kona poireri,” itxana.

¹²Ninoa kiti arokaãka atoko, iere-takari imāka inopinikiri. Ikanapiriã amesamoni. Ipimaãna:

—Kinirepa narokatari hīkiti? ¹³Hīte akiriuaãkatano nota “koerekareri.” Apaka hākiriuãkatano “Apiananiri.” Atāopitikara hīsākire, kotxi ikara inakari nitxaua. ¹⁴Hīauīte, hōereēkiri nitxaua. Iuaritika narokari hīkiti. Hinitiri atoko nīparīkauata. Ininiã hārokakititakakauako, kākiti nitiri atoko hininiua. ¹⁵Noerekapekai hīte erekari hīkamini. Uatxa hīkamariko nota kamakiti atokokana. ¹⁶Atāo inakari nitxai. Nitiritxi iamotakori poiāori. Iauīte apiari. Apaka kākiti iokanatakari apiata. Iokanatakiti poiāori. ¹⁷Uatxa hīte imarotari atāo inakari hīkamini. Hīkaminiāri, hīpoxokoniua.

¹⁸—Kona himakinikani ikara atoko nitxai. Nimarotari nīmereēkīni, txamari ia Teoso sākire iōkatsopatakori iaōka apokapitikako. Itxari:

Notakata komiri nikakari, iuakarako kamari maerekati notamoni.

¹⁹Uatxa iua himarotini apisapanika nisāpiretai hīte. Ininiã nisākire iaōka apokasaaki, himarotariko Teoso ākiri nininiua nota.

²⁰Atāo inakari nisāpiretai. Kākiti nota iokanatakiti hītemoni hāpakapiniã, nota apaka hāpakapa. Hāpakapiniãno nota, hāpakapari apaka nota iokanatakari hītemoni —itxa Xesosi.

Xotasi Mīkapiritiniri Xesosi

(Mateo 26.20-25; Marko 14.17-21; Arókasi 22.21-23)

²¹Xesosi ikara isāpiretaãka atoko, ākixinireē imatinaniuata. Itxana:

—Ari, ātikara hīte sauaki mīkapiritano nota.

²²Ininiã imoianariakori atamatakakaua.

—Kiripa ikara atoko txatako? —itxana.

²³Iusaaki Xesosi moianari itiretakiti papīkaītota iuamoni. ²⁴Ininiã iusaaki Simāo Petro ieki itxa isona iuamoni. Ininiã Petro:

—Pipimaāri iua: “Īkiripa ikara atoko txatariko iua?” —itxari.

²⁵Ininiã Xesosi tiretakiti pimaāri Xesosi:

—Kiripa ikara atoko txatai? —itxari.

²⁶Ininiã Xesosi:

—Komiri niākakiti nisikakitikarako ikara atoko txanoko.

Ininiã iusaaki iākari komiri. Eereka isikari Xotasi Isikariotximoni. Iua Xotasi Simāo ākiri. ²⁷Xotasi komiri inikasaaki, Satanasi iroā ixiniremoni. Ininiã Xesosi txari Xotasi:

—Kinirāo kamaka pinakiti pikamapoka —itxari.

²⁸Iuaã auakani ākixinireē:

—Kinirepa ikara atoko itxatari Xotasi?

²⁹Xotasi nīkataro ninoa txineirote. Ininiã ninoa ākixinireē:

—Atxiīti iokanataro iua komiri iamotini ikapani.

Ātipekana:

—Atxiīti iokanataro iua matiinimoni txineiro isikini ikapani —itxanātana ākixinireēna.

³⁰Komiri apakapaãka atoko, inikaãka atoko isipe Xotasi. Mapiāpe inakasaaki.

³¹Xotasi sipeka inaãka atoko, Xesosi txana ninoa:

—Uatxa kākiti itikariko kākiti itari iaxitikirosi posotiire. ³²Kākiti atamatariko Teoso posotiire imimoni auakari. Ininiā Teoso txari: “Erekapitkari namarite.” Iuasaaki Teoso oerekari kākiti iua apokaerekatini imi. Ikara atoko ininiā, oerekari imi ereka inini.

³³—Nitiretakini, paītikinoka nauini hītekata. Eereka hinitapiimano nota, txamari nota sinimoni kona hīposotari hīsini. Ikara atoko nitxapekana Xoteoakori. Iuatxikana uatxa nisāpiretai hīte. ³⁴Ininiā uatxa nisāpiretakiti hīte Teoso paniātakiti amaneri: “Hītiretakakaua, nota hīte nitiretini atokokana.” ³⁵Ikara atoko hīkaminiā, ikinimane imarotariko nota moianariakori atāo hininiāua.

Xesosi Sāpiretari Petro Kipatiniri Iua

(Mateo 26.31-35; Marko 14.27-31; Arókasi 22.31-34)

³⁶ Simão Petro pimaāri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hīsini. Āti ōtirako hīsa hīte.

³⁷ Iuaīkana Petro:

—Apiananiri, kinirepa kona pītekata nisa uatxa? Nipinapitikamako pītekata —itxa Petro.

³⁸—Atāopitkani notakata pipinini pinirekaka? —itxari.

—Atāo nisāpiretai. Ia īkanōkati patari sākirauatini apisapanikako, “!Nimarotari iua,” pitxanoko ipi āti pakinikata —itxa Xesosi.

Xesosi Pinitari Imoianariakori

14—Kona himatinaniuatape. Kona himaākapeua. Hāuikariko Teoso sākire. Apaka hāuikariko nota sākire. ²Niri auiniātaā aua kaiāopokori aapokotxi. Ikara atoko iminakanimako, nisāpiretapiimaiko hīte. Iuaā nisa hāuiniātaā nikamini īkapani. ³Iuaā

nisa hāapoko nikamini īkapani. Eereka nikanapiriā. Nanikai hīte notakata hāuini īkapani. Ininiā hīte apaka aua nota auiniātaā. ⁴Hīte imarotari nota sini kimaporiti —itxa Xesosi.

Teoso Kimapore Itxaua Xesosi

⁵—Kona aimarotari pisinimoni. Natokopa ininiāpa aimarotatari pite sini kimaporiti? —itxa Tomee.

⁶ Ininiā Xesosi txari:

—Teosomoni sikari kimaporiti nitxaua. Atāonoka nisākire. Atāonoka nika-makiti. Nitxīkitakari kākiti auapininiika inini. Notamoni apokakarinanira sari nirimoni. ⁷Atāo nota himarotiniā, ininiā himarotariko niri apaka. Uatxa himarotapekari iua. Hātamatapekari iua —itxa Xesosi.

⁸—Apiananiri, poerekari piri atemoni. Ikaranoka anireka —itxa Piripi.

⁹ Ininiā Xesosi:

—Piripi, kona mixaikani hītekata nauama nota, iuaritika kona himarotapanikano nota? Nota aōkitakari, aōkitapekari niri. Kinirepa, “Piri poerekaua,” pitxa? ¹⁰Kona pite auikapanikari niri auini nota āki? Nota apaka aua niri āki.

—Hītemoni nisāpiretakiti kona nota sākirenanini. Niri paniātakitira. Niri nota āki auakari iuara kamari ikinipoko nikamakiti. ¹¹Hāuikariko nisākire niri āki nauini. Niri nota āki auini apaka hāuika. Himaauikakaniāri nisākire, ininiā hāuikari nikamakiti. ¹²Atāo nisāpiretai. Nota sākire auīākani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³Nota uākaā hamanaākiti nota sikai hīte. Ikara atoko ininiā, oerekaāka niri ereka ininiua. ¹⁴Ikinipoko nota uākaā hamanaākiti, nota sikapitikai hīte. ¹⁵Nota hītiretiniā, hīkamariko nipaniātakiti —itxa Xesosi.

Erekari Matamatakoti Apokaenetini

¹⁶—Namanaãriko niri āti kōtākikareri iokanatini hītemoni. Iuakara auapinini-ika txako hītekata. ¹⁷Iua Erekari Matamatakoti atāonani ina sākiretakari. Kāk-iti Teoso sākire mauīākani kona apakapari iua, kotxi kona atamatarina iua. Apaka kona imarotarina iua. Hītepekana imarotari iua, kotxi hītekata aua. Iua aua hīte ākixinireē.

¹⁸—Ininiā kona nitakanapai hīte. Nikanapiriāpanikako hītekata nauini ikapani. ¹⁹Paītiki atoko kākiti ikoraxiti auakani kona atamataikanoko nota. Hīte atamatanoko. Hīte auapanikako, kotxi nota apaka auapanikako. ²⁰Iuaikana auapanika ninakasaaki, himarotariko niri āki nauini. Hīte apaka auako nota ākixinireē. Nota aua hīte ākixinireē apaka. Txapaniko.

²¹—Iua nisākire auiākarira nipaniātakititi kamakarira tiretano nota. Nota tiretakari niri tireta. Nota apaka turetari iua nitiretakiri. Ikara atoko ininiā, no-erekariko apikomoni nisākire iuamoni.

²²Āti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ākiri pininiua? Kinirepa kona poerekari ikara apanakinimoni? —itxa.

²³Xesosi apakapapiretari:

—Kākiti turetiniāno, ikamari nisākire iaōka. Niri turetari iua. Niri, nota pakini apokako iuamoni. Iuakata aūako. ²⁴Nota matiretakani kona nīkatari nisākire. Nisākire hīkenakotakititi kona nota sākireni. Niri niokanatakiri sākirera.

²⁵—Hītekata nauakasaaki, ikara sākiretxi nisāpiretai. ²⁶Niri iokanatariko kōtākikareri, Erekari Matamatakoti inakori hītemoni. Erekari Matamatakoti oerekaiko hīte ikinipoko niuākaā. Himaxinīkaretakititi iuaikanako

iua oerekaiko. Ikinipoko nisāpiretakiti oerekaiko.

²⁷—Nisini apisapanika nika-maerekaxiniretai. Nota xinire ereka inini atokotxikana nikamaerekaxiniretai. Nisākire mauīākani kona posotari kamaerekaxiniretiniri āti nota kamaerekaxiniretiniri atoko. Kona himaākapeua. Kona hīpīkarauatape. ²⁸Hīte kenakotapekari nisākire ia atoko nininii hīte: “Nisapitikako, iuaritika nikanapiriāpanikako hītekata nauini ikapani.” Hītiretiniano, hīpoxokoniuata nirimoni nisini ikapani, kotxi poiāori nitxaua nota. Apiatakari itxaua niri. ²⁹Ikara nisāpiretakiti apokini apisa nisāpiretai hīte. Ikara nisāpiretakiti iaōka apokasaaki, hīte auikari nisākire. ³⁰Apikomoni iteene nisāpiretinii !apakata. Ikorapokoriti auakani auīte Satanasi inakori paītiki apokako notamoni, iuaritika !iposotari itxikitakinino ipaniātakititi nikamini. ³¹Iteene ninirekari imakinika kākiti imarotiniiri nitiretiniri niri. Apaka nikamari ikinipoko niri paniātakititi —itxa Xesosi.

Ereka Xesosi txari:

—Maōkitikaua. Masipeka.

Xesosi Atāo Itīkaretsa Itxaua

15 Ininiā eereka Xesosi txari: —Atāo itīkaretsa nitxaua nota. Itīkaretsa nīkatakari itxaua niri. ²Isauakaro otsa marito, kotxi kona kariro oa. Otsa iriuatakaropekana iua kisauakaro omapotōkirenoka, iteene oriuatini ikapani. ³Hīte poirepeka hītxa. Nisākirenanira oeretai hīte. ⁴Okanotsa atokokana hītchaua. Nota itīkaretsa atoko nitxaua. Ininiā hīpitxaka notamoni. Ikara atoko hininiā, hīkaikota notakata. Ininiā nota kaikotapika hītekata. Ikara atoko hininiā, hīriuatapitika. Ikara atoko hininiā, erekarinanira hīkama.

Hīriuatiniā, ininiā erekari hīkama. Notamoni himapitxakakaniā, kona hīposotari hīkaminiri erekari. Kona hīriuata, kotxi nota tapara !apokari hītemoni. !Karii hīte. Okanotsanoka auiniā, kona kariro. Notakata hāuapininiika hininiā, amātiiri auapitika.

⁵—Nota itīkaretsa nitxaua. Hīte nikanotsa hītxaua. Notamoni pitakakari ātipaniriko oripaniko. Notakata himauakaniā, kona xapitiki kona hīposota hīkamini. ⁶Nota sākire mauīākati okanotsa ipinakari atoko itxa. Txiarokakari atoko itxa. Kākiti apotiitari okanotsa ipinakari. Eereka okari xaminaā arikini ikapani. Iua atokokana aīri Teoso misiritari isākire mauīākani. ⁷Notamoni hīpitxakiniā, hīkenakotiniāri nipaniātakiti, hinirekaākiti hamanainiāno, ininiā nisikapitikai hīte. ⁸Ito hīriuatiniā, kākiti txariko niri: “Peerekai.” Hīte iriuatiniā, ininiā hīte atāo oerekariko apanakinimoni atāo nimoianariakori hininiua.

Hītiretakakiniua Pirena

⁹—Niri tiretinino atokotxikana, nitiretai hīte. Kona hītakanapapiri nitiraōki. ¹⁰Hīkīpitiniāri nisākire, ininiā nitiraōki kaikotapika hītekata. Nota atokokanerako hītxako. Nota kīpitari niri sākire, ininiā niri tiraōki kaikotapika notakata.

¹¹—Ikara atoko nitxai hīte, nipoxokoni hītemoni kaikotini ikapani. Ikara atoko ininiā, poxokonitxi xāpokako hīxiniiremoni. ¹²Ia nipaniātakiti: “Nota tiretinii atokotxikana, hītiretakakauako.” ¹³Pipininiā

pimoianariakori mapinakani ikapani, ininiākara iteene pitiretana ninoa. Ikara tiraōkitxi apiatakari. ¹⁴Nipaniātakiti hīkaminiā, atāo nimoianariakori hītxaua. ¹⁵Uatxa !nixinikaikari nitiritxi hininiua, kotxi nitiritxi kona

imarotari iauīte xinikakiti. Uatxa atāo nimoianariakori hītxaua, kotxi ikinipoko niri oerekakiti nisāpiretapekai hīte. ¹⁶Kona hīteni mereēno nota. Notara mereēi hīte hīriuatini ikapani. Ninirekari hīriuatini. Ninirekari kākiti nota sākire hīsāpiretakini txipokori maxipokakati atoko ininina. Ikara atoko ininiā, hamanaāriko niri hinirekakiti nota uākaā, ininiā niri sikapitikai hīte. ¹⁷Ia nipaniātai hīte hītiretakakiniua.

Xesosi Moianariakori Omanatakani

¹⁸Iuaīkana Xesosi pinitari imoianariakori:

—Apanakini omanataiko hīte. Ininiā hīxinikariko ia nisākire. Merepitipanika ninoa omanatano nota. ¹⁹Teoso sākire himauikakaniā, Teoso sākire mauīākani tiretapitikai hīte, kotxi ninoa atoko hītxa. Txamari ninoa nakiti !hītxaua. Hīte kona ikoraxiti auakani !hītxaikaua. Nimereēpekai hīte. Nimakatzakapekai ātiāo parīkatxi hīkamini ikapani. Iua xika Teoso sākire mauīākani omanatai. ²⁰Hīxinikariko ia nisāpiretakiti. Nitiritxi poiāoka itxaua. Iauīte apiatakari itxaua. Kākiti misiritiniāno nota, nota atokokanerako imisiritai hīte apaka. Nisāpiretapekai hīte. Nota sākire apamonikiniāna, ininiā hīte sākirekanera ninoa apamonika apaka. ²¹Imisiritaina, kotxi hīte auikari nota sākire. Himisiritaākako, kotxi kona imarotarina niokanatakiri. ²²Nota uai mapokakaniā, nimasākirauatakaniā, kona imarotarina maerekati ikamakitina. ²³Nota omanatakani apaka omanatari niri. ²⁴Niposotiire nikamakiti apanakini kona posotari ikamini. Noerekari ninoa niposotiire, ininiā uatxa maerekati auari ninoamoni, kotxi !auikari nota sākire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵—Uatxa apopeka Teoso sākire iaōka. Teoso sākire iōkatsopatakori txari:

Maxikatiika ninoa omanatano.

²⁶Kōtākikarereri kona apokapanika. Niokanatariko nirikata auakari, Erekar Matamatakoti. Iua potorika niri auiniātaā. Atāo ene sākiretakari itxaua. Isāpiretariko nota sāpiretakiti, nikamakiti pakini. ²⁷Ininiā hīte apaka sāpiretariko nota kamakiti, nisāpiretakiti pakini apanakinimoni, kotxi merepitpanika nipotorikasaaki hīte auapika notakata. Ininiā himarotapitikano nota.

16 Xesosi sākirauatapanika:

—Ikara atoko nitxai hīte atāo himarotini ikapani, ininiā kona hītakanapari nisākire. ²Āti ōti Xoteo auīteakori omitikenataiko hīte aiko Xoteo apotiitiniātaāua. Āti ōti apokapanikako ia nisāpiretakiti. Iuasaaki ninoa xinikariko hīte okiko ereka inini. Ninoamoni hīte okiko Teoso paniātakiti iaōka. Txamari kona Teoso paniātari ikara atoko inakari. ³Ikara atoko inakari ikamanako, kotxi kona imarotano nota, niri pakini. ⁴Ikara atoko nitxai hīte, kotxi ikara atoko inakari apokasaaki, hīxinikariko nisākire. Merepanika nimoianatakasaaki, kona ikara atokoni !nitxai hīte, kotxi nota auapanika hītekata —itxa Xesosi.

Erekari Matamatakoti Parīka

⁵Xesosi sākirauatapanika:

—Paītiki nisipekako niokanatakirimoni. Kona hīpimaāpeno: “Nanipa pisa?” Kona hītxapeno. ⁶Ikara atoko nisāpiretapekai, ininiā uatxa kona erekaxinirei hīte. ⁷Iuaritika nitxai hīte atāo nisākire. Apiaerekata nota sini. Nota masakaniā, iua Kōtākikarereri kona apoka hītemoni. Nisiniā, niokanatariko iua hītemoni. ⁸Iua

Kōtākikarereri apokasaaki, oerekariko ikorapokoriti auakani maerekani. Oerekariko Teosonoka txīkitakiniri kākiti atāo inakari ikamini. Oerekariko kākiti misiritiko imaerekani xika. Iua Erekar Matamatakoti oerekariko ikara atoko inakari. ⁹Iua oerekariko maerekati kākiti kamakiti, kotxi ninoa !auikarina nisākire. ¹⁰Iua oerekariko Teosonoka txīkitakiniri kākiti atāo inakaranoka ikamini, kotxi nota sipekako nirimoni. Nota !auaika uai noerekarauatini ikapani. Paītiki kona hīte atamataikanoko nota. ¹¹Iua Erekar Matamatakoti oerekariko maerekati kamakani misiritiko, kotxi ikorapokoriti auakani auīte Satanas inakori misiritiko mereeēkapeka.

¹²—Auapanika apikomoni nisāpiretakiti tīkane hītemoni. Txamari !apakata apikomoni nisāpiretinii, kotxi !himīteenekari apikomoni nisāpiretinii. ¹³Iua Erekar Matamatakoti, atāoene sāpiretakari, iua ikasaaki, iua oerekaiko ikinipoko atāo sākiretxiti. Kona iua sākireni isāpiretaiko hīte. Iaxiti auakari sākirera, niri sākirera, isāpiretaiko. Isāpiretaiko hīte katana Teoso kamakiti tīkane apaka. ¹⁴Erekar Matamatakoti oerekaiko ereka ninini, kotxi iua apakapariko nisākire, eereka isāpiretaiko hītemoni. ¹⁵Ikini sereti niri nakiti nota nakiti apaka. Ininiā nota txai hīte, “Erekar Matamatakoti apakapariko nota nakiti. Ininiā eereka isikai hītemoni himarotini ikapani.”

Matinanitxi, Eereka

Poxokonitxi Apoka Inini

¹⁶—Paītiki kona hātamataikanoko nota. Eereka iuaikana hātamatanoko, kotxi nirimoni nisako —itxa Xesosi.

¹⁷Imoianariakori txanāta:

—Kiripa itxanāta Xesosi? “Paītiki kona hātamatanoko. Eereka iuaikana hātamatanoko nota, kotxi nirimoni

nisako.” Kiripitipa itxanāta Xesosi? —itxana imoianariakori.

¹⁸—Kirisaakipa apokatako ikara inaātakititi? Kiripa ikara isākire: “Paītiki,” Xesosi sākire atemoni? Ikara isākire kona ate imarotari xatiki —itxanātana.

¹⁹Xesosi imarotari ninoa nirekari ipi-mainiri iua. Ininiā Xesosi txana:

—Hīte nirekari hīpimainino nota, kotxi nisāpiretai paītiki kona hātamatatinino, eereka iuaīkana hātamatano. ²⁰Atāopitikara ia atoko nitxai hīte. Hītxiapatako. Himatinaniuatako. Iuasaaki apanakini kākiti īkorapokoriti auakani poxokoniuatako. Himatinaniuatako, eereka hīpoxokoni apokapitikako.

²¹—Hīte sito atoko hītxiuauako. Sito oāuaenetanapanoka onakasaaki, oa omaākapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²²Ikara atoko itxako hītemoni apaka. Uatxa kona erekaxinirei hīte. Iuaīkana naōkitapanikaiko hīte. Iuasaakirako hīpoxokoniuatako. Iuasaaki kākiti kona posotari ixipokiniri hīpoxokoni. ²³Īkora ōti apokasaaki, kona hīpimaāikano nota. Iuasaaki hamanaāri niri hinirekakiti nota uākaā, ininiā iua sikai hamanaākiti. ²⁴Uatxapiima kona hamanaāpanikari hinirekakiti nota uākaā. Hamanainiāri, hāpakapapitikariko. Ininiā hīpoxokoni apokapitikako hītemoni.

Imoianariakori Auikari Xesosi Sākire

²⁵—Mītxi niomaātari ipixini nisākire, kākiti mimarotakaniri īkapani. Āti ōti kona niomaātaikari atāo. Nisāpiretaiko niri iteene himarotini īkapani. ²⁶Iuasaaki hinirekakiti hamanaāno nota uākaā. Kona nota amanaāri niri hinirekakiti isikinii. Hīte amanainiāri, isikapitikai. ²⁷Niri tiretai hīte, kotxi hīte tiretano nota. Hīte auikari iua iokanatinino nota uaimoni. Ininiā iua

tiretapitikai hīte. ²⁸Niri iokanatano īkorapokoriti. Paītiki nitakanapari īkorapokoriti nirimoni nisini īkapani —itxa Xesosi.

²⁹Imoianariakori txari:

—Uatxa pisākire atāoenepitika. Sākiretxi piomaātakititi kona auaika, kotxi uatxa aimarotari pisākire. ³⁰Uatxa aimarotari pite imarotiniiri imakinika. Kona apakata apikomoni apimarauatini, kotxi uatxa aāuikari Teoso auinimoni īkari pininiua pite —itxarina Xesosi.

³¹Xesosi apakapapiretana:

—Uatxa hāuikari nisākire —itxa Xesosi.

³²—Uatxa Teoso ketotiniiri manapi apope hīarikini īkapani. Imakinika hīte takanapanoko. Notanani kaikota. Iuaritika kona notananini kaikota, kotxi niri aua notakata. ³³Ikara atoko nisāpiretai, kotxi ninirekari erekaxinirepeka hinini. Īkorapokoriti hāuakasaaki, kākiti misiritapitikai hīte. Iuaritika hīpoxokoniuatako, kotxi nota tapara apiata. Maerekanitxi tapara poiāoka —itxa Xesosi.

Xesosi Misākiretari Teoso Iuaka Īkapani

17 Xesosi ionakaāta iaxiti. Iuasaaki isāpiretari ia isākire Teosomoni:

—Niri, piketotini manapi apopeka. Pisikariko piotximere iuaīkana nota pamaritemoni, ininiākara nota oerekari kākiti pite iotximere, ²kotxi pite sikano nota piposotiire ikinimane auite nininiua īkapani. Ininiā nikamari ikinimane kākiti pite sikakini auapininiika ininina īkapani. ³Kākiti imarotiniāi pite, imarotiniāno nota Xesosi Kristo piokanatakiti, ninoa auapininiika, kotxi pite atāo Teoso pitxaua. Pitenanira atāo Teoso pitxaua. ⁴Noerekari īkorapokoriti auakani pite Apiananiri pininiua, kotxi nikamapekari parīkatxi pipaniātakititi. ⁵Ininiā niri,

uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaikana —itxa Xesosi.

Xesosi Misäkiretari Teoso Imoianariakori İkapani

⁶Xesosi säkirauatapanika irimoni:

—Nota säpiretari piuäka käkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiä ninoa kamari pisäkire iaöka. ⁷Uatxa imarotarina ikinika napakapakiti pite sikinino. ⁸Nisäpiretapekana ninoa pisäkire, ininiä auikarina pisäkire. İmarotapitikarina pitemoni nipotorikini. İniniä auikarina pite iokanatinino nota käkitimoni.

⁹—Nimisäkiretai pite ninoa İkapani. Kona nimisäkiretai nota säkire mauiakani İkapani. Nimisäkiretai ninoa notamoni pisikakini İkapaninoka, kotxi pite nakitiakori itxauana. ¹⁰İkinika nota nakiti pite nakiti itxaua apaka. İkinika pite nakiti nota nakiti itxaua. Ninoa pisikakini oerekari apanakini Apiananiri nininiu. İniniä iusaaki apanakini txari: “Peerekari Xesosi.” ¹¹Uatxa İnikaikotaikako İkorapokoriti. Txamari ninoa kaikotapanika uai. Nota sipekako pitemoni, ininiäkara pinikatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ätika atoko ininiuana, nota pitekata ätika atoko aniniu atokokana. ¹²Itixi ninoakata nauakasaaki, ninikatana ninoa pite uäkaã, piposotiireë. Ninoa notamoni pisikakini ninikatapitika. Kona ätika nomaiäta. Xotasinoka pİpinanaka, kotxi pİpinanakakani äkiri itxaua iua. İpİpinanaka, kotxi kitxakapirİka Teoso

säkire iökatsopatakori säpiretapekari İkara apokini apisapanika.

¹³—Uatxa nota sipeka pitemoni. İkara atoko itxa nisäkire käkitikata nauapanika ninakasaaki, nota poxokoni ninoa äkixinire auini İkapani. ¹⁴Nisikapekari pisäkire ninoamoni, ininiäkara nisäkire mauiakani omanatana ninoa, kotxi nisäkire auiakani İkorapokoriti auakani İtxaikauana ninoa. Iua atokotxikana kona İkorapokoriti auakarino nota. ¹⁵Nimisäkiretai pinİkatatinina ninoa, Satanasi mamaikakanina İkapani. Kona ninirekari mauikareni sauaki auakasaakina pimakatxakinina. ¹⁶İkorapokoriti auakani İtxauana. Nota iua atokotxikana. ¹⁷Pimakatxakana ninoa pite nakitiakori İkapani. Pisäkireë pimakatxakana, kotxi pisäkire atão. ¹⁸Nota pisäkire mauiakanimoni piokanatini atokokana, niokanatanana ninoa pisäkire mauiakanimoni. ¹⁹Ninoa İkapani notaka nisikaua pitemoni pinirekakiti nikamini İkapani. İniniäkara ninoaka apaka sikaua pitemoni pinirekakiti ikaminina İkapani.

Xesosi Misäkiretari Teoso İsäkire Auiäkani İkapani.

²⁰—Kona nimoianariakorinani İkapanini nimisäkiretai pite. Apaka nimisäkiretai imakinika nisäkire auiäkani İkapani, katana nimoianariakori säkire auiäkani İkapani apaka. ²¹Nota amanaäi ninoa xinire ätika atoko ininina İkapani. Nota aua pite äkixinireë. Pitepekana aua nota äkixinireë. Iua atokotxikana ate aua ninoa äkixinireë. İkara atoko ininiä, nota säkire mauiakani İkorapokoriti auikapanikariko pite iokanatinino nota. ²²İniniä erekari notamoni pisikakiti, piotximere, nisikapekana ninoa. İniniä ninoa xinire ätika atoko itxauana, ate

ātika aniniua atokokana itxana ninoa.
²³Nota aua ninoa ākixinireē. Pite aua nota ākixinireē. Ikara atoko ininiā peerekari, kotxi ātika itxaua ixinirena. Ikara atoko ininiā nisākire mauiakani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴—Niri, ninirekari ninoa notamoni pisikakini notakata auini ikapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite tiretano nota itixi kamiko apisa. ²⁵Niri, atāo inakarinoka kamakarii pite. Kākiti ikorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota kākitimoni. ²⁶Nisāpiretapekai pite kākitimoni. Apikomoni nisāpiretapanikariko pisākire. Ininiā pitiraōki notamoni auakari ninoamoni auako. Ininiākara nota aua ninoa ākixinireē.

Xesosi Maikiko Pirena

(Mateo 26.47-56; Marko 14.43-50; Arókasi 22.47-53)

18 Teoso imisākiretaka atoko, Xesosi ipiriātari sotoāri Setorō inakori. Iuaā aua amātiirinape. Ininiā Xesosi sari iuaā imoianariakorikata. ²Xotasi, Xesosi mīkapiritakari, imarotari Xesosi imoianariakorikata itotiniri iuaātaā isinina. ³Ininiā Xotasi sari amātiirinape-moni ātikaka sotatoakorikata, Teoso misākiretiko aikoti nīkatakanikata. Sasetotxi auiteakori, pariseoakorikata sari iuaātaā apaka. Ikeekotxi, tirikapi pakini anikana. ⁴Xesosi imarotari ikinika iuamoni ikamakitina tīkane. Imarotapekari ninoa nirekakari okinirina iua. Iuaritika isari ninoamoni. Ipimaāna:

—Kiripa hinitanāta?

⁵Ininiā ninoa:

—Xesosi Nasareekirira anita —itxana. Ininiā Xesosi:

—Iuakarano nota.

Iuasaaki Xotasi, Xesosi mīkapiritakari, aua ninoakata. ⁶Xesosi “iuakarano nota” inakasaaki, osipikana, ixitipe irika itxana.

⁷Iuaikana Xesosi pimaāna:

—Kipa hinitanāta?

—Xesosi Nasareekirira —itxana.

⁸—Nixtapekai, iuakarano nota. Nota hinitiniā, hāuiritana nimoianariakori sini —itxa Xesosi.

⁹Ikara atoko itxa, mitxi isākire apokini ikapani. Mitxi itxari Teosomoni: “Kona nomaiātana nimoianariakori notamoni pisikakini. Kona ātika !nomaiāta.”

¹⁰Eereka Simāo Petro inakori kosekari iouata auite. Isauakari Maoko inakori ikikomoni ikīpita. Iua sasetotxi auite apiatakari nitiri.

¹¹Xesosi txari Petro:

—Pitakaro iouata auite omata āki. Apakatapitika nota kaminiri niri paniātakiti. Niri nirekapitikari natatsiitiniri nipinini kākiti ikapani —itxa Xesosi.

Xesosi Anasi Apisatoō

¹²Eereka sotatoakori, apaka sotatoakori auite, Teoso aikote nīkatakani pakini maikari Xesosi. Iaxirika itxarina. ¹³Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auite apiatakari itxaua. ¹⁴Iua Kaipasi ōtākikapekana Xoteo auiteakori. Ia atoko itxa isākire: “Apiaerekata āti kiki ipinini ikinimane mapīkani ikapani,” itxa Kaipasi ōtākikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arókasi 22.54-62)

¹⁵Simāo Petro, āti Xesosi moianari pakini asikatikinitari Xesosi Anasi aapokomoni anikikosaaki. Mitxipeka

sasetotxiakori auíte apiatakari aõkitapekari iua äti Xesosi moianari. Ininiã iua iroã sasetotxiakori auíte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisäkiretaro ironakikoãtaã tore nĩkatakaro. Ininiã oãuiritari Petro iroini.

¹⁷ Oa txari Petro:

—Pite ikira Xesosi moianarikai? — otxari.

—Kona —itxaro.

¹⁸ Iuasaaki katxĩkareri aua, ininiã nitritxiakori, Teoso misäkiretiko aikoti nĩkatakani pakini kamari xamina. Xamina itinipoki irokanãtauana. Petro ni-noakata aua iuasaaki.

Xesosi Sasetotxiakori Auíte Apisatoõ

(Mateo 26.57-68; Marko 14.53-65; Arókasi 22.54, 66-71)

¹⁹ Iroko äki Xesosi sasetotxi auíteakorikata aua. Ininiã sasetotxiakori auíte apiatakari misäkiretari Xesosi:

—Pisãpiretano pimoianariakori, pisãkire poerekakiti pakini —itxari.

²⁰ Xesosi apakapapiretari:

—Ätipirika nisãpiretapikai hĩte. Nitotari noerekarauatini aiko Xoteo apotiitiñiãtaãua, Teoso misäkiretiko aikotiã apaka. Kona nikipatari nisãkire. Ikinipoko kenakotari noereëkiti. ²¹ Ininiã kinirepa hĩpimaãno? Hĩpimaãna nisãkire kenakotakani. Ninoara imarotari noereëkiti —itxa Xesosi.

²² Xesosi ikara atoko isãkirau-atakasaaiki, Teoso misäkiretiko aikoti nĩkatakari aritoõtari Xesosi.

—Atokope. Kona ikara atoko pitxape sasetotxi auíte apiatakarimoni —itxari.

²³ Ininiã Xesosi:

—Nikerokiniãri nisãkire, pisãpiretano nikerokakiti, txamari kona nikerokari. Atão nisãkire, ininiã kinirepa piaritano? —itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auíte apiatakarimoni, Kaipasi inakorimoni.

Iuaĩkana Petro Kipatari Xesosi Imarotini

(Mateo 26.71-75; Marko 14.69-72; Arókasi 22.58-62)

²⁵ Petro iporikiti aua iuasaaki. Ininiã apanakini pimaãri:

—Ikira kiki moianarikai pite? — itxarina.

Ininiã iua:

—Kona —itxa.

²⁶ Äti sasetotxi auíte apiatakari nitiri, Petro kisauakakĩpitatakiti nirimane iua. Iua pimaãri Petro:

—Pitekani amãtiirinapeãtaã nitika iuakata? —itxari.

Iuaĩkana Petro txari:

—Kona notani.

²⁷ Iuasaakipeka patari sãkirauata. Iuasaakipeka mitxi Xesosi sãpiretakiti iaõka auape.

Xesosi Pirato Apisatoõ

(Mateo 27.1-2; Marko 15.1-5; Arókasi 23.1-5)

²⁸ Ikanõkapanika ninoa takanapari Kaipasi aapoko, Anikarina Xesosi Homano auíte auinimoni, kãkiti misiritiko imarotiko pakitamoni. Xoteo auíteakori kona nirekari aiko äki iroinina. Kona inirekarina äti uãka takote iitopãkinina. Äti uãka takote iitopãkiniãna, kona apakata nipokori inikinina Pãskoã kiiniritiã. ²⁹ Ininiã Pirato pokika porikiti Xoteo imisäkiretini ikapani. Ininiã Pirato txana ninoa:

—Kixikapa himinatari ikira kiki notamoni? —itxana.

³⁰ Ininiã ninoa txari:

—Maerekati imakamakaniã, kona ate minari iua pitemoni.

³¹ Ininiã Pirato:

—Hîteka xinikari maerekati ikamakiti, ininiã ixika auiniã hîteka misiritari iua. Hîkiomaneakorini sâkire iaôka himisiritari iua —itxa Pirato.

Xoteoakori apakapapiretari:

—Kona apakata aôkiniri iua, kotxi hîte Homanokari !auiritaua aôkiniri kâkiti. Pitenokara apakata okiniri iua —itxana.

³² Ikara atoko inaâka, mitxi Xesosi sâkire iaôka apokini ikapani, kotxi mitxi isâpiretapekari aamina îpiriâmitakari nopini ipinini.

³³ Pirato îroã kâkiti misiritiko imarotiko pakita âki iuaikana. Ipîkapiretari Xesosi. Ipimaâri:

—Pitekani Xoteoakori auîte txataua? —itxari.

³⁴ Ininiã Xesosi txari: —Piteka sâkirekani ikara? Atxiîti apanakini sâkire atokotxikana pipimaâno atxiîti? —itxa Xesosi.

³⁵ Pirato apakapapiretari:

—Xoteokani nitxataua? Konapitini. Piteka nirimane, pinirimane auîteakori pakini sikai pite notamoni pimisiritiko tîkane. Kixikapa? Kipa maerekati pikamakiti? —itxa Pirato.

³⁶ Ininiã Xesosi:

—Auîtetxi nininiâtaâua kona îkorapokoritini. Nîtxixine îkorapokoriti inaâkamako, ninitiriakori neenamau-atamako, ininiã Xoteoakori kona maîkamanoko. Auîtetxi nininiâtaâua âtiâtaâra —itxa Xesosi.

³⁷ Pirato txari Xesosi:

—Ininiã auîtetxikani pitxataua?

Ininiã Xesosi: —Atâopitikara pisâkire auîtetxi nininiua. Niponaniã îkorapokoriti auîtetxi nininiua ikapani. Itixi napoka atâoene nisâpiretini ikapani. Atâoene nirekakani auikari nisâkire —itxa Xesosi.

³⁸ Ininiã Pirato:

—Kiripa atâoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Eereka Pirato iuaikana mapara isa Xoteoakori imisâkiretini ikapani. Itxari:

—Kona nota apokari maerekati ikamakiti. ³⁹ Hîte itotari maerekati kamakari kateia âki auakari nisikakini Pâskoa kiiniritisaaki. Hîte nirekatari nisikakiniri ikira Xoteoakori auîte? —itxa Pirato.

⁴⁰ Ikinimanezana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naitapekari Homanokori.

19 Ininiã Pirato paniâtari sotatoakori noropatiniri Xesosi.

² Ininiã sotatoakori kamari saporîeta atoko inakari, kotipiaro kamakori. Ieretakari Xesosi kiiã. Auîtetxi mâka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

—Aâuîte —itxarina Xesosi inapetinina.

—Xoteo auîtekai pite —itxarina.

Ininiã iuasaaki iaritarina itoô.

⁴ Iuaikana Pirato sari mapara iuaikana Xoteoakori imisâkiretini ikapani.

—Hîtakaôtxikari. Hîtemoni nimirari iua, kotxi ninirekari himarotiniri, !napokari maerekati ikamakiti. ⁵ Ininiã Xesosi apoka mapara. Saporîeta kotipiaro kamakori ikiã, auîtetxi mâka pakini aua iuamoni. Ininiã Pirato txari:

—Hâtamatari iua.

⁶ Sasetotxi auîteakori, Teoso misâkiretiko aikoti nîkatakani pakini atamatakasaakiri, ninoa akiripoakata:

—Hôkariko iua. Hôkariko iua. Aamina îpiriâmitakari nopini hîtokakitariko —itxana.

Ininiã Pirato:

—Hîteka anikari. Hîteka okari iua aamina ïpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

—Akiomane sãkire paniãtari kãkiti iua atoko inakari okiko, kotxi iua sãkire: “Teoso ãkirirano nota,” itxa —itxana Xoteoakori Piratomoni.

⁸ Xoteoakori sãkire ikenakotakasaaki, apia pïkareta Pirato. ⁹ Ininiã iuaïkana ïroã kãkiti misiritiko imarotiko pakita ãki. Ipimaãri Xesosi:

—Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisãkiretinino? Pixinikariko ia nisãkire. Nota posotari nisikakini. Apaka nota posotari nokinii aamina ïpiriãmitakari nopini —itxa Pirato sãkire.

¹¹ Xesosi apakapapiretari:

—Kona pite auari posotiiiretxi pokinino ïkapani. Ikara inakari piposotiire auiniã, Teosonanira sikai ikara posotiiiretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ãkixinireẽ ixinikari:

—Kiatokopa atxiiti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitxaukauako. Iua sãkire: “Auïtetxi apiananiri nitxaua.” Sesanoka auïtetxi apiananiri —itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kapataa.” Iuaã auïtetxi iokanatar maerekati kamakari imisiritikomoni. ¹⁴ Iusaaki apaniãxiti takote. Iua õti Pãskoã kiiniriti potorikini õti apisa. Iusaaki Pirato txari Xoteoakorimoni:

—Hãtamata, hãuïte.

¹⁵ Ininiã iuaïkana ninoã akiripoakata:

—Piokanatariko ere. Piokanatariko ere. Hõkariko aamina ïpiriãmitakari nopini —itxana sasetotxi auïteakori.

Ininiã Pirato:

—Hinirekatari nokiniri hãuïte aamina ïpiriãmitakari nopini?

Ininiã ninoã:

—Ãtikara ate auïte. Sesanokara ate auïte —itxana ninoã.

¹⁶ Ininiã Pirato sikari Xesosi sotatoakorimoni aamina ïpiriãmitakari nopini okiko tïkane.

Xesosi Tokakitaãka Aamina Ïpiriãmitakari Nopini

(Mateo 27.32-44; Marko

15.21-32; Arókasi 23.26-43)

Ininiã anikarina Xesosi. ¹⁷ Xesosi anikari aamina ïpiriãmitakari iuaã okiko ïkapani. Isana ixirata “Kiitãtatxi” inakorimoni. Xoteo sãkireẽ, “Kõokota,” inakori.

¹⁸ Iuaã aamina ïpiriãmitakari nopini itokakitaãka Xesosi. Apaka ipi kiki tokakitaãka iua takote. Æti Xesosi kikomoni. Æti isanaremoni.

¹⁹ Pirato paniãtari iõkatsopari aamina ïpiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auïte.”

²⁰ Itomaneri Xoteoakori atatsopatari iua, kotxi Xesosi okikoãtaã sitatxi takote. Sitatxi sikani napaãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ïkapani. ²¹ Ininiã sasetotxi auïteakori txari Pirato:

—Kona piõkatsopatapiri, “Xoteoakori auïte.” Piõkatsopatariko iuanoka uãkatari Xoteoakori auïte ininiã —itxana.

²² Ininiã Pirato:

—Auape niökatsopatakiti. Kona iuaĩkana niökatsopatari —itxa Pirato.

²³Xesosi itokakitakana atoko, sotoakori kosekari Xesosi mǎka. Imatso-rakitarina. Imǎka mata imatsorakitana ninoa ipi ipi pakini apakapini ĩkapani. Āti sotato apakapari ipixini, āti sotato apakapari ipixini, itxaāpota. Xesosi mǎka, āti imǎka patapi auakari, !imatso-rakitana, kotxi iotsare !auari. Peerekari. ²⁴Sotatoakori itxakakana:

—Kona amatsorakitari ia. Sarauatxi atoko makama, imǎka anikakari aimarotini ĩkapani.

Ininiā iuasaaki Teoso sǎkire iökatsopatakori kitxakapirĩka iaõka apoka. Iua txari:

Ninoa xanakari nimǎka. Isarauatana nimǎka anikakari imarotnina ĩkapani.

Teoso sǎkire iaõka sotatoakori kama.

²⁵Iuasaaki aamina ĩpiriāmitakari takote oǎua Maria, Xesosi inoro oĩtarokata. Iuaā apaka oǎua Maria Matarena inakoro. Iuaā apaka oǎua āto Maria, Krópassi inakori ĩtanoro. ²⁶Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷Imoianaripekana itxa:

—Aroa pinoro otxaua.

Ininiā eereka iua anikaro oa apokomoni uakata oǎuini tĩkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸Eereka Xesosi imarotari iparĩka xipope. Ikinika Teoso sǎkire iökatsopatakori iaõka apokini ĩkapani, itxari:

—Niposonata.

²⁹Iuaātaā aua tiitxi. Iua tiitxi āki aua iāriā katxioāri. Ininiā iuasaaki iokomokarina mapoa atoko inakari

iāriāmoni. Aākeē itakarina, Xesosi namaā taka itxarina. Iua aāke isopo inakorike. ³⁰Iātaka atoko itxari:

—Ikinika niparĩka uatxapeka ixipopeka.

Inaāka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĩtiā

³¹Iua õti sesta veira, kǎkiti tomatiko õti apisa. Xoteo auĩteakori paniātari Pirato aamina ĩpiriāmitakariā auakani tapike kapatakiko, katima ipĩka ininina ĩkapani, iĩtona makatxakiko ĩkapani apaka. Tomatiko õtisaaki kona ninoa nirekari ipĩkari ĩto kaikotini iuaā.

³²Ininiā sotatoakori sari iuaā. Ikapatarina Xesosi takote auakani tapike.

³³Txamari sotato atamatakasaakiri Xesosi, !auaika. Ipĩpeka. Ininiākara kona ikapatakari itapike. ³⁴Sotato iorotari Xesosi itanapitaā iomĩtiā. Iuasaaki iarēka, āparaā pakini xiketa.

³⁵Notara itikari Xesosi ipinini, ininiā atāopitikara nisāpiretakiti. Nisāpiretari ikinika nitikakiti. Nimarotari nisǎkire atāo inini, ininiā nisāpiretai ia atatsopatanii, hĩte apaka auikiniri ĩkapani. ³⁶Teoso sǎkire iökatsopatakori kitxakapirĩka txari:

Kona ātika iua api !kapatakaāka.

Ininiākara kona Xesosi api kapatakaāka, Teoso sǎkire iökatsopatakori iaõka apokini ĩkapani. ³⁷Āti Teoso sǎkire iökatsopatakori txari:

Ninoa atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸Eereka Xosee, Arimateia sitatxitikiri, amanaāri Xesosi ĩto Piratomoni. Iua Xosee auikari Xesosi sǎkire, txamari ikipatari Xesosi sǎkire auikini, kotxi ipĩkari Xoteo auĩteakori.

Amanaākasaakiri Xesosi ïto, Pirato txari:

—Ari, panikari iua.

Ininiã Xosee anikari Xesosi ïto. ³⁹Iuasaaki imoianari Nikotemo inakori. Iua Nikotemo mitxipeka sari Xesosimoni ïkanõka imisäkiretiniri ïkapani. Iua moianatari Xosee, Xesosi ïto apakapakasaaki. Nikotemo anikari aätsopa aroesi inakori, miha inakori pakini ikoke Xesosi ïtoã taãkori tikane. Trïta sïko kiro pakini iua ikoke anika. ⁴⁰Ninoa ipi iapirikari Xesosi ïto mākaxi mataã ikokekata. Ikara atoko Xoteo kamari ipïkari ïtoã ikatiko apisa.

⁴¹Xesosi aamina ïpiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipïkari ïto takaãkapanika iuaã. ⁴²Iua akauari kona õtakori, ininiã itakarina Xesosi ïto iuaã, kotxi Xoteo tomatini õti apokanapanoka.

Akauariã Xesosi ïto Mauakani

(Mateo 28.1-8; Marko 16.1-8; Arõkasi 24.1-12)

20 Tomïko ïkanõkapanika, Maria Matarena sari akauarimoni. Oãpokasaaki, oãtamatarari akauari tore kai auïte kamakori makatxakapeëkaika. ²Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ïto makatxakaãka akauariã. Kona aimarotari namonireuako itakapirina —otxana.

³Ininiã Petro, ãti Xesosi moianarikata sari akauarimoni. ⁴Imitekana. Iua ãti Xesosi moianari miteka katimaritika, ininiã inapari Petro. Ininiã iua apoka Petro apisa. ⁵Iãka aariko ãki atamatini ïkapani. Atamatari mākaxi mata, ipïkari iapirikiko. Kona ïïroã. ⁶Iuasaaki Petro apoka iua tikini. ïïroã aariko ãki. Atamatari mākaxi mata. ⁷Atamatari

mākaxi mata, mitxi Xesosi kiiã iapirikiko. Iporiïmatataãka. Ikikomoni aua ãti mākaxi mata. Isanaremoni aua ãti mata. ⁸Ininiã iua mitxi apoãkari ïroã, atamata itxari. Ininiã aukari Maria sãkire. Iuasaakiia aukari Xesosi õkitikiniua. ⁹Iuasaaki ninoa kona iteene imarotapanikari Teoso sãkire iõkatsopatakori kitxakapirikari, kotxi Teoso sãkire sãpiretapekari Xesosi ipinini, eereka õkitikiniua. ¹⁰Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹Maria Matarena kaikota aariko iriko takote. Otxiapanãtakasaaki, amaãtiki opapïkakiita oiãkakiita aariko iriko ãki oãtamadini ïkapani. ¹²Oãtamatana ipi Teoso nitiriakori iaxitikini. Imãkana kasarori. Iitopãkana mitxi Xesosi ïto auiniãtaã. ãti mitxi Xesosi kii auiniãtaã, ãti mitxi ikiti auiniãtaã. ¹³Itxarona:

—Kinirepa pitxiapanãta? —itxana.

Ininiã oa:

—Imaktxakaãka niauïte ïto. Kona ni-marotari ïto takikoãtaã —otxana.

¹⁴Iuasaaki oporikimoni osapotorika. Oãtamatarari Xesosi, txamari !oimarotari.

¹⁵Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nïkatakari ininiua. Ininiã otxari:

—Pite makatxakiniãri iua ïto, ininiã pisãpiretano ïto pitakiniãtaã. Ininiã nanikariko ãtiãtaã —otxari.

¹⁶Ininiã Xesosi txaro:

—Maria.

Ininiã okirioka iuamoni. Otxari osãkireë:

—Haponii.

Popïkari sãkireë, “Noereëkiri,” otxa.

¹⁷ Ininiã Xesosi txaro:

—Kona pimaãtakapeno, kotxi niri-moni kona nisapanika. Pisa nitariako-romoni. Pitxanako: “Nota sariko niri-moni, hite iritxikana apaka. Nisariko ni-Teosonemoni, hiTeosonetxikana apaka,” itxa.

¹⁸ Ininiã Maria Matarena sari Xesosi moianariakorimoni:

—Natamatapekari aãuïte —otxana.

Ininiã osãpiretana ikinika Xesosi sãkire.

Xesosi Oerekaua Imoianariakorimoni

(Mateo 28.16-20; Marko 16.14-18; Arókasi 24.36-49)

¹⁹ Iua Tomiko ìkanòkati Xesosi moianariakori apotiitaua. Iuasaaki itotarina ikinika aapokotxi tore, kotxi ipìkana Xoteo auïteakori. Iuasaaki Xesosi tokiã aapokotxi ãki ninoa sauaki.

—Erekaxinire hìtxako —itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiã Xesosi atamatakasaakina, imoianariakori iteene poxokoniyata. ²¹ Iuaikana Xesosi txana:

—Erekaxinire hìtxako. Niri iokanatinino atokotxikana, niokanatai hite niri nireëkiti hikamini ikapani.

²² Iuasaaki ixòkana. Itxana:

—Hãpakapariko Erekari Mata-matakoti. ²³ Apakata pisãpiretiniri nota sãkire auiãkari, imaerekani makatxakaãkapeka. Apakata pisãpiretiniri nota sãkire mauikani, imaerekani ìmakatxakaãka —itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakiaua, Tomee Txítximo inakori kona aua ninoakata. ²⁵ Ininiã apanakini sãpiretari Tomee:

—Ate aòkitari Xesosi —itxana.

Ininiã iua:

—Iuako karo nimatamatakaniã, iuako karo nimakaaiakakaniã niuakokiã, kona nauikari hite sãkire. Itanapita karo nimakaaiakakaniã, kona nauikari hīsãkire —itxa Tomee.

²⁶ Ìti semanati napaka atoko, Xesosi moianariakori apotiitaua iuaikana aapokotxi ãki. Iuasaaki Tomee aua ninoakata. Aapokotxi tore itotaãka, iuaritika Xesosi tokiã ninoamoni:

—Erekaxinire hìtxako —itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiã nitokakitiko karoã. Nitanapita iorotikomoni pitakari piuakoki. Kona mauikaretika ìpitxape. Pauikariko nisãkire —itxari.

²⁸ Ininiã:

—Niauíte, niTeosone —itxa Tomee.

²⁹ Ininiã Xesosi:

—Uatxa pite auikari auãki ninini, kotxi patamatano. Kãkiti nota maòkitakani auikiniãri nisãkire, apakapariko apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iòkatsopataãka ia iòkatsopariã. ³¹ Ia niòkatsopata Xesosi Teoso mereëkiti, Teoso ãkiri ininiua hãuikini ikapani. Ikara atoko hãuikiniã, hãuapininiika hìtxako Xesosi posotiireë.

Xesosi Oerekaua Setxi Imoianariakorimoni

21 Ìti òti Xesosi oerekaua iuaikana imoianariakorimoni ipoa Txiperiatxi inakori tiniã. Ia atoko iua oerekaua:

² Iuaã aua Simão Petro. Iuakata aua Tomee Txítximo inakori. Natanaeo, Kanaa aapokotxitikiri, Kariréia tōpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³ Simão Petro txana:

—Nota okatsaātako —itxa.

Ininiã apanakini:

—Ari, ate apaka okatsaātako pitekata —itxana. Ininiã isana. Kanauaã iereë-tauana. Īkanōka okatsaātana, txamari !imaīkarina ximaki. ⁴ Īkanōkapanika Xesosi ikipatxitemoni tīpokonāta, txamari !imarotarina Xesosi iuaã auini.

⁵ Xesosi akiritana:

—Namariteakori, kaiomaāi ereē? —itxana.

—Kona kaiomaãua —itxarina.

⁶ Ininiã Xesosi paniātana:

—Hītakariko hetxi hīkikomoni. Ereē hāpokariko ximaki —itxa Xesosi.

Ininiã ninoa okari hetxi ikikomoni. Eereka kona iposotaikarina ikosekinirina hetxi kanaua āki, ximaki itori imaīkinina xika. ⁷ Xesosi moianari itiretakiti txari Petromoni:

—Aãuitekara.

Ikara inakari sākiretxiti ikenakotakasaaki, Petro ieretakari imāka, mitxi imaktxakakiti, oka itxaua ipoamoni Xesosimoni isini ĩkapani. ⁸ Apanakini kanauaã ina. Ikosekaāpotarina hetxi. Iuasaaki ximaki xāpoka hetxiã. Itakoã !itakori, atxiīti seī metronoka. ⁹ Ikanīkiitakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaīkakiti mapake.

¹¹ Ininiã Petro kosekari hetxi imiriī. Xāpoākata ximaki. Sētosikoēta tres ximaki mitapoakari aua. Kaiāpopokori ximaki, iuaritika hetxi kona tsorakita.

¹² Xesosi akiritana:

—Uai hina. Manipokota.

Kona ātika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara ōti apisapanika, Xesosi ipinaka atoko, ōkitikaua atoko, oerekapekaua ipikata imoianariakorimoni.

Xesosi Misākiretari Petro

¹⁵ Inipokotaka atoko Xesosi pimaāri Simão Petro:

—Simão, Xonasi ākiri, kipa apiata tiretano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisākire soti auīte anaakorimoni, ninakitiakorimoni.

¹⁶ Iuaīkana ipimaāri:

—Simão, Xonasi ākiri, atāo pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Pinīkatana soti auīte, ninakitiakori —itxa Xesosi.

¹⁷ Iuaīkana ipimaāri:

—Simão, Xonasi ākiri, pitiretatano nota?

Ininiã Petro matinaniuata ixinireē, kotxi Xesosi pimaāri ipi āti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisākire soti auīte ninakitiakorimoni. ¹⁸ Atāo nitxai. Ātokoripatika pinakasaaki, piteka pieremākataua. Pisari pinirekinimoni. Kiomātxi pinakasaaki, pitamēkakanoketauako, ininiã āti ieremākatai. Eereka anikai pimanirekakanimoni —itxa Xesosi.

¹⁹ Ikara atoko Xesosi sākire, kotxi ikara atoko itxako Petro ipinini. Petro

ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

—Pikapokitano nota. Ninireëkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoa kiiniritisaaki. Iuasaaki ipimaãri Xesosi: “Ni-auĩte, kiripa mikapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²² Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari

piteka kaminiri nota nireëkiti —itxa Xesosi.

²³ Ininiã iaripireta Xesosi sãkire auiãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopatarika makiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti !kaiõkatikopanikari. Ikinika niõkatsopatiniã, !apakata, kotxi itixi kona apakata kaiãopokori aãtsopa auini.

ÁTOSI

Xesosi Iokanatakini Kamakiti Pirena

Xesosi Kanapiriini Iaxiti

1 Ereëkai Teópiro, Teoso tiretakari. Merepitipanika niókatsopatakiti aátsopaã txari ikinipoko Xesosi kamakiti, isápiretakiti pakini. ²Niókatsopatakiti mapotókire auari Xesosi iaxiti sini pirena. Isini apisa isápiretana iokanatakini Erekar Matamatakoti paniãtakiti.

³Ipinaãka atoko iuaĩkana iuaka oerekaua ninoamoni, ininiã imarotarina atãopitika iua òkitikapekaua. Koarëta pakini òti iua auanãta ninoakata. Iuusaaki isápiretana Teoso auĩtetxi ininiãua pirena. ⁴Imakinika apotiitakasaakia itxana ninoa:

—Kona hĩtakanapapiri Xerosareë sitatxiti. Aĩri iaxitikiri iokanaenetakiti hiãtapako. Iua mitxi hĩtemoni nisápiretakiti. ⁵Atãopitikara Xoõoni patxisatai hĩte ãparaã. Mapaõti napaka atoko, Erekar Matamatakoti apokako hĩtemoni. Iuusaaki hĩpatxisataãkako Erekar Matamatakotiã —itxa Xesosi sãkire.

⁶Ininiã imoianariakori apotiitakasaakia Xesosikata, ipimaãrina iua:

—Aãuĩte, uatxa iuaĩkana pisikataritaxine atemoni, Isaeo apika mekaniri-akorimoni? —itxarina.

⁷Ininiã Xesosi txana ninoa:

—Kona hĩte imarotiniri ikapanini. Aĩrinanira imarotapaniri hĩte tixine hĩtemoni isikini òti. ⁸Erekar Matamatakoti apokasaakirako hĩtemoni, hãpakapariko posotiiretxi. Ininiã hĩte nota kamakiti atamatakani hĩtxauako. Hĩsápiretariko hĩtiãkiti, himarotakiti pakini Xerosareë sitatxiti auakanimoni, imakinika Xotéia tãpa auakanimoni, Samaria tãpa

auakanimoni, ikini itixiti auakanimoni pakini hĩsápireãpotariko —itxa Xesosi ninoamoni.

⁹Ikara atoko inaãka atoko, ninoa okiã atamatar iua anikiko iaxiti. Katxiãri ãki isa, ininiã kona ninoa itikaikari. ¹⁰Iaxiti ionakaãtakasaakina, apoka ipi kiki kat-sopiri mãkatakani ninoa takote. ¹¹Ninoa txana:

—Kiki Kariréiakini, kinirepa hionakanãta iaxiti? Īkora Xesosi iaxiti sikari, isini atoktxikana ikanapiriini —itxana ninoa.

Itanokiri Koaã Apotiitakaniaua

¹²Ininiã Oriva xirataãtaã ipotorikana. Ikanapiriãna. Xerosareëmoni isana. Oriva kona òtakori. Kãkiti Oriva xirata potorikakani sini Xerosareëmoni tako atokokanera Xoteo kiomaneakorini auiritari kãkiti sini tomatiko òtisaaki.

¹³Xerosareë sitatxiti apokasaakina, iĩroãna aapokotxi ãki. Ininiã isana itanokiri koaã. Petroma, Xoãoma, Txiakoma, Ætreema, Piripima, Tomeema, Patoromeoma, Mateoma, Txiakoma (Aoepo ãkiri), Simãoma (Homano omanatakari), Xotasima (ãti Txiako itari) pakini aua iuaãtaã.

¹⁴Ãtipirika ninoa apotiitaua Teoso imisãkiretinina ikapani. Apaka sitoakoro Xesosi sãkire auiãkani, Maria Xesosi inoro, Xesosi itariakori pakini apotiitaua ninoakata. Ninoa misãkiretakasaakiri Teoso, ãtika kãkiti xinirenoka atoko itxana. Ininiã erekarinoka auana ninoamoni. Kona omanatakakauana.

Matxia Mereĩko Pirena

¹⁵Iuusaaki sëtovĩtxi pakini Xesosi sãkire auiãkani aua. Petro òkitikaua ninoa sauaki. ¹⁶Ininiã itxa:

—Nitariakori, hĩtakaõtxikari Teoso sãkire kitxakapirĩka Taviimoni isápiretakiti. Tavii iókatsopatar

Xotasini pirena, Xesosi maikakani oerekakari pirena, kotxi Erekarí Matamatakoti kamaimaroretari iua Tavii. Atão ikara Teoso sãkire kitxakapiríkari apokapeka uatxa. ¹⁷Iua Xotasini atekata auakari iua. Ate paríka atoko ikama.

¹⁸—Iuaritika isikari Xesosi imokaiakariakorimoni. Txineiro apakapakitoã iamotaãka itixi. Iuaã ipípe. Itano okaua. Ixiti apokasaaki, iokirikiita. Ixoreka itikako. Iuasaaki itikapitsa poãpekatani. ¹⁹Imakinika Xerosareẽ auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popíkari akiritari “Arẽkatxi Tixini.”

²⁰—Xikari iõkatsopatakoríã iõkatsopatapeẽkaika ia Xotasi pirena: Iua aapoko takanapaãkako. Kona auir-itaãka kãkiti auini iuaãtaã. Iparíka sikaãkako ãtimoni,

itxa Teoso sãkire.

²¹—Ininiã amereẽriko ãti kiki atekata sikari tĩkane. Amereẽriko kiki mitxi Xesosikata sikari, mitxi amoiari ikiniõtika Xesosikata aãuakasaaki. ²²Amereẽriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereẽkiti Xesosi õkitikiniua imarotakari ate atoko inakari —itxa Petro.

²³Ininiã imereẽrina ipi kiki, Xosee Pasapasi inakori. Apanakini akiritari iua Xósite. ãti kiki uãka Matxia inakori.

²⁴Iposo atoko imisãkiretarina Teoso:

—Pite imarotari ikinimane kãkiti ãkixinire. Poerekaua ikiripa naia kiki pimereẽkiti ²⁵atekata paríkauatakari tĩkane, Xesosi iokanatakiti tĩkane, kotxi Xotasini takanapari ikara paríkaxi imaerekani xika, maerekani misiritikoãtaã isini ikapani —itxana Teosomoni.

²⁶Iposo atoko ikamarina sarauatxi atoko inakari imoiararina imarotiniã ikapani. Ikara atoko ininiã, imereẽrina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

Pẽtekósitxi Kiiniriti Õti

2 Pẽtekósitxi kiiniriti õti (takari merepitipanika nikiko õti) apokasaaki, Xesosi sãkire auíãkani ãtika kãkiti xinire atoko itxauana. Imakinika apotiitauana. ²Katimaritika iaxiti ikari kataparari itimati atoko inakari xãpoka aapokotxi ãki Xesosi moianariakori topãkiniãtaã. ³Ininiã iuasaaki xamina tirika atoko inakari tokiã. Imakinikana ikiiãna apoka. ⁴Erekari Matamatakoti iroã ikinika ãkixinireẽ. Iuasaakipeka ninoa sãkirauata ãti uãka sãkireẽ, kotxi Erekarí Matamatakoti kamaimaroretana.

⁵Iuasaaki Xerosareẽ sitatxitiã auanãta ikini uãkati kãkiti Xoteokori. Ninoa Teoso sãkire kípitanika. ⁶Ikenakotakasaakirina iaxiti ikari itima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireãna. ⁷Itsoríkaãtana:

—Kiãtokopa ininiãpa imarotatarina ate sãkire. Hãtamatana, Kariréiakinkara sãkirauanãta ateka sãkireẽ. ⁸Kiãtokopa itxa akenakotiniri ateka sãkire? —itxana ninoa.

⁹Iuaãtaã auari kaiãopokori kãkiti ãti uãka. Auari Patxiakinima, Métxiakinima, Erãokinima, Mesopotámiakinima, Xotéiakinima, Kapatósiakinima, Põtokinima, Ásiakinima, ¹⁰Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakini atão Xoteokori. Apanakini mamakaua, ininiã Xoteo itxapekauana.

¹¹ Kretakinima, Arápiakinima pakini aua iuaã.

Ininiã ninoa txa:

—Ate kenakotari Kariréiakini sákirauatini ateka sákireë. Isápiretarina ikinipoko erekari Teoso Apiananiri kamakiti —itxana.

¹² Ininiã ninoa tsoríkaãta. !Imarotarina.

—Natokopa itxana imarotirinina ate sákire? —itxana.

¹³ Apanakini kákiti napetana:

—Poátakanira ninoa —itxana.

Petro Apakapapiretakiti Kákitimoni

¹⁴ Iuasaaki Petro, ôsi Xesosi iokanatakinikata misákiretana iuaã apotiitakanuia. Itxari:

—Xotéia auakanii, ikinika Xerosareë sitatxiti auakanii, hítakaótxikariko nisákire himarotini íkapani.

¹⁵ Híuãkatana naia kikiakori poátini. Kona ipoátana, kotxi atokatxi inaãpotapanika. ¹⁶ Ia uatxa hãtamatakiti kitxakapiríka Teoso sápiretapekari Xoeomoni. Iua Xoeo Teoso sákire sápiretakari sápiretapekaua. Iua txari:

¹⁷ Teoso txari: “Xipokatxi ôti iatokopeka inakasaaki, niokanatari Erekari Matamatakoti ikini kákitimoni. Pamariteakori sápiretariko nisákire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iuasaaki nisákire nisápiretana. Kíomãtxiakori taponetariko nota oerekakiti. Iuasaaki nisápiretariko nisákire ninoamoni.

¹⁸ Íkora ôtisaaki ninitiriakori, niniteroakoro pakinimoni niokanatari Erekari Matamatakoti. Ninoa sápiretariko nisákire.

¹⁹ Iaxiti noerekariko niposotiire kákiti mimarotakiniti. Íkorapokoriti apaka noerekariko niposotiire

Apiananiri nininiuua imarotininina íkapani. Arékatxi, xamina, katxiári pakini apokako.

²⁰ Atokatxi piákako. Kasiri arékatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini ôti. Íkora ôti apiatakari, kotxi iuasaaki Apiananiri oerekauako kákitimoni.

²¹ Ininiã Apiananiri akiritakani makatx-akaãkako imapinakani íkapani,” itxa Apiananiri Xoeomoni.

²² Petro sákirauatapanika:

—Kákiti, Isaeokini, híkenakotariko nisákire. Híte apisatoõ Teoso oerekapekari Xesosi, Nasaree sitatxitikiri. Teoso mereékiti itxaua, kotxi ikamari Teoso posotiire kákiti mimarotakiniti Teoso himarotini íkapani. Himarotapekari ikara. ²³ Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini ôti. Hítekara, apanakini maerekati kamakanikata maíkari Xesosi. Aamina ípiriãmitakari nopini hítokakitari, oka hítxapiri iuani.

²⁴ Iuaritika ipinaka atoko, iuaíkana Teoso ôkitikari iua. Teoso sikakari iua ipíkitxi mamisiritakaniri íkapani. Ipíkitxi !iposotari ixipokiniri iua, kotxi Apiananiri itxaua.

²⁵ —Kítxakapiríka Tavii sápiretari Xesosi pirena. Itxari:

Nota itikapikari Apiananiri nota apisatoõ. Iua aua nikikomoni. Ininiã !nimakatxaãka.

²⁶ Ininiã nixinire poxokoniuatapeka itxa. Nisákire poxokoni apaka aua. Niíto auáki inakasaaki, iãtapari Teoso sikaenetakiti.

²⁷ Apiananiri kona takanapano nota ipíkani auiniãtaã. Apiananiri !aur-itano Erekari Kamakari paikini.

²⁸ Apiananiri oerekepekano mapīkani kimaporite. Iua notakata aua, ininiā nipoxokoniuaata, itxa Xesosi Taviimoni kitxakapirīka.

²⁹ Ininiā Petro sākirauatapanika:

—Kikiakori, hāuiritano nisāpiretiniri Tavii pirena. Tavii anirimane kitxakapirīka auakari. Iuani ipīpe, ikatapeēka. Uatxa atemoni auapanika iua akauare. ³⁰ Iua Teoso sākire sāpiretakari. Atāo iua imarotari Teoso sākire. Teoso sāpiretakekari iua apika mekani Teoso mereēkiti itxauako. Tavii imarotari Teoso mereēkiti ōkitikaākapanikako auītetxi ininiua tīkane. Teoso sāpiretari imereēkiti topāka auītetxi itopanere nopini. Ininiā atāo auītetxi itxaua.

³¹ —Tavii imarotari ikara atoko inakari Xesosi apokini apisapanika, kotxi iōkatsopitari Xesosi ipinini pirena, iuaīkana ōkitikiniua pirena apaka. Iua txari: Ipīkani auiniātaā !ikaikota. Iito lipaiaka, itxa Tavii kitxakapirīka.

³² —Iua Xesosi ipinaka atoko, Teoso ōkitikari iua. Ate amakinika Xesosi ōkitikiniua itakakani atxaua. ³³ Ininiā uatxa iua Xesosi topāka Teoso kikomoni. Ikara atoko Xesosi Apiananiri itxaua. Apakapari Erekarī Matamatakoti, Teoso sikaenetakiti. Iposo atoko, iokanatarī Erekarī Matamatakoti atemoni. Iuakara uatxa hātamata ikamakiti. Hīkenakotari iua sākire uatxa.

³⁴ —Tavii !isari iaxiti auītetxi ininiua ikapani, iuaritika iōkatsopitari: Apiananiri misākiretari niauīte: “Nota kikomoni piitopākiniritika ³⁵ nixipokariko pimokaiakariakori. Nika-mariko ninoa pikiti pitakiniātaā atoko ininiua,” Apiananiri txari niauīte.

³⁶ —Ininiā Isaeo auakanii, himarotariko ia. Hīte okari Xesosi, iuaritika Teoso kamari iua auītetxi ininiua. Teoso mereēkiti itxaua —itxa Petro.

³⁷ Iuasaaki Petro sākire ikenakotakasaakina, ākixinireēna tsiūtxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

³⁸ Petro apakapapiretana:

—Himaerekani hītakanapa. Hīte imakinika hīpatxisataākako Xesosi Kristo uākaā, ininiā Teoso makatxakari himaerekani. Iuasaakiko hāpakapari Erekarī Matamatakoti Teoso sikakiti. ³⁹ Kotxi ikara Teoso sikaenetakiti hīte ikapani, hamarite ikapani, apanakini ōtako auakani apaka ikapani. Ikara Teoso sikaenetakiti ikinimane kākiti Teoso akiritakini ikapani —itxa Petro.

⁴⁰ Petro iteene ōtākikana ninoa, kotxi inirekari atāo ikaminina, ininiā itokata ōtākikana ia atoko:

—Īkorapokoriti auakani maerekati kamakani itxauana. Himakatxakaua. Hītakanapariko himaerekani. Hāuikariko Xesosi sākire —Petro txana ninoa.

⁴¹ Īkora ōti, tres mio kākiti ipoxokoniritikana auikari Petro sāpiretakiti. Iuasaaki ipatxisataākana.

Xesosi Sākire Auiākani Moianatakakiniua

⁴² Eereka ikiniōtika apaiaōkarina Xesosi iokanatakini oerekakiti. Ātipirika itiretakakauana. Ātipirika ikamarina kiiniri komiri imapixinikinina Xesosi ipinini ixinikinina ikapani. Ātipirika imisākiretarina Teoso. ⁴³ Ikinimane tsorīkaānāta, kotxi Xesosi iokanatakini kamari ito posotiiretxi kākiti mimarotakiniti, apanakini Teoso imarotini ikapani.

⁴⁴ Teoso sākire auiākani apotiitapikaua. Ninoa xanakari ikinika inakitina. ⁴⁵ Ivētixitarina itiina, ininiā tiitxi īki isikana matxineirotenimoni. ⁴⁶ Ikiniōtika aiko āki Teoso misākiretikoātaā apotiitapikauana.

Ninoa aapoko āki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ĭkapani. Ākixinirena erekapitikari.⁴⁷ Ixikarauatana Teoso ĭkapani. Imakinika kākiti apokaerekatana ninoa. Ininiā ikiniōtika Teoso makatxakari kākiti maerekani. Ininiā Teoso sākire auiākani apiaāpota.

Petro, Matĭpokotakati Pakini

3 Āti ōti mapiātiki Petro, Xoāo pakini sari Teoso misākiretiko aikotimoni Teoso imisākiretinina ĭkapani.² Iuasaaki ikiniōtika kākiti anikari matĭpokotakati Teoso misākiretiko aikoti toremoni. Itore uāka “Peereri.” Iuaā matĭpokotakati amanaāri txineiro iuaā napakanimoni. Iponaniākasaaki matĭpokotakati itxaua iua.³ Ininiā Petro, Xoāo pakini ĭroākasaaki, iua amanaāri txineiro:

—Txineiro hĭsikano —itxa.

⁴ Ininiā Petro, Xoāo apaka atamatari iua. Ininiā Petro txari:

—Patamataua.

⁵ Ininiā iua matĭkati atamatana nino. Iuākatari txineiro isikinina iuamoni.⁶ Ininiā Petro:

—Kona auari txineiro atemoni. Kona pirata aua atemoni. Oro apaka !uari. Iuaritika nota auakiti nisikapitikai. Xesosi, Teoso mereĕkiti, Nasareekiri, iua uākaā pōkitikauako. Pitĭpokotako — Petro txari iuamoni.

⁷ Ininiā Petro maĭkari iuako ikikomnikiri ōkitikiniua ĭkapani. Iuasaakipeka ikiti, ikitinota pakini kataparapeka itxa.⁸ Ininiā okakataua, tĭpokota itxa. ĭroā Petro, Xoāo pakinikata Teoso misākiretiko aikoti āki. ĭroākasaaki, okaāpokataua. Itĭpokoāpokata.

—Ari, peerekari Teoso —itxanāta.

⁹ Ikinimane itikari iua tĭpokotini. Ikenakotari ixikarauatini Teosomoni.

¹⁰ Ikinimane imarotari iua kiki aiko ĭronakikoōtaā “Peereri” inakoriātaā topākanātakari, txineiro amanaānātakari iua. Ininiā ninoa:

—Anekani. Kiripa atxiiti? Mitxi matĭpokotakati. Uatxa itĭpokotape. Kanatokopa itxa? —itxana.

Petro Sāpiretakiti Kākitimoni

¹¹ Apanakini kenakopiretana ninoa, ininiā imitekana ninoamoni matĭpokotakati pirena imarotinina ĭkapani. Iuasaaki ninoa auiniātaā akiritaāka “Saromāo pakita.” Iuaā Petro, Xoāo pakini aua mitxi matĭpokotakatikata. Iua maĭkakanokeāpotana Petro, Xoāo pakini.¹² Iua Petro atapana kākiti ninoamoni ĭkani. Itxana:

—Isaeo auakanii, kinirepa hĭte tikoka ere kiki tĭpokotini hātamatakasaaki? Kinirepa hĭte itikaua ate? Na ate posotiireēni kamari iua tĭpokotini. Ate ereka anini kona kamari iua tĭpokotini.¹³ Apraāoni, Isakini, Xakooni pakini Teosone, aĭriakorini kitxakapirĭkarini Teosone, iuara oerekepekaua imi Xesosi ereka inini. Teoso ākiripitikara itxaua. Iua posotiire auapitika. Iuakara hĭsika okiko ĭkapani. Eereka Pirato inakori nirekasaakiri isikakiniri. Hĭte !nirekari iua sikakiniri Xesosi.¹⁴ Iuasaaki hĭte kona nirekari erekarinoka kamakari. !Hĭnĭrekari iua atāo inakarinoka kamakari. Hĭte amanaāri Pirato isikakiniri kokaniri hĭtemoni.¹⁵ Ininiākara hĭte okapiri kākiti auāki inini kamakari. Iuaritika ipĭkani sauaki Teoso ōkitikari iua. Ate itikari atāopitikara iua ōkitikiniri.

¹⁶ —Ia kiki hĭtikakiti himarotakiti kataparapeka itxa, kotxi iua auikari Xesosi posotiire. Iua auikari Xesosi sākire erekepeka inini ĭkapani. Hātamataru hĭte apisatoō iua ereka inini.

¹⁷ —Ininiā uatxa nitariakori, nimarotari hĭte, hĭte auĭteakori pakini

okapiri Xesosi atão himimarotakani xika. ¹⁸Kitxakapiríka Teoso sákire sápiretakani oerekapekua Kristo misiritiko. Ikara imisiritiko auapeka. ¹⁹Ikara atoko ininiã, hítakanapariko himaerekani. Erekarí kimaporiti hinitako, ininiã Teoso makatxakari himaerekani. ²⁰Iusaaki Apiananiri kamapoxokonitai. Isikataparatai. Iusaaki iua iokanatarí Xesosi imereékiti hitemoni. ²¹Merepanika iua Xesosi kaikota iaxiti. Teoso kamariko imakinika amaneri. Iusaaki Xesosi apoka iuaíkana. Iua atokokana itxana Teoso sákire sápiretakani kitxakapiríka.

²²Kitxakapiríka Moisesi txari: Apiananiri híTeosone iokanatariko isákire sápiretakari hitemoni nota iokanatiní atokokana. Hinirimane itxaua iua. Híkenakotariko ikinika isápiretakiti hitemoni.

²³Ikinimane iua sákire makenakotakati xipokaákako.

²⁴—Teoso sákire sápiretakari Samoeo inakori, eereka ikinikana Teoso sákire sápiretakani pakini sápiretapekari Teoso iokanatiniri imereékiti kákitimoni íkorasaaki. ²⁵Teoso sákire sápiretakani anaakorirai híte, ininiákara isákire ninoamoni, iuatxikana isákire hitemoni uatxa. Itxari Apraãoni:

Áti pimekaniri sikariko erekari ikini itixiti auakanimoni,

itxa Teoso. Ininiã ikara Teoso sikaenetakiti híkiomaneakorinimoni, hitemoni apaka isikaeneta. ²⁶Ininiã Teoso iokanatarí iua ákiri Xesosi hitemoni merepitipanika. Iokanatarí iua hitemoni erekari hitemoni isikini íkapani, himaerekani hítakanapini íkapani —itxa Petro.

Petro, Xoão Pakini Xoteo Auíteakori Apisatoõ

4 Petro, Xoão pakini sákirauatapanika kákitimoni inakasaaki, sasetotx-

iakori, Teoso misákiretiko aikoti níkatakari, satoseoakori pakini apoka ninoamoni. ²Ininiã ninoa naiataua, kotxi Petro, Xoão pakini sápiretari kákiti ipíkani ókitikiniua pirena, kotxi ninoa txari:

—Xesosi ipinaka atoko, iuaíkana iua ókitikaua, ininiã ipíkani ókitikauako.

³Ininiákara ninoa maíkana Xoão, Petro pakini. Iusaaki mapiánikata, ininiã itakana kateia áki íkanõka iuaã inapinina íkapani. ⁴Iuaritika itomaneri Petro sákire kenakotakani auikapiretari iua sákire. Síko mio kikiakori aukari Teoso sákire Petro sápiretakiti.

⁵Katimatínikata Xoteo auíteakori, kiomátxiakori, kaiókatsoपरeriakori pakini apotiimanetaua Xerosareẽ.

⁶Sasetotxiakori auíte apiatakari Anasi inakori iuaã aua. Inirimane Kaipasi inakori, Xoão inakori, Arexãtri inakori pakini aua iuaã apanakini sasetotxiakori auíte nirimaneakata. ⁷Xoão, Petro pakini minaãka ninoa apisatoõ. Ipimaãrina:

—Kiposotiireëpa hókitikari matípokotakati? —itxana.

⁸Erekarí Matamatakoti moianatarí Petro. Ininiã iua txana ninoa:

—Aáuíteakori, akiomaneakori,

⁹hinirekarí asápiretinii uatxa erekari akamakiti matíkatimoni. Hinirekarí himarotiniri erekapeka inini. ¹⁰Ininiã ikinika híte, ikinika Isaeo tixini auakani apaka, himarotariko ia. Xesosi Nasareekiri posotiireëra ia kiki híte apisatoõ timakari makananitaãka. Iuara híte oka aamina ípiriãmitakari nopini. Iuara Teoso ókitika iuaíkana ipíkani sauaki. ¹¹Kitxakapiríka Teoso sákire iókatsoपatakori sápiretari Xesosi híte manirekakani, kotxi itxari:

Kai aapokotxi kamakanii, !hinirekarí áti kai soro. Iua kai himanirekakiniti apiari itxapekua. Apanakini kai soro maíkakari itxaua.

¹²—Xesosinokara makatxakari kāk-iti maerekani. Kona āti maerekanitxi makatxakakari !auari ikini itixiti. Teoso sikari iuanokara kākitimoni imaerekani imaktxakini ikapani —itxa Petro.

¹³Ninoa tsorikaānātana Petro sākire ikenakotakasaakina, kotxi Petro, Xoão pakini sākirauata itaparaxinireritika. Mitxi kona ninoa apaiaōkarauata, iuaritika ninoa imarotari atāo isākirauatini. Ninoa xinikari:

—Ixi. Ninoa minakani. Iuaritika kīkitena, kotxi Xesosi moianariakori itxauana —itxana.

¹⁴Ininiā !kasākirena, kotxi matīkati tīpokotapeka ninoa apisatoō. ¹⁵Ininiā ipaniātana Petro, Xoão pakini mapara isinina, ninoa auītetxiakori ininimoni-uana isākirauatinina ikapani. ¹⁶Ininiā auītetxiakori txari:

—Kanatokopa atxatana ninoa? Kotxi ikinimane Xerosareē auakani imarotari itxīkitakinirina matīkati erekape inini. Atāopitikara ninoa kamari posotiiretxi. !Aposotari akipatiniri ia sākiretxiti, kotxi ikinipoko imarotapekari matīkati tīpokotini. ¹⁷Kona anirekari ikara pirena apikomoni iaripiretini kākiti sauaki. Ininiā atxanako ninoa: “Na apikomoni Xesosi pirena hisāpiretapinikariko.”

¹⁸Ininiā iuaīkana akiritana. Eereka itxana:

—Kona hisāpiretapinikariko apikomoni Xesosi pirena. Kona hōerekapiriko iuaīkana Xesosi pirena —itxana.

¹⁹Ininiā Petro, Xoão pakini apakapapiretana:

—Kiripa atāo akīpitini? Hītekani? Teosokani? Kipa erekari? Hīte mereēri. ²⁰Kona aposotari atakanapiniri asāpiretiniri ātikakiti, akenakotakiti pakini —itxana.

²¹Ininiā iuaīkana auītetxiakori txitana. Iposo atoko auiritana isinina, kotxi

maerekati !ikamana. !Imisiritana, kotxi ipīkarina kākiti. Ikinimane kākiti txari:

—Peerekari Teoso kamakiti matīkati ikapani —itxana.

²²Ikora kiki makananitakori koarēta anope iusaaki.

Xesosi Sākire Auiākani Misākiretiniri Teoso

²³Xoão, Petro pakini sikakikosaaki, ninoa kanapiriā imoianariakorimoni. Ikinika sasetotxi auīteakori sākire, kiomātxiakori sākire pakini ikinika isāpiretana. ²⁴Ikara ikenakotakasaakina, ikinikana misākiretari Teoso. Ininiā itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani, potxoari uiniti auakani pakini pikama. ²⁵Kitxakapiriā Erekari Matamatakoti kamaimaroretari pinitiri aātokiri Tavii. Ininiā itxari:

Kinirepa kākiti Teoso manirekaākani omanākarauata? Kinirepa kākiti maxikatiika xinikari maerekati ikamini ātimoni?

²⁶Auītetxiakori apotiitaua neenamatzikaminina ikapani. Ninoa apotiitaua Apiananiri inaiatinina ikapani, imereēkiti apaka inaiatinina ikapani,

itxa Tavii.

²⁷—Atāopitikara Erotxi, Pōsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiā. Isākirauatana pamarite Xesosi okinina ikapani. Txamari pite mereēri iua erekarinoka kamakari.

²⁸Mitxi pite imarotari imakinika ninoa kamakiti tīkane. Kākiti kamari pinirekakiti, kotxi kaposotiirei.

²⁹Ininiā aāuīte, pixinikariko ikara maerekapiretati. Pisikataparaxiniretatau ate pinitiriakorieu pisākire asāpiretini

íkapani. ³⁰Pamarite erekari kamakari Xesosi posotiireē pimakananitanako amianatakani. Kākiti maposotakiniti pikamako. Posotiiretxi pikamako pisākire aōerekini íkapani. Ikara pikamako pamarite Xesosi posotiireē —itxana ninoa Teosomoni.

³¹Teoso imisākiretaākana atoko, ninoa apotiitiniātaāua iakeka. Erekari Matamatakoti apoka ikinimanemoni. Ininiā itaparaxinireritikana isāpiretarina Teoso sākire kākitimoni.

Teoso Sākire Auiākani Moianatari Itariakori

³²Ikinika Teoso sākire auiākani ātika kākiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³Xesosi iokanatakini itaparaxinireritikana txari ikinimanemoni:

—Xesosi Apiananiri iuaikana ōkitikaua ipinaka atoko. Ate imarotari, kotxi ate aōkitari iua ipinaka atoko —itxana kākitimoni.

Ininiākara Teoso sikari ikinika erekari ninoamoni. ³⁴Ninoa sauaki tiitxi amonitakari !auari. Kikio ipi auiniāri, kakikioteri vēxtitari ātika. Aapokotxi ipi auiniāri, kaapokori vēxtitari ātika. Oa txineiro ninoa sika ³⁵Xesosi iokanatakinimoni. Eereka ninoa xanakaro oa txineiro matiitinimoni.

³⁶Iuasaaki aua Xosee. Sasetotxi, Arevii apika mekaniri itxaua. Xipri inakori pokomiriitiki iua. Xesosi iokanatakini takauākatari iua Panapee inaāka. Popikari sākireē iuāka: “Kasikapoxokoniri,” kotxi ātipirika isikapoxokonitari kākiti. ³⁷Iua vēxtitari ātika ikikiote. Iua kikio íki isika Xesosi iokanatakinimoni.

Ananíasi, Sapira Pakini

5 Iuasaaki auari Ananíasi inakori, ítanoro Sapira inakoro pakini.

Iua vēxtitari kikio. ²Ikaikotakaro ipixini kikio íki. Ipixininoka isika Xesosi iokanatakinimoni. Sapira imarotari ōtaniri kamakiti. Txamari iua sikasaakiro oa txineiro Xesosi iokanatakinimoni, itxari:

—Ikinika kikio íki asika Teosomoni — itxa.

³Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini íkapani? Erekari Matamatakotira pimisirieneta, kotxi ipixini kikio íki kaikota pitekata. Kinirepa pisāpiretari ikinika txineiro pisikini Teosomoni?

⁴Kikio pivēxtitini apisapanika, íkora kikio pite nakiti. Eereka pivēxtitakasaakiri, ōkora txineiro pite nakito. Ininiā kinirepa pitxari: “Ikinika nisika Teosomoni?” Kona kākiti pimisirieneta. Teosora pimisirieneta —Petro txari.

⁵Iuasaakipeka Ananíasi iripe. Ipīpe. Ininiā ikara kenakotakani pīkarauakata. ⁶Iuasaaki ātokoriakori iapirikari Ananíasini íto mākaxi mataā ikatinirina íkapani. Eereka anikarina, kata itxarina iuani.

⁷Ipi oara, āti oara pakini napaka atoko iua ítanoro apoka. Kona oimarotapanikari ōitanirini ipinini. ⁸Ininiā Petro txaro:

—Pisāpiretano. Oia txineironokani hīkikiote íki hāpakapakito aua? Atāo pisāpiretano? —itxaro.

Ininiā oa:

—Ari aroanokara ate apakapakito aua —otxari.

⁹Ininiā Petro:

—Hīte uākatatari Erekari Matamatakoti auiritai himisirienetini iua? Uatxaika íronakikoātaā pītanirini katakani apokapeka. Ininiā ninoa anikapitikai pite apaka —itxaro.

¹⁰Iuasaakipeka oīripe, pīpe otxa. Iuaikana ninoa ātokoriakori íroā.

Apokarona oani, ininiã anikarona. Ikatarona òtanirini takote. ¹¹Ininiã ikinipoko Xesosi sãkire auiaãkani, apanakini ikara kenakoenetakani pakini pïkarauata.

Amianatakani Makananitiko

¹²Iuasaaki Xesosi iokanatakini kamanãtari posotiiretxi, kãkiti mimarotakinini pakini kãkiti sauaki. Ikinioitika Xesosi sãkire auiaãkani apotiitaua Teoso misãkiretikoãtaã, “Saromão pakita” akiritakori. ¹³Xesosi sãkire mauiaãkani apokaerekatana ninoa, txamari ipikarena xika !nirekarina imoianatinina. ¹⁴Iuaritika apikomoni kãkiti apotiiãpotaua ninoakata, kotxi kikiakori, sitoakoro pakini auikari Apiananiri sãkire. ¹⁵Iuasaaki Xesosi iokanatakini makananitana amianatakani, ininiãkara kãkiti anikana amianatakani kimaporimoni. Sirimatatxi nopini itakana ninoa kimaporiãtaã. Ininiã kãkiti xinikari: “Petro napakasaaki, isanõka amianatakanimoni apokiniã, imakananitaãkana.” ¹⁶Ininiã kaiãopokori kãkiti Xerosareẽ takotekini apoka. Ninoa minana amianatakani, apaka kãkiti maerekani matamatakoni misiritakini pakini. Ininiã Xesosi iokanatakini makananitana imakinikana.

Xesosi Iokanatakini Misiritiko

¹⁷Iuasaaki sasetotxi auite apiatakari, imoianariakorikata, satoseoakorikata xikotana Xesosi iokanatakini. ¹⁸Ininiã ninoa maïkana. Eereka kateia ãki taka itxapena ninoa. ¹⁹Iua ìkanõkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰—Hisa Teoso misãkiretiko aikotimoni. Iuaã hīsãpiretariko Teoso sãkire kãkitimoni kãkiti auini amaneri inini ikapani —itxa Teoso nitiri.

²¹Ininiã ìkanõkapanika ninoa sari Teoso misãkiretiko aikotimoni. Teoso nitiri sãkire iaõka ikamana. Iuaã isãpiretarina Teoso sãkire kãkitimoni.

Iuasaaki sasetotxi auite apiatakari, imoianariakorikata pïkapiretana Xoteoakori kõtãkikarerini, Xoteo kiomaneakori pakini, ininiã imakinika ninoa apakítakana Xesosi iokanatakini. ²²Ininiã apanakini sari kateiamoni apinina ikapani. Txamari apokasaakina iuaã, !auaikana Xesosi iokanatakini. Ininiã ikanapiriãna auítetxiakorimoni isãpiretinina ikapani. ²³Ininiã itxana:

—Ate apokasaaki kateia tore, itotaãkapanika. Kateia nïkatakani auanãta itore takote. Txamari itore amatakakasaaki, kãkiti !auaika iriko ãki —itxana.

²⁴Ininiã sasetotxi auite apiatakari, Teoso aikote nïkatakani auite, sasetotxiakori pakini kenakoenetakasaakiri ikara sãkiretxiti:

—Anekani? Nãpa ninoa atxiiti? Kiripa apikomoni auatako? —itxana.

²⁵Iuasaakipeka kiki apoka. Isãpiretana:

—Hïkenakotariko nisãkire. Ninoa kikiakori kateia ãki hïtakakini Teoso misãkiretiko aikoti ãki aua. Oerekanãtarina Teoso sãkire kãkitimoni —itxana.

²⁶Ininiã Teoso misãkiretiko aikoti nïkatakani auite, initiriakorikata sari iuaã. Ninoa minana Xesosi iokanatakini iuaïkana auítetxiakorimoni. Imaïkasaakina, kona iaritatana, kotxi ipïkarina kãkiti kai sorõã kiporonakinina. ²⁷Ninoa apokasaaki, ipaniãtana Xesosi iokanatakini Xoteoakori kõtãkikarerini apisatoõ itiminina. Sasetotxi auite apiatakari txana:

²⁸—Mitxi ate paniãtai Xesosi sãkire himasãpiretakani kãkitimoni. Txamari hõerekapanikari iua sãkire ikinimane

Xerosareē auakanimoni. Ate xika Xesosi ipina, hītxanāta ikinimanemoni —itxa sasetotxi auīte.

²⁹ Ininiā Petro, apanakini Xesosi iokanatakinikata apakapapiretari:

—Ate kīpitari Teoso paniātakiti. Kona kākiti paniātakitini akīpita. ³⁰ Teoso, akiomaneakorini Teosone, ōkitikari Xesosi iuaikana auini ikapani. Hītera okari iua Xesosi aamina ipiriāmitakari nopini. ³¹ Iuaritika Teoso takari Xesosi ikikomoni. Itxīkitakari iua auītetxi ininiua. Kākiti maerekani makatxaākari itxaua. Ininiā Isaeo auakani takanapiniāri imaerekani, Xesosi makatxakari ninoa maerekani. ³² Ikara ate imarota. Apaka Erekar Matamatakoti imarotari ikara. Teoso sikari iua Erekar Matamatakoti isākire kīpitakanimoni —itxa Petro ninoamoni.

³³ Ikara ikenakotakasaakina, iteene omanākarauatana. Ininiā ninoa:

—Māokana —itxana.

³⁴ Iuasaaki Kamarieo inakori ōkitikaua kōtākikarerini sauaki. Pariseo itxaua. Teoso paniātakiti oerekakari itxaua. Ikinimane paxitari iua. Ininiā iua txari:

—Hanikana naia mapara atenoka asākirauatini ikapani —itxa.

³⁵ Ininiā eereka itxana:

—Isaeo tixini auakanii, hīkitetariko hīkamakiti ninoa Xesosi moianariakorimoni. ³⁶ Akokaxiti auari Teota inakori. Iua txari: “Auītetxi apiatakari nitxaua nota,” itxa. Iuasaaki koatrosētosi kikiakori moianatari iua. Auikarina iua sākire. Txamari okapeēka iuani. Eereka iuakata sikani iarikape. Iua auītetxi ininiua xipope. Isākire !auikaākaika.

³⁷ —Teotani ipinaka atoko Xotasi Kariréiakiri apoka. Iuasaaki auītetxiakori iaōtari ikinimane kākiti. Kaiāopokori kākiti auikari iua Xotasi sākire, ininiā ninoa moianatari iua. Iua Xotasi imoianariakorikata nirekari

ixipokinina auītetxiakori. Txamari iua apaka okapeēka, ininiā imoianariakori iarikape.

³⁸ —Ininiā uatxaikara nōtākikai hīte: “Hītakanapanako ninoa Xesosi iokanatakini. Hīsikakanako ninoa, kotxi atxiīti ninoa !ikamari Teoso paniātakiti, ininiā paītiki ninoa sākire apaka !auaika. ³⁹ Txamari, ninoa kaminiāri Teoso paniātakiti, erepaniko, kotxi atxiīti hinaiatari Teoso” —itxa Kamarieo.

Iuasaaki ninoa Xoteo ōtākikakani kīpitari Kamarieo sākire. ⁴⁰ Akiritana Xesosi iokanatakini iuaikana iūroinina. Ipaniātari ninoa xirokitatiko. Ininiā ninoa:

—Xesosi sākire kona hīsāpiretapinikako —itxana.

Eereka sikaka itxana isinina ikapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi sākire aūiukini xika —itxana.

⁴² Ininiā ikiniōtika oerekarauatana Teoso misākiretiko aikoti āki, kākiti aapoko āki apaka. Isāpiretarina erekari pirena Xesosi Teoso mereēkiti ininiua pirena.

Setxi Kikiakori Mereīko

6 Xesosi sākire auīākani apiaāpota. Iuasaaki Xoteoakori Kreko sākire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniōtika apanakini tikinitakoni apakapiniri atoko —itxana ninoa.

² Ininiā Xesosi iokanatakini tosi pakini pīkapiretana ikinimane Xesosi sākire auīākani. Itxana:

—Kona erekari ate takanapiniri Teoso sākire aōerekini asikakienarauatini ikapani. ³ Ininiā setxi kikiakori himereēko, ikara parīkatxi ikaminina ikapani. Himereēna Erekar Matamatakoti

paniätakitinoka kamakani. Himereëna kimarorerini. Ininiã asikana ia parikatxi ikaminina, sitoakoro tikinitakoni isikakienatinina ikapani. ⁴Ininiã atepekana, Teoso amisäkireta. Isäkire aõereka. Ikaranoka akamako ikiniõtika —itxana.

⁵Ikinimane Xesosi säkire auiaãkani apokaerekatari Xesosi iokanatakini säkire, ininiã ninoa mereëri Estevão. Iua iteene auikari Teoso säkire. Erekar Matamatakoti paniätakitinokara ikama. Apaka imereëna Piripima, Porókoroma, Nikanooma, Tximoma, Pamenama, Nikoraoma pakini. Iua Nikorao Átxiokiakiri itxaua. Mitxi Xoteo minakatiua iua, eereka imamakaua. Xoteopeka itxapekaua. ⁶Xesosi säkire auiaãkani minana ninoa Xesosi iokanatakinimoni. Ininiã Xesosi iokanatakini misäkiretari Teoso. Iuakona itakana ninoa nopini, ikara Teoso parika ikaminina tãkane.

⁷Ikara atoko ininiã, Teoso säkire iaripireta apikoxiti. Ininiã mokatanitika kaiãori Xerosareë auakani auikari Xesosi säkire. Ito sasetotxiakori apaka kãpitari Xesosi säkire.

Estevão Maĩkiko

⁸Estevão iteene auikari Xesosi säkire. Teoso posotiire aua iuamoni. Kaposoti-ireri iua, ininiã ikamari kãkiti mimarotakiniti. Ikamari posotiiretxi, Teoso posotiire oerekini ikapani. ⁹Txamari ätikaka kikiakori !inirekari iua. Ninoa äti Xoteo apotiitiniãtaãua aikoti sikani. Ninoa “Ninoaka nireëkiti kamakani” akiritaãkana. Ninoa Sireni sitatxitikini, Arexãtria sitatxitikini, Sirísia tixinikini, Ásia tixinikini pakini. Ninoa iteene misäkiretakakaua Estevãokata, kotxi !auikarina iua säkire. ¹⁰Txamari Estevão säkirauataka atoko, !kasäkireikana, kotxi Erekar Matamatakoti sikaimaroretari iua Estevão. ¹¹Ininiã ninoa sikari tx-

ineiro apanakini kikiakorimoni Estevão apoitinina ikapani. Ininiã ninoa txineiro apapakapani txari:

—Ate kenakotari iua, Moisesini imisäkirepiretini, Teoso apaka imisäkirepiretini —itxana.

Txamari na atãoni isäkirena. ¹²Ikara isäkirena xika, kiomãtxiakori, kaiõkatso-pareriakori, apanakini kãkiti pakini na-iataua, ininiãkara imaĩkarina Estevão, kõtãkikarerinimoni anika itxarina iua.

¹³Eereka iminana apanakini, Estevão imisäkirepiretinina ikapani. Ninoa txari:

—Ia kiki misäkirepiretapikari Teoso misäkiretiko aikoti. Apaka kona inirekari Moisesi paniätakiti.

¹⁴Ate kenakotari iua säkire: “Xesosi Nasareekiri xipokariko Teoso misäkiretiko aikoti. Ixipokariko akiomaneakorini säkire Moisesini paniätakiti.”

Ikara atoko aãpirena ikamana ninoa. ¹⁵Ikinimane ninoa kãkiti õtãkikakani atamatari Estevão toõ. Teoso nitiri iax-itikiri toõ atokokana itxa Estevão toõ.

Estevão Säkirauata Kõtãkikarerimoni

7 Ininiã sasetotxiakori auite apiatakari txari Estevão:

—Atãokani ninoa säkire?

²Estevão txari:

—Nikiomaneakori, nitariakori pakini, hikenakotanoko. Teoso iaxitikiri oerekaua aãtokirini Apraõonimoni. Mesopotãmia tixini auakasaaki, Araã tixini auini apisapanika, Teoso motika iuamoni. ³Iuasaaki Teoso txari iua: “Pitakanapariko pitixine, pinirimane pakini. Äti tixinimoni pisako. Noerekinimoni pisako,” itxa Teoso. ⁴Ininiã sipe itxa Apraõ. Itakanapari Kaotéia inakori tixini. Araã tixinimoni iua sipe. Araã auakasaaki irini ipĩpe. Irini ipinaka atoko, Teoso mĩpiri iua uaimoni uatxa aãuiniãtaã. ⁵Apraõ auakasaaki, Teoso !isikari uai

tôpa iuamoni iua nakiti inini îkapani. Kona ipixini metro isika iuamoni inakiti inini îkapani. Isikaenetari uai tôpa iua, imekaniriakori pakinimoni. Txamari !keeneri iua iusaaki. ⁶Teoso txari Apraõmoni: “Pamariteni, pimekaniriakori, papika mekaniriakori auako âti kâkiti tixine. Iuaârako imisiritapeëkanako koatrosëtosi anokanani. Iparîkauatana apanakini îkapani maxikatiîka. Ininiâ iteene imisiritiko aua.”

⁷—“Ininiâkara nimisiritariko ninoa misiritakani. Eereka Apraõ apika mekaniriakori takanapariko iuaã, uaimoni kanapiriã itxanako. Ininiâ îkorapokoriti ninoa parîkauatoko nota îkapani,” itxa Teoso. ⁸Ininiâ Teoso txari: “Hîte kitsotakariko ikini hamariteni tsiki mata. Ikara nitakaõtixikare hâtamatakasaaki, hîxinikariko nisikaenetakiti,” itxa Teoso. Eereka Apraõ âkiri aua, Isaki inakori. Oito ôtipeka auini ôti inakasaaki, Apraõ kitsotakarî itsiki mata. Isaki aneëkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aâtokiriakorini iriakori itxauana.

Xosee Pirena

⁹—Xakoo anaakori xikotari itarina Xosee inakori. Ininiâ itariakori vëtxitari iua Exito sikanimoni. Iuaritika Teoso auapika iuakata. ¹⁰Imisiritiko auakasaaki, Teoso moianatari iua imapinakani îkapani. Iusaaki Exito auakani auîte Paraoo inakori. Teoso sikaimaroretari Xosee, ininiâ Paraoo potxitari iua, ininiâ Paraoo txari iua: “Exito auakani auîte pitxauako. Naapoko auakani pinîkata apaka,” itxa Paraoo Xoseemoni.

¹¹—Eereka makienanitxi aua Exito tixiniâ, Kanaaã tixiniâ apaka, ininiâ ikinimane natxita. Aâtokiriakorini

apaka !auari nipokori. !Apokari nipokori. ¹²Ininiâ Xakoo kenakoenetari triko auini Exito tixini. Ininiâ ipaniâtana tesi imiakori Exito tixinimoni isinina. Mitxi !isana Exitomoni.

¹³—Ininiâ iuaîkana âti ôti isana Exitomoni, kienatxi iamotinina îkapani. Iusaaki Xosee oerekaua ninoamoni. Iusaaki Paraoo imarotari Xosee nirimane. ¹⁴Ininiâ Xosee pikapiretari iri Xakoo, itariakorikata, inirimanekata. Setëta sîko pakini kâkiti sari Exito tixinimoni, kotxi aua ikinipoko nipokori iuaã.

¹⁵—Ininiâ Xakoo apanakinikata sari Exitomoni. Iuaã mapakanani atoko Xakooni ipîpe. Eereka aâtokiriakorini ipina iuaâtaã apaka. ¹⁶Ninoa ipîkasaakina, iîtona anikapeëka Sikeë tixinimoni. Iuaâkiri akauaritiã ikata inapeëkana. Apraõni auapanika inakasaaki, iamotari iua akauari Emoo âkiriakorimoni.

Moisesi Pirena

¹⁷—Itixi Teoso sikaenetakiti Apraõmoni kaimapeka Xoteoakorimoni inakasaaki, kâkiti Isaeokini kaiâopokoikana Exito tixiniâ. ¹⁸Itokanani napaka atoko, âti Exito auakani auîte Xoseeni mimarotakati aua. ¹⁹Iua auîtetxi misiritari anirimaneakorini. Ininiâ sotatoakori mixirika itxapena amarini xapitiri. Eereka oka itxapena.

²⁰—Iusaakiikara Moisesi iponaniâ. Moisesi amariniapanika inakasaakia peerepatikiri. Ipi, âti pakini kasiriti iri, inoro pakini nîkatari iua ninoa aapoko. ²¹Eereka ninoa takanapari iua Paraoo âkero kipaâtiniâtaãua takote. Ininiâ oa apokari iua amarini. Oanikari oaâpokomoni. ²²Exito auakani imarore ikinipoko oerekaâka iuamoni. Kasâkireri iua. Kakamareri iua.

²³—Koarêta anokanani inakasaaki, inirekari inirimane Isaeokini aõkitini. ²⁴Inirmanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵Iuasaaki Moisesi uãkatari inirimane Isaeokini imarotini Teoso nirekari Moisesi makatxakinina ninoa, Exito auakani mamisiritakanina ìkapani. Txamari ninoa ìmarotari ikara. ²⁶Apikomoni àti òti, iua sari inirmanemoni. Iuaã iua apokana ninoa neenamauanãtini, inaiapoatakakauana. Ininiã Moisesi òtãkikana ninoa. Itxana: “Kikiakori hìtaritakakaua. Kinirepa himisiritakakaua?”

²⁷—Inirimane misiritakari katika txari Moisesi: “Kipa txai pite ate auìte pininiua? Kipa txai pite ate òtãkikakari pininiua? ²⁸Kita Exitokirini pokini atokokana pokatanoko nota?” itxa. ²⁹Ikara sãkiretxiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ìtanorouata. Ipi imiakori aua iuamoni.

³⁰—Koarêta anokanani àparaã makipakaniãtaã iua aua iuasaaki. Teoso nitiri iaxitikirì motika Moisesimoni ixirata Sinai inakoriãtaã. Iuasaaki iua atamatarì aanaia tirinini, txama ìrika. ìxipoka. ³¹Ikara itikasaaki, Moisesi tsorìkaãta, ininiã aanaia takote isa iteene atamatini ìkapani. Iuasaakipeka ikenakotari Apiananiri sãkirauatini: ³²“Pikiomaneakori Teosonekarano nota. Apraão, Isaki, Xakoo pakini Teosonekarano nota,” itxa Teoso. Iuasaaki Moisesi kikinana ipìkare xika. Ipìkari Teoso sãkirauatini manapi atamatini.

³³—Ininiã Apiananiri txari iua: “Pikitimata pimakatxaka, kotxi uai pitiminiãtaã nota auanãta. ³⁴Nitikana ninakitiakori Exito tixiniã. Exito auakani misiritapena ninoani.

Nikenakotari oõkinina. Nota inari nisikakinina ìkapani. Ininiãkarako Exito tixinimoni niokanatai pite,” Apiananiri txari Moisesi.

³⁵—Iua Moisesi Isaeokini manirekakiniti, kotxi ninoa txari: “Kipa txai pite ate auìte pininiua? Kipa txai pite ate òtãkikakari pininiua?” itxarina. Iuakara Teoso iokanatakiti ninoamoni ninoa auìte ininiua ìkapani, ninoa imakatxakini ìkapani, kotxi Teoso nitiri aanaiaã tirinakariã auakari iokanatarì iua ninoamoni.

³⁶—Eereka iua makatxakana ninoa Exito tixini. Oerekari Teoso posotiire kãkiti maposotakiniti Exito tixiniã. Oerekari Teoso posotiire potxoari uiniti, Põkamarari inakoriã. Àparaã makipakaniãtaã apaka oerekari Teoso posotiire koarêta anokanani iuaãtaã.

³⁷—Ia Moisesikara sãpiretana Isaeokini: “Teoso iokanatariko isãkire sãpiretakari hìtemoni nota iokanatini atokokana. Hìte nirimanekara iua. Hìkenakotariko iua sãkire,” itxa Moisesi. ³⁸Moisesi aua Teoso nakitiakorikata àparaã makipakaniãtaã. Aãtokiriakorini aua iuakata. Apaka Teoso nitiri iaxitikirì aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini ìkapani. Iua Teoso sãkire txìkitakari iua sãkire auiaãkani àtipirika auini Teosokata.

³⁹—Aãtokiriakorini kona nirekari inìkaenetinirina Moisesi sãkire. ìnirekarina iua. Inirekarina Exitomoni ikanapiriinina. ⁴⁰Iuasaaki ninoa paniãtari Arão: “Teosoakori kamakoni pikaminaua, ate mìkiikakani tìkane. ìkora Moisesi Exito tixini amakatxakakiri, ìtapari iua? ìAimarotari iua auiniãtaã,” itxarina Arãomoni. ⁴¹Ininiã ninoa kamari kema auìte àkiri atoko inakari oro kamakori iteasonetinina

íkapani. Eereka okarina soti auíte teoso ikamakitina isikinina íkapani. Kiiniri ikamana. Ipoxonoiuatana, kotxi ninoaka kamari iteosonena. ⁴²Txamari Teoso atão inakari takanapana ninoa. Ininiã iteosonetarina iaxiti auakani iõriki, kasiri, atokatxi pakini. Teoso sãkire sãpiretakani kitxakapiríka iõkatsopatari ia sãkiretxiti:

Híte Iseokini, koarêta anokanani
 āparaā makipakaniātaā
 hāuakasaaki, !hõkari pirātxi nota
 íkapani.

⁴³Iuasaaki híte anikari papiri aamata kamakori híteosone Moroki inakori íkapani. Apaka iõriki atoko inakari híteosone Hēpaā inakori hīkamakiti hanika hītekata iusaaki. Híte kamari Moroki, Hēpaā pakini híteosonetini íkapani. Ikara xika nota iokanataiko híte āti kãkiti tix-inemoni. Papirónia sitatxiti apikox-iti niokanatai híte.

Teoso Papire Pirena

⁴⁴—Aãtokiriakorini auari papiri aamata kamakori Teoso misãkiretiko papire āparaā makipakaniātaā auakasaakina. Moisesi kamari iua papiri Teoso paniātakiti iaõka, kotxi Teoso oerekari Moisesi iua papiri kamiko. ⁴⁵Moisesi ipinaka atoko apanakini aãtokiriakorini apakapari iua papiri irina sikakiti. Ininiã iusaaki ninoa anikari iua papiri, Xosoekata isikasaakina, āti uāka tixine imixirikasaakina, kotxi Teoso omitikana ninoa āti uāka, aãtokiriakorini apokasaaki iuaā. Iua papiri kaikota iuaā. Auapanika iuaā Tavii aãtokiriakorini auíte inakasaakiua. ⁴⁶Teoso apokaerekatari Tavii, ininiã Tavii nirekari Xakoo Teosone misãkiretiko aikoti ikamini. ⁴⁷Txama Teoso !auritari Tavii

kaminiri. Ininiã Saromão, iua ākiri kamari Teoso misãkiretiko aikoti.

⁴⁸—Teoso Apiananiri kona aua aapokotxi kãkiti kamakiti āki, kotxi Teoso sãkire sãpiretakari kitxakapiríka txari:

⁴⁹Apiananiri txari: “Niitopãkiniātaā iax-iti itxa. Itixi nikiti nitakiniātaā. Ininiã kanatokopa itxa aapokotxi hīkamini nota íkapani? Namonipa nauiniātaā?”

⁵⁰Kotxi notakara kamari ikinipoko,” itxa.

Erekari Matamatakoti Manirekakani

⁵¹Estevão sãkirauatapanika:

—Híte kona kinirão kenakotaka txari Teoso sãkire. Hītsiki mata kisauakaãkapitika, txamari kona hīkenakotari Teoso sãkire hãkixinireẽ. Ātipirika kona hinirekari Erekari Matamatakoti paniātakiti hīkamini. Hãtokiriakorini kitxakapiríka atoktxikana híte. ⁵²Hãtokiriakorini misiritana ikinimane Teoso sãkire sãpiretakani. Ninoa okana iua sãkire sãpiretakani, Erekarinoka Kamakari sãpiretakani. Ninoa Teoso sãkire sãpiretakani sãpiretari Erekarinoka Kamakari āti õti uai apokini. Īkorsaaki hītera mikapiritari iua. Hītera okari iua Erekarinoka Kamakari. ⁵³Hítekara apakapapekari Teoso sãkire Teoso nitiriakori mikiiti. Iuaritika !hīkamari ipaniātakiti —itxa Estevão.

Estevão Kiporonakiko

⁵⁴Xoteoakori kenakotakasaakiri Estevão sãkire, omanãkarauatana. Akatsakatsiriĩtauana omanãkarena xika. ⁵⁵Iuaritika Erekari Matamatakoti iteene sikataparaxiniretari Estevão. Iusaaki iua ionakaāta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶Ininiã itxa:

—Hātamata. Natamatari iaxiti xorekini. Aītari iaxitikiri tima Teoso kikomoni —itxa Estevão.

⁵⁷Iuasaaki Xoteoakori totari ikenakokina iuakoāna. Iteene ninoa akiripoakata. Eereka ninoa ikinika miteka iuamoni. ⁵⁸Imaīkarina. Ikosekaāpotarina sitatxi mapotōkire. Iuaātaā ipotorikana ikiporonakinirina iua kai soroā. Iuasaaki itikarauatakani takari imākana Saoro inakori kiti takote inīkatini ikapani. ⁵⁹Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰Iuasaaki ikapotoreēkaua. Itapasākireritika akiritari Teoso:

—Apiananiri, pimaxinikaretariko ia maerekati ninoa kamakiti —itxa.

Iuasaakepeka ipīpe.

Xesosi Sākire Auiākani Misiritiko

8 Estevão ipikasaaki Saoro aua iuaā. —Ari erekapitkari ipinini —itxa Saoro.

Estevãooni ipinini ōtisaakepeka ipotorika Xesosi sākire auiākani misiritiko Xerosareē. Ninoa iteene misiritaāka, ininiā ikinimane Xesosi sākire auiākani Xerosareē auakani iarika itxapena. Xotéia tōpamoni, Samaria tōpamoni pakini iarikana. Xesosi iokanatakininoka kaikota Xerosareē. ²Estevão ipinaka atoko kikiakori Teoso sākire auiākani katari iuani. Iteene itxiapatana. ³Iuasaaki Saoro potorika ixipokinina Xesosi sākire auiākani. Ninoa aapokomoni isaāpota. Kikiākini, sitoakoro apaka ikosekaītota, taka itxana kateia āki.

Piripi Samariamoni Sini

⁴Teoso sākire auiākani iarikasaaki, isāpiretarina Teoso sākire ikini aapokotxitiā. ⁵Piripi sari Samaria

sitatxitimoni. Iuaā iua sāpiretari kākiti Xesosi Teoso mereēkiti ininiua. ⁶Isākire ikenakotakasaakina, posotiiretxi ikamakiti itikasaakina, iteene ikenakotarina isākire. Imixinikarina isāpiretakiti. ⁷Maerekani matamatakoni kākiti auaītotakini takanapari kākiti. Akiripoakatana ipokīkasaakina. Kaiāopokori matīpokotakani apaka makananitaāka. ⁸Ininiā Samaria auakani iteene poxokoniua.

Miiti Simão Inakori

⁹Iuasaaki Samaria sitatxitiā aua kiki Simão inakori. Miiti itxaua iua. Imisirienetana kākiti Samaria auakani. Ininiā ikinimane tsorīkaāta, ikamakiti atamatakasaaki. Iua iuikaua.

—Kimaroreno nota —itxa.

¹⁰Ininiā ikinimane kīpitari iua sākire. Auītetxiakori, poiāorini pakini kīpitari isākire. Ininiā itxana:

—Iua Simão auari Teoso posotiire. Ka-posotiireri iua —itxana.

¹¹Ininiā ikīpitarina isākire, kotxi itokatapeka itikarina ikamakiti kākiti mimarotakiniti. ¹²Ninoa auikasaakiri Piripi sāpiretakiti erekari pirena, Teoso auītetxi ininiāua pirena, Xesosi Kristo posotiire pirena pakini, kikiakori, sitoakoro apaka patxisataāka. ¹³Iuasaaki Simão apaka auikari. Ipatxisataāka. Ininiā isari Piripi sinimoni, kotxi itsorīkaāta, posotiiretxi kākiti mimarotakiniti itikasaaki.

¹⁴Xesosi iokanatakini Xerosareē auakani kenakopiretari Samaria auakani auikiniri Teoso sākire. Ininiā ninoa iokanataro Petro, Xoāo pakini Samariamoni. ¹⁵Iuaā apokasaakina, imisākiretarina Teoso, Erekari Matamatakoti isākire auiākani apakapini ikapani. ¹⁶Erekari Matamatakoti kona apokapanika ninoamoni iuasaaki. Apiananiri Xesosi uākaānanira ipatxisataākana. ¹⁷Ininiā

Petro, Xoão pakini takari iuakona ninoa nopini. Iuasaakipeka apakaparina Erekar Matamatakoti.

¹⁸ Simão itikasaakiri Erekar Matamatakoti apokini kákitimoni, kiniráo sikaka itxaro txineiro Petro, Xoão pakinimoni. ¹⁹ Ininiã itxa:

—Íkora híposotiire hísikano, niuako kákiti nopini nitakasaaki, Erekar Matamatakoti ninoamoni apokini íkapani — itxa.

²⁰ Txamari Petro txari:

—Pite, pitxineirotekata samakauako, kotxi pite uákatari pitxineirote iamotiniri Teoso posotiire. ²¹ Kona xapiti pitemoni auapani ia paríkatxi, kotxi pákixinire na atão Teoso apisatoõ. ²² Ininiã pitakanapariko ikara pimaerekani. Pamanaári Apiananiri pimaerekani imaktxakini íkapani. Atxiíti iua maxinikaretari pixinikakiti pákixinireẽ. ²³ Nota imarotai pite. Pákixinireẽ xápoákata maerekatinoka. Pimaerekani maíkai. !Auiritai pisini pinirekinimoni —itxa Petro.

²⁴ Ininiã Simão apakapapiretari:

—Pimisákiretariko Teoso nota íkapani. Ikara atoko pisápíretakíti na ninireka —itxa Simão.

²⁵ Petro, Xoão pakini sápiretari Xesosi kamakiti ninoa íkapani. Isápíretarina Apiananiri sákire. Eereka íkanapiriána Xerosareẽmoni. Ikanapiriaápotakasaakina, isápíretarina Teoso iokanapirena erekari kaiáopokori aapokotxi auakanimoni Samaria tópa.

Piripi Etxiópiakirikata

²⁶ Eereka Apiananiri nitiri iaxitikiri misákiretari Piripi:

—Paiamatako. Atokatxi pokíkinimoni pikikomoni pisako. Pisa kimaporimoni, áparaã makipakaniátaã. Iua kimapori Xerosareẽ Kasa tixinimoni sikari.

²⁷ Ininiã aiamata, sipe itxari. Ipixinipokorití aókitari Etxiopia tixinikiri.

Etxiopia auakani auíte ótákkikakari itxaua. Paimatireri iua. Ikinimane kamari iua paniátakiti. Etxiopia auakani auíte sito Kátasi inakoro. Kaiáopokoro otxineirote, otii pakini. Iua kiki paríka íkinipoko oa nakiti iníkata oa íkapani. Mitxi iua sari Xerosareẽmoni Teoso imisákiretini íkapani. ²⁸ Ikanapiriákasaaki, mitekaí áki iitopákasaaki, atatsopatarí Isaía iókatsopatakíti. Isaía Teoso sákire sápiretakari kitxakapiríka. ²⁹ Iuasaaki Erekar Matamatakoti txari Piripi:

—Pisa okira mitekaímoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaía iókatsopatakíti atatsopatini, Piripi pimaári:

—Pimarotatarí ere patatsopatakíti? — itxari.

³¹ Ininiã iua:

—Natokopa ininiápa nimarotari? Kipa oerekano? —itxari.

Ininiã aiatarí Piripi mitekaí áki iuakata iitopákini íkapani. ³² Iua iókatsopatarí ia Teoso sákire:

Soti auíte okikomoni aníkiko atoko itxa iua. Soti auíte ákiri piti kisauakikosaaki, !kasákireri iua. Iua soti auíte ákiri atoko itxa iua, kotxi iua apaka !kasákireri.

³³ Inapetaáka iua. !Atáoni kákiti kama iuamoni. Okaákape. !Auari iua ákiri.

Ikara atoko itxa Teoso sákire, Isaía iókatsopatakíti.

³⁴ Ininiã iua Etxiopiakiri pimaári Piripi:

—Pisápíretano, natokopa itxa Teoso sákire sápiretakari sákire? Kipa soti auíte atoko inakari? Kipa okaáka? Iuakani? Átikani?

³⁵ Ininiã Piripi oerekari ikara Teoso sákire iókatsopatakori.

—Xesosira ikara atoko inaáka —itxa.

Ininiã apikomoni isãpiretari Teoso iokanapirena erekari, Xesosi pirena.

³⁶ Isaãpotakasaakina, apokana ãparaã auiniãtaã. Ininiã iua kiki txari:

—Uai aua ãparaã. Apakata nipatxisatiko?

³⁷ Ininiã Piripi txari iua:

—Apakatapitika pipatxisatiko iteene paukiniãri Xesosi sãkire pãkixinireẽ.

Ininiã iua apakapapireta:

—Nota auikapitikari Xesosi Teoso mereẽkiti, Teoso ãkiri ininiãua.

³⁸ Ininiã iua Etxiõpiakiri paniãtari mitekãñ anikakari iotokini. Iuasaaki Piripi, iua Etxiõpiakiri apaka katzaka, imaãta itxana. Ininiã Piripi patxisatari iua kiki.

³⁹ Ikanikiõtakasaakina, Erekar Matamatakoti anikari Piripi. Ininiã iua kiki kona atamataikari Piripi. Ininiã iãpotapitipo. Ipoxononoka itxa. ⁴⁰ Iuasaaki Asoto sitatxitipeka itokiã Piripi. Isaãpotakasaaki, ikinika aapokotxitiã isãpiretari Teoso sãkire. Teoso sãkire isãpiretiniritika Sesaréia sitatxitimoni apokako.

Saoro Auikiniri Xesosi Sãkire

(Átosi 22.6-16; 26.12-18)

9 Iuasaaki Saoro okaenetapikana Apiananiri sãkire auiãkani. Ininiã iua sari sasetotxi auite apiatakarimoni. ² Amanaãri aãtsopa Saoro paríka sãpiretiko aãtsopati. Iua nirekari sasetotxi auite iõkatsopatiniri ikara, Saoro anikini ikapani. Inirekari isikiniri iua aãtsopa ikinika aiko Xoteo apotiitiniãtaãua níkatanimoni Tamásiko sitatxiti, kotxi Saoro nirekari imaĩkinina Xesosi sãkire auiãkani, kikiakori, sitoakoro pakini, Tamásiko sitatxitiã apokakini. Inirekari anikinina Xerosareẽmoni.

³ Iua apokaãpotakasaaki Tamásiko sitatxitimoni, katimaritika iotximeretxi

iaxitikiri ãkitari. ⁴ Irika xitipe. Ininiã ikenakotari sãkiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiã iua:

—Kiriparai Apiananiri?

Ininiã:

—Xesosira nota. Pimisiritakitikarano —itxa Xesosi.

⁶ Ikikinana, iteene ipíkaruatiniã.

—Apiananiri, kipa pinireka níkamini? —itxa.

Ininiã Apiananiri:

—Põkitikaua, sitatxi pisa. Iuaã ãti sãpiretai pikamakiti tĩkane —itxa Xesosi.

⁷ Imoianariakori iotoka. Ipíkarauatana. Masãkireninoka itxana. Ninoa kenakotari iaxitikiri sãkire, txamari !atamatarina.

⁸ Eereka Saoro õkitikaua, xorekaãta itxa, txamari imosiãretapeka iua. Ininiã imoianariakori anikari iua. Ikanõpiãpotarina Tamásikomoni. ⁹ Ipi, ãti pakini õti mõsiãretika itxa. Iuasaaki !inipokota. !lãta.

Ananíasi Makananitiniri Saoro

¹⁰ Tamásiko sitatxiti aua kiki Xesosi sãkire auiãkari, Ananíasi inakori. Iuasaaki Teoso sãkirauata Ananíasikata itaponemoni. Itaponeẽ Apiananiri akiritari iua:

—Ereẽkai Ananíasi —itxa.

Ininiã:

—Uaikarano nota, Apiananiri —itxari Teoso.

¹¹ Apiananiri txari:

—Paiamatako. Kimapori Eretĩka ãpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isãkirauanãta notakata. ¹² Saoro taponetai pite. Iua atamatai pite apokini iuamoni, piuako inopini pitakini

íkapani iuaíkana kōsiärepeka inini íkapani —itxa Teoso.

¹³ Ininiã Ananíasi:

—Apiananiri, kãkitipokoni sãpiretano íkara kiki pirena. Pamonõkoniri iua. Imisiritapekana pite nakitiakori Xerosareẽ sitatxiti auakani.

¹⁴ Sasetõxiakori auite paniãtari iua imaĩkinina piuãka akiritakani uai Tamásiko sitatxiti auakani —itxa Ananíasi.

¹⁵ Ininiã Apiananiri txari:

—Pisako iuamoni. Nota mereẽpekari iua kiki, nota paríka ikamini íkapani. Iua sãpiretariko nota sãkire Xoteo minakonimoni, auítetxiakorimoni, Isaeo tixini auakanimoni pakini. ¹⁶ No-erekariko Saoro iteene atatsiirauatini nota sãkire auikini xika —itxa Teoso.

¹⁷ Ininiã Ananíasi sari Xotasi aapokomoni. Iĩroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatano nota pitemoni kōsiärepeka iuaíkana pinini íkapani. Iokanatano nota pitemoni Erekarí Matamatakoti papakapini íkapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kōsiärepeka itxa. Eereka õkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auiañkanikata. ²⁰ Iua sari aiko Xoteo apotiitiniãtaãua. Iuaã oerekarauata. Oerekari Xesosi Teoso ãkiri ininiãua. ²¹ Isãkire kenakotakani tsořĩkaãta.

—Iua Saoro okana Xesosi uãka akiritakani Xerosareẽ auakani. Iua ina uaimoni Xesosi uãka akiritakani imaĩkini íkapani, sasetotxi

auiteakorimoni anikinina íkapani —itxana.

²² Saoro oerekarauatakasaaki, imaroãpotari Teoso imarore. Teoso sikaposotiireãpotari iua. Ininiã iteene imarotari Teoso sãkire, apanakini oerekini íkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereẽkiti ininiãua. Ininiã ninoa limarotari apakapapiretinirina iua.

²³ Mapaõti atoko Xoteoakori sãkirau-atakaka Saoro okinina íkapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi ãron-akikoãtaã okinirina tĩkane. Íkanõka, pokamara iãtaparina iua.

²⁵ Iuasaaki íkanõka Xesosi sãkire auiañkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareẽmoni.

Saoro Xerosareẽ Apokini

²⁶ Saoro apokasaaki Xerosareẽ, inirekari Xesosi moianariakori imoianatini. Txama ikinikana pikari iua. Kona !auiritarina iua moianatinina ninoa, kotxi !auikarina iua atão auikiniri Xesosi sãkire. ²⁷ Iuaritika Panapee anikari iua Xesosi iokanatakinimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni —itxa Panapee.

²⁸ Panapee sãkire ikenakotakasaakina, auikarina Saoro sãpiretakiti. Ininiã Saoro kaikota Xerosareẽ Xesosi sãkire auiañkanikata. Inirekinimoni isa Xerosareẽ. Isinimoni itaparaxinireritika isãpiretari Apiananiri Xesosi sãkire. ²⁹ Isãkirauata Xoteoakorikata, Kreko sãkire imarotakanikata. Inirekarina

ninoa imarotiniiri Xesosi sākire. Txamari inirekarina okinirina iua. ³⁰Iuasaaki Xesosi sākire auīākani imaropiretari ninoa okaenetiniri Saoro, ininiā anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹Iuasaaki Xesosi sākire auīākani !imisiritaākaika. Xotéia tōpa, Kariréia tōpa, Samaria tōpa pakini !lauaika Xesosi sākire auīākani misiritiko iuasaaki. Erekari Matamatakoti sikataparaxiniretana ninoa. Kākiti itoāpotari auikiniri Xesosi sākire. !Ikamarina maerekati, kotxi iteene ipīkarina Apiananiri.

Enéias, Tókasi Pakini

³²Petro ianaxititakasaaki, iua sari Teoso sākire auīākanimoni Arita sitatxiti auakanimoni. ³³Iuaā aōkitari kiki Enéias inakori. Iua matīpokotakati itxaua. Oito anokanapeka !ōkitikaua. ³⁴Petro txari iua:

—Enéias, Xesosi Kristo makananitari. Pōkitikaua. Piapirikari pisirimata — itxari matīpokotakati.

Iuasaakipeka ōkitikaua. ³⁵Ikinipoko Arita sitatxiti auakani, Sarō sitatxiti auakani pakini atamatari iua Enéias, ininiā itakanaparina imaerekanina. In-īkapiretarina Apiananiri sākire.

³⁶Āti sitatxiti Xopi inakoriā oāua sito Teoso sākire auīākaro, Tapita inakoro. Kreko sākireē ouāka Tókasi otxaua. Oa kamapikari erekari. Omoianatana matxineiroteni.

³⁷Arita auakani auikasaakiri Apiananiri sākire, oa Tókasi amianata. Eereka oani opīpe. Opīpeka atoko, arokaītotarona, taka itxarina oīto itanokiri koaā. ³⁸Xopi sitatxiti Arita sitatxiti takote, ininiā Xesosi sākire auīākani Xopi sitatxiti auakani kenakoenetari Petro Arita sitatxiti

auiniā, iokanatanana ipi kiki Petromoni, apinirina ikapani. Iokanapiretana:

—Pinapokako uai. Katima pitxako — itxana.

³⁹Ininiā Petro aiamata. Ninoakata isa. Iua apokasaaki, anikarina itanokiri koaā. Ikinipoko tikinitakoni txiapanāta Petro takote. Ninoa oerekari Petro mākatxi Tókasi kamakiti ninoa ikapani oāuakasaaki. ⁴⁰Ininiā Petro iokanatanana ninoa mapara. Eereka ikapotreēkaua. Isākirauata Teosokata. Eereka oamoni ikirioka. Itxaro:

—Tapita pōkitikaua.

Iuasaakipeka xorekaāta otxa. Oātamatakasaakiri Petro, oitopāka. ⁴¹Ininiā imaīkaro ouako oōkitikiniua ikapani. Eereka iua akiritana Xesosi sākire auīākani, tikinitakoni pakini, oa auāki onini oerekini ikapani.

⁴²Ikini Xopi auakani imaropiretari Tókasi iuaīkana auāki onini, ininiāra ito-maneri kākiti auikari Apiananiri sākire. ⁴³Petro kaikota iuaā Xopi sitatxiti mapaōti. Iua kaikota Simão inakorikata. Iua Simão aamata kamakari.

Konério Tapone Pirena

10 Iuasaaki Sesaréia sitatxiti auā kiki Konério inakori. Āti uāka iua. Homano itxaua. Seī pakini sotato auīte iua. Kākiti akiritana ninoa sotatoakori Itáriakini. ²Iua Konério kamari Teoso sākire iaōka. Iua, ikinipoko aapoko auakanikata paxitari Teoso. Imisākiretapikari Teoso. Isikana matiitimoni inirekakitina. ³Āti ōti kikatapeka inakasaaki itaponeuata. Itaponeē itikari Teoso nitiri apokini iuamoni. Itxari:

—Konério —itxa.

⁴Teoso nitiri atamatakasaaki, ipīkarauata.

—Apiananiri, kipa pinireka? —itxa Konério.

Ininiā Teoso nitiri txari:

—Teoso kenakotapekari pisäkire iuamoni. Itikapekari pisikarauatini matiinimoni. Teoso xinikapitikai. ⁵ Ininiäkara ätikaka kikiakori piokanata Xopimoni Simão Petro uaimoni imininina ikapani. ⁶ Iua kaikota äti Simãoakata, aamata kamakarikata. Iua aapoko potxoari uiniti takote aua. Iua Simão Petro säpiretaiko pikamakiti tikane —itxa Teoso nitiri.

⁷ Eereka iua Teoso nitiri sipe. Iposo atoko Konério akiritana ipi initiriakori, ätika isotatone pakini. Iua sotato kamari Teoso säkire iaõka. Iua auapika Konériokata, inireékiti ikamini tikane. ⁸ Ininiä Konério säpiretana ninoa ikinipoko Teoso nitiri säpiretakiti. Iposo atoko iokanatanata Xopimoni.

Petro Tapone Pirena

⁹ Katimatiniäkata Konério iokanatakini potorika. Apaniäxiti inakasaaki ninoa apokaäpota sitatxi Petro auiniätaä. Iuasaaki Petro kanikauata aapokotxi nopini Teoso imisäkiretini ikapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹ Itaponeē atamatari iaxiti xorekini. Aamata mitamatari katxakaäpota iuamoni. Imapotomatare ipi ipi pakini iaxirikaäka. Iua aamata katxaka xitimoni. ¹² Iua aamata äki aua ikini sereti kaxipirini. Aua pirätxi. Aua itopa auakani. Aua imini. Aua araäkani. ¹³ Ininiä Petro kenakotari itanokiri säkirauatini:

—Petro, pōkitikaua. Pokari ia, pinikini ikapani —itxari Petro.

¹⁴ Petro Xoteo itxaua, ininiä kona ikinika linika. Ininiä Petro txari:

—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵ Iuaikana itanokiri säkirauata:

—Nota oeretakiti kona kamininiri kona pitxape —itxa.

¹⁶ Ipi, äti pakinikata iua aamata katxaka ikara atoko. Iposo atoko ikanikaxitita Teoso tixinemoni.

¹⁷ Ininiä Petro äkixinireē ixinikaxitita: —Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereëkai. Simão Petro uai aua atxiiti? —itxana.

¹⁹ Iuasaaki Petro xinikapanikari itapone. Erekar Matamatakoti txari:

—Ikiraäkarana ipi, äti pakini kākiti nitanātai. ²⁰ Pōkitikaua. Pikatxaka xitimoni. Pisa ninoakata, kotxi niokanatanata ninoa uaimoni —itxa Erekar Matamatakoti.

²¹ Ininiä Petro sari Konério iokanatakinimoni:

—Notakara hīte nitanāta. Kipa ikai hīte?

²² Ninoa apakapapiretari iua:

—Konério, aäuīte iokanataua ate. Erekar iua. Ikamari Teoso säkire iaõka. Ikinipoko Xoteo apokaerekatari iua. Teoso nitiri iaxitikiri paniätari iua pite akiritini, pisäkire ikenakotini ikapani —itxana.

²³ Ininiä Petro:

—Hīiroä. Uai himaka —itxa.

Konério Aapoko Auakasaakina

Katimatiniäkata Petro sari ninoakata. Apanakini Xesosi säkire auiaäkani Xopikini sari apaka. ²⁴ Katimatiniäkata apokana Sesaréia sitatxiti, Konério auiniätaä. Iua Konério apotiitapekana inirimane, aōkimanere pakini Petro iätapinina ikapani. ²⁵ Petro iroäkasaaki Konério aapoko, iua aōkitari Konério. Iuasaaki Konério kapotoreëkaua Petro apisatoō. ²⁶ Txamari Petro txari iua:

—Pōkitikaua. Kiki pite atoko inakarikarano nota.

²⁷ Isākīrauatakasaakina, Petro īroā. Aōkitari ito kākīti apotiitakaniua. ²⁸ Ininiā itxana:

—Hīte imarotari ate kiomaneakorini !auritari Xoteo moianatiniri āti uāka. !Auritaāka ate īroini hīte atoko inakari aapoko. Iuaritika Teoso txano nota: “Na pakiritapiri āti uāka kanaiari,” itxano. ²⁹ Ininiā hīte pīkapiretakasaakino nota, nīmarotari atāo nisini hītemoni. Ininiā, kinirepa hīte apakītakano nota? —Petro txari Konériomoni.

³⁰ Konério apakapiretari:

—Ipi, ipi pakini ōti apisapanika nauanāta naapoko. Iuasaaki kona ninikari nipokori, Teoso nimisākiretini ikapani. Kikatapeka inakasaaki, nimisākiretakasaakiri Teoso, katimaritika kiki tokiā nota apisatoō. Pomēkoriri imāka. ³¹ Itxano: “Konério, Teoso kenakotapekari pamanaākīti. Ixinikari pisikarauatini matiinimoni. ³² Ātikaka kiki piokanata Xopi sitatxitimoni Simāo Petro inakori uaimoni imininina ikapani. Iua aua āti Simāokata, aamata kamakarikata. Simāo aapoko potxoari uiniti takote.” ³³ Iuasaaki nota apakītakai pite. Peerekari papokini atemoni. Uatxa ate uai aua Teoso apisatoō Teoso paniātakīti pitemonikiri akenakotini ikapani. Ininiā pisāpiretauako —itxa Petromoni.

³⁴ Ininiā Petro txari:

—Uatxa nīmarotari atāo inakari. Teoso sikari erekari ikininapemoni. Inirekari ikini uāka apokini iuamoni, inakītiakori ininiuana ikapani. ³⁵ Teoso apakapari ikini itixiti auakani, iua paxitakani, atāo inakari kamakani. Apakapari Xoteoakori. Apakapari Xoteo minakaniua apaka. ³⁶ Himarotari Teoso iokanapirena Isaeo auakanimoni. Ikara erekari pirena sāpiretaua Xesosi Kristo xipokari Teoso omanatiniri kākīti imaerekani xika, kākīti erekaxinire

inini ikapani. Ikinimane auīte itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tōpa. Merepitipanika iaripireta Kariréia tōpa, Xoāo patxisarauataka atoko. ³⁸ Himarotari Xesosi Nasareekiri pirena. Himarotari Teoso sikari Erekarī Matamatakoti iuamoni. Iteene isikaposotiiretari iua. Ikini tōpati isa erekari ikamini ikapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakīti Xoteoakori tixine iua auakasaaki, Xerosareē sitatxiti auakasaaki apaka. Eereka aamina īpiriāmitakari nopini ninoā okari iuani.

⁴⁰ —Iuaritika ipi āti pakini ōtisaaki Teoso ōkitikari iua. Iuaka oerekaua kākītimoni ipīpekariika iuaīkana aua inini. ⁴¹ Kona ikinipokoni atamatari iua. Teoso mereēkininanira atamatari iua. Iuaritika kaiōri iua atamatakani. Ininiā ate atamatari iua. Iua ōkitikaua atoko ate nipokota, iāriā aāta iuakata. ⁴² Iokanataua ate Teoso sākire asāpiretini ikini kākītimoni. Teoso mereēri iua, kākīti misiritiko mereēkari ininiua ikapani. Auākīpanika inakani, ipīkani pakini misiritiko mereēkari itxaua. ⁴³ Ikinipoko Teoso sākire sāpiretakani sāpiretari iua pirena. Ninoā txari: “Iua sākire auīākani maerekani makatxakaāka” —itxa Petro.

Xoteo Minakaniua Patxisatiko

⁴⁴ Petro sākīrauatapanika inakasaaki, Erekarī Matamatakoti apoka ikinika Petro sākire kenakotakanimoni. ⁴⁵ Ininiā Petro moianariakori Xesosi sākire auīākani kisauakatsikimatatakoni tsorikaāta, kotxi Teoso sikari Erekarī Matamatakoti Xoteo minakonimoni apaka. Ninoā tsiki mata līkisauakaāka, iuaritika Erekarī Matamatakoti apoka ninoamoni. ⁴⁶ Ikenakotarina Xoteo

minakanuia sákirauanāta āti uāka sáikireē.

—Peerekari Teoso. Apiananiri itxaua —itxanātana Xoteo minakanuia.

⁴⁷ Ininiā Petro txari:

—Ninoa Xoteo minakanuia apakapapekari Erekarí Matamatakoti ate apakapiniri atokokana. Ininiā apakatapitika ninoa patxisatiko āparaā. Kona kákitini iotokakana ipatxisatikona.

⁴⁸ Ininiā iua paniātana ninoa patxisatiko Xesosi Kristo uākaā. Iuusaaki ninoa aiatarí Petro:

—Atekata mapaōti pikaikota —itxarina.

Ininiā Petro kaikota ninoakata.

Petro Sāpiretakiti

11 Xesosi iokanatakini, Teoso sáikire auíākani Xotéia tōpa auakani apaka kenakotari Xoteo minakanuia auikinirina Teoso sáikire. ² Ininiā Petro kanapiriākasaaki Xerosareēmoni, kisauakatsikimatatakoni apoītari iua.

³—Pite imaka itsiki mata makisauakakoni aapoko āki. Ninoakata pinipokota pitxa. !Apakata pikamakiti —itxarina.

⁴ Ininiā Petro sāpiretari ikinipoko itiākiti, ikenakotakiti pakini.

⁵—Xopi sitatxiti nauakasaaki, Teoso nimisáikiretakasaaki, nitaponemoni natapari mākaxi mata atoko inakari iaxiti katxakaāpotini. Ipi, ipi pakini imapotomatare iaxirikaāka. Iua apoka nota takote. ⁶ Iteene nimixinitari mākaxi mata āki auakani. Natamatari ikini sereti kaxipirini. Aua pirātxi. Aua ĩtopa auakani. Aua imini, araākaní pakini. ⁷ Iuusaaki nikenakotari sáikiretxi iaxitikiri: “Pōkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. !Ninikari nipokori mauritakoti ia atoko inakari, kotxi pamininiri,” nitxari.

⁹—Iuaíkana iaxitikiri sákirauata: “Teoso oeretakiti kona kamininiri kona pitxape.” ¹⁰ Ipi āti pakinikata iua aamata katxaka ikara atoko. Eereka ikinika kosekaāka iaxiti.

¹¹—Iuusaakipeka ipi, āti pakini kikiakori Sesaréiakini apoka aapokotxi nikaikotiniātaā. Iokanataākana notamoni. ¹² Ininiā Erekarí Matamatakoti paniātano: “Pisa ninoakata. Kona pipíkarauatape,” itxa. Naia seisi aitariakori Xopikini moianatano nota iuusaaki. Ininiā ate ĩroā Konério aapoko. ¹³ Ininiā iua sāpiretaua ate, Teoso nitiri iaxitikiri apoka iuamoni aapoko āki. Iua Teoso nitiri txari iua: “Piokanatarí kikiakori Xopimoni Simāo Petro inakori apinina ĩkapani. ¹⁴ Iua sāpiretaiko pite maerekani makatxakiko, paapoko auakani maerekani makatxakiko apaka.”

¹⁵—Nipotorikasaaki nisákirauatini, Erekarí Matamatakoti apoka ninoamoni merepanika atemoni apokini atokotxikana. ¹⁶ Iuusaaki nixinikari Apiananiri sáikire. Iua txari: “Xoāo patxisarauata āparaā. Hĩte patxisataākako Erekarí Matamatakotiā.”

¹⁷ Ininiā Teoso sikari Erekarí Matamatakoti ninoamoni, atemoni isikini atokotxikana Xesosi Kristo Apiananiri sáikire aauikasaaki. Ikara atoko ininiā, !apakata Teoso ninaiatini —itxa Petro.

¹⁸ Petro sáikire ikenakotakana atoko, litsoataikana.

—Peerekari Teoso —itxana.

—Ininiā Teoso auiritari Xoteo minakanuia apaka imaerekanina itakanapinina, Teosokata ātipirika auinina ĩkapani —itxana.

Teoso Auíākani Ātxiokia Sitatxiti Auakani

¹⁹ Estevāo ipinaāka atoko, Xesosi sáikire auíākani misiritaāka, ininiā ninoa

iarika. Iariäkani sari maioakari. Penísia tixinima, Xipri pokomiriütima, Átxiokia sitatxitima pakimimoni isana. Ninoa oerekari Teoso sákire Xoteomoninani. ²⁰Ninoa átikaka Xiprikini, Sirenikini pakini sari Átxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini íkapani. ²¹Apiananiri sikaposotiiretana ninoa. Ininiäkara itomaneri kákiti aukari Apiananiri sákire. Maerekati itakanapana. Ikamarina Apiananiri nireékiti.

²²Ikara apopireta Xesosi sákire auiañkanimoni Xerosareẽ sitatxitiã. Ininiã ninoa iokanitari Panapee Átxiokia sitatxitimoni. ²³Iuaã iua apokasaaki, imarotakasaakiri ninoa apakapiniri erekari Teoso sikakiti, ipoxokoniua. Isikataparaxiniretana. Ótãkikana Apiananiri paniãtakitinoka ikaminina ikini itaparaxinireritikana. ²⁴Erekari Panapee. Ikinika Erekari Matamatakoti paniãtakiti ikama. Aukari Xesosi sákire ikini ixinireritika. Ikara atoko ininiã, itomaneri kákiti aukari Apiananiri sákire.

²⁵Eereka Panapee sari Taaso sitatxitimoni, Saoro inítini íkapani. ²⁶Itaõkitakasaakiri, iminari iua Átxiokia sitatxitimoni. Áti anokanani ikaikotana iuaã Xesosi sákire auiañkanikata. Oerekarina Teoso sákire itomaneri kãkitimoni. Xesosi sákire auiañkani Átxiokia sitatxiti auakani merepitipanika takauãkataãka, “Kristopiki.”

²⁷Iuasaaki átikaka Teoso sákire sãpiretakani Xerosareẽkini sari Átxiokia sitatxitimoni. ²⁸Ninoa átika Ákapo inakori ókitikaua. Erekari Matamatakoti sákire isãpireta:

—Natxinoka auako ikini itixiti —itxa.

Ikara isákire apokapeka Kráotxio Homano auíte inakasaaki.

²⁹Ininiã ikinika Xesosi sákire auiañkani nirekari txineiro iokanatini itariakorimoni Xotéia tõpa auakanimoni. Ito auinina, ito iokanatana. Poiãonoka auinina, poiãonoka iokanatana. ³⁰Panapee, Saoro pakini anikari isikakitina. Isikaro oa txineiro Xotéia tõpa auakani ótãkikakanimoni.

Xesosi Sákire Auiäkani Misiritiko Iuaíkana Apokini

12 Iuasaaki auítetxi, Erotxi inakori, misiritana Xesosi sákire auiañkani. Átikaka itaka kateia áki. ²Iua okapiri Txiako iouata mitaroã. Iua Txiako Xoõo itari. ³Erotxi imarotakasaakiri Xoteoakori apokaerekatiniri Txiakoni okiko, ipaniãtari Petro maíkiko. Imaíkari Petro Xoteoakori kiiniritesaaki, pão miãtiãkati kiiniritisaaki. ⁴Petro imaíka atoko itakari iua kateia áki. Ipaniãtari tesiseisi sotatoakori níkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵Ininiã Petro kateia áki kaikota. Iuasaaki Xesosi sákire auiañkani átipirika misãkiretari Teoso Petro íkapani.

Petro Sikakaãka

⁶Íkanõka, imisiritiko imarotini óti apisapanika, kateia áki Petro imakanãta ipi sotato apaníkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani íkapani. ⁷Patimari Teoso nitiri tokiini. Tirikapi ponika kateia áki. Iuasaakipeka Teoso nitiri õpiríkari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoãkiri katxaka. ⁸Teoso nitiri paniãtari:

—Pimãka pieretaka. Pikiti mata pitaka, ininiã Petro takari. Pimãka

pinopinikiri apaka pitaka, eereka pisa notakata —itxa.

⁹Ininiã Petro sari iua tikini. Kateia ipokíkana. Iuasaaki Petro uãkatari itaponeuatini. !Imarotari atão Teoso nitiri mipokíkiniri iua. ¹⁰Eereka inapari ipi sotatoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokíka. Iua ahoa mapotókire apokasaakina, katimaritika Teoso nitiri takanapari iua. ¹¹Iuasaaki Petro imarotapekari:

—Na nitaponeni itxa. Atãopitikara Apiananiri iokanatarini iniriti itixinekiri nota imakatzakini íkapani. Pataparari Erotxi, iuaritika Apiananiri makatzakano. Xoteoakori nirekari okinino, iuaritika Apiananiri makatzakano —itxa.

¹²Ikara ixinika atoko, isari Maria aapokomoni. Xoão Marko inakori inoro oa Maria. Iuaã itomaneri kãkiti apotiitapekaua, Teoso imisãkiretinina íkapani. ¹³Maria aapoko apokasaaki, akirita. Átokoro Hotxi inakoro sari itoremoni. Okenakotari Petro sãkire. ¹⁴Oimarotakasaakiri Petro mapara apokini, omiteka iriko ãki aapokotxi ãki auakanimoni. Opoxoniuata, txamari omaxinikaretari itore omatakakini Petro íkapani. Ininiã otxari apanakinimoni:

—Aapokotxi toreãtaãpekari Petro —otxa.

¹⁵Ininiã ninoa:

—Pimapitxirita.

—Atãopitikara nisãkire —otxa oa.

Ininiã ninoa:

—Petro kamiritekara.

¹⁶Ninoa ikara atoko inaãtakasaaki, Petro mapara akirinãtapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷Ininiã iuakoã ipinitana:

—Híkenakotari nisãkire —itxana.

Eereka isãpiretana:

—Apiananiri makatzakano nota kateia ãki. Ikinika ikara hísãpiretariko Txiako, apanakini aítariakori pakini —itxa.

Iuasaaki isipe. Átiãtaã isa.

¹⁸Katimatiníkata sotatoakori kateia nĩkatakani tsořikaãta:

—Íteri iua Petro? Kanatokopa itxa Petro pokíkiniri? —itxana.

Initapiimarina Petro. ¹⁹Ininiã Erotxi paniãtana initiko, txamari !apokarina. Erotxi pimaãna sotatoakori Petro nĩkatakani, Petro sinimoni imarotininina íkapani, txamari ninoa !imarotari Petro sinimoni. Ininiã eereka ipaniãtari ninoa sotatoakori okiko Petro mitekini xika.

Ikara atoko inaãka atoko Erotxi sipeka. Xotéia tãpa ipotorika. Sesaréia sitatxitimoni isa.

Erotxi Ipinini Pirena

²⁰Erotxi omanatana Txiro sitatxiti auakani, Sitoõ sitatxiti auakani pakini. Ninoa nirekari iua omanatinina xipokini, kotxi ninoa apakapari nipokori Erotxi tixinekiri. Ininiã ninoa sãkirauata Parásito inakorikata. Iua Parásito nĩkatari Erotxi aapoko, itii pakini. Paimatireri iua. Ninoa sãkirauatakasaaki iuakata, iua auikari ninoa sãkire. Eereka Erotximoni isana neenamati xipokini íkapani. ²¹Erotxi ketotari ikinimane kãkiti imisãkiretini íkapani. Iketo õti apokasaaki ieretakari imãka ereri inakari, auítetxi mãka. Eereka iitopãka auítetxi itopanere nopini. Iuaã iua misãkiretana kãkiti. ²²Ininiã kãkiti txari:

—Teosora sãkirauanãta. Na kãkitini —itxana.

²³Iuasaakipeka Teoso nitiri iaxitikiri okari Erotxi, kotxi iua auiritari kãkiti

iteosonetiniri iua. Ininiã tsoni sotakiperi nika txari iito. Ikara atoko inikoã ipípe.

²⁴Iuasaaki Teoso sãkire iaripireta. Ininiã itomaneri kãkiti auikari Teoso sãkire.

²⁵Panapee, Paoro pakini paríka Xerosareẽ sitatxitiã xipokaãka atoko, Átxiokia sitatxitimoni kanapiriã itxana. Anikarina Xoão Marko ninoakata.

Panapee, Saoro Pakini Mereïko

13 Xesosi sãkire auiãkani sauaki Átxiokia sitatxitiã aua Teoso sãkire sãpiretakani, Teoso sãkire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaeẽ. Auítetxi Erotxi inakori xapitipanika inakasaaki, iua Manaeẽ xapitipanika inakasaaki, imakananitaãka Erotxikata. Apaka Saoro aua Átxiokia sitatxitiã. ²Áti õti Xesosi sãkire auiãkani iuaãtaã takanapari inipokotinina Apiananiri imisãkiretinina íkapani. Iuasaaki Erekar Matamatakoti txana ninoa:

—Himakatxakana Panapee, Saoro pakini paríkatxi ikaminina nota íkapani —itxa Erekar Matamatakoti.

³Ininiã ninoa takanapari inikini Teoso imisãkiretini íkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniãtakiti ikaminina íkapani.

Xipri Pokomiriüti Pirena

⁴Erekar Matamatakoti iokanatana Panapee, Saoro pakini, ininiã ninoa sari Sereósia sitatxitimoni. Iuaã ninoa iereẽtaua maporo äki. Isana Xipri pokomiriütimoni. ⁵Saramina sitatxitiã apokasaakina, isãpiretarina Teoso sãkire aiko äki Xoteo apotiitiniãtaãua. Xoão Marko inakori moianatana ninoa iuasaaki.

⁶Xipri pokomiriüti ípirixititana. Paposi sitatxitimoni isana. Iuaã itaõkitarina kiki

Xoteo. Müiti itxaua. Iuãka Paxesosi. Áti iuãka Erimasi.

—Teoso sãkire sãpiretakarikarano nota —itxa iua.

Txamari na atão isãkire. ⁷Iua moianatari Xipri auakani auíte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sãkire ikenakotini íkapani. ⁸Txamari Erimasi !nirekana ninoa. !nirekar Séxio Paoro auikiniri atão Teoso sãkire.

⁹Iuasaaki Erekar Matamatakoti iteene sikaimaroretari Saoro (ãti iuãka Paoro,) ininiã iteene atamatari iua müiti. ¹⁰Itxari iua:

—Pite Satanasi äkiri pitxaua. Pite atão kamakari mokaiakari pitxaua. Pite kamari ikini sereti maerekati. Ikara atoko ininiã, pimisirienetari kãkiti. Atão inakari Apiananiri sãkire pite nirekar pimamakini. ¹¹Ikara pimaerekani xika Teoso misiritaiko pite uatxa. Mõsiãreti pitxauako. Kona patamatapaniri atokatxi mapaõti.

Iuasaakipeka katxiãri atoko inakari, ipiã apaka apoka Erimasimoni. Ininiã iua nitari äti anikakiri íkapani. ¹²Séxio Paoro atamatakasaakiri Erimasi misiritiko, iua auikari Teoso sãkire. Itsoriãkaata:

—Peerekari Paoro oerekakiti sãkiretiti Apiananiri pirena isãpiretakiti —itxa.

Átxiokia Sitatxiti Pisítxia Tixini

¹³Iposo atoko Paoro imoianariakorikata iereẽtaua maporo äki. Paposi itakanapana. Pexi sitatxitimoni, Pãpíria tixini isana. Pexi sitatxiti auakasaakina, Xoão Marko takanapana ninoa, Xerosareẽmoni ikanapiriini íkapani. ¹⁴Eereka iuaãkana maporo äki iereẽtauana. Isana Átxiokia sitatxitimoni, Pisítxia tixinimoni. Átxiokia sitatxiti auakasaakina tomatiko õtisaaki íroãna aiko Xoteo

apotiitiniātaāua. Iuaā iitopākana.
¹⁵Teoso paniātakiti aātsopateē, Teoso sākire sāpiretakani iōkatsopatakiti aātsopateē pakini atatsopataāka atoko auītetxiakori iuaātaā auakani txana ninoa:

—Aītariakori, ate nirekari hīsākirauatini, hīsākire auiniā, naia kākiti hīsikataparaxiniretini ikapani —itxana.

¹⁶Ininiā Paoro ōkitikaua. Ōkatari iuako ninoa sākirauatini iotokakinina ikapani. Ininiā itxa:

—Nitariakori Isaeo auakanii, apaka hīte Xoteo minakanua Teoso paniātakiti kamakanii, hīkenakotariko nisākire.
¹⁷Isaeo auakani Teosone mereēna aātokiriakorini Exito tixini auakasaakina, āti uākakata auakasaakina. Itxīkitakana ninoa itomane ininina. Iuasaaki Exito auakani misiritana. Ininiā eereka Teoso makatxakana iposotiireē, ininiā itakanaparina Exito tixini.

¹⁸—Eereka, koarēta ano Teoso mīteenekana ninoa āparaā makipakaniātaā, kotxi ikamapikarina maerekati iuaā. ¹⁹Eereka ixipokana setxi pakini āti uāka Kanaā tixini auakani. Eereka isikari iua itixi ninoamoni ātipirika iuaā auinina ikapani. ²⁰Eereka Teoso sikana kōtākikarerini Isaeo auakani auīteakori tīkane. Āti kōtākikarerini aua. Eereka iua ipina. Eereka ātipekana kōtākikarerini aua. Eereka iua ipina. Itxaāpotana koatrosētosi sīkoēta anokanani. Imapotōkire, Samoeo inakori Teoso sākire sāpiretakari ninoa ōtākikakari itxaua.

²¹—Eereka ninoa nirekari auītetxi apiatakari ninoa auīte ininiua ikapani. Ininiā Teoso sikana ninoa Saoo inakori, Kixi ākiri. Iua atokiri kitxakapirīka Pēxamīi inakori. Iua Saoo ninoa auīte apiatakari koarēta anokanani. ²²Eereka Teoso makatxakari Saoo. Itxīkitakari Tavii ninoa auīte apiatakari ininiua.

Teoso sāpiretari Tavii pirenā: “Kākiti Tavii Xeseē ākiri atoko inakari ninireka, kotxi iua kamari ikinika ninireēkiti,” itxa Teoso.

²³—Teoso sikaenetari āti, Tavii apika mekani Isaeo auakanimoni. Isaeo auakani maerekani makatxaākari itxauako. Iua Xesosikara. Iua kākiti maerekani makatxaākari txaua. ²⁴Xesosi parīka ipotorikini apisapanika, Xoāo sāpiretari ikinimane Isaeokini imaerekanina itakanapinina, eereka ipatxisataākana. ²⁵Xoāo parīka ixipokasaaki, ipimaāna ninoa: “Kipa hīuākatatano nota? Nota kona iua hiātapakitini. Iuaritika iua ina nota tikini. Nota poiāori, ininiā !apakata iua takote napokini ikiti mata nimakatxakini ikapani, kotxi iua Apiananiri,” itxa Xoāo.

²⁶Paoro sākirauatapanika:

—Nitariakori, Apraō apika mekaniriakorii, apaka hīte Xoteo minakanua Teoso paniātakiti kamakanii, hīkenakota. Hītemonikari Teoso iokanatarini iokanapirenā kākiti maerekani makatxakiko pirenā. ²⁷Xerosareē auakani, ninoa auīteakori pakini kona imarotari Xesosi Teoso ākiri ininiua. Ninoa atatsopatarini Teoso sākire sāpiretakani sākire ikini tomatiko ōti, iuaritika !imarotarina ninoa sākire. ²⁸Ninoa kona apokari ixika Xesosi okiko ikapani, iuaritika ipaniātari Pirato okiniri. ²⁹Ninoa kamari Xesosimoni ikinipoko mitxi Teoso sākire iōkatsopatakori iaōka. Ipo atoko imakatxakarini iua aamina ipiriāmītakariā. Ikata itxarina kai iriko āki. ³⁰Iuaritika Teoso ōkitikari iua ipīkitximoniipeka auakaripeka. ³¹Ōkitikaāka atoko, ito ōti kākiti atamatari iua. Kariréiakini, iuakata Xerosareēmoni sikani aōkitari iua. Ininiā Xesosi iuaīkana auini pirenā sāpiretakari itxauana ninoa Xesosi

aōkitakani. Isāpiretarina apanakini Isaeo auakani.

³²—Ininiā uatxa ate sāpiretari Teoso iokanapirena erekari hītemoni. Ikara sākiretxiti Teoso kamaenetakiti aātokiri-akorinimoni kitxakapirīka. ³³Īkorasaaki Teoso kamapekari ikara ikamaenetakiti ate ĩkapani, ninoani apika mekanirakori ĩkapani, kotxi iua ōkitikari Xesosi ipīkasaaki, iuaĭkana auāki inini ĩkapani. Kitxakapirīka Teoso sākire iōkatsopatakori Xikari ipiātaā sāpiretari Xesosi ōkitikiniua ōti, kotxi itxari:

Pite namarite. Ia ōti noerekari kākiti pite iri nininiua nota.

³⁴—Kitxakapirīka Teoso sāpiretapekari iua ōkitikiniri Xesosi ipīkasaaki, iuaĭkana imapinakani tīkane, kotxi isākire iōkatsopatakori txari:

Nikamaenetakiti Taviiimoni pitemonikara nikama. Ikara erekari nikamapitikako pitemoni.

³⁵Teoso sākire iōkatsopatakori Xikari tesiseisiātaā txari:

Teoso kona auiritari Erekari Kamakari ĩto paiakini.

³⁶—Kitxakapirīka Tavii auakasaaki, ikamari Teoso nireēkiti, kotxi inirimane auīte itxaua. Eereka ipipe. Ikatapeēka. Inirimanekata ikatapeēka, ininiā ĩto paiaka. ³⁷Xesosipekana, Teoso ōkitikari iua. Iua ĩto kona paiaka. ³⁸Ininiākara nitariakori himarotariko ia. ³⁹Xesosi sākire auīākani maerekani makatxakaāka. Erekarini ninoa. Moisesi paniātakiti kamiko kona makatxakari kākiti maerekani. ⁴⁰Erepaniko. Kitxakapirīka Teoso sākire sāpiretakani sākire iaōka atxiīti apoka hītemoni, kotxi ⁴¹ia atoko itxana:

Hīkenakota, hīte Teoso sākire napetakanii. Hātamatariko niposotiire, iuaritika hīpinako, kotxi !hāuikari niparīka hīte sauaki.

Āti sāpiretiniāri niparīka, iuaritika !hāuikari.

Ikara atoko itxa Paoro sākire ninoamoni.

⁴²Xoteoakori pokīkasaaki Xoteo apotiitiniua aapokotxiti, iusaaki Xoteo minakanuia aiatana Paoro, Panapee pakini iuaĭkana tomatiko ōti ĩkari Teoso sākire isāpiretinina ĩkapani. ⁴³Kākiti apotiitakanuia poterika atoko, itomaneri Xoteo, Xoteo minakanuia Teoso sākire auīākani pakini sari Paoro, Panapee pakinikata. Paoro, Panapee pakini misākiretana ninoa. Ōtākikana ninoa, ikiniōtika atāo ikaminina, kotxi Teoso iteene turetana ninoa.

⁴⁴Ininiā āti tomatiko ōtisaaki ikinimane iua sitatxiti auakani apoka Apiananiri sākire ikenakotinina ĩkapani. ⁴⁵Xoteoakori atapari itomaneri kākiti apokaāpotini Paoro, Panapee pakini sāpiretakiti ikenakotinina ĩkapani. Ininiākara ninoa xikotana Paoro, Panapee pakini. Imisākirepiretana ninoa:

—Na atāo Paoro sākire. !Apakata isākire —itxanātana.

⁴⁶Iusaaki Paoro, Panapee pakini itaparaxinireritikana isākirauatana.

—Ate sāpiretari Teoso sākire hīte Xoteoakorimoni merepitiapanika. Ikara atāo. Txamari hīte !inirekari. Hīte atxiīti !inirekari ātipirika auāki hinini? Ikara atoko ininiā, ate sariko Xoteo minakonimoni, ⁴⁷kotxi Apiananiri paniātaua ate ia atoko:

Tirikapi atoko inakari hītxauako Xoteo minakanuia ĩkapani nisākire atāo ninoa imarotini ĩkapani, ninoa maerekani nimakatxakini ĩkapani, ikini itixiti auakani ikara imarotini ĩkapani,

—itxa Paoro.

⁴⁸Xoteo minakanuia kenakotakasaakiri ikara Paoro sākire, ipoxokoniuatana. Ininiā ninoa:

—Peerekari Apiananiri sākire —itxanātana.

Teoso mereēri kākiti ātipirika iuakata auini ikapani, ininiā iusaaki kākiti kenakotakasaakiri Paoro sākire, ninoa Teoso mereēkini auikari iua sākire.

⁴⁹Iusaaki Teoso sākire iaripireta ikinipoko iua tixini. ⁵⁰Txamari Xoteoakori !apokaerekatari Xoteo minakanuia auikiniri Xesosi sākire. Ininiā isāpiretarina aāpirena sitoakoro apiatakani Teoso paxitakanimoni, sitatxi auakani auíteakorimoni pakini. Ininiā ikara xika ninoa omanatana Paoro, Panapee pakini. Ininiā iokanatana ātiātaā isinina. ⁵¹Ininiā Paoro, Panapee pakini takanapari iuaā. Itakanaparina kipatxi ikiti mataā auakari apaka, kotxi kona ninoa nirekaikari Teoso sākire. Ininiā isana Ikónio sitatxitimoni. ⁵²Ātxiokia sitatxiti auakani Xesosi sākire auiaākani poxokoniuata. Iteene ikamarina Erekar Matamatakoti nireēkiti.

Ikónio Pirena

14 Paoro, Panapee pakini auakasaaki Ikónio sitatxitiā, isana aiko Xoteo apotiitiniātaāua. Isāpiretarina Teoso sākire kākitimoni, ininiā kaiāopokori Xoteoakori, Xoteo minakanuia pakini auikapiretari Teoso sākire. ²Txamari apanakini Xoteoakori Teoso sākire mauiaākani kamaomanākaretana Xoteo minakanuia. Ininiā ninoa omanatana Teoso sākire auiaākani. ³Xesosi iokanatakini Paoro, Panapee pakini okanani auana Ikónio sitatxiti. Ninoa sāpiretari Apiananiri pirena itaparaxinireritikana. Isāpiretarina Apiananiri sikiniri ikinipoko erekari maerekanimoni. Apiananiri oerekari isākirena atāo inini, kotxi isikaposotiiretana ninoa, posotiiretxi, kākiti mimarotakiniti pakini ikaminina. ⁴Kākiti sitatxi

auakani omanatakakana. Apanakini auikari Xoteoakori sākire. Apanakini auikari Xesosi iokanatakini sākire.

⁵Ininiā Xoteo minakanuia, Xoteoakori pakini, ninoa auíteakorikata imisākiretakakaua Xesosi iokanatakini imisiritinina ikapani, kai soroā ikiporonakinina ikapani. ⁶Paoro, Panapee pakini kenakotakasaakiri ikiporonakikona pirena, imitekana. Arisitara sitatxitimoni, Tepi sitatxitimoni, Arikaónia tixini isana. ⁷Iuaā isāpiretarina Teoso iokanapirena erekari kākitimoni.

Arisitara Pirena

⁸Arisitara sitatxiti aua kiki petokak- ititakari iusaaki. Matīpokotakati. Iponaniākasaaki, ipetokakititapeka. ⁹Ikenakotakasaakiri Paoro sākire, Paoro atamatar iua. Iusaaki Paoro imarotari iua kiki auikapiretiniri Xesosi sākire erekape inini ikapani. Ininiā iteene atamatar iua. ¹⁰Itaparāsākireritika Paoro txari iua:

—Pōkitikaua. Pitima —itxari.

Ininiā iusaakipeka ōkitikaua, tīpokota itxa. ¹¹Iusaaki kākiti itikari Paoro kamakiti. Ininiā ninoa akirikata isākireēna, Arikaónia tixini auakani sākireē:

—Teosoakori apoka atemoni. Kikiakori atoko itxana ninoa.

¹²Ninoa takauākatari Panapee, Xópite ininiua. Itakauākatari Paoro Mekório ininiua, kotxi apiata isākirauata. Panapee poiāoka isākirauata. Xópite, Mekório pakini teosoakori kamakoni uāka. ¹³Sitatxi ĩronakikoātaā takote aua Xópite misākiretiko aikoti. Xópite misākiretakani auíte iusaaki minari kema auíteakori, aāui kaiāori pakini sitatxi ĩronakikoātaāmoni. Iuaā iua apanakini kākitekata nirekari kema auíte okinina Paoro, Panapee pakini ikapani, iteosone ikapani okinirina

atokotxikana. ¹⁴ Panapee, Paoro pakini imarotakasaakiri ikamakitina tíkane, imatsorakitarina ninoaka māka, kotxi Teoso !itxauana.

Ninoa kākiti itomanerimoni imitekana. Itapasākireritikana itxana:

¹⁵—Kākiti, kinirepa ikora atoko hītxa? Hīte kikiākini atokokanera atxa ate. Ate uai apoka teoso kākiti kamakiti hitakanapini ikapani, atāo Teoso himarotini ikapani, kotxi atāo Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti āki auakani pakini. ¹⁶ Kítxakapirīka Teoso auiritana ikinipoko kākiti inirekaākitina ikaminina. ¹⁷ Iua Teoso ininiua sāpiretakari kaiāopokori auapika, kotxi erekari Teoso sikakiti kākitemoni oerekari iua Teoso ininiua. Teoso sikari āparaā iaxitikiri kākitemoni. Iua āparaā oerekari iua Teoso ininiua. Takari kikio auakari iua sikakiti erekari apaka oerekari kākiti iua Teoso ininiua. Teoso sikari nipokori ikini sereti kākitemoni. Ikara oerekari iua Teoso ininiua. Iua sikapoxokonitari aākixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kākiti nirekapanikari okiniri kema auīte Paoro, Panapee pakini ikapani. Itapararitika Paoro, Panapee pinitana ninoa, ininiā !ikamarina. ¹⁹ Eereka Xoteakori Ātxiokia sitatxitikini, Ikónio sitatxitikini pakini apoka Arisitara sitatxitimoni. Ninoa kākiti misākiretana Arisitara auakani. Imisākirepiretana Paoro, Panapee pakini, ininiā Arisitara auakani auikari ninoa sākire. Ininiā ikipronakarina Paoro kai soroā. Eereka ikosekaītotarina iua sitatxi mapotōkire. Ninoa uākatari iua ipīpe. ²⁰ Iuaritika Xesosi sākire auīākani apotiitakasaakia iuaakata, Paoro ōkitikaua. Sitatximoni

kanapiriā itxa. Katimatinīkata Paoro, Panapeekata sari Tepi sitatxitimoni.

Ikanapiriāna

Ātxiokiamoni, Síria Tixiniā

²¹ Paoro, Panapee pakini sāpiretari Teoso iokanapirena erekari Tepi sitatxiti auakanimoni. Ninoa oerekari kaiāopokori kākiti. Eereka Arisitara, Ikónio, Ātxiokia pakini sitatxitimoni ikanapiriāna. ²² Iuaā oerekana kākiti Teoso sākire iteene imarotina ikapani. Ōtākikana ninoa Teoso sākire iaōka ātipirika ikaminina. Ia atoko Paoro, Panapee pakini oerekana ninoa: “Teoso aauītetakasaaki, amisiritiko kaiāopokori amīteenekako.”

²³ Ikinipoko Xesosi sākire auīākani apotiitiniātaāua Paoro, Panapee pakini mereēna ninoa ōtākikakani. Ninoa kōtākikarerini iteene auikari Apiananiri sākire. Paoro, Panapee pakini misākiretari Teoso ninoa ikapani. Nipokori itakanapa Teosokata isākirauatini ikapani iuasaaki.

²⁴ Eereka isipekana. Īpirixitarina Pisítxia tixini. Eereka Pāpírria tixinimoni isana. ²⁵ Isāpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶ Iuaā iereētaua maporo āki Ātxiokia sitatxitimoni isinina ikapani. Iuaā Ātxiokia sitatxitiā mitxipeka ninoa iokanataāka Teoso parīka ikaminina ikapani. Iuaātaā Xesosi sākire auīākani misākiretari Teoso ninoa ikapani, Teoso iteene nīkatinina ikapani. Ikara parīkatxi iposope ninoa kamini.

²⁷ Ātxiokia sitatxiti apokasaakina, Xesosi sākire auīākani imakinika apotiitaua ninoakata. Ininiā Paoro, Panapee pakini sāpiretari ikinika Teoso kamakiti. Isāpiretarina Teoso auiritinina Xoteo minakanua apaka auikiniri Xesosi sākire. ²⁸ Paoro, Panapee pakini

auapokota iuaã Átxiokia sitatxitiã Xesosi sãkire auiãkanikata.

Teoso Takaõtxikare Pirena

15 Átikaka kikiakori Xotéia tōpakini apoka Átxiokia sitatxitimoni. Nino a oerekana Xesosi sãkire auiãkani:

—Moisesini paniãtaua Teoso takaõtxikare aĩtoã atakini. Txamari hĩte !hĩtakari, ininiã Teoso !imakatxakari himaerekani —itxana ninoa.

²Paoro, Panapee pakini txana ninoa:

—Na atão hĩte sãkire. Teoso takaõtxikare ninoa ĩtoã !uari, iuaritika Teoso makatxakapekari ninoa maerekani —itxana.

Ininiã itaparakienatakakauana ikara sãkiretxiti xika, ininiã ninoa mereẽna Paoro, Panapee, átikaka Xesosi sãkire auiãkani Átxiokia auakani apaka Xerosareẽmoni isinina ĩkapani.

—Iuaã hĩsãpiretariko ikara sãkiretxiti Xesosi iokanatakinimoni, kiomãtxiakori pakinimoni. Ninoa sãpiretaua atão —itxana.

³Iuasaaki Xesosi sãkire auiãkani takapiretanapana ninoa, ininiã Paoro, Panapee, apanakini pakini potorika. Ninoa ĩpirixititakasaakiri Penísia tixini, Samaria tōpa pakini, Paoro sãpiretana ikinimanemoni:

—Xoteo minakanuia takanapapekari imaerekani. Inirekarina Teoso paniãtakitinoka ikaminina.

Ininiã Xesosi sãkire auiãkani poxokoniuta ikara pirena ikenakotakasaakina.

⁴Eereka Paoro apanakinikata apoka Xerosareẽmoni. Xesosi iokanatakini, kiomãtxiakori, apanakini Xesosi sãkire auiãkani pakini apakapana ninoa. Paoro, Panapee pakini sãpiretari Teoso kamakiti Xoteo minakonimoni. ⁵Iuasaakipeka átikaka pariseoakori, Xesosi sãkire auiãkani, apakapapiretana:

—Ninoa Xoteo minakanuia apakapapitikariko Teoso takaõtxikare. Ninoa kamapitikariko Moisesini paniãtakiti. Hĩsãpiretanako —itxana.

Xesosi Iokanatakini Kiomãtxiakorikata

⁶Ininiã ninoa Xesosi iokanatakini, kiomãtxiakorikata apotiitaua, Xoteo minakanuia ĩtoã Teoso takaõtxikare takiko pirena isãkiretinina ĩkapani. ⁷Ninoa iteene sãkirauatata atoko, iua Petro õkitikaua, misãkireta itxana ninoa:

—Nitariakori hĩte imarotari Teoso mereẽno nota. Hĩte sauaki uatxakapokoikani iua mereẽno nota, iua iokanapirena erekari nisãpiretini ĩkapani Xoteo minakonimoni, ikenakotinina ĩkapani, auikinirina ĩkapani. ⁸Teoso imarotari kãkiti ãkixinire sãkire. Iua sikari Erekar Matamatakoti Xoteo minakonimoni. Ininiãkara aimarotari Teoso apakapari Xoteo minakanuia, kotxi isikari Erekar Matamatakoti ninoamoni, atemoni isikini atokotxikana. ⁹Amaerekani ate ãkixinireẽ Teoso makatxakini atokokanera, Teoso makatxakari imaerekanina ãkixinireẽna, kotxi ninoa auikari Xesosi sãkire. ¹⁰Hĩte txĩkitakari Teoso omanãkarauatini. !Erekar hĩkamakiti. Hĩte nirekari Xesosi sãkire auiãkani kaminiri ikinika Moisesi paniãtakiti, txamari akiomaneakorini kitxakapirĩka !iposotari ikaminirina Moisesi paniãtakiti. Ate apaka !aposotari. ¹¹Moisesini paniãtakiti kamiko !imakatxakari kãkiti maerekani. Amaerekani makatxakaãka, kotxi Xesosi Apiananiri iteene tiretaua ate, ininiã aãuikari isãkire. Ikara atokokana Xoteo minakanuia maerekani makatxakaãka apaka —itxa Petro.

¹²Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso

kamakiti kākiti maposotakinīti, posotiiretxi. Ikara isāpiretakasaakina, ikinimane iuaā apotiitakaniua tsorīkaānāta. Masākireninoka itxana. ¹³ Panapee, Paoro pakini sākirauatata atoko, Txiako txari:

—Nitariakori hīkenakotari nota sākire. ¹⁴ Simāo Petro uatxananira isāpiretaua Teoso tīretinina Xoteo minakanīua, kotxi nīnoa sauaki imereēna kākiti inakitiakori īkapani. ¹⁵ Teoso sākire sāpiretakani kitxakapirīkarini iōkatsopatapekari ikara atoko inakari sākiretxiti. Nīnoa iōkatsopatapekari:

¹⁶ Apiananiri txari: “Eereka nikanapiriā. Noerekai nisāpirena amaneri, notamoni hāpokini īkapani. Hīauīte Taviini auakasaaki, pamimari hāpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamako, ininiā apakatapitika kākiti apokini notamoni.

¹⁷ Ininiā ikini uākati nitanoko nota. Xoteo minakanīua nota akiritakini nīnakitiakori nitanoko nota.”

¹⁸ Ikara atoko itxa Apiananiri kitxakapirīka kākiti imarotini īkapani, itxa Teoso sākire iōkatsopatakori.

¹⁹ —Ininiā notamoni, !erekari apaniātīnina nīnoa Xoteo minakanīua, Teoso sākire auīākani, ate kiomanekorini paniātakiti ikaminina. Ikara atoko inakari pamimari.

²⁰ Maōtākikana nīnoa. Maiōkatsopata nīnoamoni: “!Hinikapiri nipokori teoso kamakorimoni siākori. Hītanoro minakotokatika !hīsīrīkape. Hītaniri minakotikatika hīsīrīkape. !Hinikapiri nipokori manotsāatakori xini. Arēkatxi !hiātape, !hinikape.” Ikaranokara maiōkatsopata nīnoamoni. ²¹ Ikaranoka aiōkatsopata, kotxi apikomoni Moisesini paniātakiti atatsopataāka

aiko āki Xoteoakori apotiitiniātaāua ikini ōti tomatiko ōtisaaki. Moisesini sākire sāpiretaāka ātipirika ikininape sitatxiti, nīnoa iteene imarotini īkapani —itxa Txiako nīnoamoni.

Iokanatsopatakitina Xoteo Minakonimoni

²² Nīnoa Xesosi iokanatakini, kiomātxiakori apaka, ikinimane Xesosi sākire auīākani apaka, nīnoa apokaerekatari ātikaka kiki imereinina Ātxiokia sitatxitimoni Paoro, Panapee pakinikata isinina īkapani. Nīnoa mereēri Xotasi inakori, Sīrasi inakori pakini. Iua Xotasi uāka Pasapasi inaāka. Xesosi sākire auīākani iteene paxitana nīnoa ipi. ²³ Xesosi iokanatakini, apanakini pakini iokanatarī aātsopa iōkatsopatakitina Xotasi, Sīrasi pakini anikiniri. Ia atoko itxa iua iōkatsopari:

Ate hītariakori, Xesosi iokanatakini, kiomātxiakori apaka, aiokanatsopata hīte ātariakorimoni Xoteo minakonimoni, Ātxiokia sitatxiti auakanimoni, Sīria tixini auakanimoni, Sīrsia tixini auakani pakinimoni aiokanatsopata. Ereēkai hīte.

²⁴ Ate kenakoenetari Xesosi sākire auīākani uai auakani sari hītemoni. Nīnoa txai hīte: “Hītakariko Teoso takaōtxikare hītoā. Hīkamariko Moisesini paniātakiti. Ikara himakamakanīsaaki, Teoso !imakatxakapaniri himaerekani.” Ikara atokora itxaina hīte. Ininiā hīte kamaxirexinirenoka hītxa. Uatxa kona hīte imarotari atāo hīkamini. Kona ateni paniātana nīnoa ikara atoko inakari isāpiretiniina hīte.

²⁵ Ininiākara ate apotiitaua. Akinika ate apokaerekatari kikiakori amereēkini hītemoni aiokanatarini Panapee, Paoro

pakinikata. Panapee, Paoro pakini ate tiretakini. ²⁶Ninoa kikiakori amereékini sipeka monókoriátaā Apiananiri Xesosi Kristo paniātakiti ikaminina ikapani.

²⁷Ate iokanatarī Xotasi, Sírası pakini ninoakata hitemoni. Hāpisatoō ninoa sāpiretaiko ate iokanatsopatakititxikana. ²⁸Erekari Matamatakoti apokaerekatakiti sākiretxiti, ate apokaerekatakiti sākiretxiti apaka asāpiretai hīte uatxa. Paniātakori apia mimari !apaniātai hīte. Ianokara apaniātakiti sākiretxiti hīkamako: ²⁹“!Hinikapiri nipokori teoso kamakorimoni sikakori. Arēkatxi !hiātape, !hinikape. !Hinikapiri nipokori manotsaātakori xini. !Hīsirikape sitokata pītanoro minakotokatika. !Hīsirikape kikikata pītaniri minakotikatika.” Iuanokara himakamakaniā, peerekari. Ereēpiko,

itxa ninoa iōkatsopatakiti.

³⁰Paoroma, Panapeema, Xotasima, Sírasima pakini iokanataāka Átxiokia sitatxitimoni. Ninoa iuaā apokana. Apotiitana ikinimane Xesosi sākire auiākani, ninoamoni sika itxarina iua iōkatsopari. ³¹Atatsopatakana atoko ipoxokoniuatana, kotxi erekapirenari ninoa iokanapirena. ³²Xotasi, Sírası pakini Teoso sākire sāpiretakani itxauana. Ninoa iteene sākirauata ninoa Xoteo minakanuia isikataparaxiniretinina ikapani. Ininiā ninoa Xoteo minakanuia apikomoni auikarina Xesosi sākire. ³³Xotasi, Sírası pakini kaikota iuaātaā mapaōti. Eereka Xesosi sākire auiākani takanapapiretana, Xesosi iokanatakinimoni ikanapiriinina ikapani.

—Hīsipiniikaua erekaxinire hinini — itxana.

³⁴Iuaritika Sírası apokaerekatarī iuaā ikaikotini. ³⁵Paoro, Panapee pakini kaikotapanika Átxiokia sitatxiti. Ninoa apanakinikata oerekari Apiananiri sākire iua sākire auiākanimoni. Isāpiretarina iua sākire isākire mimarotakanimoni apaka.

Paoro, Panapee Pakini Iarikini

³⁶Eereka mapaōtipeka inapaka atoko, Paoro misākiretari Panapee:

—Makanapiriā ikininape aapokotxitimoni mitxi Apiananiri sākire asāpiretinimoni. Mamotikaētana aītariakori atauako erekana atxiīti —itxari Panapee.

³⁷Panapee nirekari Xoão Marko inakori anikini ninoakata. ³⁸Txamari Paoro !inirekari anikiniri iua.

—Pāpírīa tixini aāuakasaaki, iua Xoão Marko asikaua. !Nirekaikari atekata iparīkauatini —itxa.

³⁹Ikara xika itaparakienatakakauana. Eereka iarikana. Panapee anikari Xoão Marko. Maporo āki iereētāuana Xipri akori pokomiriūtimoni isinina ikapani.

⁴⁰Paoro mereēri Sírası, iuakata isini ikapani. Iuaātaā Xesosi sākire auiākani misākiretari Teoso, Paoro, Sírası pakini ikapani, Teoso inīkatinina ikapani. Eereka Paoro potorika Sírasikata. ⁴¹Īpirixititarina Síria tixini, Sirísia tixini pakini. Aapokotxi apokasaakina, isāpiretari Xesosi sākire iuaātaā auakanimoni. Isikataparaxiniretana Xesosi sākire auiākani. Ininiā ninoa apia auikari Xesosi sākire.

Tximótxio Moianatana Paoro, Sírası Pakini

16 Paoro sari Tepi sitatxiti. Eereka Arisitara sitatxiti isa. Iuaā aua kiki, Xesosi sākire auiākari, Tximótxio inakori. Inoro Xoteo otxaua. Oa apaka auikari Xesosi sākire. Iri kona Xoteoni. Áti uāka Kreko itxaua. ²Xesosi sākire auiākani, Arisitara auakani, Ikónio

auakani apaka sākire: “Peerekari Tximótxio.” ³Paoro nirekari anikiniri Tximótxio iuakata imoianari íkapani. Ininiã iua takari Teoso takaótxikare Tximótxio ítoã, kotxi Xoteoakori iuaãtaã auakani imarotari Tximótxio iri Kreko ininua. ⁴Paoro imoianariakorikata saãpota ikininape sitatxitimoni. Käkiti aapoko apokaãpotakasaakina, isãpiretarina ninoa Xesosi iokanatakini sākire, kiomãtxiakori sākire pakini. Isãpiretarina ikinimane kãkitimoni. Ninoa sākire aãsopaã iókatsopatakori sãkiretxiti isãpiretana ninoa. Paoro imoianariakorikata ótãkikana ninoa ikara isãkirena auikinina íkapani. ⁵Ininiã ikiniótika kãkiti apiaãpotape auikiniri Xesosi sākire. Itomanepaka auikari Xesosi sākire.

Paoro Taponetari Masetónia Auakari

⁶Paoro imoianariakorikata ípirixitiãpotari Piríxia tixini, Karásia tixini pakini. Iuasaaki Erekar Matamatakoti !auiritana ninoa Xesosi sākire isãpiretinina Ásia tixiniã. ⁷Ninoa apokasaaki Mísia tixini takote, inirekamarina Pitxínia tixini isinina. Erekar Matamatakoti !auiritana isinina Pitxínia tixinimoni. ⁸Ininiã ninoa ípirixititari Mísia tixini. Apokana Tóatxi sitatxiti.

⁹Iua íkanókati Paoro taponeuata. Itaponetari kiki Masetónia tixini auakari. Itimanãta. Amanããntari:

—Uaimoni pina Masetónia tixini. Pi-moianataua ate —itxari.

¹⁰Ininiã Paoro taponeuataka atoko, ate xinikari:

—Masapoka Masetónia tixinimoni, kotxi atãoka Apiananiri akiritaua ate Teoso iokanapirena erekari kãkiti ikiraãkinimoni asãpiretini íkapani.

Ininiã aiamata Masetóniamoni asini íkapani.

Arítxia Auikari Xesosi Sākire

¹¹Tóatxi ioporokote ate iereëtaua maporo äki. Asapitipo Samotirásia ipokomiriüti. Pokatimari óti ate sari Niápori sitatxiti. ¹²Iuaã apotorika. Asari Piriposi sitatxitimoni, Masetónia tixiniã. Masetónia tixiniã iua sitatxi mitari. Piriposi atoko inakari !auari. Iuaã auana kaiãopokori kãkiti Homa sitatxitikini. Ate napari mapaóti iuaã.

¹³Tomatiko ótsaaki sitatxi ítinikata ate sari uini ítinikata. Ate uãkatari uini ítinikata Xoteoakori apotiitiniãua Teoso imisãkiretinina íkapani. Ininiã ate apoka iuaã. Atãopitika ate uãkatakiti. Aãpokaro Xoteoakoro. Iuaã apotiitauana Teoso imisãkiretinina íkapani, ininiã aítópaka, ninoakata asãkirauatini íkapani. ¹⁴Sito Arítxia inakoro aua ninoa sitokata. Oa txíta poporeri vëtxitakaro otxaua oa. Txiatxira sitatxitikero oa. Teoso misãkiretakaro oa. Iuasaakipekara okenakotari asãkire. Iuasaaki Apiananiri iteene kamaimaroretaro oa Paoro sãpiretakiti, ininiã oa auikari isãpiretakiti. ¹⁵Ininiãkara oa, oaãpoko auakani apaka, patxisataãka. Eereka oa aiataua oaãpoko äki akaikotini:

—Masa naapoko, hikaikotini íkapani. Hitemoni atão nauikiniãri Apiananiri sākire, ininiã notakata hikaikota —otxa.

Ikara atoko oa aiataua oakata akaikotini, ininiãkara akaikota oaãpoko.

Paoro, Sírsasi Pakini Kateia Äki Auini

¹⁶Äti óti Teoso misãkiretiko aikotimoni asikasaaki, ataókitaro átokoro iamotakoro. Maerekati matamatakoti auãítotaro oa. Iua maerekati matamatakoti imarotari kãkiti kamakiti apisapanika. Oa amotakani apakaparo ito txineiro oimarore íki. ¹⁷Oa átokoro osapika Paoro tikini, ate tikini apaka. Oãkiritapika:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini ikapani —otxaāpokata.

¹⁸Itanaōtika ikara atoko oākirināta. Ininiā Paoro maerekaxiniretinoka itxa oākiritakiti xika. Āti ōti isapotorika, paniāta itxari maerekati matamatakoti:

—Xesosi Kristo uākaā nota paniātai, pitakanapiniro aroa ātokoro —itxa.

Iuasaakipeka maerekati matamatakoti takanaparo. ¹⁹Oa amotakani ikara imarotakasaaki, otsopa imapaka-papekaniika oimarore īki, ininiā imaīkarina Paoro, Sírası pakini. Ikosekaītotana, anikana sitatxi apanīkaki auītetxiakorimoni. ²⁰Iuaā apokana. Isāpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiā sitatxi auakani omanākarauata ninoa sāpiretakiti xika. ²¹Ate amakinika Homano atxaua. Aimarotapekari aāuiākiti aāuite paniātakiti. Txamari naia oerekaua ipinimonipo inakari akamini ikapani. Naia oerekaua āti uāka auiākiti sākiretxiti. !Auiritaāka aāuikiniāri naia oerekapiretakiti. !Auiritaāka akaminiri —itxana.

²²Iuasaaki kākītipokoni iuaā apotiitakania nirekari Paoro, Sírası pakini iāsokinina. Ninoa auītetxiakori matsorakitari Paoro māka, Sírası māka apaka, imaktxakinina ikapani. Ipaniātarina apanakini aāpitsaā ixirokitatiko. ²³Ixirokitatapeēkana atoko, kateia āki okaākana Paoroni, Sírasini pakini. Auītetxiakori paniātari iua kateia nīkatakari, inapokopiretiniri imasikakakoni tīkane. ²⁴Ininiākara kateia nīkatakari okaraītotana Paoro, Sírası pakini kateia irikoākixiti. Ieretakari ninoa kiti isikatatxi taopata kamapakotatakori āki, imaktxakakanina ikapani.

²⁵Īkanōka Paoro, Sírası pakini misākirenātari Teoso. Ixikarauanātana Teoso ikapani. Apanakini kateia āki auakani kenakonātari. ²⁶Iuasaaki katimaritika itixi iakeēkata iteene. Kateia patapi apaka iakeēkata. Iuasaakipeka kateia tore takaka. Iītxikikona metao kamakori, pirikeri āki auakani ītxikikona, karakitakata, katxaka itxa metao. ²⁷Iuasaaki kateia nīkatakari meraka. Iua atamatarī kateia tore takakapeka, ininiā iuākatari ikinimane kākīti inīkatakini mitekapeka. Ninoa mitekaākamako, iua auīte okamariko iua, iparīka imakamakani xika. Ininiā ikosekaro iouata mitaro iuaka iorotiniua ikapani. ²⁸Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹Iua kateia nīkatakari amanaāri tirikapi. Katimaritika iroā. Ipamaka Paoro, Sírası pakini apisatoō. Ikikinanaākata. ³⁰Eereka imipokīkana ninoa. Iua:

—Kiatokopa nikama, nimaerekani Teoso makatxakini ikapani? —itxana ninoa.

³¹Ninoa:

—Pauikariko Apiananiri Xesosi sākire, ininiākara Teoso makatxakari pimaerekani, paapoko auakani maerekani apaka —itxari.

³²Eereka Paoro, Sírası pakini sāpiretari Apiananiri sākire iuamoni, iua aapoko āki auakanimoni apaka. ³³Iuasaaki imaropirīkata kateia nīkatakari arokari ninoa karo. Eereka iua imiakorikata, ītanorokata patxisataāka. ³⁴Eereka anikana Paoro, Sírası pakini aapoko āki. Isikakienatana. Iua imiakorikata, ītanorokata poxokoniua, kotxi iuasaaki ninoa auikari Teoso sākire.

³⁵Katimatinīkata auītetxiakori iokanatana initiriakori kateiamoni,

Paoro, Sírası pakini isikakini íkapani. Ninoa apokasaaki, itxana kateia nĭkatarimoni:

—Pauritana Paoro, Sírası pakini isinina.

³⁶ Ininiã iua kateia nĭkatakari sãpiretari Paoro:

—Niauĩteakori iokanapireta notamoni hĭte nisikakini íkapani. Ininiãkara hisipiniĩkaua erekaxinirepeka hinini —itxana.

³⁷ Txamari Paoro txari auĩtetxiakori nitriakorimoni:

—Ari, Homanoakorikareua ate, iuaritika auĩtetxiakori Homanoakori iaritataua ate ikinimane apisatoõ. Maxikatiĩka ninoa iaritataua ate. !Akamari maerekati. Eereka kateia ãki ninoa okaua ateni. Uatxa ninoa nirekari iokanatinuia ate ikinimane mimarotakinitipanika. Konapitini. Ninoapitikarako inari uai. Ninoa makatxakaua ate uai —itxa Paoro ninoamoni.

³⁸ Ninoa kikiakori kanapiriã iauĩteakorimoni. Isãpiretarina Paoro iokanapirena. Ninoa auĩteakori imaropiretakasaakiri Paoro, Sírası pakini Homano ininiuana, ninoa pĭkarauata, kotxi ninoa maxikatiĩka misiritana Paoro, Sírası pakini.

³⁹ Ininiãkara ninoa sari Paoromoni, Sírası pakinimoni. Ninoa:

—Ate !imarotari hĭte Homano hininiuana. Aimarotaãkamariko !amisiritamaiko —itxana.

Eereka ninoa auĩtetxiakori mipokĩkana Paoro, Sírası pakini.

—Sitatxi hĭtakanapako —itxana.

⁴⁰ Ininiã Paoro, Sírası pakini takanapari kateia. Arĩtxia inakoro aapokomoni isana. Iuaã aõkitana kãkiti Xesosi sãkire auĩãkani. Paoro, Sírası pakini sikataparaxiniretana ninoa. Eereka isipekana, iua sitatxiti itakanapinina.

Tesarónika Sitatxiti Pirena

17 Paoro, Sírası pakini napari ãpĩpori sitatxiti. Apikomoni inaparinina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ² Paoro itotapekari Xoteo apotiitiniãtaãua aikotimoni isini. Ininiãkara iua sari iuaã. Ipi ãti pakini õti tomatiko õti, isari iuamoni. Iuasaaki Teoso sãkire iõkatsopatakori isãpireta kãkitimoni iuaãtaã auakanimoni. Ninoa pimarauata, ininiã iua sãpirenauata.

³ Ininiã Paoro txari:

—Teoso sãkire iõkatsopatakori oerekaua ate: Teoso mereẽkiti misiritaãkapitikako, okaãkapitikako. Eereka õkitikapitikauako, iuaĩkana auãki inini íkapani. Ia Xesosi hĭtemoni uatxa nisãpirenãtakiti Teoso mereẽkitipitikara iua —Paoro txana ninoa.

⁴ ãtikaka Xoteoakori auikari Paoro sãkire, ininiã Paoro, Sírası pakini moianariakori itxapekauana. Kaiãopokori Akaia tixini auakani Teoso sãkire auĩãkani, auikari Paoro sãkire apaka. Kaiãopokoro sitoakoro, auĩtetxiakori ítanoroakoro, auikari Paoro sãkire apaka.

⁵ Xoteoakori, Paoro sãkire mauĩãkani, xĭkotari Paoro. Ininiã ninoa apotiitana kãkiti kaneenamarini, maparĩkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteẽkatana. Ikinimane sitatxi auakani kenakotari. Neenamati atoko itxakatana. Imitekana Xasão inakori aapokomoni. Ñroãkatana itapararitikana, Paoro, Sírası pakini initinina. Inirekarina imipokĩkinirina ninoa kãkiti apotiitakanimoni apisatoõ.

⁶ Txamari Paoro, Sírası pakini !uari iuaã. Ininiã ikosekaĩtotarina Xasão. Apanakini Xesosi sãkire auĩãkani

apaka ikosekaĩtotana. Iauĩteakorimoni anikana. Isãpiretarina iauĩteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineẽpekarana uatxa. ⁷Ia Xasão apakapana ninoa. Iua aapoko ikaikotana ninoa. !Ikamarina aãũte Sesa inakori paniãtakiti, kotxi ninoa oerekari kãkiti ãti auĩtetxi ininiãua, Xesosi inakori —itxana iauĩteakorimoni.

⁸Ikara sãkiretxiti ikenakotakasaakina, kãkiti apotiitakaniua akiripoakata. Auĩtetxiakori !imarotari ikamakitina tĩkane. ⁹Eereka auĩtetxiakori misãkiretana Xasão, apanakinikata:

—Hiĩkitxitana hĩsikakiko ikapani. Eereka auiritaina hĩsini.

Ininiã eereka auiritana isinina.

Peréia Sitatxiti Pirena

¹⁰Kikatapeka inakasaaki, Xesosi sãkire auĩãkani iokanatana Paoro, Sírası pakini Peréia sitatxitimoni. Iuaã Peréia sitatxiti ninoa apoka atoko, iroãna aikoã Xoteo apotiitiiniãtaãua. ¹¹Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopatarari Teoso sãkire iõkatsopatakorari, kotxi inirekarina imarotininina:

—Paoro sãkire atão atxiĩti? —itxana.

¹²Ininiã kaiãopokori Xoteoakori auikari Xesosi sãkire. Kaiãopokoro sitoakoro Akaia tixini auakani apaka auikari Xesosi sãkire. Naia sitoakoro auĩtetxiakori iãnoroakorokara. Kaiãopokori kikiakori Akaia tixini auakani apaka auikari Xesosi sãkire.

¹³Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sãkire Peréia sitatxitiã. Ininiã ninoa sari Peréia sitatxitimoni. Apokaãkana atoko, itxiãkitakarina kãkiti ahoaãtaã

apotiitakaniua Paoro omanatinina ikapani. ¹⁴Ikara atoko ininiã, Xesosi sãkire auĩãkani iokanatari Paoro potxoari uinitimoni. Sírası, Tximótxio pakini kaikotapanika Peréia sitatxiti. ¹⁵Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírası, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶Ininiã Atena sitatxitiã Paoro iãtapari Sírası, Tximótxio pakini apokini. Iuusaaki Paoro itikari kaiãopokori teoso kãkiti kamakiti. Sitatxi xãpoka kãkiti teosonenoka. Ia xika Paoro matinaniuata. ¹⁷Ininiãkara Paoro oerekari Teoso sãkire Xoteoakorimoni aiko ãki Xoteo apotiitiiniãtaãua. Xoteo minakaniua, Teoso sãkire auĩãkani apaka, Paoro oerekari Teoso sãkire iuaãtaã. Ninoa pimarauata, ininiã imisãkiretakana Teoso sãkire ixinikinina ikapani. Ikiniõtika Paoro oerekari Teoso sãkire kãkitimoni, nipokori iamotikoãtaã sikanimoni. ¹⁸Kãkiti kaxinikaxitirerini, Epikoreo inakoni, Esitóiko inakoni apaka sãkirauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka õkitikiniua, iuaikana auãki inini pirena. Ininiã ãtikaka:

—Natokopa itxa ikara inakari sãkiretxiti? Uuato sãkire atoko itxa. !Kĩkiteri iua —itxana.

Apanakinipekana txari:

—Isãpiretari ãti itixiti auakani teosone pirena.

Paoro Sãpirenauata Ariópako Inakoriãtaã

¹⁹Eereka ninoa kaxinikaxitirerini anikari Paoro aiko kãkiti apoti-

itiniátaãua, imiriĩ nopini Ariópako inakoriátaã. Iuaã ninoa txari:

—Ate nirekari aimarotini poerekakiti sãkiretxiti. Mitxi kona ate kenakotari ikara atoko inakari sãkiretxiti. ²⁰ Ipinini poerekakiti sãkiretxiti !aimarotapanika. Ipinimonipo itxa poerekakiti. Ininiã pisãpiretau. Poerekaua, aimarotini ikapani —itxarina Paoro.

²¹ Ikara atoko itxana, kotxi ikiniõtika Atena sitatxiti auakani, apaka áti itixiti ikani Atena kaikotakani nirekari átiátaãkiri sãpiretakiti imarotini ikapani, ininiã ikiniõtika amaneri sãkiretxiti ikenakonãtana.

²² Paoro ikinimane apisatoõ itima, imiriĩ Ariópako inakoriátaã. Iua txana ninoa:

—Kikiakori, Atena sitatxiti auakanii, nitikapekari hĩteosone kaiãopokori, ininiã nimarotari iteene hĩpaxitiniri hĩteosone. ²³ Ahoaãtaã ninapaãpotakasaaki, natamatari kaiãopokori hĩteosone misãkiretikoãtaã. Iuasaaki natamatari áti hĩteosonemoni sikakori takikoãtaã. Iuaã natatsopatari iökatakori: “Uai Teoso mimarotakoti misãkiretikoãtaã.” Iua hĩteosonetakiti, himimarotakiniti, iuapitikara uatxa nota sãpiretai hĩte.

²⁴ —Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auĩte itxaua iua. Iaxiti auakani auĩte apaka itxaua iua. !Ikaikota kãkiti kamakiti aikotiã. ²⁵ Ikinipokokara auapeka Teosomoni, ininiã !inirekari kãkiti kamakiti iua auini ikapani. Teosopitikara txikitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitipanika kãkiti !auari, eereka Teoso kamari kiki Atão inakori. Ikini uãkati kãkititi atokiri itxaua iua Atão. Teoso iokanatana

ninoa ikini itixitiã auinina. Kãkiti mauakani apisapanikara, imereẽri kãkiti iponaniini õti tĩkane. Iaõtari kãkiti auiniátaã tĩkane. ²⁷ Ikara atokora itxa Teoso kamakiti. Teoso txikitakari kãkiti nitiniri Teoso. Initaãpotakasaakirina, atxiiti ninoa apokari Teoso, kotxi kona õtakoni aua Teoso. ²⁸ Áti txapekari: “Teoso txikitakaua auãki anini, atĩpokotini ikapani. Iua matxikitakaniãua auãki anini, !aãuari.” Kaxikarerini hĩte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mitxi kãkiti !imarotari atão inakari. Iuasaaki Teoso !imisiritana kãkiti imimarotakanisaakina. Txamari uatxaika ipaniãtari ikininape kãkiti ikini itixiti auakani imaerekanina itakanapinina ikapani. ³¹ Ikara atoko Teoso txari ikinimane kãkiti, kotxi iua ketotapekari áti õti kãkiti misiritiko õti. Xesosi Teoso mereẽkiti iuakarako sãpiretariko kãkiti misiritiko ikara õti apokasaaki, kotxi iua imarotari atão inakari. Aimarotari Xesosi Teoso mereẽkiti ininiãua, kotxi Teoso õkitikari iua, iuaikana auãki inini ikapani —Paoro txana ninoa.

³² Xesosi iuaikana auãki inini pirena ikenakotakasaakina, átikaka napetari Paoro. Apanakini:

—Ate nirekari pisãpirena iuaikana ak-enakotini —itxarina Paoro.

³³ Ininiã Paoro sipe. ³⁴ Apanakinipekana auikapitikari Paoro sãkire. Txionísio inakori, Atena sitatxiti auakani auĩte, auikari isãkire. Apaka sito Tamari inakoro auikari isãkire.

Korīto Sitatxiti Pirena

18 Eereka Paoro takanapari Atena sitatxiti. Korīto sitatxitimoni isa. Iuamoni apoka. ²Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itária tixini ìkari. !Okanani apoka Korīto sitatxiti. Apoka ìtanorokata, Pirisira inakorokata. Ninoa takanapari Itária tixini, kotxi Itária auakani auite Kráotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³Eereka ikaikota ninoakata, kotxi ninoa parīka iua Paoro parīkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparīkauatini ìkapani. ⁴Ikiniõtika tomatiko õti, Paoro sari aiko Xoteo apotiitiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina ìkapani.

⁵Sírasi, Tximótxio pakini takanapari Masetónia tixini. Korīto sitatxiti apoãkana atoko, Paoro takanapari iparīka papiri aamata kamakori ikamini, Teoso sãkire kãkitimoni ikiniõtika isãpiretini ìkapani. Iua oerekana Xoteoakori Teoso mereëkitipitikara iua Xesosi. ⁶Txamari ninoa Xoteoakori omanatari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iõokari imãka ninoa apisatoõ aãpani katxakini ìkapani, omanãkare oerekini ìkapani. Ininiã Paoro txana:

—Teoso !apakapai hīte Xesosi sãkire himauikakani xika. Kona nota xikani, kotxi nisãpiretapekamai hīte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

⁷Ininiãkara Paoro takanapana ninoa. Isari Txísio Xósito inakorimoni iua aapoko ikaikotini ìkapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸Aiko Xoteo apotiitiniãtaãua sikani auite Krispo inakori auikari Apiananiri Xesosi sãkire. Ìtanoro, imiakori apaka, auikari Xesosi sãkire. Kaiãopokori kãkiti Korīto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹Áti ìkanõkati Teoso txikitakari Paoro itaponeuatini. Itaponemoni Apiananiri misãkiretari iua:

—!Pipikarauatape.

Nisãkire

pisãpiretapitipo kãkitimoni. !Piotokape. ¹⁰Kotxi nota auapika pitekata. Pikarotakiri !auari, kotxi kaiãopokori kãkiti nota nakitiakori ìkorapokoriti auari —itxa Paoromoni.

¹¹Ininiã Paoro kaikota iuaã áti ano, ipixini ano pakinikanani Teoso sãkire oerekini ìkapani.

Xoteoakori Anikari Paoro Káriomoni

¹²Eereka iuaã Akaia tixini auakani auite áti ìroã, Kário inakori. Iua Homano itxaua. Homanoakori auitetari iua. Iuasaaki Xoteoakori apotiitaua. Ninoa maĩkari Paoro. Anikarina aiko kãkiti misiritiko sãpiretikoãtaã. ¹³Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴Paoro sãkirauatini apisapanika, Kário txana Xoteoakori:

—Nisãpiretai hīte Xoteoakori.

Paoro kamaãkamariko maerekati, nota kenakotamariko apikomoni hisãkiremako. ¹⁵Txamari !ikamari maerekati. Hīte taparakienatakakaua

hãuikapiretakiti xika, hãtokiriakorini oerekapiretakiti xika. Hïte Xoteoakori. Nota ãti uãka nitxaua, ininiã hïtekara xinikari atão inakari. Kona notani sãpiretai hïte auiãkiti —itxa Kãrio.

¹⁶Ininiã omitikana ninoa, aiko kãkiti misiritiko sãpiretikoãtaã õpõkikinina ïkapani. ¹⁷Iuasaaki Krekoakori maïkari Sõseni inakori. Iuani Xoteoakori apotiitiniãtaãua sikani auïte. Krekoakori xirokitatari aãkeë aiko kãkiti misiritiko sãpiretikoãtaã apisatoõ. Txamari Kãrio !imaãkatari.

Paoro Kanapiriã Ãtxiokia Sitatxitimoni

¹⁸Eereka Paoro kaikotapanika mapaõti iuaã Korïto sitatxiti Xesosi sãkire auiãkanikata. Eereka iua takapiretanapana ninoa. Isipe Pirisira, Ákira pakinikata. Iereëtauana maporo ãki, Síria tixinimoni isinina ïkapani. Sëkireia sitatxiti apokana. Iuaã Paoro sãpiretari Teoso ikamaenetakiti Teoso ïkapani. Eereka ikixatari ikii ikamaenetakiti ixinikini ïkapani. ¹⁹Ninoa apoka Épeso sitatxiti. Iuaã Paoro takanapana Pirisira, Ákira pakini. Paoro ïroã aiko ãki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰Ninoa misãkiretari Paoro ninoakata apikomoni ikaikotini ïkapani. Txamari Paoro !nirekari ikaikotini.

²¹—Nisariko kiiniri Teoso misãkiretiko aikotiã Xerosareë. Eereka Teoso nirekiniãri, uai nikanapiriã hïtemoni —itxa Paoro.

Eereka isipe. Iereëtaua maporo ãki. Épeso sitatxiti itakanapa. ²²Sesaréia sitatxiti apoka Paoro. Eereka isa Xerosareëmoni. Iuaã apokasaaki, ianapokota Xesosi sãkire auiãkanimoni. Eereka isa Átxiokia sitatxitimoni. ²³Iuaã ikaikota mapaõti. Eereka isipe. Karásia tixini, Piríxia tixini

apaka ïpirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵Iua oerekapeëkaika Xesosi sãkire, ininiã atão Xesosi sãkire isãpireta kãkitimoni. Ipoxoniritika isãpirenauata. Txamari kãkiti patxisatiko pirena !iteene imarotapanika. Xoõo kapatxisareri oerekapiretakitinanira imarota. ²⁶Iua Aporo sãpirenauata itaparaxinireritika aiko ãki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ïkapani. ²⁷Eereka Aporo:

—Ninirekari Akaia tixinimoni nisini —itxa.

Ininiã Xesosi sãkire auiãkani:

—Ari, erekapitikari pisini.

Ininiã Xesosi sãkire auiãkani, Épeso auakani, iokanatsopatarari itariakorimoni Akaia tixini auakanimoni. Itxana iõkatsopariã: “Hãpakapariko aïtari Aporo inakori.” Aporo apokasaaki Akaia tixini, iteene imoianatana Xesosi sãkire auiãkani. Ninoa auikari Xesosi sãkire, kotxi Teoso iteene tirtana ninoa. ²⁸Ikinimane apisatoõ Aporo oerekana Xoteoakori, Xesosi sãkire mauïãkani, Xesosi atãopitika Teoso mereëkiti ininiua. Teoso sãkire iõkatsopatakoriã iua oerekana Xesosi Teoso mereëkiti ininiãua. Ininiã Xoteoakori !kasãkirena.

Paoro Épeso Sitatxiti Auakasaaki

19 Aporo Korïto sitatxiti auakasaaki, Paoro ïpirixititari Épeso tõpa Épeso sitatxiti apokini

íkapani. Iuaã aõkitana kãkiti Xesosi sãkire auiaãkani. ²Paoro pimaãna ninoa: —Xesosi sãkire hãuikasaaki, hãpakap- atari Erekar Matamatakoti? —Paoro tx- ana ninoa.

Ininiã ninoa:

—Kiripitipa iua Erekar Matamatakoti? !Aimarotari —itxana.

³Ininiã Paoro:

—Kanatokopa inakariãpa hĩte patxisataãka, Erekar Matamatakoti himimarotakani?

Ininiã ninoa:

—Ari, Xoão patxisarauatini atoko in- akarikanera ate patxisataãka —itxarina Paoro.

⁴Ininiã Paoro:

—Xoão patxisatana kãkiti maerekati takanapakani. Itxana ninoa: “Hĩteko iteene auikapiretariko nitikini apokakari, Kristo Xesosi inakori,” Xoão txari kãkiti —itxa Paoro.

⁵Ikara ikenakotaãkana atoko, ninoa patxisataãka Xesosi Apiananiri uãkaã.

⁶Iuasaaki Paoro takari imakinika iuako ninoa nopini. Iuasaakipeka ninoa apaka- pari Erekar Matamatakoti. Iuasaaki ni- noa sãkirauata kãkiti ãti uãka sãkireẽ. Isãpiretarina Teoso sãkire kãkitimoni.

⁷Ninoa kikiakori atxiiti tosi pakini.

⁸Ipi ãti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxinireritika. Apanakinikata imisãkirenãtakakauana. Paoro nirekana ninoa auikinirina Teoso sãkire, Teoso auĩtetxi ininiãua pirena.

⁹Txamari ãtikaka ninoa !inirekar auikapiretinirina, kotxi !inirekarina ikara atoko inakari sãkiretxiti. Ninoa misãkirepiretari Xesosi sãkire ikinimane kãkiti apisatoõ. Ininiãkara Paoro takanapana ninoa. Anikana Xesosi sãkire auiaãkani iuakata. Ikiniõtika Txirano inakori oerekarauatiniãtaã Paoro oerekari Teoso sãkire kãkitimoni. Ninoa pimaãapotakakaua

Teoso sãkire imarotininina íkapani. Apakapapireãpotakakauana. ¹⁰Iuaã Paoro oerekarauata ipikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹Teoso sikaposotiiretari Paoro posotiiretxi ipinimonipo inakari ikamini. ¹²Ikara atoko ininiã ikii mata, imãka iparĩkauatini íkapani apaka anikaãka amianatakanimoni, ininiã Teoso txikitakana amianatakani erekape ininina. Maerekani matamatakoni auãĩtotiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³Iuasaaki apanakini Xoteoakori, miĩ- tiakori, maerekani matamatakoni omi- tiãkani, sari kãkitimoni maerekani mata- matakoni omitikinina íkapani. Xesosi pirena ikenakotana. Ininiã eereka ninoa txari maerekani matamatakonimoni:

—Apaniãtai hĩsipiniikaua Xesosi uãkaã, Paoro sãpiretakiti Xesosi uãkaã —itxana ninoa.

¹⁴Iuasaaki aua kiki Xoteo, Sepa inakori. Sasetotxiakori auĩte itxaua. Iua anaakori kiki setxi pakini. Sepa anaakori paniãtana maerekani matamatakoni sini Xesosi uãkaã. ¹⁵Txamari ãti õti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hĩte !nimarota. Kiniparai hĩte? — itxa maerekati matamatakoti.

¹⁶Iuasaakipeka kiki maerekati auãĩ- totakiti okakataua ninoa nopini. Api- ataparata iua maerekati. Iuasaaki iua ãsokitakatapena ninoani. Ininiã ninoa miteẽkata, kasarapekana, kakaropekana itxapena.

¹⁷Ikinimane kãkiti Épeso sitatxiti auakani kenakopiretari

ikara ene. Xoteoakori, Krekoakori apaka kenakopiretari ikara ene, ininiākara ipīkarauatana. Ikara atoko ininiākara Xesosi uāka apiata ipaxitaāka. ¹⁸Kaiāopokori Xesosi sākire auīākani apotiitaua. Ikinimane apisatoō isāpiretarina maerekati mitxi ikamakitina. ¹⁹Apanakini kasikapōererini apaka apoka iuaā. Iminarina sikapōerexi apaiāōkiko tsopa. Ikinimane apisatoō iotikarina. !Inirekaikarina maerekati ikaminina. Iaōtarina ikara aātsopa īki. Iiki sikoēta mio txineiro ota pirata kamakoro. Kaiāopokoro txineiro. ²⁰Ikara atoko ininiāpanirako Apiananiri sākire iaripiretako ikini itixiti. Kaiāopokori kākiti apiata auikaāpotari Apiananiri sākire.

²¹Eereka Paoro ākixinire txari:

—Nīpirixititariko Masetónia tixini, Akaia tixini pakini. Iposo atoko Xerosareēmoni nisako. Iposo atoko Homa sitatxitimoni nisako —itxa ākixinireē.

²²Iokanatana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniā.

Neenamtxi Épeso Sitatxiti Auini

²³Iuasaaki Paoro Épeso sitatxiti auakasaaki, kākiti Xesosi oerekapiretakiti manirekakani misākirepireāpotari Paoro, kotxi !inirekarina Xesosi oerekapiretakiti. ²⁴Iuasaaki kiki Temétxio inakori aua iuaā. Ikamari aiko axapitipikiri inakari. Krekoakori teosone Txiana inakoro misākiretiko aikoti atoko inakari ikama. Kaiāopokori ikama pirata kamakori ivēxtitini ikapani. Iua, initiriakori apaka apakaparo txineiropokoni iparīkana īki. ²⁵Iua Temétxio pīkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka īki. ²⁶Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso !itxaua.” Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auīākani auapeka. Kaiāopokori kākiti !inirekaikari teoso ate kamakiti. ²⁷Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Api-ananiri oa —itxanātana ninoa.

²⁹Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotiitiniātaāua aikotimoni anikaākana, mīroā itxana. ³⁰Ikara Paoro imarotakasaaki, inirekari iroini kākitekata isākirauatini ikapani, txamari Xesosi sākire auīākani !auiritari iua iroini. ³¹Ātikaka Ásia tixini auakani auīteakori, Paoro tiretakani, iokanapireta Paoromoni:

—Kona pīroāpeko kākiti apotiitiniātaāua aikoti āki —itxarina iokanapirena.

³²Aiko āki ikinimane akiripoanankata. Apanakini akirikatakiti ipinimonipo. Apanakinipekana akirikatakiti ipinimonipo itxanātana, kotxi kaiāopokori kākiti txari:

—Kixikapa aāpotiitaua?

!Imarotarina ixika. ³³ Xoteoakori iuaã apotiitakanuia katikari Arexãtri inakori ikinimane apisatoõ, isãkirauatini ikapani. Iuasaaki õkitikari iuako kãkiti iotokini ikapani, isãkire ikenakotinina ikapani. ³⁴ Txamari ninoa imarotakasaakiri Arexãtri Xoteo ininiãua, akiripoakatana ipi oara:

—Txiana, Épeso auakani teosone, Api-ananiro —itxanãtapikana.

³⁵ Eereka auítetxi inakariua apoka ninoa apisatoõ. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nãkatiniri ateosone Txiana misãkiretiko aikoti. Apiananiro oa. Ninoa imarotari atenokara nãkatiniri kai oa ãto atoko inakari iaxiti katxakakaro. ³⁶ Ikinimane imarotapekari ikara inakari, ininiãkara hãotokako. Iteene hãxinikariko hãkamakiti tãkane. Maxikatãika !hãkirinãtape. ³⁷ Kotxi hãte minana naia kikiakori uaimoni, txamari !iãtirãkarina tiitxi ateosone misãkiretiko aikoti ãki auakari. !Imisãkirepiretarona ateosone. ³⁸ Temétxio, iuakata parãkauatakani pakini, nirekiniãri naia kateiamoni isinina, auapitika aiko kãkiti misiritiko sãpiretikoãtaã. Auapitika aãuítakori. Iuaã erekari isãpiretinirina maerekati naia kamakiti. ³⁹ Iuaãkana hitsoatinã, sitatxi auakani auítakori apotiitakasaakiaua, hããpiretana ninoa himapokaerekatakiniti ninoa õtãkikinii ikapani. ⁴⁰ !Apakata mixikanani himitekini, hãkiripoakatini atoko hãkamini. Maxikatãika hãkiripoanãta. Ixika !auari. Atxiãti Homanoakori auíte txitaua maerekati akamakiti xika —itxana ninoamoni.

⁴¹ Eereka ipaniãtana ninoa sini.

Masetónia Tixini, Akaia Tixini Pakini

20 Ninoa kãkiti apotiitakanuia aapokomonina ikanapiriãka

atoko, Paoro pãkapiretana Xesosi sãkire auiãkani. Imisãkiretana. Ikamapoxokonitana. Iposo atoko itakanapapiretana. Isipe Masetónia tixinimoni. ² Ípirixititari Masetónia tixini. Aapokotxi apokaãpotakasaaki, isãpireãpotari Xesosi sãkire kãkitimoni. Isikataparaxiniretana. Eereka Akaia tixinimoni apoka. ³ Iuaã ikaikota ipi ãti pakini kasiriti. Eereka Paoro kaiamapeka maporo ãki iereãtiniua Sírã tixinimoni isini ikapani. Iuasaaki, ikenakopiretari Xoteoakori okaenetiniri iua. Ininiãkara Paoro:

—Masetónia tixinimonikanerako nikanapiriãko —itxa Paoro.

⁴ Sópato inakori Peréia sitatxitikiri sari iuakata. Piho inakori ãkiri itxaua. Arisitako inakori, Sekõto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txãkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata ãkiika isinina. Nota, nimoianariakorikata sari Paoro tikini. Tóatxi sitatxiti Paoro iãta-paua ate. ⁶ Pão miãtiãkati nikiko õti napaka atoko, Piriposi sitatxiti aiereãtaua maporo ãki Tóatxi sitatxiti asini ikapani. Siko pakini õti napaka atoko Tóatxi aãpoka. Iuaã aaõkitana Paoro imoianariakorikata. Iuaã anapari ãti semanati.

Paoro Txãkitakari Ipãkari Iuaãkana Auãki Inini

⁷ Tomatiko õtisaaki Xesosi sãkire auiãkani apotiitaua komiri ixanakinina ikapani, Xesosi ipinini ixinikinina ikapani. Iuasaaki Paoro oerekanãtari Teoso sãkire. Apaãkanõkapeka isãpirenauatapanika, kotxi katimatinikata isipe. ⁸ Ate apotiitiniãtaãua aiko inopinina auakari iriko ãki. Iuaã auari kaiãopokori tirikapi

poniākari, ininiākara papatakari.
⁹Iuasaaki ātokori Etxiko inakori
 topākanāta inopinita auakari sonaā.
 Paoro sāpirenauanātapika, ininiākara
 itapo inokaāpotari iua Etxiko. Eereka
 imaka. Iuasaaki ixipotorika. Xitipeka
 apoākata. Ninoa miteēkata iuamoni
 isinina, txamari !auaika. ¹⁰Ininiā Paoro
 katxaka, sa itxa iuamoni. Isirika iua
 ipikari nopini, imaarata itxari.

—!Hīpikarauatape. Auākipanikari —
 itxana ninoa.

Ininiā iuaīkana iua ātokori auākipeka
 itxa. ¹¹Iposo atoko Paoro kanika
 iuaīkana inopinita irikomoni.
 Komiri inika. Iposo atoko iuaīkana
 ninoakata isākirauanātiniritika
 katimata itxa. Ikatimataāka atoko
 isipe Paoro. ¹²Eereka anikarina iua
 ātokori aapokomoni. Ninoa iteene
 poxokoniuata iua auākipanika inini.

Miretomoni Sikiko Pirena

¹³Iuasaaki Paoro paniātaua ate:

—Hīte sari maporoā Asosi sitatxiti-
 moni. Imiriīrako nota sari. Iuaā nota
 iereētaua hītekata —itxaua ate.

Ininiā ate sari iua apisa. ¹⁴Asosi
 sitatxiti Paoro aōkitaua ate. Iereētaua
 maporo āki. Iposo atoko asa Mitxireni
 sitatxitimoni. ¹⁵Iuaātaā aāpokasaaki,
 iuaīkana apotorika. Āti ōti napaka
 atoko, anapari Kio inakori takote
 pokomiriī. Āti ōti napaka atoko, Samosi
 inakori pokomiriī aāpoka. Iuaīkana
 āti ōti napaka atoko, aāpoka Mireto
 sitatxiti. ¹⁶Iuasaaki Paoro !inirekari
 Épeso ioporokoti apokitini, kotxi
 !inirekari auapokotini Ásia tixiniā.
 Ikatimaritaua, kotxi iposotiniāri,
 inirekari Xerosareē apokini. Pētekósitxi
 kiiniriti apisapanika apokini inireka.

Xesosi Sākire Auiākani Auūteakori Ōtākikiko

¹⁷Ininiā Paoro Mireto sitatxiti
 auakasaaki, iokanapireta Épeso
 sitatxitimoni. Ipikapiretana Xesosi
 sākire auiākani auūteakori. ¹⁸Ninoa
 apokasaaki, Paoro misākiretana ninoa:

—Himarotari merepitipanika Ásia
 tixini napokasaaki, eereka hītekata
 nauakasaaki, himarotari ikiniōtika
 nauini hītekata. ¹⁹Iuasaaki niparīkauata
 Apiananiri nirekakiti nikamini. Na
 niuikaua. Iteene nitxiapata. Xoteoakori
 nirekari okinino, ininiā nimaxirexinire
 auapitika iuasaaki, uaritika nikamari
 Apiananiri paniātakiti. ²⁰Himarotari
 na nikipatari ipixini Teoso sākire.
 Nisāpiretapekai hīte imakinika Teoso
 sākire hīte ereka hinini ikapani.
 Kākiti apotiitiniātaāua noerekai Teoso
 sākire. Apaka nisari āti haāpokomoni,
 eereka āti haāpokomoni, eereka āti
 haāpokomoni, nitxaāpota Teoso
 sākire noerekinii. ²¹Xoteoakori,
 Xoteo minakaniua apaka nisāpiretari
 nimarotakiti Teoso oerekakiti
 maerekanitxi itakanapinina ikapani,
 Teoso paniātakiti ikaminina ikapani.
 Nisāpiretari nimarotakiti Teoso
 oerekakiti, Xesosi Apiananiri sākire
 auikinina ikapani.

²²—Ininiā nota sariko Xerosareē,
 kotxi Erekar Matamatakoti paniātano
 nota iuaā nisini. !Nimarotari
 kiatokouako ninaākapaniko iuaā.
²³Ikini sitatxiti nauakasaaki, Erekar
 Matamatakoti pinitano: “Piteniko
 takapeēkako kateia āki iuaā. Iuaā
 pimisiritiko auapitikako,” itxano. Iua-
 nanira nimarota Xerosareē napokasaaki.
²⁴Ikara nimisiritiko sākirexiti kona
 mamakari nixinikakiti, kotxi kona
 nitiretari nauini ikorapokoriti. Xesosi
 Apiananiri paniātakiti parīkatxiti
 ninireka nikamini. Nipoxokoniritika

nauini mapotökirepe nitxako. Xesosi paniātano Teoso iokanapirena erekari Teoso tiraōki nisāpiretini kākiti.

²⁵—Nisāpiretapekari Teoso auītetxi ininiāua pirena hīte sauaki nauakasaaki. Uatxa nimarotari hīte hīkinika kona hātamataikanoko nota.

²⁶Ininiā hīxinikapikariko nisākire iaōka uatxa nisāpiretakiti. Kākiti hīte sauaki auakari pīpinanakiñiā, Teoso kimapore imimarotakaniā, kona nota xikani.

²⁷Kotxi nisāpiretapekai hītemoni imakinika Teoso iokanapirena.

²⁸Erepaniko, katokinani hītxako maerekati apokini hītemoni. Erekar Matamatakoti sikapekari kākiti hītemoni Xesosi sākire hōerekini ikapani, ininiākara hinīkatana ninoa. Soti auīte nīkatakani atokokana hītxauako. Ninoa hīpiraakori atoko. Ininiā hītiretanako ninoa kākiti, kotxi Teoso nakitiakori itxauana. Teoso ākiri ipina ninoa ikapani, iua nakitiakori ininiuana ikapani.

²⁹Nimarotari kākiti apokapitikako hītemoni nota sini tikini. Ninoa nirekari ixipokinirina hīparīka Teoso ikapani. Xapakori patari imaīkini monōkoni atoko itxako ninoa hīte sauaki imonōkoni apokini. Ininiā erepaniko. Katokinani hītxako.

³⁰Āti ōti kākiti hīte oereēkini sāpiretakiti na atāoni. Koketakori sākiretxiti isāpiretana apanakini Xesosi sākire auīākani. Ikara xika apanakini auikari ninoa sākire, ininiākara isanako ninoakata. !Auikaikarina hīte sākire.

³¹Ininiākara erepaniko. Hīxinikariko ipi anokanani āti anokanani pakini nota ōtākikanātai hīte. Noerekanātai hīte Teoso sākire ikanōka, pokamara pakini. Ikiniōtika noerekai hīte. Nitxiapata nōtākikasaakii, kotxi nitiretai.

³²—Uatxa nisikai hīte Teosomoni, iua nīkatiniī ikapani. Nitakanapari Teoso sāpirena hītekata, kotxi iua sāpiretari isikiniī ikinipoko

erekari. Iuara sikaposotiiretai hīte. Iuara sikai hīte erekari inīkatakiti, inakitiakorimoni isikini ikapani.

³³!Nixikotari apanakini. !Nimaākatari itxineirote, imākana pakini.

³⁴Hīte imarotapitikari notaka parīkauata imakinika ninireēkiti, nimoianariakori nireēkiti apaka niamotini ikapani.

³⁵Ikara atoko aparīkauatiniā, atiretana kākiti maposotakanuia. Nota parīka oerekepekai hīte ikara atoko hīkamini. Maxinikari Xesosi Apiananiri sākire. Iua txari: “Teoso takari erekari kākitimoni iua amonitakiti apakapakasaaki. Teoso takari apia erekari sikarauatarimoni,” —Paoro txana ninoa Épesokinimoni, Teoso sākire auīākani auīteakorimoni.

³⁶Iuasaaki Paoro kapotoreēkaua ninoakata. Imisākiretarina Teoso.

³⁷Nino a ikinimane txiapakata. Imaarākara rina Paoro, apitxoka itxarina. Itakapiretanaparina.

³⁸Apiata imatinanina, kotxi Paoro sāpiretana ninoa, !aōkitaikarina iua. Isana iuakata maporomoni.

Paoro Sari Xerosareēmoni

21 Maporo aāpokasaaki, ate takapiretanapana ninoa Épesokini. Eereka asipeka. Kosi pokomiriītimoni asakatapitipo. Iuaā aāpoka. Katimatinīkata asa Hotxi ioporokotemoni. Eereka Pátara sitatxitimoni asa.

²Iuaā aāpokaro āto maporo Penísia tixinimoni sikaro, ininiā aiereētaua atoko ate potorika asini.

³Apaniāxiti apokasaaki, aātamatari Xipri pokomiriīti. Anapari Xipri pokomiriīti asanaremoni. Asari Síria tixinimoni. Aāpokita Txiro sitatxiti, kotxi iuaā tiitxi maporo āki auakari kaikota.

⁴Iuaā ate aōkitari kākiti Xesosi sākire auīākani, ininiā akaikota ninoakata āti semanati. Ninoa txari Paoro:

—Xerosareēmoni !pisipe, kotxi Erekar Matamatakoti sāpiretapekaua

ate pimisiritiko tūkane aua iuaātaā —itxarina.

⁵ Apotorikini ōti apokasaaki, ate sipe iuaīkana maporomoni. Ninoa ikinika, itanoroakorokata, imiakorikata, isana atekata sitatxi itiniā ioporokomoni. Akinika akapotoreēkaua ikipatxiteē, misākireta atxari Teoso. ⁶ Atakapiretanapana iposo atoko, ate iereētaua maporo āki. Ninoa kanapiriā aapokomonina.

⁷ Ininiā Txiro sitatxiti atakanapa. Iuaīkana apotorika. Eereka aāpoka Pitoremaita sitatxiti. Iuaā ate misākiretana kākiti Xesosi sākire auīākani. Akaikota āti ōti ninoakata.

⁸ Katimatinikata iuaīkana apotorika asini. Eereka aāpoka Sesaréia sitatxiti. Iuaā Piripi inakori aapokomoni asa. Teoso sākire sāpiretakari itxaua Piripi. Xesosi moianariakori Xerosareē auakasaakina, ninoa mereēri iua Piripi, apikomoni kikiakori seisi pakini, ninoa imoianatinina ikapani. Ate kaikota Piripi aapoko. ⁹ Piripi auari ipi ipi pakini imiakoro ātokoropanika. Ninoa apaka sāpiretari Teoso iokanapirena kākitimoni. ¹⁰ Ate auanapa iuaā mapaōti. Iuasaaki Teoso sākire sāpiretakari Ákapo inakori Xotéia tōpa potorikakari apoka Piripi aapoko.

¹¹ Ikosekari Paoro makiomatare. Itixikari iuako ikitikata. Itxari:

—Erekari Matamatakoti txari: “Xoteoakori Xerosareē auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹² Ikara akenakotakasaaki, ate apanakini iuaā auakanikata txari Paoro:

—Paoro koniko !pisipe Xerosareēmoni —atxari.

¹³ Txamari Paoro:

—Kinirepa hītxiapanāta? Hīte kamamatinanitano nota. !Nimaākatari

niaxirikiko Xerosareē. !Nimaākatari nokiko apaka Apiananiri Xesosi nauikini xika —itxaua ate.

¹⁴ !Ikīpitari asākire. Ininiā ate:

—Iaōpe. Ikara atoko ininiā, ate nirekari Teoso nireēkiti kamiko —atxa.

¹⁵ Mapaōti inapaka atoko, aāiamata Xerosareēmoni asini ikapani. Eereka apotorika asini. ¹⁶ Apanakini Xesosi sākire auīākani Sesaréiakini sari atekata apaka. Menasō inakori aapoko ninoa anikaua ate, kotxi iuaā anirekari akaikotini. Menasō Xipri pokomiriitiki. Okananipeka iua aukari Xesosi sākire.

Paoro Apoka Xerosareē

¹⁷ Xerosareē aāpokasaaki, Xesosi sākire auīākani apakapaua ate ipoxokoniritikana. ¹⁸ Katimatinikata Paoro sari atekata Txiakomoni aianapokotini ikapani. Ikinimane Xesosi sākire auīākani auīteakori aua iuaātaā. ¹⁹ Paoro misākiretana. Isāpiretana imakinika Teoso kamakiti Paoro parīkaā Xoteo minakanuia sauaki iparīkauatakasaaki. ²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aītari, pimarotari kaiāopokori Xoteoakori auikiniri Xesosi sākire. Ninoa aukari Moisesini oerekakiti sākiretxiti apaka. ²¹ Apanakini sāpiretapedkana ninoa: “Paoro oerekanātana Xoteoakori, Xoteo minakanuia sauaki auakani, Moisesini oerekakiti itakanapinina ikapani. Oerekanātana ninoa Teoso takaōtxikare imiakori itōā imatakakani ikapani. Oerekanātana ninoa aātokiriakorini oerekakiti itakanapinina ikapani.” Ikara atoko itxanātana ninoa. ²² Ninoa !imarotapanikari pite uai apokini, ininiākara natokopa atxatari akaminiri, kotxi anirekari ninoa imarotini

apanakini sãpiretakiti poxiene inini. Anirekari ninoa imarotiniri pite auikapitikari Moisesini oerekakiti. ²³Ininiãkara ia pikama. Naia ipi ipi pakini kikiakori misãkiretari Teoso. Isãpiretarina Teosomonikari ikamaenetakitina tãkane. ²⁴Ininiã pisa naiakata Moisesini oerekakiti iaõka hãkamini ãkapani, ininiãkara hãkãpãtaua Teoso ãkapani. Pite ãkitxitari naia kii kixatiko ãkapani. Ikara atoko ininiã, ãkinimane imarotariko poxienetapa apanakini sãpiretakiti. Ninoa imarotariko Moisesini paniãtakiti pikamini. ²⁵Ninoapekana, Xoteo minakanuia Xesosi sãkire auããkanipekana, ate iokanatsopatapeka ninoamoni. Asãpiretana ate xinikakiti: —!Hinikapiriko nipokori teoso kãkiti kamakitimoni sikakori. !Hinikapiri arãkatxi. Manotsããtakori xini !hinikape. !Hãsirikape pãtanoro minakotokatika. !Hãsirikape pãtaniri minakotikatika. Ikara atoko atxa ate ninoamoni aiokanatsopatini —itxarina Paoro.

²⁶Ininiã Paoro anikana ninoa kikiakori. Katimatinãkata ninoa kãpãtaua Teoso ãkapani Moisesini oerekakiti iaõka ikaminina ãkapani. Eereka Paoro ãroã Teoso misãkiretiko aikotiã. Isãpiretari sasetotxi ninoa keto ãtona arokiko xipokini õti, kotxi iusaakiko sasetotxi apakapari ninoa sikakiti Teosomoni.

Paoro Maãkiko

²⁷Iua semanati kaïamapeka ixipokini inakasaaki, ãtikaka Xoteoakori Ásia tixinikini atamatari Paoro Teoso misãkiretiko aikoti ãki. Ninoa misãkireporetari Paoro ãkinimane kãkiti iuaã apotiitakanimoni, ininiã ninoa sãkire xika ãkinimane omanatari Paoro. Eereka imaãkarina Paoroni. ²⁸Ásia tixinikini akiripoata:

—Hãte Xoteoakori himoianataua ate. Ia kãkãra oerekari ãkini itixitãkini oma-

natinina Xoteoakori. Iara oerekari kãkiti Moisesi paniãtakiti imakamakani. Oerekari kãkiti mapaxitakaniri ia Teoso misãkiretiko aikoti. ãkorasaaki lipaxitari ia aiko, kotxi imãroãna Xoteo minakanuia aiko ãki, ininiãkara itxikotari ia aiko Teoso nakiti —itxanãtana ninoa.

²⁹Ikara itxana, kotxi mitxi itikarina kiki Xoteo minakatiua Tõpimo inakori Épeso sitatxitikiri Paorokata tãpokotini sitatxi apanãkaki. Txamari Paoro !anikari iua aiko ãki. Ininiã iuaãkatarina Paoro anikapekari iua aiko ãki. ³⁰Ininiã iua Paoro maãkiko pirena iaripireta. ãkininape sitatxi auakani kenakoenetakasaakiri ikara, imitekana aikomoni. Imaãkarina Paoro. Ikosekaãtotarina. Teoso misãkiretiko aikotiã imipokiãkatarina Paoro. Iusaakipeka aiko tore totaãkapeka. ³¹Kãkiti iuaã apotiitakanuia nirekari okiniri Paoro. Sotatoakori Homano inakanuia ninoa auãte kenakoenetari ãkinimane Xerosareã auakani neena-mauatini. ³²Iusaakipeka sotatoakori auãte anikana sotatoakori. Imitekana Paoromoni. Kãkiti atapakasaakina sotatoakori auãte sotatoakorikata, iusaakiika iotoka Paoro iaritatinina.

³³Ininiã sotatoakori auãte maãkari Paoro. Ipaniãtana sotatoakori Paoro iaxirikini ipi kohãtxiã. Iposo atoko ipi-maãna kãkiti itakote auakani:

—Kiripa ia kiki? Kixikapa ia atoko in-aãka? —itxana ninoa.

³⁴Ininiã ãtikaka iuaã auakani, ia xikara. Apanakinipekana ãti xikara, itxaãponãtana isãkirena. Sãkiretxi kaããopokori ininiã, iua !imarotari atão ixika. Ikara atoko ininiã, sotatoakori auãte paniãtana sotatoakori, ninoa aapokomoni anikinirina Paoro. ³⁵Sotato aapokokiri kanikoatxiã apokasaakina, sotatoakori õtanõkari Paoro ãto, kãkiti mamaãkakaniri ãkapani. ³⁶Kotxi

kaiãopokori kãkiti itikini ìkani akiripoakata:

—Hõkariko. Hõkariko —itxanãtana.

³⁷ Paoro sotatoakori aapoko ãki ñroã-napanoka inakasaaki, Paoro txari sota-toakori auíte:

—Apakata pite nimisãkiretini?

Ininiã sotato auíte tikoka.

—Pite imarotari Krekoakori sãkire — itxari Paoro.

³⁸ —Kona piteni Exito tixinikiri pitx-ataua? Kona piteni kitatiki kamanãtari neenamtxi auítetxiakori pomanatini? Kona piteni anikatana ipi ipi pakini mio kokanirini ixaminakitekatanã ãparaã makipakaniãtaã? —ipimaãri Paoro.

³⁹ Ininiã Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauiritano nakira kãkiti nimisãkiretini —itxari iua.

⁴⁰ Ininiã sotatoakori auíte:

—Ari, pimisãkiretana.

Inakasaakiri Paoro tima kanikoatxiã. Iuusaaki õkitikari iuako kãkiti akiritini iotokini ñkapani, isãkire ikenakotinina ñkapani. Ikinipoko iotokasaaki, iua sãki-rauata ninoakata Xoteo sãkireẽ, Epiráiko sãkireẽ.

Paoro Misãkiretari Xerosareẽ Auakani

22 Ininiã Paoro:

—Nitariakori, niriakori, hñke-nakotariko nisãkire. Na maerekati na nikama. Erekarinokara nikama —itxa.

² Ninoa kenakotakasaakiri ninoaka sãkireẽ, Epiráiko sãkireẽ isãkirauatini, ñakiritaikana. Itsoríkaãtana.

³ Ininiã Paoro:

—Xoteopitikarano nota. Niponaniã Taaso sitatxiti, Sirísia tixiniã. Eereka uai Xerosareẽ sitatxiti napoka. Uaikara naneẽ. Iuusaaki koerekareri kimatireri Kamarieo inakori oerekano imakinika.

Iua oerekano akiomaneakorini kitxakapiríkarini paniãtakiti imakinika. Nota paríkauata Teoso ñkapaninokara, hñte paríkauatini atokotxikana.

⁴ Mitxipeka nota kapokotana kãkiti Xesosi sãkire auiãkani, Xesosi kimaporeẽ sikani. Nimaikana, kateia ãki oka nitxana. Kiki, sito pakini nimaika. Nota xika ninoani ipipe.

⁵ Sasetotxiakori auíte apiatakari, Xoteo auíteakori pakini imarotari atãopitika nisãkire. Ninoakara sikano aãtsopa iõkatsopatakittina auítetxiakorimoni Tamásiko sitatxiti auakanimoni nanikini ñkapani. Iua aãtsopa auiritano Xesosi sãkire auiãkani nimaikini. Ininiã nota sari iuaã Xesosi sãkire auiãkani nimaikini ñkapani, Xerosareẽmoni nimikanapiriinina ñkapani imisiritikona tñkane.

⁶ —Apaniãxiti Tamásiko sitatxiti takote napokaãpotakasaaki, patimari iotximere iaxitikiri apoka notamoni. ⁷ Xiti nirika. Nikenakotari nakiriuãkatiko: “Saoro, Saoro, kinirepa pite misiritano nota?” itxano.

⁸ —Ininiã nota: “Apiananiri, kiriparai pite?” nitxari.

—Ininiã iua: “Nota Xesosi Nasaree sitatxitikirikarano nota. Pimisiritakitikarano nota,” itxano.

⁹ —Nimoianariakori atamatari iua iotximere, ininiã ipíkarauatana. Na ikenakotarina nota misãkiretakari. ¹⁰ Ininiã nota: “Apiananiri, kipa pinireka pitemoni nikamini?” nitxari.

—Ininiã Apiananiri: “Ereẽ pitima. Tamásikomoni pisa. Iuaãtaã pisãpiretaãkako imakinika Teoso nireẽkiti pikamini ñkapani,” itxa Apiananiri notamoni.

¹¹ —Iua iotximere xika mõsiãreti nitxaua. Ininiã nimoianariakori kanõpiãpotano. Anikanona Tamásikomoni. ¹² Iuaãtaã aua kiki Ananási inakori. Iua kamapikari

akiomaneakorini kitxakapiríkarini paniátakiti. Ikinimane Xoteoakori Tamásiko auakani iteene paxitari iua.¹³ Iua ina notamoni. Nota takote apoka itxa. Itxano: “Nitari Saoro, kōsiāre pitxako,” itxano nota.

—Iuasaakipeka nota kōsiārepeka nitxa. Natamatari iua.¹⁴ Iua: “Akiomaneakorini Teosone mereēi pite inirekakiti pimarotini íkapani. Teoso mereēi pite Erekarinoka Kamakari patamatini íkapani. Teoso mereēi pite Erekarinoka Kamakari sākire pikenakotini íkapani.¹⁵ Pitekarako sāpiretariko itanapoko kākítimoni atão Xesosi pirena, patamatakiti, pikenakotakiti pakini.¹⁶ Ininiã kona okanani pitxape. Pōkitikaua. Pipatxisataākako. Pakiritariko Apiananiri uāka, ininiã iua makatxakari pimaerekani,” Ananíasi txano nota.

¹⁷ Eereka nikanapiriã Xerosareẽmoni. Teoso misākiretiko aikotimoni nisa. Iuaã Teoso nimisākirenátakasaaki, nitapone-tari Apiananiri.¹⁸ Natamatari iua. Itxano nota: “Katima pitxako. Xerosareẽ posipika uatxapeka. Uai auakani !auikap-nirini nota pirena pisāpiretakiti,” itxa.

¹⁹ Ininiã nota: “Apiananiri, nota nitapekana kākiti pisākire auíākani ikini aikoti Xoteo apotiitiniãtaãua. Niã-sokapekana. Kateia āki nitakapekana. Ninoa imarotapitikari ikara nikamakiti.²⁰ Pite sākire sāpiretakari Estevão inakori okikosaaki, nota aua iuaã. Iuasaaki niníkatari kokanirini māka inopinikiri. Nota apokaerekatari okinirina iuani.”

²¹ —Ininiã Apiananiri: “Pisipeka. Ōtakoxiti niokanatai Xoteo minakonimoni,” itxano —itxa Paoro kākítimoni.

Paoro Homano Itxaua

²² Iuasaakipeka Xoteo minakonimoni isini xika, kākiti iuaã apotiitakanuia

!inirekaikarina Paoro sākire ikenakotin-ina. Omanākarauata. Akiripoakatana:

—Hōkariko. !Erekari auapanika inini —itxana.

²³ Akiripoakatana. Iōkokarina imākana inopinikiri. Kipatxi okara-pekataana apaka, kotxi omanākarauata.²⁴ Ininiã sotatoakori auíte paniātana sotatoakori anikiniri Paoro aiko kaikori āki, sotatoakori aapoko āki. Ipaniātana Paoro ixirokitatiko tíkane, kotxi inirekari imarotini Paoro omanatiko xika.²⁵ Paoroni iitxikasaakina ixirokitatiko íkapani, Paoro pimaãri sotato itakote timakari:

—Erekari atxiiti híte xirokitatiniri kiki Homano inakori maxikatiika? Homano nitxaua. Kixikapa híte nirekari hixiroki-tatinino? —Paoro txari iua.

²⁶ Ininiãkara sotato sari iauítemoni.

—Iua kiki amaíkakiti Homano itxaua iua, ininiãkara erepaniko iuamoni pika-makiti tíkane —itxari.

²⁷ Ininiã sotatoakori auíte sari Paoromoni.

—Pisāpiretano. Homanokani pitxataua? —itxari Paoro.

Ininiã Paoro:

—Iuapítikarano nota.

²⁸ Sotatoakori auíte txari:

—Nota Homano nitxaua, kotxi niúkitx-itari aãtsopa íki Homano nininiua íka-pani. Pakaroneri.

Ininiã Paoro:

—Niponaniãkasaaki Homano nitxapekaua —itxa.

²⁹ Iuasaaki Paoro xirokaaritakani pa-timari isinina. Sotatoakori auíte píka-rauata, Paoro Homano ininiua imaro-takasaaki, kotxi iua paniātana sota-toakori iitxikiniri Paoro.

Paoro Xoteo Auíteakori Apisatoõ

³⁰ Katimatiníkata sotatoakori auíte koxirikari Paoro. Inirekari imarotini Xoteo apoítiniri, ininiã

ipīkapiretana sasetotxi auīteakori, Xoteo auīteakorikata. Ipaniātari Paoro itimini ninoa apisatoō.

23 Ininiā Paoro iteene mixinitoō-tana Xoteo auīteakori.

—Nitariakori, erekari nikaminiritika, uatxa uai naua. Teoso nireēkitinoka ninireka nikamini. Teoso imarotari ikara, kotxi imarotari nixinikakiti nāixinireē —itxa.

²Sasetotxiakori auīte apiatakari Ananíasi inakori !ipotxitari Paoro sākire, ininiā ipaniātari Paoro takote auakani aritiniri Paoro sona. ³Ininiā Paoro:

—Teosokarako aritaiko pite. Apokotxi tare txītatakori atoko pitxa pite, kotxi mapara peerekai, txamari pāixinireē maerekatinoka. Pite topākanāta ereē nota pikenakotini ikapani akiomaneakorini paniātakiti iaōka pikamini ikapani, txamari pipaniātari niaritiko. Akiomaneakorini na paniātari ikara atoko inakari. Pite kona kamari ninoa paniātakiti —Paoro txari iua auītetxi.

⁴Paoro takote auakani txitari Paoro:

—!Erekari pimisākirepiretiniri sasetotxi auīte apiatakari Teoso nakiti —itxana.

⁵Ininiā Paoro:

—Nitariakori, !nimarotari iua sasetotxi auīte apiatakari ininiua, kotxi Teoso sākire iōkatsopatakori txari: “Kona pimisākirepiretapiri hīauīte.”

⁶Paoro atamatana kākiti iuaā apotitakaniua. Apanakini satoseoakori itxauana. Apanakini pariseoakori itxauana. Ininiā itapararitika isāpiretana:

—Nitariakori, pariseokarano nota. Pariseo ākirikarano nota. Uai nota minaāka hīte apisatoō, kotxi nota auikari ipīkanipeka ōkitikiniua, iuaīkana auāki ininina ikapani —itxana ninoa.

⁷Iuasaakipeka pariseoakori, satoseoakori pakini taparakien-atakakaua, kotxi pariseoakori auikari Paoro sākire. Satoseakori !auikari Paoro sākire. ⁸Kotxi satoseoakori !auikari ipīkari ōkitikiniua, iuaīkana auāki inini ikapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipikari ōkitikiniua, iuaīkana auāki inini ikapani. Auikarina Teoso nitiriakori auini. Auikarina matamatakoni auini apaka. ⁹Iuasaaki ikinimane apia akiripoakata. Itaparakienatakakauana. Pariseoakori, kaiōkatsoparerini inakoni, ōkitikaua. Itapararitika itxana:

—Atemoni ia kiki !ikamari maerekati. Atxiīti matamatakoti, atxiīti Teoso nitiri iaxitikiri sākirauata iuakata. Ininiākara !apakata anaiatiniri Teoso —itxana.

¹⁰Ninoa iteene taparakien-atakakauana, ininiā inenamauaaritana. Sotatoakori auīte pīkari ninoa okiniri Paoro, ininiā ipaniātana sotatoakori:

—Hīsako kākiti sauaki apanīkaki. Iuaā himaktxakariko Paoro. Hanikariko sotatoakori aapokomoni —itxana.

Ininiā anikarina iuaā.

¹¹Āti ikanōkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisāpire-tapekari nota pirena uai Xerosareē. Apaka pisāpiretariko nota pirena Homa sitatxiti —itxari.

Xoteoakori Nirekari Okinirina Paoro

¹²Katimatinīkata apanakini Xoteoakori apotiitaua. Ixinikarina Paoro okini ikapani. Ninoa txari:

—!Anipokotapani, !aātapani, Paoro aōkini apisa —itxana.

¹³Ninoa Xoteoakori koarēta apikomoni. ¹⁴Eereka ninoa sari sasetotxi auīteakorimoni, kiomātxiakori pakinimoni. Ninoa txana:

—Ate okaenetari Paoro.
!Anipokotapani iua aōkini apisa.
¹⁵Ininiā hīte aāuīteakori amanaāriko
sotatoakori auīte, imininiri Paoro uai.
Hīsāpiretariko sotato auīte, hinirekari
apikomoni hīpimainiri Paoro. Iuasaaki
ate iātapariko kimaporiā aōkiniri
īkapani —itxana ninoa.

¹⁶Paoro itaro ākiri kenakoenetari
Paoro okaenetiko, ininiākara
īroā sotatoakori aapoko, sāpireta
itxari iritanirimoni. ¹⁷Ininiā Paoro
misākiretari sotato auīte poiāori.

—Panikari ia ātokori hīauītemoni. Im-
inapiretakiti inireka isāpiretiniri iua —
itxa.

¹⁸Ininiā sotato auīte poiāori anikari
iua auītemoni.

—Ate maīkakiti Paoro misākiretano
nota, ia ātokori pitemoni niminini, kotxi
inirekari isākirauatini pitekata —itxari.

¹⁹Ininiā apiari anikari iuakoā ni-
noanani auiniātaā. Ininiā iua:

—Kīpa pinireka pisāpiretinino? —
itxari.

²⁰Ininiā iua ātokori apakapapiretari:

—Xoteo auīteakori nirekari amanainii
katana pokamara Paoro panikini
ninoamoni. Isāpiretainako pite,
inirekapanikarina apikomoni Paoro
sākire ikenakotinina. Txamari paxirari
ninoa sākire. ²¹!Pauikapena, kotxi
koarēta apikomoni kikiakori kipatauako
kimaporiā Paoro iātapinina, okinirina
īkapani. Ninoa kikiakori txapeka
!inipokotaikana, !iātaikana, Paoro
imokakinina apisa. Ninoa iposopeka
kimaporiā iātapinirina Paoro. Ninoa
iātapari ninoa nirekakiti pikamini
—itxari sotato auīte.

²²Ininiā sotato auīte:

—!Pisāpiretapiri notamoni pisāpire-
takiti apanakinimoni.

Ininiā iokanatarī ātokori ikanapiriini
aapokomoni.

Paoro Iokanataāka Périsi Inakorimoni

²³Iposo atoko sotato auīte pīkapire-
tana ipi sotatoakori auītetxi poiāoni in-
akaniua. Imisākiretana:

—Hāpotiitana tosētosi sotatoakori ik-
itiā sikani, setēta sotatoakori kavaro
nopini sikani, tosētosi sotatoakori mere-
taua anikakani pakini. Iposope hītx-
ako ia ikanōkati novi oara hipotorikini
Sesaréia sitatxitimoni hīsini īkapani.
²⁴Kavaroakoro hīsikari Paoro, oa nopini
isini īkapani. !Hāuiritapiri Paoro okiko.
Hanikari Paoro Homanoakori auītemoni
Périsi inakorimoni —itxana ninoa.

²⁵Iposo atoko sotato auīte
iōkatsopata:

²⁶Nota Kráotxio Arísia inakorino

iōkatsopata apiarimoni, pite Périsi
aāuītemoni. Ereēkai. ²⁷Ia kiki
Paoro inakori Xoteoakori maīkakiti.
Ninoa nirekari okiniri. Nota,
nisotatoneakorikata makatxakari
iua, kotxi Homano itxaua.

²⁸Ninirekari nimarotiniri kixikapa
ninoa nirekari okiniri Paoro,
ininiākara nanikari iua Xoteoakori
auīteakori apotiitiiniātaāua. ²⁹Iuaā
nimarotari ixika !auari kateia
āki ikaikotini īkapani. Ixika
!auari ipinini īkapani. Ninoa
apoītari iua ninoa atokiriakorini
paniātakiti imakamakani xika.

³⁰Nikenakopiretari Xoteoakori
okaenetiniri Paoro, ininiā
niokanatarī iua pitemoni.
Nipaniātana Paoro apoītakani
isāpiretiniina Paoro kamakiti.
Iananirako niōkatsopata. Ereēpiko,
itxa sotato auīte sākire Périsimoni.

³¹Sotatoakori auīte paniātiniri
atokokana sotatoakori anikari Paoro.
Īkanōka anikarina Ātxipatiritxi sitatx-
itimoni. ³²Katimatiničkata sotatoakori
ikitiāna sikaninanira kanapiriā sotato

aapokomoni. Kavaro nopini sikani anikari Paoro apikomoni. ³³Anikarina Sesaréia sitatxitimoni. Isikarina Paoro iökatsoparikata auítetximoni, Périsi inakorimoni. ³⁴Ininiã iua atatsopatarí iua iökatsopari. Iposo atoko ipimaãri Paoro:

—Kitixinepa paua? —itxari iua.

Ininiã Paoro:

—Sirísia tixinikirirano —itxa.

³⁵Ininiã Périsi txari:

—Pikamapiretakini apokasaaki, nike-mariko pisãkire —itxa.

Ininiã ipaniãtana sotatoakori:

—Erotxini kamakiti aikoti ãki hinikatariko Paoro.

Paoro Apoítiko Pirena

24 Siko ôti auakasaaki, sasetotxi-akori auíte apiatakari Ananfási inakori sari Sesaréia sitatxitimoni. Apoka iuaã kiomãtxiakorikata, kiki Tétoro inakorikata apaka. Iua Tétoro kãkiti íkapani kasãkireri kãkiti misiritiko mereékari apisatoõ. Ninoa apoka Périsi apisatoõ Paoro apoítinina íkapani. ²Ninoa apokasaaki, sotato minari Paoro Périsi apisatoõ. Iposo atoko Tétoro akiritaãka isãkirauatini íkapani. Ininiã Tétoro apoítari Paoro:

—Périsi, apiari pitxaua. Auítetxi kimatireri pitxaua, kotxi mapakanani atixine neenamatzí !uari. Mítxi kaiãopokori maerekati kamakori. Uatxa maerekati poiãõpota, kotxi pite kamari erekari kãkiti íkapani. ³Erekapitikari pikamakiti ate íkapani. Ate apokaerekatari. ⁴Kona ninirekari niomaketetini pite, ininiãkara nisãkire poiãoka apikomoni nisãpiretai, ininiã pikenakotari nisãkire.

⁵—Ia kiki !erekari. Pamonõkoniri. Itxíkitakari Xoteoakori neenamauatini ikini itixiti. Kiki Nasaree sitatxitikiri sãkire auíãkani auíte itxaua iua Paoro. ⁶Teoso misãkiretiko aikoti

imapaxitakanisaaki, ate maíkari iua. Akiomaneakorini oerekini atoko atxamariko Paoro. ⁷Txamari iuasaakipeka sotatoakori auíte Arísia inakori apoka iuaã. Imakatzakari Paoro itapararitika ate sauaki. ⁸Eereka Arísia paniãtaua pitemoni ainini. Pite pimaãriko Paoro, ininiã pimarotari asãpiretakiti inipitika inini —Tétoro txari Périsi.

⁹Iuasaaki Xoteoakori iuaã auakani:

—Ari, inipitikara isãkire —itxarina Périsi.

Paoro Sãkire Périsi Apisatoõ

¹⁰Iposo atoko Périsi paniãtari Paoro isãpirenauatini. Ininiã Paoro: —Nimarotapitikari kona uatzakani ate tixine auakani misiritiko mereékari pitxaua. Ininiãkara nota apokaerekatari pitemoni nisãpiretiniri nikamakiti.

¹¹Tosi ôti pakini napakari nisa Xerosareẽmoni Teoso nimisãkiretini íkapani. Pipimaãri apanakini atãokani nisãkire. ¹²Nanera !ikenakotari nota txitiniri ãti Teoso misãkiretiko aikoti ãki. Ikininape Xoteo apotiitiniãtaãua aikoti ãki !atamatarina neenamatzí nikamãkitakini. Átiãtaã apaka !atamatarina nitxíkitakiniri kãkiti neenamatzí ikaminina. ¹³Nanera maxikatiíka kamapiretano nota. !Itikanona nota maerekati nikamini.

¹⁴Nota auikari Xesosi sãkire. Ia atão. Naneramoní Xesosi sãkire na atão. Nota paríkauata ate atokiriakorini Teosone íkapani Xesosi sãkire nikípitakasaaki. Moisesini paniãtakiti apaka nauika. Teoso sãkire sãpiretakanini iökatsopatakiti apaka nauika. ¹⁵Nanera auikari Teoso õkitikinina ikininape kãkiti ipíkani. Erekari, maerekani apaka õkitikauako iuaíkana auãki ininina íkapani. Nota apaka auikari ikara. ¹⁶Ikiniõtika ninirekari atãonoka

nikamini Teoso ikapani, kākiti ikapani apaka.

¹⁷—Ninapapekari mapakanani ātiā-taā, eereka nikanapiriā Xerosareēmoni. Iuaā nisa txineiro ninirimanemoni matxineirotenimoni nanikini ikapani. Apaka iuaā ninirekari nisikaenetakiti Teosomoni nisikini. ¹⁸Nisikaenetakiti Teosomoni nisikasaaki Teoso misākiretiko aikoti āki, nikipaātaua Moisesini oerekakiti iaōka. Iuasaaki Xoteoakori Ásia tixinikini itikano nota. Kākiti apotiitakanuia !auari notakata iuasaaki. Neenamati !auari iuasaaki. ¹⁹Ninoa itikano. Maerekati nikamaākamako, kinirepa kona ninoa apoka uai uatxa pite isāpiretinina ikapani? ²⁰Ninoa uai mapokakanisaaki, pipimaāna nanera ikenakotakitina, itikakitina nota Xoteo auiteakori apisatoō nauakasaaki. Kipa atxiiti nimaerekani iuasaaki? Iuasaaki kona nikamari maerekati. ²¹Atxiiti iuasaaki nanera !apokaerekatari nisākire, kotxi nitxana: “Nota auikari ipikani okitikinia, iuaikana auāki inini ikapani. Ikara naukakiti sākiretxiti xika hīte maikano nota.” Atxiiti nanera !apokaerekatari ikara nisākire —itxa Paoro sākire Pērisimoni.

²²Pērisi iteene imarotapekari Xesosi oerekakiti sākiretxiti. Iua misākiretana ninoa:

—Sotatoakori auite Arisia inakori apokapanikako uai. Iuasaakiko nisāpiretari kiātokopa nitxtari Paoro. Uatxa xipope asākire —itxa Pērisi.

²³Ipaniātari sotato auite poiāori inakari Paoro nīkatakari tīkane:

—Pinīkatariko Paoro. Pauiritariko inirekiniātaā isini. Pauiritariko inirimane apokini iuamoni. Pauiritariko inirekakiti isikinirina —itxa Pērisi.

Paoro Sākirauata Pērisi, Tosira Pakinikata

²⁴Mapaōti napa atoko Pērisi itanorokata Tosira inakorokata apoka Paoro auiniātaā. Xoteo oa. Pērisi pīkapiretari Paoro. Iua apokasaaki, Paoro sāpiretana ninoa Kristo Xesosi sākire auikiko, ininiā ninoa kenakotari. ²⁵Paoro sāpiretari Teoso sākire atō inakari kamiko pirena. Isāpiretari Teoso sākire itotxi nireēkiti amakamakani. Isāpiretari kākiti misiritiko itixi xipokini ōti apokasaaki. Ininiākara Pērisi pīkarauata.

—Iaōpe. Pisipe. Āti ōti niparīka mauakanisaaki, iuaikana nipīkapiretai —itxari.

²⁶Pērisi nirekari Paoro sikiniri txineiro iuamoni, isikakiniri ikapani. Ininiākara itokata ipīkapiretari Paoro iuakata isākirauatini.

²⁷Ipikanani napa atoko Pōsio Pēsito inakori auitexi txapekaua, ininiā Pērisi sipe. Pērisi nirekari Xoteoakori apokaerekatiniri iua, ininiā isini apisa !isikakari Paoro, ininiā Paoro kaikotapanika kateia āki.

Paoro Amanaāri Sesakata Isākirauatini

25 Pēsito aua Sesaréia sitatxiti ipi āti pakini ōti, eereka isari Xerosareēmoni. ²Iuaā sasetotxi auiteakori, Xoteo auiteakori pakini kamapiretari Paoro Pēsitomoni. ³Ninoa iteene amanaāri Pēsito:

—Pikamariko ate nireēkiti. Piminariko Paoro uai Xerosareēmoni —itxana.

Ikara ninoa nireka, kotxi okaenatarina Paoro ipixinipokoriti. ⁴Txamari Pēsito apakapiretana:

—Kona, Sesaréia sitatxitikarako aua Paoro. Mapaōti napa atoko nota kanapiriā iuamoni. ⁵Hinirekiniāri,

ātikaka hīte sari iuamoni notakata. Iuaā hīsāpiretari Paoro kamakiti maerekati —Pésito txana ninoa.

⁶ Pésito napari ipi semanati Xerosareē. Eereka ikanapiriā Sesaréiamoni. Katimatiníkata iroā aiko kākiti misiritiko sāpiretikoātaā. Iuaā ipikapiretari Paoro. ⁷ Paoro apokasaaki, Xoteo Xerosareēkini ākitari iua. Apoītarina iua maerekati kaiāopokori ikamakiti, txamari imaerekani itikakari !auari, kotxi !ikamari maerekati. ⁸ Eereka Paoro:

—Maerekati na nikama. Xoteoakori aātokiriakorini paniātakiti nikamapitika. Teoso misākiretiko aikoti nipaxitapitika. Homano auīte paniātakiti, Sesa inakori paniātakiti nikamapitika —itxa.

⁹ Pésito nirekari Xoteoakori apokaerekatini iuaka, ininiā ipimaāri Paoro:

—Pinirekatari Xerosareē pisini? Iuaārako nota kenakotariko nanera sākire, pite sākire apaka —itxa.

¹⁰ Txamari Paoro:

—Konapitini. Homano nitxaua. !Apakata Xerosareē Xoteoakori apisatoō nisākire kenakotiko. Uaikara Homanoakori auīte Sesa nirekari Homano sākirauatini kākiti misiritiko sāpiretakani apisatoō. Erekari uai pikenakotiniri nisākire. Pite iteene imarotari kona xatiki maerekati nikama Xoteoakorimoni. ¹¹ !xika auiniā nipinini ikapani, maerekati nikaminiā, ininiā apakata nipinini. Txamari nanera na atāo apoītano nota, ininiā naneramoni nisikanapakiri !auari. Ninirekari Sesamoni nisini —itxa Paoro sākire.

¹² Ininiā Pésito sākirauata iua otātikakanikata Paoro Sesamoni isini ikapani. Eereka apakapapiretari Paoro:

—Pite nirekari Sesamoni pisini, ininiārako iuamonirako pisa —itxari Paoro.

Pésito Sākirauata Akiripakata

¹³ Mapaōti napa atoko auītetxi Akiripa inakori apoka Sesaréia itaro Perenisi inakorokata. Ninoa ianapokota Pésit-omoni. ¹⁴ Mapaōti napa atoko Pésito sāpiretari Paoro Akiripamoni:

—Uai aua kiki kateia āki Périsi takakiti Paoro inakori. ¹⁵ Xerosareē napokasaaki, sasetotxi auīteakori, Xoteo auīteakori apaka apoītari iua. Inirekarina nota paniātiniri iua okiko. ¹⁶ Txamari nisāpiretana: “Homanoakori kona okari kākiti āti apoītakiti, iua apoītakiti sākire imakenakotakani apisa. Merepanika erekari iua apokini iua apoītakanikata kākiti misiritiko mereēkari apisatoō, ninoa sākire kākiti misiritiko mereēkari kenakotini ikapani,” nitxana.

¹⁷ —Paoro omanatakani uai apokasaaki, katimatiníkata niīroā kākiti misiritiko sāpiretikoātaā. Iuaā nipikapiretari Paoro, ininiā iua apoka iua omanatakani apisatoō.

¹⁸ Ninoa sākirauata. Apoītarina Paoro. Niuākatari ninoa sāpiretiniri maerekati Paoro kamakiti. ¹⁹ Txamari ninoa auīākiti sākiretxiti xika ninoa omanatari Paoro. Kiki ipīkari Xesosi inakori xikara apoītarina. Paoro auikari Xesosi iuaīkana auāki inini. Ninoa !auikari Xesosi okitikinua.

²⁰ —Iuasaaki na nimarotari nikamakiti tīkane. Ininiā nipimaāri Paoro: “Na pinirekatari Xerosareē pisini? Iuaā pite apoītakani, pite pakini kenakotaākako,” nitxari Paoro.

²¹ Txamari iua apakapapiretano: “Kona. Sesamonira ninireka nisini,” itxano nota. Ininiā notara paniātari iua kateia āki ikaitotiniritika niokanatariko Sesamoni —itxa Pésito.

²² Ininiā Akiripa:

—Nota nirekari nikenakotiniri iua kiki sākire —itxa.

Ininiã Pésito:

—Katanarako pikenakotari iua sákire
—itxa.

Akiripa, Perenisi Pakini Apoka Pésitomoni

²³ Katimatiníkata Akiripa, Perenisi pakini apoka, itomaneri initiriakorikata. Peeremákapokona. Iiroána kákiti apotiitiniátaáua. Sotato auíteakori, sitatxi auakani auíteakori pakini iroã. Eereka Pésito píkapiretari Paoro, ininiã Paoro minaãka. ²⁴ Ininiã Pésito:

—Pite, Akiripa, híte atekata apotiitakaniaua apaka, hãtamataria ia kiki. Ikinimane Xoteoakori uai auakani, Xerosareë auakani apaka !apokaerekatari ia. Isãpiretanona ia maerekati ininiua. Ninoa amanaãno ia okiko. ²⁵ Notamoni maerekati !ikama ia. Notamoni ixika !auari ipinini íkapani. Eereka ia amanaãno apiari Sesamoni isini, ininiã nota auiritari isini. ²⁶ Txamari !nimarotari ixika niókatsopatini Sesamoni. Ininiãkara nimirari Paoro híte apisatoõ isákire híkenakotini íkapani. Akiripa, apiari pítxaua pite, ininiã ninirekari pite sãpiretinino nota niókatsopatakiti tíkane. Ia híkenakotaka atoko hisãpiretano Sesamoni niókatsopatini íkapani. ²⁷ !Apakata kateia ákikiri Sesamoni niokanatinini ixika nimasãpiretakaniã, kotxi Sesa nirekari imarotiniiri ikamakiti xika.

Paoro Sãkirauatini Akiripa Apisatoõ

26 Eereka Akiripa paniãtari Paoro:
—Nauritai pisãpiretiniaua pi-
maíkiko xika.

Ininiã Paoro õkatari iuako isákire isãpiretini íkapani. Iposo atoko Paoro sãkirauata, maerekati imakamakani ninoa imarotini íkapani.

²—Aãuíte Akiripa, notamoni erekari pite apisatoõ nisãpiretiniri Xoteoakori

apoítinino. ³ Kotxi pite iteene imarotari ate atokiriakorini oereëkiti, Xoteoakori paniãtakiti. Ininiã namanaãni pikenakotiniiri nisákire imakinika.

⁴—Xoteoakori imarotano nota átokoripanika ninakasaakiaua, nitixine nauakasaaki. Eereka Xerosareë nauakasaaki ninoa imarotano. Imarotarina ikiniõtika nauini. ⁵ Mixakapokoni ninoa imarotano nota. Imarotarina pariseo nininiãua. Ikara isãpiretaina, inirekiniãna. Kákiti pariseo inakari iteene auikari ate atokiriakorini oereëkiti sákiretxiti.

⁶—Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. ⁷ Ate nirimane, tosi pakini nirimantexi, iãtapari ikara Teoso sikaenetakiti apokini õti. Ninoa paríkauata Teoso íkapani íkanõka, pokamara pakini. Niauíte Akiripa, ikara Teoso sikaenetakiti xika Xoteoakori maíkano nota. ⁸ Kinirepa híte !auikari Teoso posotiniiri ipíkari õkitikini, iuaíkana auãki inini íkapani?

⁹—Mitxipeka nota omanataria Xesosi Nasareekiri, híte omanatiniri atokokana, ininiã nikapokotari isákire auíãkani. ¹⁰ Xerosareë nauakasaaki, nikapokotari isákire auíãkani. Sasetotxi auíteakori auiritano kákiti Teoso nakitiakori kateia áki nitakini. Kaiãopokori nitaka kateia áki. Xoteo auíteakori nirekasaakiri okinina, nota apaka nirekari. ¹¹ Nisari Xoteo apotiitiniua aikotimoni ikininape Xesosi sákire auíãkani nimisiritini íkapani. Ninirekari Xesosi sákire auíkiko xipokini. Iteene nomanatana, ininiãkara nisari apanakini sitatxitimoni ninoa nikapokotini íkapani.

¹²—Ikara xika nisari Tamásiko sitatxitimoni. Sasetotxi auíteakori auiritano nisini. Ipaniãtanona Xesosi sákire auíãkani nimaíkini. ¹³ Ipixinipokoriti,

apaniāxiti iotximere iaxitikiri apoka notamoni. Atokatxi iotximere poiāoka. Ikara iotximere apiata. Iua iotximere āki nota nimoianariakorikata aua. ¹⁴ Ate iriākata xitipe. Iuasaakipeka nikenakotari nakiritiko: “Saoro, Saoro,” itxano Epirāiko inakori sākiretxitiā. “Kixikapa pimisiritano nota? Piteka pimisiritaua, nota pimisiritakasaaki. Atxiiti kema auiteka karotaua ipitikiri aāketeē. Iua kema auite atoko pitxa,” itxano.

¹⁵ —Ininiā nota: “Apiananiri, kiriparai pite?” nitxari.

—Ininiā iua: “Xesosira nota, pimisiritakitikarano nota. ¹⁶ Pitima. Nota oerekaua pitemoni, pite nimereini ikapani, ninitiri pininiua ikapani. Uatxa pitikakiti pišāpiretako apanakinimoni. Pišāpiretapanikariko ikinimane kākiti apikomoni noerekakiti tikane. ¹⁷ Ninikataiko pite Xoteo sauaki pauakasaaki, Xoteo minakanuia sauaki pauakasaaki apaka. Xoteo minakonimoni niokanatai pisini. ¹⁸ Kākiti ipiāā sikani atoko itxana, kotxi !imarotarina Teoso sākire. Mōsiāreni atoko ninoa, kotxi !atamatarina Teoso kimapore. Ininiākara pitekara oerekanao Teoso sākire ikimapore imarotinina ikapani, ipiā itakanapinina, ikamaramoni isinina ikapani. Ininiākara !ikamaikari Satanasi paniātakiti. Teoso paniātakitinoka ikamana eereka. Ininiā ninoa auikariko nisākire, ininiākara nota makatxakariko ninoa maerekani. Ininiā Teoso nakitiakori ninoa apaka txauana,” Xesosi txano nota.

¹⁹ —Niauūte Akiripa, ikara atoko ininiāra, nikamapekari imakinika Xesosi paniātakiti, iaxiti iotximere apokasaaki nikenakotakiti. ²⁰ Nisāpiretari Xesosi sākire merepitipanika kākiti Tamāsiko sitatxiti auakanimoni, eereka nisāpiretari Xerosareē auakanimoni. Eereka nisāpiretari ikinimane Xotéia tōpa auakanimoni. Eereka nisāpiretari

kākiti Xoteo minakonimoni. Nisinimoni nisāpireāpotana ninoa: “Himaerekani hitakanapako. Hāuikariko Teoso sākire. Erekarinoka hikamako, ininiākara aimarotapitikari maerekati hitakanapini,” nitxana. ²¹ Ikara atoko nitxana ikinimane nisāpiretini. Ikara nisākire xika Xoteoakori maikano nota Teoso misākiretiko aikoti āki nauakasaaki. Kinirāo okaka itxanona. ²² Uatxa nauapanika, kotxi Teoso nīkatanano nota. Ininiā ia ōti Xesosi sākire nisāpireta hīte apiarinimoni, hīte poiāorinimoni apaka. Moisesini sāpiretakiti iaōka nisāpireta. Teoso sākire sāpiretakani sāpiretakiti iaōka nisāpireta. Ninoa sāpiretari Teoso mereēkiti apokini. ²³ Ninoa txari: “Teoso Mereēkiti apokako. Iua misiritaākako. Iuakarako ōkitikaua ipinaka atoko. Iuaikana auāki itxako. Mītxi ipinakar! ōkitikaua. Merepanika iua ōkitikaua. Iuara sāpiretariko Xoteoakori maerekani makatxakiko, Xoteo minakanuia maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka —itxa Paoro.

²⁴ Paoro ikara atoko inakasaaki, Pésito akiritari:

—Paoro, !kiikitei. Pimapitxiriāpota iteene papaiaōkarauatini xika —itxa.

²⁵ Ininiā Paoro:

—Niauūte Pésito, kona nimapitxirita nota. Atāopitikara nisākire nikama. Erekari nisākire. ²⁶ Niauūte Akiripa, pimarotapekari nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipīkasaaki, kona kipatakoriātaāni ipina. ²⁷ Niauūte Akiripa, pite auikatari Teoso sākire sāpiretakani sākire? Nota imarotari pite auikini.

²⁸ Ininiā Akiripa:

—Pite sākire txīkitakaaritano nota Xesosi sākire nauikini —itxari.

²⁹ Ininiā Paoro:

—Teoso imarotari. Ninirekari pite, hīte hīkinika uatxa nisākire kenakotakani pakini iteene hāuikiniri Xesosi sākire nota auikiniri atokotxikana. Txamari kona nota nirekai hīte kateia āki hāuini nota atoko —itxa Paoro sākire.

³⁰ Paoro sākirauataka atoko auītetxi Akiripa, itaro Perenisi, Pésito, ikinimane ninoakata ikani pakini, itimana. ³¹ Iporikiti ipokíkasaakina, imisākiretakakana:

—!Auari ikira kiki okiko xika. !Auari kateia āki itakiko xika.

³² Ininiā Akiripa txari Pésito:

—Ikira kiki mamanaākaniāri Sesa-
moni isini, isikakaākapiimako.

Paoro Potorika Homamoni Isini

27 Eereka Pésito sāpiretaua ate iketo apope Itária tixinimoni aīpiriātini. Paoro apanakini maīkakoni apaka sikaāka Xório inakorimoni. Iua Xório seī pakini sotato auīte itxaua. Sesa sotatone itxaua. ² Ate iereētaua maporo āki, Ataramítxio sitatxitikero āki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiā ate sipe. ³ Katimatiníkata ate apoka Sitoō ioporokoti. Xório tiretari Paoro, ininiā auiritari iua aōkimaneremoni isini iuaā, inirekakiti apakapini ikapani. ⁴ Eereka ate poterika iuaā. Iuasaaki ĭtima inataparata aāpisamoni, ininiā maporo iopiriāri Xipri pokomiriīti ĭtima manapakaniātaā. ⁵ Ate ĭpiriātari potxoari uiniti. Sirísia tixini takote anapa. Pāpíría tixini takote anapa. Ate apoka Míha sitatxiti, Arísia tixiniā. ⁶ Iuaā sotato auīte apokaro maporo Arexātria sitatxitikero, Itária tixinimoni sikaro. Iua iereētakaua ate oa maporo āki.

⁷ Iuaīkana apotorika. Iuasaaki ĭtima inataparata aāpisatoō, ininiā inaritika asaāpota mapaōtipeka, ininiā eereka aāpoka Sinito sitatxiti apisatoō. ĭtima tapara xika !aposotaika apikomoni asini anirekinimoni, ininiā aiopiriāri Kreta pokomiriīti ĭtima manapakaniātaā. Iuaā anapari Saomona pokomiriīti. ⁸ Ianaritika asaāpota imiriī takote. Aāpoka ioporoko “Ioporoko Erekarē” akiritikoātaā, Araséa sitatxiti takote.

⁹ Iuaā aūapokota. Pamonōkoniri apikomoni asini. Kiiniri Teoso ikapani kākiti manipokotakani inapapeka, ininiā imarotaāka ĭtima kataparari kaiamapeka apokini. Ininiā Paoro ōtākikana ninoa:

¹⁰ —Apikomoni asiniā, pamonōkoniri. ĭtima kataparari kasaikamaro maporo atiikata. Kākiti ipinako —itxa Paoro.

¹¹ Txamari sotatoakori auīte !auikari Paoro sākire. Iua auikapiretari kamaporoteri sākire, maporo nīkatakari pakini sākire. ¹² Kaiāopokori maporo āki parīkauatakani txari:

—Ia ioporoko kona erekari mitaā anapini. Masa apikomoni. Atxiīti aposota Penisi sitatxitimoni aāpokini. Iuaā manapakakari mitaā —itxana.

Penisi sitatxiti Kreta inakori pokomiriīti ioporokoti. Atokatxi ereēkokini manapi aua Penisi sitatxiti.

ĭtima Kataparari Pirena

¹³ Iuasaaki ĭtima poiāoka apokaāpota ate tixinimoni, ininiā ninoa uākatari:

—Uatxaika erekapekari Penisi sitatxitimoni asini —itxana.

Ininiā ōtanōkarina kai, maporo maīkiko, ininiā poterika atxa. Kreta miriīti takote anapaāpota. !Anirekari potxoari uiniti apanīkakiā asini, kotxi pamonōkoniri iuaā. ¹⁴ Txamari patimari ĭtima iteene inataparata Kreta pokomiriītikiri. ĭtima uāka “Atokatxi Pokīkinimonikiri.” ¹⁵ Ininiā ĭtima apoka

maporomoni. Pataparari. !Aposotari
 ĩtima ininimoni asini, ininiākara
 aāuiritari ĩtima anikiniro maporo ĩtima
 sinimoni. ¹⁶ Aiopiriāri Kaota inakori
 pokomiriīti. Iua pokomiriī xapitiri. Iua
 pokomiriīti ĩtima kimaporeē aua, ininiā
 iuasaaki pokomiriī anapakasaaki ĩtima
 poiāo taparata, ininiākara aōtanōkaro
 kanaua maporo kapokiāmonikiri.
¹⁷ Akosekaāpotari kanaua maporo
 āki aeretakini ĩkapani. Ininiā ninoa
 iapiripoatara maporo aāpitsā ĩtima
 katakakitapetiniri monōkoni. Ninoa
 pĳkari ĩtima anikiniro maporo ikipatxite
 apanĳkakiākirimoni. Iua ikipatxite
 Arĳpia tixini takote. Ininiā ikaxitikarina
 mākaxi mata maporo aniākari.
 Mākaxi mata kaikotiniā maporo
 nopini, patimaua ĩtima anikiniua.
 Ikara atoko ininiā, auiritarina ĩtima
 anikiniua. ¹⁸ ĩtima inataparatanika,
 ininiā katimatinĳkata ninoa okaāpotari
 tiitxi maporo āki auakari potxoari
 uinitimoni maporo sakikini monōkoni.
¹⁹ Katimatinĳkata okarina maporo tii
 potxoari uinitimoni.

²⁰ Mapaōti !aātamataikari atokatxi.
 !Aātamataikari iōriki. ĩtima inataparatanika,
 ininiā auākatari apinini.

²¹ Mapaōtiųpeka maporo āki parĳkau-
 atakani kona inikaikana. Ininiā Paoro
 misākiretana:

—Kinirepa hĳte kona kĳpitari
 nisākire? Kinirepa hĳte takanapari
 Kreta pokomiriīti? Hĳkĳpitaākamariko
 nōtākikini, tiitxi kona hōkamako.
²² Iuaritika kataparaxinire hĳtxako.
 Nisāpiretai, kona kākiti !ipina.
 Maporonanira sakika. ²³ Nota Teoso
 nakiti nitxaua. Iua ĩkapani niparĳkauata.
 Minipani iua nitiri iaxitikiri oerekaua
 notamoni. ²⁴ Teoso nitiri akiritano:
 “Paoro, !pipĳkarauatape. Pite
 apokapitikako Sesa apisatoō. Peerekari
 Teoso. Itiretai pite, ininiākara ninoa
 pitekata sikani !lipinapani,” itxano.

²⁵ Ininiā kataparaxinire hĳtxako,
 kotxi nota auikari Teoso sākire.
 Ikamapitikariko nisāpiretini iaōka.
²⁶ ĩtima okaroko maporo ipokomiriī
 —itxa Paoro sākire ninoamoni.

²⁷ Ipi semanati ĩtima inataparata.
 Anikaro maporo potxoari uiniti
 Metxiteháneo inakori ĳpiriātini. Eereka
 apanĳkanōka maporo āki parĳkauatakani
 uākatari imiriī takotepeka aāpokini.
²⁸ Ininiā ninoa okari kai iokaritsā
 ĳpanā imarotinina ĩkapani. Trĳta
 seisi metro ĳpanā. Eereka apikomoni
 iaōtarina ĳpanā, vĳtxi setxi metronoka.
²⁹ Ininiā ipĳkarauatana maporo kai
 mitarimoni oāpokini monōkoni. Ininiā
 maporo kapokiāmoni ikaxitikarina
 ipi ipi pakini kai iokaritsā maporo
 maĳkiko. Eereka imisākiretarina Teoso
 pāĳtiki ikatimatini ĩkapani. ³⁰ Maporo
 āki parĳkauatakani nirekari maporo
 itakanapinina. Iokaxakarina kanaua
 potxoari uinitimoni. Ninoa txaua:

—Iuaĳkana kai aiokatxaka uai maporo
 ĳkiinaā.

Txamari na atāo isākirena. Inireka-
 rina maporo itakanapinina kanaua āki.

³¹ Iuasaaki Paoro txana sotato auĳte, so-
 tatoakori pakini:

—Nakira kikiakori maporo āki
 makaikotakaniā, hĳte ipinako —itxa.

³² Ininiā sotatoakori tsotakari aāpitsa
 kanaua maĳkakari, ininiā ĩtima anikari
 iua kanaua.

³³ Iuasaaki imaropirikata. Paoro
 ōtākikana ikinimane inipokotini
 ĳkapani:

—Ipi semanati hiātapanātari ĩtima
 napini. Ipi semanati hĳteni kona xatiki
 hinipokota. ³⁴ Ininiā hinipokotako
 uatxa, hĳtapara apokini ĳkapani
 himapinakani ĳkapani. Hĳkarotiko
 !auapani. Hiāko ātika kona katxakapani
 —itxa.

³⁵ Eereka Paoro kosekari komiri.
 Ikinimane apisatoō isākirauata

Teosokata. Iposo atoko imapixinikari komiri porii, nika itxari. ³⁶Ininiã ikinimane kataparaxinirepe itxana, ininiã inipokotana. ³⁷Tosëtosi setëta seisi pakini kãkiti maporo äki auakani iuasaaki. ³⁸Iteene inipokotakana atoko, okarina triko potxoari uinitimoni maporo poana onini ikapani.

Maporo Sakikini Pirena

³⁹Katimatinikata maporo äki parikau-atakani atamatarimiri, txamari !imaro-tarina itixi uãka. Atamatarina ikipatxite, ininiã ninoa:

—Iuaã kipatxi nopini maanikaro maporo, aposotiniã —itxana.

⁴⁰Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maikiko, maporo oerekaãtiko. Iposo atoko õkitikarina mãkatxi mata maporo ikiiãtinimoni auakari, ikipatxitemoni maporo itima anikini ikapani. Ininiã ikipatxitemoni asaãpota. ⁴¹Txamari ipixinipokoriti maporo atxapaã ikipatxite nopini. Maporo ikiiãtinimoni atxapaã. !Osaika. Tsakati kataparari xika maporo kapokiãtinimoni txirakiãpota.

⁴²Sotatoakori kinirão okaka txana ikinimane maikakoni. !Nirekarina ninoa mitekini imiriimoni anokinina. ⁴³Sotatoakori auite !inirekari Paoro okiko, ininiã !auritana. Ipaniãtana ikinimane:

—Himarotiniãri hanokini, ininiã hite merepanika hikomokako. Hanoka ikipatxitemoni. ⁴⁴Eereka, hite mimataanoreni hikomokako. Himaikariko maporo txirata, ininiã hanoka ikipatxitemoni —itxana.

Ikara atoko aniniã, amakinika aãpoka ikipatxitemoni.

Máota Pokomiriiti Pirena

28 Imiriipekaua amakinika, eereka aimarotari Máota inakori

pokomiriiti aãpokini. ²Iuaã auakani apakapaua ipoxokoniritikana. Iuasaaki äparaã potorika ikipini. Äparaã kipini xika patxikareri, ininiã iuaã auakani kamari xamina, ate irokini ikapani. ³Iuasaaki Paoro apaka apotiitari xamina. Xamina pokiã itakasaakiri, xamina pataka õpõkikari imini xamina iriko äki auakari. Akatsatari Paoro uako. ⁴Ninoa ipokomiriã auakani atamatarimiri Paoro uakoã iarõkini. Ininiã imisãkiretakakana:

—Ikira kiki kokaniri atxiiti. !Pina potxoari uiniti, iuaritika inapakakiniri lauari. Uatxaika ipinapitikako —itxakakana.

⁵Paoro ikokari imini xamina pokimoni arikini ikapani. !Katsiiri iuamoni. ⁶Ninoa iãtapanãtari iuako ananapoatini. Iãtaparina iua mokatanitika ipinini. Mapa oara napa atoko !ipina, ininiã ninoa:

—Kona kokaniri ikira. Teoso itxaua —itxanãtana.

⁷Iuaãtaã takote aua kicio Põpirio inakori nakiti. Máota pokomiriiti auakani auite itxaua. Iua apakapaua ate ipoxokoniritika. Akaikota iua aapoko ipi äti pakini õti. ⁸Iuasaaki iri sirikanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini ikapani. Itakari iuako inopini. Iuasaakipeka erekapeka itxa iua. ⁹Eereka amianatakani iua pokomiriiti auakani sari Paoromoni, ininiã iua makananitana ninoa. ¹⁰Ninoa sikaua tiitxipokoni. Apotorkasaaki äto maporo äki, isikauana imakinika anireëkiti.

Paoro Homa Sitatxiti Isini

¹¹Ate napari ipi äti pakini kasiriti iuaã. Eereka aiereëtaua maporo äki, Arexãtria sitatxitikero äki. “Itaritxi Ipi” akiritaãka maporo uãka. Mitaãsaaki oa maporo kaikota Máota pokomiriiti.

¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi áti pakini õti.

¹³ Eereka iuaíkana maporo potorika. Aãpoka Héxio sitatxiti. Katimatiníkata ítima atikinimonikari ina, ininiã patimari asini. Katimatiníkata aãpoka Posoori sitatxiti. ¹⁴ Iuaã aókitana kákiti, Xesosi sákire auiákani. Ninoa amanaãua áti semanati anapini ninoakata. Eereka iuaíkana aiereétaua maporo áki. Iuaíkana apotorika. Homa sitatxiti aãpoka.

¹⁵ Xesosi sákire auiákani, Homa auakani, kenakoenetari aãpokaenetini, ininiã inana ate aókitinina íkapani. Apanakini aókitaua ate kienatxi amotikoãtaã takote, Ápio inakoriãtaã takote. Apanakini aókitaua ate kákiti imakiniãtaã, “Ipi Áti Aapokotxiti” inakoriãtaã. Paoro aókitakasaakina ninoa, ipoxokoniuaa.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. Átika sotato kaikotapika iuakata isinimoni imarotini íkapani.

¹⁷ Ipi áti pakini õti napaka atoko, Paoro píkapiretana Xoteoakori auíteakori. Ninoa apotiitakasaakiua, Paoro misákiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sákiretxiti. Iuaritika nimaíkaãka Xerosareë. Nisikanapaãka Homanoakorimoni.

¹⁸ Homanoakori pimaãno nimaíkiko xika. Eereka inirekarina isikakinino, kotxi ninoa imarotari ixika !auari nipinini íkapani. ¹⁹ Txamari Xoteoakori !inirekari Homano sikakinino, ininiãkara nakiritari Sesa nisákire ikenakotini íkapani. !Ninirekari

nimisákireporetiniri ninirimane Xoteoakori. ²⁰ Íkara atoko ininiã, nipíkapiretai híte nimisákiretini íkapani. Teoso mereékiti sákire, Xoteoakori iãtapakiti sákire nauikini xika, nota maíkaãka.

²¹ Ininiã ninoa:

—Ate !apakapari iókatsopari Xotéia tópakiri pite maerekani pirena. Aítariakori iuaã íkani !iminapiretari maerekati pikamakiti pirena. ²² Ate nirekari akenakotiniri pite auiákiti sákiretxiti, kotxi akenakoenetapekari apanakini sákire: “Xesosi sákire na atão” —itxana ninoa.

²³ Ininiã ninoa ketotari áti õti Paorokata aókitakakiniuaa. Iketotiniri manapi itomaneri kákiti sari Paoro auinimoni. Paoro íkanókapanika sákirauatapitipo. Íkanókapeka auakapanika isãpirenauatini. Isãpiretana Teoso auítetxi ininiãua.

—Atão Teoso ákiripitikara Xesosi —itxa Paoro sákire.

Isãpiretana ninoa Moisesi iókatsopatakiti, Teoso sákire sãpiretakani iókatsopatakiti apaka, atão Teoso ákiripitikara Xesosi ininiua ninoa imarotini íkapani. ²⁴ Apanakini auikari Paoro sákire. Apanakini !inirekari auikininirina Paoro sákire. ²⁵ Ininiã ninoa taparakienatakakaua Xesosi sákire auikakani mauikarenikata. Ipotorikinina apisa, iuaíkana Paoro misákiretana ninoa:

—Erekari Matamatakoti sákirauata atão hinirimanekata kitxakapirika. Ipaniãtari Teoso sákire sãpiretakari Isaía inakori isãpiretiniri Teoso sákire hinirimanemoni. ²⁶ Itxari:

Hísa kákitimoni. Hísãpiretanako ninoa: “Híkenakotari nisákire átipirika, txamari !hinirekari himarotiniri nisákire. Átipirika hítikari nikamakiti, txamari !hinirekari

hāuikiniri nota kaminiri ia atoko inakari.”

²⁷ Kotxi kākiti ākixinireē !nirekarina imarotininirina nisākire. !Nirekarina ikenakotininirina nisākire. !Nirekarina itikinirina nikamakiti. Inirekiniārina, itikapitikarina nota kamakiti. Inirekiniārina, atāo ikenakotarina nisākire. Ākixinireēna imarotaākamariko nota sākire, inamanako notamoni, ininiā nota txikitakamanako ninoa ereka ininina, itxa Teoso sākire.

²⁸ Paoro sākirauata iuaīkana ninoakata:

—Ninirekari himarotininiri Teoso iokanapirena erekari kākiti maerekani

makatxakiko pirena iokanapire-taākapeka Xoteo minakonimoni. Ninoakara auikapitikariko Teoso sākire.

²⁹ Ikara Paoro sāpiretaāka atoko, ninoa Xoteoakori sipeka. Isikasaakina, iteene itaparakienatakakauana Paoro sākire ikenakotininina xika.

³⁰ Paoro kaikota iuaā ipi anokanani. Iikitxitari kaapokori iua aapoko Paoronoka auini ikapani. Paoro ipoxokoniritika apakapana ikinimane iuamoni sikani. ³¹ Isāpiretana ninoa Teoso auītetxi ininiāua. Oerekana ninoa Xesosi, Teoso mereēkiti ininiāua, Apiananiri ininiāua. Isākirauata itaparaxiniriritika kākitemoni. Auiritaāka ikinipoko imarotakiti isāpiretini.

HOMANO

Paoro Iokanatsopatakiti Homa Auakanimoni

1 Nota Paoro iokanatsopata hitemoni. Xesosi Kristo nitirikarano nota. Teoso mereëno nota iua iokanatakiti kăkitimoni nininiua ikapani. Iua akiritano nota, Teoso iokanapirena erekari kăkitimoni nisăpiretini ikapani. Ikara parikatxinoka inireka nikamini. ²Kitxakapirika Teoso săkire săpiretakani săpiretaua Teoso sikaenetakiti, iua iokanapirena erekari. Teoso săkire iokatsopatakoriă ikara atatsopataăka.

³Ia Teoso iokanapirena erekari săpiretaua aăuïte Xesosi Kristo Teoso akiri ininiua. Kăkiti itxapekaua. Iuasaaki Tavii apika mekaniri itxaua. ⁴Iuaritika Teoso akiri itxaua. Erekari Matamatakoti oerekari kăkiti Teoso akiri ininiua Xesosi, kotxi okitikari Xesosi ipikaripeka. Iuaikana aua itxa. Ikara posotiiretxi apiari oerekari kăkiti Xesosi Teoso akiri ininiua. ⁵Xesosi Kristo sikaua ikinipoko erekari. Ininiă iokanataua ikini itixitimoni, kăkiti isăkire asăpiretini ikapani, isăkire auikinina ikapani, isăkire iaoka ikaminina ikapani. Ikara atoko aparikauata Kristo ikapani.

⁶Hitepekana, Teoso akiritai hite apaka Xesosi Kristo nakitiakori hininiua ikapani. ⁷Ininiă nota iokanatsopata hitemoni Teoso tirketakinimoni, Homa sitatxiti auakanimoni. Teoso akiritai hite iua nakitiakori hininiua ikapani. Aïri Teoso, Apiananiri Xesosi Kristo apaka sikari ikinipoko erekari hitemoni. Ikamaerekaxiniretai hite.

Paoro Nirekari Isini Homa Auakanimoni

⁸Merepanika nitxari niTeosone: “Erekapitikai, kotxi Homa auakani iteene auikari pisăkire. Ikini tōpati auakani kenakopiretari ninoauikiniri pisăkire,” nitxari Teoso Xesosi Kristo uăkaă. ⁹Nisăkirauatakasaaki Teosokata, nimisăkiretari Teoso hite ikapani. Ātipirika nimisăkiretari Teoso hite ikapani. Teoso imarotari ikara nisăkire atao inini. Nota parikauata Teoso ikapani. Iuanoka ninireka nikamini. Nisăpiretari iua iokanapirena erekari imi pirena kăkitimoni. ¹⁰Nimisăkiretakasaakiri Teoso, nitxari: “Pauiritiniăno, ninirekari païtiki Homa auakanimoni nisini. Mitxi !apakata ninoamoni nisini. Pinirekiniari iuaă nisini, pimoianatano ninoamoni napokini ikapani,” nitxari. ¹¹Iteene ninirekari naokitini hite, kotxi ninirekari Teoso kamataratiniri hăkixinire nisăkiree. ¹²Ininiă nota kamataraxiniretaiko hite, kotxi himarotari nota iteene auikiniri Xesosi săkire. Apaka hite kamataraxiniretano nota, kotxi hite apaka iteene auikari Xesosi săkire.

¹³Nitariakori, ninirekari himarotiniri itokatapiima naiamatama hitemoni nisini ikapani, txamari iuasaaki !apakata nisini. Itomaneri kăkiti Xoteo minakanuia aïtiataă auakani auikari Xesosi săkire. Ininiă iua atokotxikana ninirekari kaiăopokori kăkiti hite sauaki auakani apaka auikiniri Xesosi săkire. ¹⁴Nisăpiretari Teoso săkire ikininapemoni. Nisăpiretari sitatxi auakanimoni. Nisăpiretari itopa auakanimoni apaka. Nisăpiretari iokatsopari imarotakanimoni. Nisăpiretari iokatsopari mimarotakanimoni apaka. Ikara niparika. ¹⁵Ininiă iposope nitxa nisăpiretiniri Teoso iokanapirena

erekari hīte Homa sitatxiti auakanimoni apaka. Ikinika nitaparaā nisāpiretai.

¹⁶Na nipētauata Kristo iokanapirena erekari nisāpiretinii, kotxi iua iokanapirena oerekaua Teoso posotiire iua sākire auīākani maerekani imaktxakini ikapani. Kaposotiireri iua, ininiā imaktxakari ikinimane maerekani, iua sākire auīākani maerekani. Ikara ikaminana Xoteoakori merepanika. Eereka ikaminana Xoteo minakanuia apaka. ¹⁷Teoso iokanapirena erekari sāpiretaua Teoso txīkitakiniri kākiti atāo inakarinoka ikamini. Teoso sākire auikikoānokara, kākiti txīkitakaāka atāo inakarinoka ikamini. Teoso sākire iōkatsopatakori txari:

Kākiti atāo inakarinoka kamakani auini erekari, kotxi ninoa auikari Teoso sākire.

Kākiti Kamakiti Maerekati

¹⁸Teoso iaxiti auakari oerekaua iua omanākarauatini kākiti maerekani xika, ininiākara iua misiritariko kākiti, kotxi kākiti !inirekari Teoso paniātakiti ikamini. Ikamarina maerekatinoka. Maerekati ikamakasaakina, ikipatarina atāo inakari. ¹⁹Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitimoni iua imarotininia ikapani. ²⁰Teoso kamari itixi, ininiā kākiti atamatakasaakiri Teoso kamakiti, imarotari kiātokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiākara kākiti imarotapitikari Teoso auini. Ininiākara na atāo kākiti sākire: “Na nimarotari Teoso auini inini.”

²¹Kākiti imarotari Teoso auini, iuaritika !isāpiretarina Teoso: “Atāo Teoso pitxaua,” !itxarina. !Isāpiretarina Teoso: “Erekapitikari pikamakiti ate ikapani,” !itxarina. !Kiikitenā. !Imarotaikarina atāo inakari, kotxi ākixinireēna maerekatinoka aua. ²²Ninoa sākire: “Kimareuea ate,” txamari !kiikitenā. ²³Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hīte ateosone,” itxana.

²⁴Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina iitona nireēkiti. Ninoaka na paxitauana iitona, kotxi āti sirīka ātikata. ²⁵!Inirekarina auikinirina atāo inakari Teoso sākire. Inirekarina auikininirina atāo minakati. Teoso kamakitimoni itxana: “Pite ateosone. Aparīkauata pite ikapani,” itxana. Ikinipoko kamakari- moni !itxana: “Pite aTeosone. Aparīkauata pite ikapani,” !itxana. Atāo inakari kamakani ātipirika txari ikinipoko kamakari: “Peerekai pite.” Ameē.

²⁶Ikara kākiti maerekani xika, Teoso takanapana ninoa. Auiritana maerekati kākiti kapēta txīkitaākari, iitona nireēkiti ikaminina. Ininiā sito na nirekaikari kikikata osirīkini. Sito nirekari āto sitokata osirīkini. !Apakata. Ikara maerekati itxaua. ²⁷Iua atokokana kiki !inirekaikari sitokata isirīkini. Kiki nirekari āti kikikata isirīkini. !Apakata. Ikara maerekati itxaua. Ininiākara iitona misiritaākako imaerekanina xika.

²⁸Ninoa imaroreē !inirekarina imarotininirina Teoso, ininiā Teoso takanapana. Auiritana ixinikinirina

atão minakati. Maerekatinoka ixinikakitina, ininiã ikamarina atão minakati. ²⁹ Ākixinireēna aua ikini sereti maerekati. Itona nireēkitinoka ikamana. Ātipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Ākixinireēna ixikotarina āti. Kokaniri itxauana. Inenamauatapikana. Apanakini imisirienetana. Ixinikarina apanakini kamakiti maerekatinoka. Aāpirena ikamana. ³⁰ Imisākirepiretarina āti. Omanatarina Teoso. !Ipaxitarina apanakini imisākiretakasaakina. Iuikauana. Ātipirika: “Paimatireua ate,” itxanātana. Ixinikapikarina: “Natokopa itxa apikomoni maerekati akamini.” !Ikīpitarina iri paniātakiti, inoro paniātakiti pakini. ³¹ !Kiikitena. !Ikamarina ikamaenetakitina. !Itiretarina inirimane. !Inirekarina neenamati xipokinina. !Iamonikana apanakini. ³² Teoso sākire txari: “Kākiti ikara atoko inakani ipinapitikako. Ninoa ipinini atão.” Ikara Teoso sākire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

Teoso Misiritari Maerekati Kamakani

2 Atxiiti hīte txari: “!Erekana ninoa, kotxi ninoa kamari maerekati,” hītxa. !Apakata ikara atoko hinini, kotxi hīte apaka kamari maerekati ninoa kamakiti atokotxikana. Ininiã !apakata kākiti akiritiniri āti kākiti maerekati kamakari ininiua. ² Apakatapitika Teoso akiritiniri kākiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaōka. ³ “Ninoa maerekati kamakani misiritaākako,” hinakasaaki, hīxinikari hīte apaka kamari maerekati ninoa kamakiti

atokotxikana. Ininiã hīte apaka !hinapakapaniri Teoso misiritinii hīte. ⁴ Atxiiti na hīte maākatari Teoso, kotxi hīte txari: “Teoso katiraōkiri itxaua,” hītxa. Atxiiti na himaākatari Teoso, kotxi iusaaki !imisiritapanikai hīte. Atxiiti na himaākatari Teoso, kotxi Teoso ātipirika miteenekai hīte. Teoso nirekari hītakanapiniri maerekati hīkamakiti, erekarinoka hīkamini ikapani. Ininiã iua tiretai hīte. Ikara hīte imarotamako.

⁵ Txamari hīte paikoxinirei. Na hinirekari himaerekani hītakanapini. Ininiã himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iusaaki kākiti imarotariko Teoso omanākare imaerekani xika, kotxi Teoso atão imarotari kākiti kamakiti. ⁶ Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷ Aua kākiti ātipirika erekari kamakani. !Isāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txikitakana ātipirika auinina ikapani. ⁸ Apanakinipekana kamari inireēkitinoka. !Inirekarina atão imarotinina. Maerekatinoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹ Ikinipoko kākiti maerekati kamakani maxikaākako. Atatsirauatako. Merepanika Xoteo misiritaākako, eereka Xoteo minakanua apaka misiritaākako. ¹⁰ Teoso txanako kākiti erekari kamakani: “Erekapitikai hīte.” Ikara atoko itxanako merepanika Xoteoakori, eereka Xoteo minakanua apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kākiti maerekati kamakani. !Auiritari apanakini

maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹²Xoteo minakanuia !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iuasaaki Teoso !ikamaerekatai pite. ¹⁴Xoteo minakanuia !auari Teoso sākire iōkatsopatakori. Iuaritika atxiiti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireña. ¹⁵Teoso paniātakiti iaōka ikamakasaakina, oerekarina imarotinarina atāo inakari ākixinireña. Ākixinirena sākire sāpiretana atāo. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶Kākiti kamakiti imarotiko ōti apokako. Iuasaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakiniti apaka isāpireta. Iuasaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰Hītxari: “Koerekarerini atxaua. Kākiti miikiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹Hīte Xoteo inakanuia oerekari apanakini. Kinirepa kona hīteka oerekaua apaka? Hīte ōtākikari apanakini: “!Piitiriuatape”. Kinirepa hīte na takanapari hīitiriuatini? ²²Hīte ōtākikari apanakini: “!Pisirikape pītanoro minakotokatika.” Kinirepa hīte apaka sirika hītanoro minakotokatika? Hīte omanatari teoso kamakori, ininiā kinirepa hītirikari ninoa teosone aikoti tii? ²³Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴Teoso sākire iōkatsopatakori txari:

Hīte Xoteo xika, Xoteo minakanuia mis-
ākirepiretari Teoso,
itxa Teoso sākire iōkatsopatakori.

²⁵Teoso takaōtxikare aua hīitoā.
Teoso paniātakiti hīkaminiā,

erekapitikari Teoso takaõtxikare hiitoã auini. Teoso paniãtakiti iõkatsopatakoru himakamakaniã, Teoso takaõtxikare mauakinu atoko hitxaua. ²⁶Xoteo minakatiua, Teoso takaõtxikare iitoã mauakini, Teoso sãkire iaõka ikaminiã, Teoso txariko: “Iua Xoteo atokotxikana itxa. Nitakaõtxikare iitoã auakiti atokotxikana itxaua.” ²⁷Hite Xoteoakorimoni aua Teoso paniãtakiti iõkatsopatakoru, iuaritika !hikipitari Teoso sãkire. Teoso takaõtxikare auapitikama hiitoã, iuaritika !hikipitari Teoso sãkire. Xoteo minakanua !uari Teoso takaõtxikare iitoãna, iuaritika ninoa kamari Teoso paniãtakiti iõkatsopatakoru. Ikara atoko ininiã, ninoa oerekai himaerekani.

²⁸Kiripa atão Xoteo? Kiripa Teoso nakiti txataua? Kirimonipa aua Teoso takaõtxikare atão inakari? Teoso takaõtxikare iitoã auakini, na ikinikani atão Xoteo itxauana. ²⁹Teoso paniãtakiti iõkatsopatakoru !oerekaua Teoso nakiti aniniua. Xoteo atão inakariua, Teoso nakiti itxaua ãkixinireẽ. Teoso takaõtxikare aua iua ãkixinireẽ. Erekari Matamatakoti takari Teoso takaõtxikare iua ãkixinireẽ. !nirekari kãkiti iuikiniri. Inirekari Teoso iuikiniri.

Teoso Kamari Ikamaenetakiti

3 Atxiiti hite txano nota: “Teoso apakapari Xoteo. Teoso apakapari Xoteo minakanua apaka, ininiã !apierekata Xoteo aniniua. !apiaerekata Teoso takaõtxikare aiitoã auini.” Atxiiti ikara atoko hitxa. Txamari na atão. ²Apierekatapitika Xoteo aniniua, kotxi Teoso merepitipanika sãpiretari iuaka sãkire Xoteomoni, ninoa iõkatsopatiniri ikapani, inikatinirina ikapani. ³Iuaritika apanakini Xoteo !auikari Teoso sãkire. Ikara xika atxiiti Teoso !ikamari ikamaenetakiti? ⁴Ikamapitikari. Atxiiti

paxirari ikinimane sãkire. Iuaritika Teoso sãkire atãonoka. Teoso sãkire iõkatsopatakoru txari:

Teoso sãkirauatakasaaki, ikinimane imarotari isãkire atão ininiua. Isãpiretakasaakiri kãkiti imisiritiko imaerekani xika, iuasaaki imarotaãkako Teoso kamakiti atão inini.

⁵Atxiiti kãkiti txano nota: “Atão minakati akamakasaaki, apanakini apia imarotari Teosonoka kaminiri atão inakari. Ininiã erekari akaminiri atão minakati apanakini imarotini Teosonoka kaminiri atão inakari. Ininiã !apakata Teoso misiritiniua ate, maerekati akamini xika.” Atxiiti aua kãkiti ikara atoko ina sãkiretakani. ⁶Apakatapitika Teoso misiritiniri maerekati kamakari. Iua kamari atãonoka, ininiã apakatapitika imisiritiniri ikinimane maerekati kamakani.

⁷Atxiiti kãkiti txaua: “Atão minakati asãpiretakasaaki, apanakini imarotari Teoso sãkirenoka atão ininiua. Atão aminasãkiretakaniã, apanakini kãkiti txari: ‘Teosonoka ereka,’ itxana. Ininiã !apakata Teoso misiritiniua amaerekani xika.” Atxiiti aua kãkiti ikara atoko ina sãkiretakani. ⁸Ikara atão ininiã, maerekati makama erekari apokini ikapani. Txamari ikara sãkiretxiti na atão. Iuaritika apanakini apoitapekaua ate ikara atoko asãpiretini. Ininiã atãopitika ninoa misiritiko, isãkirena xika.

!Auari Kãkiti Erekari

⁹Hixinikariko ikinika ikara nisãpiretakiti. Atauako Xoteo apiaerekata? Atauako Xoteo minakanua poião ereka? Kona ikara atokoni itxa. Noerekapekai hite, Xoteo minakanua atokokana itxa Xoteo, kotxi ikinimane kamari maerekati. Akinika !apostari

atakanapiniri maerekati akamini.

¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti. Erekarī kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa. Itotarina imisirienetinirina apanakini. Kākiti sākire imini tsiā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatīka inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamatchi itakanapinina.

¹⁸ !Ipaxitarina Teoso. !Ipīkarina iua. Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini ikapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekepekaua itxīkitakiniri kākiti atāo inakari kamakani ininiua. Teoso paniātakiti ikinika !ikama kākiti, iuaritika itxīkitakaākana atāo inakari kamakani

ininiua. Kitxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiua, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiua, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximeremoni. ²⁴ Maerekati kamakaniua ate, iuaritika Teoso sikari ikinipoko erekari maxikatīka atemoni, ininiā Teoso kamaerekataua ate, kotxi Kristo Xesosi iīkitxirauata ate ikapani ipīkasaaki. Ininiā Teoso !imisiritakaua amaerekani xika. ²⁵ Teoso sikari Xesosi ipinini kākiti ikapani. Xesosi ipīkasaaki, Teoso makatxakari maerekati akamakiti. !Imisiritakaua ate, kotxi aāuikari Xesosi ipinini ikitxitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atāo inakarinoka ikamini. Mitxipitipanika Teoso !imisiritana kākiti imaerekanina xika. Iātapari iketo manapi apokini, kotxi iamoniari kākiti. ²⁶ Teoso sikari Xesosi, ininiā ipīpe kākiti ikapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarinoka kamakari itxaua iua, kotxi !auiritari maerekati kamakari inapakakini. Erekarī Teoso, ininiā iua posotari ikamaerekatiniri kākiti Xesosi sākire auīākani.

²⁷ Ininiā !apakata aāuikiniua, kotxi !auari aparīka akamaerekatakiri, ininiā !apakata aāuikiniua Teoso paniātakiti iōkatsopatakori akamakasaaki. Teosora kamaerekataua, Xesosi sākire aāuikasaaki. ²⁸ Teoso paniātakiti iōkatsopatakori kamakari atxīiti !ikamaerekataāka, kotxi !auikari Xesosi sākire. Xesosi sākire auikakarīnoka

ikamaerekataāka. ²⁹Atauako Teoso Xoteo Teosonenanini itxataua? Konapitini. Xoteo minakaniua Teosonekanera apaka itxaua Teoso. ³⁰Teoso ātinoka aua. Iua kamaerekatana Xoteo, Xesosi sākire auiākani. Iua kamaerekatana Xoteo minakaniua apaka, Xesosi sākire auikasaakina. ³¹Ikara atoko ininiā, atxiīti kākiti txari: “Teoso kamaerekataua ate, kotxi aūuikari Xesosi sākire, ininiā Teoso paniātakiti iōkatsopatakori !itxaika. Ininiā !akamaikari,” itxa kākiti sākire atxiīti. Konapitini. Xesosi sākire aūuikasaaki, anirekari iteene akaminiri Teoso sākire paniātakiti iōkatsopatakori.

Atāo Inakari Kamakari Apraão

4 Maxinikari Apraão aīri kitxakapirīkari. Natokopa itxa iua imarotakiti, Teoso kamaerekatiniri kākiti? ²Apraão kamakiti erekari kamaerekataākamariko iua, ininiā iua iuikamauako. Txamari iua iuikiniua !uari Teoso apisatoō. ³Teoso sākire iōkatsopatakori txari:

Apraão auikari Teoso sākire, ininiākara Teoso txīkitakari iua atāo inakari kamakari ininiua.

⁴Parīkauatakari ipatrāote sikari iparīka īki iuamoni. Maxikatīka !iikitxitari iua. Isikari, kotxi iparīkauata. ⁵Kākiti auikiniāri Teoso kamaerekatiniri maerekati kamakari, iua kākiti !uikari iuaka parīka. Imarotari iparīka !ikamaerekatari iua. Teoso txīkitakari ikara atoko inakari kākiti atāo inakari kamakari ininiua, kotxi iua auikari Teoso sākire. ⁶Kitxakapirīka Tavii txari ikara atoko. Iua sāpiretari kākiti Teoso sikakiti erekari apakapakani. Teoso txīkitakari iua atāo inakari kamakari ininiua. Na iparīkani txīkitakari iua atāo inakari kamakari ininiua. ⁷Tavii txari:

Teoso makatxakasaakiri kākiti maerekani, !atamataikari maerekati ikamakiti. Teoso takari ikinipoko erekari kākiti ikara atoko inakarimoni.

⁸Teoso !iaōtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirīka.

⁹Atxiīti pite txari: “Atauako ia erekari Teoso sikakiti, Tavii sāpiretakiti, kākiti Teoso takaōtxikare auaitotakiti ikapaninanini?” Konapitini. Ia erekari Teoso sikakiti Teoso takaōtxikare mauaitotakini ikapani apaka. Nisāpiretapekai ia Teoso sākire iōkatsopatakori:

Apraão auikari Teoso sākire, ininiākara Teoso txīkitakari iua atāo inakari kamakari ininiua,

itxa Teoso sākire iōkatsopatakori.

¹⁰Kirisaakipa Teoso txīkitakari Apraão atāo inakari kamakari ininiua? Atauako Teoso takaōtxikare Apraão itoā auakasaakiikani? Konapitini. Takaōtxikari Apraão itoā takiko apisapanikara, itxikitakari Apraão atāo inakari kamakari ininiua. ¹¹Merepanika Teoso txīkitakari Apraão atāo inakari kamakari ininiua, eerekaikara itakari itakaōtxikare iitoā. Ikara Teoso takaōtxikare oerekari, mitxipeka Teoso txīkitakari Apraão atāo inakari kamakari ininiua, kotxi iua auikari Teoso sākire. Apraão auikari Teoso sākire, Teoso takaōtxikare iitoā auini apisapanika. Ininiā Apraão ikini Teoso sākire auiākani iri atoko itxaua. Atxiīti Teoso takaōtxikare iitoāna !uari. Iuaritika ninoa iri atoko itxaua Apraão. Teoso txīkitakari ikinimane iua sākire auiākani atāo inakari kamakari ininiuana. ¹²Apraão Teoso takaōtxikare auaitotakini iri atoko itxaua, ninoa auikiniāri Apraão sākire Apraão auikiniri atokotxikana, kotxi Teoso

auikari Teoso sākire Teoso takaōtxikare iitoā auini apisapanika.

¹³Teoso sikaenetari itixi Apraāomoni, imekaniriakori pakinimoni. Ikara atoko Teoso sākire, kotxi Apraāo auikari Teoso sākire. Iua auikari Teoso sākire, ininiā Teoso txīkitakari iua atāo inakari kamakari ininiua. Apraāo kamakiti erekari !itxīkitakari Teoso sikaenetiniri itixi Apraāomoni. ¹⁴Kākiti erekari kamakari Teoso sākire mauīākati !apakapari Teoso sikaenetakiti, kotxi !auikari Teoso sākire. Teoso sikari isikaenetakiti iua sākire auīākanimoninani. ¹⁵Teoso paniātakiti iōkatsopatakoriki makamakati misiritaākako. Teoso paniātakiti iōkatsopatakoriki mauakanīā, maerekati !auari. Txamari auapitika Teoso paniātakiti iōkatsopatakoriki.

¹⁶Ininiā kākiti auikasaakiri Xesosi sākire, apakapari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitimoni. Ininiā ikinimane Apraāo apika mekaniriakori apakapapitikari Teoso sikaenetakiti. Xoteoakori Teoso paniātakiti iōkatsopatakoriki auakini apakapari. Xoteo minakanīua Teoso sākire Apraāo auikini atoko inakani apaka apakapari. Ate amakinika iri atoko itxaua Apraāo. ¹⁷Teoso sākire iōkatsopatakoriki txari:

Teoso txari Apraāo: “Nota txīkitakaiko pite itori āti uāka iri pininiua.”

Ininiā Teosomoni iua aīri atoko itxaua, kotxi Apraāo auikari Teoso sākire. Teoso txīkitakana ipīkani iuaīkana auāki inini. Iua kamari mitxi mauakati auini.

¹⁸Apraāo kiomātxipeka inakasaaki, kona keeneri. Iuaritika auikari Teoso sākire. Iātapari Teoso sikaenetakiti apokini. Ininiā apanakini āti uāka iri atoko itxapekaua Teoso sākire iaōka. Teoso sākire iōkatsopatakoriki txari:

Papika mekaniriakori kaiōpokopaniriko.

¹⁹Apraāo seī anokanani inakasaaki, imarotari iito ipinanapanoka inini. Imarotari Sara !oposotaikari keene onini. Iuaritika iteene auikari Teoso sākire. ²⁰Iotoka auikiniri Teoso sakiniri isikaenetakiti iuamoni. Iua auikari Teoso sākire itaparaxinireritika. “Teoso posotari ikinipoko ikamini,” itxa. ²¹Iua iteene imarotari Teoso posotiniri isikiniri isikaenetakiti. ²²Apraāo auikari Teoso sākire, ininiākara Teoso txīkitakari iua atāo inakari kamakari ininiua. ²³Na Apraāonanini Teoso txīkitaka atāo inakari kamakari ininiua. ²⁴Iua txīkitakaua ate apaka atāo inakari kamakani aniniua, aūuikiniāri Teoso sākire. Aūuīte Xesosi ipīkasaaki, Teoso ōkitikari iua iuaīkana auini īkapani. ²⁵Teoso sikari Xesosi kākitimoni ipinini īkapani maerekati akamakiti xika. Teoso ōkitikari iua iuaīkana auāki inini īkapani, ate ikamaerekatini īkapani.

Teoso !Omanataikaua Ate

5 Ininiā Teoso kamaerekataua, kotxi aūuikari isākire, ininiākara aūuīte Xesosi Kristo iotokakari Teoso omanatinīua ate. Teoso !omanataikaua ate. Uatxa apakapaua ate. ²Aūuikasaakiri Xesosi sākire, iuasaaki aimarotari ikinipoko erekari Teoso sikakiti atemoni ikiniōtika. Iteene apoxokoniua, kotxi aiātapari Teoso aaōkitini, iua iotximere aātamatini īkapani. ³Apanakini misiritakasaakīua, apoxokoniua apaka, kotxi Teoso oerekaua amīteenekiniri amisiritiko. ⁴Amisiritiko amīteenekiniā, aimarore apiaāpota. Aimarore apiaāpotakasaaki, aiātapariko erekari apokini atemoni. ⁵Erekari apokini aiātapiniā, aāpakapapitikariko erekari, kotxi aākixinireē aimarotari Teoso iteene tīretiniua. Erekari Matamatakoti Teoso

sikakiti atemoni, oerekaua Teoso tiraōki aākixinireē.

⁶Erekari akamini amaposo-takanisaaki, Teoso amanirekakanisaaki, Kristo ipina ate ikapani. Iua ipina iketo ōti manapi. ⁷Atxiīti kākiti ipina atāo inakari kamakari ikapani iua mapinakanani ikapani? Atxiīti lipina iua ikapani. Atxiīti kākiti ipina āti erekari kamakari ikapani, iua mapinakanani ikapani? Atxiīti ipina iua ikapani. ⁸Teoso oerekaua ate, iua iteene tiritiniua ate, kotxi Kristo ipina ate ikapani maerekati akamapanika anakasaaki.

⁹Kristo ipinini kamaerekataua ate, ininiā uatxa Teoso apakapaua ate. Apikomoni Kristo kaminaua, kotxi Teoso !omanataikaua. !Misiritaikaua. ¹⁰Ate Teoso omanatakani anakasaak-iua, Teoso ākiri ipina ate ikapani. Ininiā Teoso mokaiakari !atxaikaua. Iua apakapaua. Iua apakapaua, ininiā amaerekani imakatzaka, ininiā aāuapininiika, kotxi iua ōkitikaua auapininiika anini ikapani Teosokata, kotxi Kristo auini auapika. ¹¹Teoso kamari ikara ate ikapani. Apikomoni iua kaminapanikauako ate, kotxi iua kamapoxokonitaua, kotxi aāuīte Xesosi Kristo mikanapiriāua ate Teosomoni.

Adāo, Kristo Pakini

¹²Maerekanitxi apoka itixi kiki ātika xika, Adāo inakori xika. Maerekati ikamakiti xika ipina. Ininiā ikinimane kākiti ipina, kotxi ikinimane kākiti kamari maerekati. ¹³Teoso paniātakiti iōkatsopatakori apokini apisapanika, kākiti kamari maerekati, iuaritika Teoso !misiritana ninoa maerekati ikamakitina xika, kotxi iusaaki !isāpiretapanikari ipaniātakiti. ¹⁴Adāo auakasaaki atoko, Moisesi auakasaaki manapi, iusaaki Teoso paniātakiti iōkatsopatakori !apokapanika, iuaritika

ikinimane ipina. Atxiīti kākiti !ikamari maerekati Adāo maerekani atoko, kotxi iua !ikamari Teoso paniātakiti, iuaritika ikinimane ipina. Kiki Adāo inakori axinikasaaki, aimarotari iua Xesosi atoko ininiua.

¹⁵Txamari aimarotari iua na Xesosi !atokoni itxaua, kotxi ātika kiki maerekani xika, itori kākiti ipina. Iua sikari ipikitxi kākitimoni. Kiki ātipekana, Xesosi Kristopekana, iua sikari erekari Teoso siākiti itori kākitimoni imapinakanina ikapani. Teoso siākiti iiki !auari. !Erekari Adāo sikakiti. Peerekari Xesosi Kristo siākiti. ¹⁶Kiki ātika Adāo inakori kamari maerekati. Ātinoka maerekati ikama, ininiā eereka Teoso sāpiretari imaerekani. Eereka Teoso misiritari iua. Teoso siākiti !ikara atokoni itxa. Kākiti maerekati itori ikamakasaaki, kiki ātipekana Xesosi sikari Teoso siākiti kākitimoni, ininiā ikamaerekatana kākiti. Iusaaki imakatzakari ninoa maerekani. ¹⁷Kiki ātika, Adāo inakori maerekani xika, Teoso txīkitakari ikinimane ipinini. !Erekari iua kiki kamakiti. Āti kiki, Xesosi Kristo inakori kamakiti peerekari. Iua txīkitakari kākiti ākixinire katapara inini maerekati imakamakani ikapani. Kākiti ikara atoko inakari Teoso sikari ikinipoko erekari. Itori isika. Itxīkitakari iua atāo inakari kamakari ininiua. Ia iparika iki lauari.

¹⁸Adāo kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatina kākiti ninoa ātipirika auini ikapani. Iusaaki atāonoka ikamakiti. ¹⁹Kiki ātika Adāo inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso

sākire iaōka, ininiā itxīkitakari kākiti itomaneri atāo inakari kamakani ininiuana.

²⁰Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiaāpota, iuaritika erekari Teoso sikakiti kākitemoni apiata. ²¹Maerekanitxi txīkitakari kākiti ipinini. Erekari Teoso sikakiti kākitemoni txīkitakari kākiti auini ātipirika imaxipokakani tikane, kotxi aāuīte Xesosi Kristo txīkitakari kākiti atāo inakari kamakari ininiua. Ininiākara kākiti auapininiika, kotxi Xesosi Kristo kamaerekatana.

!Anirekaikari Maerekati Akamini

6 Ininiā erekari atxiīti apikomoni maerekati akamini, ikinipoko erekari Teoso sikakiti apiata auini ikapani? ²Konapitini. Teoso makatxakapekari amaerekani, kotxi iuasaaki !anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴Apatxisatiko oerekari Kristokata ikatakoni atoko aniniua, ininiā !anirekari apikomoni maerekati akamini. Kristo iri Teoso posotiire ōkitikari imi, iuaikana auāki inini ikapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini ikapani.

⁵Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaikana auini

atokokana, aāuini amaneri. Peerekari, kotxi aāuapika Kristokata, ātika atoko aniniua iuakata. ⁶Mitxi anireēkiti xipope, kotxi Kristo makatxakari amaerekani aamina ipiriāmatakari nopini ipikasaaki ate ikapani. Ininiā mitxi anireēkiti posotiire !auaika. Ixipokaākapeka, kotxi mitxi anireēkiti maerekatina. Ininiā maerekanitxi nitiriakori atoko !atxaikaua. Aimarotari ikara. ⁷Maerekanitxi na paniātaikari kākiti ipikari.

⁸Kristokata ipikani atoko aniniā, aimarotari iuakata aāuini apaka. ⁹Ipikasaaki ōkitikaāka, ininiā !lipinaika. Aimarotari ikara. Ipikitxi na kaposotiireikari iuaikana Kristo ipinini ikapani. ¹⁰Iua ipina maerekanitxi posotiire ixipokini ikapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini ikapani. ¹¹Iua atokotxikana anireēkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireēkitinoka akamini ikapani, kotxi Kristo Xesosikata aāuapika.

¹²Ininiā na hāūiritapiri hīto paniātini maerekati hīkamini. Na hīkamapiri maerekati hīto nireēkiti. ¹³Na hāūiritapiri hīto kaminiri maerekati. Na hāūiritapiri hōki kaminiri maerekati. Na hāūiritapiri hinama kaminiri maerekati. Na hāūiritapiri hūuako kaminiri maerekati. Na hīkamapiri maerekati hīto nireēkiti. Hīteka hīsikauako Teosomoni, kotxi mitxi ipikani atoko hītxaua, eereka Teoso txīkitakai auāki iuaikana hinini, ininiā hīsikari hīto ikinika Teosomoni. Atāo inakarinnoka hīkamako hōkiā, hinamaā, hūuakoā, imakinika hītoā. ¹⁴Uatxa maerekanitxi apatrāote atoko !itxaikauako. Uatxa amisiritiko !auaika, Teoso paniātakiti iōkatsopatakori

amakamakaniā, kotxi ikinipoko erekari Teoso sikakiti aāpakapakasaaki, iuasaaki imaktxakari amisiritiko.

Atāo Inakari Nitiriakori

¹⁵ Ininiā atxiīti hītxano nota: “Maerekati makama, kotxi amisiritiko !auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imaktxakari amisiritiko. Ininiā makamari maerekati,” atxa atxiīti. Konapitini. ¹⁶ Himarotari, hāuiritiniāri kākiti paniātini iua nireēkiti hīkamini, ininiā iua hīpatrāote atoko itxaua. Iua nitiriakori atoko hītxaua, kotxi hīkamari iua paniātakiti. Maerekanitxi hīpatrāote ininiāua, hīkamari maerekati, ininiā hīpina. Ininiā kona hāua Teosokata ātipirika. Teoso hīpatrāote ininiāua, iua paniātakiti hīkama, ininiā atāo inakarinoka hīkama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hītxaua. Uatxa maerekanitxi nitiriakori !hītxaikaua, kotxi iteene hīkīpitari hōerekiko. ¹⁸ Teoso maktxakapekai hīte, ininiā uatxa maerekanitxi nitiriakori !hītxaikaua. Uatxa Teoso nitiriakori hītxaua, ininiā atāo inakarinoka hīkama. ¹⁹ Ikara atoko nitxa sākireta hītemoni, kotxi himarotari nitiritxi, patrāo pakini pirena. Himarotakiti poiāoka. Mitxi hāuiritari hīto kaminiri maerekati inireēkiti. Hāuiritari hīto apikomoni maerekati ikamaāpotini. Apiaāpota maerekati hīkamakiti. Iuasaaki hīto maerekanitxi nitiri atoko itxaua. Uatxa hīsikari hīto Teosomoni atāo inakari nitiri ininiua ikapani, ininiā hīkamariko atāo inakarinoka. Ininiā Teoso nakitiakorinoka hītxaua.

²⁰ Maerekanitxi nitiriakori hinakasaakiaua, atāo inakari nitiriakori na hītxaua, ininiā atāo inakari na paniātai hīte atāo inakarinoka hīkamini. ²¹ Īkiripa erekari hāpakapa, maerekati mitxi hīkamakasaaki? Kona kapakaparei. Uatxa hīpētauata maerekati mitxi hīkamakiti xika. Maerekati kamiko xika kākiti ipina, ininiā kona aua Teosokata ātipirika. ²² Uatxa maerekanitxi na paniātaikai hīte. Uatxa Teoso nitiriakori hītxapekua, ininiā hīkamari ikinipoko Teoso ikapani. Ininiā hāupininiika hītxako Teosokata ātipirika. ²³ Maerekanitxi kākiti patrāote atoko itxa. Iikitxitari kākiti parīkatxi ĩki, txamari ipīkitxi itxaua parīkatxi ĩki. Teoso sikakiti atemoni ātiāo. !Aparīkauata Teoso sikakiti aāpakapini ikapani, iuaritika isikaua aūuini ātipirika inini ikapani, kotxi aūuīte Xesosi Kristo ipina ate ikapani.

Tanirauatakaro Atoko Atxa

7 Nitiriakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ² Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³ Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴ Nitiriakori, oa sito atokotxikana ate amakinika. Kristo ipina ate ikapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori

atxaua, ininiã erekari akama Teoso ikapani. ⁵Mitxi anireëkiti maerekati paniãtaua maerekati akamini. Aïto nirekari maerekinoka ikamini, kotxi paniãtakori iökatsopatakori txari: “Kona hïkamapiri maerekati.” Ininiã iusaaki apiata anirekari maerekati akamini, kotxi maerekinoka kamakani atxaua. Ininiã apina, ininiã kona aãuapika Teosokata. ⁶Mitxi paniãtakori iökatsopatakori nirekari ipaniãtiniua. Uatxa paniãtakori iökatsopatakori na paniãtaikaua. Ikara kitxakari. Uatxa amaneri, kotxi uatxa aparïkauata Teoso ikapani. Erekari Matamatakoti oerekaua aparïkauatini Teoso ikapani.

Teoso Paniãtakiti Iökatsopatakori

⁷Ininiã natokopa itxa uatxa axinikakiti? Teoso paniãtakiti iökatsopatakori maerekati itxaua atxiïti? Konapitini. Maerekati !itxaua. Teoso paniãtakiti iökatsopatakori mauakanimako, nota !imarotamariko maerekati nikamini. Teoso paniãtakiti iökatsopatakori txari:

Kona pinirekapiri äti nakiti, ininiã äti nakiti ninirekiniã, nimarotari nikaminiri maerekati. ⁸Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iökatsopatakori txari:

Kona pinirekapiri äti nakiti.

Teoso paniãtakiti iökatsopatakori mauakaniã, iusaaki maerekati !uari.

⁹Teoso paniãtakiti iökatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniãtakiti iökatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika.

¹⁰Iusaakipeka nimarotari nãkixinire ipïkari atoko inini. Teoso paniãtakiti

iökatsopatakori oerekari kãkiti erekari ikamini, iua auini ikapani. Txamari Teoso paniãtakiti iökatsopatakori oerekano nota nipinini nimaerekani xika. ¹¹Maerekati ninireëkiti misirienetano. Imisirienetano, ininiã na nikamari Teoso paniãtakiti iökatsopatakori iaõka. Ininiã nikamari maerekati. Ininiã maerekati xika nipina.

¹²Teoso paniãtakiti iökatsopatakori lauari maerekati, kotxi Teoso kamari. Atãonoka itxa Teoso paniãtakiti. Erekari. ¹³Atxiïti erekari txïkitakano nipinini? Konapitini. Maerekanitxi txïkitakano nipinini. Maerekanitxi txïkitakano Teoso paniãtakiti iökatsopatakori erekari nimakamakani, ininiã nikamari maerekati, ininiã iua maerekanitxi txïkitakano nipinini. Ininiã aimarotari maerekanitxi kona xatiki apakata. Maerekinoka, kotxi maerekanitxi txïkitakano nipinini. Teoso paniãtakiti iökatsopatakori oerekaua ikara atoko inakari.

¹⁴Aimarotari Teoso paniãtakiti iökatsopatakori iaxiti ikari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ikapani. ¹⁵Na nimarotari nikamakiti, kotxi na nikamari notaka nireëkiti. Nikamari nimanirekakiniti, nomanatakiti. ¹⁶Ininiã maerekati nimanirekakiniti nikamakasaaki,

iusaaki nimarotari Teoso paniãtakiti iökatsopatakori ereka inini. ¹⁷Ininiã na notani kamari maerekati. Maerekati nãkixinireë auakarira txïkitakari nikaminiri iua maerekati.

¹⁸Nimarotari erekari !uari nãkixinireë. Maerekinoka aua nãkixinireë, kotxi ninirekari erekari nikamini, txamari !nuposotari. ¹⁹Na nikamari erekari ninireëkiti. Nikamapikari maerekati nimanirekakiniti. ²⁰Ininiã nimanirekakiniti nikaminiã, kona

notani kamari. Maerekati nākixinireē auakarira txīkitakano iua maerekati nikamini.

²¹ Ininiā ia sākiretxiti atāo: Ninirekasaakiri erekari nikamini, maerekatinoka niposota nikamini. ²² Nākixinireē iteene ninirekari Teoso paniātakiti iōkatsopatakori iaōka nikamini. ²³ Txamari aua āti ninireēkiti niito āki. Iua niito nireēkiti nirekari ixipokiniri nākixinire nireēkiti. Iua niito nireēkiti xika nikamari maerekati nireēkitinoka. !Niposotari erekari nikamini. Kateia āki iaxirikakoni atoko nitxa. ²⁴ !Erekanota nota. Maerekati kamakarino nota. Kipa makatxakano, maerekati niito nireēkiti nimakamakani ikapani? Niito txīkitakano nipinini. Kipa moianatano? ²⁵ Aūiite Xesosi Kristokara moianatano. Iuara makatxakano nimapinakani ikapani. Peerekari Teoso, kotxi iua kamari ikara atoko nota ikapani.

Ininiā uatxa ia atoko inakari nisāpiretai. Nākixinireē ninirekari Teoso paniātakiti iōkatsopatakori nikamini. Txamari niitoā maerekanitxi nireēkitinoka niposota nikamini.

Erekari Matamatakoti Txīkitakari Aākixinire Auāki Inini

8 Ininiā uatxa Teoso !itxaikaua ate: “Maerekati hīkamakiti xika nimisiritaike hīte,” !itxaikaua ate, kotxi Kristo Xesosi nakitiakori atxapekaua. !Akamaikari āito nireēkiti. Erekari Matamatakoti sikaposotiiretaua iua nireēkiti akamini. ² Erekari Matamatakoti nireēkiti akama, ininiā iua txīkitakari aākixinire auāki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireēkiti nikamini, ininiā na nipina. ³ Aīto maerekani xika Teoso paniātakiti iōkatsopatakori !iposotari imakatxakiniri amaerekani,

kotxi !aposotari akaminiri iua paniātakiti. Iuaritika Teoso makatxakari amaerekani, kotxi iua iokanatarimi imi atemoni. Imi ito ate ito atoko, maerekati kamakari ito atoko itxa. Teoso iokanatarimi imi atemoni ipinini ikapani, amaerekani imakatxakini ikapani. Ininiā ixipokari maerekati posotiire aītoā auakari. ⁴ Teoso kamari ikara, ininiā Xesosi kamari ikinika Teoso paniātakiti iōkatsopatakori iaōka ate ikapani, kotxi ipaniātakiti atāo inakarinoka. Ininiā !akamaikari maerekati aīto nireēkiti. Akamari Erekari Matamatakoti nireēkiti.

⁵ Itotxi nireēkiti kamakani xinikapikari iitona nireēkitinoka. Erekari Matamatakoti nireēkiti kamakani xinikapikari Erekari Matamatakoti nireēkitinoka. ⁶ Kākiti xinikiniāri iito nireēkitinoka, ixinikakiti txīkitakari iua ipinini, ininiākara kona auapika Teosokata. Kākiti auiritiniāri Erekari Matamatakoti txīkitakiniri ixinikiniri Erekari Matamatakoti nireēkitinoka, iua auapininiika Teosokata. Erekaxinireri iua. ⁷ Kākiti xinikiniāri iito nireēkitinoka, Teoso mokaikariakori itxauana, kotxi !inirekarina Teoso paniātakiti iaōka ikaminina. !Iposotarina Teoso paniātakiti iaōka ikaminina. ⁸ Itotxi nireēkitinoka kamakani !iposotari ikamapoxokonitirinina Teoso.

⁹ Hitepekana, Erekari Matamatakoti hākixinire auiniā, hīkamari iua paniātakiti. !Hīkamari maerekati hīto paniātakiti. Erekari Matamatakoti kākiti ākixinireē mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰ Hīto ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakarinoka ate ikapani. ¹¹ Teoso ōkitikari Xesosi, iua

ipīkasaaki. Erekarī Matamatakoti Teoso nakiti hākixinireē auiniā, Teoso Kristo ōkitikakarī, txīkitakarīko hīto ipinakarī iuaīkana auāki inini, kotxi Erekarī Matamatakoti Teoso nakiti aua hākixinireē.

¹² Ininiā nitariakori, auapitika akamakiti tīkane Teoso ikapani. !Auari akamakiti tīkane aīto nireēkiti akamini ikapani. ¹³ Hīto nireēkiti hīkaminiā, hīxinire ipikarī atoko itxa, ininiā ātipirika kona hāua Teosokata. Hamanaiāri Erekarī Matamatakoti maerekati hīto kamakiti ixipokini, iusaaki hāupika ātipirika Teosokata.

¹⁴ Erekarī Matamatakoti nireēkiti kamakani, Teoso anaakori itxauana, kotxi Erekarī Matamatakoti Teoso nakiti. ¹⁵ Iua Erekarī Matamatakoti Teoso sikakiti hītemoni. !Itxīkitakai nitiritxi kapīkareri hininiua. Itxīkitakai Teoso anaakori hininiua. Erekarī Matamatakoti posotiireē aākiritari aīri Teoso: “Papai, niri,” atxari. ¹⁶ Erekarī Matamatakoti sāpiretaua aākixinireē Teoso anaakori aniniua. ¹⁷ Teoso anaakori aniniāua, aāpakapariko erekarī Teoso nīkatakiti ate ikapani. Kristo apakapari erekarī Teoso nīkatakiti iua ikapani, ininiā ate apakapari iuakata. Kristo misiritaākapeka. Ate misiritiko apaka auiniā Kristo sākire aāuikini xika, Kristo ikinimane auīte inakasaakīua, ate apaka aua iuakata iusaaki. Aātamatari iua iotximere. Peerekari iusaaki iuakata aūuini.

Aāpakapariko Ikinipoko Erekarī

¹⁸ Uai itixi aāuakasaaki, aātatsiirauata. Eereka !axinikaikari mitxi aātatsiirauatini, kotxi Teoso oerekauako ikinipoko erekarī. Iusaaki peerekari. ¹⁹ Ikinipoko Teoso kamakiti iātapari ipoxokoniritika Teoso keto ōti. Iusaaki aimarotari Teoso anaakori. ²⁰ Kotxi ikinipoko Teoso kamakiti misiritaākapeka, ixipokaāpotini tīkane.

Ikinipoko Teoso kamakiti ixinireka !ixipokaāpota. Teoso txīkitakarī ikinipoko xipokaāpotini. Iuaritika aimarotari, ipikitxi xipokini ōti apokapitikako. ²¹ Ikinika Teoso kamakiti iātapari iua ōti. Iusaakiko itixi amaneri itxauako. !Ixipokaika. Iusaaki ikinika amaneri. !Ixipokaika. Teoso anaakori misiritiko !auaika. Peerekari iusaakiko.

²² Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³ Na itixi Teoso kamakitinanini atatsiirauata. Aākixinire apaka akiripireta, kotxi anirekarī Teoso keto apokini. Iusaaki iua apakapaua ate iua anaakori. Iusaakiko aīto amaneri isikaua. Iusaakiko aīto !kaxiporeikari. Merepanika Teoso sikakiti auapeka atemoni, kotxi iua sikapekarī Erekarī Matamatakoti atemoni. ²⁴ Teoso makatxakapekarī amaerekani, aāuikasaakiri isākire. Ininiā aiātapari apikomoni isikaenetakiti atemoni. !Aātamatapanikari isikaenetakiti, ininiā aiātapapanikari. Aāuikapitikari isikaenetakiti isikiniua, ininiā atāo aāuikiniri. ²⁵ Aiātapari aāpakapakiti tīkane. !Aāpakapapanikari, iuaritika aiātapari apoxokoniritika, kotxi aimarotapitikari ikara apokini.

²⁶ Erekarī Matamatakoti moianataua, kotxi na kataparaxinireua. !Aimarotari aamanaākiti tīkane, Teoso amisākiretakasaaki. Iuaritika, Erekarī Matamatakoti misākiretari Teoso ate ikapani. Asākireē !aposotari asāpiretiniri Teoso ikinika anireēkiti, ininiā Erekarī Matamatakoti misākiretari Teoso ate ikapani. Ipinimoni itxa isāpiretiniri Teoso. Kākiti sākireē !isākirauata Teosokata. ²⁷ Teoso imarotari kākiti ākixinire, ininiā iua imarotari Erekarī Matamatakoti xinikakiti, kotxi Erekarī Matamatakoti

misäkiretari Teoso, Teoso nakitiakori ikapani. Erekar Matamatakoti amanaari Teoso, Teoso nirekiti ikaminana inakitiakori.

Teoso Iteene Tiretiniua

²⁸ Aimarotari ikiniotika erekari ikaminaua ate, kotxi iua tirketani, iua merekini atxaua ate. Iuaritika aatatsiirauatini auapitika. Iuaritika iusaaki apaka erekari ikaminaua. Iua mereua, kotxi inirekari imereiniua. ²⁹ Itixi kamiko apisapanika Teoso imarotapekaua ate. Iua merepekaua ate, iua anaakori kaiopokori aniniua ikapani. Imerepekaua, imi Xesosi atoko aniniua ikapani. Ininiã Xesosi aitari apiari. ³⁰ Teoso akiritana imereekini. Apaka ikamaerekatana iua mereekini. Apaka itanapoko erekari isika ninoa ikamaerekatakinimoni.

³¹ Teoso kamari ikinipoko ikara erekari ate ikapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ikapani. Isikari imi atemoni, ininiã aua atxiiti iua masikakiniti atemoni? !Auari. Ikinipoko erekari isikapitikaua atemoni. Ikarone !auari. ³³ Aua atxiiti Teoso mereekini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. ³⁴ Aua atxiiti Teoso mereekini misiritiko sãpiretakari? !Auari. Kotxi Kristora misäkiretari Teoso ate ikapani, kotxi Teoso ikikomoni auakari itxaua. Iua ipina ate ikapani, ininiã eereka Teoso okitikari iua, auapika inini ikapani. Iuara misäkiretari Teoso ate ikapani. ³⁵ Ininiã kipa atxiiti iotokakatar Kristo tiretiniua? !Auari, kotxi amaxikikosaaki, Kristo

tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monokori auakasaaki, Kristo tiretapanikaua. Neenamatzu auakasaaki, Kristo tiretapanikaua. ³⁶ Teoso sãkire iokatsopatakori txari:

Pisãkire aauikini xika, pamonokoniri ikiniotika. Aokiko monokoni auapika. Soti auite apanakini okini atoko, apanakini nirekari okiniua ate,

itxa Teoso sãkire iokatsopatakori. ³⁷ Maerekati ikara atoko aua, iuaritika iteene akãiata, kotxi atiretakari sikataparataua. ³⁸ Ia nimarota. Kristo tiretiniua iotokakakari !auari. Apikasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. Ikorasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, lhãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aãuite Kristo Xesosi oerekaua Teoso iteene tiretiniua.

Teoso Mereena Xoteoakori Inakitiakori Ikapani

9 Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireẽ nimarotari nisãkire atão inini, kotxi Erekar Matamatakoti oerekari nisãkire atão inini. ² Ia nisãkire atão. Iteene nimatinaniuatapika. Nãkixinireẽ maerekaxiniretinoka nitxa, ninirimane Kristo sãkire

mauikakani xika. ³Ninirekamari Teoso misiritinino nota, ninoa nitariakori imamisiritakani ikapani. Ninirekamari Kristo manirekakanino nota, ninirimane Kristo nakitiakori ininiu ikapani. Niposotiniāri ikara atoko nikamini, nikamari ninirimane ikapani. Txamari !niposotari. ⁴Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isāpiretana ninoa ikamaenetakiti ninoa ikapani. Isikari ipaniātakiti iōkatsopatakori ninoamoni. Oerekana ninoa kiiniri atāo ikaminina, iuakata isākirauatakasaakina. Teoso sāpiretana ninoa ikamakiti tīkane ikinimane kākiti ikapani. ⁵Ninirimane apika atokiriakorini Apraāoma, Isakima, Isaeoma pakini. Kristo uaimoni iponaniākasaaki, ninoa apiko mekaniri itxaua, iuaritika Teoso itxaua. Ikinimane auīte itxaua. “Peerekai,” matxari iua ātipirika. Ameē.

⁶Atxiīti Teoso kona kamari ikamaenetakiti Isaeo apika mekaniriakori ikapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷Kona ikinikani Apraāo apika mekaniriakori atāo Teoso anaakori !itxauana, kotxi Teoso txari Apraāo:

Papika mekaniriakori atāo inakani Isaki mekaniriakori itxauana.

⁸Teoso sāpiretari Isaki auini, iua auini apisapanika. !sāpiretari āti Apraāo ākiri Isimaeo inakori auini, iua auini apisapanika. Isimaeo iponaniā, kotxi Apraāo sirīka Isimaeo inorokata. Ininiā kākiti Isimaeo atoko, Teoso anaakori !itxauana. Teoso sāpiretari Apraāo iua keene inini, ininiā isikaenetakininoka atāo Apraāo apika mekaniriakori itxauana. ⁹Teoso sikaenetari Apraāo keene inini. Itxari:

Niketo manapi nikanapiriāko. Iuasaaki Sara keeneroko. Kiki oenetako.

¹⁰Apikomoni nisāpiretai. Hepeka anaakori iri ātika. Aāpika atokirini itxaua Isaki inakori. ¹¹⁻¹²Oa anaakori iponaniā ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sāpiretaro oa: Merepanika iponaniākari eereka iponaniākari nitiri itxauako.

Ininiā Teoso mereēri iua eereka iponaniākari Xakoo inakori apiari inini ikapani, iua auini apisapanika. Ininiā na Xakoo kamakitini txīkitakari Teoso mereiniri iua. Teoso mereēri iua, kotxi inirekari ikara atoko inini. ¹³Teoso sākire iōkatsopatakori txari: Xakoo nitireta. Isao nomanata.

¹⁴Ikara atoko ininiā, kanatokopa itxa axinikakiti? Atauako Teoso na kamari erekari? Ikamapitikari erekari. Ātipirika Teoso kamari erekari. ¹⁵Teoso txari Moisesi:

Ninirekiniāri āti niamonīkini, niamonīkari. Ninirekiniāri āti nimoianatini, nimoianatari.

¹⁶Ikara atoko ininiā, anireēkiti !itxīkitakari Teoso mereiniu. Akamakiti !itxīkitakari Teoso mereiniu. Imereēua, kotxi iamoniāka. ¹⁷Teoso txari Paraoo isākire iōkatsopatakoriā:

Nota txīkitakai auītetxi pininiu, niposotiire noerekini ikapani, niuāka ikini itixiti auakani imarotini ikapani,

itxa Teoso sākire iōkatsopatakori. ¹⁸Ininiā Teoso nirekiniāri iamoniākini āti, iua amoniākari iua. Apaka inirekiniāri, itxīkitakari āti ākixinire kaikoxinire inini, Teoso nireēkiti imanirekakani tīkane.

Teoso Omanākare, Iamonīkare Pakini

¹⁹Atxiīti hīte txano nota: “Teoso ikara atoko ininiā, na ate xikani

kaikoxinireua ate. !Aposotari akaminiri Teoso manirekakiniti,” atxiiti hĩtxano. ²⁰Txamari !apakata ia atoko hinini. Kiriparai hĩte ikara atoko ina sākiretakani Teosomoni? Kākiti hĩtxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hikamakirimoni. ²¹Hixinikari kiki tiitxi kamakari. Ikamari inirekiti. Atxiiti āti porii katsariā, ikamari ipi kopiti. Atxiiti ianaka ikamari āti kopiti, peereri inini, kiiniri ikapani. Atxiiti ātipekana ikama patimari poiāo ereri, ikiniōtika iāriā iātiko ikapani.

²²Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotininina ikapani imaerekanina xika. Iusaaki oerekana iposotiire imarotininirina ikapani. Teoso omanatana ninoa, iuaritika imĩteenekana. Kona uatxa ixipokana ninoa. Txamari iketo manapi ixipokanako ninoa. Uatxa imĩteenekapanikari ninoa maerekani. ²³Apaka ikamari apanakini iua amonikakini. Uatxa imĩteenekari iua omanatakini maerekani, kotxi inirekari iua amonikakini imarotininiri iua ereka inini, kotxi peerekari iua. Iteene itiretari iamonikakini. Ikamana ninoa erekari isikakiti apakapininina ikapani. ²⁴Hĩte, ate pakini, iua amonikakini atxaua. Iua akiritakini atxaua. Na Xoteonanini akirita. Akiritana Xoteo minakanuia apaka. ²⁵Teoso sākire iōkatsopatakori, Oséia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hĩtxapekauako.” Ninoa mitxi nimatiretakinitimoni nitxako: “Uatxa nota tiretakini hĩtxapekauako,” nitxako.

²⁶Mitxi Teoso txana ninoa: “Na nota nakitiakorini !hĩtxaua.” Ikara Teoso sākiretiniātaā, iuaātaātxikana: “Teoso ātipirika auāki inakari anaakori hĩtxaua,” inaāka ninoamoni,

itxa Teoso sākire iōkatsopatakori.

²⁷Apaka Teoso sākire iōkatsopatakorriā, Isaia txari:

Isaeo apika mekaniriakori kaiāopokori, potxoari uiniti kipatxite atoko itxana, txamari poiāonoka makatxakaāka imapinakani ikapani.

²⁸Patimari Teoso xipokiniri iparīka imisiritininiri kākiti imaerekani xika, itxa Isaia. ²⁹Mitxipeka Isaia txari:

Apiananiri kaposotiireri nīkatari apanakini aāpika mekaniriakori imapinakani ikapani. Ininiā atenape auapanika. Teoso manīkatakanimauako, axipokapimako kākiti Sotoma sitatxiti auakani xipokini atoko, kākiti Komoha sitatxiti auakani xipokini atoko atxapiimako, itxa Isaia sākire.

Xoteo Mauikakaniri Teoso Sākire

³⁰Ininiākara aimarotari ia: Xoteo minakanuia manitakanisaakiri Teoso txīkitakinina atāo inakari kamakani ininiuana, iusaaki Teoso txīkitakana atāo inakari kamakani ininiuana, kotxi auikarina Teoso sākire. ³¹Txamari Xoteoakori nitaāpotari paniātakori ninoa atāo inakari kamakani txīkitakakari, txamari !apokarina. ³²Kinirepa !apokarina ikara? Kinirepa Teoso na txīkitakana ninoa atāo inakari kamakani ininiuana? Kotxi !auikarina isākire. Inirekarina iparīkana txīkitakinina atāo inakari kamakani ininiuana. !Inirekarina auikarinina Xesosi sākire. Ninoamoni Xesosi kai kimapori nopini auakari atoko itxa, kotxi kai xika kākiti mākitita. ³³Teoso

sākire iōkatsopatakori kitxakapirīkari sāpiretari ia kai pirenā. Itxari:

Pikenakotariko ia: Nota iokanatakiti kākitemoni kai atoko itxa. Nitakari iua kai Siāo sitatxitiā Xoteoakori kimaporeē. Iua kai xika kākiti mākitita. Iua kai xika kākiti irika. Iuaritika iua sākire auīākani !ipētauata nota apisatoō.

10 Nitariakori, nākixinireē iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimisākiretari Teoso ninoa maerekani makatxakiko ikapani. ²Nimarotari ninirimane iteene nirekiniri iparīkauatini Teoso ikapani. Txamari ninoa kerokari, kotxi !imarotarina atāo iparīkauatini Teoso ikapani. ³!Imarotarina Teoso txīkitakiniri kākiti atāo inakari ikamini. Ninoaka nirekamari atāo inakari ikaminina, Teoso apakapinina ikapani. Ininiā !auiritarina Teoso txīkitakinina ninoa atāo inakari ikaminina. ⁴Kristo kamari ikinipoko Teoso paniātakiti iōkatsopatakori iaōka, ininiā iuanoka txīkitakari ikinimane kākiti iua sākire auīākani atāo inakari ikaminina.

Apiananiri Akiritakani

⁵Kitxakapirīka Moisesi sāpiretari atāo inakari akamini Teoso paniātakiti. Iuasaaki itxari:

Ikinika Teoso paniātakiti iōkatsopatakori ikiniōtika pikaminiā, pauapininiika pitxako,

itxa Moisesi sākire. ⁶Txamari !aposotari ikara atoko akamini. Aāuikasaakiri Xesosi sākire, iua txīkitakaua atāo inakari akamini. Ininiākara !apakata pākixinireē pixinikiniri: “Kipa atxiīti posotari iaxiti apiko nopinixitimoni isini, Kristo notamoni iminini ikapani?” ⁷!Apakata pākixinireē pixinikiniri: “Kipa atxiīti posotari

ipīkani auiniātaā isini, Kristo notamoni iminini ikapani?” ⁸Xesosi sākire auape hītemoni. Na hīsa ātiātaā iua sākire himarotini ikapani. Hinamaāpekari. Hākixinireēpekari. Xesosi sākire auikiko asāpiretapikari kākiti. Ia atoko asāpiretari kākiti: ⁹Pinamaā, “Xesosi niauīte” pininiā, pākixinireē pauikiniri Xesosi ipinini Teoso ōkitikiniri iua, iuasaaki pimaerekani makatxakaākako. ¹⁰Kotxi aākixinireē Xesosi sākire aāuikinīā, ikamaerekataua. Anamaā “Maerekati kamakarino nota,” aniniā, iua makatxakari amaerekani. ¹¹Teoso sākire iōkatsopatakori txari:

Iua sākire auīākari pētauatini !uari.

¹²Iua Kristo sākire auīākari atxiīti Xoteo itxaua. Atxiīti Xoteo minakatiua itxaua. Xoteo auīte itxaua Kristo. Xoteo minakaniua auīte apaka itxaua. Ikinimane auīte itxaua Kristo Apiananiri. Isikari itanapoko erekari ikinimane iua akiritakanimoni. ¹³Teoso sākire iōkatsopatakori txari:

Ikinimane akiritiniāri Apiananiri uāka imaerekanina imakatxakini ikapani, iuasaaki imakatxakaākako imaerekanina.

¹⁴Kiātokopa itxa ninoa akiritiniri iua, isākire imauikakanisaaki? Kiātokopa itxa ninoa auikiniri isākire, imakenakotakanisaakirina? Kiātokopa itxa ninoa kenakotiniri isākire, imasāpiretakonisaakina? ¹⁵Kiātokopa itxa Teoso iokanapirena sāpiretiko, ate maiokanatakaniāri iua sākire sāpiretakani kākitemoni? Teoso sākire iōkatsopatakori txari:

Erekapitikari Teoso iokanapirena erekari sāpiretakani apokini kākitemoni, kotxi isāpiretarina Teoso kamaerekaxiniretiniri kākiti. Isāpiretarina erekari Teoso sikakiti kākitemoni. Ikara iminapiretakitina kamapoxokonitari kākiti.

¹⁶Txamari na ikinimane kăkitini auikari Teoso iokanapirena erekari. Kotxi kitxakapirika Isafa txari:

Apiananiri, asăpiretamari piokanapirena kăkitimoni, txamari !auikarina,

itxa Isafa. ¹⁷Kăkiti kenakotakasaakiri Teoso iokanapirena, Teoso txikitakari kăkiti auikiniri isăkire. Kristo săkire akenakotakasaaki, akenakotari Teoso iokanapirena.

¹⁸Txamari nota pimaăi: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso săkire iokatsopatakori txari: Iaxiti apiko nopinixiti auakari oerekari Teoso ikini itixiti auakani. Teoso săkire atoko itxa iaxiti apiko nopinixiti auakari oerekakiti.

¹⁹Iuaikana nipimaăi: “Atauako Xoteo !imarotari Teoso iokanapirena?” Imarotapitikarina. Moisesi săpiretapekari Teoso săkire. Itxari:

Nimakatxakari Xoteo minakanuia maerekani, ininiă nitxikitakaiko hite hixikotinina ninoa mitxi nota nakitiakori minakanuia. Nitxikitakai hite homanăkarauatini, ninoa mitxi mimaroreni xika.

²⁰Isafapekana săpiretari Xoteo minakanuia pirena. Isăpiretari Teoso săkire itaparaxinireritika:

Teoso txari: “Ninoa nota manitakani aokitano nota. Nimotika nota makiritakanimoni.”

²¹Apikomoni isăpiretari Teoso săkire Xoteo kamakiti:

Teoso txari: “Ikiniôtika namanaări ninoa kanapiriini notamoni, txamari !ikăpitarina nisăkire. !Ikamarina nisăkire iaôka. Inireêkitinoka ikamana.”

Xoteo, Teoso Săkire Auiăkani

11 Ininiă nipimaăi: “Atauako Teoso !inirekakarari Xoteoakori?”

Inirekapitikana. Nota apaka Xoteo nitxaua. Apraăo apika mekaniri nitxaua. Păxamiı apika mekaniri nitxaua.

²Teoso !itakanapari Xoteoakori. Iua mereēna ninoa itixi kamiko apisapanika. Himarotari Teoso săkire iokatsopatakori, Erıasi tsoatakasaaki Teosomoni Xoteo maerekani isăpiretakasaaki. ³Iuasaaki Erıasi txari: Apiananiri, ninoa okapekari kăkiti pisăkire săpiretakani. Ikupirinikarina amesa pinakiti pitemoni sikakori takikoătaă. Notanoka pisăkire săpiretakarino auapanika. Ninoa asikatikinitano nota okinino ikapani,

itxa Erıasi. ⁴Kanatokopa Teoso apakapapiretari Erıasi? Teoso txari:

Kona pitenanini auikari nisăkire. Nota nıkatarari setxi mio kikiakori nota nakitiakori. Ninoa kona teosonetari kăkiti kamakiti Paaokori. Kona ikapotoreêkauana iua apisato,

Teoso txari Erıasi. ⁵Ikara atokotxikana uatxa. Aua apanakini kăkiti Teoso mereêkini. Imereēna ninoa, kotxi iua nirekari ikinipoko erekari ikaminina ninoa. ⁶Maerekati kamakani kăkiti, iuaritika Teoso mereêua ate. Isikari ikinipoko erekari ate ikapani maxikatiıka. Aparıka !itxikitakari iua sikiniri ikinipoko erekari atemoni. Aparıka txikitakiniări ikinipoko erekari isikiniua, ininiă kona maxikatiıka isikarauata atemoni.

⁷Ininiă kanatokopa atxa asăkire apikomoni? Xoteoakori kona apakapari inireêkitina. Inirekarina Teoso apakapinina ninoa erekarini ininiuana. Teoso mereêkininoka apakapari ikara inakari. Apanakinipekana Teoso !aurita atăo imarotinina. Măsiäreni atoko itxana. ⁸Teoso săkire iokatsopatakori txari:

Teoso txikitakari ninoa âkixinire imakakari atoko inini, iua

sākire imimarotakanina ikapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !inirekarina Teoso sākire ikīpitinina. Uatxapiima ikara atoko itxapanika,

itxa Teoso sākire iōkatsopatakori. ⁹Kitx-akapiriŋka Tavii txari Teosomoni:

Ninoa kiena kaiāopokori. Inipokotakasaakina, iuākatarina pite apokaerekatina ninoa, kotxi kaiāopokori ikienana. Ikienana takapiri atoko itxa imaīkinina ninoa. Itxīkitakana ikerokinina. Ikara xika ninirekari pimisiritinina.

¹⁰Ninirekari ninoa mōsiāreni atoko ininiuana, ininiā na atāo atamatarina pikimapore. Kākiti tiitxi minari porikitakani atoko pitxīkitakanako ninoa ātipirika, itxa Tavii sākire.

Xoteo Minakanuia Maerekani Makatxakiko

¹¹Iuaīkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiākara Teoso sāpiretari Xoteo minakanuia imaerekanina imakatsakini, Xoteo xikotinina ikapani, iuaīkana Teosomoni ikanapiriinina ikapani. ¹²Xoteoakori kamari maerekati, ininiākara Teoso sikari erekari kiikiri apanakini itixi auakanimoni. Xoteo mapakapakiniti Xoteo minakanuia apakapa erekari kiikiri. Ininiā Xoteo kanapiriākasaaki Teosomoni, iusaaki apiaerekata Teoso sikakiti kākitimoni.

¹³Uatxa nota misākiretai hīte Xoteo minakanuia, kotxi Teoso iokanatano nota hītemoni isākire nisāpiretini ikapani. Niuikari hītemoni niokanatiko. ¹⁴Ikara atoko ininiā, atxiīti ninirimane Xoteo xikotai

hīte, ininiā atxiīti apanakini ninoa kanapiriā Teosomoni, imaerekanina Teoso makatxakini ikapani. ¹⁵Teoso takanapakasaakiri Xoteo, iua apakapari Xoteo minakanuia, ininiā ninoa Xoteo minakanuia kanapiriā Teosomoni. Teoso iuaīkana apakapakasaakiri Xoteoakori, iusaakiko peerekari. Ipīkani iuaīkana auāki inini atoko itxako.

¹⁶Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiuana. Aamina kotsa Teoso nakiti ininiā, imina pori apaka iua nakiti. ¹⁷Xoteoakori oriva mina takakori atoko itxa, takakori Teoso nakiti. Ātikaka ipori kapatakaāka. Oriva itopakiri pori apaāka. Iapitaka inaāka ikapatakikoātaā. Aneē takari katiā. Takari sikakienatari itopakiri pori. Hīte Xoteo minakanuia iua oriva itopakiri pori atoko hītxaua. Hāpakapari Teoso sikakiti, kotxi hīte apotiitaua Xoteoakorikata, Teoso nakitiakorikata. ¹⁸Hīte Xoteo minakanuia, kona hūikapeua Teoso apakapini hīte. “Iua aāpori kapatakiko atoko, Teoso takanapana Xoteoakori, ate apakapini ikapani,” kona hītxape, kotxi aāpori atoko hītxaua. Na aāpori sikataparatarari aākotsa. Aākotsa sikataparatarari aāpori. Ininiā hīte apakapari Teoso sikakiti, kotxi hāpotiitaua Xoteokata.

¹⁹Atxiīti hīte Xoteo minakanuia txano nota: “Iua aāpori kapatakaākori atoko Teoso takanapari Xoteoakori. Āti aāpori iapitakiko atoko, Teoso apakapaua ate,” hītxano atxiīti. ²⁰Atāopitikara. Teoso takanapari Xoteoakori, kotxi ninoa !auikari isākire. Iua apakapai hīte, kotxi hīte auikari iua sākire. Iuaritika !hūikapeua ikara atoko hinakasaaki. Erepaniko. ²¹Teoso takanapari Xoteoakori, takari pori sauakakori atoko. Ininiā erepaniko, kotxi itopakiri aāpori atoko hītxaua. Atxiīti āti ōti okanapai hīte apaka.

²² Aimarotari katiraōkiri ininiua Teoso. Aimarotari apaka kataparax-inireri ininiua. Kataparaxinireri iua, kākiti kamakasaakiri maerekati. Katiraōkiri iua, itiraōki hinirekasaaki. Itiraōki himanirekakaniā, hīte apaka mapara hōkaāka, iua aāpori sauakakori atokokana. ²³ Xoteo takanapiniāri imauikakaniri Xesosi sākire, auikiniāri iuaikana isākire, Teoso iuaikana mikanapiriāna, kotxi Teoso kaposotiireri ikara atoko ikamini. ²⁴ Hīte itopakiri pori sauakakori takarimoni iapitaākori atoko hītxaua. Kona ixinireka aua ikara atoko. Pamimari ikara atoko. Xoteo atāo oriva takakori atoko itxauana. Ininiā na kamimari mitxi auiniātaā iuaikana Teoso takinina ninoa, iuaikana imikanapiriinina ninoa iuamoni.

Xoteo Maerekani Makatzakaākapanikako

²⁵ Nitariakori ninirekari himarotiniri apanakini mimarotakiniti, ininiā na hīuikaua. Xoteo !nirekari auikiniri Teoso sākire uatxa, iuaritika na ikara atoko !itxapani ātipirika. Ikini itixiti auakani Teoso nireēkini Xoteo minakaniua kanapiriākasaaki Teosomoni, iusaakiko Xoteo kanapiriāko Teosomoni. ²⁶ Ininiā iusaaki ikinimane Xoteo kanapiriāko Teosomoni. Iusaaki Teoso makatzakari ninoa maerekani. Teoso sākire iōkatsopatakori kitxakapiriāka auakari ikara atoko itxa. Itxari:

Xoteo itxauako maerekanitxi makatzakakari. Imakatzakariko ikinika maerekati Xoteoakori kamakiti, Teoso manirekakiniti. Iusaaki Teoso nireēkitinoka inirekanako.

²⁷ Nimakatzakariko maerekati ninoa kamakiti, kotxi kitxakapiriāka nika-maenetari ikara atoko inakari,

itxa Teoso sākire iōkatsopatakori.

²⁸ Xoteoakori !nirekari Teoso iokanapirena erekari, ininiā Teoso takanapana ninoa. Ininiā Teoso iokanapirena erekari sāpiretaāka hīte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereēna ninoa. Apraāo, Isaki, Xakoo pakini apika mekaniriakori itxauana, ininiākara Teoso tirtapanikana ninoa. ²⁹ Teoso kona mamakari isākire. Kākiti iua mereēkini ātipirika iua mereēkini itxauana. Isiākiti erekari kākitimoni !imaktxaka iuaikana. ³⁰ Hīte Xoteo minakaniua kitxakapiriāka !hīkīpitari Teoso sākire, iuaritika uatxa Teoso amonikai hīte, kotxi Xoteo kona kīpitari Teoso sākire uatxa. ³¹ Uatxa Xoteoakori kona kīpitari Teoso sākire. Teoso amonīkapekai hīte Xoteo minakaniua, ininiā Teoso iuaikana amonīkanako Xoteoakori apaka. ³² Ikinimane kākiti na kīpitari Teoso sākire. Kona aposotari akīpitiniri Teoso sākire. Teoso txīkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonīkaua.

Peerekari Teoso

³³ Peerekari Teoso. Atāonoka ikama. Paimatireri iua. Kākiti !imarotari ikamakiti tīkane. Kākiti !imarotari inireēkiti tīkane. ³⁴ !Kimarotikori Teoso xinikakiti. !Kōtākikikori Teoso. ³⁵ Teosomoni ikinipoko aua, ininiā kipa asika atxīiti iuamoni? Asikiniri !auari. Ininiā !auari ate nakiti, iuaikana Teoso sikiniua ikapani. ³⁶ Kotxi Teosokara kamari ikinipoko. Ikinipoko aua Teoso posotiireē. Ikamari ikinipoko iua ikapani. Ātipirika matxariko Teoso: “Peerekai pite.” Ameē.

Teosomoni Sikakori Auākiri

12 Ininiā nitariakori Teoso amonikapitikaua. Ininiā nota iteene ōtākikai hīte. Hīteka hīsikaua Teosomoni. Teosomoni sikakori auākiri atoko hītxauako. Ininiā iua nakitinoka hītxaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atāo. ² Hīkamapinikariko Teoso sākire mauīakani kamakiti atoko. Hāuiritariko Teoso txīkitakiniri hīxiniākiti ereka inini, ininiākara ipinipo hītxako. Iuasaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atāo hīkamini.

³ Teoso sikari ikinipoko erekari notamoni, ininiā nisāpiretari iua sākire hītemoni. Ininiā nota ōtākikai hīte hīkinika. Na hīuikapeua. Hīteka atāo himarotauako. Hīteka hātamakauako. Teoso txīkitakai hāuikiniri isākire. Iteene hāuikiniāri iua sākire, iteene hīteka himarotaua. ⁴ Kākiti īto ātika, iuaritika ītotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Okī parīka ātiāo. Itxaāpota. ⁵ Iua atokokana atxa. Ītotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, ītotxiā auakari atoko ate. Kristokata aāpotiitaua. Anakititakakaua. ⁶ Nota parīka Teoso ikapani ātiāo. Āti parīka Teoso ikapani ātiāo. Āti parīka Teoso ikapani ātiāo, itxaāpota. Teoso sikari erekari ikininapemoni, ikara iparīka ikamini ikapani. Atxiīti Teoso sikaimaroretai iua sākire apanakinimoni pisāpiretini ikapani, ininiākara Teoso sākire pauikini iaōka pisāpiretari Teoso sākire kākitimoni. ⁷ Teoso sikaimaroretiniāi

apanakini pimiparīkatini, ininiā pimiparīkatariko apanakini. Teoso sikaimaroretiniāi isākire poerekini, ininiā poerekarauatako. ⁸ Teoso sikaimaroretiniāi āti pisikataparaxiniretini, ininiā pisikataparaxiniretariko āti. Teoso nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auītetxi pininiua, ininiā auītetxi erekari pitxauako. Teoso nirekiniāi apanakini piamonīkini, ininiā pipoxokoniritika piamonīkanako.

Tiraōkitxi

⁹ Atāo pitiretariko apanakini pākixinireē. Pomanatariko maerekanitxi. Na piotokakapiri erekari pikamini. ¹⁰ Iteene hītiretakakauako, kotxi Kristo txīkitakapekua aītaritakakiniua. Piteka pipaxitiniua atokokana, apiata pipaxitariko āti. ¹¹ Pitaparaxinireritika piparīkauatako. Na piarinouatape. Piparīkauatako Teoso ikapani pipoxokoniritika pākixinireē. ¹² Pipoxokoniatako, kotxi pimarotari Teoso kaminiri ikamaenetakiti. Pimīteenekariko pimisisiritiko. Ātipirika pimisākiretariko Teoso. ¹³ Nipokori kaamatiniā pitariakorimoni, tiitxi kaamatiniā pitariakorimoni, auiniā pitemoni, pisikanako. Papakapanako pipoxokoniritika ikinimane Xesosi sākire auīākani paapoko apoākani, ātiātaā ikani.

¹⁴ Pamanaāri Teoso erekari ikaminina pite misiritakani. Ari, pamanaāri Teoso erekari ikaminina ninoa. Na pamanaāpiri Teoso maerekati isikinina ninoa. ¹⁵ Pipoxokoniatako poxokorinikata. Pitxiapata kaminanirinikata. ¹⁶ Āti pitiretini atokotxikana, ikinimane pitiretako. Na piuikapeua. Pisākirauatako kākiti matxineirotenikata, katxineiroteni pimisākiretini atokotxikana. “Kimaroreno nota,” na pitxape.

¹⁷Kākiti kaminiāri maerekati pitemoni, na pikamapiri maerekati iuamoni. Atāonoka pikama ikinimane ikapani. ¹⁸Pinirekariko pauini kākiti sauaki ereka inini, ininiā maxikatīika kona pitxitapiri āti. ¹⁹Nitiretakini, na hīxikatxitapiri āti. Teosora xikatxitariko, kotxi Teoso sākire iōkatsopatakori txari:

Nota parika āti nixikatxitini. Notara misiritari maerekati kamakari, itxa Apiananiri sākire. ²⁰Ari, kona pixikatxitapiri āti. Pikamariko ātimoni ia Teoso sākire iōkatsopatakori iaōka:

Pomanatakiri natxitiniā, pisikakienatari iua. Iposonatiniā, pisikari iātini.

Ikara atoko pikaminiā, ipētuaata maerekati pitemoni ikamini,

itxa Teoso sākire iōkatsopatakori.

²¹Na pauiritapiri maerekati piauīte atoko ininiua. Erekaru pikamakasaaki, maerekati iokanatapeēkaika.

Aāuīteakori Nirekakiti Akīpitini

13 Akīpitariko aāuīteakori nirekakiti, kotxi Teosora auiritana ninoa auītetxiakori ininiuana. Teosora takari ninoa auītetxiakori aāuīteakori ininiuana ikapani.

²Aāuīteakori nirekakiti amakamakaniā, Teoso nirekakiti apaka !akama, kotxi Teoso txīkitakana ninoa aāuīteakori ininiuana. Ninoa paniātakiti amakamakaniā, amisiritaākako.

³Erekaru kamakani !ipīkari iauītena. Maerekati kamakaninani pīkana ninoa. Pinirekatari pimapīkakaniri piauīte? Ininiā erekaru pikamako, ininiā iua txaike: “Erekaru pite.” ⁴Teoso nitiri itxaua piauīte, erekaru pitemoni ikamini ikapani. Txamari maerekati pikaminiā, erepaniko. Pipīkariko iua, kotxi iposotari imisiritini. Iua Teoso nitiri itxaua kākiti maerekati kamakani imisiritini ikapani. ⁵Ininiākara pikamariko piauīteakori nirekakiti, kotxi pimakamakanisaakiri, pimisiritiko

auapitika. Apaka pikamariko ninoa nirekakiti, kotxi pimarotari pākixinireē ikara atoko atāo pikamini.

⁶Piauīteakori Teoso nitiriakori itxauana, ininiā erekaru apaka pisikiniri txineiro ninoamoni iparīkana ikaminina ikapani. ⁷Ininiākara pīkitxitana ninoa amanaākiti, sitatxi pauini ikapani, pitii papakapini ikapani. Pipaxitanako ninoa. Pikamariko ninoa nirekakiti.

Hītiretakiniua Īkapani

⁸Pīkitxitariko ikinika piamotakiti. !Erekaru pimaīkitxitakaniri āti. Ātinoka tēpito erekaru. Ia tēpito na txineironi. Ia tēpito atiraōki. Ia atoko inakarū tēpito xipokini kona erekaru. Ātipirika hītiretakakauako. !Erekaru pixipokiniri pitiretiniri āti. Āti tiretakari kīpitapekaru Teoso paniātakiti iōkatsopatakori. ⁹Teoso paniātakiti iōkatsopatakori txari: “!Pisirīkape pītanoro minakotokatika. Na pokaniuatape. Na pītiriuatape. Na pinirekapiri apanakini tii.” Akīpitari ikara Teoso paniātakiti iōkatsopatakori, apanakini ipaniātakiti apaka, ia Teoso paniātakiti ātika akīpitiniā. Ia Teoso paniātakiti paniātatau: “Piteka pitiretinia atokotxikana, pitiretariko āti.” ¹⁰Pitiretinīari āti, maerekati !pikaminiri iua. Ininiā āti pitiretinīā, pikamari Teoso paniātakiti iōkatsopatakori ikinika.

¹¹Matiretari āti, kotxi aimarotari kaiamapekaru Kristo kanapiriini. Ininiā pimerekako. Kona pimakapeko. Piparīkauatako Teoso ikapani, kotxi itixine Xesosi anikiniua ōti apokaāpotanapanoka. Akokaxiti aāuikari Xesosi sākire. Uatxa paitiki ikanapiriā. ¹²Īkanōkari xipokaāpotanapanoka. Pokamara apokaāpotanapanoka Kristo kanapiriākasaaki. Maerekati ipiākasaaki kamakori atoko itxa,

ininiā maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiā maerekati !imaikaua. Pokamarari atoko itxa erekari akamakiti. ¹³Pokamara kākiti kamari atāo inakarinoa apanakini apisatoō. Makamari ikara atoko inakari ātipirika. !Erekari kiiniri maerekati akamini. !Erekari apoātini. !Erekari asirikini sito aitanoro minakotokatika. !Erekari akaminiri maerekati aīto nireēkiti. !Erekari anenamauatini. !Erekari axikotiniri āti. ¹⁴Ikara atoko inakari akamini !erekari. Makamari ia atoko inakari: Maamanaāri Apiananiri Xesosi Kristo kapakiniua, sotato māka paikori sotato īto kapakini atoko. !Hīxinikapiri: “Kanatokopa nitxa nikaminiri niīto nireēkiti?” Kotxi maerekatinoka aīto nireēkiti.

Kona Hītaparakienatakapeua

14 Hāuiritariko Xesosi sākire poiāonoka auīākari hītekata apotiitiniua. Na hītxitapiri iua, ixinikakiti na hīte xinikakiti atoko iminakanisaaki. ²Kākiti iteene auikiniāri Xesosi sākire, atxiīti inikari itanapoko nipokori. Āti kākiti poiāonoka auikiniāri Xesosi sākire, atxiīti inikari takarinoka. ³!Erekari ikinipoko niākari sāpiretiniri takarinoka niākarimoni: “Pikerokari” ininiri. Apaka !erekari takarinoka niākari sāpiretiniri ikinipoko niākarimoni: “Pikerokari” ininiri, kotxi Teoso apakapapekari iua. ⁴Kinakariparai pite āti nitiri pinitakarii: “Pikerokari” ātimoni inakarii. Ikerokiniāri, iua patrāote pinitamariko. Maerekati !ikama, kotxi Apiananiri moianatari iua.

⁵Atxiīti āti sākire: “Ia ōti erekari iteene axinikiniri Teoso.” Atxiīti ātipekana: “Ikinīōtika erekari iteene axinikiniri Teoso.” Hākixinireē

hīxinikariko: “Natokopa itxa atāo nikamini?” ininiā eereka atāo hīkamini tūkane himarotape. ⁶Hīte: “Ia ōti apiaerekata iteene axinikiniri Teoso,” hininiā, ininiā ikara atoko hīxinika Teoso hīpaxitini īkapani, ininiā erekapitikari. Ikinipoko niākari nikari ikinipoko, Teoso ipaxitini īkapani, kotxi apisapanika itxari Teoso: “Erekapitikai ia nipokori pisikinino niniākiti īkapani,” itxari. Ikinipoko maniākati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniākiti īkapani,” itxari. Ininiā iua apaka paxitari Apiananiri. ⁷Kona ateka auītetaua. Kona aāua ateka īkapaninanini. Kona apina ateka īkapaninanini. ⁸Auapanika anakasaaki, aparīkauata Apiananiri īkapani. Apikasaaki, apina Apiananiri īkapani. Ininiā auapanika anakasaaki, apikasaaki apaka, Apiananiri nakiti atxaua. ⁹Kristo ipina, eereka ōkitikaua iuaikana, auapanika inakani auīte ininiua īkapani, ipīkani auīte apaka ininiua īkapani. ¹⁰Ininiā !apakata pitxitiniri pitari. “!Kiūkitei,” kona pitxapiri, kotxi akinika aāpokako Teoso apisatoō. Iuasaaki iua sāpiretariko akamakiti, erekari inini atxiīti, maerekati inini atxiīti. ¹¹Teoso sākire iōkatsopatakori txari:

Nota Apiananiri, ātipirika auakari nitxaua. Ikinimane kākiti kapotoreēkauako nota apisatoō. Ikinimane txanoko nota Teoso nininiua.

¹²Ininiā iuasaakiikarako akinika asāpiretari Teoso ikinika akamakiti iikorapokoriti aāuakasaaki.

Masikataparaxiniretakaua

¹³Ininiā hīotokakariko hītaparakien-atakakiniua. Hākixinireē hītxako: “!Nitxīkitakapaniri nitari kerokiniri

ikamakiti. !Nix̄ikitakapaniriko nitari kaminiri maerekati,” h̄itxako. ¹⁴Xesosi Apiananiri nakiti nitxaua, ininiākara nimarotari, apakatapitika Teoso sākire auīākari nikiniri ikinipoko nipokori, kotxi nipokori maerekati !auari. Iuaritika kākiti auikiniāri iua nipokori maerekati inini, !apakata inikiniri. ¹⁵Hinikiniāri ikinipoko nipokori, atxiīti h̄itari ākixinire maxirauata, ininiā na atāo h̄itretari iua. Kristo ipina iua h̄itari ikapani, ininiā h̄itakanapariko iua nipokori hinikini, kotxi atxiīti iua !auikaikari Xesosi sākire, iua nipokori hinikini xika. ¹⁶Erekari auakasaaki, !h̄auiritapiri āti s̄āpiretinii ikara erekari maerekati inini. ¹⁷Teoso aāuīte ininiāua, kona nipokorinanini, kona iātakorinanini, axinika. Teoso aāuīte ininiāua, axinikari Erekari Matamatakoti sikakiti atemoni. Iua tx̄ikitakaua atāonoka akamini. Ikamaerekaxiniretaua. Isikapoxokonitaua. Teoso aāuīte ininiāua, ikara atoko itxa aāuini. ¹⁸Ikara atoko aparīkauatiniā Kristo ikapani, Teoso apokaerekataua. Kākiti apaka apokaerekataua. ¹⁹Ininiākara manirekari kākiti auini ereka inini, neenamtxi mauakani ikapani. Masikataparaxiniretakakaua. ²⁰Na himisiritapiri Teoso parīka nipokori xika. Ikinipoko nipokori erekari hinikini, txamari h̄ite nikakiti tx̄ikitakinīāri āti takanapiniri Kristo, h̄ikerokari. ²¹H̄itari kerokiniāri ikamakiti h̄ite niākiti xika, apiaerekata himanikakaniri iua nipokori. H̄itari kerokiniāri ikamakiti h̄ite iātakiti xika, apiaerekata iua iāriā himiātakani. Na xatiki h̄itx̄ikitakapiri h̄itari kaminiri maerekati. ²²H̄itemoni ikinipoko nipokori nikiko erekari, txamari na h̄is̄āpiretapiri apanakini. Erekari Teosonoka imarotiniri. H̄ixinikasaakiri h̄ikamakiti atāo inini, h̄ākixinireē

himarotakasaakiri h̄ikamakiti atāo inini, iusaaki h̄ipoxokoniua. Ininiā kona h̄iteka apoītaua. ²³Hinikasaakiri nipokori, h̄ākixinireē: “Erekari atxiīti ia nipokori ninikini?” hinakasaaki, iusaaki Teoso txai: “Maerekati pikama,” kotxi kona pauikari pikaminiri erekari. Himauikakaniāri h̄ikamakiti ereka inini, ininiā maerekati itxaua h̄ikamakiti.

Āti Nireēkiti Kamiko Pirena

15 Atxiīti ikinipoko Teoso sākire aāuika, ininiā amoiatariko Teoso sākire poiāonoka auīākari, imaposotakiniti ikamini ikapani. !Erekari ateka nireēkitinoka akamini. ²Erekari akaminiri aītari nireēkiti, iua amoiatanini ikapani, Teoso sākire iteene auikini ikapani. ³Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri: Kākiti misākirepiretakasaakii pite, no-tara ninoa misākirepireta.

⁴Ikinika Teoso sākire iōkatsopatakori iōkatsopataāka ate oerekiko ikapani. Teoso sākire iōkatsopatakori aāuikasaaki, aiātapani apoxokoniritika erekari apokini. Aimarotari erekari apokapitikako. Teoso sākire iōkatsopatakori sikataparaxiniretaua.

⁵Teoso sikataparataua, ininiā apoxokoniritika aiātapani erekari apokini. Isikataparaxiniretaua. Ninirekari Teoso tx̄ikitakiniri h̄ite nireēkiti ātinoka inini, Kristo Xesosi nireēkiti iaōka h̄ikamini. ⁶Erekari hinireēkiti h̄ākixinireē ātinoka inini. Erekari h̄isākire ātinoka inini. Ikara atoko hininiā, h̄ikinika txari Teoso: “Peerekai pite,” kotxi iua aāuīte Xesosi Kristo iri itxaua.

Xoteo Minakanuia Poxokoniuatini

⁷H̄āpakapariko āti, Kristo apakapinii atokokana, ininiā kākiti txari Teoso:

“Peerekai pite,” txariko. ⁸Nisāpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi ikorapokoriti apokasaaki. ⁹Kristo Xoteoakori nitiri atoko itxapekaua, ininiā Xoteo minakanuia txari: “Kaamonikareri Teoso. Peerekari iua,” itxana. Teoso sākire iōkatsopatakori txari:

Xoteo minakanuia auiniātaā nitxariko
Teoso: “Peerekai pite.” Nixikarauata pite ikapani, kotxi peerekai pite.

¹⁰Iuaikana Teoso sākire iōkatsopatakori txari:

Hīte Xoteo minakanuia hīpoxokoni-
uatako Xoteoakorikata, Teoso nakitiakorikata.

¹¹Iuaikana Teoso sākire iōkatsopatakori txari:

Hīte hīkinika Xoteo minakanuia,
“Peerekari Apiananiri” hītxako.
Hīkinika itixi auakanii
hīxikarauatako Teoso ikapani.

¹²Iuaikana Teoso sākire iōkatsopatakori-
riā Isaía txari:

Auako Xesee apika mekaniri. Xoteo
minakanuia auite itxauako. Ninoa
imarotariko isākire iaōka ikamini,
itxa Teoso sākire iōkatsopatakori.

¹³Teosora txikitakai himarotniri
isākire iaōka ikamini. Ninirekari
iua iteene kamapoxokonitini hīte.
Ninirekari ikamaerekaxiniretinii
hīte, kotxi hāuikari iua sākire. Ininiā
himarotari hāpakapapitikariko Teoso
sākire iaōka. Erekari Matamatakoti
posotiireē himarotari ikara.

Paoro Teoso Iokanapirena Erekari Sāpiretakari Xoteo Minakonimoni

¹⁴Nitariakori, nota imarotari
ereka hinini. Nimarotari hīte iteene
kimarore hinini hōerekakakinuia

ikapani. ¹⁵Iuaritika ia niōkatsopatakitiā
nōtākikapekai hīte nitaparaxinireritika.
Himarotakiti, iuaikana nisāpiretai,
iuaikana hīxinikiniri ikapani. Teoso
sikari erekari notamoni, ininiā
ikara atoko niōkatsopata hītemoni.
¹⁶Teoso sikari erekari notamoni,
kotxi itxikitakano Xesosi Kristo nitiri
nininiua. Ipaniātano niparīkauatini
Xoteo minakanuia ikapani. Sasetotxi
apakapari kākiti mīkiti, ininiā sika itxari
Teosomoni. Ikara atoko itxa sasetotxi
parīka. Nota sasetotxi atoko nitxaua.
Nisāpiretari Teoso iokanapirena erekari
Xoteo minakonimoni, ininiā ninoaka
sikaua Teosomoni inireēkiti ikaminina
ikapani. Teoso apakapari ikara atoko
inakari ninoaka iuamoni sikakanuia.
Erekari Matamatakoti kamaerekatari
kākiti Teoso apakapinina ikapani.

¹⁷Ininiā Teoso ikapani niparīkau-
atakasaaki, niuikari Xesosi Kristo.

¹⁸Nota kona iuikaua, kotxi Kristo
posotiireē Xoteo minakanuia kamari
Teoso nireēkiti. Kristo paniātano
nota iua sākire nisāpiretinina Xoteo
minakanuia. Ipaniātano inireēkiti
nikamini Xoteo minakonikata
nauakasaaki, ininiākara ninoa auikari
nisākire. Ininiā ikamarina Teoso
nireēkiti. ¹⁹Erekari Matamatakoti
posotiireē noerekari Teoso takaōtxikare
ninoamoni. Noerekari posotiiretxi kākiti
maposotakiniti ninoamoni. Ininiākara
ninoa kamari Teoso sākire iaōka.
Kristo iokanapirena erekari ikinika
nisāpiretaperi kākiti Xerosareē
sitatxiti auakani. Eereka kākiti apikoxiti
auakani nisāpireta. Eereka kākiti
apikoxiti auakani nisāpireta. Nitxāpota
kākiti nisāpiretini. Imapotōkire
Iríría tixinipeka napoka, Kristo
iokanapirena erekari nisāpiretini
ikapani. ²⁰Ātipirika ninirekari
nisāpiretiniri Kristo iokanapirena
erekari Kristo mimarotakoniātaā.

Ininiã kona nipaŕikauata Teoso ikapani aŕi paŕikauatiniãtaã, kotxi aŕi sãpiretapekari Kristo iokanapirena kãkiti iuaãtaã. ²¹ Kotxi Teoso sãkire iøkatsopatakori txari:

Mitxi iua masãpiretakoni imarotariko iua sãkire. Mitxi iua sãkire make-nakotakani imarotariko iua sãkire, itxa Teoso sãkire iøkatsopatakori.

²² Kaiãokataikani ninirekamari nisini hitemoni, txamari kona apakata, kotxi iuaaaki nisãpiretari Kristo sãkire Kristo sãkire mimarotakanimoni.

Paoro Seenetini Homamoni

²³ Itokanani ninirekamari naøkيتينii hite. Uatxaika apakata nisini hitemoni, kotxi nixipokapekari nipaŕika ikorapokoriti. ²⁴ Nirekari Espãnia tixinimoni nisini. Iuaã nisikasaaki, ninirekari naøkيتينii hite. Ninirekari mapaõti nikaikotini hitekata, kotxi nipotxtari hitekata nauini. Ninirekari hite moianatinino Espãniamoni nisini ikapani, ininiã eereka Espãnia tixinimoni nisa. ²⁵ Uatxa hitemoni nisini apisapanika, nisa Xerosareẽmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ikapani. ²⁶ Kristo sãkire auiaãkani, Xoteo minakanuia Masetõnia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxtiã. ²⁷ Ninoa poxokoniuata oa txineiro isikinina Xerosareẽ auakanimoni. Erekarini oa txineiro isikinina, kotxi Xoteoakori Kristo sãkire auiaãkani sikari Teoso sikakiti Teoso iokanapirena erekari Xoteo minakonimoni. Ininiã erekari Xoteo minakanuia sikiniri ipixini itxineirotena Teoso sikakito, Xoteoakorimoni. ²⁸ Ininiã oa txineiro nanika Xerosareẽ auakanimoni. Ninoamoni txineiro

nisika atoko, ininiã eereka nipotorika Espãniamoni nisini. Espãnia napokini apisapanika nisako hitemoni. ²⁹ Ereẽ napokasaaki, nisãpiretai ikini sereti erekari Kristo sikakiti hitemoni.

³⁰ Nitariakori nota amanaãi hite, himisãkiretiniri Teoso nota ikapani. Hikenakotatari namanaãkiti? Himisãkiretariko Teoso nota ikapani. Xesosi Kristo aãuŕte itxaua, ininiã namanaãi himisãkiretiniri Teoso nota ikapani. Erekarini Matamatakoti txikitakaua atiraõkiuatini, ininiã himisãkiretari Teoso nota ikapani. Ikara atoko hikaminiã, Teoso sikataparatanoni misiritiko auakasaaki. ³¹ Kristo sãkire mauiaãkani Xoteia tõpa auakani nirekari imisiritinino nota. Himisãkiretari Teoso ninoa mamisiritakanino ikapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakanuia iokanatakito. ³² Ininiã Teoso nirekiniãri, napoka hitemoni nipoxokoniritika. Ininiã asikapoxokonitakakaua. ³³ Teoso akamaerekaxiniretakiri aua hitekata. Ameẽ.

Paoro Akiriuaãkaãpotana Ixinikakini

16 Niokanataro aĩtaro Pepi inakoro hitemoni. Peerekaro oa. Omoianatana Xesosi sãkire auiaãkani Sãkireia sitatxtiti auakani. ² Apiananiri nakito otxaua, ininiã hãpakaparoko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka. ³ Hĩsãpiretanako Piriãira, oĩtaniri Ákira pakini nixinikamanapitinina ninoa. Ninoa paŕikauatapeka Kristo Xesosi ikapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakanuia, ikini Teoso

misäkiretikoätaã apotiitakaniua apaka imarotari erekari Pirisira, Ákira pakini kamakiti nota íkapani. ⁵Xesosi sákire auiäkani apotiitaua ninoa aapoko Teoso imisäkiretinina íkapani, ininiã hisäpiretanako nixinikamanapitinina ninoa.

Hisäpiretariko nitiretakiti Epeneto inakori nixinikamanapitiniri iua. Ásia tixiniã iua merepitanika auikari Kristo sákire. ⁶Hisäpiretaroko Maria nixinikamanapitiniro oa. Oa iteene paríkauata ate íkapani. ⁷Hisäpiretanako nimirane Átoróniko, Xónia pakini nixinikamanapitinina ninoa. Mitxipe ninoa aua notakata kateia áki. Teoso kãkitimoni iokanatakini iteene imarotana Átoróniko, Xónia pakini. Ninoa ipi auikari Kristo sákire, iua sákire nauikini apisapanika.

⁸Hisäpiretariko Ápirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹Hisäpiretariko Opano nixinikamanapitiniri iua. Iua paríkauata Kristo íkapani atekata. Hisäpiretariko nitiretakiti Esitaki nixinikamanapitiniri iua. ¹⁰Hisäpiretariko Aperi nixinikamanapitiniri iua. Imisiritiko sauaki iua likipatarí Kristo sákire auikini. Hisäpiretanako Arisitóporo aapoko auakani nixinikamanapitinina ninoa. ¹¹Hisäpiretariko ninirimane Erotxião nixinikamanapitiniri iua. Hisäpiretanako Apiananiri nakitiakori Nasiso aapoko auakani nixinikamanapitinina ninoa.

¹²Hisäpiretanako sitoakoro Tipena, Tiposa pakini nixinikamanapitinina ninoa. Ninoa paríkauatapitipo Apiananiri íkapani. Hisäpiretaroko nitiretakito Pesitxi nixinikamanapitiniro oa. Oa apaka paríkauatapitipo Apiananiri íkapani. ¹³Hisäpiretanako Hopo, inoro pakini nixinikamanapitinina ninoa. Apiananiri mereëri iua. Iua inoro tirtano

nota, ninoro tirtinino atokotxikana. ¹⁴Hisäpiretanako Asíkirito, Pirekõtxi, Émisi, Pataropa, Émasi, íkinika aitariakori ninoakata apotiitakaniua pakini nixinikamanapitinina ninoa. ¹⁵Hisäpiretanako Piróroko, Xória, Nereo, Nereo itaro, Orípa, íkinika Teoso nakitiakori ninoakata apotiitakaniua pakini nixinikamanapitinina ninoa.

¹⁶Himaaratakakauako, kotxi aitariatakakaua. Kristo nakitiakori íkini Teoso misäkiretikoätaã apotiitakaniua xinikamanapitai híte.

Paoro Ótãkikare Mapotókire

¹⁷Nitariakori iteene nótãkikai híte. Erepaniko kãkiti neenamatzí nireëkani. Ninoa nirekari Kristo sákire auiäkani omanatinina apanakini Kristo sákire auiäkani. Na atão ninoa oerekakiti sãkiretxiti, ininiã atxiiti kãkiti takanapari Kristo sákire auikini ninoa oerekakiti xika. Kristo sákire nota oerekakiti hitemoni atão. Ninoa oerekakiti koketakori sãkiretxiti. Ninoa moianariakori kona hitxapeua. ¹⁸Kãkiti ikara atoko inakani kona paríkauata aãuíte Kristo íkapani. Ninoa paríkauata iitona nireëkiti íkapani. Imisirienetarina kãkiti sákire auiäkani. Imisirienetarina kãkiti ikara atoko inakani, kotxi kãkiti potxitari isãkirena. Kãkitimoni peerekari ninoa sákire. ¹⁹Íkinika kãkiti imarotari híte kaminiri Kristo sákire iaõka, ininiã nota iteene poxokoniuata híte ikara atoko hininiã. Ninirekari kíikite hinini erekari híkamini íkapani. Ninirekari himimarotakaniri maerekati híkamini. ²⁰Teoso akamaerekaxiniretakiri, paítiki xipokariko Satanasi posotiire, ininiã híposotari híokanatiniri Satanasi isini.

Aãuíte Xesosi Kristo átipirika sikari íkinipoko erekari hitemoni.

²¹Tximótxi, notakata paríkauatakari, xinikamanapitai híte.

Ninirimane Arósio, Xasão, Sosipato pakini xinikamanapitai hīte apaka.

²²Nota Tésio inakori iōkatsopatarī ia iōkatsopari Paoro īkapani. Nota apaka xinikamanapitai hīte, kotxi Apiananiri nakiti nitxaua.

²³Nota Paoro aua Kaio aapoko. Kristo sākire auiākani apotiitaua iua aapoko Teosokata isākirauatinina īkapani. Iua nirekari himarotiniri iua xinikamanapitini hīte. Erásito inakori apaka xinikamanapitai. Txineiro nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

²⁴Aũite Xesosi Kristo ātipirika sikari ikinipoko erekari hītemoni. Ameẽ.

²⁵“Peerekari Teoso,” matxako. Iua posotari ikamataparaxiniretinii hīte,

ininiã kona hītokakari hāuikiniri Kristo sākire. Teoso iokanapirena erekari nota sāpiretakiti, Xesosi Kristo sākire pakini sāpiretari ikara atoko inakari. Ikara Teoso sākire kitxakapirīka !kimarotikori. Uatxa imarotapeẽkaika. ²⁶Īkorasaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoa sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiã apakata ikinimane auikiniri isākire. Apakata ikinimane kaminiri inireẽkiti iaõka.

²⁷Iuanani Teoso txaua. Iuanokara imarotari atão ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameẽ.

1 KORĪTO

Merepanika Paoro Iokanatsopatakiti Korīto Auakanimoni

1 Nota Paoro, Xesosi Kristo iokanatak-
itino. Teoso akiritano iua iokanatak-
iti nininiua ikapani, kotxi inirekari ioka-
natinino kăkitimoni isăkire nisăpire-
tini ikapani. Aitari Sôseni inakori aua
notakata uai. ²Niokanatsopata hĭte-
moni, kăkiti Xesosi săkire auĭăkani Ko-
rĭto sitatxiti auakanimoni. Kristo Xe-
sosi makatxakakini hĭtxaua Teoso ĭka-
pani. Teoso akiritai hĭte iua nakitiakori
hininiua ikapani. Apaka niokanatsopata
ikini tōpati auakanimoni, aăuĭte Xesosi
Kristo uăka akiritakanimoni. Ate auĭte
Xesosi, ninoa auĭte apaka itxaua. ³Aĭri
Teoso, Apiananiri Xesosi Kristo pakini
sikari ikinipoko erekari hĭtemoni. Ninoa
kamaerekaxiniretai hĭte.

Paoro Misăkiretari Teoso Korĭto Auakani ĭkapani

⁴Ătipirika nimisăkiretari Teoso ia
atoko: “Peerekai pite, kotxi Xesosi
Kristo sikari ikinipoko erekari Korĭto
auakanimoni. Ikara erekari pite sikakiti.
⁵Peerekai pite, kotxi pite kamaerekatari
ninoa auĭni. Pite oerekana ninoa
săkire atăo inini ikapani. Pite
kamaimaroretana. Ininiă ninoa săkire
apiaerekata. Ninoa imarore apiaăpota.”
Ia atoko nimisăkiretari Teoso.

⁶Hĭtemoni asăpiretakiti Kristo
pirena auapeka hăkixinireĕ. Ininiă
iteene hăuĭkari Kristo săkire. ⁷Ininiă
hiătapakasaakiri aăuĭte Xesosi Kristo
kanapiriini, ikini sereti erekari
Teoso sikakiti aua hĭtemoni iua
parĭka hĭkamini ikapani. ⁸Hĭte
isikataparaxiniretiniritika ikanapiriini
ōti apokako. Ininiă maerekati hĭtemoni
!auari aăuĭte Xesosi Kristo apokasaaki.

⁹Teoso kamariko ikara hĭtemoni, kotxi
ikinika isăkire iaōka ikamako. Iuakara
akiritai hĭte, himoianatiniri imi aăuĭte
Xesosi Kristo.

!Homanatakakapeua

¹⁰Nitariakori, aăuĭte Xesosi Kristo
posotiireĕ nôtăkikai. Hĭsăkireătino
hĭtxako. !Ninirekari homanatakakiniua.
Ninirekariătika hĭxinĭkakiti auĭni.
Ninirekariătika hinirekakiti auĭni.
¹¹Nitariakori, Kroee aapoko
auakani săpiretano hĭtekararika
hinaiatakakiniua. ¹²Kotxi apanakini
hĭte txari: “Paoro săkirera nota kĭpita.”
Ătipekana: “Aporo săkirera nota kĭpita.”
Ătipekana: “Petro săkirera nota kĭpita.”
Ătipekana: “Kristo săkirera nota kĭpita.”
¹³!Apakata ikara atoko hĭkamini. Kristo
!ikaiarikaăka. Kona Paoro ipina aamina
ĭpiriămitakari nopini hĭte ikapani. Kona
Paoro uăkaă hĭpatxisataăka.

¹⁴Nisăpiretari Teoso ereka inini,
kotxi kona notani patxisatai hĭte.
Krispo, Kaio pakininanira nipatxisata.
Apikomoni !nipatxisatari kăkiti.
¹⁵Ininiă kona kăkiti săpiretari
nipatxisatiniri kăkiti nota uăkaă.
¹⁶Ii. Nimaxinĭkaretari. Nipatxisatari
Esitėpana, iua aapoko auakani
pakini. Apikomoni nipatxisatakini
!nixinikaika. ¹⁷Kristo kona iokanatano
nipatxisarauatini ikapani. Iokanatano
Teoso iokanapirena erekari nisăpiretini
ikapani. !Ninirekari kăkiti săkireĕ,
kăkiti imaroreĕ nisăpirenauatini,
kotxi kăkiti imarore !isăpiretari Kristo
ipinini aamina ĭpiriămitakari nopini
amaerekani imakatxakini ikapani.

Teoso Imarore

¹⁸Teoso săkire mauĭăkani uăkatari
!kĭkiteri kăkiti Kristo ipinini aamina
ĭpiriămitakari nopini săpiretakani.
Atepekana, Kristo ipinini săpiretiko
oerekari Teoso posotiire, kotxi Kristo

ipinini makatxakari amaerekani.
¹⁹Teoso sākire iōkatsopatakori
 kitxakapirīka txari:

Nixipokariko ikorapokoriti kimarorerini
 imarore. Nixipokariko kiikiterini
 iikite.

Itxa Teoso kitxakapirīka. ²⁰Itapari
 kimaroreri? Itapari apaiaōkarau-
 atakari? Naniparari kaxinikareri
 ikorapokoritikiri? Teoso oerekapekari
 ikorapokoritikiri imarore miikiteti
 imarore atokotxikana inini.
²¹Paimatireri Teoso, kotxi !auritari
 ikorapokoriti auakani imarotniri iua
 ninoaka imaroreē. Apanakinimoni
 Kristo sākire sāpiretiko !kiikiteri,
 iuaritika Teoso apokaerekatari
 imaktxakiniri kākiti maerekani, Kristo
 sākire sāpiretiko auikasaakina.

²²Xoteoakori nirekari atamatiniri
 Teoso takaōtxikare, isākire auikinina
 ikapani. Krekoakoripekana nirekari
 imaroretxi apiari imarotini. ²³Iuaritika
 ate sāpiretari Kristo ipinini ipiriāmi-
 takari nopini amaerekani imaktxakini
 ikapani. Xoteoakori !nirekari ikara
 asākire auikinina. Krekoakoripekana
 uākatari ikara asākire miikiteti sākire
 inini. ²⁴Iuaritika Teoso akiritakini
 aua Xoteoakori, Krekoakori pakini.
 Ninoamoni Kristo parīka oerekari
 Teoso posotiire. Iua parīka oerekari
 Teoso imarore. ²⁵Kākiti uākatari Teoso
 imarore !kiikiteri, iuaritika axapitiki
 Teoso imarore apiata. Ikinipoko kākiti
 imarore poiāoka. Axapitiki Teoso tapara
 apiata. Ikinipoko kākiti tapara poiāoka.

²⁶Nitariakori, Teoso akiritakasaakii,
 hīxinikari kākiti xinikakiti atokokana.
 Natokopa itxa hīte iusaasaki? Iusaaki
 !kimarorei. !Kaposotiirei iusaaki.
 Auītetxi !hītxaua iusaaki. Itori hīte
 ikara atoko inakani iusaaki. ²⁷Teoso
 mereēri kākiti. Ikorapokoriti auakani
 uākatari ninoa kākiti Teoso mereēkini
 miikiteni ininiua. Imereēna ninoa,

kimaroreni ikorapokoriti auakani pē-
 tauatini ikapani. Ikorapokoriti auakani
 uākatari ninoa kākiti Teoso mereēkini
 iōkapetakani ininiua. Imereēna ninoa,
 katapararini ikorapokoriti auakani
 pētauatini ikapani. ²⁸Iua mereēri kākiti.
 Ikorapokoriti auakani uākatana ninoa
 Teoso mereēkini minakani ininiua.
 Imereēri apanakini manirekakini.
 Imereēri kākiti omanatakoni. Kinirepa
 Teoso mereēri kākiti ikara atoko
 inakani? Teoso oerekari kākiti, kākiti
 uākatakiti apiari inini na atāo. ²⁹Ikara
 atoko ininiā, kākiti !iposotari iuikiniua
 Teoso apisatoō. ³⁰Teosora txikitakaua
 Xesosi Kristo nakitiakori aniniua.
 Kristo nakiti aniniāua, aimarotari
 imaroretxi atāo inakari. Kristo
 txikitakaua atāo inakari akamini Teoso
 apakapiniua ikapani. Iua txikitakaua
 Teoso nakitiakori aniniua ikapani.
 Iikixirauata ate ikapani ipikasaaki.

³¹Teoso sākire iōkatsopatakori txari:
 !Apakata piuikiniua. Apakatapitika
 piuikiniiri Apiananiri.

Xesosi Ipinini Īpiriāmitakari Nopini

2 Nitariakori, napokasaaki hītemoni,
 nisāpiretai Teoso sāpiretakiti. Kona
 nisāpiretai notaka sākire nimatire.
 Iusaaki kona noerekai notaka imarore.
 Teoso sākirenoka nisāpiretai hīte.
²Hītekata nauakasaaki, na ninirekari
 āti imaroretxi nimarotini. Ninirekari
 Xesosi Kristonoka nisāpiretinii. Apiata
 ninirekari nisāpiretinii iua ipinini kākiti
 ikapani ipiriāmitakari nopini. ³Hītekata
 nauakasaaki kona kataparaxinireno.
 Nikikinanaka nipīkarauatini xika.
⁴Iusaaki kona kākiti imaroreēni
 nisākirauata. Kona kākiti imaroreēni
 ninirekari hāuikiniri Teoso
 iokanapirena nisāpiretakiti iusaaki.
 Teoso iokanapirena nisāpiretakasaaki,
 kākiti imarotari Erekari Matamatokoti
 posotiireē nisākirauata. ⁵Ininiā

kona kākiti imaroreēni hāuikari Teoso iokanapirena. Hāuikari Teoso iokanapirena Teoso posotiireē.

Erekari Matamatakoti Imarore

⁶Teoso sākire auiākani iteene ākixinireē aneēkani imarotari Teoso iokanapirena asāpiretakiti kimatireri inini. Ikara imaroretxi kona ikorapokoriti auakani imaroreni. Kona auītetxiakori imaroreni ikara imaroretxi. Kotxi ninoa imarore paītiki !uaaika. ⁷Asāpiretari Teoso imarore mitxi kākiti mīmarotakinīti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitimoni ate iotximere aāpakapini ikapani. ⁸Auītetxiakori ikorapokoriti auakani !imarotari ikara Teoso imarore. Ninoa imarotaākkamariko, ininiā !okamarinako Apiananiri kaiotximereri aamina īpiriāmitakari nopini. ⁹Kitxakapirīka Teoso sākire iōkatsopatakori txari:

Kākiti oki !atamatapanikari Teoso kamakiti tīkane iua tīretakani īkapani. Kākiti kenakoki !ikenakotapanikari Teoso kamakiti tīkane iua tīretakani īkapani. Kākiti !ixinikapanikari Teoso kamakiti tīkane iua tīretakani īkapani.

¹⁰Iuaritika Teoso oerekepekaua Erekari Matamatakotiā. Ikinipoko imarotakari itxaua Erekari Matamatakoti. Ikinipoko kipatakori Teoso imarore imarota. ¹¹Kākiti ākixinirenoka imarotari iua ixiniākiti. Āti !imarotari iua xiniākiti. Iua atokokanera Erekari Matamatakotinoka imarotari Teoso xiniākiti, kotxi Teoso itxaua iua. ¹²Kona ate apakapari ātiāo matamatakoti ikorapokoritikiri. Ate apakapari Erekari Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

¹³Atemoni isikakiti asāpireta. Kona kākiti imaroreēni asāpiretari kākiti. Erekari Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aāmatari iua oerekakiti, ininiā iuasaaki aimarotari atāo. Ikara atoko aōerekai hīte. ¹⁴Erekari Matamatakoti mauakinīti !apakapari Erekari Matamatakoti oerekakiti, kotxi iuamoni ikara sākiretxi mīkiteti sākire. !Iposotari imarotiniri Erekari Matamatakoti sāpiretakiti, kotxi Erekari Matamatakoti !auari iuamoni. ¹⁵Erekari Matamatakoti auakasaakiri kākiti, iuasaaki iposotari ataerekatiniri imakinika, ininiā kākiti Erekari Matamatakoti mauakinīti !iposotari apoītini iua.

¹⁶Teoso sākire iōkatsopatakori txari: Kiripa imarotatari Apiananiri xiniākiti iua oerekini ikapani? Iuaritika Kristo oerekaua iuaka xiniākiti.

Teoso Nitiriakori Atxaua

3 Nitiriakori, hīte !ikamari ikinipoko Erekari Matamatakoti nireēkiti. Hīkamari hīteka nireēkiti ikorapokoriti auakani kamini atokokana. Ininiākara nisākīrauata hītekata amarinikata nisākīrauatinī atoko, kotxi poiāonoka hāuikari Kristo sākire. ²Tinitxiā atoko inakari nisākire nisikai. Xinitxi atoko inakari nisākire kona nisikai, kotxi !himīteenekari nisākire kamimari. Uatxapiima hīte !iposopanika noerekakiti kamimari himarotini. ³Īkorapokoriti auakani xinikini atoko hīxinikapanika. Ikara xika hīxikotakakaua. Hinaiatakakaua. Homanatakakaua. Hīteka nireēkiti hīkama, ikorapokoriti auakani kamini atokokana. ⁴Kotxi ātikaka hīte txari: “Paoro sākire nikīpita.” Apanakini txari: “Aporo sākire nikīpita.” Ikara atoko

hininiā, kākiti i korapokoritikini sākire atoko hīsākirauata. !Kiikitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakaninoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini ikapani. ⁶ Ia atoko itxa parīkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireēkiti atoko itxa apikomoni Teoso sākire isāpiretakiti. Nota, Aporo pakini parīkauata ikara atoko, iuaritika Teosonoka aneēkakari takari. Iuanokara txīkitakari kākiti auikiniri isākire. ⁷ Takariki taākari, āparaā siākari pakini minakati ninoa, kotxi Teosonoka aneēkakari takari. ⁸ Teoso sākire merepanika sāpiretakari nirekari iparīkauatini Teoso ikapani. Teoso sākire apikomoni sāpiretakari apaka nirekari iparīkauatini Teoso ikapani. Ininiā Teoso sikariko ninoa parīka iki ninoamoni iparīkana iaōka. ⁹ Teosokata parīkauatakani atxaua. Teoso kikiote atoko hītxaua. Apaka Teoso aapoko atoko hītxaua.

¹⁰ Teoso sikapekano ikinipoko erekari niparīka iua ikapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini ikapani. Iua aapokotxi kamakari kimaroreri atoko nitxaua. Merepanika nota parīkauata Kristo sākire nisāpiretini. Kaikori aapokotxi kamakari takakiti atoko itxa ikara iua sākire. Eereka apanakini oerekarauata apikomoni. Ninoa parīka aapokotxi kamiko kaikori nopini atokokana itxa. Erepaniko akamakasaakiri ikara parīkatxi. ¹¹ Kaikori, aapokotxi kamakari takakiti atoko itxa Xesosi Kristo sākire. Āti

kaikori kākiti sākire !auari. Auape kaikori Xesosi Kristo sākire, kotxi kataparari. ¹² Xesosi Kristo sākire aāuikasaaki, kaikori aāuini ikapani iposope. Aapokotxi iua kaikori nopini atoko itxa aparīka. Aparīka atxiīti oro atoko itxa. Atxiīti pirata atoko itxa. Atxiīti kai erekari atoko itxa. Atxiīti aamina atoko itxa. Atxiīti aātsopa atoko itxa. Atxiīti katsotati atoko itxa aparīka.

¹³ Itixi xipokini ōti kākiti imarotariko natokopa itxa iparīka, kotxi iuasaakiko arikatxi ataerekatari iparīka. ¹⁴ Iparīka marikakaniā, apakapari iparīka iki. ¹⁵ Iparīka arikiniā, !apakapari iparīka iki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hīte imarotapanikari Teoso misākiretiko aikoti hininiua? Kona hīte imarotapanikari Erekari Matamatakoti auini hīto āki? ¹⁷ Kākiti xipokiniāri Teoso misākiretiko aikoti, Teoso xipokariko iua. Teoso misākiretiko aikoti iua nakiti. Hītera Teoso misākiretiko aikoti hītxaua.

¹⁸ Kona hīteka misirienetapeuako. Atxiīti ātikaka kākiti hīte sauaki uākatari kimaroreni ininiua, kotxi imarotarina i korapokoriti auakani imarore. Īkorapokoriti auakani uākatari Kristo sākire auiaākari miikiteti ininiua. Ininiā erekape kākiti i korapokoriti auakani akiritinii miikiteti hininiua, kotxi iuasaaki kimaroreri atāo inakari hītxaua. ¹⁹ Teosomoni !kiikiteri i korapokoriti auakani imarore. Teoso sākire iōkatsopatakori txari:

Teoso maikari kimarorerini i korapokoriti auakani ninoaka imaroreē.

²⁰ Apaka Teoso sākire iōkatsopatakori txari:

Apiananiri imarotari i korapokoriti kimarorerini imarore !itxapō.

²¹ Ininiā !apakata kākiti iuikiniua imarore xika. Ikinika aua hītemoni.

²²Paoro aua hītemoni. Aporo aua hītemoni. Petro aua hītemoni. Itixi aua hītemoni. Hāuini, hīpinini apaka aua hītemoni. Uatxa auakari, katana auakari apaka aua hītemoni. Ikinipoko aua hītemoni. ²³Kotxi hīte Kristo nakiti hītxaua. Kristo, Teoso nakiti itxaua.

Kristo Iokanatakini Kākitimoni

4 Erekarī kākiti imarotiniri auītetxiakori aminakanīua. Kristo nitiriakori atxaua. Teoso iokanapirena nīkatakani atxaua. Iua sikari iokanapirena atemoni apanakini asāpiretini īkapani. Iua Teoso iokanapirena !imarotaāka mitxi. ²Nitiritxi atāo inakari ātipirika kamari iauīte paniātakiti. ³!Nimaākatari hīte ataerekatinino nota. !Nimaākatari apanakini ataerekatinino apaka. Kona notaka ataerekataua apaka. ⁴Nākixinireē maerekati !uari, iuaritika nikamapekari maerekati. Apiananirinokara ataerekatano. ⁵Ininiā !hīsāpiretapiri: “Kona erekari iua parīka. Peerekari ikara parīka,” kona hītxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparīkauatakasaakina. Iuasaaki Teoso txariko kākiti: “Erekapitikari pikamakiti,” itxa.

⁶Nitariakori, ikara nota pirena, Aporo pirena pakini nisāpiretai atāo inakari himarotini īkapani, āti apiata himiūkakani īkapani. Ininiā hīkamari Teoso sākire iōkatsopatakori iaōka, kotxi !apakata kākiti iteene iuikiniri āti, ātipekana imanirekakani inini. ⁷Pite apiananitakari !uari. Himapakapakiniti !uari. Kapakapare hininiā, kinirepa mapakapareni sākirauatini atoko hītxa? ⁸Ikinipoko hinireēkiti auapeka hītemoni atxiīti? Katiipekai hīte. Ate ereē mauakanisaaki,

atxiīti hīteka kamari auītetxi hininiua. Ninirekari auītetxi atāo hininiua, ininiā ate auītetxi atxaua hītekata. ⁹Īkorasaaki neenamati xipoka atoko, auītetxi kāiatakari kanapiriā isotatonekata. Ninoa mapotōkire kākiti auītetxi maīkakini minaāka apanakini atamatinina īkapani, inapetinina īkapani. Eereka okaākana ninoa kākiti. Nota xinikari Teoso nirekari ate iua iokanatakini ikara kākiti maīkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apininimoni asini. ¹⁰Hītemoni, miikiteni ate txaua, Kristo īkapani aparīkauatakasaaki. Hītemoni, kimarorei hīte, Kristo īkapani hīparīkauatakasaaki. Hītemoni, !kaposotiireua ate. Hītemoni kaposotiirei hīte. Hīte paxitaāka, txamari ate omanataāka. ¹¹Uatxapiima Kristo sākire ate auikini xika anatxita. Aposonata. !Kamākaua. Amisiritaāka. !Kaapokoua. ¹²Iteene aparīkauata anireēkiti aamotini īkapani. Kākiti takasaakiri maerekati atemoni, ate amanaāri Teoso erekari ninoamoni itakini īkapani. Amisiritikosaaki, iuasaaki amīteenekari. ¹³Apanakini misākirepiretakasaakīua, erekari ate apakapapiretana ninoa. Uatxapiima apanakinimoni īkorapokoriti txiko atoko atxaua. Kasakari atoko atxaua ninoamoni.

¹⁴Kona niōkatsopata ikara hīpētauatini īkapani. Niōkatsopata ikara nipinitinii īkapani monōkori apokini apisa, kotxi namariteni nota tīretakini atoko hītxaua. ¹⁵Hītemoni tesi mio Teoso sākire oereēkani auaākamako, iuaritika poiāo hīri atoko inakari aua. Notara hīri atoko nitxapekaua, kotxi hāuikari Teoso iokanapirena erekari noerekasaakii Kristo Xesosi posotiireē. ¹⁶Ininiā nōtākikai: Nota kamakiti atokotxikana

hīkamako. ¹⁷ Ikara ikapani niokanatarī Tximótxio hītemoni. Iua namarite nitiretakīti atoko. Iua kamari Apiananiri paniātakīti iaōka. Iua txīkitakai hīxinikiniri nikamakīti ikiniōtika Kristo posotiireē. Ikini tōpati Kristo sākire auīākani apotiitiniātaāua, noerekari kākīti erekari ikamini ikiniōtika, erekari nota kamini atokotxikana.

¹⁸ Ātikaka hīte iuikaua, kotxi hīuākatari nota mapokakani hītemoni. ¹⁹ Txamari Teoso auiritiniāno, paītiki napokako hītemoni. Iuasaakiko !ninierekari nimarotiniri ninoau iukakanīua sākire. Napokasaaki ereē, ninirekari nimarotiniri Teoso posotiire. ²⁰ Teoso auītetxi ininiātaāua kona sākiretxinani aua. Iposotiire apaka aua. ²¹ Kiripa hīte nireka? Hinirekatari ninoropatīnīi aīkeē, ereē napokasaaki? Hinirekatari nitiretinīi, nimatxitakanīi, ereē napokasaaki?

Maerekati Xesosi Sākire Auiākani Sauaki

5 Isāpiretaāka kākīti ereē kaminiri maerekati itotxi nireēkīti āti kākītikata. Iua kākīti maerekani apiari, kotxi iua sirīka iri itanorokata. Teoso sākire mauīākani kamari maerekati, iuaritika ninoau !ikamari ikara atoko inakari maerekati, kiki hīte sauaki auakari kamakīti atoko. Ninoau !ninierekari isākiretinirina ikara atoko inakari maerekati. ² Iuaritika hīte iuikaua. !Himatīnīuata himaerekani xika. Apiaerekata ikora iri itanorokata sirīkakari hīokanatinī itakanapīnīi. ³ Niīto kona ereē aua, iuaritika nixīnikakīti auapitika ereē hītekata, ininiā nota ereē hītekata nauīni atokokana, nimereēpekari iua maerekati kamakari misiritiko. ⁴ Aāuīte Xesosi Kristo uākaā hāpotiitakasaakīua, nota aua hītekata nixīnikakītiā. Iuasaakī himarotakasaakīri Xesosi Kristo

posotiire, ⁵ hīsīkarīko iua Satanasīmoni iua ito ipīnīni ikapani, ixīnīre ereka inīni Xesosi kanapiriākasaaki.

⁶ !Apakata hīuīkīnīua. Himarotari axapīti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākīti kaminiri maerekati. ⁷ Ininiā hōkanaparīko maerekati mitxi hīkamakīti, amaneri hinīni ikapani. Ininiā pāo miātiākati atoko hītxaua, kotxi ikoke !auari. Kitxakapirīka kākīti okari ipira soti auīte, ininiā Teoso nitiri napaāpotakasaaki ninoau nopīni, kona okana ninoau. Kristo, apira soti auīte atoko itxa. Iua ipīna ate mapīnakani ikapani. ⁸ Pāsōka kiinirītīsaakī, Teoso !auiritari pāo ātikakari nīkīko, kotxi maerekati pāo tirekakari atoko itxa. Ininiā maōkanapari maerekati mitxi akamakīti. Pāo miātiākati atoko matxaua, ininiā makamari erekari. Masākiretari atāo inakarīnoka. ⁹ Niokanatsopatapeka hītemoni himapotiitakaniua maerekati kamakanīkata, itotxi nireēkīti kamakanīkata. ¹⁰ Na nixīnikari ikorapokorīti maerekati kamakani. Maerekati itotxi nireēkīti kamakani, kamanarerīni, kamsīrienererīni, kamakori teosonetakani pakīni ikorapokorīti auakani na nixīnikanāta. !Hīposota hītakanapīnīna ninoau, kotxi auapīkana. Hīpīkasaakīnokara, hītakanapana ninoau. ¹¹ Uatxa niokanatsopata hītemoni, himapotiitakaniua maerekati kamakanīkata, “Xesosi sākire auīākarīrano” inakanīkata. Itanoro minakotokatīka sirīkakani, kamanarerīni, kamakori teosonetakani, āti misākīrepiretakani, ipoātakani, kamsīrienererīni pakīni hītakanapako. Kona hinīpokotape ikara atoko inakanīkata.

¹² Kona nota parīkani Xesosi sākire mauīākani misiritiko nisāpiretinī. Hīte

parīkakara Xesosi sākire auiākani misiritiko hīsāpiretini. ¹³Teosokara sāpiretariko Xesosi sākire mauīākani misiritiko. Hīte iokanatariko maerekati kamakari hīte sauaki auakari isini.

Āti Naiatakasaakiri Āti

6 Xesosi sākire auiākari naiatiniāri āti Xesosi sākire auiākari, !apakata Xesosi sākire mauīākani apisatoō anikiko. Hanikana ninoa Xesosi sākire auiākanimoni maerekati kamakari misiritiko himarotini ikapani. ²Kona himarotapanikari Xesosi sākire auiākani mereēriko Xesosi sākire mauīākani misiritiko āti ōti? Hīkamariko ikara atoko inakari xipokatxi ōtisaaki, ininiā hīposotapitikari uatxa himereiniri kākiti misiritiko, āti naiatakasaakiri āti. ³Atxiīti hīte kona imarotapanikari himereiniri Satanasi nitiriakori misiritiko āti ōti? Ininiā hīposotapitikari himereiniri kākiti misiritiko ikorapokoriti uatxa. ⁴Txamari neenamati hīte sauaki auiniā, hanikatari kākiti Teoso sākire auiākani mapaxitakanimoni? !Apakata, kotxi ninoa !imarotari Teoso paniātakiti. ⁵Ikara atoko nitxai nikamapētatinii ikapani. Atxiīti kona hīposotatari hāpokiniri kimaroreri hīte sauaki neenamati xipokini ikapani? Atxiīti kona ātika aua? ⁶Txamari āti Xesosi sākire auiākari anikari āti Xesosi sākire auiākari Xesosi sākire mauīākani apisatoō maerekati kamakari misiritiko himarotini ikapani. Ikara atoko !apakata.

⁷Ininiā iteene hīkerokari, kotxi hanikari hītari kākiti misiritiko mereēkarimoni. Erekape hāuiritiniri hītari kaminiri maerekati hītemoni. Erekape hāuiritiniri hītari itirīkiniri hītii. ⁸Txamari hīitiriua. Hīkamari maerekati. Hītariakorimonira hīkamari

ikara. !Apakata. ⁹Kona himarotapanikari atō minakati kamakani !isari Teoso auītetxi ininiātaāua? Kona hīteka himisirienetapeua. Ia atoko inakari kākiti !isari Teoso auītetxi ininiātaāua: maerekati itotxi nireēkiti kamakani, kamakori teosonetakani, itanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoa !isari Teoso auītetxi ininiātaāua. ¹⁰Kiitiririni, kamanarinerini, poātakani, āti misākirepiretakani, kamisirienenerini pakini !isari Teoso auītetxi ininiātaāua. ¹¹Ikara atoko mitxi hītxaua hīte apanakini. Iuaritika himaerekani makatxakaākapeka. Teoso kamai hīte inakitiakori hinini. Apiananiri Xesosi kamaerekatai. Erekar Matamatakoti, aTeosone nakiti, iua apaka txīkitakai hīte atō inakari kamakani hininiua.

Maerekati Itotxi Nireēkiti

¹²Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauīte ininiua. ¹³Nipokori kamaāka tikakotxi ikapani. Tikakotxi nirekari nipokori. Txamari Teoso xipokariko nipokori, tikakotxi pakini. Teoso !nirekari akaminiri maerekati aīto nireēkiti āti kākiti itokata. Apiananiri kamari aīto iua nireēkiti akamini ikapani. Aīto Apiananiri nakiti.

¹⁴Teoso ōkitikari Apiananiri ipikani sauaki. Iua atokokana iua ōkitikaua ate iposotiireē.

¹⁵Ininiā !apakata Kristo ito hīsikini sito kanokareroni. !Apakata. ¹⁶Kiki sirīkasaaki kanokarerekata, iuasaaki ātinoka itotxi atoko itxauana ninoa. Teoso sākire iōkatsopatakori sāpiretaua: Kiki sirīkini sitokata, ātika itotxi atoko itxauana.

¹⁷ Kākiti moianatakasaakiri Apiananiri, ātika xiniretxi atoko itxauana ninoa xinire.

¹⁸ Ātokata hīsīrīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti !imisiritari hīto. Imisiritari hākixinire. Hīkamakasaakiri maerekati hīto nireēkiti sitokata, himisiritari hīto, hākixinire pakini. ¹⁹ Kona himarotapanikari hīto Erekarī Matamatakoti misākiretiko aikoti atoko ininiua? Hīte itōākarari iua. Teoso sikari iua hītemoni, ininiā hīto kona hīte nakiti. ²⁰ Teoso iamotapekai hīte Xesosi ipīkasaaki, ininiā hīto īki auapitika. Ininiā uatxa iua nakiti hītxaua. Ininiā uatxa hītoā hīpaxitariko Teoso.

Ītanorouatiko Sākiretxiti

7 Uatxa napakapapiretariko mitxi hiōkatsopatakiti notamoni. !Erekari kiki kaxirotiniro sito. ² Txamari inirekasaakiri sitokata isīrīkini, erekari kiki auini iuaka ītanorokata. Erekarī sito auini oaka ōtanirikata. ³ Ininiā erekari kiki sikiniri iito ītanoromoni. Erekarī sito sikiniri oīto oītanirimoni. ⁴ Ītanorotxi ito kona oa nakitinanini. Ōtaniri nakiti apaka oīto. Apaka ītaniritxi ito kona iua nakitinanini. Ītanoro nakiti apaka iito. ⁵ Kona hītxape: “Kona ninirekari nisīrīkini pitekata,” kona hītxape. Hinirekasaakiri nipokori himanikakani Teoso himisākiretini ikapani, atxīti iusaaki !hinirekari hīsīrīkini hītanorokata. Hītanoro apaka kona nirekari osīrīkini hītekata iusaaki, Teosonoka hīxinikini ikapani. Ininiā ikara atoko hīkaminiā erekari, txamari paītiki eereka iuaīkana hīsīrīkako hītanorokata. Ininiā ikara atoko Satanasi kona sikanireōtai maerekati hīto nireēkiti hīkamini āto sitokata hīsīrīkini. ⁶ Ikara nota ōtākikai hīte. Kona nipaniātai ikara hīkamini.

⁷ Notamoni erekari nota atoko hinini. Iuaritika ikinimane aua Teoso siākiti iparīka kamini ikapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekarī himītaniriuatakani, himītanorouatakani nota atoko hinini. ⁹ Txamari himaposo-takaniāri hītakanapiniri hīto nireēkiti, erekari hītanorouatini, erekari hītaniriuatini, kotxi kapatakari atoko itxa hīto nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti ītaniriuatakani: !Apakata sito takanapiniri oītaniri. Kona notani paniātai. Apiananirira paniātai. ¹¹ Otakanapiniāri oītaniri, !apakata iuaīkana oītaniriuatini. Erekarī oītanirimoni iuaīkana okanapiriini. Iua atokotxikana !apakata kiki takanapiniro ītanoro. ¹² Nōtākikari apanakini. Apiananiri paniātakiti apanakini ikapani !auari, ininiā nota ōtākikana ninoa ia atoko: Xesosi sākire auīākari auiniā ītanoro Xesosi sākire mauīākato, oa nirekiniāri okaikotini iuakata, !apakata iua iokanatiniro oa otakanapiniri iua. ¹³ Iua atokotxikana, Xesosi sākire auīākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iusaaki ītaniritxi Xesosi sākire mauīākati apakapari Teoso sākire ītanoro kamakiti ereka atamatakasaaki. Iua atokotxikana, ītanorotxi Xesosi sākire mauīākato apakapari Teoso sākire ōtaniri kamakiti ereka oātamatakasaaki. Imakamakaniārina ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri ītanoro, oa auiritariko isini. Xesosi sākire

mauiākato nirekiniāri otakanapiniri oītaniri, iua auiritaroko osini. Ikara atoko ininiā, ninoa sikakapeēkaika. Ikara atoko ininiā erekari, kotxi Teoso !nirekari anenamauatini ikara xika. ¹⁶ Pite itanorotxi, pimarotatari? Atxiīti pītaniri auikari Xesosi sākire imaerekani makatxakiko ikapani, Xesosi sākire pisāpiretakasaakiri iua. Pite itaniritxi, pimarotatari? Atxiīti pītanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparika Teoso sikakiti iuamoni, kotxi Apiananiri akiritaua ikara parīkatxi akamini. Ikara nipaniātari ikinimane Teoso mereēkini apotiitiniātaāua. ¹⁸ Teoso akiritakasaakiri kiki, Teoso takaōtxikare iītoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iītoā mauakaniā, !apakata Teoso takaōtxikare iītoā takiko. ¹⁹ Teoso takaōtxikare hiītoā auiniā, ikara kona txīkitakai Teoso anaakori hininiua. Teoso takaōtxikare hiītoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iuasaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauīte sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatuiua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaikana kākiti nitiri iamotakoni !hītxapeuako. ²⁴ Nitariakori, Teoso

akiritakasaakii, iuasaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nōtākikai hīte mitxitakani. Apiananiri kona sāpiretano ipaniātakiti hīte ikapani, iuaritika nisāpiretai nixinikakiti, kotxi Apiananiri amonikapekano, ininiā kākiti posota auikiniri nisākire. ²⁶ Īkorasaaki pamonōkoniri Xesosi sākire auīakanimoni, ininiā notamoni apiaerekata kākiti mītanorouatakani. ²⁷ Hītanorouatapeka hininiā, kona hītakanapapero hītanoro. Mītanorouatakatipanika hininiā, kona hinitapero hītanoro. ²⁸ Iuaritika hītanorouatiniā, maerekati !hīkama. Kākiti itanorouatiniā, apokapitakiko ninoa maxikiko. Kona ninirekari ikara atoko hīte ikapani.

²⁹ Nitariakori, poiāo ōtinoka aua aparīkauatini Apiananiri ikapani. Ininiā hīte kītanororini parīkauatako Teoso ikapani mītanoroni parīkauatini atokotxikana. ³⁰ Txiapatakari parīkauatako Teoso ikapani, kākiti matxiapatakati parīkauatini atokokana. Poxokori parīkauatako mapoxokoniti parīkauatini atokokana. Tiitxi amotakari parīkauatako Teoso ikapani, tiitxi mauakiniti parīkauatini atokokana. ³¹ Īkorapokoriti tiitxi auakini !ixinikapiriko itiina, kotxi ĩkorapokoriti kākiti potxitakiti xipokaāpota.

³² Ninirekari erekaxinire hinini. Kiki mītanoroti posotari ixinikiniri kanatokopa iparīkauatini Apiananiri ikamapoxokonitini ikapani. ³³ Txamari kiki kītanorori xinikari parīkatxi ĩkorapokoritikiri, kotxi inirekari ikamapoxokonitiniro itanoro. ³⁴ Mītanirito, mitxitakaro pakini nirekari oparīkauatini Apiananiri ikapani, kotxi onirekari oīto, oxinire pakini osikini iuamoni. Txamari

sito kītaniriro xinikari parīkatxi
īkorapokoriti auakari, kotxi onirekari
ōtaniri okamapoxokonitini. ³⁵ Ikara
atoko nisāpiretai hīte, hīte ereka hinini
īkapani. Kona ninirekari nimauiritakanii
erekari hāpakapini. Ninirekari atāonoka
hīkaminī. Ninirekari hīparīkauatini
Apiananirinoka īkapani.

³⁶ Ātokoro iri atxiīti !auiritapanikaro
oa itaniriuatini, txamari oaneēpeka.
Ātokori nirekiniāri itakiniro oa, erekari
iua auiritiniri iua. !Ikamari maerekati.
Erekari iua auiritinina ninoa itaniriu-
atini. ³⁷ Atxiīti ātokoro iri ākixinireē
!nirekaro oa itaniriuatini. Atxiīti
!sikaenetaro oa ātimoni. Iua xinikakiti
omītaniriuatakani īkapani pataparari
ininiā, ākixinireē imarotiniāri inireēkiti
oa mītaniriuatakani, ininiā iua
kiki kamari erekari. ³⁸ Oa sikakari
oītaniriuatini īkapani kamari erekari.
Iuaritika oa masikakati oītaniriuatini
īkapani kamari apiaerekata.

³⁹ Teoso paniātakiti iōkatsopatakori
paniātaro sito kaikotini oītanirikata
iua auapanika inakasaaki. Iua
ipininiā, apakata oītaniriuatini
onirekakitikata. Txamari Apiananiri
sākire auīākarikatanoka apakata
oītaniriuatini. ⁴⁰ Notamoni oa apia
poxokoniuata omītaniriuataniā
iuaīkana. Ikara atoko inakari
nōtākikaro sito, kotxi nimarotari
Erekari Matamatakoti Teoso nakiti aua
notamoni.

Nipokori Teoso Kamakori Sikiko

8 Uatxa nisāpiretai nipokori sikiko
teoso kākiti kamakitimoni.
Amakinika aimarotari ikara.
Ikara inakari aimarotapeka ate.
Kākiti imaroretxi auiniā iuikaua.
Apiaerekata kākiti auini tiraōkitxi,
kotxi isikataparatarari kākiti xinire.
² “Kimaroreno nota” inakari !auari
imaroretxi. Kaiāopokori imaroretxi

imimarotakiniti aua. ³ Iuaritika kākiti
tiretiniāri Teoso, Teoso imarotari iua.

⁴ Maxinikari nipokori teoso kamakori-
moni sikakori. Aimarotari teoso kākiti
kamakiti !kakamareri. Aimarotari ātika
Teoso atāo inakari aua. ⁵ Aua kākiti
kamakiti. Kākiti takauākatari “teoso”
itxaua. Kākiti takauākatari teoso
iaxiti auakani, īkorapokoriti auakani
apaka. Kaiāopokori ikara atoko inakari
teosoakori aua. Kaiāopokori ikara atoko
inakari auītetxiakori aua. ⁶ Atemoni
ātika Teoso aua. Iua aīri iaxitikiri. Iua
kamari ikinipoko. Aparīkauata iuanoka
īkapani. Ātika aāuīte aua, Xesosi Kristo.
Ikini sereti kamakari iua. Iua posotiireē
aāuini aua.

⁷ Apanakini !imarotapanikari kākiti
kamakiti teoso minakaniua, kotxi mitxi
iteene itotarina teoso kākiti kamakiti.
Ininiā inikasaakirina nipokori teoso
kamakorimoni siākori, iuākatarina ikara
nipokori teoso atāo inakarimoni siākori.
Iuasaaki ninoa uākatari maerekati
ikaminina, kotxi ākixinireēna !iteene
imarotarina atāo inakari. ⁸ Txamari
nipokori !itxikitakaua Teosomoni asini.
Ikara nipokori anikini !imisiritaua.
Apaka !ikamari ereka anini.

⁹ Iuaritika erepaniko. Hinirekiniāri
ikara nipokori hinikini, hīxinikariko
apanakini Teoso sākire poiāonoka
auīākani. Ninoa imarotiniāri hīte
nikiniri ikara nipokori, ininiā ninoa
apaka nikari, txamari iuasaaki ninoa
kamari ākixinirena manirekakiniti.
¹⁰ Teoso sākire poiāonoka auīākari
atamatiniāi Teoso sākire iteene
imarotakari nikiniri nipokori teoso
kamakori misākiretiko aikotiā,
isikataparaxiniretari iua apaka nikiniri
nipokori teoso kamakorimoni siākori.
¹¹ Ininiā pimarore xika, atxiīti pitari
Teoso sākire poiāonoka auīākari sari
imisiritikomoni. Kristo ipina iua īkapani
apaka. ¹² Ikara maerekati hītarimoni

hīkaminiā, hīkarotari ākixinire. Hītari ākixinire hīkarotakasaaki, hīkamari maerekati Kristomoni. ¹³ Ininiā nipokori ninikini txikitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

Teoso Iokanatakini Kākitimoni

9 Teoso iokanatakiti nitxaua. Ninireēkiti niposota nikamini. Naōkitapekari Xesosi Kristo aūiūte. Iparika nikamakasaaki, hīte auikari Apiananiri sākire. ² Atxiīti apanakini !auikari Teoso iokanatakiti nininiua. Hītera auikari Teoso iokanatakiti nininiua. Hītera oerekari Apiananiri iokanatakiti nininiua, kotxi hīte auikari Apiananiri sākire, nota sāpiretakasaakii hīte.

³ Kākiti mauikakaniāri Teoso iokanatakiti nininiua, napakapapiretana ninoā ia atoko: ⁴ Apakata atxiīti aāpakapiniri nipokori, iāriā pakini aparīkauatini ikapani? ⁵ Apakata atxiīti ate anikiniro ātanoro Teoso sākire auīākaro atekata, apanakini Teoso iokanatakini, Apiananiri itariakori, Petro pakini anikinina ninoā itanoro atokotxikana? ⁶ Atxiīti apakata Panapee, nota pakininoka parīkauatini anikakiti aāpakapini ikapani?

⁷ Sotato sikasaaki ineenamauatini ikapani, iuaka !iamotari anikakitina. Aua atxiīti ova takakari. Ova itakakiti matximakati aua? !Auari. Kona auari kema aūiūte piratakari ipira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hiitxikari kema aūiūte nama trikopani ikamakasaaki. Hāuiritariko inikini.

Teoso turetatarī kema aūiūte? Itiretapi-tikari. ¹⁰ Apiata isāpiretari ikara kāk-iti parīkauatakani ikapani. Ininiā takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini. ¹¹ Katarareri takarauatini atokokana, ate takari Teoso sākire hākixinireē. Katarareri nikari ikiena itakakiti, ininiā atxiīti apakata ate apakapiniri kienatxi hīte sikakiti? Kotxi ate parīkauata hīte ikapani. ¹² Apakatinā apanakini apakapiniri iparīkana īki hīte sikakiti, ininiā apiata apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini. ¹³ Himarotari Teoso misākiretiko aikoti āki parīkauatakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina ikapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana īki.

¹⁵ Ikara atāopitikara, iuaritika kona nipaniātari ikara atoko hīkamini. Kona niōkatsopatari ikara, niparīka īki notamoni hīsikini ikapani. Niparīka īki namanainii apisa erekape nipinini. Niuikari niparīkauatini hīte ikapani hītxineirote nimapakapakanisaaki. ¹⁶ Teoso iokanapirena erekari noereka, iuaritika !apakata niuikiniua, kotxi Teoso sikari ia parīkatxi notamoni. Nimisiritiko auapitika, Teoso iokanapirena erekari nimasāpiretakaniā. ¹⁷ Teoso iokanapirena erekari nisāpiretiniāri kākiti, nākixinireē iteene ninirekiniāri ikara nikamini, ininiā napakapapitkariko niparīka īki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini ikapani. ¹⁸ Ia atoko niikitxitiko: Teoso

iokanapirena erekari nisāpiretakasaaki, kona minakati napakapa. Ikara atoko kamapoxokonitari nākixinire, kotxi maikitika nisāpiretai Teoso sākire. Teoso iokanapirena erekari sāpiretakari nitxaua, ininiā niposotiire auapitika hiikitxitinino nota nipaniātiniāi hīte, iuaritika !ninierekari ikara atoko nikamini nota nireēkiti napakapini ikapani.

Parīkatxi Ikinimane Īkapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxikitakaua ikinimane nitiri nininiua, Teoso sākire apikomoni kākiti auikini ikapani. ²⁰ Xoteoakori sauaki nipaṛīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoa auini atokokana nitxa nota auini, kotxi ninirekari Moisesi sākire auiaākani auikiniri Xesosi sākire. ²¹ Xoteo minakanuia !imarotari Moisesi paniātakiti. Ininiā ninoakata nauakasaaki, kona nipaniātari Moisesi paniātakiti ikaminina, Xesosi sākire auikinina ikapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina ikapani. Ikini kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko ikapani. ²³ Ikara atoko nikama Teoso iokanapirena erekari nisāpiretini ikapani. Nikamari ikinipoko, Teoso iokanapirena erekari nisāpiretini ikapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapakari

²⁴ Himarotari mitekaxi. Kākiti miteēkani miteka, iuaritika ātinoka apakapari imitekini īki. Merepitipanika mitekaxi mapotōkire apokakarinnoka apakapari imitekini īki. Ininiā miteēkari atoko hītxako. Hīsapitipo. Teoso paṛīka hīkamapitipo hīpaṛīka īki hāpakapini ikapani. ²⁵ Ikini miteēkari paṛīkauatapitipo iito tapara iteene auini ikapani. !Auiritari iito misiritakari. Ikara atoko ikama, saporiēta imitekini īki apakapini ikapani. Ikara saporiēta kona okanani aua. Oxipokapitikako. Ate paṛīkauatapitipo ātiāo aāpakapakiti aāpakapini ikapani. Ikara aāpakapakiti !ixipoka. ²⁶ Miteēkari isinimoni mimarotakati atoko !nitxaua. Nimarotari nisinimoni. Nisapitipo mitekaxi mapotōkiremoni. Maxikatīka !nineenamauata. Na neenamauata nisanōkakata. ²⁷ Nitxikitakari niito ninitiri ininiua, nota nireēkiti ikamini ikapani, kotxi nisāpiretapekari ikara apanakinimoni, ininiākara kona ninirekari nimapakapaniri notaka paṛīka īki.

Kākiti Isaeokini Aōerekini Pirena

10 Nota nirekari hīxinikiniri kitxakapirīka, aātokiriakorini takanapakasaakiri Exito tixini, ikinika ninoa aua katxiāri patapī. Iua katxiāri oerekana isinimonina. Apaka ikinika ninoa napari potxoari uniti āki. ² Ninoa sari Moisesikata, ininiā katxiāri patapī auakasaakina, potxoari uniti patapī auakasaakina, iuasaaki ninoa patxisatiko atoko aua iuasaaki. ³ Ninoa ikinikana nikari xinitxi Teoso iokanatakiti. ⁴ Ninoa ikinikana iātari āparaā Teoso sikakiti. Ninoa iātari āparaā kai auiteākiriā. Kristo iua kai auite āparaā potorikiniātaā atokokana. Iua sari ninoakata. ⁵ Txamari Teoso

!apokaerekatari kaiāpopokori ninoā, ininiā ipinana. Iītona iarika āparaā makipakaniātaā.

⁶Uatxa axinikana ninoā, ininiā aimarotari amanirekakaniri maerekati ninoā nirekiniri atoko.

⁷!Hīteosonetapiri kākiti kamakiti, ninoā apanakini teosonetiniri atokokana, kotxi Teoso sākire iōkatsopatakori txari: Ninoā topāka inipokotinina ikapani, iātinina ikapani, eereka ōkitikauana isarauatinina ikapani teoso ikamakitina apisatoō.

⁸!Apakata aanokarauatini ninoā apanakini anokarauatini atoko, kotxi āti ōtinokara vītxi tres mio ninoā okaāka ikora maerekati xika.

⁹!Apakata aātamaekatiniri Kristo ninoā apanakini kitxakapirīka atamakaekatiniri atoko, kotxi iua xika imini okana ninoā. ¹⁰!Hītsoatape, ninoā apanakini kitxakapirīka tsoatini atokokana, kotxi eereka Teoso nitiri xipokana ninoā.

¹¹Ikara imisiritikona apoka ninoamoni apanakini pinitiko ikapani. Ikara imisiritikona iōkatsopataāka ate pinitiko ikapani, kotxi itixi mapotōkire ōti apokaāpota. ¹²Hītemoni ereka hinini, ininiā erepaniko, kotxi atxiīti paitiki hīkamari maerekati. ¹³Hīte atamakaerekataāka ikinimane atamakaerekataāka atokotxikana. Iuaritika Teoso !itakanapai hīte. Kona iua auiritari hātamakaerekatiko himamīteenekakinīti. Iuasaaki oerekai himitekini, ininiā hīposotari himīteenekiniri.

Teoso Kākiti Kamakiti

¹⁴Ininiā nitariakori nota tiretakini, himiteka teoso kākiti kamakiti hītakanapini. ¹⁵Hīte kākiti kimarorerini, ininiā iteene himixinikariko nisākire. ¹⁶Iāriā aātakasaaki, akinika aāpotiitakasaakia, axinikari Xesosi

ipinini. Iuasaaki atxari Teoso: “Erekapitikai, kotxi Xesosi arēka xiketa ate ikapani.” Amaxiōpekitaakasaakiri komiri, anikasaakiri, aāpitiitakasaakia, axinikari Kristo ito noropatiko ate ikapani. ¹⁷Iuasaaki itomaneua ate, iuaritika ātika komiri atokokana atxaua. Ātika itotxi atokokana atxaua, kotxi amakinika anikari ātika komiri. Ikara komiri Kristo ito atokokana itxaua.

¹⁸Hīxinikanako kākiti Isaeokini ikorapokoritikini. Ninoā sikari Teoso xinitxi. Eereka ninoā nikari ikara xinitxi. Inikasaakirina ikara xinitxi, iuasaaki ninoā oerekari iTeosonetinirina iua. ¹⁹Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰Iuaritika erepaniko. Ikara atāo maerekati. Xoteo minakanua sikakiti teoso kākiti kamakitimoni ninoā sika Satanasi nitiriakorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²²Atauako anirekatari akaminiri Teoso naiatinua? Ate tapara apiata atxiīti?

Xesosi Auiākani Kamakiti

²³Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini. ²⁴!Hīnitapiriko hīteka nireēkiti hāpakapini. Himoianatariko āti iua nireēkiti apakapini.

²⁵Hīposotari hinikiniri nipokori amotakorīātaā auakari. Iuasaaki kona hīpimaāpiri: “Ia nipokori sikaākapeka teoso kākiti kamakitimoni?” !hītxapeko. Kotxi himarotakasaakiri hinikiniri nipokori

teoso kākiti kamakitimoni sikiko, hākixinire karotaāka atxiīti. ²⁶Teoso sākire sāpiretaua:

Itixi Apiananiri nakiti itxaua, ikinika itixi auakani pakini.

²⁷Xesosi mauīākani aiatakasaakii hīte hinipokotini ninoakata, hinirekiniāri hīsa. Hinikariko isikakītina. Kona hīpimaāpiri: “Ia nipokori teoso kākiti kamakiti sikaākapeka?” kona hītxape, hākixinire himakarotakaniri ikapani. ²⁸Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iuasaaki kona hinikapiri, kotxi atxiīti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

²⁹Na nitxai: “Kona hinikapiri ikara, hīteka ākixinire himakarotakani ikapani,” !nitxai. Nitxai: “!Hinikapiri ikara, āti kākiti ākixinire himakarotakani ikapani.” Nota ākixinireē nota nireēkiti nikamini ikapani erekari. Āti kākiti ākixinireē nota nirekakiti nikamini ikapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auiritakiti?

³⁰Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹Nisāpiretai hīte. Hinikasaaki, hiātakasaaki, ikinipoko hīkamakasaaki, hīkamariko ikinika Teoso ereka inini imarotiko ikapani. ³²Kona hītxīkitakapiri, Xoteoakori, Xoteo minakanua, kākiti Xesosi sākire auīākani pakini kaminiri maerekati.

³³Ninirekari ikinimane kākiti nireēkiti nikamini, ikinika nikamakasaaki. !Ninirekari erekari notanani ikapani. Ninirekari erekari itomaneri ikapani,

imaerekanina Xesosi makatxakini ikapani.

Sitoākini Xesosi Sākire Auiākani

11 Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ²Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴Ininiā kiki ikii māka imamakatzakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. ⁶Okii māka omanirekakaniā, ininiā okisauakaiākotaākako. Opētauatiniā, okii kixākiko xika, oiāko kisauakiko xika, ininiā iuasaaki okii māka otaka.

⁷Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini ikapani. Sito kamaāka oītaniri ereka oerekini ikapani. ⁸Merepitipanika Teoso kona kamari kiki sito iōā. Teoso kamaro sito kiki iōā. ⁹Kiki kona kamaāka sito ikapani. Sito kamaāka kiki ikapani. ¹⁰Ininiā oa takari okii māka. Ikara atoko ininiā, oerekari oauītetiniri oītaniri. Iuasaaki Teoso nitiriakori iaxitikini apaka imarotari oauītetiniri oītaniri.

¹¹Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹²Kotxi sito ina kiki iōā. Eereka ikinipoko kiki iponaniā sito iōā. Ikara atoko itxapitikama, Teoso kamari

ikinipoko. ¹³Hīteka hīxinikapiretari ia: Sito kii māka mauakaniā, iusaaki atāokani Teoso omisākiretini? ¹⁴Kākiti itotakiti oerekaua kiki itanoiākori pētatico. ¹⁵Sito auiniā oiāko paītanori, oōuikari oiāko, kotxi oiāko sikaāka okii ipatakari ikapani. ¹⁶Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auīākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. ¹⁸Merepanika nikenakopiretari hāpotiitakasaakiua Teoso misākiretiko aikotiā hītaparakienatakakiniua. Nixinikari ipixini ikara nikenakopiretakiti atāo inini. ¹⁹Apanakini oerekakiti atāo minakati auapitika hīte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sākire atāo inakari oerekakani. ²⁰Hāpotiitakasaakiua, kona atāo hīkamari kiiniri, Apiananiri ipinini xinikiko kiiniriti. ²¹Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iusaaki. ²²Auapitika haāpoko hinikini ikapani, hiātini ikapani. Hāpotiitakasaakiua, homanatarī apanakini Xesosi sākire auīākani. Hīkamapētatarī aītariakori matiini. Kiripa nitxai hīte? Atxiīti hinirekari niuikini? Kona xatiki niuikai hīte.

²³Apiananiri sāpiretakiti notamoni, iua atokotxikana nisāpiretapakai hīte. Ia nisāpiretai: Īkanōka Apiananiri Xesosi mīkapiritiko ōtisaaki, iua kosekari komiri. ²⁴Iusaaki imisākiretari Teoso: “Erekapitikari ia komiri psikakiti atemoni,” itxa. Iposo

atoko imaxiōpekari iua komiri, sika itxari imoianariakorimoni. Itxana: “Apakapa, nika hītxako. Ia niito okaāka hīte ikapani. Ia komiri hinikasaaki, hīxinikanoko nota. Hīxinikari nipinini hīte ikapani,” itxa. ²⁵Ninoa nipokotaka atoko, mitxi komiri ikosekari atokokana, ikosekari iākoanatxi. Iusaaki itxana: “Ia iākoanatxi oerekari Teoso kamapekari ikamaenetakiti amaneri, kotxi niarēka xiketa hīte ikapani. Ia iāriā hiātakasaaki, hīxinikanoko nota. Hīxinikariko nipinini hīte ikapani,” itxa Xesosi.

²⁶Ia komiri hinikasaaki, ia iākoanatxi iākiri hiātakasaaki, hōerekari Apiananiri ipinini kākiti ikapani. Ikara hōerekiniritika iua ikorapokoriti kanapiriāko.

²⁷Maxikatiika kākiti nikiniāri ia komiri, maxikatiika iātiniāri Apiananiri iākoanaākiri, ikamari maerekati, kotxi !ipaxitari Apiananiri ito, iarēka pakini. ²⁸Ia komiri hinikini apisapanika, ia iākoanatxiākiri hiātini apisapanika, erekari hīxinikiniri hākixinireē auakari. Maerekati auakasaaki, hamanaāri Teoso imaktxakiniri ikapani. Eereka ia komiri hinika, ia iāriā hiāta. ²⁹Maxikatiika hinikiniāri, hiātiniāri, ininiā hīteka akiritari himisiritiko apokini, kotxi kona hīpaxitari Apiananiri ito. ³⁰Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

³¹Amaerekani anitiniā, aamanainiāri Teoso makatxakiniri amaerekani, ininiā amisiritiko kona apoka. ³²Txamari Apiananiri apokiniāri amaerekani, imisiritaua ate uatxa, amaerekani atakanapini ikapani, ininiā eereka !imisiritakaua iua sākire mauīākanikata.

³³Ininiā nitariakori, hāpotiitakasaakiua Xesosi ipinini xinikiko kiiniriti ikapani, hiātapana apanakini. ³⁴Hinatxitiniā, hinipokotako haāpoko. Ininiā hāpotiitakasaakiua !hīkamari

maerekati, ininiā Teoso !imisiritai. Apikomoni nōtākikai ereē napokasaaki.

Erekari Matamatakoti Sikakiti Kākitimoni

12 Nitariakori, ninirekari himarotiniiri Erekari Matamatakoti sikakiti. !Apakata himimarotakaniri. ²Mitxi Xesosi sākire mauīakani hinakasaakiua, himisrienetaāka, ininiā hāuikari teoso kamakori masākireti teoso atāo inakari ininiu. Ikara himarotape. ³Kākiti sāpiretiniāi hīte: “Maerekati kamakari itxaua Xesosi,” ininiā iusaaki himarotari Erekari Matamatakoti !uari iuamoni. Kākiti sāpiretiniāi hīte: “Apiananiri itxaua Xesosi,” ininiā iusaaki himarotari Erekari Matamatakoti auapitika iuamoni, kotxi ikara iua oerekakiti.

⁴Erekari Matamatakoti siākiti ikini sereti aua, iuaritika Erekari Matamatakoti ātinoka aua. ⁵Ikini sereti parīkatxi Teoso ikapani aua, iuaritika Apiananiri ātinoka aua. ⁶Ikini sereti Teoso kamakiti aua kākiti ikapani, iuaritika Teoso ātinoka aua.

⁷Erekari Matamatakoti iuaka oerekaua kākitimoni, ikinimane ereka inini ikapani. ⁸Iua Erekari Matamatakoti sikari apanakinimoni isākire kiīkiterini ininiuana ikapani. Iua Erekari Matamatakoti sikari apanakinimoni isākire kimarorerini ininiuana ikapani. ⁹Iua sikari apanakinimoni Teoso sākire iteene auikinina ikapani. Isikari apanakinimoni amianatakani imakananitinina ikapani. Erekari Matamatakoti ātinoka aua, iuaritika ikini sereti isika kākitimoni. ¹⁰Apanakini isikaposotiireta posotiiretxi ikaminina ikapani. Apanakini isikaimaroreta Teoso sākire isāpiretinina ikapani. Apanakini isikaimaroreta Erekari Matamatakoti sākirauatakasaaki imarotinina

ikapani, maerekati matamatakoti sākirauatakasaaki imarotinina ikapani apaka. Apanakini isikaimaroreta ikini sereti kākiti sākire isākiretinina. Apanakini isikaimaroreta ikara sākiretxi mimarotakoti ikenakotakasaakina, isāpiretinirina iua kenakotakani ninoa sākireē ninoa apaka imarotiniri ikapani. ¹¹Ātinoka Erekari Matamatakoti aua. Iuanokara parīkauata ikara atoko. Isikari ikara isikakiti kākitimoni inireēkiti iaōka.

Kristo Īto Pirena

¹²Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. Itori ikara atoko inakari aua ĩtotxiā, iuaritika ātinoka ĩtotxi aua. Iua atokokana itxa Kristo ĩto. Xesosi sākire auīakani Kristo ĩto atoko itxauana. ¹³Atxiīti Xoteoakori atxaua. Atxiīti Xoteo minakaniua atxaua. Atxiīti nitiritxi amotakoni atxaua. Atxiīti nitiritxi minakatiua atxaua. Iuaritika ātika ĩtotxi atoko atxaua, kotxi Erekari Matamatakoti ātinoka inakari apoka atemoni. Iua apotiitaua ātika ĩtotxi atoko anini ikapani. Iua aua aākixinireē.

¹⁴Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. ĩtotxiā kaiāopokori aua. ¹⁵Ininiā !apakata kitītxi sāpiretiniā: “Uakōtxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kitītxi. ¹⁶Kenakokitxi sāpiretiniāri: “Okītxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kenakokitxi. ¹⁷Ītotxi okītxinoka auiniā, kanatokopa itxa kākiti kenakorauatini? Ītotxi kenakokitxinoka auiniā, kanatokopa itxa kākiti imixikarauatini? ¹⁸Teoso kamari ikinika ĩtotxiā auakari. Iua inireēkiti iaōka ikaminana ninoa. ¹⁹Ātinoka ĩtotxi auakiti auiniā, ĩtotxi

!auari. ²⁰Ītotxiā auakani itori aua, iuaritika ĭtotxi ātinoka aua.

²¹Okītxi kona posotari isāpiretiniri uakōtxi: “Kona nota nirekai pite.” Apaka kītxi kona posotari isāpiretiniri kitītxi: “Kona nota nirekai pite.” ²²Kona ikara atoko itxa. Atxiīti auākatari āti aīto auakari !itxa, kotxi !kataparari, iuaritika ikara mauakaniā, aīto !iparīkauata atāo. ²³Kākiti tīretari iītoā auakari poiāori kākiti atamatakiti. Ipatari apanakini iītoā auakari kākiti matamatakani ĭkapani. ²⁴Aītoā auakari apiata apotxi-takiti aua apaka. Kona apatari ikara. Apanakini aītoā auakari Teoso takari aītoā iteene apaxitini ĭkapani. ²⁵Ininiā Teoso kamari ĭtotxi ātinoka inini. Ika-mari ĭtotxiā auakani itiretakiniuana ĭkapani. Apanakini ĭtotxiā auakari naia-tiniāri apanakini iītoā auakari, !apakata. ²⁶Āti ĭtotxiā auakari tsiīka. Iuasaaki ikinika kākiti iīto atatsiirauata. Āti ĭtotxiā auakari iuikaāka, ininiā ikinika ĭtotxi auakini poxokoniuaata.

²⁷Kristo iīto atoko hītxaua hīte. Ītotxiā auakani atoko hītxaua Kristo iītoā. ²⁸Teoso sākire auīākani ĭtotxiā auakani atoko itxauana. Ikinini sereti parīkatxi aua ĭtotxi ĭkapani akamini ĭkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakinini sākiretakani pakini. Teoso takari ikara atoko inakani parīkauatakani iua sākire auīākani imoianatinina ĭkapani. ²⁹Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰Kona ikinimaneni

amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakinini. Ikinimane !iposotari isāpiretiniri ikara sākiretxi iua kenakotakanimoni ninoā sākireē ninoā apaka imarotini ĭkapani. ³¹Auapitika ikara Erekarī Matamatakoti sikakiti aparīkauatini ĭkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

Tiraōkitxi Pirena

13 Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ²Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakinini. Atxiīti ikinipoko imaroretxi aua notamoni. Atxiīti iteene naukari Teoso posotiire, ininiā niposotari oītanoxiratari nīpaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari nīto arikiko. Txamari iuasaaki nitiraōkiuatini !auari, ininiā !apakata.

⁴Pitiraōkiuatakasaaki, pīposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari

maerekati apanakini kamakiti pitemoni. ⁶Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakari pikenakotakasaaki. ⁷Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, !katimari pitakanapiniri piparīka pikamini. ⁸Tiraōkitxi !xipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹Kotxi poiāonoka aimarore. Poiāonoka Teoso sākire aimarota asāpiretini. ¹⁰Āti ōti aimarotari ikinipoko atāo inakari. Iuasaaki atāo minakati !auaika. ¹¹Amarini ninakasaakiaua, nisākiraauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiaua, !ninarekaikari amarini atokokana nininia. ¹²Uatxa aātamatakiti Teoso oerekakiti !aposota iteene aātamatinī. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

Erekari Matamatakoti Siākiti

14 Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata

hinirekariko iua sikinii Teoso iokanapirena hīsāpiretini. ²Kākiti sākire mimarotakoti sākiretakari misākiretari Teoso. !Misākiretari kākiti, kotxi kākiti !imarotari isākire. Erekari Matamatakoti posotiireē isāpiretari atāo inakari Teoso oerekakiti. ³Teoso sākire sāpiretakaripekana misākiretari kākiti. Iua txikitakari kākiti apiata auikiniri Teoso sākire. Isikataparaxiniretana ninoa. Imīkapiritari ninoa ākixinire. ⁴Kākiti sākire mimarotakoti sākiretakari, iuaka txikitakaua apiata auikiniri Teoso sākire. Teoso sākire sāpiretakaripekana, txikitakari ikinika Xesosi sākire auiākani apiata auikinirina Teoso sākire. ⁵Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniri ikapani, iuasaaki erekari, kotxi iuasaaki itxikitakari Xesosi sākire auiākani apiata auikiniri Teoso sākire. ⁶Hītemoni napokasaaki, nisākiretiniāri kākiti sākire mimarotakoti, nitxikitakatai hīte apiata hāuikiniri Teoso sākire? Konapitini. Ininiā kona itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini ikapani, iuasaaki nitxikitakai hīte apiata hāuikiniri Teoso sākire. ⁷Maxinikari xikari moianatakari atxiīti viorāo, atxiīti xōkakori pakini. Kākiti mimatireni kaminiāri ikara, iuasaaki xikari atāo inakari !imarotaāka. Ienenoka aua.

⁸Ātipekana noerekai. Trōpeta ene atāo ininiā, sotatoakori kenakotakasaakiri, aiamatana ineenamauatini ikapani. Trōpeta ene na atāo ininiā,

sotatoakori !imarotari neenamtxi manapipe inini.

⁹Iua atokokana kākiti sākire imarotakiti himasākiretakaniā, kiriāpa ninoa imarotari hīsāpiretakiti? Ikara atoko hīsākirauatiniā, maxikatiika hīsākirauata. ¹⁰Itori uākati sākire aua ikini itixiti. Apakata ikinika imarotiko. ¹¹Kākiti sākire nimimarotakaniā, ininiā notamoni iua āti tixinikiri atoko itxa. Apaka iuamoni nota āti tixinikiri atoko nitxa. ¹²Hīte iteene nirekari Erekarī Mata-matakoti siākiti hāpakapini, ininiā apiata hinirekariko isikinii isikakiti Teoso sākire auiākani iua sākire iteene auikinina ikapani.

¹³Ikara atoko ininiā, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotiniiri ikapani. ¹⁴Teoso nimisākiretiniā kākiti sākire mimarotakotiā, nixinire misākiretari Teoso, txamari !imarotari notaka sākire. ¹⁵Ininiā kipa atāo nikamini? Ia atāo: Nimisākiretari Teoso nixinireē. Apaka nimisākiretari Teoso nīkīteē. Nixikarauata nixinireē. Apaka nixikarauata nīkīteē. ¹⁶Kākiti sākire mimarotakotiā hīsāpiretiniāri Teoso ereka inini, kākiti ereē pisākire mimarotakani sauaki, !iposotari “atāopitikara” inini, kotxi !imarotari pisāpiretakiti. ¹⁷Atxiīti atāo hīsāpiretiniri Teoso ereka inini, txamari iusaaki kona pitxikitakari iua kākiti apiata auikiniri Teoso sākire.

¹⁸Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiā. Poiāonoka hīte imarotari kākiti sākire mimarotakotiā himisākiretiniri iua. ¹⁹Iuaritika, Xesosi sākire auiākanikata nauakasaaki, apiaerekata nisāpiretinina sikonoka sākiretxi ninoaka sākireē, kotxi apakata ninoa imarotiniiri

nisākire. Niposotiniāri siko mio sākiretxi kākiti sākire mimarotakotiā nisāpiretiniri kākiti, itori nisākire, iuaritika maxikatiika nisākirauata, kotxi kākiti !imarotari.

²⁰Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atokotxikana amarini xapitikiri atoko !hīkamapiri maerekati ātimoni. Aneēkari imarore atoko itxako hīte imarore. ²¹Teoso sākire iōkatsopatakori txari:

Niokanatarī āti uāka hītemoni, hīte nimisākiretini ikapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²²Ininiā Teoso sākire auiākari sākiretiniāri Teoso sākire mauīākani sākire, iua mimarotakiniti, Teoso sākire mauīākani iusaaki imarotari Teoso posotiire. Teoso sākire auiākari sāpiretiniāri Teoso sākire apanakini Teoso sākire auiākanimoni, ninoa iusaaki imarotari Teoso posotiire. ²³Teoso sākire auiākani apotiitiniāua, ikinimane sākiretiniāri kākiti sākire mimarotakotinani, iusaaki kākiti Teoso sākire poiāopanika imarotakari iroiniā, Teoso sākire mauīākati atxiīti iroiniā, ininiā iua uākatai hīte mapitxiritakani hininiua.

²⁴Txamari ikinimane sāpiretiniāri Teoso sākire iusaaki, Teoso sākire mauīākati iroiniā, kākiti Teoso sākire poiāopanika imarotakari iroiniā, ininiā iua imarotari maerekati kamakari ininiua. Iusaaki imarotari imisiritiko auapitika āti ōti. ²⁵Iusaaki ikinimane imarotari iua xinikakiti ākixinireē. Ininiā iusaaki ikapotoreēkaua Teoso apisatoō. Itxari: “Atāopitikara Teoso aua hīte sauaki,” itxa.

Kākiti Apotiitakasaakia Teoso Apisatoō

²⁶ Nitariakori, kanatokopa itxa Teoso sākire auiākani apotiitakasaakia? Aāpotiitakasaakia, akinika aminari xikari Teoso ikapani. Akinika iposope Teoso sākire aōerekini atāo aimarotini ikapani. Akinika iposope Teoso oerekakiti asāpiretini. Akinika iposope iua sāpiretakiti asāpiretini ikinimane imarotini ikapani. Ikara atoko itxa aāpotiitakasaakia Teoso apisatoō. Iuasaaki makamari ikinika, Teoso sākire Teoso nakitiakori apiata auikini ikapani. ²⁷ Iuasaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiīti ipi āti pakini kamari ikara atoko inakari. !Apakata apikomoni kākiti sākiretini kākiti sākire mimarotakoti iuasaaki. Āti sākirauatakasaaki, apanakini kenakotari. Ātinoka sākirauata iuasaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotini ikapani. ²⁸ Iuasaaki isākire sāpiretakari mauakaniā, !apakata kākiti sākire mimarotakoti sākiretakari sākirauatini. Erekarī ākixinireē isākirauatini Teosokata.

²⁹ Kākiti apotiitakasaakia Teoso apisatoō, iuasaaki ipi, atxiīti ipi āti pakini Teoso sākire sāpiretakani sāpiretariko Teoso sākire. Iuasaaki apanakini xinikariko iua sāpiretakiti, atāo inini imarotini ikapani. ³⁰ Topākakari xinikasaakiri apikomoni Teoso oerekakiti, ininiā iuasaaki sākirauatakari iotoka, Teoso oerekakiti topākakari sāpiretini ikapani. ³¹ Ikara atoko ininiā ikinimane posotari Teoso sākire isāpiretinina. Teoso sākire sāpiretakani āti sākirauata, eereka āti

sākirauata. Ikara atoko itxaāpotana. Ininiā ikinimane oerekaākako. Ikinimane sikataparaxiniretaākako. ³² Teoso sākire sāpiretakani posotari iātapiniri Teoso oerekakiti isāpiretini ikapani. ³³ Kotxi Teoso kona potxitari ienenoka auini. !Apakata kaiāopokori sākirauatini, kotxi apanakini !imarotari ninoa sāpiretakiti. Neenamati atoko itxa. Teoso nirekari inakitiakori kamakiti atāo inini apotiitakasaakia iua apisatoō.

³⁴ !Apakata sito sākirauatini hāpotiitakasaakia Teoso apisatoō. !Auiritaāka osākirauatini iuasaaki, kotxi Teoso sākire iōkatsopatakori paniātaro sito kaminiri kiki paniātakiti. ³⁵ Ninoa nirekiniāri ipimarauatinina imimarotakinini imarotini ikapani, ininiā ninoa pimaāna itanirina aapokona apokasaakina. Sito sākirauatiniā kākiti apotiitakasaakia Teoso apisatoō, kākiti pētauata oa sākirauatini xika.

³⁶ Hīte kona apokaerekatatari nisāpiretakiti? Atxiīti hīte kamari Teoso sākire? Konapitini. Atxiīti Teoso sākire iokanataāka hītenanimoni? Konapitini.

³⁷ Teoso sākire sāpiretakani hininiāua, Erekarī Matamatakoti siākiti auiniāi, ininiā iuasaaki himarotari ikara nisākire niōkatsopatakiti Apiananiri paniātakiti inini. Hīsāpiretariko hāuikiniri ikara. ³⁸ Himamaākatakaniāri ikara nisākire, apanakini !imaākatari hīte sākire.

³⁹ Ininiā nitariakori, iteene hinirekariko Teoso sākire hīsāpiretini. Apaka hāuiritariko kākiti sākire mimarotakoti sākiretiko. ⁴⁰ Ininiā hīkamari ikinika atāo hāpotiitakasaakia Teoso apisatoō, Teoso sākire ikinimane kenakotini ikapani.

Xesosi Ōkitikiniua Pirena

15 Nitariakori, uatxa iuaīkana ninirekari hīte xinikiniri

Teoso iokanapirena erekari hītemoni nisāpiretakiti. Hīte apakapapekari ikara nisāpiretakiti. Hīte iteene auikari ikara. ²Ikara Teoso iokanapirena erekari oerekai himaerekani makatxakiko. Ininiā atāo hīxinikariko ikara nisāpiretakiti. Itene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatiūka hāuikari. ³Nisāpiretapekai mitxi nota apakapakiti, kotxi ia himimarotakaniā !apakata. Ia napakapakiti: Kristo ipina amaerekani imaktxakini ikapani. Teoso sākire iōkatsopatakori sāpiretaua ikara. ⁴Eereka ikataāka. Ipi ōti, āti ōtisaaki iuaīkana ōkitikaua. Teoso sākire iōkatsopatakori sāpiretaua ikara. ⁵Eereka Petro atamatarī iua. Eereka ikinika Kristo moianariakori atamatarī iua. ⁶Eereka kiētosi aītariakori atamatarī iua āti ōti apotiitakasaakiuana. Kaiāopanikani ninoa auapanika. Ātikaka ipīpe. ⁷Eereka Txiako atamatarī iua. Eereka ikinika Xesosi iokanatakini atamatarī iua. ⁸Imapotōkire nota apaka atamatarī iua. !Natamatarī Xesosi ikorapokoriti itipokotakasaaki. Eereka iua apoka notamoni.

⁹Xesosi iokanatakiti poiāori nitxaua. Apanakini iua iokanatakini apiata. Mitxi !erekari nikamakiti, kotxi nimisiritana Xesosi sākire auīākani Teoso nakitiakori, iuaritika Xesosi akiritano iua iokanatakiti nininiua. ¹⁰Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona maxikatiūkani isikari ikinipoko erekari notamoni, kotxi iteene niparīkauata Teoso ikapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni niparīkauata. Ikinipoko erekari Teoso sikakiti notamoni sikaposotiiretano

nota niparīkauatini ikapani. ¹¹Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹²Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? “!Auari ipīkani iuaīkana ōkitikiniua,” hītxa. ¹³Ipīkani iuaīkana ōkitikiniua mauakaniā, ininiā Kristo apaka kona ōkitikaua. ¹⁴Kristo mōkitikakaniāua, ininiā maxikatiūka asāpiretai iua sākire. Kristo mōkitikakaniāua, maxikatiūka hāuikari iua sākire. ¹⁵Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶Kotxi ipīkani iuaīkana mōkitikakaniāua, Kristo apaka kona ōkitikaua. ¹⁷Kristo iuaīkana mōkitikakaniāua, maxikatiūka hāuikari iua sākire, kotxi !imaktxakari himaerekani. ¹⁸Kristo iuaīkana mōkitikakaniāua, ipīkani iua sākire auīākani pīpinanaka. ¹⁹Xesosi mōkitikakaniāua, iuaritika ikiniōtika ate auikari iua sākire ikorapokoriti aūakasaaki, ininiā mīkiteni apiarini atxaua ate.

²⁰Ikara na atāo. Uatxa maxinikari atāo inakari. Kristo ipikaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apīkasaaki ate apaka ōkitikaua. ²¹Āti kiki kamakitiā ipīkitxi apoka ikinimanemoni. Iua atokokana āti kiki kamakitiā, ipīkani ōkitikiko apoka. ²²Adāo kamakitiā ikinimane ipina. Kristo kamakitiā iua sākire auīākani auapiniika ātipirika. ²³Kākiti ōkitikaāka ia atoko. Kristo

mitxi ōkitikaua. Iua merepanika ōkitikakariua. Ikanapiriākasaaki iua nakitia kori ōkitikauako apaka.²⁴ Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitia kori isika iri Teosomoni.²⁵ Kristo ikinimane auīte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa.²⁶ Imokaiakari atoko itxa ipīkitxi. Imokaiakariakari ixipokasaaki, imapotōkire ixipokari ipīkitxi.²⁷ Teoso sākire iōkatsopata kori txari: Teoso takapekari ikinika iua kiti patapi. Ikara Teoso sākireē “ikinika” aua, iuaritika aimarotari iuaka !itakaua Xesosi kiti patapi, kotxi Teosora txīkitakari Xesosi ikinimane auīte ininiua.²⁸ Kristo ikinimane auīte inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auīte ininiua. Iuasaaki Teosonoka ikinimane auīte itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikiniua ikapani?³⁰ Atepekana, ipīkani mōkitikakaniāua, kinirepa ikiniōtika amīteenekari monōkori?³¹ Nitariakari, nimarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aāuini aāuīte Kristo Xesosikata.³² Uai Épeso sitatxitā kākiti ākiti kaneenamari atoko inakani nirekari imaikinino nota. Ipīkani mōkitikakaniāua, kinirepa nimīteenekari ikara atoko inakari? Ipīkani mōkitikakaniāua, ininiā atxari: Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua.³⁴ Himerekako. Himarotariko atāo inakari hīkamini ikapani. Maerekati

!hīkamapinikako. Hīpētauatako, kotxi apanakini hīte !imarotari Teoso.

Kākiti Īto Ōkitikasaakiua

³⁵ Atxiīti āti txari: “Kanatokopa itxa kākiti ōkitikiko? Iuasaaki kanatokopa inakaripa iīto?” itxa.³⁶ !Kiīkiteri kākiti pimarauatini ikara atoko. Takariki, pimatakakaniāri kipatxi āki !ipitxaka.³⁷ Pitakarauatakasaaki, pitakari okinoka, atxiīti triko, atxiīti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni.³⁸ Teoso kamari takari pitxere inireēkiti iaōka. Ikini takariki Teoso sikari ipitxere.³⁹ Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni.⁴¹ Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴² Iua atokokana itxa ipīkani iuaīkana ōkitikikosaaki. Ītotxi ixiti taākori !auaika. Iua ōkitikakari kona ipinaika.⁴³ Ītotxi katikosaaki, !erekari. Ītotxi iuaīkana ōkitikikosaaki, peerekari. Ītotxi katikosaaki !kataparari. Iuaīkana ōkitikikosaaki, kataparari.⁴⁴ Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi ĩkorapokoriti aāuini ikapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi !ipina.⁴⁵ Teoso sākire iōkatsopata kori txari: Teoso txīkitakari kiki merepitipanika auakari Adāo inakari auāki inini.

Adāo imatonōkari auakari, Kristo inakori, txīkitakari kākiti auāki inini, apaka imapinakani ikapani.

⁴⁶Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹Aponaniākasaaki, kipatxi kamakori aīto, Adāo īto atokokana itxa aīto. Iua atokokana Teoso tixinekiri īto, Kristo īto atokokana itxako aīto.

⁵⁰Nitariakori, nisāpiretai hīte, !apakata kākiti īto, iarēka pakini sini Teoso auītetxi ininiātaāua. Ipinakari kona auapininiika !itxa. ⁵¹Hīkenakotariko nisākire. Nisāpiretaiko kākiti mimarotakiniti mitxi. Kona ikinimaneni ipina. Iuaritika amakinika txīkitakaāka ipinipo aniniua. ⁵²Iusaaki imapotōkire trōpetakero xōkaāka. Iusaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iusaaki ipīkani ōkitikaāka. Kona ipinaikanako. Iusaaki atxīkitakaāka ipinipo aniniua. ⁵³Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. ⁵⁴Arakakani txīkitakikosaaki miarakakani ininiua, apaka ipīkani txīkitakikosaaki mipīkani ininiua, iusaaki Teoso sākire iōkatsopatakori apopeka. Ia atoko itxa Teoso sākire kitxakapirīka:

Ipīkitxi xipokaākako. Auape kāiatakari, ipīkitxi xipokakari.

⁵⁵Ipīkitxi tsii !auaika. Maerekani misiritikoātaā anikakari kona kāiata.

⁵⁶Ipīkitxi tsii mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekantxi tapara aua, kotxi Teoso paniātakiti iōkatsopatakori auapitika. ⁵⁷Erekapitikari Teoso, kotxi aūūite Xesosi Kristo txīkitakaua akāiatini.

⁵⁸Ikara atoko ininiā, nitariakori nota tiretakini, kataparaxinire hītchako. Kona hāuiritapiri apanakini txīkitakinii maerekati hīkamini. Hīparīkauatako ikiniōtika Apiananiri ikapani, kotxi himarotari maxikatīka !hīparīkauata iua ikapani. Hīparīka īki hāpakapapitikako.

Txineiro Sikiko Xesosi Sākire Auiākani Ikapani

16 Uatxa nisāpiretai txineiro himakatzakini Teoso nakitiakori ikapani. Hīkamariko Karásia tixini auakani nipaniātini atokotxikana. Nipaniātana ninoa Teoso misākiretikoātaā apotiitakaniua ia atoko: ²Ikini Tomīko hīkinika hīte nīkataro txineiro ninoa ikapani. Txineiro Teoso siākiti iaōka, hinīkataro ipixini ninoa ikapani. Ininiā ereē napokasaaki apikomoni txineiro kona apotiitaāka. ³Napokasaaki ereē, niokanataro kākiti, txineiro hīsikakito anikakani Xerosareēmoni. Hīsāpiretano hīokanatsopatakitiā himereēkini hītchineirote anikakani ikapani. ⁴Atxiīti erekari nota sini apaka, ininiā ninoa moianatano nota.

Paoro Paniātakiti Pirena

⁵Masetónia tixinimoni nisako, eereka napoka hītemoni, kotxi nisapitikako Masetóniamoni. ⁶Iusaaki atxiīti nikaikota hītekata. Atxiīti nikaikota mitaāsaaki hītekata. Ininiā eereka hīte posotari himoianatinino nota naiamatakasaaki apikoxiti nisini

īkapani. ⁷ Kona ninirekari mapaōtinoka nikaikotini hītekata uatxa. Apiananiri auiritiniāno, ninirekari apikomoni nikaikotini hītekata. ⁸ Txamari nikaikota uai Épeso sitatxiti Pētekósitxi kiiniriti manapi ōti. ⁹ Kotxi uatxa kaiāopokori kākiti ikorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti !nirekano.

¹⁰ Atxiiti Tximótxio sari hītemoni, ininiā hāpakapariko iua, imapīkarau-atakani īkapani hīte sauaki, kotxi iua parīkauata Apiananiri īkapani nota parīkauatini atokokana. ¹¹ Ininiā kona apakata kākiti mamaākatakaniri iua. Ikanapiriākasaaki notamoni, iusaaki hīokanataru iua erekaxinire inini. Niātapari iua aītariakorikata.

¹² Iteene ninirekari aītari Aporo apokini hītemoni aītariakorikata. Txamari uatxa !nirekari isini hītemoni, iuaritika iposotakasaaki isapitikako hītemoni.

¹³ Araōkire hītxako. Iteene hāuikariko Teoso sākire. Hītaparaxinireritika hāuako. Hītapararitika hāuako Teoso īkapani. ¹⁴ Xesosi tiraōkiā ikinipoko hīkamako.

¹⁵ Hīte imarotari Esitépana, inirimane pakini. Ninoa Akaia tixini auakani. Iuaā-taā ninoa merepitipanika auikari Xesosi sākire. Ninoa iteene parīkauata

Teoso nakitiakori īkapani. Nitariakori, iteene nipaniātai hīte. ¹⁶ Hīkamariko kākiti ikara atoko inakani paniātakiti. Hīkamariko ikinimane amoianari paniā-takiti, atekata parīkauatakani paniā-takiti. ¹⁷ Esitépana, Potonato, Akaiko pakini apokasaaki uai, nipoxokoniuata, kotxi iminarina notamoni mauakati hīte masakakiniti. ¹⁸ Ninoa sipapoxokonitari nākixinire, hīte ākixinire apaka. Erekari ate iuikiniri kākiti ikara atoko inakani.

¹⁹ Teoso misākiretikoātaā apotiitaka-niua Ásia tixini auakani xinikamanapitai hīte. Ákira inakori, Pirisira inakoro pakini iteene xinikamanapitai hīte, kotxi Apiananiri nakiti hītxaua. Apaka Xesosi sākire auiaākani ninoa aapoko apoti-itakaniua xinikamanapitai hīte. ²⁰ Ikinimane aītariakori uai auakani xinikamanapitai hīte. Haōkitakakasaakiua, himaratakakauako, kotxi Teoso nakitiakori hītxaua.

²¹ Nota Paoro iōkatsopatari ia nitakapiretanapini niuakoā. ²² Kākiti matiretakaniāri Apiananiri Xesosi Kristo, maerekati takaāka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ikinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameē.

2 KORĪTO

Paoro Iokanatsopatakiti Iuaīkana Korīto Auakanimoni

1 Nota Paoro, Xesosi Kristo iokanatak-itino. Teoso nirekari iokanatinino kākitemoni isäkire nisäpiretini ikapani. Ia aätsopa niökatsopata. Aītari Tx-imótxio aua notakata. Ia iökatsopari niokanata kākiti Teoso mereėkinimoni, Korīto sitatxiti auakanimoni. Apaka ia iökatsopari niokanata kākiti Teoso naki-tiakorimoni, Akaia tixini auakanimoni. ²Aīri Teoso, Xesosi Kristo Apiananiri pakini sikari ikinipoko erekari hītemoni. Ikamaerekaxiniretai hīte.

Teoso Mīkapiritiniua Pirena

³Peerekari Teoso. Aāuīte Xesosi Kristo iri itxaua. Kaamonīkareri iua. Āti kākiti amonīkakari iua atoko inakari !auari. Amaerekaxinirensaaki, iua atekata aua. Amaerekaxinireni imaktxakinaua. Iuasaaki imīkapiritaua. ⁴Imīkapiritaua amaerekaxinirensaaki, ininiā apanakini maerekaxinirensaaki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶Apanakini misiritaua, kotxi anirekari Teoso mīkapiritini hīte. Anirekari Teoso maktxakiniri himaerekani. Teoso mīkapiritaua ate, ininiā hīte apaka imīkapirita. Teoso mīkapiritakasaakii hīte, isikataparatai himisiritiko hīpoxokoniritika himīteenekini ikapani. Hīte misiritiko ate misiritiko atokokana. ⁷Aimarotapitikari erekari Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸Aītariakori, anirekari hīxinikiniri ate misiritiko Ásia tixini aūakasaaki. Iuasaaki iteene amaxikaāka. Kona amīteenekari. Auākatari aōkiko. ⁹Iuasaaki aākixinireē atxa: “Apinapitakako,” atxa. Ikara atoko ininiā, aimarotari kona ate posotiire !auari. Aimarotari Teosonoka sikataparataua, kotxi iua posotari ōkitikiniri ipikari. ¹⁰Pamonōkoniri iuasaaki, iuaritika Teoso maktxakaua amapinakani ikapani. Iua maktxakapanikaua amapinakani ikapani. Ate auikari iua sākire, iuaīkana imaktxakiniaua tīkane. ¹¹Hīte moianataua ate, kotxi himisākiretari Teoso ate ikapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ikapani.

Paoro Masikani Korītomoni

¹²Ate poxokoniua, kotxi ate kamari erekarinoka Teoso oerekakitinoka, kākitemoni, hītemoni apaka. Atāonoka anireka akamini kākitemoni. Aimarotari ikara aākixinireē, ininiā apoxokoniua. Ikara atoko aūuini, kotxi ikinipoko erekari Teoso sikakiti sikataparataua. Kākiti imaroreē !iposotari ikaminiri iua auini ereka inini, kotxi !kiūkiteri kākiti. ¹³Hātatsopatakasaakiri aiökatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴Hīte na iteene imarotapanikaua ate, iuaritika ninirekari hīuikinua ate, Apiananiri Xesosi uai ikanapiriini ōtisaaki, ate iuikinii atokotxikana. ¹⁵Ikara nimarota, ininiā ninirekamari hītemoni nisini, ipikata hīpoxokoniuatini ikapani. ¹⁶Masetónia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni,

ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotéia tōpamoni. Txamari na nisa. ¹⁷Atxiīti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitikari napokini hītemoni. Na nota xinikari Teoso sākire mauīakani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākirauatakarari imarotari ikara nisākire atāo inini. ¹⁹Sírasi inakori, Tximótxio inakori, nota pakini sāpiretapekai hīte Teoso ākiri, Xesosi Kristo sākire. Xesosi sākire inamaā auakari, isākire ākixinireē auakaritxikana isākireta. “Nikamapitikariko,” inakasaaki, ākixinireē inirekapitikari ikaminiri. Ikamari isākire iaōka. ²⁰Teoso sikaenetakiti kākitemoni kaiāopokori aua. Iua Kristo sikaua ikinipoko Teoso sikaenetakiti, ininiākara atxari: “Ameē.” Peerekari Teoso, kotxi Kristo sikapitika Teoso sikaenetakiti. ²¹Teosokara sikataparaxiniretai hīte, ate apaka, Xesosi Kristo amatakanapakani ikapani. Teosokara mereēua iua nakitiakori aniniua ikapani. ²²Apaka Teosokara sikaua Erekarari Matamatakoti, Teoso nakiti aniniua aimarotini ikapani. Iua Erekarari Matamatakoti aua aākixinireē. Teoso takaōtxikare itxaua iua. Iua Erekarari Matamatakoti merepitipanika Teoso sikakiti atemoni, ininiā aimarotari apikomoni isikapanikaua itanapoko inīkatakiti ate ikapani.

²³Kona nisari hīte Korīto sitatxiti auakanimoni, kotxi kona ninirekari hīte matinaniuatini hīte maerekani nisāpiretini xika. Teoso imarotari ikara

atāo inini. ²⁴Hīauīte kona ate txaua. Kona apaniātai: “Ia atoko inakari hāuika. Kona ikara atoko inakari kona hāuikape.” Kona ikara atoko !atxai hīte, kotxi hīte auikapitikari Teoso sākire atāo inakari. Aparīkauata hītekata hīpoxokoniuatini ikapani.

2 Nākixinireē nitxari: “Na nisa iuaīkana ninoamoni nikamamatinanitinina ikapani.” ²Nota xika maerekaxinirenenoka hininiā, kiripa kamapoxokinitano nota? Hitenoka aua nota kamapoxokonitakani. Ininiā kona nota nirekari maerekaxinireni hinini nota xika. ³Kona ninirekari hītemoni napokini, maerekaxiniretikano ninini, hīte maerekani xika, ininiākara nota iokanatsopatari ikora mitxi niōkatsopatakiti hītemoni ereē napokini apisapanika. Kotxi nikamapoxokonitakini hītxaua hīte. Nimarotari ia. Nota nienenīkasaaki, hīte himakinika enenīka apaka. ⁴Niokanatsopatari ikora niōkatsopatakiti hītemoni, kotxi himaerekani xika maerekaxiniretinoka nitxa. Nitxiapata. Niokanatsopatari ikora niōkatsopatakiti hītemoni, iteene nitiretinii himarotini ikapani. Na ninirekari nikamamatinanitinii.

Maerekanitxi Maxinīkaretiko

⁵Iua kiki maerekati kamakari maerekaxinireti txīkitakano. Iua apia maerekaxinireti txīkitakai hīte, maerekati ikamini xika. Na iteene ninirekari nitxitiniri iua. ⁶Uatxa atokopeka homanatiniri. Iua txitaākapeka imaerekani xika. ⁷Uatxa himaxinīkaretariko maerekati ikamakiti, ininiā hāpakapariko iua. Himisākiretariko iua. Hīkamapoxokonitari iua. Ikara atoko himinakaniāri, iua kona erekaxinireri. Ikara atoko himinakaniāri, atxiīti itakanapari Teoso kimapore. ⁸Ininiākara nota otākikai hīte nitapararitika. “Atiretapitikai,”

hītchariko iua, hītiretiniri imarotini ikapani. ⁹Ininiā mitxi niokanatsopata hītemoni, kotxi iusaaki nataerekatai hīte. Ninirekari nimarotiniri, hīkīpititari nōtākikinii atxiīti? ¹⁰Himaxinīkaretakasaakiri maerekati āti kamakiti, nota apaka maxinīkaretari. Maerekati āti ereē kamakiti auiniā, nimaxinīkaretari, kotxi nitiretai hīte. Kristo nirekari nimaxinīkaretiniri maerekati ikamakiti. ¹¹Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹²Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotinina, kotxi Apiananiri sikanireōtana nisākire imarotinina ikapani. ¹³Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetōnia tixinimoni nisako,” nitxana.

Kamariāro Atoko Atxa

¹⁴Peerekari Teoso kamakiti ate ikapani. Kristo nakiti aniniāua, Teoso txīkitakaua ātipirika akāiatini, ikinimane imarotini ikapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini ikapani. ¹⁵Kristo sikaua Teosomoni, ininiā Teoso apokaerekataua, kotxi kamariāro arikiko Teoso ikapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitimoni,

kākiti apokakonimoni, kākiti pīpinanaākanimoni apaka. ¹⁶Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parīkatxi ikamini Teoso ikapani? ¹⁷Ate posotari Teoso ikapani aparīkauatini, kotxi kona apanakini atokoni !atxa ate. Kaiōpokori kākiti sāpiretari Teoso sākire txineiro apakapini ikapani. Ninoamoni Teoso sākire tiitxi vēxitiko atoko itxa. Kona ikara atokoni !akama, kotxi Teoso iokanataua ate kākitimoni. Teoso atamataua, ininiā atāonoka asākirauata, kotxi Kristo nitiriakori atxaua.

Iōkatsopari Atoko Hītxa

3 Atxiīti iuaīkana ate sāpiretatari erekari akamakiti asākire hāuikini ikapani? Atxiīti hinirekatari apanakini iōkatsopatiniri erekari ate kamakiti ate sākire hāuikini ikapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini ikapani? Apanakini kamari ikara atoko. Ate kona kamari ikara atoko. ²Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatarari ikara iōkatsopari, ininiā imarotarina erekari hīte kamakiti. ³Iōkatsopari Kristo iōkatsopatakiti ate mikititi atoko hītxa. Kona txītaā iōkatsopataāka. Erekari Matamatakoti Teoso Mapinakati iōkatsopatarari. Kona aātsopaā iōkatsopataāka. Kākiti ākixinireē iōkatsopataāka.

⁴Ikara atoko atxai hīte, kotxi iteene aimarotari Teoso, Kristo nakitiakori aniniua. ⁵!Kimaroreua ate. Ateka

!aposotari aparīkauatini Teoso īkapani. Teosora sikaposotiiretaua. Isikari imarore atemoni. ⁶Isikaposotiiretaua Teoso īkapani aparīkauatini īkapani, isākire amaneri kākiti asāpiretini īkapani. Ikara isākire amaneri oerekaua Erekarī Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekarī Matamatakoti aākixinireē auiniā, itxīkitakaua aāuapininiika anini.

Teoso Parīka Amaneri

⁷Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene au. Moisesi toō iusaaki apakapari Teoso iotximere. Itene iotximere au Moisesi toō, ininiā kākiti Isaeo auakani kona posotari atamatiniri. Iotximere poiāoāpotakasaaki, !iposotapanikarīna itoō atamatinina. Ininiā Teoso iotximere auakasaaki, isākire iōkatakori apoka itiximoni kākiti ipinini īkapani. ⁸Uatxa iua Erekarī Matamatakoti txīkitakari kākiti ātipirika auini īkapani, ininiā uatxa Teoso parīka apiata. Peerekari ikara iparīka. ⁹Peerekari Teoso parīka ipaniātakiti iōkatakori kākitimoni isikasaaki, txamari iusaaki oerekari kākiti misiritiko imaerekani xika. Uatxa Teoso parīka apiaerekata, kotxi Kristo kamaerekatari kākiti. ¹⁰Uatxa Teoso parīka apiata. Peerekari. Iotximere apiari atoko itxa, ininiā iua parīka kitxakapirīka iotximere napakari atoko itxa. ¹¹Kitxakapirīka Teoso parīka ipaniātakiti iōkatakori isikasaaki peerekari, txamari ikara Teoso parīka xipope. Īkorasaaki iparīka kākiti ikamaerekatini !ixipoka, ininiā apiaerekata.

¹²Ia Teoso parīka !ixipoka, ininiā ataparaxinireritika asākirauata. ¹³Moisesi atoko !atxaua, kotxi iua ipatoōtaua mākatxi mataā, itoō iotximere Isaeo auakani matamatakani īkapani. Itoō iotximere poiāota, iuaritika !iposotarīna atamatinirīna. ¹⁴Moisesi ipatoōtiniua atokokana ninoa Isaeo auakani oki ipataāka, kotxi !imarotarīna atāo Teoso nireēkiti. Uatxapiima okina ipataākapanika atatsopatakasaakirīna Teoso sākire iōkatsopatakori, Xesosi apokini apisapanika auakari sākiretxiti. !imarotarīna Teoso nireēkiti. Kristo sākire auikikosaaki, iua ipatoōtiko makatxakaāka, ininiā iusaaki kākiti imarotari Teoso nireēkiti. ¹⁵Īkorasaaki apaka Moisesi iōkatsopare atatsopatakasaakina, !imarotarīna. Okina ipataākapanika. ¹⁶Kākiti akiritakasaakiri Apiananiri, ipatoōtiko makatxakaāka. ¹⁷Erekarī Matamatakoti itxaua Apiananiri. Erekarī Matamatakoti auiniā aākixinireē, !aparīkauataika amaerekani makatxakiko īkapani, kotxi Xesosi makatxakapekari amaerekani. ¹⁸Xesosi sākire auīākani atxaua, ininiā atoō kona ipataāka. Ātakaāri atoko atxaua. Kākiti atamatakasaakīua ate, atamatari Apiananiri iotximere. Apiananiri Erekarī Matamatakoti aākixinireē txīkitakaāpotaua ikara atoko aniniua, ininiā apiaāpota aiotximere.

Teoso Iokanapirena Erekarī Pokamara Atoko Itxa

4 Teoso amonīkaua ate, ininiā iua paniātaua ia parīkatxi akamini, iokanapirena erekarī apanakinimoni asāpiretini. Ikara atoko ininiā, isikataparaxiniretaua, ininiā !anirekarī atakanapiniri ikara parīkatxi. ²Kākiti kipatari ikamakiti, maerekati ikamakasaaki,

kotxi ipētauata. Ikara atoko inakari maerekati !akamaika. Atakanapapekari. !Amisirienetari kākiti. Kona akoketari ate sākire Teoso sākirekata. Teoso kenakotari asākire, ininiā atāonoka asākire, ininiā kākiti ākixinireē imarotari akamakiti atāo inini. ³Kākiti mimarotakanisaakiri Teoso iokanapirena erekari asāpiretakiti, kākiti pīpinanaākari atoko itxa. ⁴Kākiti pīpinanaākari !imarotari Teoso iokanapirena, kotxi kākiti teosone, Satanasi inakori, ipatari ninoa oki, ininiā !atamatarina pokamara ninoa iopiniākari. Teoso iokanapirena erekari pokamara atoko itxa. Peerekari ikara Teoso iokanapirena. Iua erekari pirena sāpiretari Kristo Apiananiri ininiua, kotxi Teoso itxaua. ⁵Ate kona sāpiretari kākiti ateka pirena. Ate sāpiretari Xesosi Kristo Apiananiri ininiua. Ate hīte nitiriakori atxaua, kotxi Xesosi nirekari hinitiriakori aniniua. ⁶Kītxakapirīka ipiānoka auakasaaki, Teoso txari: “Piopinikaxitita.” Iuasaakipeka iopinikaxitita. Iua Teosotxikana iopinikari aākixinire. Ikara iopinikare kamaimaroretāua Teoso Apiananiri kaiotximereri ininiua. Kristo aātamatākasaaki, aātamatari Teoso iotximere.

Xesosi Sākire Auiākani Misiritiko

⁷Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekari katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara !auari. ⁸Asinimoni amaxikakini aua, iuaritika !okaua ate. Atxiīti !aimarotari akamakiti tīkane, iuaritika kona aiotokakari Kristo sākire aūikini. ⁹Amisiritiko aua, iuaritika Teoso kona takanapāua ate. Atxiīti akarotaāka, iuaritika kona aōkaāka. ¹⁰Ikiniōtika aīto okiko

monōkoni aua Xesosi sākire aūikini xika. Xesosi atatsiirauata. Ipina. Iua atokotxikana ate atatsiirauata. Atxiīti aīto ipina iua sākire aūikini xika. Xesosi auapika, kotxi ipīpe, eereka ōkitikāua, ininiā iua atokokana aīto auapika. ¹¹Auapanika anakasaaki, aōkiko monōkoni aua Xesosi sākire aūikini xika. Aīto ipinapitikako, iuaritika aūapanika, kotxi Xesosi auapanika. ¹²Xesosi iokanapirena asāpiretini xika, apanakini nirekari okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³Teoso sākire iōkatsopatakori txari: Nota auikari Teoso sākire, ininiā nisāpiretari kākiti.

Iua atokotxikana ate auikari Teoso sākire, ininiā ate sāpiretari kākiti. ¹⁴Teoso ōkitikari Apiananiri Xesosi, iuaīkana auini īkapani, ininiā aimarotari Teoso ōkitikiniua ate apaka, iuaīkana aūuini īkapani. Eereka Teoso anikauako ate hītekata Xesosi aaōkitini Teoso apisatoō. ¹⁵Amīteenekari ikinipoko amisiritiko Xesosi sākire hītemoni asāpiretini īkapani. Kākiti apikomoni, apikomoni, apikomoni, txaāpota apakapari ikinipoko erekari Teoso sikakiti, ininiā ninoa kākiti kaiāopokori txari Teoso: “Erekapitikari pisikakiti notamoni.” Ikara atoko ininiā, kākītipokoni txari: “Peerekari Teoso,” itxako.

Maerekaxinireni !Atxaua

¹⁶Ininiākara maerekaxinireni !atxaua. Aīto xipokaāpota, iuaritika aākixinire ikiniōtika apiataparaāpota. ¹⁷Īkoraasaaki amaxikiko auapitika Xesosi sākire aūikini xika. Kona okanani aua amaxikiko. Eereka Teosokata ātipirika aūapika, kotxi aūuikari isākire. Peerekari iuasaakiko. !Axinikaikari mitxi amaxikiko, kotxi iuasaakiko

peerekari. ¹⁸Kona amaākatari aātamatakiti. Amatamatakiniti axinika. Atamatakori xipokako. Matamatakoti kona xipoka.

Aāuapoko Teoso Tixineē

5 Īkorapokoriti aāuakasaaki, aīto aāuapoko itxaua aākixinire ĩkapani. Āti ōti aīto xipoka. Ixipokasaaki, Teoso sikari ātiāo aāuapoko. Iua aīto isikaua, itixine aāpokasaaki. Iua aīto kona xipokaika. Iua aāuapoko kona uakōtxiā kamakorini. ²Īkorasaaki aātatsiirauatakasaaki, atxari: “Ninirekari ātiāo niīto, niīto Teoso sikakiti itixine napokasaaki.” ³Anirekari ātiāo aīto, ininiā maītotika !atxaua. ⁴Īkorasaaki ia aīto auapanika inakasaaki, aātatsiitari katsiiri. Kona kataparari ia aīto. Anirekapitikamari aīto. Anirekari ātiāo aīto, ininiā aīto maxipoākati makatxakari aīto xipoākari. ⁵Teoso kamari aīto maxipoākani ĩkapani. Isikapanikauako aīto ikara atoko inakari. Aimarotari ikara atāo inini, kotxi isikapekari Erekarī Matamatakoti atemoni. Ipixini Teoso sikaenetakiti isikapekaua, ininiā apikomoni isikaenetakiti isikapitikauako.

⁶Ininiā kataparaxinirepitikaua ate. Aimarotari aāuapoko ia aīto ininiāua, kona aāpokapanika Apiananiri tixinemoni. ⁷Xesosi sākire auikiko oerekaua atāo aāuini tīkane. Aōkinoka kona oerekaua atāo aāuini tīkane. ⁸Kataparaxinirepitikaua ate. Kona ate pīkari apinini. Apiaerekata apinini, kotxi iusaakiko Apiananirikata aāua. ⁹Anirekari amiinitiniri Apiananiri, ia aīto āki aāuakasaaki, ia aīto xipokasaaki apaka. ¹⁰Āti ōti ate amakinika sariko Kristomoni. Iusaaki Kristo sāpiretaua aparīka ĩki. Iua imarotari ĩkinipoko akamakiti ia aīto āki aāuakasaaki. Atxiīti akamari erekari. Atxiīti akamari

maerekati. Akamakiti iaōka isikaua aparīka ĩki.

Kākiti Mikanapiriīko Teosomoni

¹¹Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auikiniri iua sākire. Aparīkauata, iua sākire kākiti auikini ĩkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹²Kona ate nirekari iuaīkana asāpiretinii hīte ereka anini. Anirekari asāpiretinii, apakatapitika hīuikiniua ate, kotxi atāonoka akama. Ikara atoko inakari himarotiniā, himarotari kākiti hāpakapapiretini, ninoa misākirepiretakasaakiaua ate. Ninoa kākiti ate misākirepiretakani iuikari atamatakorinoka. Kona imaākatari kākiti ākixinire ereka inini. ¹³Atxiīti kākitimoni kona kiīkiteua ate. Ikara atoko atxa Teoso ĩkapani. Atxiīti paīkiteua ate. Ikara atoko atxa hīte ĩkapani. ¹⁴Kristo iteene tīretaua, ininiākara anirekari iua nireēkiti akamini, kotxi aimarotari iua ipina ĩkinimane ĩkapani, kotxi ĩkinimane ipīkani atoko itxauana. ¹⁵Kristo ipina ĩkinimane kākiti ĩkapani, kākiti mapinakani ĩkapani, kākiti ātipirika auini ĩkapani. Ininiā iua kākiti kona kamaikariko iuaka nireēkiti ĩkiniōtika. Ikamariko Kristo nireēkitinoka, kotxi Kristo ipina iua ĩkapani. Iuaīkana ōkitikapekaua.

¹⁶Ininiā uatxa !axinikaikari kākiti ĩkorapokoriti auakani xinikakiti atokokana. Mītxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷Kristo sākire auīākari ākixinire amaneri itxaua. Mītxi maerekati ikamakiti kona ikamaika. Amanerinoka ikama. ¹⁸Ikara atoko inakari Teosora kaminaua. Mītxi amokaiakari atoko itxa Teoso, iuaritika

imikanapiriāua ate iuamoni, kotxi Kristo ipina ate ikapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹Teoso mikanapiriāri kākiti ikini itixiti auakani iuamoni, kotxi Kristo ipina kākiti ikapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰Asāpiretari Kristo sākire kākiti-moni. Asākirauata iua ikapani, ininiā Teoso iteene otākikai hīte ate sākireē. Kristo nireēkiti iaōka ate otākikai hīte. Hikanapiriāko Teosomoni. ²¹Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aūikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6 Ate parīkauata Teosokata, ininiā ate iteene otākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso. ²Kotxi Teoso sākire iōkatsopatakori txari:

Erekari kākitemoni nisika. Niketo apokasaaki, iusaaki nikenakotari hākiritinino nota. Kākiti maerekani nimaktxakini otisaaki, nimoianatai hīte.

Nisāpiretai. Uatxa apokapeka Teoso keto erekari kākitemoni isikini. Uatxa Teoso makatxakari kākiti maerekani.

Teoso Nitiriakori Atāo Inakani

³Kona xatiki akerokari akamakiti kākitemoni, ininiā kākiti kona txari: “Ninoa kerokari ikamakitina, atāo minakati isāpiretiniua,” litxana. ⁴Teoso nitiriakori atāo atxaua. Aūuini ikiniōtika

oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoaātaā kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākaruatini. Amoianatari

kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷Ate Teoso nitiriakori atāo atxaua, kotxi atāo inakarinoka asāpireta. Teosora sikaposotiiretaua. Erekari akamakiti aiķeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisiriennerini ninoa,” iuaritika atāo inakarinoka asākire. ⁹Minakaniua ate, iuaritika ikinimane imarotaua. Kaiāokatani apinaarita, iuaritika aūupanika. Amisiritaāka, iuaritika kākiti kona okapanikaua. ¹⁰Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiāopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹²Ate nirekari atiretinii

hīte, txamari kona hīte nirekari hītiretiniua ate. ¹³Uatxa nimisākiretai hīte namariteakori nimisākiretini atokotxikana. Hītiretauako ate, ate taretinii atokotxikana. Hōerekaua hītiretiniua ate.

Xesosi Sākire Mauiākani Moianariakori !Hītixapeua

¹⁴Xesosi sākire mauiākani moianariakori !hītixapeua, kotxi !apakata erekari kaikotini maerekatikata. !Apakata pokamara ikanōkarikata auini. ¹⁵Kona Kristo moianatari Satanasi. Xesosi sākire auiākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auiākari auini Xesosi sākire mauiākatikata. ¹⁶Teoso misākiretiko aikoti āki !auari kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitīpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷Ininiākara hītakanapanako nisākire mauiākani. Kona ninoakata !hāuape. !Hīkaikotape maerekati takote, ininiā napakapai hīte.

¹⁸Ininiā hīri nitxauako. Namariteakori, namariteakoro hītixauako hīte, itxa Apiananiri, Kaposotiireri sākire.

7 Nitiretakini ikara atoko itxa Teoso kamaenetakiti ate ikapani. Ininiā matakanapari ikinipoko maerekati aīto txikotakari, aākixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

²Hītiretauako ate. Kona amisiritari kākiti. Kona aōerekari kākiti maerekati ikamini. Kona amisirienetari kākiti.

³Kona ikara atokoni nitxa hīte nitxitini ikapani. Kona nitxitai, kotxi

nisāpiretapekai iteene atiretinii hīte. Ininiā ipīkitxi kona oiarikaua. Auakari kona oiarikaua. Ate oiarikakari !auari. ⁴Nimarotari hīte kaminiri nota otākikakiti iaōka. Nota iuikai hīte. Hīte kamataraxiniretano nota. Amaxikaākapika, iuaritika iteene nīpoxokoniua.

⁵Masetōnia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireē apīkarauata. ⁶Teoso, mikapiritari kākiti matinaniuatakani, ininiā imīkapiritaua ate Txito apokasaaki. ⁷Iua apokini kamapoxokonitaua. Apaka isākire kamapoxokonitaua, kotxi isāpiretaua hīte kamapoxokonitini iua. Isāpiretaua ate hīte kinirāo aōkitaka ininino nota. Isāpiretaua, hīte maerekaxinireni, kotxi hītixikitakano maerekaxinire ninini. Isāpiretaua hīte ātipirika sāpiretiniri apanakini nota kamakiti ereka inini. Txito sāpirena nikenakotakasaaki, apia nīpoxokoniua.

⁸Mitxi niokanatsopatakiti hītemoni maerekaxinireti txīkitakai hīte, iuaritika erekari niokanatiniri iua niōkatsopatakiti hītemoni. Merepanika nota matinaniuata, kotxi nimarotari niokanatsopatakiti hātatsopatini xika hīte matinaniuata. Mapaōtinoka maerekaxinireni hītixaua.

⁹Uatxa poxokopekano nota. Na nīpoxokoniua hīte maerekaxinireni nitxikitakini ikapani. Nīpoxokoniua, kotxi maerekaxinireni hinini xika, hītakanapari maerekati hīkamakiti. Iuasaaki hīkanapiriā Teosomoni. Teoso apokaerekatari ikara atoko inakari himaerekaxinireni, ininiā kona ate misiritai. ¹⁰Erekari Teoso txīkitakiniri kākiti matinaniuatini, kotxi iuasaaki kākiti takanapari maerekati ikamakiti. Ikanapiriā Teosomoni, ininiā Teoso makatxakari iua maerekani. Ikara atoko

inakari matinanitxi erekari. Txamari kākiti Teoso manirekakani matinani ātiāo, ininiā ninoa ipinapikako. ¹¹Hīte matinaniuata himaerekani xika, ininiā Teoso kamaerekatai. Ininiākara uatxa erekarinoka hinireka hīkamini. Uatxa iteene hinirekari hīkaminiri Teoso nireēkiti. Hinirekari ikinimane imarotniri hīkamakiti ereka inini. Uatxa homanitari maerekati mitxi hīkamakiti. Maerekaxinireti hītxaua himaerekani xika. Uatxa iteene hītiraōki aua. Hinirekari himarotniri nota pirena, nota ereka ninini himarotini ikapani. Uatxa hinirekari maerekati kamakari misiritiko. Ininiākara kona hīkerokari, iua kiki maerekati ikamakasaaki.

¹²Iua iōkatsopari mitxi niokanatakiti hītemoni, niōkatsopata hīte ikapanikara. Kona iua maerekati kamakari ikapanini niokanatsopata. Kona iua maerekati kamakari misiritakiti ikapanini niokanatsopata. Niokanataru iua iōkatsopari hītemoni atiraōki himarotini ikapani. Teoso imarotari atiretinii.

¹³Ininiā ate kamataparaxiniretaāka, kotxi hīte kamataparaxiniretaāka apaka. Apaka apoxokoniuaata, kotxi Txito poxokoniuaata. Iua poxokoniuaata, kotxi hīte himakinika kamapoxokonitari iua. ¹⁴Txito hītemoni isini apisapanika, nota sāpiretari iua niuikinii hīte, kotxi peerekai hīte. Atāo nisākire, kotxi kona nipētauata hīkamakiti xika, kotxi hīkamakiti atāo. Atāonoka asākire hītemoni. Atāonoka asākire Txitomoni apaka ate iuikinii hīte. ¹⁵Apiaāpota Txito tiritinii, kotxi hīkamari iua sākire iaōka. Imarotari hāpakapiniri iua hīpaxitininiritika. ¹⁶Nipoxokoniuaata, kotxi nimarotapitikari hīkaminiri nōtākikinii iaōka.

Txineiro Apanakini Sikakito

8 Nitariakori, anirekari asāpiretinii Teoso misākiretikoātaā apotitakaniua Masetōnia tixini auakani. Peerekari Teoso kamakiti ninoa ikapani, kotxi ikinipoko erekari isika ninoamoni. ²Ninoa !iteene kauarena. Pasāpaniri ninoa misiritiko, iuaritika ienenikana ninoa. Na katxineiroteni, iuaritika ipotxitarina itiina isikinina kākiti kaamonirinimoni. ³Nota imarotari ninoa minakati auiniāna, isikarauatana apanakinimoni. Iteene isikarauatana, ininiā kaiāokatani inatxitana. ⁴Nota kona amanaāri ninoa txineirote kākiti Teoso nakitiakori Xerosareē sitatxiti auakani ikapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikiniāro apoxokoniuaata, kotxi ikara atoko akamini amoiataru kākiti Teoso nakitiakori,” itxana. ⁵Kona ikarananini ninoa nireka. Iteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakiti apaka akamini,” itxana Masetōnia tixini auakani. ⁶Txito amanaāpekai hīte txineiro hīsikini Xerosareē sitatxiti auakani ikapani, ininiā apaniātari iua sini hītemoni hīsikakiti apakapini ikapani, hītiraōki ninoa Teoso nakitiakori hōerekini ikapani. ⁷Hīte iteene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na iteene imarotari. Hīte iteene imarotari Xesosi sākire. Apanakini poiāonoka imarota. Hīte iteene nirekari Teoso parīka hīkamini. Apanakini poiāonoka nirekari. Hīte iteene tiretaua ate. Apanakini poiāoka tiretaua. Hīte apiaerekata, ininiākara ninirekari

hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸Kona nipaniātai nitapararitika hīsikiniro hītxineirote ninoamoni. Nataarekatari hītiraōki. Atāo atxiīti hītiretari apanakini? Masetónia tixini auakani atāo tiritari apanakini. Hīte tiraōki ninoa tiraōki atoko atxiīti? ⁹Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hīte ikapani. Ininiākara ikinipoko itakanapini xika, ikinipoko aua hītemoni.

¹⁰Uatxa nota ōtākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani ikapani?” hītxa. Hīte merepanika nirekari txineiro hīsikini ninoa. ¹¹Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹²Hīpoxokoniritika hinirekiniāri hīskarauatini Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari lapakata apikomoni hīsikini.

¹³Kona ate nirekari hīte kaamoni hinini, ikinipoko ninoamoni auini ikapani. Erekari ninoa auakiti hīte auakititxikana. ¹⁴Uatxa hīte txineirote auapitika ninoa hīsikini ikapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte.

Ikara atoko inakari atāo. ¹⁵Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatiko Korītomoni

¹⁶“Peerekai,” atxari Teoso, kotxi iua sikanireōtari Txito itiretinii hīte, nota tiritini atokotxikana. ¹⁷Txito nirekapitikari ate paniātakiti ikamini, hītemoni isini. Apaniātiniri apisapanika, inirekari hītemoni isini, ininiā ipoxokoniritika isa hītemoni. ¹⁸Aiokanatarī āti aītari iuakata. Ikinimane Teoso misākiretikoātaā apotiitakanuia iteene apokaerekatari iua, kotxi isāpiretari Teoso iokanapirena erekari ikinimanemoni. ¹⁹Ninoa mereēri iua aītari atekata isini Xerosareēmoni, oa txineiro aanikasaaki. Oa txineiro asikakito oerekana Xerosareē auakani Apiananiri ereka inini. Oerekana apoxokoniritika amoianatinina.

²⁰Oa txineiro kaiāopokoro aua, ininiā iua aītari siniā atekata, iua imarotari atāo asikiniro oa txineiro Xerosareē auakanimoni. ²¹Anirekari atāo akamini oa txineiro asikasaaki ninoamoni. Anirekari Apiananiri imarotiniri atāo akamini. Anirekari kākiti apaka imarotiniri atāo akamini.

²²Iuaīkana aiokanatarī ātipekana aītari hītemoni. Aātaerekatapekari iua. Ipxokoniritika imoianatarī kākiti. Apiapoxokonita iua, kotxi imarotari hīte kaminiri mitxi hīsākire iaōka. ²³Txitopekana, nota moianari itxaua. Iua miparīkatano nota, hīte amoianatini ikapani. Xesosi sākire auīakani mereēna aītariakori Txitokata sikani hītemoni. Kākiti imarotakasaakina ninoa, “Peerekari Kristo,” itxana kākiti. ²⁴Ininiākara hōerekana ninoa kikiakori atāo hītiretinina,

ininiā ikinimane Xesosi sākire auīākani imarotari atāo hītiraōkiuatini. Iuasaakiko ninoa imarotari ate sākire atāo inini ate iuikinii hīte.

9 Nisāpiretai hīte txineiro asikakito tīkane Teoso nakitiakorimoni, Xerosareē auakanimoni. Nimasāpiretakaniāi hīte, iuaritika hīte nirekari hītixineirote hīsikini ninoamoni. Nimarotari ikara. ²Nimarotari iteene hinirekari himoianatinina ninoa. Nitxapekana Masetónia tixini auakani: “Nota iuikana aītariakori Korīto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareēmoni,” nitxana. Hīte poxokoni txineiro hīokanatinini, sikanireōtana Masetónia tixini auakani apaka iokanatiniro txineiro. ³Uatxa niokanatanana ninoa aītariakori ipi āti pakini hītemoni. Hīte iposope hininiā hītixineirote hīokanatinini, erekapitikari, kotxi ikara nisākire iaōka. Ininiā atāo ate iuikinii hīte. ⁴Masetónia tixini auakani siniā notakata, hītixineirote miposonitipanika, ininiā ate pētauata, kotxi ate auikari hīsākire. Hītepekana apia pētauata hīsākire iaōka himakamakani xika. ⁵Ininiākara ninirekari ninoa aītariakori sini hītemoni nota ereē napokini apisapanika. Ninoa moianatai txineiro kaiāopokoro hīsikaenetakito hāpotiitini īkapani. Ininiā napokasaaki ereē, iposope hīsikakito nanikini. Ininiā iuasaaki aimarotariko kinirāo sikaenetaka hinakito txineiro. Iuasaaki aimarotariko hīpoxokoniritika hīsikiniro hītixineirote.

Takari Itori Auini

⁶Ia nisākire hīxinika. Poiāoka komiri pitakiniā pitakarauatakasaaki, poiāonoka iri pimaporoka. Kaiāopokori pitakiniā, kaiāopokori pimaporoka. ⁷Ininiā pākixinireē pixinikari atāo pisikakiti ātimoni. Kona erekari

pimanirekasikatakiniti pisikini. Āti itapararitika paniātiniāi pisikarauatini, !apakata. Teoso apokaerekatari kākiti ipoxokoniritika isikarauatini ātimoni. ⁸Teoso posotari ikinipoko erekari isikini hīte, ininiā ikiniōtika ikini sereti hiamonitakiti auiniā, hāpakapari ikinika hinireēkiti. Ininiā ikinipoko erekari hīkama. ⁹Teoso sākire iōkatsopatakori txari:

Teoso sikari itori erekari matxineirotenimoni. Teoso kamakiti atāo inakari !ixipoka. Auapikako.

¹⁰Teosora sikari takariki katakarerimoni itakarauatini īkapani, ininiā eereka iposope inakasaaki, auari kienatxi inikakiti īkapani. Iua atokokana Teoso sikari kaiāopokori takariki hītemoni. Iua anekakari hītakare, ininiā eereka iposope inakasaaki, kaiāopokori auari, ininiā kaiāopokori hīkamakiti atāo inakari apanakinimoni. ¹¹Teoso sikai ikini sereti erekari, ininiā ikinipoko auape hītemoni. Ininiākara kākiti mauarenimoni hīsikariko kaiāopokori. Ate anikasaakiro hīsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹²Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiāopokori txari: “Peerekari Teoso,” itxanako. ¹³Ninoa poxokoniuatako, kotxi hīte sikari kaiāopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴Ininiā ninoa misākiretari Teoso hīte īkapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵Matxari Teoso: “Peerekai pite, kotxi

pite sikaua pamarite. Āti pisikakiti iua atoko inakari !auari.”

Paoro Apakapapiretari Apoōitiko

10 Kataparaxinireri Kristo, iuaritika ianaka ōtākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro itakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipīkarauata amaerekani isāpiretiniua,” itxana. Ikara apanakini sākire na atāo, kotxi itakoxiti nauanāta, iuaritika amaātiki nōtākikai hīte. ²Kona ninirekari noekinini hīte apanakini nitxitini ereē napokasaaki. Niposotapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauīākani kamakiti atokotxikana,” itxana. Txamari na atāo ninoa sākire. ³Aīto tapara poiāoka, kotxi kākiti atxaua, ininiā aīto taparaā !apakata anaiatiniri maerekati. Teosora sikataparataua aākixinireē, maerekati anaiatini ikapani. ⁴Ate ikeeko kona Xesosi sākire mauīākani ikeeko atokoni. Teoso ikeeko isika atemoni. Kaposotiireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵Kākiti iuikaua. !Nirekarina auikinirina Teoso imarore. “Paimatireua ate,” itxanātana. Teoso sikaimaroretua ate, ninoa sākire paxirari inini aōerekini ikapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxīkitakari iua axinikakiti imamakini Kristo nireēkiti iaōka inini ikapani. ⁶Hīte iteene kamakasaakiri Kristo nireēkiti iaōka, ate misritariko kākiti ereē Kristo nireēkiti imakamakanisaaki.

⁷Hīte xinikari hātamatakitinoka. Kona hīxinikari kākiti ākixinireē

auakari. Kākiti ereē uākatiniāri Kristo nakiti ininiuana, erekari imarotininina ate apaka Kristo nakitiakori aniniua, ninoa Kristo nakiti ininiuana atokotxikana. ⁸Atxiiti iteene niuikari Apiananiri sikaposotiiretiniua ate, iuaritika kona nipētauata niuikiniri ikara, kotxi Apiananiri sikaposotiiretina ate, hīte akamataparaxiniretini ikapani. Kona ate nirekari hīte ākixinire tapara poiāopotini. ⁹Kona ninirekari hīpīkarauatini, iōkatsopari niokanatsopatakiti hātatsopatini xika. ¹⁰Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipīkarauata ate itxitini,” itxana apanakini. Na atāo ninoa sākire. ¹¹Itakoxiti ate auakasaaki, asākire aiokanatsopatakiti iuatxikana asākireta, ereē hītekata aūakasaaki.

¹²Ninoa ate misākirepiretakani iteene iuikaua. Atauako ninoa apiaerekata? Atauako !erekaua ate? !Kiikitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. ¹³Atepekana, kona ate iuikari ateka kamakiti. Ate iuikari parīkatxi Teoso sikakiti atemoni akamini ikapani. Iuanoka ate iuika. Iua paniātaua aparīkauatini hīte ikapani. Iua aparīka ate iuikapitika. ¹⁴Teoso paniātakitinoka akama. Ia aparīka, ininiā ate sari hītemoni Kristo iokanapirena erekari asāpiretini ikapani. Ininiā apakatapitika ate iuikiniri ikara aparīka. ¹⁵Apanakini parīka Teoso ikapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo sākire, Kristo sākire iteene hāuikini ikapani, ininiā ate nirekari aparīkauatini Teoso ikapani

hīte auiniātaā, Kristo sākire apanakini auikini īkapani. ¹⁶Ate nirekari Kristo iokanapirena erekari asāpiretiniri kākiti, hīte tixine apiko auakani Xesosi sākire masāpiretakotipanika ininiātaā. Ininiā kona aparīkauata apanakini parīkauatiniātaā. Ininiā apanakini parīka: “Ate parīkakara iua,” kona atxari.

¹⁷Teoso sākire iōkatsopatakori txari: Pinirekatari piuikarauatini? Pinirekiniāri, ininiā piuikariko Apiananiri kamakitinoka.

¹⁸Teoso kona apokaerekatari kākiti iuaka, “Erekapitikano,” inakari. Teoso sāpiretinīari: “Erekapitikari iua kākiti,” ininiā Teoso apokaerekatari iua.

Teoso Maiokanatakini

11 Atxiīti miīkiteti sākirauatini atoko nimisākiretai hīte, iuaritika hāuiritano nota. ²Teoso nirekinii hīte iua nakitiakorinani hininiua, iua atokotxikana nota nirekai hīte Teoso nakitiakorinani hininiua. Nisikaenetai Kristomoni hītaniri atoko inini īkapani. Iuamoninani nisikaenetai. Ninirekari iuamoni nisikinii, ātokoro kikikata masirīkakato atoko inakaro. ³Kitxakapirīka Satanasi auaitotari imini. Iua imini misirienetaro Eva, kotxi paimatireri Satanasi sākire. Nipikari Satanasi misirienetini hīte apaka, ininiā eereka hīxinikakiti na atāoni. Nota pīkari Xesosi hītakanapini. Mitxi iteene hītiretari iua. Iuananira hītireta. ⁴Kotxi hīte apakapari hīpoxokoniritika ikinimane ereē apokakani, “Ate Xesosi sākire sāpiretakaniua” inakani, txamari Xesosi pirena ninoa sāpiretakiti na atāoni. Kona ate sāpiretari ikara atoko inakari, iuaritika hāuikari ninoa sākire. Hāuikasaakiri ninoa sākire, atxiīti hāpakapari matamatakoti, txamari kona hāpakapari Erekar Matamatakoti ate sāpiretakiti. Ate sāpiretai hīte atāo

Kristo iokanapirena erekari, txamari hīte auikari ātiāo.

⁵Hitemoni, Teoso iokanataka ninoa kākitemoni. Hitemoni, ninoa Teoso iokanatakini apiarini. Nota poiāo atxiīti? Ninoa apiata atxiīti? Konapitini. ⁶Atxiīti kona nota iteene imarotari nisākirauatini, iuaritika nimarotapitikari Teoso sākire. Himarotapekari ikara atoko inakari, kotxi asāpiretpekai.

⁷Teoso iokanapirena erekari nisāpiretakasaakii hīte, maxikatīka nisāpiretai. Kona ninirekari hīkitxinino, ininiā nota poiāotakaua, hīte atāo inakari himarotini īkapani. Ikara atoko nikerokatari atxiīti? ⁸Hītekata niparīkauatakasaaki, kākiti ātiātaā Xesosi sākire auīākani iokanataro txineiro notamoni, txamari kona nota moianatana ninoa iuasaaki. Hītekara nimoianata iuasaaki. ⁹Hītekata nauakasaaki, nota nirekamaro txineiro. Txamari kona nota amanaāi hītxineirote. Aītariakori Masetónia tixinikini mininano itanapoko niamonitakiti. Iua atokotxikana kona namanaāpaniro hītxineirote nota īkapani, kotxi atxiīti nota minari atoko nitxa hīporikiā. Kona ninirekari ikara atoko inakari nininiua. ¹⁰Kristo atāonoka isākire. Isākire nākixinireē auape, ininiā nota sākire apaka atāo. Nisāpiretapanikari kākiti hītxineirote nimanirekakani pirena. !Auari ikara nisākire iotokakakari ikinika Akaia tixiniā. ¹¹Kinirepa ikara atoko nitxa sākiretai? Atxiīti kona nitiretai hīte? Teoso imarotari nota iteene tiretinii hīte.

¹²Uatxa iuaīkana nisāpiretai hītxineirote nimapakapakani. Nanera kākiti uatxa hītekata auakani Teoso maiokanatakini txari: “Ate kamari Paoro parīkatxikana,” itxana. Ikara atoko ininiā iuikauana. Txamari ninoa

parīka ātiāo, kotxi ninoa apakaparo hītxineirote. Ate kona apakaparo hītxineirote. ¹³Teoso kona iokanātana nanera hītemoni. Na atāo Teoso iokanatakini !itxauana. Imisirienetaina hīte, “Aparīkauata Teoso ikapani,” inakasaakina. Nanera txari: “Kristo iokanatakini raua ate,” itxana. Txamari na atāo nanera sākire. ¹⁴Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekai atāo inakari.” Ininiā iua sākire auīākani auapitika. ¹⁵Ininiākara nanera kikiakori Satanasi nitiriakori txari: “Atāo inakari kamakaniua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

Paoro Misiritiko Pirena

¹⁶Iuaīkana nisāpiretai. Miikiteti !nitxaua, iuaritika hīte potxtari kākiti miikiteni, ininiā miikiteti atoko niuikaua, kotxi nota posotari niuikiniua. ¹⁷Apiananiri kona sākirauata ia atoko. Miikitetinoka sākirauata ia atoko iuikiniua. ¹⁸Nanera kikiakori iuikaua, Teoso sākire mauīākani iuikiniua atokokana, ininiā nota apaka sāpiretari niuikiniua. ¹⁹Hīte auiritari kākiti miikiteni himoianarini ininiua, kotxi !kiikitei hīte. ²⁰Nanera hītekata auakani txikitakai hīte initiriakorina hininiua. Hīte auiritari ikara atoko inakari. Nanera amanaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹Erekari nipētauatini atxiiti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā miikiteti atoko kataparaxinireno

nota. Nikamakiti niuikako. ²²Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraāo apika mekaniriakorikani? Ari. Apraāo apika mekanirikanarano nota apaka. ²³Nanera Kristo nitiriakorikani? Atxiiti. Miikiteti iuikiniua atoko nitxaua: “Kristo nitiri apiaerekatakari nitxaua nota.” Nota apia parīkauata Teoso ikapani. Apiata nimisiritiko, kotxi kaiāokatani kateia āki nitakaāka. Kaiāokatani nota noropataāka aāpitsaā. Kaiāokatani nipinaarita. ²⁴Ipi ipi āti pakinikata Xoteoakori noropatano aāpitsaā. Iuasaaki inoropatanona trīta novi pakinikata. ²⁵Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaaki, maporo sakika apanīkakiā. Āti ikanōkati, āti pokamarariti pakini ninapa potxoari uiniti nipimakaātini. ²⁶Nianaxititapika. Natamonōkonitari uini torōkani. Natamonōkonitari kiitiririni. Natamonōkonitari ninir- imane. Natamonōkonitari ninirimane minakaniua. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriā- takasaaki pakini. Natamonōkonitari kākiti, “Xesosi sākire aūiuka” inakanikata nauakasaaki, kotxi na atāo ninoa sākire. ²⁷Kaiāokatani nisāpaka itori parīkatxi xika. Kaiāokatani nitsii aua. Kaiāokatani kona apakata nimakini ikanōka. Kaiāokatani ninatxita, niposonata. Kaiāokatani nipokori !auari. Kaiāokatani nimīteenekari katxīkareri. Kaiāokatani nimāka !auari. ²⁸Ikara atoko inakari monōkori auapika notamoni. Apaka niparīka kasāpaniri aua, kotxi ikiniōtika niparīkauata kākiti Teoso misākiretikoātaā apotiitakaniua ikapani. ²⁹Āti iōkapetiniā, nota

apaka niōkapeta. Āti txīkitakaāka maerekati ikamini, ininiā nota maerekaxiniretinoka nitxa.

³⁰Hīte nirekiniāri niuikiniua, ininiā niuikari niōkapere. ³¹Aāuīte Xesosi Kristo iri, Teoso imarotari nisākire atāo inini. Ātipirika matxari: “Peerekai.”

³²Tamāsiko sitatxiti nauakasaaki, kākiti auīte apiari Areta inakori auakasaaki, Tamāsiko auakani auīte paniātari sotatoakori kaikotini sitatxi kākiti ĩronakiniātaā nota imaīkinina ĩkapani. ³³Txamari kona nota pokīka sitatxi toreātaā. Nīroā kotari mitari āki. Iuasaaki aītariakori iokatxakano aapokotxi sonaā sitatxi pirikere mapara. Ixitipe apoka nitxa. Ikara atoko itxa nimitekini, ininiā kona ninoa maīkano iuasaaki.

Taponetxi Teoso Sikiniri Paoro

12 Hinirekatari apikomoni niuikiniua? !Apakata, iuaritika hinirekiniāri, niuikapanikauako, kotxi Apiananiri sikano taponetxi peereri. Iua oerekano imarore. ²Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxiīti nīto atāo anikaākauako? Kona iteene nimarotari. Teosonokara imarotari. ³Ianoka nimarota. Nanikaāka Teoso tixinemoni nitaponeē atxiīti, atāo nīto anikaāka atxiīti. Teosonoka imarotari. ⁴Iuaxiti nikenakotari sākiretxi erekari. Ikara kona nimarota iuaīkana nisāpiretini. Apaka !auritaāka nisāpiretiniri kākiti. ⁵Ninirekiniāri, niuikari nitapone ikara atoko inakari, txamari !apakata notaka niuikiniua. Niōkaperenoka niuika. ⁶Ninirekiniāri niuikiniua, atāonoka nisāpireta, kotxi kona miīkiteti !nitxaua. Txamari kona ninirekari niuikiniua, kotxi atxiīti kākiti uākatari nota apiari nininiua. Ninirekari kākiti atāo imarotinino. Erekari kākiti

imarotinino nisākireē, nikamakitiā pakini.

Paoro Misiritiko Inako Tsi Atoko Inini

⁷Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auiritari Satanasi misiritinino nītoā. Katsiiri. Inako atoko itxa nītoā, ininiā niuikiniua !auari. ⁸Ipi āti pakinikata namanaāri Apiananiri ia nitsii imaktxakini. ⁹Txamari itxano: “Kona nimaktxakari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata,” itxano. Ininiākara nipoxokoniritika niuikari niōkapere, kotxi iuasaaki nimarotari Kristo posotiire nākixinireē auini. ¹⁰Niōkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tikane nimimarotakanisaaki, nipoxokoniua. Ikara atoko inakari nimiteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

Paoro Nirekari Erekari Korīto Auakanimoni

¹¹Miīkiteti sākirauatini atoko nisākirauata, txamari hīte xika nisākirauata miīkiteti sākirauatini atoko, kotxi hīte iuikaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hītekata auakani kona apiaerekata. ¹²Hītekata nauakasaaki, nikamakiti oerekai atāo Teoso iokanatakiti nininiua, kotxi iuasaaki noerekai Teoso oerekakiti kākitimoni. Noerekai kākiti maposotakiniti. Noerekai posotiiretxi iuasaaki. !Asāpaka ikara

atoko inakari aōrekinii hīte. ¹³Atxiīti apiata nitiretari apanakini Teoso misākiretikoātaā apotiitakaniuā ātiātaā auakani? Konapitini. Ninoa nitiretini atokotxikana nitiretai hīte. Namanaāna ninoa txineirote niamonitakiti ikapani. Hīte txineirote kona xatiki namanaāi, ininiā nikerokatarī atxiīti? Himaxinikaretariko ia nikerokakiti.

¹⁴Ipkata nisipeka hītemoni. Naiamatapeka iuaikana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵Nipoxokoniuaata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ikapani apiaāpotakasaaki, hīte tiraōki nota ikapani poiāoāpota.

¹⁶Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Misirienetaina. ¹⁸Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹Atxiīti hīte xinikari ikara asāpiretai, ate ereka anini himarotini ikapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tirketakini hītxaua hīte, ininiā ikinipoko akamakiti

akaminii hīte, hīte ākixinire tapara auini ikapani. ²⁰Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hīneenamauatini. Ikara nimarotini nipīka, ereē napokasaaki. ²¹Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

Paoro Sākire Imapotōkire Ōtākikare

13 Ipkata nota sari hītemoni. Iuaikana hītemoni nisako. Teoso sākire iōkatsopatakori txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako,

itxa Teoso sākire. ²Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaikana uatxa itakoxiti nauakasaaki, ikara nisākiretxikana nisāpiretai hīte. ³Hīte nirekarī himarotini: “Atāokani atxiīti Paoro

sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo iōkapeta. Oerekapekai iposotiire hīte sauaki. ⁴Kristo okikosaaki aamina ipiriāmitakari nopini, iīto iōkapere aua. Uatxa kataparari iua, kotxi Teoso sikatapararari iua. Ate iōto apaka iōkapeta, mitxi Kristo iōto iōkapetini atoko, iuaritika Teoso sikataparataua Kristokata aūuini hīte amoiānatini iōkapani.

⁵Hīxinikariko hāxixinireē auakari. Atāokani hāuikatari Teoso sākire? Hīteka ataerekatauako. Himarotatari Xesosi Kristo hāxixinireē auini? Teoso sākire hāxixinireē mauakaniā, Kristo Xesosi !auari hāxixinireē. ⁶Ninirekari himarotiniri Kristo Xesosi auini ate ākixinireē. ⁷Ate misākiretari Teoso, maerekati hīte makamakani iōkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua iōkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸!Apakata aiotokakiniri atāo inakari. Atāo inakari auapika. Atāo inakari !ixipoka. Apakata

aōerekiniri atāo inakari. ⁹Atxiīti ate iōkapeta, iuaritika apoxokoniua hitaparaxinire akenakoenetakasaaki. Ate misākiretari Teoso hīte atāonoka hīkamini iōkapani ikiniōtika, Xesosi sākire iaōka hīkamini iōkapani. ¹⁰Ikara atoko inakari niōkatsopata hīte iōkapani hītekata nimaukanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo nikamini hītemoni. Txamari kona ninirekari Xesosi sākire hītakanapini, nota txitini xika. Ninirekari hīte kataparaxinire hinini, Xesosi sākire iteene hāuikini iōkapani.

¹¹Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakapeua. Ininiākara Teoso katiraōkiri, kauaireri, auapikako hītekata.

¹²Haōkitakakasaakiua, hīpoxokoniritika hāpakapakakauako, kotxi Apiananiri nakitiakori hītxaua.

Ikinimane Teoso nakitiakori uai auakani xinikamanapitai hīte.

¹³Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

KARÁSIA

Paoro Iokanatsopata Karásia Auakanimoni

1 Nota Paoro iokanatsopata ia aätsopa hitemoni. Nota Teoso iokanatakítino kákitimoni Teoso iokanapirena nisápiretini íkapani. Kona kákitini iokanatanano nota. Xesosi Kristora iokanatanano nota. Aíri Teoso, Xesosi ipinaäka atoko ökitikakarira, iuara iokanatanano nota kákitimoni. ² Ikinika aítariakori notakata auakani, nota apaka xinikanátaí híte. Híte ikini aikoti Teoso misákiretikoá-taá apotiitakaniua Karásia tixini auakani axinikanátapika.

³ Aíri Teoso, Xesosi Kristo aäuíte pakini sikari ikinipoko erekari hitemoni. Ninoa kamaerekaxiniretai híte.

⁴ Xesosi ipina amaerekani imaktxakini íkapani. !Erekari uatxa auakani. Maerekati kamakani sauaki aäuakasaaki, Xesosi ipina ate imaktxakini íkapani, amapinakani íkapani. Xesosi ipípe ate íkapani, kotxi aíri Teoso nirekari Xesosi ipinini ate maerekani imaktxakini íkapani.

⁵ Ikinioítika: “Peerekai,” matxari Teoso. Átipirika kákiti txapikari Teoso: “Peerekai.” Amé.

Áti Iokanapirena Erekari !Auari

⁶ Nikenakopiretari Teoso hítakana-paápotini. Iusaaki nitsoríkaänáta. Kinirepa hítakanapari Teoso sákire? Kotxi mapa kasiritinoka híte auikari Teoso iokanapirena erekari. Kristo iteene tiretai híte, ininiá akiritai híte inakitiakori hininiua íkapani. Kinirepa háuikatari áti iokanapirena? ⁷ Atáo nisápiretai híte. Áti iokanapirena erekari !auari. Nikenakopiretari kákiti híte oereékani. Ninoa nirekari ikoketinirina isákirena Kristo

iokanapirenakata. Uatxa !himarotaikari atáo sápirenatxi. ⁸ Atáo asápiretapekai Teoso iokanapirena erekari. Átiáo sákiretxiti asápiretiniái, Teoso iokanataua ate kákiti misiritikomoni, átipirika misirikaretxi auiniátaá. Teoso nitiri iaxitikiri apaka sápiretiniái átiáo iokanapirenatxi, Teoso iokanatarí iua initiri imisiritikomoni átipirika misirikaretxi auiniátaá. ⁹ Híte auikapekari Teoso iokanapirena erekari. Átiáo iokanapirenatxi sápiretakari sápiretiniái Teoso iokanapirena atáo minakati, iokanataákako imisiritikomoni átipirika misirikaretxi auiniátaá. Asápiretapekai ikara inakari sákiretxiti. Uatxa iuaíkana nisápiretai.

¹⁰ Ikara atoko nitxai híte, ininiá himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atáo minakati sápiretakani txai híte: “Paoro nirekari kákiti apokaerekatiniri iua.” Ikara na atáoni. !Ninirekari kákiti apokaerekatinino nota. Ninirekiniári kákiti apokaerekatinino, kona Kristo nitiri !nitxaikaua.

Teoso Akiritari Paoro

¹¹ Nanera atáo minakati sápiretakani híte oereékani: “Paoro iokanapirena kona Teoso iokanapirenani,” itxana ninoa sákire. Nitariakori atáopitikara nisápiretai híte. Iokanapirenatxi hitemoni nisápiretakiti kona kákiti sákireni. Teoso sákirera. ¹² Kona kákitini sápiretano ia iokanapirenatxi. Kona kákitini oerekano. Xesosi Kristora sápiretano nota iua iokanapirenatxi.

¹³ Híte imarotari mitxi nauakasaaki, Xoteo kiomaneakorini oerekakiti nauikasaaki, iusaaki kona nitiretana Xesosi sákire auíakani. Iteene nimisiritana ninoa. Ninirekari nixipokiniri Xesosi sákire kípítakani.

¹⁴Iusaaki nimarotari Xoteoakori kitxakapiríkarini paniátakiti. Nikamari imakinika ninoa paniátakiti. Iusaaki nimoianariakori apaka kamari ninoa kitxakapiríkarini paniátakiti. Nota apiata kamari ninoa sákire iaôka. Iteene ninirekari nikaminiri kitxakapiríkarini paniátakiti.

¹⁵Teoso iteene tiretano nota. Iua mereëno nota nauini apisapanika. Iusaaki akiritano nota initiri nininia tíkane. ¹⁶Teoso keto manapi apokasaaki, oerekari imi notamoni, imi Xoteo minakonimoni nisápiretini íkapani. Iusaaki kona nisápiretari kákiti Teoso oerekakiti sákiretxiti, ininiã na kákitini sápiretano nikamakiti tíkane. ¹⁷Iusaaki kona nisari Xerosareë sitatxitimoni, ininiã nota apisapanika Teoso iokanatakini kona ôtákkikano. Kona kákitimonini nisa noerekiko íkapani. Arápia tixinimoni nisapitipo. Eereka nikanapiriã Tamásiko sitatxitimoni.

¹⁸Ipi anokanani, áti anokanani pakinikanani napaãka atoko, nisa Xerosareëmoni Petro nimisákiretini íkapani. Ipi semanati ninapa Petrokata. ¹⁹Apanakini Teoso iokanatakini isákire sápiretakani kona naókita. Apiananiri itari Txiako inakorinoka naókita. Ininiãkara kona kákiti sákireni nisápiretai híte. Teoso iokanapirenakara nisápiretai híte.

²⁰Ia niókatsopatakiti nisápiretakiti hítemoni atão inakari. Teoso imarotari atão inakari nisápiretinii.

²¹Xerosareëmoni nisaãka atoko, nisari Síria tixini, Sirísia tixini apaka. ²²Iusaaki Kristo sákire auíãkani, Xotéia tópa auakani, !aókitapanikano nota iusaaki. ²³Ninoa imarotari apanakini minapiretakiti. Apanakini sákire: “Kiki mitxi ate misiritakari, uatxa sápiretari Xesosi sákire. Mitxi iua nirekari ixipokiniri Xesosi oereékiti

sákiretxiti, iuaritika uatxa inirekari oerekiniri Xesosi oerekakiti sákiretxiti kákitimoni,” itxana apanakini sákire. ²⁴Ininiãkara ninoa: “Peerekari Teoso,” itxana, kotxi nota auíkapekari Xesosi sákire.

Xesosi Iokanatakini Apakapari Paoro

2 Katosi anokanani napaãka atoko, nikanapiriã Xerosareëmoni nimoianari Panapee inakorikata. Nanikari nimoianari Txito inakori apaka notakata. ²Xerosareëmoni nisa, kotxi Teoso oerekano nisini iuamoni. Iuaã napokasaaki, nisákirauata Xesosi sákire auíãkani auíteakorikata. Ninoakatanoka nisákirauata. Teoso iokanapirena erekari Xoteo minakonimoni nisápiretakiti nisápiretana ninoa. Nota nirekari ninoa imarotiniiri nisápiretakiti atão inini. Apaka ninirekari ninoa imarotiniiri iuaíkana katana nisápiretakiti atão inini íkapani. Nisápiretakiti ikenakotakasaakina, ninoa: “Atáopitikara pisápiretakiti Xoteo minakonimoni,” itxana. ³Txito nimoianari na Xoteo !itxaua. Krekora itxaua, ininiãkara Teoso takaótxikare !auari iuamoni, iuaritika Xesosi sákire auíãkani auíteakori na paniátari itsiki mata kisauakiko. ⁴Mitxi apanakini kikiakori apoka iuaã. Ninoa sákire: “Ate auikari Xesosi sákire,” itxana ninoa. Txamari na atão ninoa sákire. Ninoa apotiitaua Xesosi sákire auíãkanikata. Inirekarina Txito itoã Teoso takaótxikare takiko. Ninoa nirekari imarotiniirina kitxakapiríkarini Xoteo kiomaneakorini paniátakiti atakanapini, kotxi atakanapapekari ipixini ninoa paniátakiti, kotxi Kristo Xesosi nakitiakori atxapekaua. Ninoa nirekari imarotiniiri ikinika ate oerekakiti sákiretxiti. Ninoa nirekari ate kaminiri ikinika kitxakapiríkarini Xoteo kiomaneakorini paniátakiti. Ninoa

nirekari ikinika Xesosi sákire auiákani, Xoteo minakanuia apaka kaminiri Xoteo kiomaneakorini paniátakiti. Ninoa nirekari nitiritxi amotakoni atoko aniniua. ⁵Kona xatiki akamari ninoa nireékiti, kotxi inirekarina Teoso iokanapirena atão inakari akoketini Xoteo kiomaneakorini paniátakitikata. Ate nirekari Teoso iokanapirena atáonoka inakari asápiretinii.

⁶Xesosi sákire auiákani auíteakori txari notamoni: “Xoteo minakonimoni pisápiretakiti erekapitikari. Apikomoni ate sákire !uuari ninoa pisápiretini íkapani,” itxana. Ninoa auítetxiakori itxauana, iuaritika Teosomoni ninoa apanakini kákiti poiáorini atokotxikana itxauana, kotxi Teoso atamatarí aákixinire. Ininiákara nota !nipíkari auítetxi. ⁷Ninoa Xesosi sákire auiákani auíteakori apokaerekatari niparíka. Ninoa imarotari Teoso sikano nota ia paríkatxi, ia iokanapirenatxi erekari nisápiretinina Xoteo minakanuia. Iua atokotxikana Teoso sikari paríkatxi Petromoni, iokanapirenatxi erekari Xoteoakori isápiretini íkapani. ⁸Teoso iokanatarí Petro Xoteoakorimoni, ininiá isikaposotiiretari iua ninoa sauaki iparíkauatakasaaki. Iua atokotxikana Teoso iokanatano nota Xoteo minakonimoni. Nota apaka isikaposotiireta ninoa sauaki niparíkauatakasaaki. ⁹Iusaaki ninoa auíteakori Txiako, Petro, Xoão pakini imarotari Teoso sikinino notamoni ia paríkatxi, ininiákara imaíkarina niuako, Panapee uako pakini, kotxi akinika aparíkauata Teoso íkapani. Akinika aápokaerekatari nota, Panapee pakini sápiretiniri Teoso sákire Xoteo minakonimoni. Akinika aápokaerekatari Txiako, Petro, Xoão pakini sápiretiniri Teoso sákire Xoteoakorimoni. ¹⁰Ninoa

paniátaua ate matxineiroteni atiretini. Iuanoka ipaniátaua. Napokaerekatari ninoa sákire, kotxi ninirekapitikari matxineiroteni nitiretini.

Paoro Ôtákkikari Petro

¹¹Eereka Petro motikaétaua ate Átxiokia sitatxiti aúuakasaaki. Iusaaki Petro kamakiti na atáoni. Ininiákara nota sákirauata Petro apisatoó: “Petro, pite kerokari,” nitxari iua. ¹²Merepanika Petro nipokota ikiniótika aítariakori Xoteo minakonikata. Eereka átikaka kikiákini apoka Txiako iokanatakini. Iusaaki Petro píkana ninoa, ininiá kona inikaika aítariakori Xoteo minakonikata, Xoteo kiomaneakorini sákire xika, kotxi ninoa sákire: “Kákiti Teoso takaótxikare iítóá mauakaniá, !pinipokotape ninoakata,” itxana ninoa sákire. Petro píkana Txiako iokanatakini, kotxi ninoa nirekari Teoso takaótxikare auini aítariakori iítóá, Xoteo minakanuia iítóá. ¹³Apanakini Xoteoakori Xesosi sákire auiákani apaka kamari Petro kamakiti atokokana, ininiá ninoa apaka kerokari. !Inipokotaikana aítariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aítariakorikata, Xoteo minakonikata. ¹⁴Nimarotakasaakiri ninoa kerokiniri ikamakítina, nota misákiretari Petro ikinimane ókiátaá, kotxi ninoa !ikamari atão inakari. Teoso iokanapirena erekari iaóka !ikamana. Nitxari iua: “Xoteokarai, iuaritika pauanáta Xoteo minakanuia sauaki, ininiá Xoteo kamakiti atoko !pikamaika. Xoteo minakanuia atoko pitxaua. Ininiákara kinirepa pite paniátana Xoteo minakanuia: ‘Híkípitariko Xoteo kiomaneakorini sákire?’ !Erekari,” nitxa Petromoni.

Xesosi Säkire Auikiko Kamaerekatari Käkiti

¹⁵Ate Xoteo atxaua, kotxi aïri, ainoro pakini Xoteo txaua apaka. Xoteo kiomaneakorini säkire: “Xoteo minakaniua maerekati kamakani itxauana,” itxana isäkirena. Xoteo minakaniua !atxaua ate. ¹⁶Aimarotari, aäuikiniäri Xesosi Kristo säkire, iua kamaerekatari aäkixinire, ininiäkara Teoso apakapaua. Kitxakapirïka Teoso säpiretari Moisesi ipaniätakiti käkiti kamini tïkane. Ininiäkara Moisesi iökatsopatarari ikara Teoso säkire. Txamari !aposotari akaminiri imakinika Teoso paniätakiti, Moisesi iökatsopatakiti, ininiäkara !ikamaerekatari aäkixinire. !Apakapaua ate. Ate auikari Xesosi säkire ereka anini ikapani, ininiä Teoso apakapapitikaua ate. Teoso paniätakiti iökatsopatakori ikinika !aposota akamini, ininiä Xesosi kamaerekatari aäkixinire Teoso apakapiniua ikapani, Kristo säkire aäuikasaaki. ¹⁷Anirekasaakiri Teoso kamaerekatinina, aäpoka Kristomoni. Iusaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ikapani. Ikara atoko ininiä, atxiïti Kristo nirekatari maerekati akamini, imaktxakiniri ikapani? Konapitini. ¹⁸Atxiïti käkiti imarotari Xoteo kiomaneakorini paniätakiti kamiko na kamaerekatari käkiti äkixinire, ininiä itakanapari ninoa paniätakiti ikamini. Atxiïti äti öti iuaïkana ikamari ninoa Xoteo kiomaneakorini paniätakiti iaöka, ininiä iusaakiikarako ikerokari. ¹⁹Moisesi iökatsopatakiti oerekano nota ipïkari atoko nininiua, kotxi nota kona posotari ikinika Moisesi iökatsopatakiti iaöka nikamini, ininiä nimisiritiko auapitikako. Ininiä nimarotari Moisesi iökatsopatakiti kona makatxakari

nimaerekani. Ininiä nimarotari Xesosi säkire auiäkarinokara auapiniika. Ininiä uatxa ikiniötika ninirekari Teoso nireëkitinoka nikamini. ²⁰Xesosi okaäka aamina ipiriämitakari nopini. Aamina ipiriämitakari nopini okokari atoko nitxaua, kotxi maerekati mitxi nikamakiti !niniäkaikari nikaminiri. Mitxi ninireëkiti kona auaika. Iuaritika auäkipanika nitxaua, kotxi Kristo aua näkixinireë. Teoso äkiri säkire nauikiniä, auäkipanika nitxa. Iua taretano nota. Iua ipïpe nota ikapani. ²¹Moisesi iökatsopatakiti kamiko kamaerekatiniaua ate, kinirepa Xesosi ipina? Moisesi iökatsopatakiti kamiko na xatiki kamaerekataua ate. Teoso tiraökinokara kamaerekatari aäkixinire.

Natokopa Itxa Teoso Kamaerekatiniaua?

3 Hïte Karásia tixini auakanii kona kiükitei hïte. Kipa misirienetai hïte atäo inakari himakamakani ikapani? Kotxi himarotapitikari atäo inakari. Himarotari Xesosi Kristo ipina aamina ipiriämitakari nopini amaerekani imaktxakini ikapani. Ate oerekapekai ikara atäo inini. ²Ianoka nipimaäi hïte: Kisaakipa häpakapari Erekar Matamatakoti? Häpakapatari iua, Moisesi paniätakiti hikamakasaaki? Konapitini. Häpakapatari Erekar Matamatakoti Teoso iokanapirena erekari häuikasaaki? Ari, Teoso iokanapirena erekari häuikasaaki, iusaakiikara häpakapari iua Erekar Matamatakoti. ³Kipa iomaiïkitetai hïte? Merepanika Teoso sikari Erekar Matamatakoti hïtemoni, ininiä Erekar Matamatakoti sikaposotiiretai hïte Teoso paniätakiti hikamini ikapani. Uatxa hïxinikatarari Teoso paniätakiti hikamini hïteka posotiireëkani? Konapitini. Kona hïte posotari. ⁴Himisiritapeëkaika Xesosi säkire

hāuikini xika. Kinirepa himíteenekatari himisiritiko? Atauako uatxa kona hāuikaikari mitxi hāuikakiti Xesosi sākire? ⁵Kirisaakipa Teoso sikari Erekar Matamatakoti hitemoni? Kirisaakipa Teoso oerekari iposotiire hitemoni? Atauako ikara atoko itxa Moisesi paniätakiti hikamakasaaki? Konapitini. Isikai Erekar Matamatakoti, oerekai iposotiire, Teoso iokanapirena hāuikasaaki.

⁶Hixinikariko Apraõni. Apraõ auikari Teoso sākire, ininiākara Teoso kamaerekatari iua, ininiā Teoso apakapari iua. ⁷Ininiā ninirekari himarotniri, kākiti Teoso sākire auiaškani Apraõ apika mekaniriakori atão inakani itxauana ninoa. ⁸Teoso kamaerekatari Xoteo minakaniua, kotxi ninoa auikari Xesosi sākire. Kitxakapirika Teoso sākire iökatsopatakori sãpiretapekari ikara Teoso iokanapirena erekari Apraõmoni. Ikara iökatsopari txari: “Nota sikariko erekari ikinimane kãkitimoni, kotxi pite Apraõ auikari nota sākire.” ⁹Apraõ kãpitari Teoso sākire, ininiākara Teoso takari erekari iuamoni. Iua atokotxikana Teoso takari erekari iua sākire kãpitakanimoni.

¹⁰Apanakini uãkatari Teoso apakapinina ninoa, kotxi ikãpitarina Moisesini sākire. Txamari Teoso misirikare pamonõkonipaniriko ninoamoni, kotxi Teoso sākire iökatsopatakori txari: “Teoso misiritariko kãkiti ikinika Moisesi paniätakiti ikiniõtika imakamakanisaaki.” ¹¹Teoso sākire iökatsopatakori txari: “Teoso kamaerekatariko kãkiti, iua sākire auiaškani. Ininiā isãkire auiaškani auapininiika itxako Teosokata,” itxa Teoso sākire iökatsopatakori. Ininiākara aimarotari Moisesi paniätakiti kãpitiko kona kamaerekatari kãkiti. ¹²Moisesini iökatsopatakiti kona paniätaua aãuikiniri Xesosi ipinini amaerekani

imakatxakini ikapani. Moisesi iökatsopatakiti paniätaua akaminiri ikinika Teoso paniätakiti. Teoso sākire iökatsopatakori txari: “Kãkiti, Teoso paniätakiti iökatsopatakori ikinika makerokakatirako auapininiika itxako Teosokata,” itxa Teoso sākire iökatsopatakori.

¹³Txamari ätika Teoso paniätakiti Moisesi iökatsopatakiti akerokiniã, amisiritaãkako. Kristo makatxakaua ate ikara misirikaretxi monõkori, kotxi Teoso misiritari Xesosi Kristo aamina ipiriãmitakari nopini ate maerekani xika ate mapinakani ikapani. Teoso sākire iökatsopatakori txari: Kãkiti aamina nopini okakori Teoso misiritakiti itxaua.

¹⁴Teoso sikaenetari erekari Apraõmoni. Kristo ipipe hite Xoteo minakaniua ikara erekari hãpakapini ikapani. Ininiā Xesosi Kristo sākire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekar Matamatakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵Nitariakori, ikinimane kãkiti imarotakiti nisãpiretaiko hite, noereškiti sãkiretxiti iteene himarotini ikapani. Ipi kãkiti aua itiina isikaenetakakana. Iuasaaki, iökatarina iuãkana isikaenetakitina tsopaã. Eereka !auritaãkana imaxinikaretinirina isikaenetakitina. Apaka !auritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶Himarotariko ia. Teoso sikaenetari erekari Apraõmoni, Apraõ apika mekanirimoni apaka. Teoso sākire iökatsopatakori na txari: “Apika mekaniriakori.” Teoso sākire iökatsopatakori txari: “Apika mekaniri.” Ininiā ätika apika mekaniri.

Kristo itxaua iua. ¹⁷Ia ninireka nisäpiretinii. Kitxakapirika Teoso sikaenetakiti Apraãomoni apokaþeka. Koatrosëtosi trïta pakini anokanani Apraão auaka atoko, Teoso säpiretari Moisesi ipaniätakiti iökatsopatini ikapani käkiti kamini ikapani. Moisesi iökatsopatakiti kona xipokari Teoso sikaenetakiti Apraãomonikari. ¹⁸Teoso sikari Kristo käkitimoni, kotxi mitxi isäpiretari isikaenetakiti Apraãomoni. Teoso sikasaakiri ipaniätakiti säkiretxiti Moisesimoni ikara iaöka käkiti kamini ikapani, isikaenetakiti auapeka iusaaki. Ipaniätakiti sikiko !ixipokari isikaenetakiti.

¹⁹Ininiäkara kininiäpa Teoso sikari ipaniätakiti Moisesimoni käkiti kamini ikapani? Teoso paniätakiti iökatsopatakori oerekaua maerekati kamakanuia ate, kotxi !aposotari ikinika ipaniätakiti akamini. Kristo, Apraão apika mekaniri ïkorapokoriti apokini apisapanika, Moisesi iökatsopatakiti oerekaua Teoso nireëkiti akamini ikapani. Teoso sikaenetakiti itxaua Xesosi Kristo. Teoso sikasaakiri ipaniätakiti säkiretxiti Moisesimoni, Teoso nitiriakori aua iuaätaä. Teoso säpiretari isäkire Moisesimoni. Eereka Moisesi säpiretari käkiti. ²⁰Teoso säpiretakasaakiri Apraão isikaenetakiti, !ipaniätari äti käkiti säpiretiniri Apraão. Teosonokara säpiretari Apraão.

Moisesi Iökatsopatakiti

²¹Moisesi iökatsopatakiti aäuikiniä, atxiiti !anirekaikari Teoso sikaenetakiti? Anirekapitikari. Akiomaneakorini paniätakiti säkiretxiti, kona txïkitakaua aäuapininiika anini tïkane. Ininiäkara akiomaneakorini säkire kona kamaerekataua ate, ininiä Teoso kona apakapaua ate, ininiäkara kona aäuapininiika !atxa Teosokata. !Auari mauritakoti säkiretxiti käkiti

auapininiika inini txïkitakakari. ²²Teoso säkire iökatsopatakori txari: “Ikininape käkiti kamari maerekati.” Kateia äki auakani atoko atxaua, kotxi !aposotari erekari akamini. Teoso sikaenetakiti sikaäka Xesosi Kristo säkire auiäkanimoni.

²³Xesosi Kristo säkire auikiko apisa, käkiti kateia äki auakani atokokana itxauana. Käkiti moiaäkari atoko itxaua Teoso paniätakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokaþeka ïkorapokoriti. Ipinapeka käkiti ikapani, ininiä uatxa aäuikiniäri iua säkire, kona Teoso misiritaikaua uatxa. ²⁴Kristo mapokakani apisa, ate oerekakari atoko itxaua Teoso paniätakiti iökatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aäuikari Kristo säkire. ²⁵Uatxa apokaþeka Xesosi Kristo säkire auikiko. Ininiäkara Teoso paniätakiti iökatsopatakori !imoiaäikaua ate.

²⁶Teoso anaakori hïtxaua, kotxi häuikari Kristo Xesosi säkire. ²⁷Hïte patxisatapeëkaika, ininiäkara hïpatxisatiko oerekari apanakini Kristo ätipirika himoianatini ikapani. Ininiäkara Kristo atokoþeka hïtxa. ²⁸Ikara atoko aniniä, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakanuia, nitiritxi, nitiritxi minakanuia, kiki, sito, amakinika Kristo nakiti atxaua. ²⁹Kristo nakiti pininiäua, Apraão apika mekaniri pitxaua apaka. Ininiä pite apakapitikariko Teoso sikaenetakiti.

Teoso Anaakori

4 Apikomoni nisäpiretaiko hïte äti säkiretxiti. Amarini !apakapari irini tii itakanapakiti iua ikapani, kotxi xapitipanikari. Ikinipoko irini

nakiti imi nakiti txapekaua, iuaritika na apakapapanikari. Axapitipanika inakasaaki, nitiritxi atoko itxaua. ²Axapitipanika inakasaaki apanakini moiaári iua. Ninoa níkatari itxineirote. Irini ketotiniri manapi apokasaaki, imi apakapari íkinika irini tii itakanapakiti. ³Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniátakiti sákiiretxiti amoiaákiri atoko itxaua, kotxi oerekaua akamakiti tíkane. ⁴Teoso iokanatarí imi kákitimoni iketo manapisaaki. Sito íto áki aua merepanika, íkinimane kákiti atoko. Iua kípitari íkinika Teoso paniátakiti iókatsopatakori. ⁵Amakamakaniári íkinika Teoso paniátakiti iókatsopatakori, amisiritiko auapitika. Xesosi makatxakaua ate amamisiritakoni íkapani. Ininiá Teoso anaakori atxaua. ⁶Teoso anaakori aniniáua, Teoso iokanatarí Erekarí Matamatakoti imi nakiti aákiixiniremoni. Ininiá iua Erekarí Matamatakoti aákiixinireé auiniá, aákiiritari Teoso: “Papai, niri,” atxariko. ⁷Ininiá nitiritxi atoko !atxaikaua. Teoso anaakori atxapekaua. Iua anaakori aniniáua, ikini isikaenetakiti isikaua atemonikari, kotxi Kristo makatxakapekari amaerekani.

**!Erekaxinireri Paoro
Karásia Auakani Xika**

⁸Mitxi híte !imarotari Teoso. Iuasaaki nitiritxiakori amotakoni atoko hítxaua. Híparíkauata teoso minakaníua íkapani. ⁹Uatxa híte imarotari Teoso. Ari, uatxa Teoso imarotai híte. Ininiá kinirepa híte nirekari híkanapiriini mitxi híauíteakorimoni. Kona kaposotiirena ninoa. !Kíikitena ninoa. Kinirepa híte nirekari iuaíkana ninoa nitiriakori amotakoni atoko hininiáua? Kinirepa híte nirekatari iuaíkana háuikiniri ninoa oereékiti sákiiretxiti? ¹⁰Híte nirekari Xo-

teo kamakiti atoko inakari híkamini. Híuákatari Teoso apokaerekatinií híte, kotxi ninoa kíinirite atokotxíkana híte apaka kama. ¹¹Ininiá !erekaxinireno nota ikara níkenakoenetini. Atauako maxikatiíka nota sápiretari Teoso sákiire hítemoni?

¹²Nitariakori, nota iteene ótákiikai híte. Hítakanapariko Xoteo kiomaneakorini paniátakiti híkamini. Nota atoko hítxako, kotxi híte sauaki nauakasaaki nota híte atoko nitxaua. Xoteo minakaníua atoko nitxaua. Hítekata nauakasaaki, !himisiritano nota. Hítiretano nota. ¹³Híxinikari merepitipanika Teoso iokanapirena erekari híte nisápiretakasaaki, namianare xikara nisápiretai híte, hítekata nauakasaaki. ¹⁴Iuasaaki nami-anatakasaaki, híparíkauatapitipo nota íkapani. !Hinaiakakano. !Híokanatanó nisini namianare xika. Híte apakapano nota Teoso nitiri íaxitikiri hápakapini atokokana. Híte apakapano nota, Kristo Xesosi hápakapini atokokana. ¹⁵Iuasaaki híte iteene hípoxokoniua. Nimarotari ereka hinini, kotxi noki amianatakasaaki, híposotaákkamariko, himakatkakamariko híteka oki notamoni hísikini íkapani. ¹⁶Atauako uatxa himokaiakari nitxataua nota, atáo inakari nisápiretinii xika?

¹⁷Ninoa kamsirienererini iteene tire-tapitikamai híte, txamari ninoa ákiixinire níreékiti !erekari híte íkapani. Inirekarina híte omanatiníua ate. Inirekarina híte apokaerekatiniina ninoanoka. ¹⁸Erekari kákiti iteene tiritinii híte, ákiixinire inireékiti erekari inakasaaki. Nota hítekata nimauakanisaaki apaka, erekari kákiti iteene tiritinii, ákiixinire inireékiti erekari inakasaaki. ¹⁹Híte namariteni nota tirketakini atoko hítxa. Hinoro atokotxíkana nitxa nota. Káiamapeka auauenetakaro atoko nitxa, kotxi nota atatsiirauata híte xika. Kristo

kamakiti atokotxikana hīkamakasaaki, iusaakinoka nitsii nāixinire auakari iotoka. ²⁰ Kinirāo auaka nitxa hītekata uatxa. Ninirekari aāpisatoōtakaniua, ininiā nixinikakiti ipinimonipo itxa atx-īiti. !Erekaxinireno nota hīte xika.

Akaa, Sara Pakini

²¹ Hīte Xoteo kiomaneakorini paniā-takiti nireēkani, himarotatarini ninoa sākire? ²² Teoso sākire iōkatsopatakori sāpiretaua, ipi Apraō anaakori aua. Sito niterotxi iamotakitokata aua imi āti. Niterotxi minakotokata itanorokata aua āti imi. ²³ Akaa inakoromoni, niterotxi iamotakitomoni imi aua, kotxi Apraō sirīka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Apraō anaakori oerekaua Teoso parīka kākiti ikapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka oṭanoxiratarini Sinai inakori iua auakasaaki, niterotxi Akaa atoko itxa. Teoso paniātakiti iusaaki amakamakaniā, amisiritiko auapitikako, nitiritxi amotakori atokotxikana. Nitiritxi makamakaniāri ipatrāote paniātakiti imisiritiko auapitikako. ²⁵ Ininiākara oṭanoxiratarini Sinai inakori Arāpia tixini auakari Akaa atoko itxa. Apaka ikorasaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakorini amotakoni atoko itxana. Ninoa Xerosareē auakani !ikamari ikinika Teoso paniātakiti, ininiā Teoso misiritapitikanako ninoa. ²⁶ Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomaneakorini kona paniātaikaua ate ninoa nireēkiti

akamini. ²⁷ Teoso sākire iōkatsopatakori txari:

Pite sito meeneto pipoxokoniuatoko. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoro, itori pamariteakori auako. Kitaniriro poiāoka oamariteakori auako, itxa Teoso sākire iōkatsopatakori.

²⁸ Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraō imi Saramoni auini. Iuatxikana Teoso sikaenetaua Xesosi amaerekani imakatzakini ikapani, Teoso anaakori aniniua ikapani. ²⁹ Akaa ākiri Isimaeo inakori iponaniā, kotxi Apraō nirekari imi, ininiā iua sirīka Akaakata. Sara ākiri Isaki inakori iponaniā Erekarini Matamatakoti posotiireē. Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. ³⁰ Teoso sākire iōkatsopatakori txari:

Hīokanataroko niterotxi iamotakoro osipinini imikata, kotxi niterotxi ākiri kona apakapapaniri ipixini iri tii. Niterotxi minakoto ākirinoka apakapari iri tii,

itxa Teoso sākire iōkatsopatakori. ³¹ Ininiā nitariakori, niterotxi amotakoro ākiri atoko !atxaua. Niterotxi minakoto ākiri atoko atxaua.

Takaōtxikari !Ikamaerekatari Kākiti

5 Nitiritxi kamari ipatrāote nireēkitinani. Ikara atoko uatxa !atxaika, kotxi aāuikari Kristo sākire. Kristo makatzakapekaua amisiritiko monōkoni. Ininiākara nitiritxi amotakoni atoko iuaikana !hītxapeua. !Hāuiritapiri kākiti paniātini ninoa auīākiti hāuikini.

² Hikenakotoko. Nota Paoro sāpire-taiko hīte. Hāuiritiniāri takaōtxikari

takiko hiitoa Xoteo atoko, ininiā hāuikari takaōtxikari kamaerekatinii hīte Teoso apakapini ikapani. Txamari na atāo. Kristonoka kamaerekatari kākiti Teoso apakapini ikapani. Erepaniko, pinirekiniāri takaōtxikari, !pinirekaikari Kristo. ³Iuaikana nota ōtākikai hīte. Hāuiritiniāri takaōtxikari takiko hiitoa Xoteo atoko, ininiā Moisesi paniātakiti ipixini hikamapeka. Ikara atoko hininiā, ikinika ipaniātakiti hikamako. ⁴Ātikaka hīte nirekari Moisesi paniātakiti hikamini Teoso kamaerekatinii ikapani. Txamari ikara atoko hinirekiniā, hītakanapari Kristo. Ininiākara Teoso !ipositari ikinipoko erekari isikinii. ⁵Atepekana, ate auikari Xesosinoka txīkitakiniri kākiti ereka inini ikapani, Teoso apakapini ikapani. Ikamaerekataua Erekar Matamatakoti posotiireē, kotxi aūikari Xesosi sākire. ⁶Takaōtxikari hiitoa auiniā, iua takaōtxikari !ikamaerekatai hīte. Takaōtxikari hiitoa mauakaniā, takaōtxikari mauakani !ikamaerekatai apaka. Kristo Xesosi nakitiakori aniniāua, Teosora kamaerekataua, kotxi aūikari Xesosi sākire, ininiā atiretari iua.

⁷Merepanika hīte auikapitikiari Xesosi sākire. Kīpa xipokatari atāo inakari Teoso sākire hāuikini? Natokopa itxa Teoso sākire atāo inakari hītakanapini? ⁸Hīte akiritakari itxaua Teoso. Kona iuani xipokari hāuikiniri atāo inakari isākire. ⁹Kākiti sākire txari: “Pāo ātikaākari axapitiri ipani, iuaritika iātikakakiti itori ipe.” Iua atokokana ātika maerekati kamakari xika kaiāopokori kākiti kamari maerekati. ¹⁰Teoso kamaimaroretano nota hīte takanapiniri hīkerokakiti, atāo inakari hikamini ikapani. Hīte nitariakori hītxaua, kotxi Apiananiri nakitiakori atxaua, ininiārako nimarotari nota ōtākikinii iaōka hikamapanikako.

!Nimarotari iua kiki himisirienetakiri. Ia nimarota. Teoso misiritapanikariko iua.

¹¹Apanakini sāpirenātari: “Paoro paniātari Xoteo minakanuia takiniri takaōtxikari iitoāna.” Na atāo ninoa sākire. Nipaniātaākamariko takaōtxikari takiko, nimisiritiko !auamako. Kona nipaniātari Xoteo minakanuia takiniri takaōtxikari iitoāna. Ikara xika nimisiritāka. Nisāpiretari ia: Kristo aamina ipiriāmitakari nopini ipīpe amaerekani imakataxikini ikapani. Kristonoka kamaerekataua Teoso apakapiniua ikapani. Ikara noerekakiti xika nimisiritāka. ¹²Ninoa kamisirienenerini nirekiniāri itsiki mata kisauakiko, erekari itsikipati tsotatiko apaka. Nomanākarauata, ninoa misirienetini xika.

¹³Nitariakori, Teoso akiritai hīte iua nakitiakori hininiua ikapani, ininiākara uatxa hīpositari hīteka nirekiki hikamini. Iuaritika !hīkamapiri maerekati hīto nirekiki. Ia hikamako: Hītiretakauako ātipirika. Ikara atoko hininiā, himoianatakakauako. ¹⁴Teoso paniātakiti txari: “Pitiretana apanakini piteka pitiretiniua atokokana.” Ikara paniāretxi pikaminiā, pikamapekari ikinika Moisesi paniātakiti. ¹⁵Kaxipiri itopa auakani atoko !hītxape. Ninoa karotakakaua, okakakaua itxana. Erepaniko. Kaxipiri itopa auakani atoko hininiā, hīxipokakauako.

Aīto Nirekiki

¹⁶Nōtākikare ia atoko itxapaniko: Hāuiritariko Erekar Matamatakoti oerekinii iua kimapore ikiniōtika. Iua hikimapore oerekari ininiāua, !hīkamapiri maerekati hīto nirekiki. ¹⁷Aīto !nirekari Erekar Matamatakoti nirekiki. Iuatxikana Erekar Matamatakoti !nirekari hīto nirekiki. Erekar Matamatakoti mokaiakari

itxaua aïto. Ininiã aãkixinire nireëkiti !aposota akamini aïto nireëkiti xika. ¹⁸Iua Erekar Matamatakoti oerekiniã pikimapore ikiniõtika, pikaminiãri iua nireëkiti, ininiã Xoteo kiomanekorini paniãtakiti !oerekaikari pikimapore.

¹⁹Aimarotapitikari kãkiti ïto nireëkiti. Inirekari ïtaniritxi minakotikatika osirĩkini, ïtanorotxi minakotokatika isirĩkini, mitxitakari ãtokata isirĩkini. Kãkiti ïto nirekari kãkiti xinikaxititiniiri maerekati ïto nireëkiti. Kãkiti ïto nirekari ãti kãkiti ïto, maerekati ikaminina ïkapani. ²⁰Kãkiti ïto nirekari teoso kãkiti kamakiti iteosone ïkapani. Kãkiti ïto nirekari maerekani matamatakoni paniãtakiti ikamini. Kãkiti ïto nirekari omanãkaretxi, neenamtxi, xikoretxi, norikaretxi, iuikaretxi. Kãkiti ïto nirekari kãkiti omanatiniri apanakini. ²¹Kãkiti ïto nirekari ãti kãkiti tii. Inirekari okanitxi, poãtaktxi, maerekati kiiniriti ikamini. Ikara atoko inakari maerekati kãkiti ïto nireëkiti. Uatxa nipinitai hïte, mitxi nipinitinii atokotxikana. Ikara maerekati kamakani !auapani Teoso auïtetxi ininiãtaãua.

Erekar Matamatakoti Nireëkiti

²²Iua Erekar Matamatakoti aãkixinireë auiniã, !ikara atokoni itxa akamakiti. Iua Erekar Matamatakoti aãkixinireë auiniã, atiraõkiuata. Apox-okoniua. Erekarixinireua. !Katimari aomanãkarauatini. Aamonikaruata. Ereka. Akamaenetakiti akamapitika. ²³Ate !iuikaua. !Akamari maerekati aïto nireëkiti. Ikara atoko atxa, Erekar Matamatakoti aãkixinireë auiniãua. Ikara atoko aniniã, amisiritiko !auari. ²⁴Kristo nakitiakori aniniãua, !anirekaikari akaminiri maerekati aïto potxitakiti, aïto nireëkiti. Amanirekakiniti aõkini atokokana, aõkapekari maerekati aïto nireëkiti.

²⁵Erekar Matamatakoti txĩkitakari axinire auãki inini, ininiãkara makamari ikinipoko iua nireëkiti ikiniõtika. ²⁶!Apakata aãuikiniua. !Apakata aneenamauatini. !Apakata axikotakakiniua.

Himoianatakakiniua

6 Nitariakori, hïte Erekar Matamatakoti nireëkiti kamakanii, himarotakasaakiri aïtari kaminiri maerekati, hõtãkikariko iua imaerekani itakanapini ïkapani. Hõtãkikariko hïtiraõkiritika. Iuasaaki erepaniko, kotxi atxiïti hïte apaka nirekari iua maerekani atokotxikana hïkamini. ²Himoianatakakauako hïtapara poiãonoka inakasaaki. Ikara atoko hininiã, hïkamari Kristo paniãtakiti apanakini hïtiretini. ³!Erekar ate iuikiniua. Kãkiti minakati: “Apiari nota,” inakari, iuanika misirienetaua. ⁴Erekar nataerekatiniri notaka kamakiti. Erekar atxiïti? Nikamakiti ereka ininiã, nipoxokoniua. !Apakata nãkixinireë nixinikiniri: “Iua ãti kamakiti apiaerekata. Nota kamakiti poião erekar.” !Apakata ikara atoko ninini. ⁵Ikininape kãkiti aua iparĩka kasãpaniri. Iuanoka posotari ikaminiri.

⁶Teoso sãkire oereëkari oerekiniã pite Teoso sãkire, iusaaki minakati auiniã pisikari iuamoni. Nipokori atxiïti, txineiro atxiïti, pisika iuamoni, kotxi iua kikiote !auari. ⁷Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteë mitxi pitakakiti iaõka papakapa. Iua atokokana pikamakiti ereka inini, papakapari erekar. Pikamakiti maerekati inini, papakapari maerekati. ⁸Pïto nireëkiti pikaminiã, papakapari pïto siãkitinoka. Pïto sikai ipĩkitxinoka. Teoso misiritapitikai. Erekar Matamatakoti nireëkiti pikaminiã,

papakapari iua siäkiti. Iua siäkiti Teosokata ätipirika pauini ikapani. ⁹!Apakata asäpakini erekari ikiniötika akamini. Makamari erekari ikiniötika, maiotokakanikaua anini. Erekarik akamini amaiotokakaniä, erekari Teoso sikakiti aäpakapini apokapitikako. ¹⁰Ininiä aposotakasaakiri, makamari erekari ikininapemoni. Merepanika makamari erekari aitariakorimoni Xesosi säkire auiäkanimoni.

Imapotökire Ötäkikaretxi

¹¹Hätamatariko ia niökatsopare mitari. Ia iökatsopari imapotökire nota niuakoä niökatsopatakiti. ¹²Apanakini hite sauaki nirekari ninoaka apokaerekatiko, ininiä isäpiretari käkiti potxitakitinoka. Ninoakara paniätai hïtakiniri takaötxikari hïtoä. Kininiäpa ninoa nirekatari takaötxikari hïtakini? Ninoa misiritiko monökoni xika, ninoa paniätari Xoteo minakanuia takiniri takaötxikari iïtoäna, ininiä Xoteoakori potxitari ninoa oereëkiti säkiretxiti. Inirekarina Xoteoakori apokaerekatina ninoa. Txamari Kristonoka kamaerekatari käkiti, kotxi ipipe aamina ipiriämitakari nopini käkiti maerekani imakatzakini ikapani. ¹³Ninoa kamisirienererini kamari Moisesi paniätakiti takaötxikari itakinina iïtoäna. Txamari ikinika Moisesi paniätakiti !ikamana. Ninoa

nirekari hite takiniri takaötxikari hïtoä, ininiä eereka ninoa iuikaua, kotxi hite kamari ninoa paniätakiti. ¹⁴Kona ninirekari niuikiniua. Teoso !nirekari niuikiniua. Nota iuikari aäuïte Xesosi Kristo. Iuanokara niuika, kotxi iua ipina aamina ipiriämitakari nopini ate ikapani. Ininiä nota !nirekaikari Xesosi säkire mauïakani nireëkiti. Iuatxikana ninoa !nirekari nota nireëkiti. ¹⁵Takaötxikari hïtoä auiniä, iua takaötxikari !kamaerekatai hite. Takaötxikari hïtoä mauakaniä, takaötxikari mauakani !kamaerekatai. Teoso txïkitakiniäi iua anaakori hininiäua, iusaaki ikamaerekatai hite. Ininiäkara häkixinire amaneri itxaua. Ininiä mitxi hinireëkiti !hinirekaika. ¹⁶Teoso kamaerekaxiniretai hite, ikara säkiretxiti häuikasaaki. Iua amonïkai hite. Ikara atoko Teoso kamari käkiti iua nakitiakori ininiuana, atäo Isaeo mekaniriakori ininiuana.

¹⁷Ixipope ia iökatsopari. Nipinitana nota kamamaxiretakani. !Hïkamaxiretapeno, kotxi nimisiritaäkapeka. Nikaro mata auapeka niïtoä. Auïtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸Nitariakori, aäuïte Xesosi Kristo sikari ikinipoko erekari hite äkixiniremoni. Ameë.

ÉPESO

Paoro Iokanatsopatakiti Épeso Auakanimoni

1 Nota, Paoro. Niōkatsopatarari iā aātsopa. Teoso nirekano Xesosi Kristo iokanatakiti nininiua. Ininiā niokanatsopata Teoso nakitiakorimoni Épeso sitatxiti auakanimoni. Kristo Xesosi sākire auiākanimoni, ipaniātakiti kamakanimoni niokanatsopata. ²Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Teoso Mereēua Itixi Kamiko Apisapanika

³Masāpiretari Teoso, aāuīte Xesosi Kristo iri: “Erekapitikai,” kotxi itakapekari ikinika erekari ate ākixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴Itakari ikara erekari ate ākixiniremoni, kotxi itixi kamiko apisapanika Teoso mereēpekaua Kristo nakitiakori aniniua. Imereēua Teoso nireēkitinoka akamini ikapani, maerekati amakamakani ikapani, atiraōkiuatini ikapani. ⁵Itixi kamiko apisapanika, Teoso mereēua iua anaakori aniniua ikapani. Xesosi Kristo ipīpe ate ikapani, ininiā iua txīkitakaua Teoso anaakori aniniua. Teoso txīkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekarari ipotxitakiti ikamini tīkane.

⁶Teoso txīkitakaua iua anaakori aniniua, kotxi inirekari asāpiretiniri: “Peerekari ikinipoko erekari pisikakiti kākitimoni.” Teoso sikaua ikara erekari, kotxi iua tīretakiti nakitiakori atxaua.

⁷Xesosi iīkitxitari amaerekani, kotxi iarēka xiketa ate ikapani, ininiā

Teoso maxinīkaretari amaerekani. Uatxa !imisiritaikaua amaerekani xika. Teoso kamari ikara ate ikapani, kotxi ikinipoko erekari isika atemoni. !Ixipoka ikara erekari Teoso sikakiti. Ikinipoko erekari aua iuamoni. ⁸Kākiti kona posotari iaōtiniri erekari Teoso sikakiti ate maerekati kamakanimoni. !Kaiāotikori. Ikinipoko imaroretxi aua iuamoni. Atāo inakarinoka imarota ikamini, ininiā ikara erekari ikaminiāua. ⁹Mitxi !aimarotari Teoso inireēkiti ikamini tīkane. Uatxa ikamaimaroretāua. Ipotxitari oerekiniua inireēkiti. Peerekari iua potxitakiti. Ākixinireē ixinikari ikara ikamini. ¹⁰Teoso ketotini ōti manapi, ikinipoko iposope inakasaaki, iua apotiitariko ikinimane itixine auakani, itixiā auakani pakini.

¹¹Xesosi Kristo nakitiakori atxaua, ininiā aāpakapari ate ikapani inīkatakiti. Itixi kamiko apisapanika ixinikari ikamakiti ate ikapani. Ikamari ikinika inirekakiti iaōka. ¹²Iua mereēua ate, merepitipanika Kristo sākire auiākanīua, ikinimane asāpiretini ikapani: “Peerekari Teoso. Erekapitikari ikamakiti.”

¹³Hītepekana auikari Xesosi sākire, atāo inakari hīkenakotakasaaki. Ikara atāo inakari Teoso iokanapirena erekari itxaua, kotxi iua iokanapirena oerekai himaerekani makatxakiko. Xesosi sākire hāuikasaaki, Erekarari Matamatakoti apoka hākixinireē. Iua Teoso takaōtxikare itxaua. Iua oerekai hīte Teoso nakitiakori hininiua. Xesosi sikaenetapekari Erekarari Matamatakoti atemoni iokanatini. ¹⁴Isikaenetakiti Erekarari Matamatakoti atemoni auape, ininiā aimarotapitikari aāpakapiniri ikinika isikaenetakiti, inīkatakiti ate ikapani. Iuasaaki Xesosi apakapaua ate iua nakitiakori, iua iamotakini, kotxi imakatxakapekari amaerekani. Ikara

atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵ Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hitiretini nikenakopiretakasaaki, ¹⁶ nimisãkiretapikari Teoso hïte ïkapani. Nitxari iua: “Erekapitikai, kotxi pite makatxakari ninoa Épeso sitatxiti auakani maerekani,” nitxa.

¹⁷ Teoso, aãuïte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hïte ïkapani ia atoko: “Pisikaimaroretana ninoa ãkixinire. Ninirekari Erekar Matamatakoti oerekinina pite iteene imarotnina ïkapani. ¹⁸ Piopinikariko ninoa ãkixinire atão inakari imarotnina ïkapani. Pite akiritana ninoa ikinipoko erekari apakapnina ïkapani. Ikara poerekana ninoa imarotnirina ïkapani, iãtapinirina ïkapani. Pikamaimaroretana ninoa pite nïkatakiti pite nakitiakori ïkapani. Ikara pinïkatakiti, pisikaenetakiti, peerekari. Itori pinïkatakiti. !Ixipoka pinïkatakiti. !Kaiãotikori pinïkatakiti pinakitiakori ïkapani. ¹⁹ Pikamaimaroretana ninoa kaposotiire pinini. Ininiã piposotari iteene pisikaposotiiretinuia ate pisãkire auïãkani. Ikara piposotiire !uari ãtimoni. Pataparari pite posotiire.” Ia atoko nimisãkiretari Teoso hïte ïkapani.

²⁰ Ikara Teoso posotiire õkitikari Kristo ipïkani sauaki auakasaaki. Iposo atoko iposotiireë itakari Kristo apiari topãkiniãtaã, ikikomoni itixinëë. ²¹ Ininiã Kristo Apiananiri itxaua. Iua posotiire apiata. Maerekani matamatakoni auïteakori posotiire poiãoka. ïkorapokoriti auïtetxiakori posotiire poiãoka. Kristo posotiire apiata. ïkorsaaki Kristo Apiananiri.

Apaka katana Kristo atoko inakari !uari. !Auari ãti kaposotiireri Kristo atoko. Kristo apiata. ²² Teoso txïkitakari Kristo ikinimane auïte ininiua. Itakari ikinimane imokaiakariakori ikiti patapi, ininiã Xesosi paniãtakitnoka ikamana. Imokaiakari !uaika. Ininiã ikinipoko Teoso kamakiti auïte itxaua Kristo. Teoso sikari iua isãkire auïãkani auïte ininiua. Inakitiakori kii atoko itxa Xesosi. ²³ Iua ïto atoko itxa inakitiakori, ininiã ikinimane inakitiakori sauaki iua aua. Itxïkitakari ikinipoko atão inini.

Mitxi Ipïkani Atoko Atxaua

2 Hïtepekana, Xesosi txïkitapekari hïxinire auãki inini. Mitxi, isãkire hãuikini apisapanika, ipïkani atoko itxa hãkixinire, Teoso manirekakiniti hikamini xika, himaerekani xika. ² Iuasaaki hïte kamari ikini sereti maerekati, ïkorapokoriti auakani maerekani atokokana. Iuasaaki hikïpitari Satanasi sãkire, maerekani matamatakoni auïte sãkire. Iua, initiriakorikata aua ïtima auiniãtaã. Iua parïkauata Teoso sãkire makïpitakani xinire ãki. ³ Mitxipeka amakinika ate Teoso sãkire makïpitakani atxaua, kotxi akamari maerekati aïto paniãtakiti. Iuasaaki akamari maerekati aïto nireëkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonïkaua. Kaamonïkareri Teoso atoko inakari !uari. Iua iteene tiretaua. Ate maerekati kamakani atxaua, iuaritika itiretaua. ⁵ Ipïkani atoko anakasaaki, maerekatinoka akamakasaaki, iuasaaki itxïkitakaua auãki anini, Kristo auãki inïkitakini atoko. Iuasaaki imakatxakari amaerekani, kotxi inirekari ikinipoko

erekari isikiniua. ⁶Ininiã Teoso òkitikaua ipíkani sauaki aãuakasaaki, Kristo òkitikini atokokana. Ininiã itixineë Teoso takaua ate aítopákini Kristo Xesosikata, kotxi iua nakitiakori atxaua. ⁷Ininiã katanarako átipirika inirekari oerekiniri ikinipoko erekari atemoni. Erekari isikakiti !ixipoka. !Kamapotòkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸Atemoni erekari isikakitinokara makatxakari amaerekani, isãkire aãuikasaaki. Ininiã !aposota ateka maerekani amaktxakini, kotxi maerekati kamakani atxaua. Teoso sikakitinokara makatxakari amaerekani. ⁹Akamakiti erekari !iposotari amaerekani imaktxakini. Ininiã kãkiti iuikiniua !uari. Teosonokara posotari imaktxakiniri kãkiti maerekani. ¹⁰Peerekari Teoso paríka aãkixinireë, kotxi ikamaua ate ereka anini. Ininiã Xesosi Kristo nakitiakori atxaua. Ikara iparíka amaneri. Ikamaua ate amaneri anini, erekari akamini íkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Átika Nirimanetxi

¹¹Xoteo minakanuia hñtxaua, kotxi ikara atoko hñponaniã. Teoso takaòtxikare auaitotakini takauãkatai hñte: “Teoso takaòtxikare mauaitotakini.” Xoteoakori auari ikara Teoso takaòtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹²Hixinikariko mitxi, Kristo sãkire hãuikini apisa, Kristo !uari hñtemoni. Iuasaaki maparakini atoko hñtxaua. Isaekini !hñtxaua. Átiã hñtxaua. Ikara xika kona hñte posotari hãpakapiniri Teoso sikaenetakiti iuasaaki. Iuasaaki !himarotari Xesosi makatxakiniri

himaerekani. Iuasaaki !himarotari Teoso.

¹³Uatxa Kristo Xesosi apakapapekai hñte. Mitxi itakoxiti auakani atoko hñtxaua, iuaritika uatxa iua minai hñte Teosomoni, kotxi Kristo arëka xiketa hñte íkapani.

¹⁴Iuanokara kamaerekaxiniretaua, ininiã ixipokari Xoteo, Xoteo minakanuia pakini omanatakakiniua. Ikara omanãkaretxi paretxi atoko itxa. !Auiritari Xoteo sini Xoteo minakonimoni. Uatxa átika nirimantxi atxaua. ¹⁵Kristo ipíkasaaki,

ixipokari ikara omanãkaretxi, kotxi iuasaaki ikamari ikinika paniãtakori iòkatsopatakori ikinimane íkapani. Ikara Xoteoakorimoni sikakori. !Isikaãka Xoteo minakonimoni. Ininiã Kristo ipíkasaaki, itxikitakana Xoteoakori, Xoteo minakanuia pakini átika kãkiti amaneri atoko inini. Neenamati !auaika, kotxi Kristo kamaerekaxiniretaua amakinika.

¹⁶Ipina aamina ipiriãmitakari nopini, ininiã iuasaaki iuaãkana iminana Xoteoakori, Xoteo minakanuia pakini Teosomoni. Átika nirimantxi atoko iminana Teosomoni. Iuasaaki ixipokari Xoteoakori, Xoteo minakanuia omanatakakiniua. ¹⁷Xesosi apoka íkorapokoriti Teoso iokanapirena erekari isãpiretiniri kãkiti. Isãpiretari kãkiti, Teoso omanatiniri kãkiti imaerekani xika xipope, Xesosi sãkire auikasaakina. Isãpiretai hñte Xoteo minakanuia. Apaka isãpiretari Xoteoakori. Mitxi òtakoxiti auakani atoko hñtxaua, kotxi iuasaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸Erekari Matamatakoti átinoka aua. Kristo sãkire aãuikasaaki, iua Erekari Matamatakoti anikaua ari

Teosomoni. Anikari Xoteoakori, Xoteo minakanuia pakini iuamoni.

Teoso Aapoko Atxaua

¹⁹ Uatxa Teoso mimarotakani !hïtxaikaua. Uatxa äti uäka !hïtxaikaua. Teoso tixine auakani hïtxaua, apanakini Teoso säkire auäkanikata. Iua aapoko auakani hïtxaua.

²⁰ Teoso aapoko atoko atxaua. Aapokotxi kamaäka kaikori nopini imirikakani ikapani. Xesosi moianariakori tosi pakini, iua iokanatakini käkitemoni, ninoa säpiretakiti iua kaikori atoko itxa. Kitxakapirïka Teoso säkire säpiretakani säpiretakiti apaka iua kaikori atoko itxa. Aapokotxi aua ätika kai mitari, apanakini kai soro maïkakari. Xesosi Kristo iua kai mitari atoko itxa. ²¹ Ininiä iua maïkaua. Iuakata aäua, ininiä käkiti itoäpotari auikiniri Xesosi säkire. Apiananiri aapoko aneeäpotini atoko itxa. Iua Apiananiri aapoko atoko atxa. Imisäkiretiko aikoti atoko atxa. ²² Ininiä iua apotiitai hïte hïkinika iua aapoko hininiua ikapani, kotxi Teoso auiniätaä hïtxaua. Erekar Matamatakoti auiniätaä hïtxaua apaka.

Paoro Säpiretari Teoso Säkire Xoteo Minakonimoni

3 Ikara atoko ininiä, nota Paoro kateia äki naua, hïte Xoteo minakanuia Xesosi Kristo säkire nisäpiretini xika. Kateia äki naua, kotxi nauikari Xesosi säkire.

² Hikenakopiretapekari parïkatxi Teoso sikakiti notamoni, isäkire Xoteo minakanuia nisäpiretini ikapani. Ikinipoko erekari isika notamoni, hïte nisäpiretini ikapani. ³ Teoso oerekepekano käkiti mitxi mimarotakiniti. Mitxi axapitiki ikara Teoso oerekakiti niökatsopatapeka hitemoni. ⁴ Uatxa ia hätsopatakasaaki,

hïposotari himarotiniri nimarotakiti, käkiti mitxi mimarotakiniti, Kristo parïka käkiti ikapani. ⁵ Kitxakapirïka käkiti kona imarotari ikara Kristo parïka käkiti ikapani. Uatxa Erekar Matamatakoti oerekari ikara Xesosi iokanatakinimoni. Apaka oerekari ikara Teoso säkire säpiretakinimoni. Teoso parïkanoka ikamana ninoa. ⁶ Nisäpiretai hïte käkiti mitxi mimarotakiniti. Xoteo minakanuia apakapariko Teoso nïkatakiti itixineë, Xoteoakori apakapiniri atokotxikana. Xoteo minakanuia, Xoteoakorikata Kristo ito atoko itxauana. Xoteo minakanuia apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari säpiretari käkiti isikaenetakiti, kotxi isikari Kristo, Xoteoakori maerekani, Xoteo minakanuia maerekani apaka imaktxakini ikapani. Ikara käkiti mitxi mimarotakiniti.

⁷ Teoso iokanatano nota käkitemoni iua iokanapirena erekari nisäpiretini ikapani. Ikara parïkatxi isikano, kotxi ikinipoko erekari Teoso sikano nota iposotiireë. ⁸ Itomaneri Teoso nakitiakori poiäorini, iuaritika nota poiäori nininiua atoko inakari !uari. Iuaritika Teoso sikano ikinipoko erekari, kotxi iokanatano Xoteo minakonimoni erekari Kristo aukiti nisäpiretinina ikapani. Ikara erekari lixipoka. Itori. !Kimarotikori ikinipoko erekari Kristo aukiti. ⁹ Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakiniua. Itixi kamikosaaki, Teoso kipatari ikara käkiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !uari. ¹⁰ Uatxa Teoso nirekari imereëkini oerekiniri ikinipoko Teoso imarore

auñtetxiakori matamatakonimoni, Teoso tixine auakanimoni. ¹¹ Itixi kamiko apisapanika, átipirika Teoso nirekari aãuñte Kristo Xesosi kaminiri íkapani inirekakiti kãkiti íkapani. ¹² Kristo kamakiti ate íkapani aãuikiniã, aposotapitikari aãpokini Teosomoni, ininiã !kapíkareua Teosomoni aãpokini. Ataparaxiniriritika asari uamoní. ¹³ Ininiãkara nõtãkikai hñte. !Himatnaniuatape nimisiritiko xika. Nimisritaãka hñte íkapani, Xesosi sãkire hãuikini íkapani, ininiã hñuikariko nimisiritiko. Teoso auiritari nimisiritiko, kotxi iua iteene tìretai hñte.

Iuaíkana Paoro Misãkiretiniri Teoso

¹⁴ Teoso nirekakiti kãkiti íkapani nixinikasaaki, nikapotoreëkãua aãuñte Xesosi Kristo iri apisatoõ, nimisãkiretiniri íkapani. ¹⁵ Íkinimane Teoso nakitiakori, itixine auakani, apaka íkinimane íkorapokoriti auakani apakapari iua uãka. ¹⁶ Ia atoko nimisãkiretari Teoso hñte íkapani: “Peerekai pite. Íkinipoko erekari aua pitemoni. !Ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekari Matamatakoti iteene sikataparatinina ninoã ãkixinire. ¹⁷ Ninirekari iteene auiknirina Kristo sãkire, ininiã Kristo auapika ãkixinireãna. Ninirekari ninoã iteene imarotniri pite tiraõki. Takari kotsa kipatxi erekari ãki auini atokokana, ninirekari ninoã kaikotini pitekata pitiraõki sikataparatinina íkapani. Imarotniãrina pitiraõki, !irikana. !Ikamarina maerekati. ¹⁸ Ninirekari ninoã, pinakitiakori, apanakini pinakitiakori pakini, imarotniri Kristo tiraõki kãkiti íkapani, kotxi Kristo tiraõki !ixipoka. !Kaiãotikori iua tiraõki. ¹⁹ Kãkiti kona posotari imarotniri íkinika Kristo tiraõki. Ninirekari ninoã Épeso auakani

apakapiniri ikini sereti erekari pisikakiti ãkixinireãna, pite atão imarotnina íkapani.” Ikara atoko nimisãkiretari Teoso hñte íkapani.

²⁰ Ininiã uatxa maxinikariko iua. Kaposotiireri apiatakari itxãua. Íkinipoko iposota ikamini. Imaposotakiniti !auari, ininiã íkinika aamanaãkiti, íkinika axinikakiti pakini, iposota ikamini. Ari, apikomoni iposota ikamini ate íkapani. Axinikakiti, aamanaãkiti poiãoka. Apiata iposotiire. Iua posotiire paríkãuata aãkixinireã. ²¹ Ininiã Teoso mereëkini kitxakapiríka auakani, uatxa auakani, katana auakani pakini átipirika txariko Teoso: “Peerekai pite. Apiananiri pitxãua.” Ikara atoko itxãna, kotxi Xesosi Kristo makatxakari amaerekani Teoso anaakori aniniua íkapani. Ameë.

Xesosi Auiãkani ãtika Íto Atoko Itxãuana

4 Kateia ãki naua, kotxi nauikari Apiananiri sãkire. Ininiã nota iteene õtãkikai hñte ikiniõtika atão hñkamini, kotxi Teoso akiritai hñte iua anaakori hininiua íkapani. Ikara atoko hininiã, iua kamakiti atokokana hñkamako. ² Ininiãkara !hñuikapeua. !Hinirekapiri hinirekakitinoka hñkamini. Hãuiritariko ãti kaminiri iua nirekakiti. Katima homanãkarauataka !hñtxapeko. Himiteenekakakauako hñkerokasaakiri hñkamakiti. Hñtìretakakauako. ³ Erekari Matamatakoti txíkitakari axinikakiti, anireëkiti pakini átinoka inini, kotxi iua kamaerekaxiniretaua. Ininiãkara hñparíkãuatako ikara atoko auini íkapani. ⁴ Xesosi ãto atoko atxãua. ãtika íto, ininiã ãtotxi ãtika atoko atxãua. Erekari Matamatakoti átinoka aua. Teoso akiritakasaakii inakitiakori hininiua, hiãtapariko hãpokini iua tixine iuakata hãuini íkapani. Ininiã átinoka hiãtapakiti. ⁵ Átinokara Apiananiri aua. Átinokara aãuiãkiti

sākiretxiti aua. Ātinokara apatxisatiko.
⁶Ātika Teoso aua. Iua ikinimane iri
 ātika aua. Iua ikinimane apisatoō
 apiatakari itxaua. Ikini itixiti iua aua.
 Amakinika aākixinireē iua aua.

Teoso Sikakiti Atemoni

⁷Kristo sikapekari iposotiire ate
 amakinimoni iparīka akamini ikapani.
 Iposotiire isikaua aparīka akamini
 ikapani. Aparīka pamimari, ininiā
 apiata isika iposotiire atemoni. ⁸Kotxi
 Teoso sākire kitxakapirīka txari:
 Ikanīkasaaki itixinemoni, imikanapir-
 iāna kākiti mitxi imokaiakari
 maikakini. Iuasaaki isikari erekari
 kākitimoni.

⁹Iua kanīka, kotxi mitxipe iua katxaka
 itixi patapixiti ipīkani auiniātaā. ¹⁰Iua
 itixi patapixiti katxakakari, iuatxikana
 kanīka iaxiti apiko nopinixiti, ininiā
 uatxa iua aua ikini itixiti, iaxiti, Teoso
 tixine pakini. !Auari iua mauakaniātaā.

¹¹Iposotiire isikasaaki isākire
 auīākanimoni, isikari ia atoko
 parīkauatakani ininiuana ikapani:
 Kristo iokanatakini kākitimoni, Teoso
 sākire sāpiretakani, Teoso iokanapirena
 erekari sāpiretakani, Teoso nakitiakori
 ōtākikakani, Teoso sākire oerekakani
 pakini isikaua. ¹²Ikara atoko isikaua,
 kotxi inirekari ninoa oerekiniua
 inakitiakori iparīka atāo akamini
 ikapani. Ikara atoko isikaua, kotxi
 ninoa sikataparaxiniretaua. ¹³Ninoa
 sikataparaxiniretiniritika ātika aāuiākiti
 auako. Ipinimoni inakari aāuiākiti
 !auaika, kotxi atāo aimarotariko
 Teoso ākiri sākire. Ininiā kiikiteua,
 kimaroreua iuasaaki. Kristo atoko
 atxauako, kotxi paimatireri iua.

¹⁴Ininiā iuasaaki amarini atoko
 !atxaikaua, kotxi amarini !imarotari
 atāo inakari. Tsakati anikakiti atoko,
 itima anikakiti atoko itxana kākiti
 kamisirienereri sākire auīākani.

!Imarotarina atāo Teoso sākire.
 Ninoa kamisirienereri xinikaxitita
 atāo minakati oerekini ikapani.
¹⁵Atāo inakarinoka asāpiretako kākiti
 atiraōkiritika. Ikara atoko akaminiā,
 aimarore aneeāpota. Kristo sākire
 iteene aāuikaāpota. Erekari akamakiti
 aneeāpota. Ininiā Kristo atoko atxaua,
 kotxi iua ito atokotxikana atxaua.
 Ate kii atoko itxaua Kristo. ¹⁶Itotxi
 kamari ikii paniātakiti. Iua atokokana
 ate kamari Kristo paniātakiti. Ininiā
 aāpotiitaua. Amoianatakakaua
 Kristo parīka akamini ikapani, kotxi
 itotxi ātika atoko atxaua. Kristo
 sikataparataua amoianatakakiniua.
 Ininiā ikinika Kristo nakitiakori atāo
 parīkauatiniā iua ikapani, apiaāpota
 aimarotari iua imarore atāo akamini
 ikapani. Akinika atāo aparīkauatiniā
 Kristo ikapani, ikamataparaxiniretaua.
 Iuasaaki atiretakakaua. Iuasaaki itotxi
 erekari, mamianatakati atoko itxaua
 Kristo nakitiakori.

Aūuni Amaneri

¹⁷Ikara atoko ininiā, ia nisāpiretai.
 Apiananiri imaroreē iteene nōtākikai.
 !Hikamapinikariko apanakini
 Xoteo minakaniua kamakiti atoko.
 !Kiūkiteri ninoa kamakiti. !Kiūkiteri
 ixinikakitina. ¹⁸!Imarotarina atāo
 inakari. Mapiāri atoko itxa iikitena.
 Ikara atoko ininiā, !kimarorena.
 Teoso !itxikitakana auapininiika
 ininina, kotxi ākixinireēna !inirekarina
 atāo inakari imarotinina. ¹⁹Ninoa
 ākixinire āpatapeka, ininiā !ipētauatana
 maerekati ikamakasaakina. Ininiākara
 ninoaka sikaua Satanasimoni iitona
 nireēkitinoka ikaminina ikapani.
 Ininiā ikamarina ikinika maerekati.
 Itori maerekati inireka ikaminina.
 !Inirekarina iotokakinirina ikara
 maerekati ikaminina.

²⁰ Hītepekana, ikara maerekati !hōerekaāka, Kristo himarotakasaaki. ²¹ Iuasaaki hīkenakotapitikari iua sākire. Iua oerekai atāo inakari, kotxi Xesosi imarotari ikinipoko atāo inakari. ²² Hōerekaāka hītakanapiniri maerekati mītxi hīkamakīti, hīxinikakīti pakīni. Himāka kītxakari hōkīni atokokana hītxapaniko himaerekani hītakanapīni. Hītakanapariko ikara kītxakari hinireēkīti, kotxi ikara maerekati hinireēkīti misīrienetai. ²³ Ininiā eereka hamanaāriko Teoso txīkitakiniri hīxinikakīti, hinireēkīti pakīni amaneri inini. ²⁴ Ininiā himāka amaneri hīretakīni atokokana, amanerinoka atāo inakarinoka hīkamako, kotxi Teoso txīkitakai hīxinire amaneri inini, Teoso atoko hinini ikapani. Ininiā atāo inakari himarota. Erekarinoka hīkama. Teoso ikapaninanira hīparīkauatako.

²⁵ Ininiā aāpirena kona hīkamape hītariakorimoni. Atāo inakarinoka hīsākiretako, kotxi amakinika ate ātika itotxi atoko atxaua. ²⁶ Hina-iatakasaakiua, !hāuiritapiri homanākare txīkitakinii maerekati hīkamini. Himakini apisapanika, hīotokakariko homanākarauatīni. ²⁷ Ikara homanākare himatakanapakanisaaki, hāuiritari Satanasi txīkitakinii maerekati hīkamini, ininiā !hāuiritapiriko iua.

²⁸ Atxiīti hīitriuatapeka, ininiā !hīitriuatapīnikako. Hīparīkauatako. Erekarī parīkatxi hīuakoā hīkamako, hīparīka īki hāpakapīni ikapani. Ininiā eereka aua minakati hītemoni, kākīti minakati mauinakinimoni hīsikīni ikapani. ²⁹ Maerekati sākiretxiti !hīsāpiretapiri kākīti. Erekarinoka hīsāpiretako, hīsākire kenakotakani hīsikataparaxiniretīni ikapani, ikinipoko erekari Teoso sikakīti ninoa apakapīni ikapani. ³⁰ Kona hīkamamatīnanitapiri Erekarī Matamatakoti Teoso nakīti himaerekani

xika. Erekarī Matamatakoti Teoso takaōtxikare itxaua. Teoso sikapekari iua atemoni, ininiā aimarotapītikari aāpakapīniri ikinipoko Teoso sikaenetakiti Kristo uai kanapiriākasaaki. Iuasaaki imaktxakaua īkinika maerekati auiniātaā. ³¹ !Hīnīkatapiri homanākare hākixinireē. Katima naiataka !hītxapeko. Ātipirika apanakīni homanatinī, hītakanapako. !Hītxitapiri āti. !Hīmīsākīrepiretapiri āti. İkīni sereti maerekati ikara atoko inakari hītakanapako. ³² Erekarī hīkaminakakauako. Hīamonīkakauako. Hīmaxinīkaretariko maerekati āti kamakīti hītemoni, maerekati ate kamakīti Teoso maxinīkaretīni atokotxikana. Teoso maxinīkaretari amaerekani, kotxi Kristo ipina ate ikapani.

Hītiraōkiuatako İkīniōtika

5 Teoso anaakori itiretakini hītxaua, ininiā hīkamariko Teoso kamakīti atokotxikana. ² Hītiraōkiuatako ikīniōtika, Kristo tīretīniua atokotxikana. Iuaka isikaua Teosomoni, kotxi ipina ate ikapani. Teoso apokaerekatarī Kristo ipīnīni ate ikapani. Peerekari isikīniua Teosomoni.

³ Teoso nakītiakori hītxaua, ininiā kona nīnīrekari nīkenakopīretīniri pītaniri minakotikatīka, pītanoro minakotokatīka pīsīrīkīni. !Apakata maerekati hīito nīrēkīti hīkamini. !Apakata maerekati hīito nīrēkīti hīxinīkīni, hīsāpiretīni. Ikara hīxinire txīkotakari hītakanapako. Txīneiro potxitakani !hītxapeuako. ⁴ !Hīsāpiretapiriko sākiretxi maerekati. Sākiretxi mīkīteti apaka !hīsāpiretape. !Hīnapetapiri āti. Hīsākīrauatakasaaki, hītxariko: “Peerekari Teoso, kotxi isikaua ikinipoko erekari.” ⁵ Aimarotari ia: Ītanoro minakotokatīka sīrīkakari, maerekati iīto nīrēkīti kamakari,

txineiro potxitakani pakini litesonetari Teoso. Teoso kamakori misäkiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auütetxi ininiätaäua.

⁶Kona häuiritapiri käkiti misirienitini hite miikiteti säkiretxitiä. Kona !häuikapiri ninoa säkire, kotxi ikara atoko inakari maerekati xika, Teoso misiritariko isäkire makipitakani. ⁷Ininiä ikara atoko inakani moianariakori !hïtxapeuako.

Pokamara Atoko Hïtxaua

⁸Mïtxi hïte mapiäri atoko hïtxa, kotxi !himarotari Apiananiri iusaaki. Uatxa hïte imarotapitikari iua, ininiä pokamara atoko hïtxaua. Ininiäkara erekarinoka hïkamako ikiniötika. ⁹Erekari Matamatakoti auakasaaki käkiti äkixinireë, erekarinoka inireka ikamini. Atäonoka ikama. Atäo inakarinoka isäpireta. Ikara atoko inakari Erekari Matamatakoti sikakiti. ¹⁰Hinitariko Apiananiri nireëkiti hïkamini ikapani. ¹¹Ikara atoko ininiä, kona himoianatapiri käkiti maerekati kamakani, kotxi ikara parikatxi ipiaä potorikakari. Ikara atoko inakari parikatxi !iminari erekari atemoni. Ininiä maerekati !hïkamape. Ia hïkamako. Hõerekariko käkiti maerekati makamakani. ¹²Apëtauata asäpiretiniri Teoso säkire makipitakani kamakiti ipiaä, kotxi apia maerekati ikora. ¹³Ikinika tirikapi kamara auiniätaä atamataäka, ¹⁴kotxi tirikapi iopinikari ikinika. Ininiä äti txari: “Himereka, imakakani atoko inakanii. Hõkitikauako ipikani atoko inakanii. Ininiä iusaaki Kristo iopinikariko häkixinire.”

Miikiteti !Hïtxapeua

¹⁵Erepaniko. Atäo inakari hïkamako ikiniötika. !Hïkamapiri miikiteti kamakiti atoko. Hïkamariko käkiti kiikiteri kamakiti atoko. ¹⁶Hïkamariko erekari, kotxi poiäonoka häuini. Hïkamariko erekari ikiniötika, kotxi maerekati auapitika ikorasaaki. ¹⁷Ininiä miikiteti !hïtxapeua. Himarotariko Apiananiri nireëkiti.

¹⁸Kona hiätapero iäriä kapoäro hïpoätini ikapani, kotxi itxikitakai maerekati hïkamini. Häuiritariko Erekari Matamatakoti txikitakinii erekarinoka hïkamini. ¹⁹Hisäpiretakakaua xikari Teoso ikapani, xikari kitxakari, xikari ikorapokoriti auakari pakini. Hïxikaretari ikara atoko inakari xikari Teoso ikapani. Häkixinireë apaka hïxikarauata Teoso ikapani. ²⁰Ätipirika hïtxariko äiri Teoso: “Erekapitikai pite, kotxi erekari ikinipoko pisikakiti atemoni.” Xesosi Kristo ääuïte ininiua, asäpiretari Teoso ikara atoko inakari.

Tanorotxi Pirena.

²¹Hïpaxitakakauako, äti nirekakiti hïkamini, kotxi hïpikariko Teoso manirekakiniti hïkamini. ²²Ininiä hïte sitoakoro hïkamariko hïtaniri nireëkiti. Apiananiri nireëkiti hïkamini atokokana hïkamariko hïtaniri nireëkiti, ²³kotxi pïtäni piki atoko itxaua. Ininiä iua piauïte itxaua. Iua atokokana Kristo inakitiakori kii atoko itxaua Kristo. Iua ïto atoko atxaua. Ääuïte itxaua. Amaerekani makatxakakari itxaua. Ininiä sito kamariko oïtaniri paniätakiti. ²⁴Ininiä käkiti Kristo nakitiakori kamari Kristo nireëkiti. Iua atokotxikana sito kamariko ikinipoko oïtaniri nireëkiti.

Taniritxi Pirena

²⁵Hïte taniritxi, hïtiretaroko hïtanoro. Kristo tiritinina inakitiakori

atokokana, hītiretaroko hītanoro. Iua iteene turetana, kotxi ipina inakitiakori ikapani. ²⁶Iua ipina, kotxi inirekari itxikitakiniua ate iua nakitiakori aniniua. Inirekari imaktxakiniri amaerekani. Āparaā maktxakiniri aīto txiko atokokana, iua sākire maktxakari amaerekani aākixinireē auakari. ²⁷Kristo ipina inakitiakori ikapani, kotxi inirekaua iposope anini ate apakapini ikapani. Iuasaaki peerekaua. Ātika amaerekani !auaika. Ātika akerokakiti !auaika. Ikara atoko inakari maerekati !auaika. Iuasaaki atāo Teoso nakitiakori atxaua. Erekarinoka akama iuasaaki. ²⁸Ikara atoko ininiā, kiki turetaroکو itanoro, iito itiretini atokokana. Itanoro turetakari iuaka itiretaua. ²⁹Kākiti !omanatari iuaka ito. Isikakienatari. Itiretari. Apiananiri turetini inakitiakori atokokana, kākiti turetari iuaka ito. ³⁰Apiananiri ito atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaāpota. ³¹Iua ito atoko atxaua, ininiākara kiki itanorouatakasaaki, itakanapana iri, inoro pakini itanorokata ikaikotini ikapani. Ininiā ātinoka itotxi atoko itxauana. ³²Nisāpiretai mitxi !kimarotikori. Kristo inakitiakorikata ātika itotxi atoko itxauana. Kākiti !imarotari ikara mitxi. ³³Ininiā pitiretaroko pītānoro piteka ito pitiretini atokokana. Pite tanorotxipekana, pipaxitariko pītaniri.

Amarini Pirena

6 Hīte amariniakori, hīkīpitanako hīri, hinoro pakini sākire, kotxi ikara Apiananiri paniātakiti. Atāo pikīpitanako ninoa sākire. ²Kitxakapirīka Teoso sākire paniātaua: Hīpaxitanako hīri, hinoro pakini.

Ikara Teoso paniātakiti hīkaminiā, Teoso sikaenetakiti isika hītemoni. Mitxi Teoso paniātakiti !uari Teoso sikaenetakiti.

³Hīri, hinoro pakini sākire hīkīpiniā, ia isikaenetakiti apokapitikako hītemoni. Hīkīpitiniāri ninoa sākire, erekari hāuini. Hīkīpitiniāri ninoa sākire, hāuiniritika kiomātxi hītxauako.

Irītxi Pirena

⁴Hītepekana irītxiakori, kona hītxikitakapena hamariteakori omanākarauatini atāo minakati hīkamini xika. Hōerekanako Apiananiri nireēkiti ikaminina. Hōerekanako Apiananiri sākire imarotiniina.

Nitiritxi Pirena

⁵Hītepekana nitiritxiakori amotakoni, hīkamariko hīauīteakori ikorapokoriti auakani paniātakiti. Hīpaxitanako ninoa. Hīpīkariko ninoa manirekakiniti hīkamini. Hākixinireē hinirekariko ninoa nireēkitinoka hīkamini. Kristo paniātakiti hīkamini atokokana, hīkamariko ninoa paniātakiti.

⁶!Hīparīkauatapeko hīparīka erekari apanakini atamatini ikapani ikapani, kotxi iuasaaki hinirekari ninoa poxokotini. Kristo nitiriakori hītxaua, ininiā hīparīkauata Teoso nireēkiti hīkamini, kotxi hākixinireē ikaranoka hinireka hīkamini. ⁷Hīkamariko hīparīka ikinika hīpoxokoniritika, hinirekiniritika. Apiananiri ikapani hīparīkauatini atokokana, hīparīkauatako hīauīte ikorapokoriti auakari ikapani. ⁸Kotxi himarotari Apiananiri sikariko parīkatxi īki kākitimoni, ikinipoko erekari ikamakiti īki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina īki.

Patrão Pirena

⁹Hítepekana patrão, ia atoko inakari hīkamako hinitiriakorimoni. !Hītxapiri hinitiriakori: “Ikinika nota paniātakiti himakamakaniā, iteene nimisiritai hīte,” kotxi hīte patrãoite aua apaka iaxiti. Iua Teoso. Teoso kamakiti poiāorimoni, iua atokotxikana ikamakiti auītetximoni.

Kākiti Xinire Tokapare

¹⁰Nitariakori, ia nisākire mapotōkire: Katapara hītxako. Hīkosekataparatariko Apiananiri tapara, kotxi kaposotiireri iua. ¹¹Sotato ieretakari iūto tokapare, neenamati ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamati auapitika Satanasikata. Iua paimatireri. Ixinixaxititapekari itxīkitakinia maerekati akamini. ¹²!Aneenamauata kākītikata. Aneenamauata maerekani matamatakoni auīteakorikata, ikinika maerekani matamatakoni kaposotiirerinkata. Aneenamauata auītetxiakorikata ikorapokoriti ipiaā auakanikata. Aneenamauata ikinipoko maerekani matamatakoni iaxiti auakanikata.

¹³Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanitari Satanasi isini. Hīte káiata.

¹⁴Sotato iposope ineenamauatini atoko hītxako. Sotato takari ipakiomatare. Ipakiomatare maikari ikinipoko iūto tokapare. Sotato pakiomatare atoko itxa hīxinire tokapare maikiko. Atāo inakari sākiretxiti itxaua iua. Ininiā hītakariko ikara hīpakiomatare.

Sotato takari itorota koana, itorota tokapare ikapani. Sotato torota koana atoko itxa hīkamakiti atāo inakari-

noka. Ininiā hīeretakariko ikara hītorota tokapare.

¹⁵Sotato kiti apaka iposope ineenamauatini, kotxi itakari ikiti mata ikiti tokapare ikapani. Sotato kiti mata atoko itxa Teoso iokanapirena erekari aanikapiretakiti kākītimoni. Ikara iokanapirena sāpiretaua Teoso limisiritaikaua, isākire aūikasaaki. Ininiā hīeretakariko ikara hīkiti mata.

¹⁶Sotato maikari itokapare, iūto imokaiakari xiripi minokakani ikapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasi liposotari inokinii maerekatiā. Ininiā himaīkariko ikara tokaparetxi.

¹⁷Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.

Sotato anikaro iouata mitaro. Oa iouata mitaro atoko itxa Erekar Matamatakoti sāpiretiniua Teoso sākire. Ininiā himaīkaroko oa iouata mitaro.

¹⁸Himisākiretariko Teoso ātipirika. Hamanaāriko, Erekar Matamatakoti nirekiki iaōka hāpakapini. Araōkire hītxako. !Hītakanapapiri hīsākirauatini Teosokata. Hamanaāriko Teoso, ikinimane inakitiakori nirekiki isikinina.

¹⁹Himisākiretari Teoso nota ikapani apaka. Hamanaāri Teoso, isākire isikinino nisākirauatakasaaki, nitaparaxinireritika nisākirauatini ikapani, kotxi ninirekari Teoso iokanapirena erekari nisāpiretiniri kākiti. Mitxi Teoso iokanapirena erekari !kimarotikori.

²⁰Uatxa Teoso iokanatanota nota kākītimoni, iokanapirena erekari nisāpiretini ikapani. Ikara nisāpiretini xika, kateia

āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹Niokanatarī Txīkiko inakori hītemoni. Aītari atiretakiti iua. Apiananiri nitiri itxaua. Atāo iparīkauata Apiananiri īkapani. Iua sāpiretaiko hīte nota pirena. Ikara atoko himarotariko nauini, nikamakiti pakini. Iua sāpiretai ikinipoko nota

pirena. ²²Ininiā niokanatarī iua hītemoni ate pirena himarotini īkapani, isikataparaxiniretinii hīte īkapani. ²³Nitariakori, aīri Teoso, Apiananiri Xesosi Kristo pakini kamaerekaxiniretai. Itiretaina hīte. Itxīkitakaina Teoso sākire iteene hāuikini. ²⁴Teoso sikari ikinipoko erekari aāuīte Xesosi Kristo ātipirika tirketanimoni. Ameē.

PIRIPOSI

Paoro Iokanatsopatakiti Piriposi Auakanimoni

1 Nota Paoro, Tximótxio pakini, Kristo Xesosi nitiriakori iua amotakini atx-
aua. Niökatsopata ikini kākiti Kristo Xesosi nakitiakorimoni, Piriposi sitatx-
iti auakanimoni aiokanapireta. Niökat-
sopata hīte kōtākikarerinimoni, kotxi
hīte ōtākikana Xesosi sākire auiākani.
Hītepekana, kamiparīkarerini, niökat-
sopata hītemoni, kotxi hīte moianatana
Xesosi sākire auiākani.

²Ereēkai hīte. Aīri Teoso, Xesosi
Kristo Apiananiri pakini sikai ikinipoko
erekari. Ninoa kamaerekaxiniretai.

Paoro Misākiretari Teoso Piriposi Auakani Īkapani

³Hīte nixinikasaaki: “Erekapitikari
aTeosone,” nitxa. ⁴Teoso nimisākire-
takasaaki hīte himakinika ĩkapani,
nipoxokoniritika nimisākiretari
Teoso. ⁵Nipoxokoniuata, kotxi hīte
miparīkatano nota Teoso iokanapirena
erekari nisāpiretini ĩkapani, kotxi hīte
iokanataro txineiro notamoni. Teoso
iokanapirena erekari hāuikasaaki,
hīporika himiparīkatatinino. Eereka
kona hīte iotokaika himiparīkatatinino
nota. Uatxa auapika himiparīkatatinino
nota. ⁶Teoso sikari erekari hītemoni
merepanika isākire hāuikasaaki, ininiā
nota imarotapitikari Teoso sikari erekari
hītemoni ikiniōtika. Ikara Teoso parīka
hītemoni. Erekari isikiniritika Xesosi
kanapiriā ĩkorapokoriti. ⁷Atāōpitika
nixinikinii hīte nipoxokoniritika, kotxi
iteene nitiretai hīte himakinika. Atxiīti
kateia āki naua. Atxiīti mapara naua,
kākiti Teoso iokanapirena erekari
atāo ininiua noerekini ĩkapani. Atxiīti
nisāpiretari Teoso iokanapirena erekari,

kākiti iteene imarotiniri ĩkapani. Kateia
āki nauakasaaki, mapara nauakasaaki,
ikiniōtika hīte notakata apakapari
ikinipoko erekari Teoso sikakiti.
⁸Nota iteene tiretai hīte. Kristo Xesosi
tiretinii atokokana nitiretai hīte. Teoso
imarotari ikara nisākire atāo inini.

⁹Nota misākiretari Teoso hīte ĩkapani
ia atoko: Ninirekari hītiraōkiuatini
apiaāpotini ikiniōtika. Hītiraōki
aneeāpotakasaaki, ninirekari himarore
apaka aneeāpotini. Imaroretxi
himaroāpotakasaaki, ninirekari
atāonoka himarotini. ¹⁰Ikara atoko
hininiā, himereēri apia erekari
hīkamini. Ininiā maerekati !hīkama.
Maerekati na apanakinimoni !hīkama.
Ikara atoko hininiā, iposopeka hītxa
Kristo kanapiriākasaaki. ¹¹Ikara atoko
hininiā, ikinipoko hīkamakiti erekari.
Xesosi Kristonokara kamaerekatai
hīte hīkamakiti ereka inini ĩkapani.
Apanakini atamatakasaakiri erekari
hīkamakiti, ninoa imarotari Teoso
posotiire, ininiā eereka ninoa:
“Peerekari Teoso,” itxanako.

Paoro Misiritiko Pirena

¹²Nitariakori, himarotari nota
iteene misiritaāka. Iuaritika Teoso
iokanapirena erekari iaripiretapeka.
Ninirekari himarotiniri, nimisiritiko
xika apikomoni kākiti imarotari
Teoso iokanapirena erekari. ¹³Ininiā
nimisiritiko xika ikinika sotatoakori,
Homanoakori auīte aapoko inīkatakani,
ikinimane kākiti mapara auakani
apaka imarotari nota uai kateia āki
nauakasaaki Kristo sākire nisāpiretini
xika. ¹⁴Itori aītariakori Apiananiri
sākire auiākani, sikataparaxiniretaāka,
kotxi imarotarina Teoso nīkatatinino
nota kateia āki nauakasaaki. Ininiā
ninoa sāpiretari Teoso sākire
itaparaxiniriritikana. Mapīkaretika
itxana.

¹⁵ Ninoa sãpiretari Kristo sãkire, kotxi inirekarina erekari ikaminina. Txamari apanakinipekana sãpiretari Kristo sãkire nota xikotiko xika. Inirekarina kãkiti auikiniri ninoaka sãkire, nota sãkire poiãoka auikinina ikapani. Ninoa sãpiretari Kristo iokanapirena, kotxi ninoa potxitari kãkiti taparakienatakiniua. ¹⁶ Aĩtariakori, ekerarinani nirekakani, sãpiretari Kristo iokanapirena, kotxi ninoa tiretano nota. Ninoa imarotari Teoso sakinino nota ia parĩkatxi, Teoso iokanapirena erekari atão inini noerekini ikapani. ¹⁷ Nota xikotakani sãpiretari Kristo sãkire, txamari inirekarina ninoaka nireẽkiti ikaminina. !Inirekarina Teoso nireẽkiti. Inirekarina nota apia atatsiitiniri nimisiritiko uai kateia ãki nauakasaaki.

¹⁸ Atxiĩti Kristo iokanapirena sãpiretakani ãkixinire erekari. Atxiĩti ninoa ãkixinire kona erekari. Iuaritika erekapitĩkari, kotxi Kristo iokanapirena sãpiretapeẽkaika. Ininiãkara nipoxokoniua nota. Ari, !niotokapani nipoxokoniuatini. ¹⁹ Nipoxokoniua, kotxi nimarotari nitakanapiniri kateia, kotxi hĩte misãkiretari Teoso nota ikapani. Nimakatzakaãkako kateia ãki, kotxi Erekari Matamatakoti Xesosi Kristokata auakari moianatano nota. ²⁰ Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ikapani. Ikara atoko nininiã, apanakini imarotari Kristo Apiananiri ininiua. Ikinĩõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireẽkitinoka nikamini. Erekapitĩkari nipinini, kotxi eereka Kristokata

nauapika. ²² Auapanika ninakasaaki, niparĩkauatapitipo Teoso sãkire nisãpiretini, ininiãkara erekari niparĩka. Kipa ninireka? Nota auapanika nininikani? Nipininikani? !Nimarotari ninireẽkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauuni ikapani. Ikara atoko apiaerekata. ²⁴ Txamari hĩte noerekini ikapani, ninirekari auapanika ninini, kotxi hĩte nirekapanikano nota. ²⁵ Ikara nimarotapitika, ininiã auapanika nitxa, himakinika noerekini ikapani, kotxi nota nirekari himaroãpotiniri Teoso sãkire. Ninirekari hãuikiniri hĩpoxokoniritika. ²⁶ Ininiã eereka hĩtxari: “Erekapitĩkari Kristo Xesosi, kotxi Paoro iuaĩkana apoka atemoni,” hĩtxapaniko. Ininiã iteene hĩpoxokoniua iusaaki.

²⁷ Atxiĩti auapanika nitxa, atxiĩti nipina, iuaritika ikiniõtika ereka hĩtxako hãuini. Erekari Kristo iokanapirena, ininiã hĩte apaka ereka hĩtxako hãuini. Atxiĩti nisa hĩtemoni. Atxiĩti kona nisa. Atxiĩti nikenakopiretai hĩte uai kateia ãki nauakasaaki. Iuaritika, hãuini ereka inakasaaki, nimarotariko hĩte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĩte himakinika sãpiretiniri Kristo iokanapirena iaõka apanakinimoni. ²⁸ Hãuini ereka inakasaaki, na hĩpĩkana hĩte omanatakani. Hĩtaparaxinireritika hãuiniã, ninoa hĩte omanatakani imarotari ixipokinina ãti õti. Hĩtaparaxinireritika hãuiniã, ninoa imarotari Teoso makatzakinii hĩte himapinakani ikapani. ²⁹ Ininiã Teoso sikari erekari hĩtemoni, kotxi iua auiritai hĩte auikiniri Kristo iokanapirena. Apaka erekari isikai hĩte, kotxi iua auiritai hĩte atatsiitiniri himisiritiko Kristo ikapani. ³⁰ Hĩte

atamatapekari nota misiritiko, hīte sauaki nauakasaaki. Hīkenakopiretari nimisiritiko auapanika uatxa. Uatxa hīte nota atoko, kotxi hīte apaka misiritaāka.

Kristoka Poiāotakaua.

2 Kristo sikataparaxiniretaua ate, iua nakiti aniniāua. Kristo mīkapiritaua ate, amarini axapitiri inoro mīkapiritini atoko itxa, kotxi iua tiretaua. Ātipirika iua Erekarī Matamatakoti amoianari itxaua. Kristo iteene tiretaua. Iua amonīkaua.

² Ininiākara nota ōtākikai hīte hīkinika. Hīxinikariko Teoso nireēkitinoka hīkamini, ininiā hīxinikakiti ātinoka txauako. Hītiretakakauako Teoso tiretiniua atokokana. Hinireēkiti ātinoka txauako. Ikara atoko hininiā, iteene hīkamapoxokonitano nota.

³ Kona kapotxinaniri hītixapeua. !Hīuikapeua. Hīteka minakati hītixauako. Hīxinikariko: “Apanakini apiata, nota poiāoka”. ⁴ !Hīxinikapiri pite nireēkitinani. Himiparīkatanako apanakini, ninoa nireēkiti ikaminina ikapani.

⁵ Xesosi Kristo xiniākitikanerako hīxinikako. Kristo kamakitikanerako hīkamako. ⁶ Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷ Iuaritika itakanapari auītetxi ininiua. Nitiritxi atoko itxapekaua. Iuaka minakati itxīkitakaua, kotxi kākitipeka itxaua uai itixi iponaniākasaaki. ⁸ Iuasaaki kiki inakasaakiua, iuaīkana iuaka ipoiāotakaua, kotxi ikīpitari Teoso sākire ipinini ikapani. Imarotari okiko tīkane, kokaniri okiko atoko inaākako aamina ipiriāmitakari nopini. Iuaritika ikīpitari Teoso sākire ipinini ikapani. ⁹ Ikara atoko ininiā, Teoso txīkitakari iua Apiananiri ininiāua. Āti iua atoko inakari !auari. Teoso takari iuāka. Āti

uāka iua atoko inakari !auari, ¹⁰ kotxi kākiti ikininape kenakotakasaakiri iuāka Xesosi, ikapotoreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipīkani auiniātaā pakini kapotoreēkauako Xesosi apisatoō, kotxi iauītena itxaua Xesosi. ¹¹ Ikinipoko kākiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari aīri Teoso,” itxanako.

Iōriki Atoko Hītixako

¹² Ininiā nota tiretakini, hīkīpitariko nisākire uatxa, mitxi hītekata nauakasaaki nisākire hīkīpitini atokokana hītixako. Uatxa kona hītekataikano, iuaritika ninirekari apiata hīkīpitiniri nisākire. Teoso makatxakapekari himaerekani itixine hīsini ikapani, ininiākara ikiniōtika hīparīkauatako Teoso ikapani. Hīpīkariko maerekati hīkamini. Erekarinanira hīkamapikako. ¹³ Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini ikapani. Iua sikaposotiiiretai hīte iua nireēkiti hīkamini ikapani.

¹⁴ Hīparīkauatakasaaki, !hītsoatape, !hītixitakapeua. ¹⁵ Ikara atoko hīkaminiā, hīkerokiniri !auari, himaerekani !auari, ininiā erekarinoka hīkama apanakinimoni. Ininiā Teoso anaakori erekarini hītixaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti ikanōka. Iōriki atoko hītixako. Hīopinikariko maerekati auiniātaā, atāo inakari kākiti imarotini ikapani. ¹⁶ Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini ikapani. Hīte Teoso anaakori erekarini

hininiāua, nota iuikaiko hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatiikani niparīkauatapitipo hīte ikapani, kotxi hīte auikapekari Teoso sākire nisāpiretakiti.

¹⁷ Atxiiti nota okaāka Teoso sākire nisāpiretini xika. Atxiiti niarēka oxikepoakataāka, Teosomoni sikakori atoko inakari, Teoso sākire nisāpiretini xika, Teoso sākire hāuikini xika. Nokaāka atxiiti, iuaritika nipoxokoniuaata. Nipoxokoniuaata hītekata. ¹⁸ Ininiā erekari hīte apaka poxokoniuatini. Erekari hīpoxokoniuatini notakata.

Tximótxio Pirena

¹⁹ Xesosi Apiananiri nirekiniāri nota iokanatiniri Tximótxio hītemoni, ininiā mapaōtipeka inakasaaki niokanataru iua. Ininiā eereka iua minapiretari hīte pirena, nota apaka poxokoniuatini ikapani. ²⁰ Āti Tximótxio atoko inakari uai !uari, kotxi iua iteene tiretai hīte. Iua nirekari hāuini ereka inini. ²¹ Apanakini kākiti xinikari ninoaka nireēkitinoka. !Ixinikarina Xesosi Kristo nireēkiti. ²² Himarotari iua Tximótxio parīkauatape notakata, imi irikata parīkauatakari atoko itxa. Iparīkauata notakata Teoso iokanapirena erekari apanakini asāpiretini ikapani. Ininiākara himarotari Tximótxio atamakaākapeka, ininiā himarotari erekapitikari iua. ²³ Kiatokopa ninaataāka? Uatxa !nimarotari. Nimarotakasaakiri, niokanataru Tximótxio hītemoni. ²⁴ Apiananiri kamaimaroretano nota, Tximótxio tikinimoni nota apaka apoka ereē hītemoni.

Eparotxito Pirena

²⁵ Notamoni erekari iuaikana niokanatiniri hīokanapirena mīkari, Eparotxito inakori. Hīte iokanatapekari iua notamoni nota itiretini ikapani. Iua nitari atoko itxa. Imiparīkatapitipono nota,

Teoso iokanapirena asāpiretakasaaki. Iua, nota pakini sotato atoko atxaua, kotxi ate neenamauata Teoso ikaapani. ²⁶ Iua ipiātai hīte hikinika. Iua maerekaxiniretinoka itxa, kotxi ikenakopiretari hīte imaropiretiniri iua amianatini. ²⁷ Atāopitikara iua amianatipitika. Iua ipinaarita, iuaritika Teoso amonikari iua. Itxīkitakari iua iuaikana ereka inini. Ininiā Teoso amonikano nota apaka, kotxi Eparotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hītemoni, hīpoxokoniuatini ikapani haōkitakasaakiri. Ikara atoko ininiā, nota maerekaxiniretinoka ninini !auaika. ²⁹ Ininiā hīpoxokoniritika hāpakapariko iua, kotxi iua Eparotxito aītari itxaua, kotxi Apiananiri nakitiakori atxaua. Hīpaxitariko kākiti Eparotxito atoko inakari, ³⁰ kotxi Kristo ikapani iparīkauatini xika ipinaarita. Iuaka monōkorimoni isa nota imoianatini ikapani, kotxi iua imarotari hīte nirekapitikamari himoianatinino, txamari !hīposota himoianatinino, ininiā iua iteene moianatano.

Kiatokopa Kākiti Atāo Ereka Inini?

3 Nitariakori, apikomoni nisāpiretai. Hīpoxokoniuaatako, kotxi Apiananiri nakitiakori atxaua. !Nisāpaka iuaikana nisāpiretakitipeka nisāpiretini hīte. Iuaikana nōtākikai hīte, atāo minakati himauikakani ikapani. ² Erepaniko kākiti maerekati kamakani, atāo minakati sāpiretakani, kotxi ninoasāpiretari kākiti: “Teoso takaōtxikare pītoā mauakaniā, kona Teoso nakiti !pitxaua,” itxana. ³ Ninoa auapitika Teoso takaōtxikare iītoāna, txamari kona Teoso nakitiakori !itxauana. Atera Teoso nakitiakori, kotxi atemoni aua atāo inakari Teoso takaōtxikare ate ākixinireē, kotxi Erekari Matamatakoti oerekaua amisākiretiniri Teoso.

Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata.

⁴Hīuākatari atxiīti hīte kamakiti ereka inini Teoso apakapiniī ikapani? Konapitini. Nota kamakiti apiaerekata, iuaritika nikamakiti !txīkitakano Teoso apakapinino ikapani. Hīkenakotariko erekari nota kamakiti: ⁵Teoso takaōtxikare nītoā takaāka oito ōti nauakasaaki. Nirini, ninoroni pakini Xoteo itxauana. Natokiri kitxakapirīka Pēxamiī inakori. Kitxakapirīka natokiriakorini, nakiroakoroni pakini ikinika Xoteoakori itxauana, ininiā atāo Xoteo nitxaua. Nota kīpitari aūūiteakori kitxakapirīkarini paniātakiti, kotxi nota pariseo nitxaua, ininiā Teoso sākire iōkatsopatakori oerekakari nitxaua.

⁶Nota iteene nirekari Teoso nireēkiti nikamini, ininiā nimisiritari kākiti Xesosi sākire auiākani, kotxi niuākatari Teoso nirekari ikara nikamini. Aātokiriakorini paniātakiti ikinika nikīpita. !Nikerokari.

⁷Mitxi niuākatari ikara atoko nininiā erekapitikari, ininiā, “Teoso apakapapitikano nota,” nitxa. Uatxa nimarotari Kristo, ininiā nimarotari mitxipe minakati nininiua nota. ⁸Uatxa nimarotari niauīte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !ninirekaikari. Kristo nakiti uatxa nitxaua. ⁹Nitakanapapekari mitxi nikamakiti Kristokata ātipirika nauini ikapani. Nota kīpitari Moisesini paniātakiti. Ikara atoko inakarinani kona ereka txīkitakano nota. Teosonokara kamaerekatano nota, kotxi nauikari Kristo sākire. ¹⁰Ninirekari Kristo iteene nimarotini. Ninirekari nimarotiniri Teoso posotiire, kotxi iposotiireē ōkitikari Kristo, iuaikana auāki inini

ikapani. Kristo atatsiirauatape, ininiā nota apaka nirekari natatsiirauatini atāo imoianari nininiua ikapani. Ninirekari nota nireēkiti ipinini, Kristo aamina ipiriāmitakari nopini ipinini atoko. Ninirekari Xesosi nireēkitinoka nikamini, ininiā iua atoko nitxaua. ¹¹Ininiā itixi xipokini ōti Teoso ōkitikanoko, iuaikana auāki ninini tikane.

Mitekakari Atoko Nitxa

¹²Ikara ikinika !nimarotapanika. Nimaroāpotapanikariko. Teoso kamapanikari iparīka nota ākixinireē. !Ixipokapanikari, ininiā !niotokakari niparīka Teoso ikapani. Niparīkauatapitipo. Mitekakari mitekini atoko, !niotoka. Mitekakari nirekari mitekaxi mapotōkire apokini. Iua atokokana nota nirekari niparīka mapotōkire napokini, kotxi Kristo Xesosi mereēno nota ikara atoko nikamini ikapani. ¹³Nitariakori, niparīka mapotōkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparīka mapotōkire napokini ikapani. ¹⁴Mitekakari iteene nirekari mitekaxi mapotōkire apokini imitekini iki apakapini ikapani, ininiā imitekaxi. !Iotoka. Iua atokokana nota parīkauatapitipo Teoso ikapani, niparīka mapotōkire napokini ikapani, niparīka iki Teoso sikakiti napakapini ikapani, kotxi Teoso pīkapiretano nota Kristo Xesosiā itixine nisini ikapani, niparīka iki napakapini ikapani.

¹⁵Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hīte atāo inakari. ¹⁶Mitekaxi kamakari paniātakiti iaōka mitekakari kama imitekasaaki. Iua atokokana

makamariko Teoso paniātakiti. Uatxaika akamakiti atokokana makama.

¹⁷Nitariakori, hikamariko nota kamakiti atoko inakari, kotxi ate oerekapekai hīte ikara atoko inakari hikamini. Hikīpitariko nota kamakiti atoko inakari kamakani sākire.

¹⁸Kaiāopokori kākiti !auikari Kristo ipinini amaerekani imaktxakini ikapani. Kristo omanatakani itxauana ninoa. Itokatpeka ikara nisāpiretai hīte, ininiā iuaikana uatxa ikara nisāpiretai. Iteene nimatinaniuata ninoa xika. ¹⁹Itixi mapotōkire ōtisaaki ninoa iokanataākako maerekani misiritikoātaā. Iitona iteasonena atoko itxana, kotxi iitona nireēkitinoka ikamana. Ikamakitina !erekari, iuaritika iuikarina ikamakitina. !Ipētauatana. Ninoa xinikapikari īkorapokoriti. !Ixinikarina Teoso. ²⁰Atepekana, Teoso tixine auakani atxapekautau. Aiātapari apoxokoniritika kākiti maerekani maktxakakari iuaxitikiri uaimoni apokini. Iua Xesosi Kristo Apiananiri itxaua. ²¹Iuasaakiko inoākari aīto mataparati. Itxīkitakari aīto iua īto erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniātakiti, kotxi kataparari iua Xesosi.

Ōtākipirenatxi

4 Nitariakori, nota iteene tiretai hīte. Nipiātai hīte. Hikamapoxokonitano nota. Niuikai hīte, kotxi nīparīka īki atoko hītxa. Nitiretakini, hīxinikariko ikara nota ōtākikinii uatxa. Nota ōtākikinii hikīpitiniā, !hītakanapari Apiananiri.

²Nota ōtākikai hīte Epótxia inakoro, Sītxiki inakoro pakini. Hikīpitariko Apiananiri sākire. Hīotokakariko hītxitakakiniua.

³Pitepekana nimoianari erekari, nota nirekai

pite ōtākikinina naia sito ipi, kotxi ninoa parīkauatpeka notakata Teoso iokanapirena erekari asāpiretakasaaki. Ninoa parīkauata notakata, Kremētxi inakori pakīnikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auapininiika ininina tikane.

⁴Hienenīkapikako, kotxi Apiananiri nakiti hīttxaua. Iuaikana nitxai. Hienenīkako.

⁵Erekari hikamako apanakinimoni. !Hītxitapena. Erekari apanakini imarotiniiri hīte ereka hinini. Apiananiri kaiamapeka ikanapiriini uaimoni.

⁶Na xatiki maerekaxiniretika !hīttxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri

Teoso, hīttxariko: “Erekapitikari notamoni pikamakiti,” hīttxariko. ⁷Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !iīroā hākixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hīttxapekautau.

⁸Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hikamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko inakarinoka hīxinikako, kotxi erekapitikari ikara. Peerekari ikara. ⁹Hikamapikariko noerekakiti iaōka. Hīsāpiretanako apanakini hītemoni nisāpiretakiti. Hikamariko nota kamakiti hītiākiti atokokana. Ininiā Teoso kākiti kamaerekaxiniretakari kaikota hītekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiã iteene nipoxokoniuaata. Iuaïkana hïte oerekari hïtiretinino, txineiro hïsikakito hïokanatinano, ininiã nipoxokoniuaata. Ätipirika hïxinikano, kotxi iteene hïtoretano. Txamari mitxi !hïporetari hïsikakiti hïokanatinini notamoni. ¹¹ !Namanaã iuaïkana txineiro hïokanatinini notamoni. Ikinipoko ninireëkiti auakasaaki, nipoxokoniuaata. Ikinipoko ninireëkiti mauakanisaaki, iuaritika nipoxokoniuaata. ¹² Nota napapekari nimamãkani, nimanipokoreni, nimatxineiroteni pakini. Apaka nimarotari ätikataã ninireëkiti ikinipoko auinano. Teoso oerekepekano ikiniõtika nipoxokoniuatini. Nienenïka nipokori auakasaaki. Nienenïka ninatxitakasaaki apaka. Nienenïka ikini sereti auinakasaakino. Nienenïka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hïte, kotxi nimatxineirotenisaaki, hïokanatarini txineiro notamoni. ¹⁵ Teoso iokanapirena erekari merepitipanika hïkenakotakasaaki, ereë Masetônia tixini nosipikasaaki, hïte Piriposi auakaninokara iokanataro txineiro napakapini ïkapani. Apanakini Xesosi säkire auiãkani ätiãtaã auakani,

!okanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hïokanatinano. ¹⁷ !Niãtaparo txineiro hïsikininino. Niãtapari Teoso sikinii erekari, kotxi hïte tiretapekano nota. ¹⁸ Napakapapekari ikinipoko hïokanatakiti. Kaiãopokori hïokanatakiti. Eparotxito inakori mininano hïsikakiti, ininiã ikinika ninireëkiti uatxa auinano nota. Teosomoni sikakori kamariri atoko itxa hïte sikakiti notamoni. Teoso potxitari hïsikakiti notamoni. ¹⁹ NiTeosone sikaiko hïte hinireëkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ätipirika matxari Teoso: “Peerekai aïri, aTeosone. Ameë.”

Takanapapirenatxi

²¹ Hïsäpiretanako ikinimane ereë auakani Kristo Xesosi nakitiakori, nixinikamanapitinina ninoa. Äitariakori uai notakata auakani xinikamanapitai hïte apaka. ²² Ikinimane uai auakani Teoso nakitiakori iokanapireta hïtemoni ixinikiniina. Homanoakori auïte aapoko auakani, Teoso nakitiakori, iokanapireta hïtemoni iteene ixinikiniina.

²³ Xesosi Kristo Apiananiri sikari ikinipoko erekari hïtemoni. Ameë.

KOROSO

Paoro Iokanatsopatakiti Koroso Auakanimoni

1 Nota Paoro. Niokanatsopata hitemoni. Teoso mereëno nota, kotxi inirekari nota Xesosi Kristo iokanatakiti nininiua. Aĩtari Tximótxio apaka iokanapireta hitemoni. ²Ininiã aiokanatarı ia iókatsoparı Teoso nakitiakorımoni, ikinika Teoso paniãtakiti kamakanimoni Koroso sitatxiti auakanimoni. Aĩtariakorı hĩtxaua. Aĩri Teoso, Apıananıri Xesosi Kristo pakini sikari ikinipoko erekari hitemoni. Ninoa kamaerekaxıniretai hĩte.

Teoso Misãkiretiko Koroso Auakani İkapani

³“Erekapitikai,” atxari Teoso, aãuĩte Xesosi Kristo iri, iua amisãkiretakasaaki hĩte ikapani. Ātipirika amisãkiretari Teoso hĩte ikapani. ⁴Ikara atoko atxari Teoso, kotxi ate kenakopiretari hĩte auikiniri Kristo Xesosi sãkire. Apaka akenakopiretari hĩte tiretiniri ikinika kãkiti Teoso nakitiakorı. ⁵Teoso iokanapirena erekari atão sãkiretxiti itxaua. Ikara hĩkenakotakasaaki, hĩkenakotari Teoso sikaenetakiti ipotetakiti itixineẽ hĩte ikapani, ininiã hiãtapari hãpakapıniri Teoso sikaenetakiti. Himarotari hãpakapıniri, ininiã Teoso sãkire hãuikini aua, hĩtiraõkiuatini pakini aua. ⁶Teoso iokanapirena erekari hĩkenakotakiti iaripiretapeka ikini itixitimoni. İkiniõtika apikomoni kãkiti kenakotari. İuasaaki kãkiti auikaãpotari Teoso iokanapirena. İkiniõtika kãkiti apakapari erekari Teoso sikakiti. İua atokokana hĩte kenakotari Teoso iokanapirena erekari. İuasaaki

himarotari ikinipoko erekari Teoso sikakiti. İuasaaki himarotari Teoso atão sikiniri ikinipoko erekari kãkitimoni.

⁷Amoianari, atiretakiti, Epãpara inakori, iuara oerekai Teoso sikiniri ikinipoko erekari kãkitimoni. İua Kristo nitiri itxaua. Ātipirika iparĩkauata Kristo ikapani, ininiã Ātipirika iparĩkauata hĩte ikapani. ⁸İua sãpiretaua ate hĩtiraõki, Erekarı Matamatakoti siãkiti hitemoni.

⁹Hĩte pirena akenakopiretakasaaki, Ātipirika amisãkiretari Teoso hĩte ikapani. Ate nirekari hĩte iteene imarotıniri Teoso nireẽkiti hĩkamini ikapani. Anirekari kĩkiteni hininiãua. Anirekari himarotıniri Teoso imarore Erekarı Matamatakoti siãkiti.

¹⁰Ininiã ate misãkiretari Teoso hĩte atão hĩkamini ikiniõtika, kotxi Apıananıri anaakori hĩtxaua. Anirekari hĩkamakiti kamapoxokonitıniri Teoso. Ininiã hĩkamakiti ikiniõtika erekarınoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti. ¹¹Anirekari Teoso sikataparaxıniretinii hĩte iposotiireẽ, kotxi kaposotiireri iua. Ininiã iuasaaki hiãtapari himısiritiko xipokini. İuasaaki !hinaiataua. İuasaaki hĩposotari himĩteenekıniri himısiritiko hĩpoxokoniritika. ¹²İuasaaki hĩtxariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakorı ikapani Teoso tixineẽ, ipiã mauakaniãtaã. ¹³İua sikakaua ipiã posotiireẽ aãuakasaaki, maerekati posotiireẽ aãuakasaaki. İua anikaua imi itiretakiti auiniãtaã. İuaãtaã auakani auĩte itxaua imi. ¹⁴İmi Kristo iĩkitxitari Teoso amaerekani İki ipĩkasaaki, ininiã Teoso makatxakari amaerekani. !İxinikaikari amaerekani.

Kristo Apıananıri

¹⁵Kãkiti kona posotari atamatiniri Teoso. Teosotxikana itxaua Kristo,

iuaritika aposotari Kristo aātamadini. Ikinipoko kamiko apisa, Kristo aua Teosokata. ¹⁶Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kākiti atamatakiti, kākiti matamatakiniti apaka. Ikamari ikinika kaposotiirerini, auītetxiakori matamatakoni, ikinika Teoso nitiriakori pakini. Ikamari ikinika. Ikinika kamaāka iua ikapani. ¹⁷Kristo aua ikinipoko apisa. Iua maikari ikinika imaxipokakani ikapani. Ikara atoko ininiā, ikinipoko auapanika. Iua mauakaniā, ikinika iarika. Iua mauakaniā, ikinipoko xipoka.

¹⁸Kākiti Teoso mereēkini Kristo ĩto atoko itxauana. Teoso mereēkini kii atoko itxa Kristo. Merepitipanika ipikari ōkitikakariua iua. Ininiā ōkitikasaakiua, oerekari kākiti Apiananiri ininiua. Āti kaposotiireri iua atokokana inakari !uari. ¹⁹Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰Kristo arēka xiketakasaaki aamina ĩpiriāmitakari nopini, iusaaki Kristo xipokari Teoso omanākaruatini kākiti maerekani xika. Kotxi Teoso nirekari Kristo mininiri ikinipoko iuaikana iuamoni, ikorapokoriti auakani, iaxiti auakani pakini. Ininiā uatxa Teoso apakapari Kristo sākire auīākani.

Kristo Kamakiti Koroso Auakani Īkapani

²¹Hītepekana, mitxi !himarotari Teoso. Iusaaki !hāuari Teosokata. Maerekati hīkamakiti xika homanataru Teoso hākixinireē. Teoso mokaiaakari-akori hītxaua iusaaki. Uatxa Teoso apakapai hīte, ²²kotxi Kristo ĩto ipina hīte ikapani. Ininiā iua anikai hīte Teosomoni iua makatxakakini hininiua ikapani. Teosomoni himaerekani !uaaika, kotxi Kristo makatxakapekari imakinika himaerekani. Teoso apisatoō

hāpokasaaki, kona āti posotari apoītinii himaerekani xika. ²³Ikara atoko aua hītemoni, iteene hāuikiiniāri Kristo sākire ikiniōtika, Kristo sākirenoka hāuikiiniā, isākire himatakanapakaniā. Ikara atoko hikaminiā, apanakini kona txīkitakai hītakanapiniri hīatapiniri ikinika Teoso kamakiti hīte ikapani. Teoso iokanapirena erekari sāpiretaua ikinika Teoso kamakiti inakitiakori ikapani. Hīte kenakotapekari Teoso iokanapirena erekari. Isāpiretaākapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisāpiretini ikapani.

Paoro Parīkauata Kākiti Teoso Mereēkini Īkapani

²⁴Uatxa nipoxokoniuata hīte ikapani natatsiirauatini, kotxi natatsiirauatini xika hīte auikari Kristo sākire. Natatsiirauata niitoā Teoso mereēkini ikapani. Kristo ĩto atoko itxauana kākiti Teoso mereēkini. Natatsiirauatapitika, iuaritika Kristo atatsiirauatini apiata. ²⁵Teoso iokanatano nota imereēkini nitiri nininiua. Ipaniātano nisāpiretiniri ikinika isākire hītemoni. ²⁶Ipaniātano nisāpiretinii mitxi kākiti mimarotakiniti. Okananipeka Teoso !oerekari ikara kākiti mimarotakiniti. Kristo ipinini apisa ikini itixiti auakani !imarotari ikara. Mitxi kākiti mimarotakiniti uatxa oerekaāka Teoso nakitiakorimoni. ²⁷Uatxa Teoso nirekari inakitiakori Xoteo minakanua imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisāpiretai. Kristo posotari kākiti ākixinireē auini. Ia mitxi kākiti mimarotakiniti. Kristo aua hākixinireē. Ininiā himarotari hīsini Teoso tixinemoni. ²⁸Ininiā asāpiretari kākiti Kristo pirena. Aōtākikari ikinimane Teoso imaroreē. Aōerekari ikinimane Teoso imaroreē,

kotxi Teoso sikaimarorettau. Iua aua ikinika imaroretxi. Ikara atoko aanikana Kristo nireēkitinoka kamakani Teosomoni. ²⁹Ikara nikamini ikapani, niparīkauatapitipo. Pasāpaniri. Kristo posotiireē niparīkauata, kotxi kaposotiireri iua. Iua iteene sikataparitari nākixinire, ininiā nīpotari iteene niparīkauatini iua ikapani.

Paoro Nirekakiti

2 Ninirekari himarotini iteene nimisiritiko hīte ikapani. Apaka iteene nimisiritaāka Araotxiséia sitatxiti auakani ikapani. Nimisiritaāka apanakini nimataōkitakini ikapani apaka. ²Ninirekari ikinimane ninoa kataparaxinire ininina. Apaka ninirekana itiretakakiniuana, ininiā ātika ninoa nireēkiti. Ikara atoko ininiāna, iteene imarotarina ikinika Teoso sākire. Iuasaaki imarotarina Kristo, mitxi kākiti mimarotakiniti, mitxi aīri Teoso moerekakiniti. ³Paimatireri Kristo. Iua mimarotakiniti !uari. Ikinipoko imarota. ⁴Ikara atoko nisāpiretai hīte, apanakini mamsirienetakani tīkane kākiti imaroreē. ⁵Niito !uari hītekata, iuaritika nixinikapikai hīte nākixinireē. Nīpoxokoniua, kotxi nīmarotari hīkamakiti atāo inini. Apaka nīpoxokoniua, kotxi hīte iteene auikari Kristo sākire.

Atāo Kristo Sākire Auiākani Kamakiti

⁶Hāpakapapekari Kristo Xesosi hīauīte ininiua ikapani, ininiā hīkamariko inirekakiti ikiniōtika. ⁷Iua taparanoka hīkosekako. Aākotsa kosekiniri āparaā atoko hītxako. Ikara atoko hininiā, kataparari hīxinire. Ininiā atāo hāuikari Kristo sākire mitxi aōerekakiti atoko, ininiā kataparaiko. Ininiā iteene hītxariko Teoso: “Ikinika

pikamakiti ate ikapani peerekari,” hītxako.

⁸Erepaniko. Kona hāuiritapiri kākiti makatxakinii Teoso kimaporeē. !Hāuikapiri ninoa sākire, kotxi ātiāo ninoa sākire. Na atāo isākirena. Kākiti imarorenoka imarotana. Kamisirienererini ninoa. Maxikatiika isākirauatana. Kitxakapirika auakani sāpiretakiti ninoa sākire. Īkorapokoriti auakani nireēkiti maerekati isāpiretana kākiti. Kona Kristo sākireni.

Apiananiri Itxaua Kristo

⁹Kristo aua iito, iuaritika Teosotxikana iua. Kristo aua ikinipoko Teoso posotiire, ikinipoko itiraōki, ikinipoko imarore, txaāpokata, kotxi Teoso itxaua. ¹⁰Kristo aua hākixinireē, ininiā ikinipoko aua hītemoni. !Auari apikomoni hinirekakiti, kotxi auītetxiakori iaxiti auakani auīte itxaua. Apiananiri itxaua. Kaposotiireri iua atoko inakari !uari.

Kristo Kamakiti Hīte ikapani

¹¹Hāpakapapekari Teoso takaōtxikare kākiti mataākiniti. Hākixinireē Teoso takari itakaōtxikare. Kristo makatxakasaakiri himaerekani hīito nireēkiti, iuasaaki hāpakapari Teoso takaōtxikare. ¹²Hīpatxisatikosaaki, Kristokata ikatakoni atoko hītxaua. Eereka hōkitikaāka Kristo ōkitikiko atoko. Hīte ōkitikaākako, kotxi hīte auikari Teoso posotiire Kristo ōkitikini ipīkasaaki.

¹³Mitxi ipikani atoko hītxaua himaerekani xika. Xoteo minakanua hīte, ininiā mitxi kona himarotari Teoso nireēkiti. Hīponaniākasaaki, maerekati auape hītemoni. Iuaritika Teoso txīkitakai auāki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴Iua oakari iōkatsopatakori amaerekani

sāpiretiko. Ikara iōkatsopatakori sāpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iōkatsopatakori. Imaktxakari ikara iōkatsopatakori. Īpiriāmitakari nopini Kristo tokakitikosaaki, ikara iōkatsopatakori tokakitaāka apaka iuaā, ininiā !itxaika. Iuasaaki amisiritiko !auaika. ¹⁵ Kristo ĩpiriāmitakari nopini ipikasaaki, iuasaaki imaktxakari ikinika Satanasi posotiire, iniritiakori posotiire pakini. Iua oerekari ikinimane !kaposotiirena ninoa. Iua ōkitikasaakiaua, oerekari ikinimane iuananira Apiananiri ininiu. Iuasaaki Kristo oerekari ikinimane ikāiatini.

¹⁶ Ininiā kona hāuiritapiri apanakini txitinii hinikakiti xika, hiātakiti xika pakini. Kona hāuiritapiri apanakini txitinii kiiniri Teoso ĩkapani hĳkamini xika, kiiniri kasiri itopaĳtakasaaki hĳkamini xika, kiiniri tomatiko ōti hĳkamakiti xika pakini. ¹⁷ Kiiniri Teoso ĩkapani ĩkorasaaki sanōkatxi atoko itxa. Oerekaua atāo inakari, txamari na iteene oerekaua. Iteene oerekaāka atemoni, Kristo aōkitakasaaki. ¹⁸ Erepaniko kākiti ia atoko inakari: Ninoa iuikari imiuiakaniuana. Ninoa teosonetari Teoso nitiriakori matamatakoni. Ninoa sāpiretari kākiti matamatakoni aōkitinina itaponeēna. Ixinikarina ninoaka nireēkitinoka. Ixinikarina kimarorerini ininiuana, ininiā iuikauana. Erepaniko kākiti ikara atoko inakani. Hāuikiñiāri ninoa sākire, !auaika hĳparĳka ĩki. ¹⁹ Kākiti ikara atoko inakani !nirekari Kristo iauĳtenu ininiu. Kotxi Kristo akii atoko itxa. Ate iua ĩto atoko atxaua. Ikara atoko ininiā, isikataparataua. Aāpotiitaua. Asikataparatakakaua. Ātika ĩtotxi atoko atxaua. Ikara atoko aniniā, aimaroāpotari isākire. Aaneē, kākiti ĩto aneini atoko.

Apinini, Aūuini Pakini Kristokata

²⁰ Mitxi hinireēkiti itixi auakani nireēkiti atoko. Hāuikasaakiri Kristo sākire, mitxi hinireēkiti !auaika. Ipĳpe. Txamari hĳkamapanikari ĩkorapokoriti auakani kamakiti atoko. Ninoa nireēkiti iaōka hĳkamapanika. ²¹ Ninoa txari: “Kona pimaĳkapiri ikara. Kona pinikapiri ikara nipokori. Kona piouātakapiri ikara.” Kinirepa hĳkĳpitari ikara isākirena? ²² Ninoa paniātakiti xipokapitikako. Ikara atoko !itxa, kotxi ikara atoko inakari paniātakori kākitinoka paniātakiti. Kākiti oerekakiti sākiretxitinoka ikara. ²³ Kākiti uākatari ninoa paniātakiti kimarorerini paniātakiti atoko. Ninoa xinikakiti iaōka inirekarina Teoso. “!Erekanu,” itxana, txamari ākixinireēna itxana “Peerekanu.” Ninoaka misiritaua iĳtoāna. Ikamarina ikinika iĳtona nireēkiti.

Atāo Hĳkamakiti Erekari Hāuini ĩkapani

3 Hĳte ōkitikaāka Kristokata hāuini amaneri inini ĩkapani, ininiā hinirekariko hĳkaminiri Teoso tixine auakani kamakiti iaōka. Iuaā Kristo topākanāta Teoso kikomoni. Apiananiri itxaua Teoso kikomoni topākakari. ² Hĳxinikariko Teoso tixine. Kona hĳxinikapiri ĩkorapokoriti. ³ Ipĳkani atokopeka hĳtxa, kotxi hāuini kitxakari !auaika, ininiā kona hĳxinikaikari ĩkorapokoriti auakari. Teoso sākire mauĳākani !imarotari hāuini amaneri Kristokata Teoso auiniātaā. ⁴ Kristo txĳkitakari aūuini amaneri inini. Iua uai apokasaaki iuaĳkana atamataāka. Iuasaaki hĳte apaka atamataāka iuakata. Iuasaaki hĳtemoni auari Kristo iotximere atokokana. ⁵ Hĳxipokariko hĳito nireēkiti, kotxi ĩkorapokoriti auakari nirekari ĩtotxi nireēkitinoka.

Hōkariko. Kipa aua aākixinireē aōkini ikapani? Auari anokaretxi. Auari aāto nireēkitinoka kamiko nirekiko. Auari āti īto nirekiko. Apaka auari āti nakiti nirekiko aākixinireē. Iteene anirekiniāri āti nakiti, ateosone atoko itxaua anireēkiti. ⁶Ikara maerekati xika, Teoso omanākare apokapitakako Teoso paniātakiti makīpitakanimoni. ⁷Mitxi hīte kamari maerekati ikara atoko inakari. Iuasaaki hītotapekari ikara atoko inakari hīkamini. ⁸Uatxa ia atoko inakari hītakanapako: omanākaretxi, āti iteene txitiko, Teoso misākirepiretiko, maerekati sākiretxiti pakini. ⁹Kona himisirienetakapeua, kotxi hītakanapapekari maerekati mitxi hīkamakiti. Himāka kitxakari hōkini atoko, hītakanapapekari ikara maerekati.

¹⁰Uatxa hīkamakiti amaneri. Himāka amaneri hīeretakini atoko, hīkamakiti uatxa amaneri. Teoso txīkitakari hīkamakiti amaneri inini, ininiā himarotari atāo inakari imaroretxi. Ininiā Teoso kamakiti atokokana hīkama, kotxi hīte kamakari itxaua. ¹¹Uatxa kākiti apiari !auari. Krekoakori, Xoteoakori, Teoso takaōtxikare auaītotakini, Teoso takaōtxikare mauaītotakini, mimaroreni, kākiti ītopa auakani, nitiritxi amotakoni, kākiti miamotakoni pakini !auari kākiti apiari. Āti kākiti āti kākititxikana, kotxi Kristonoka Apiananiri. Iua aua ikinimane isākire auīākani ākixinireē.

¹²Ininiākara hiamonīkariko āti. Hīkamariko erekari ātimoni. !Hīuikapeua. Kaneenama !hītshape. !Katimari homanākaruatini. Ikara atoko hāuako, kotxi Teoso mereēkini, iua nakitiakori, itiretakini hītshape. ¹³Himīteenekakauako. Himaxinīkaretariko apanakini kamakiti, hīte mapokaerekatakiniti. Kristo maxinīkaretapekari maerekati hīte

kamakiti, ininiā iua atokotxikana himaxinīkaretariko maerekati apanakini kamakiti hītemoni. ¹⁴Ikara erekari hīkamako. Erekari apiari hīkamini, hītiraōkiuatini. Hītiraōkiuatako. Hītiraōkiuatakasaaki, ininiā iuasaaki ikinika hīkamakiti atāo.

¹⁵Kristo kamaerekaxiniretai, ininiā erekari hākixinire. Hāuiritariko ikara erekari kaikotini. !Hīkamapiri ikara erekari makatxakiko ikapani. Hīkinika ātika itotxi atoko hītshape. Teoso akiritai hīte hākixinire ereka inini ikapani. Hītchariko Teoso ātipirika: “Erekapitikari pikamakiti nota ikapani,” hītshape. ¹⁶Hāuiritariko ikinika Kristo sākire kaikotini hākixinireē, ininiā iuasaaki himarore iteene aua. Hōerekakakaua. Hōtākikakakaua. Hīxikaretari xikari Teoso ikapani. Hīxikaretariko xikari Teoso sākire iōkatsopatakori xikariti. Hīxikaretariko xikari kitxakari, amaneri pakini Teoso ikapani. Hīxikarauatakasaaki, hākixinireē hītchariko Teoso: “Erekapitikari pikamakiti nota ikapani.” ¹⁷Ikinika hīkamakiti hīkamako Apiananiri Xesosi ikapani. Hīsākirauatakasaaki, hīsākirauata Apiananiri Xesosi ikapani. Iuasaaki hītchariko aīri Teoso: “Erekapitikari pikamakiti nota ikapani,” hītchariko.

Kākiti Aapoko Auakani Ōtākikiko

¹⁸Hīte ītanorotxi, hīkīpitariko hītaniri sākire, kotxi Apiananiri nakiti hītshape, ininiā ikara atāo hīkamini.

¹⁹Hīte ītaniritxi, hītiretaroko hītanoro. Kona hītshapepero oa. Kona homanatapero.

²⁰Hīte amarini, hīkīpitariko hīri, hinoro pakini sākire. Ikinika ninoa paniātakiti hīkamako, kotxi Teoso apokaerekatari ikara atoko inakari.

²¹Hīte irītxi, kona hīkamanaia-manetapena hamariteakori, kotxi

eereka maerekaxinireti aua ninoamoni, ininiã linirekaikarina hïte paniãtakiti ikaminina.

²²Hïte nitiritxi, hïpatrãote ïkorapokoriti aua, ininiã hikamariko ïkinika ninoa paniãtakiti. Apanakini iteene parïkauata ipatrãote apisatoõ, iua apokaerekatiniiri ïkapani. Iua mauakanisaaki apaka iteene hïparïkauatako. ïkini hïxinireritika hikamariko hïparïka. Ikara atoko ininiã, atão hïpaxitari Teoso. ²³ïkinika hikamakiti hïkamako hïtaparaxinireritika. Hïparïkauatakaaki, parïkatxi Apiananiri ïkapani hikamini atokotxikana, hïparïkauata kãkiti ïkapani. ²⁴Hïparïkauatako ikara atoko, kotxi himarotari Apiananiri sikinii ipotetakiti iaxitikiri hïparïka ïki. Itixine hãpokasaaki, hãpakapariko. Apiananiri Kristo nitiriakori hïtxaua. ²⁵Maerekati kamakari apakapariko imisiritiko. Teoso misiritari ãti maerekati kamakari, ãti maerekati kamakari imisiritini atokotxikana.

4 Hïte patrão, hikamariko atão inakari hinitiriakori ïkapani. Kona himisirienetapena ninoa. Kotxi hïte apaka aua hïpatrãote Teoso tixinë.

Apikomoni Paoro Ôtakikakiti

²Kona hïtakanapapiri Teoso himisãkiretini. Araõkire hïtxako maerekati mapokakani ïkapani. ãtipirika hïtxariko Teoso: “Erekapitikari ïkinipoko pikamakiti nota ïkapani,” hïtxariko iua.

³Apaka himisãkiretariko Teoso ate ïkapani. Hamanaãriko Teoso, iua oerekiniua isãkire apanakinimoni asãpiretini ïkapani, kotxi anirekari asãpiretiniri kãkiti Kristo pirena, mitxi kãkiti mimarotakiniti. Ikara nisãpiretini xika, kateia ãki naua.

⁴Himisãkiretariko Teoso, Kristo pirena atão nisãpiretini ïkapani, kãkiti atão imarotini ïkapani.

⁵Kimarorerini hïtxauako Teoso sãkire mauïãkani sauaki hãuakasaaki. Aãuini poião, ininiã ïkiniõtika hinitari kãkiti Teoso sãkire hïsapiretini ïkapani.

⁶Teoso sikapekai ïkinipoko erekari, ininiã hïsapirauatakaaki, hõerekari kãkiti hïsapiretini hïtoretinina. Iõkira mauakaniã nipokoriã, !kaposeri. Iua atokotxikana erekari mauakaniã hïsapiretini, kãkiti !nirekari ïkenakotiniri hïsapiretini. Erekari hïsapiretini ininiã, himarotari hãpakapapiretiniri kãkiti.

Paoro Iokanapiretini Pirena

⁷Txïkiko inakori sãpiretaiko ïkinika nota pirena. Aïtari, atiretakiti itxaua. Iua parïkauatapitipo Apiananiri ïkapani. Apiananiri nitiri itxaua atekata. ⁸Niokanataru iua hïtemoni, hïte imaropiretini ïkapani, hïte isikataparaxiniretini ïkapani. ⁹Niokanataru Onésimo inakori apaka iuakata. Koroso sitatxitikiri iua, hïte atoko. Aïtari atiretakiti itxaua apaka. ãtipirika atão iparïkauata Kristo ïkapani. Ninoa sãpiretaiko hïte ïkinipoko Kristo sãkire auïãkani kamakiti uai.

¹⁰Arisitako inakori, notakata kateia ãki auakari, xinikamanapitai hïte. Panapee itaro ãkiri Marko, xinikamanapitai hïte apaka. Nisãpiretipekai hïte Marko pirena. Ininiã ereẽ iua apokasaaki, hïpoxokoniritika hãpakapariko iua. ¹¹Xosoe Xõsito inakori xinikamanapitai hïte apaka. Ninoa ipi ãti pakini Xoteoakori notakata parïkauatakani itxauana. Ninoa parïkauata notakata, Teoso auïtetxi ininiua pirena asãpiretini ïkapani. Isikataparaxiniretanona nota.

¹²Epãpara inakori apaka xinikamanapitai hïte. Ereẽkiri iua. Kristo

nitiri itxaua. Ātipirika imisākiretari Teoso hīte ĭkapani, Teoso nireēkitinoka hīkamini ĭkapani, ikinika hīkamakiti atāonoka hīkamini ĭkapani. ¹³Nota imarotari iteene iparīkauatini hīte ĭkapani. Apaka nimarotari iparīkauata kākiti Araotxiséia sitatxiti auakani ĭkapani. Apaka nimarotari iparīkauata lerapori sitatxiti auakani ĭkapani.

¹⁴Aītari atiretakiti, amianari imarotakari Arókasi inakori apaka xinikamanapitai hīte. Témasi inakori apaka xinikamanapitai hīte. ¹⁵Hīsāpiretanako aītariakori Araotxiséia auakani nixinikinina ninoa. Hīsāpiretaroko Nīpa inakoro, Teoso

mereēkini oaāpoko apotiitakaniua pakini, nixinikinina ninoa. ¹⁶Ia niokanatsopatakiti hātatsopatako hīkinika hīkenakotini ĭkapani, eereka hīpaniātariko atatsopatiko Araotxiséia sitatxitiā, Kristo sākire auiākani kenakotiniri ĭkapani. Apaka hīte atatsopatariko Araotxiséia auakani iokanatsopatakiti. ¹⁷Hītchariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸Nota Paoro niōkatsopataria ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.

1 TESARÓNIKA

Merepanika Paoro Iokanatsopatakiti Tesarónika Auakanimoni

1 Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aíri Teoso nakitiakori hıtxaua. Apiananiri Xesosi Kristo nakitiakori hıtxaua. Aíri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hıte.

Paoro Misäkiretari Teoso Tesarónika Auakani İkapani

²Amisäkiretari Teoso hıte İkapani. Ātipirika atxari Teoso: “Peerekai pite, kotxi Tesarónika auakani auikari pisäkire,” atxari. ³Aíri Teoso amisäkiretakasaaki, axinikapikari hıte parıka Teoso İkapani. Atão hıparıkauata, kotxi iteene hãuikari iua sãkire. Axinikari hıparıka Teoso İkapani, kotxi iteene hıtiretari iua. Axinikari himarotıniri Apiananiri Xesosi Kristo sãkire iaõka hıkamini. Hıpoxokoniritika hiãtapari isãkire iaõka apokini.

⁴Nitariakori, Teoso tıretapıtıkai hıte. Iua mereëi hıte iua nakitiakori hininiua İkapani. Aımarotari İkara. ⁵Teoso iokanapirena erekari hıtemoni asãpireta Teoso posotiireë. Ate sãkirenoka !kaposotiireri. Erekari Matamatakoti oerekai asãkire atão inini. Hıte iteene imarotari asãkire atãonoka inini. Hãtamatarı aparıka hıte İkapani hıte sauaki aãuakasaaki, ininiã himarotapıtıkaua ate. ⁶Ininiã hıte kamari ate kamakiti atokotxıkana. Hıkamari Apiananiri kamakiti atokotxıkana. Himisiritiko aua, iuarıtika hãuikari Xesosi sãkire. Himisiritiko aua, iuarıtika Erekari

Matamatakoti kamapoxokonıtai. ⁷Ininiãkara Masetónia tıxini auakani, Akaia tıxini auakani pakini nırekari hıte atoko ininina. ⁸Inırekarina hıte atoko ininina, kotxi hıte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iarıpireta hıte iteene auıkiniri Teoso sãkire. Ininiã kona ate sãpiretari kãkiti iteene hãuıkiniri Teoso sãkire, kotxi ikinimane imarotape. ⁹Ikinimane sãpiretari hıpoxokoniritika hãpakapınıua ate. Ninoa sãpiretari hıte takanapıniri teoso kamakori. Isãpiretarina hıparıkauatını uatxa Teoso atão inakari İkapani, auãkıpıka inakari İkapani. ¹⁰Ninoa sãpiretari, hıte iãtapıniri Teoso ãkiri itixine auakari kanapırıini İkorapokoritı. Iua Xesosi. İpıkanı sauaki Teoso õkitıkakiti iua. Iua makatxakapekari amaerekani, ininiã amisiritiko !auaıka kãkiti misiritiko õti apokasaaki.

Paoro Parıka Tesarónika Sitatxitiã (Átosi 17.1-9)

2 Nitariakori, himarotari maxıkatiıka kona ate sari hıtemoni. ²Himarotari amisiritiko Pirıposı sitatxiti aãuakasaaki, hıtemoni aãpokini apısa. Iuaã auakani asokaua, kateıa ãki taka itxauana. Iuarıtika Teoso sikataparaxıniretaua asãpiretiniri Teoso iokanapirena erekari hıtemoni. İtari kãkiti !nırekari asãkire, iuarıtika ate sãpiretari Teoso iokanapirena erekari hıtemoni. ³Ate oerekakiti !akeroka. Teoso nıreëkitınoka anıreka akamini. Āti anıreëkiti !auari. !Anırekari amisırıenetını hıte.

⁴Teoso auırıtıua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkırıuata, kona kãkiti akamapoxokonıtını İkapanı. Anırekari

akamapoxokonitini Teoso, kotxi iua ataerekatari aākixinire. ⁵!Asāpiretai ereka hinini, ate nireēkiti hīkamini ikapani. Asāpiretari Teoso sākire hītemoni, kona hīte nakiti anirekini ikapanini. Ikara himarotape. Teoso apaka imarotari ikara nisākire atāo inini. ⁶Ate !anirekari kākiti iuikiniua ate. !Anirekai hīte iuikiniua ate. !Anirekari apanakini iuikiniua ate. Kristo iokanatakiniraua ate hītemoni, ininiā aposotari apaniātini ikinipoko anireēkiti hīsikinua. Iuaritika !anirekari ikara atoko akamini. ⁷Hīte sauaki aāuakasaaki iteene atiretai hīte. Sito tiritiniri oimi atokokana, ate tiretai hīte. ⁸Iteene atiretai, ininiā anirekari asikinii Teoso iokanapirena erekari. Kona iuananini anireka asikinii hīte. Axinire, aīto pakini anireka asikinii, kotxi ate tirketakini hītxapekaua. ⁹Nitariakori, hīxinikari aparīka hīte sauaki. Pasāpaniri. Īkanōka, pokamara pakini aparīkauatapitipo, akiena, anireēkiti pakini aāpakapini ikapani, kotxi !anirekari aamanainii hīte aamonitakiti ikapani. !Anirekari hīte parīka apiatini ate ikapani, Teoso iokanapirena erekari asāpiretakasaakii.

¹⁰Hīte Kristo sākire auīākani sauaki aāuakasaaki, hīte itikari aāuini ikiniōtika. Teoso apaka itikari. Himarotari Teoso nireēkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹Hīri atoko atxaua iusaaki, kotxi aōtākikai hīte. Amīkapiritai, imi iri mīkapiritini atokokana. Apaniātai atāo inakarinoka hīkamini. ¹²Ikara atoko akaminii, kotxi Teoso anaakori hītxaua, ininiā anirekari hīte kaminiri hīri kamakiti iaōka. Iua akiritai hīte hīauīte inini ikapani. Inirekari hātamatini iua iotximere itixine hāuakasaaki. ¹³Ininiā ātipirika amisākiretari Teoso: “Erekapitikai,

kotxi Tesarónika auakani auikari pisākire, ninoamoni asāpiretakiti. Ninoa imarotari kona ate sākireni asāpiretana. Ninoa imarotari asāpiretana atāo pite sākire,” nitxari Teoso. Teoso sākire parīkauata hīte Xesosi sākire auīākani ākixinireē isākire hāuikini ikapani. ¹⁴Xotéia tixini auakani, Kristo Xesosi nakitiakori, Teoso sākire auīākani, ninoa kamakiti atoko hīkamako hīte nitariakori. Xoteoakori misiritana ninoa. Iua atokotxikana hīte nirimane misiritapekai hīte. ¹⁵Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sākire sāpiretakani. Ninoatxikana misiritapekaua ate. Teoso !apokaerekatari ninoa kamakiti. Ninoa omanatari kākiti. ¹⁶Kotxi !auritarina Xesosi sākire asāpiretini Xoteo minakaniua, imaerekanina makatxakiko ikapani. Uatxa ninoa maerekani xāpoka. Uatxa Teoso omanākare apokapeka ninoamoni.

Paoro Ipiātina Tesarónika Auakani

¹⁷Ātiātaā ate auakasaaki, ātipirika axinikapikai. Aīto hītekata mauakanisaaki, aākixinire xinikapikai. Ate ipiātai. Iteene anirekari iuaīkana aōkitinii. ¹⁸Anirekapitikamari hītemoni akanapiriini. Nota Paoro itokata nirekamari napokini hītemoni, txamari Satanasi !auritaua asini hītemoni. ¹⁹Aāuīte Xesosi āti ōti ikanapiriākasaaki, aāpotiitaua iua apisatoō. Iusaaki aiātapakiti apokapeka. Kipa aiātapakiti? Hītera. Iusaaki iteene apoxokoniuatako. Kinirepa apoxokoniuata? Kotxi hīte aua iuaā. Iusaaki aāpakapari aparīka īki. Kinirepa aāpakapari aparīka īki? Kotxi hīte auikari Xesosi sākire ate sāpiretakiti. Ininiā peerekari iusaaki. ²⁰Atāopitikara nisākire. Ate iuikai hīte. Hīte kamapoxokonitaua ate.

3 Iuasaaki !amíteenekari amimaropiretakanii híte, ininiã axinikari atenoka kaikota uai Atena sitatxitiã. ²Ininiã iuasaaki aiokanatarai aĩtari Tximótxio hitemoni. Teoso nitiri itxaua. Imoianataua Kristo iokanapirena erekari asãpiretakasaakiri kãkiti. Aiokanatarai iua hitemoni, Xesosi sãkire iteene hãuikini ikapani, isikataparaxiniretinii ikapani. ³Ikara atoko ininiã, kona hĩxinikari Teoso sãkire hĩtakanapini, kãkiti misiritinii xika, kotxi himarotari amisiritiko apokapitikako. Teoso auiritari. ⁴Hĩtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵Ininiã apikomoni !nimíteenekaikari nimimaropiretakanii híte. Ininiã iuasaaki niokanatarai Tximótxio hitemoni, Xesosi sãkire hãuikini nimarotini ikapani. Nipikari Satanasi sikanireõtini híte, Xesosi sãkire hãuikini hĩtakanapini. Nipikari maxikatiũka Xesosi sãkire asãpiretinii híte, hĩtekata aãuakasaaki.

Tximótxio Sãpiretakiti Ikanapiriãkasaaki

⁶Uatxa Tximótxio kanapiripeka atemoni. Iua minapiretai híte. Erekari isãpiretakiti. Iua txaua ate: “Tesarónika auakani iteene auikari Xesosi sãkire. Ninoa tiraõkiuatapika. Ipotxitarina ixinikiniina híte. Ipiãtaina híte, ninoa hĩpiãtini atokotxikana,” itxa Tximótxio atemoni. ⁷Nitariakori, ate amaxikiko auapitika. Ate misiritiko auapitika, iuaritika hĩkamapoxokonitaua, kotxi iteene hãuikari Xesosi sãkire. ⁸Uatxa peerekari ate auini, kotxi Apiananiri sãkire iaõka hĩkama. ⁹Iteene apoxokoniyata Teoso apisatoõ, kotxi hãuikari iua sãkire. Axinikasaakii, apoxokoni iteene auapitika. Ininiã ätipirika atxari aTeosone: “Peerekai

pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰ĩkanõka, pokamara pakini iteene aamanaãri Teoso híte iuaĩkana aaõkitini, kotxi anirekari apikomoni Teoso sãkire himimarotakiniti aõerekinii.

¹¹Anirekari aĩri Teoso, aãũite Xesosi Kristo pakini oerekiniãua aãpokini hitemoni. ¹²Anirekari Apiananiri txĩkitakinii himarotini hĩtiretakiniua. Anirekari hĩtiraõki aneini. Anirekari iteene hĩtiraõkiuatini. Anirekari ikini mane apaka hĩtiretini, ate turetini híte atokotxikana. ¹³Anirekari Apiananiri sikataparaxiniretinii híte. Ininiã Apiananiri Xesosi Kristo ikinika inakitiakorikata ikasaaki uai, iuasaaki maerekati !uaaika hitemoni aĩri Teoso apisatoõ. Iuasaaki híte apoĩtakari !auari. Iuasaaki erekai híte.

Akamakiti Teoso Apokaerekatakiti

4 Nitariakori, apikomoni nisãpiretai. Asãpiretapekai hĩkamakiti tũkane, hãuini Teoso apokaerekatini ikapani. Ikara atoko inakari hĩkamapitika uatxa. Erekari hãuini uatxa, ininiã nõtãkikai Apiananiri Xesosi posotiireẽ, apikomoni iua apokaerekatakiti ikiniõtika hĩkamini ikapani. ²Himarotapitikari aõereẽkiti hĩkamini ikapani. Apiananiri Xesosi paniãtaua ikara aõerekinii híte.

³Teoso nirekari himaerekani xipokaãpotini hãkixinireẽ. Ininiãkara hĩtaniri minakotikatika, hĩtanoro minakotokatika, !hĩsirĩkape. ⁴!Hãuiritapiri hĩito nireẽkiti ikamini. Hĩito auĩte hĩtxauako, ininiã maerekati hĩito nireẽkiti !hĩkama. Atão hĩpaxitariko hĩteka ãto, apanakini ãto apaka. ⁵!Apakata hĩxinikiniri ätipirika maerekati hĩito nireẽkiti äti ãtokata hĩkamini. Xoteo minakanuia, Teoso mimarotakani, xinikari ikara atoko inakari. ⁶!Apakata hĩtxĩkitakiniri äti

aĩtari maerekati ĩtotxi nireėkiti ikamini, kotxi Apiananiri misiritariko kėkiti ikara atoko inakari maerekati ikaminiė. Asėpiretapekai ikara. Apinitapekai. ⁷Teoso kona akiritaua iuamoni, maerekati aĩto nireėkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸Ininiė ikara asėkire manirekakati, !omanataua ate. Omanatari Teoso. !nirekari Teoso sėkire, kotxi Teoso sikari Erekar Matamatakoti kėkitimoni.

⁹Hĩtariakori hĩtiretini pirena kona aiėkatsopata hĩtemoni, kotxi Teoso oerekapekai hĩtoretakaniua. ¹⁰Nimarotari hĩtiretiniri ikinika hĩtariakori Masetonia tixini auakani. Iuaritika nitariakori, aėtėkikai apiata hĩtiretiniri kėkiti ikiniėtika. ¹¹Hėpaiaėkariko hĩtsorikaėtini. Apanakini parėka !himaėkatape. Hėkamariko hĩteka parėka hėuini ĩkapani. Ikara atoko asėpiretapekai hĩte. ¹²Ikara atoko hėkaminiė, Xesosi sėkire mauiėkani paxitai. Ikara atoko hėkaminiė, !auari hiamonitakiti.

Apiananiri Kanapiriini

¹³Nitariakori, anirekari himarotiniri atao inakari ipėkani pirena. Kona anirekari himatinaniuatini Xesosi sėkire mauiėkani matiniuatuatini atoko, kotxi ninoa ipėkasaaki, !imarotarina isinimonina. ¹⁴Aėuikari Xesosi ipinini. Aėuikari iuaėkana őkitikiniua. Ininiėkara aėuikari ipėkani Teoso sėkire auiėkani apaka őkitikiniua. Teoso minana ninoa Xesosikata ikanapiriėkasaaki. ¹⁵Iuasaaki ate auėkipanika inakanua Apiananiri kanapiriėkasaaki, !asari ninoa mitxi ipėkani apisapanika. Mitxi ninoa sa. Iposo atoko ate sa Apiananirimoni. Apiananirira sėpiretapekaua ikara. ¹⁶Iuasaaki Apiananiri potorika itixine. Iuaka katxaka uaimoni. Iuasaaki

akiripoakata iua apokasaaki, ininiė kėkiti kenakotariko Teoso nitiriakori auite sėkire. Teoso trėpetane xėkiko kenakotaėka. Iuasaaki mitxi ipėkani, Kristo sėkire auiėkani, merepanika őkitikauako. ¹⁷Eereka ate auapanika inakanua anikaėkako ipikanikata Apiananiri aaėkitini ĩkapani. Aaėkitari iua itanoxiti katxiėriė. Ininiė eereka iuakata aėuapininiika. ¹⁸Ikara sėkiretxiti hĩsėpiretakakauako, ininiė hėkamataparaxiniretakakauako.

Apiananiri Kanapiriini Őti

5 Nitariakori, kona asėpiretari Xesosi kanapiriini őti. !Asėpiretari apokini kasiriti, ikanapiriinikanani pakini. ²Kotxi atao himarotari, Apiananiri uai apokini, kiĩtiriri ĩkanėka apokini atokokana itxako. Ininiė kėkiti !imarotari Apiananiri apokini őti. ³Iuasaaki kėkiti sėkire: "Neenamatxi !uari. Ereka. Imonėkoni !uari," inakasaaki, iuasaakepeka katimaritika Teoso xipokari ikinipoko. Katimari sito amarini tsiikini atoko itxako. Oa sito tsii apokasaaki, omitekini !uari. Iua atokokana kėkiti mitekini !uari iuasaaki Xesosi kanapiriėkasaaki. ⁴Nitariakori, kėkiti ipiė auakani atoko !hĩtxaua. Himarotapitikari aĩti őti Apiananiri uai kanapiriini, ininiė hiatapari ikanapiriini őti apokini, himatikokakani ĩkapani, kiĩtiriri tikokakiniri kėkiti atoko himinakanı ĩkapani ikanapiriėkasaaki. ⁵Hĩte hėkinika kaiotximereri anaakori hĩtxaua. Pokamarari anaakori atoko hĩtxaua. !Akaikota ipiė. !Akaikota ĩkanėka, kotxi !anirekaikari maerekati akamini. ⁶Ininiėkara apanakini imakakani atoko !himapeko. Araėkire matxako, maerekati mapokakani ĩkapani. Aĩto auite matxaua. ⁷Imakakani imaka ĩkanėka. Poėtakani poėta ĩkanėka.

!Iätapari Xesosi kanapiriini. Ikara atoko !hītẁapeko.

⁸Pokamarari anaakori atxaua, ininiã aĩto auĩte matxaua. Sotato takari itorota koana, itorota tokapare ĩkapani. Sotato torota koana atoko itxa Teoso sãkire iteene hãuikini. Sotato torota koana atoko itxa apaka hĩtiraõki. Ininiã hãuikasaakiri Teoso sãkire, hĩtiraõkiuatakasaaki, hãkixinire tokapare auape. Sotato takari ikii tãta ikii tokapare ĩkapani. Sotato kii tãta atoko itxa amaerekani makatxakiko aimarotini. Ikara imaroretẁi axinikakiti akii tokapare itxaua. ⁹Teoso mereẽua ate kona imisiritiniua ĩkapanini. Iua mereẽua ate amaerekani aãuĩte Xesosi Kristo makatxakini ĩkapani. ¹⁰Iua ipina kãkiti ĩkapani. Ipina iuakata aãuini ĩkapani. Ikanapiriãkasaaki, isãkire auĩãkani auãkipanika inakani, ipĩkani pakini aua iuakata. ¹¹Ininiã hĩsikataraxiniretakauako. Himoianatakauako Teoso sãkire iteene hãuikini ĩkapani. Uatxa ikara atoko inakari hĩkamapeka.

Paoro Õtãkikare Mapotõkire

¹²Nitariakori, aõtãkikai himarotinina hĩte sauaki parĩkauatakani, Apiananiri sãkire sãpiretakani, hĩte õtãkikakani. ¹³Ininiã iteene hĩpaxitanako. Hĩtiretanako ninoa, kotẁi ninoa iteene parĩkauata hĩte ĩkapani. !Hĩtxitakakapeua. !Hineenamauatape. ¹⁴Nitariakori, iteene aõtãkikai hĩte ia atoko: Hĩpinitariko kãkiti paniãtakiti makĩpitakani. Hĩsikataraxiniretariko pĩkarauatakani. Himoianatariko mataparani. Katima !hĩtxapeko homanãkarauatini kãkiti kerokasaaki.

¹⁵Kona hãuiritapiri misiritakori misiritiniri imisiritakiri. Ætipirika hĩkamariko erekari hĩtariakorimoni, Xesosi sãkire mauĩãkanimoni apaka.

¹⁶Ætipirika hĩpoxokoniuatoko. ¹⁷Himisãkiretapikariko Teoso. ¹⁸Hĩpoxokoniuatakasaaki, hĩtxariko Teoso: “Erekari pikamakiti nota ĩkapani,” hĩtxako. Himatinaniuatakasaaki, iuaritika hĩtxariko Teoso: “Erekari pikamakiti nota ĩkapani,” hĩtxako. Ikara atoko Teoso nirekari Ætipirika hĩsãpiretiniri iua, kotẁi Kristo Xesosi nakitiakori hĩtxaua. ¹⁹!Hĩtotakapiri Erekari Matamatakoti parĩkauatini hãkixinireẽ. Hĩkamariko ipaniãtakiti. ²⁰!Homanatapiri Teoso sãkire kãkiti sãpiretakiti. ²¹Hãtaerekatariko ikinika. Erekarinoka hĩkamako. ²²!Hĩsipeko maerekati kamikoãtaã, kotẁi hĩsiniã, apanakini xinikari atão maerekati hinireka hĩkamini.

²³Anirekari Teoso, kãkiti kamaerekaxiniretakari, iua iteene kamaerekatinii hĩte iua nakitiakorinoka hininiua ĩkapani. Nimisãkiretari Teoso hĩte ĩkapani, hĩxinire, hãkixinire, hĩto pakini ereka inini, ininiã aãuĩte Xesosi Kristo uai apokasaaki maerekati !auaika hĩtemoni, ininiã hĩte apoĩtiko !auari. ²⁴Hĩte akiritakari kamari isãkire iaõka.

²⁵Nitariakori, himisãkiretariko Teoso ate ĩkapani. ²⁶Haõkitakakasaakiaua, hĩtiraõkiritika hãpakapakauako, kotẁi hĩtariakori itxauana. ²⁷Apiananiri posotĩireẽ nipaniãtai hãtatsopatiniiri ia niokanatsopatakiti ikinika aĩtariakori kenakotini ĩkapani. ²⁸Aãuĩte Xesosi Kristo sikari ikinipoko erekari hĩtemoni. Ameẽ.

2 TESARÓNIKA

Paoro Iokanatsopatakiti Iuaíkana Tesarónika Auakanimoni

1 Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aíri Teoso nakitiakori hĩtxaua. Apiananiri Xesosi Kristo nakitiakori hĩtxaua. ²Aíri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³Nitariakori, átipirika atxari Teoso: “Erekapitikari pikamakiti Tesarónika auakani íkapani,” atxa. Ikara atoko asápiretari Teoso, kotxi ikiniótika Teoso sákire háuikini apiaápota. Apaka hĩtiretakiniua ikiniótika apiaápota. ⁴Ininiã apanakini Teoso sákire auiaëkanikata aãuakasaaki, asápiretana ninoa ate iuikinii hĩte. Ate iuikari himisiritiko himĩteenekini. Ate iuikari háuikiniri Teoso sákire. Iteene himaxikiko, himisiritiko pakini, iuaritika himĩteenekari. Iteene háuikari Teoso sákire.

⁵Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari hĩauĩte Teoso paniãtakiti, ininiãkara iuamoni apakatapitika háuini Teoso auĩtetxi ininiãtaãua.

⁶Teoso kamari atão inakaranoka. Ininiã imisiritariko hĩte misiritakani.

⁷Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerinkata.

⁸Xamina tirinakariã imisiritanako Teoso mimarotakani, aãuĩte Xesosi Kristo

iokanapirena erekari makípitakani. ⁹Ninoa misiritaãkako átipirika. Ikinipoko xipope ninoa íkapani. !Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiire. ¹⁰Ninoa misiritaãka, Apiananiri kanapiriini ótisaaki. Iuasaaki inakitiakori, isákire auiaëkani, txariko: “Peerekai. Peerekai. Áti kaposotiireri pite atoko inakari !auari,” itxanako. Ikara atoko hĩte apaka sápiretari iua iuasaaki, kotxi hĩte auikari asápiretakiti hĩtemoni.

¹¹Ininiã amisákiretapikari aTeosone hĩte íkapani. Ia atoko atxari iua: “Pite akiritari Tesarónika auakani pinakitiakori ininiuana íkapani, ininiã ninirekari pite apokaerekatiniri ninoa kamakiti pite íkapani. Pisikaposotiiretana ninoa ikinipoko inireëkitina erekari ikaminina íkapani. Ninoa auikari pisákire, ininiã iparíkauatana pite íkapani. Ininiã pisikaposotiiretana ninoa ikara iparíkana ikaminina íkapani.” ¹²Ikara atoko amisákiretari Teoso, kotxi apanakini atamatakasaakiri erekari hĩkamakiti, itxarinako aãuĩte Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hĩte: “Peerekai hĩte,” itxaike. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

Apia Maerekati Apokini

2 Nitariakori, maxinikari aãuĩte Xesosi Kristo kanapiriini. Maxinikari iuakata aãpotiitiniua. Ikara axinikasaaki, aótkikikai hĩte. ²Apanakini sápiretai: “Apiananiri kanapiriini óti apokapeka,” itxana. Maerekaxiniretika !hĩtxape. Ikara atoko inakasaakina, !hĩpikarauatape. Paxirari ninoa sákire. Atxiĩti ninoa txari: “Erekari Matamatakoti sápiretano ikara.”

Atxiiti ninoa txari: “Paoro sãpiretari ikara.” Atxiiti ninoa txari: “Paoro iõkatsopatarari ikara.” Paxirari ninoa sãkire. Kona hãuikapiri ikara atoko inakari. ³Kona xatiki hãuiritapiri kãkiti misirienetini. Apiananiri kanapiriini apisapanika, kãkiti !nirekari Teoso sãkire ikipitini. Iuasaaki maerekati kamakari apiatakari apoka. Xipokatxi akiri akiritaãka. Iua xipokaãkapitikako. ⁴Iua apia maerekati !nirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. ãti Teoso !uari,” itxako iuasaaki. ⁵Hitekata nauakasaaki, nisãpiretapekai ikara. Atxiiti hõte xinikapanikari nisãpiretakiti? ⁶Uatxa kona apakatapanika iua apia maerekati apokini. Himarotari Teoso !auiritari iua apokini uatxa. Iketo õtinokara Teoso auiritari iua apokini. Iuasaaki iuaka oerekaua. ⁷Maerekati kipatakori posotiire auape uatxa, iuaritika maerekati mauritakati !auiritapanikari iteene maerekati iarikini. ãti õti maerekati mauritakati makatxakaãka. ⁸Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixõkare, isinanirenani xipokari iua. Iotximere xipokari iua apia maerekati. ⁹Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakiniti. Iua oerekari ikara, kãkiti imisirienetini ikapani, isãkire kãkiti auikini ikapani. ¹⁰Ikini sereti maerekati ikama kãkiti pĩpinanaãkani imisirienetini ikapani. Ninoa pĩpinanaãkani xipokapitikako, kotxi !nirekarina atão inakari itiretinina, ininiã imaerekanina makatxakiko !uari. ¹¹Ininiã iuasaaki Teoso txikitakana auikinirina ninoa

misirienetakani sãkire, ininiã auikarina atão minakati apiatakari. ¹²Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³Nitariakori, Apiananiri tiretakini, ãtipirika erekari amisãkiretiniri Teoso hõte ikapani ia atoko: “Erekapitikai, kotxi pite mereẽna Tesarónika auakani imaerekanina pimakatxakini ikapani.”

Itixi kamiko apisapanika, iua mereẽi hõte. Imakatzakari himaerekani, kotxi Erekari Matamatakoti txikitakai Teoso nakitiakori hininiuua. Imakatzakari himaerekani, kotxi hãuikari atão inakari. ¹⁴Teoso iokanapirena erekari asãpiretakiti hõtemoni hãuikasaaki, iuasaaki Teoso akiritai hõte. Ininiã aãuõte Xesosi Kristo iotximere hõte apaka apakapako. ¹⁵Ininiã nitariakori, iteene kataparaxinire hõtxako. Itene hãuikariko Teoso sãkire asãpiretakiti, aiõkatsopatakiti pakini. !Hitakanapapiri.

¹⁶Anirekari aãuõte Xesosi Kristo, aõri Teoso pakini sikataparaxiniretinii hõte. Ninoa iteene tirtetaua. ãtipirika isikataparaxiniretaua. Isikaua erekari aiãtapini ikapani. Aimarotari ikara erekari apokapitikako. Ikara atoko inakari ikama ate ikapani, kotxi isikaua ikinipoko erekari. ¹⁷Erekari hõsãkiretakasaaki, erekari hõkamakasaaki, anirekari isikataparaxiniretinii hõte apikomoni erekari hõkamini ikapani.

Himisãkiretariko Teoso Ate ãkapani

3 Nitariakori, nisãkire mapotõkire apoka. Himisãkiretariko Teoso ate ãkapani Apiananiri sãkire katima iaripiretini ikapani. Himisãkiretariko Teoso Apiananiri sãkire auikiko ikapani, hõte auikiniri atokotxikana. ²Himisãkiretariko Teoso imakatzakinuua ate amapinakanani

íkapani, maerekati kamakani sauaki aāuakasaaki, kotxi apanakini !auikari Teoso sākire. ³Apiananiri kamari ikinika isākire iaōka. Iua sikataparaxiniretai hīte. Itokapakeētai, ininiā Satanasi !inokai. ⁴Apiananiri txīkitakaua ate aimarotiniri ate paniātakiti hīkamini. Ate imarotari, katana apaka hīkamapanikariko asākire iaōka. ⁵Anirekari Apiananiri oerekīnii Teoso tiraōki. Anirekari hīmiteenekiniri ikinika himisiritiko, Kristo imisiritiko imīteenekini atokokana.

Kākiti Paniātakiti Makīpitakani

⁶Nitariakori, aāuīte Xesosi Kristo nireēkiti iaōka asāpiretai hīte, ininiā apaniātai ia atoko. Hītari kākiti paniātakiti makīpitakati, aōereēkiti iaōka imakamakaniā, ininiā iua moianari !hītxapeuako. Hītakanapariko iua. ⁷Hīte imarotari akamakiti iaōka hīkamini, kotxi hītekata aāuakasaaki ate kīpitari kākiti paniātakiti. ⁸Kona anikari nipokori amaikitxitakinīti. Iuasaaki iteene aparīkauata. Īkanōka, pokamara pakini aparīkauata akiena aiamotini ikapani, kotxi !anirekari hīte kaamatini hīte kiena. ⁹Apakatapitika kākiti ikitxitiniua aparīka ikapani, iuaritika !anirekari hīkitxitiniua, kotxi anirekari hīte parīkauatini ate parīkauatini atokokana. ¹⁰Hītekata ate auakasaaki, ate paniātai hīte ia atoko: “Kākiti manirekakaniāri iparīkauatini, !inikapani.”

¹¹Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotinirina āti kākiti kamakiti. ¹²Aāuīte Xesosi Kristo posotiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ikienana apokinina ikapani. !Himaākatapiri apanakini kamakiti. ¹³Nitariakori, !hīsāpakape erekari hīkamini.

¹⁴Kākiti ereē makamakaniāri ate ōtākikakiti ia iōkatsopariā, erepaniko iua. Iua moianari !hītxapeuako. Hītakanapariko iua, ininiā iuasaaki atxiīti ipētauata. Iuasaaki atxiīti iuaikana atāo ikama. ¹⁵Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sākire Mapotōkire

¹⁶Anirekari Apiananiri, kākiti kamaerekaxiniretakari, kamaerekaxiniretini hīte ikiniōtika. Anirekari iua kaikotini hītekata.

¹⁷Nota Paoro iōkatsopata nisākire mapotōkire niuakoā. Ia nitakaōtxikare, ininiā himarotari atāo ia nota iokanatsopatakiti. Ia atoko inakari niōkatsopata. ¹⁸Aāuīte Xesosi Kristo sikari ikinipoko erekari hīte hīkinikamoni. Ameē.

1 TXIMÓTXIO

Merepanika Paoro Iokanatsopatakiti Tximótxiomoni

1 Nota Paoro iokanatsopata pite Tximótxiomoni. Xesosi Kristo iokanapirena sápiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatanona nota kákitimoni, iokanapirena nisápiretini íkapani. ²Pite Tximótxio, nota ákiri atoko pitxaua, kotxi merepitipánika pauikari Xesosi sáikire nota sápiretakasaakii. Aíri Teoso, aáuíte Xesosi Kristo pakini sikai ikinipoko erekari. Iamoníkaina. Ikamaerekaxiniretaina pite.

Atão Minakati Oerekakani

³Masetónia tixinimoni nisikasaaki, nipaniátai pite Épeso sitatxiti pikaikotini. Uatxa iuaíkana nipaniátai ereé Épeso pikaikotini. Ikara ninireka, kotxi apanakini ereé auakani oerekari Teoso sáikire kákitimoni, txamari na atáoni ninoa oerekakiti. Ninirekai pite pinitinina ninoa atão minakati imoerekakanina íkapani, ⁴kotxi ninoa sápiretapikari kitxakapiríkari pirena. Ninoa xinikapikari aátokiriakorini uáka, ininiákara kákiti taparakienatakakaua iuákana ixinikasaakina. Pótáikikanako ninoa ikara atoko inakari sáikiretxiti itakanapinina, kotxi ikara sáikiretxiti !oerekari kákiti Teoso nireékiti. Teoso sáikire aáuíkiniá, aimarotari Teoso nireékiti. ⁵Nipaniátai pite ikara atoko, kotxi ninirekari ereé Teoso sáikire auiákani tirketakiniua. Kákiti ákixinire maerekati mauakaniá, ininiá itirketakakaua. Kákiti imarotakasaakiri ikamakiti ereka inini, itirketakakaua.

Kákiti ikara atoko inakari atão auikari Xesosi sáikire. ⁶Kákiti, Teoso sáikire atão masápiretakani, takanapari ikara erekari kimaporiti. Pípinanaákani atoko itxauana, kotxi !imarotaikarina Teoso kimapore. Maxikatiíka isákirauatapikana. ⁷Ninoa kákiti nirekamari Teoso paniátakiti oerekakani ininiuana, txamari !imarotarina Teoso paniátakiti. !imarotarina isápiretakitina, iuaritika ninoa: “Atáopitika asáikire,” itxanátana.

⁸Kákiti atão sápiretakasaakiri Teoso paniátakiti iókatakori, iusaaki aimarotari ipaniátakiti ereka inini. ⁹Mauiritakoti aua, kona kákiti atão inakari kamakani íkapanini. Mauiritakoti aua, kotxi maerekati kamakani auapitika. Aua mauiritakoti manireékani. Aua Teoso manireékani. Aua maerekati kamakani. Aua erekari manireékani. Aua Teoso paniátakiti napetakani. Kákiti aua iri okakani. Kákiti aua inoro okakani. Aua kokanirini. Mauiritakoti aua, kákiti ikara atoko inakari íkapani. ¹⁰Aua kákiti áti ítanorokata siríkakari. Aua kákiti áto tanirikata siríkakararo. Aua kiki áti kíkikata siríkakari. Aua sito áto sitokata siríkakararo. Aua kákiti áti kákiti ítiriákani ivétxitiniri íkapani. Aua aápirenaári. Aua kákiti áti apóitakani. Mauiritakoti aua ikara atoko inakari kákiti íkapani. Ninoa !auikari Teoso sáikire atão inakari. ¹¹Ikara Teoso iokanapirena erekari sápiretaua. Peerekari Teoso. Peerekari iua iokanapirena. Iua paniátano nota iua iokanapirena nisápiretini ikininapemoni.

Teoso Amoníkiniri Paoro

¹²Nitxari aáuíte Kristo Xesosi: “Erekari pite kaminano, kotxi pisikataparaxiniretano nota pite íkapani niparíkautini íkapani. Erekari

pauikiniri nisäkire. Erekarì pimereinino nota pisäkire ikininapemoni nisäpiretini ikapani,” nitxari Kristo Xesosi.¹³ Meresaaki nota misäkirepiretari iua Xesosi. Nasikatikinitana iua säkire auiaäkani nokinina ikapani. Kaneenamari nitxaua iuasaaki. Iuaritika Teoso amonikano. !Imisiritano nota, kotxi iuasaaki !nimarotari nikamakiti Xesosi säkire nimauikakani xika.¹⁴ Iuasaaki !erekano. Maerekati nitxaua. Iuaritika aäüite Kristo Xesosi sikari ikinipoko erekarì notamoni. Kristo Xesosi nakiti nitxapekxaua, ininiäkara nauikari isäkire. Iua nakiti nininiäua, nitiretari iua. Nitiretari apanakini apaka. Mitxi !nimarotari nitiraõkiuatini.¹⁵ Nisäpiretaiko ia säkiretxiti atäo inakari, pauikiniri ikapani, ikinimane auikiniri ikapani. Nitxai: “Kristo Xesosi apoka ikorapokoriti maerekati kamakani maerekani imaktxakini ikapani,” nitxa. Maerekati apiata kamakari nitxaua nota.¹⁶ Maerekati apiata kamakari nitxaua, iuaritika Teoso !imisiritano. Iamonikano, kotxi inirekarì apanakini imarotiniri Kristo matima omanäkarauatakani käkiti maerekani xika. Xesosi nirekarì nota eereka auakani, isäkire auiaäkani imarotiniri Xesosi amonikinina ninoa, kotxi iua amonikano nota maerekati apiata kamakarino. Ninoa auikari isäkire, ininiäkara auapininiika Teosokata.¹⁷ Nitxari Teoso: “Ari Teoso, peerekai. Ätipirika ikinimane auite pitxaua. Pipinini !uari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ätipirika. Ikinimane ätipirika säpiretaiko ereka pinini. Atäopitikara nisäkire. Ameë.”

Xesosi Säkiere Iteene Auikiko

¹⁸ Tximótxio, namarite atoko pitxaua. Nisäpiretai noerekakiti säkiretxiti

pikaminiri ikapani. Pixinikariko akokaxiti Teoso säkiere säpiretakani säpiretakiti. Ninoa säpiretai Teoso nirekakiti pite kamini tikane. Nota säkiere uatxa ninoa säkiere atokotxikana. Ikara ninoa oerekakiti säkiretxiti pikamapikako, ininiäkara pite sotato erekarì atoko pitxaua Satanasi pinaiatini.¹⁹ Pauikapikariko Xesosi säkiere. Ikara pikeeko atoko itxa. !Pikamapiri päkixinire mapokaerekatakiniti. Ikara apaka pikeeko atoko itxa. Apanakini kamapekarì äkixinirena mapokaerekatakiniti, ininiä eereka !auikaikarina Xesosi säkiere. Kanaua sakikini atoko itxa ninoa auikiniri Xesosi säkiere.²⁰ Imeneo inakori, Arexätri inakori apaka ikara atokokana itxana. Ninoa misäkirepiretari Teoso, ininiäkara nota sikanapana ninoa Satanasi misiritakasaakina ninoa, atxiiti itakanaparina Teoso imisäkirepiretinina.

Teoso Misäkiretiko Ikinimane Ikapani

2 Merepanika nõtäkikai pimisäkiretiniri Teoso ikininape käkiti ikapani. Pimisäkiretariko Teoso ninoa nireëkiti ikapani. Pamanaäriko Teoso sikiniri erekarì ninoamoni. Pitxariko Teoso: “Peerekai pite, kotxi erekarì pisikakiti käkitimoni.”² Teoso pimisäkiretako auitetxiakori apiari ikapani, auitetxiakori poiäori ikapani apaka. Pamanaäriko Teoso ninoa ikapani, aäüini ereka inini ikapani, neenamatchi mauakani ikapani. Ikara atoko aniniä, akamari Teoso nireëkiti erekarinoka.³ Ikara akaminiä erekapitikari. Teoso, amaerekani maktxakakari, apokaerekatari asäkire ikara atoko inakari akamini.⁴ Teoso nirekarì imaktxakiniri ikinimane maerekani. Inirekarì ikinimane imarotiniri atäo inakari säkiretxiti.

⁵Átinokara Teoso aua. Áti kikinokara mikanapiriári kākiti Teosomoni. Xesosi Kristonokara mikanapiriári kākiti Teosomoni, kotxi iuanoka misākiretari Teoso kākiti ikapani. ⁶Iua ipina ikinimane kākiti iikitxitini ikapani. Teoso ketotini ōti manapi Xesosi ipina. Xesosi ipinini oerekaua Teoso nirekiniri imaktxakiniri ikinimane maerekani. ⁷Ininiākara Teoso akiritano nota isākire ikinimanemoni nisāpiretini ikapani. Ininiā Teoso iokanatakiti kākitimoni nitxaua nota. Ikara nisākire atāo. Kona paxirarini. Teoso akiritano Xoteo minakaniua noerekini ikapani. Akiritano atāo inakari sākiretxiti noerekinina ikapani. Akiritano noerekinina Teoso sākire auikinina ikapani.

⁸Ininiā ninirekari kikiakori erekarinoka kamakani, ikini itixiti auakani, misākiretiniri Teoso. Ninirekari Teoso imisākiretakasaakina, iusaaki ninirekari isākire auikinina apaka, āti imomanatakanina.

Sitoakoro Xesosi Sākire Auiākani

⁹Ninirekari sito māka atāo inini, kiki paxitiniro ikapani. !Apakata oōuikiniua omāka ereka inini xika. !Erekari sito ātipirika oeretiniri oiaōo kākiti xikaueretiniro ikapani. Oro, pērorā pakini otakinia oītoā kākiti xikaueretiniro ikapani, !erekari. !Erekari mākatxi kakaroneri oieretakini. ¹⁰Sito Teoso nireēkiti nireēkaro kaminiāri erekari, erekapitikari. Mākatxi peereri atoko itxa erekari okamakiti, kotxi kākiti atamatari okamakiti. ¹¹Teoso sākire sāpiretakari oerekarauatakasaaki, erekari sito kenakotiniri. !Apakata iusaaki osākirauatini. Erekari opaxitiniri iua, isākire okīpitini ikapani. ¹²Nota !auiritaro sito oerekinina kikiakori, ikamakitina tīkane opaniātina.

Erekari masākiretoka onini. ¹³Ikara atoko itxa, kotxi merepitipanika Teoso kamari kiki Adāo inakori. Eerekaikara ikamaro sito Eva inakoro. ¹⁴Kona Adāoni misirienetaāka. Sitora misirienetapeēka. Oa kamari maerekati, kotxi !okamari Teoso paniātakiti, ininiākara !apakata sito paniātini kiki ikamakiti tīkane. ¹⁵Sito auikiniāri Teoso sākire, otiretiniri apanakini, maerekati omakamakaniā, omasarauatakaniā, Teoso maktxakari omaerekani, kotxi āto sito eenetari Xesosi, amaerekani maktxaākari.

Kōtākikarerini Pirena

3 Ia nisākire atāo. Kiki nirekiniāri kōtākikarerini ininiua, Teoso sākire auiākani ōtākikini inirekiniā, iua nirekari parīkatxi erekari. ²Ia atoko kōtākikarerini txauako: !kamari maerekati, ininiā iua apoitiko !uari. Átonanirako itanoro. Kīkiteri itxauako. !Katimari omanākarauatini. Ipaxitaākako. Kākiti ātiātaā ikani apakapako aapoko. Imarotariko oerekarauatini. ³!Ipoātapeko. Kaneenamari !itxapeuako. Katiraōkiri itxauako. !ipotxitapiriko neenamati. Txineiro iteene !ixinikaperoko. ⁴Iua nīkatanako aapoko auakani, ninoā auini ereka ininina tīkane. Itxikitakanako imiakori ipaniātakiti ikīpitinina ikapani, ininiā ninoā paxitari iua. ⁵Ikara atoko itxako kōtākikarerini, kotxi aapoko auakani imamimatanīkaretakaniā, ininiā !imarotari kākiti Xesosi sākire auiākani inīkatini. ⁶Kiki mapaōtinoka auikiniāri Xesosi sākire, !apakata iua Xesosi sākire auiākani ōtākikakari ininiua. Xesosi sākire auiākani ōtākikakari ininiāua, iuikaua atxiīti. Iuikiniāua, Teoso misiritari iua, kitxakapirīka Satanasi iuikasaakia imisiritini atokokana. ⁷Kiki Xesosi sākire auiākani

õtākikakari paxitaākako, Xesosi sākire mauīākani apaka paxitari iua. Ikara atoko ininiā, !ikamapaniri kākiti kamapētatakari. Ininiā Satanasi !imaīkari iua itakapiremoni.

Kamiparīkarerini Pirena

⁸ Ātipekana, Xesosi sākire auīākani miparīkatakanipekana nisāpiretaiko: Iua kamariko erekari, ipaxitiko tikane. Ātika isākire itxauako. !Ipoātapeko. !Apakata txineironoka ixinikini. ⁹ Kamiparīkareri iteene auikariko Teoso sākire atāo inakari. Ākixinire imarotariko ikaminiri Teoso sākire iaōka. ¹⁰ Xesosi sākire auīākani ataerekatariko kiki, kamiparīkareri ininiua nireēkari. Erekarinoka ikaminiā, ininiā iua auiritaāka ninoa miparīkatakari ininiua. ¹¹ Iua atokokana kamiparīkareri itanoro kamariko erekari opaxitiko ikapani. Aāpirena !okamapeko. !Opoātapeko. Okamariko okamaenetakiti iaōka. Ininiā kākiti auikari osākire. ¹² Ātonanirako kamiparīkareri itanoro. Inikatariko imiakori, kākiti iua aapoko auakani apaka, ninoa auini ereka ininina ikapani. ¹³ Kamiparīkareri atāo parīkauatiniā, iteene ipaxitaāka. Apanakini apokaerekatari iparīka. Ininiā itaparaxinireritika isāpiretari Kristo Xesosi sākire auikiko kakitimoni.

¹⁴ Uatxa pitemoni niōkat-sopatakasaaki, ninirekari paītiki nisini hītemoni. ¹⁵ Atxiīti uai okanani nauapanika, ininiā ia iōkatsopari oerekaiko pite Teoso nakitiakori atāo auini ikiniōtika, kotxi Teoso aapoko atoko atxaua, iua auiniātaā ikapani. Teoso auāki itxapika. Kākiti iua nakitiakori nīkatari iua sākire. !Auiritana apanakini koketiniri atāo minakati Teoso sākirekata. Isāpiretana ikinimane Teoso sākire atāo inakari. ¹⁶ Peerekari Teoso parīka kākiti ikapani.

Merepanika kākiti !imarotari, eereka Teoso oerekari iparīka. Ia atoko Teoso kaminaua ate:

Kākiti itxapekaua. Iua Xesosi. Erekari Matamatakoti oerekari kākiti Xesosi sākire atāo inini. Teoso nitiriakori iaxitikini atamatari iua. Isākire sāpiretaāka ikini itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni.

Ikara atoko inakari Teoso parīka kākiti ikapani.

Atāo Minakati Oerekakani

4 Iua Erekari Matamatakoti sāpiretaua, apanakini !auikaikari Xesosi sākire itixi mapotōkire ōti takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa ākixinire sākire !auaika. !Isāpiretaikarina maerekati imakamakanina ikapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani !auiritari kākiti itanorouatini. “!Erekari kākiti itanorouatini,” itxa ninoa sākire. Teoso kamari ikini nipokori kākiti nikini ikapani. Txamari ninoa kamisirienererini !auiritari kākiti apanakini nipokori inikinina. Teoso nirekari Xesosi sākire auīākani, atāo inakari imarotakani, nikiniri ikara nipokori Teoso imisākiretaka atoko: “Erekapitikai ia nipokori pisikiniāua.” ⁴ Ikinika Teoso kamakiti erekari. !Apakata kākiti manirekakaniāri apanakini nipokori. Ikinipoko nipokori hinikasaaki, himisākiretariko Teoso. Hītxariko: “Erekapitikai ia nipokori pisikiniāua.” ⁵ Teoso sākire sāpiretaua ikinipoko nipokori anikini.

Nipokori anikasaaki, amisäkiretiniäri Teoso, nipokori isikakiti ereka inini asäpiretiniäri, ininiä ikara nipokori erekari anikini.

Kristo Xesosi Nitiri Erekarri Inakari

⁶ Aitariakori pötäkikiniä ikara atoko, Xesosi Kristo nitiri erekari pitxaua. Nipokori sikataparatarari käkiti ito. Teoso säkire aäuiäkiti, oerekaretxi atão inakari, nipokori atoko itxa, kotxi isikataparatarari axinire. Pite auikapikari oerekaretxi atão inakari. ⁷ Pimaakatapiri miikiteti säpiretakiti, säkiretxi Teoso mapokaerekatakiniti. Ikinioëtika piteka poerekauako Teoso paniätakitinoka pikamini, ininiä Teoso nireëkitixikana pikama. ⁸ Piïto parïkauatakasaaki, piïto tapara apiaäpota, ininiä erekari piparïkauatini. Apiaerekata pixinire parïkauatini pixinire auäki ininiä ininiä, pauapikako Teosokata ätipirika. ⁹ Ikara nisäkire atão. Erekarri ikinimane auikiniri ikara. Erekarri ikinimane kaminiri ikara. ¹⁰ Ininiäkara iteene aparïkauata Teoso ikapani. Pasäpaniri, iuaritika aparïkauatapitipo, kotxi aäuiakari Teoso säkire, Teoso mipïkati säkire. Iua ikinimane käkiti maerekani makatxaäkari itxaua. Iua makatxakari isäkire auïäkani maerekani, maerekani misiritikoätaä imasikanina ikapani.

¹¹ Pipaniätariko käkiti noerekakiti säkiretxiti iaöka ikaminina. Poerekana noerekakiti.

¹² Pite ätokoripanika, iuaritika pimarotapitikari Teoso säkire, ininiä !pauiritapiri käkiti napetiniri poerekakiti säkiretxiti. Atão inakarinoka pikamako Xesosi säkire auïäkani atamatini ikapani, ininiäkara ninoa auikapitikariko pisäkire, ininiä ninoa nirekari pite atoko ininina. Erekarinoka pisäpiretako. Erekarinoka

pikamako. Käkiti pitiretako. Iteene pauikariko Teoso säkire. Maerekati !pikamapeko. Ikara atoko pininiä, ninoa nirekari pite atoko ininina. ¹³ Ereë nimapokakanisaakipanika, patatsopatariko Teoso säkire iökatsopatariko, apanakini kenakotiniri ikapani. Pisäpiretanako Teoso säkire. Teoso säkire pötäkikanako. Poerekana Teoso säkire atão imarotinina ikapani. Ikara atoko pitxapikanako, ereë napokini apisapanika. ¹⁴ Akokaxiti kötäkikarerini säpiretai piparïka Teoso ikapani. Iuasaaki ninoa takari iuakona pite nopini, pite ikapani imisäkiretakasaakirina Teoso. Ikara atoko ininiäkara, pikamapikariko ikara piparïka Teoso ikapani. ¹⁵ Ätipirika pixinikariko ikara nötäkikini. Ikinioëtika pikamariko piparïka Teoso ikapani. Ininiä apanakini imarotari Teoso säkire apiaäpota pauikini. ¹⁶ Erepaniko pikamakiti ereka ininiä ikapani. Erepaniko poerekakiti säkiretxiti Xesosi oerekakiti iaöka inini. Ikara ätipirika pikaminiä, piteka makatxakaua pimapinakani ikapani. Apaka pimakatxakana pisäkire auïäkani imapinakani ikapani.

Ötäkipirenatxi Pirena

5 !Pitxitapiri kiki aneëkarri. Pötäkikariko, piri pimisäkiretini atokokana. Pötäkikariko kikiakori pite tikini auakani, pitariakori pimisäkiretini atokokana. ² Pötäkikaroko sito aneëkarro pinoro pötäkikini atokokana. Pötäkikaroko ätokoro, pitaro pötäkikini atoko. Iuasaaki pipaxitaroko.

Sitoäkini Tikinitakoni

³ Pinïkatanako sitoäkini tikinitakoni onirimane matiretakini. ⁴ Tikinitakoro oimiakori auiniä, oïtariakori anaakori auiniä, ninoa nïkatamaroko oa. Ikara ikaminiäna, erekari Teosomoni. Teoso

poxokotana ninoa. Merepanika ninoa kaminiári erekari ninoaka aapoko áki, aimarotari ninoa atão auikiniri Teoso sákire, kotxi meresaaki irina, inorona pakini níkatana ninoa. ⁵Tikinitakoro miníkatokoto auikari Teoso iníkatiniro oa. Oa misákiretari iua pokamara, íkanõka pakini iníkatiniro íkapani. ⁶Tikinitakoro osarauatininoka nireékaro, ipíkaro atoko otxaua. ⁷Pisápiretanako ereé auakani, Xesosi sákire auíákani níkatinina inorona, inorona itaro tikinitakoro pakini. Iníkatiniána, !apoítaákana. ⁸Xesosi sákire auíákani maníkataniári inirimane, itakanaparina Teoso sákire auikinina. Apia maerekanita iua aapoko áki auakani imaníkataniána. Kákiti Teoso sákire mauíákati maerekati itxaua. Apia maerekati itxaua iua aapoko áki auakani maníkataniána.

⁹Apanakini sito tikinitakoni moianatana Xesosi sákire auíákani. Pitakariko ninoa tikinitakoni uáka aátsopaá himoianatini íkapani. Sito ikara atoko inakaro seséta ano apiko auakaro oa. Átinoka oítanirini. ¹⁰Oa imarotaáka, kotxi erekarinani okama. Atão oóerekari oimiakori. Osikakienatana átiátaá ikani. Oimarotaáka, kotxi oa arokakititari kákiti Teoso nakitiakori. Oimarotaáka, kotxi kákiti maerekaxinireni otireta. Oimarotaáka, kotxi ikini sereti erekari átipirika okama. Tikinitakoro ikara atoko inakoro uáka aátsopaá pitaka himoianatini íkapani.

Tikinitakoni Átokoropanika Inakani Ótáikikiko

¹¹!Pitakapiri tikinitakoro uáka iua aátsopaá, átokoropanika inakaro, kotxi iuaíkana onirekari kikikata osiríkini, ininiána onirekari iuaíkana oítaniriuatini, ininiána !onirekaikari Kristo. ¹²Ikara atoko okaminiána,

okamari maerekati, kotxi mitxi osákire: “Nikamariko paríkatxi Teoso íkapaninani. !Nítaniriuataikako,” otxama. ¹³Tikinitakoro átokoropanika inakaro itotari oiarinauatini. Oianapokotapika. Apia maerekati okama, kotxi ototari aápirena okamini. Onirekari íkinika apanakini kamakiti oimarotini, txamari ikara atoko !apakata. !Apakata áti kamakiti osápiretini apanakinimoni. ¹⁴Ikara atoko ininiána, !pitakapiri tikinitakoro átokoro inakaro uáka iua aátsopaá. Nota ótáikikana átokoroakoro tikinitakoni iuaíkana taniriuatini. Erekari keene ininina, aapokona iparíkauatinina. Ikara atoko ininiána, Xesosi sákire mauíákani kona misákirepiretana Xesosi sákire auíákani. ¹⁵Nota ikara atoko nisápiretai, kotxi átikaka tikinitakoni átokoroakoro inakani takanapapekari Xesosi sákire auikinina, Satanasi paniátakiti ikaminina íkapani. ¹⁶Xesosi sákire auíákani inirimanena tikinitikoá, iníkatana ninoa. !Erekari imaníkataniári inirimanena tikinitakoni. !Erekari inirekinirina apanakini Xesosi sákire auíákani níkatinina inirimanena, kotxi ninoa níkatana kaiáopokori tikinitakoni manirimaneni. Pasápaniri ninoa paríka.

Kótáikikarerini Pirena

¹⁷Kótáikikarerini atão kaminiári iparíka Xesosi sákire auíákani íkapani, erekari hísinina iparíkana íki apiata. Teoso sákire isápiretiniána apanakinimoni, Teoso sákire oerekiniána, ininiákara erekapitikari apiata iparíkana íki híkitxitinina. ¹⁸Teoso sákire iókatsopatakori txari: !Híaxirikanamatapiri kema auíte iparíkauatakasaaki, triko íkatxaratakasaaki. Pauiritariko inikiniri triko íki, iparíkauanáatakasaaki.

Teoso sákire iókatsopatakori txari apaka:

Erekapitikari paríkauatakari apakapiniri iparíka íki.

¹⁹ Áti apoítiniári kótákikareri, !pimaákatapiri isápiretakiti. Ipi, atxiíti ipi áti pakini kákiti atamatiniári kótákikareri kaminiri maerekati, isápiretiniána pite, pikenakotapitikari ninoa sápiretakiti. ²⁰ Pótákikanako Xesosi sákire auíäkani maerekati kamakani apanakini Xesosi sákire auíäkani apisatoõ, ininiäkara apanakini píkari maerekati ikaminina.

²¹ Tximótxio, nota paniátai ikara noerekakiti iaõka pikamini. Teoso apisatoõ, Apiananiri Xesosi Kristo apisatoõ apaka, Teoso nitiriakori iaxitikini imereékini apisatoõ apaka, nipaniátai ikara noerekakiti iaõka pikamini. Ninoa kenakotari nisákire pitemoni. Átinokarako pisákire txauako ikininape kákitimoni. Erekarí pikamako ikininape kákitimoni, kákiti pipotxitakinimoni, kákiti pimapotxitakinimoni apaka. ²² Atxiíti aua Teoso sákire auíäkari iteene pimimarotakiníti. Ininiá !pimereépiri iua Xesosi sákire auíäkani otákiákari ininiua. Atxiíti ikamapanikari maerekati. Pimereiniári iua, pite moianatari iua maerekati ikamini. Erepaniko maerekati pimakamakani íkapani.

²³ Pite itokata amianata. Pitsii iriko, ininiäkara kona áparaánanini piáta. Ovaá poiãoka apaka piátako pipini íkapani.

²⁴ Apanakini !kipatari maerekati ikamakiti, ininiá ikinimane imarotari. Apanakinipekana maerekati ikamakitina !atamataäka ikamakasaakina. Ninoa kipatari. Okananixiti atokoikara imarotaäka ninoa maerekani. ²⁵ Iua atokokana erekari apanakini kamakiti atamataäka. Erekarí apanakini kamakiti

!atamataäka ikamakasaaki. Iuaritika okananixiti atokoikara imarotaäka.

Nitiritxi Amotakoni Pirena

6 Nitiritxi amotakoni, Xesosi sákire auíäkani, iteenerako iparíkauatana ipatrãotena íkapani. Ninoa paxitanako ipatrãotena. Ikara atoko ininiána, Teoso uäka !imisákirepiretaäka. Iua sákire ate oerekakiti apaka !imisákirepiretaäka iusaaki. ² Nitiritxi patrãote Xesosi sákire auíäkari ininiáua, inítiri paxitariko iua, kotxi itari apaka itxaua iua. !Apakata poiãonoka ipaxitiniri ipatrãote, itari ininiua xika. Erekarí iteene iparíkauatini ipatrãote íkapani, kotxi ipatrãote auikari Xesosi sákire. Teoso tirketakiti ipatrãote. Tximótxio, ikara noerekakiti sákiretxiti poerekariko apanakinimoni. Pótákikanako ikara iaõka ikaminina.

Txineiro Potxitakani Pirena

³ Aua kákiti atão minakati oereékani. Ninoa !auikari aãuíte Xesosi Kristo sákire atão inakari. !Auikarina atão inakari oerekakori, Teoso sákire. ⁴ Kákiti ikara atoko inakari iuikaua, txamari !kimaroreri. Ipotxitari isákirauatini apanakinikata itaparakienatakakiniuana íkapani. Ininiäkara xikoretxi aua, neenamatchi aua, misákirepiretakatchi aua. Ininiá kákiti !auikari áti sákire. Iuákatarí áti kaminiri maerekati. ⁵ Ninoa txitakakapikaua, kotxi ixinikakitina maerekatinoka. !Imarotaikarina Teoso sákire atão inakari mitxi imarotakitina. Ninoa oerekari Teoso sákire kákitimoni txineiro ito apakapinina íkapani. Txamari na atão ninoa oerekakiti sákiretxiti. !Pimaákatapiri kákiti ikara atoko inakari.

⁶ Teoso nireékitinoka pinirekiniá, ikinipoko pinireékiti auape, ininiá pákixinire poxokoniua. Kipa

apikomoni pinireka? !Auari. ⁷Kiripa ate mina uai itixi aponaniākasaaki? !Kaminareua. Kiripa aanika atekata apīkasaaki? !Kanikareua. ⁸Kamāka aniniā, kanipokore aniniā, apakatape. ⁹Satanasi oerekari kākiti maerekati ikamini txineiro apakapini ikapani. Ininiā tiitxi nireēkari mokatanitika kamari Satanasi oereēkiti. !Erekari tiitxi nireēkari nireēkiti. !Kiikiteri iua. Inireēkiti txikatoro atoko, kotxi imañkari iua. Eereka !auaika itii, itxineirote, ipoxokoni pakini xipope. Inireēkiti xika Teoso iokanitari iua kākiti misiritikomoni. ¹⁰Kākiti iteene potxitiniāri txineiro, ikamari maerekati. Takari aneē, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniā, ikini sereti maerekati aneē. Apanakini txineiro potxitakani takanapaāpotari Teoso sākire, ininiākara txineiro potxitakari iuaka karotapekaua ākixinireē. Iuaka maerekaxinireti itxikitakaua.

Paoro Ōtākikiniri Tximótxio

¹¹Pitepekana Tximótxio, Teoso paniātakiti kamakari pitxaua, ininiākara ikara maerekati xatiki !pikamape. Atāo inakarinanirako ikiniōtika pikamako. Teoso nireēkitinoka pikamako. Iteene pauikariko Teoso sākire. Katiraōkiri pitxauako. Pimisiritiko auakasaaki, pimiteenekariko. Teoso nireēkitinoka pinirekako. Kona pinirekapiri piteka nireēkiti. ¹²Pineenamauatako Teoso ikapani. Ikara neenamati erekari, Satanasi piokanadini, kākiti Teoso sākire auikini ikapani. Papakapariko Teoso sikakiti, kotxi iua akiritai iuakata pauapininiika pinini ikapani. Kaiāopokori kākiti imarotari Xesosi sākire iteene pauikini, kotxi ikenakotapekari pisāpiretinina. Peerekari

pisākire ninoamoni. ¹³Tximótxio, nimisākiretai pite Teoso apisatoō, Kristo Xesosi apisatoō apaka. Ninoakara kenakotari nisākire uatxa. Teoso ikinimane auāki inini txīkitakakari iua. Kristo Xesosi Homano auite Pōsio Pirato inakori apisatoō auakasaaki, isāpiretari atāo Teoso sākire. ¹⁴Nipaniātai ikara noerekakiti sākiretxiti iaōka pikamini. !Pimamakapiri ikara noerekakiti. Ikara noerekakiti iaōka pikaminiritika aūūite Xesosi Kristo kanapiriāko. ¹⁵Teoso ketotari Xesosi kanapiriini ōti. Iuasaaki Teoso akiritari Xesosi ikorapokoriti ikanapiriini ikapani. Iuanokara kaposotiireri. Peerekari iua. Auīttxiakori auite itxaua. Apiarini sauaki iuanokara Apiananiri txaua. ¹⁶Iuanoka !ipina. Iuanokara ikinipoko auāki inini txīkitakakari. Iua auiniātaā iotximere auapika, ininiākara kākiti !iposota imatokotiniri Teoso. !Katamatikori. Kākiti !iposotari atamatiniiri iua. Iuanokara kaposotiireri ātipirika. Ātipirika maākiritari: “Peerekari Teoso.” Ameē.

Xesosi Sākire Auiākani Katxineiroterini

¹⁷Pipaniātanako kākiti katxineiroterini: “Katii hininiā, !hūiikapeuako. !Hīpoxokotapero hitxineirote, kotxi āti ōti atxiiti hitxineirote !auaika. Hīpoxokotariko Teoso, ātipirika auākiri, kotxi iuara sikaua ikinipoko apotxitakiti. Kaiāopokori isikaua. ¹⁸Erekari hīkamako. Hītixineirote kaiāopokoro auini atokokana, erekari kaiāopokori hīkaminanako apanakini. Kaiāopokori hīti auiniā, hīsika kākiti kaamonirimoni. Himarotakasaakiri, matxineiroteni amonitakiti hīsikanako ninoa. ¹⁹Ikara atoko hininiā, hāpotiiāpotari erekari Teoso tixinekiri. Iuaā apotiitakori !ixipoka. Ipinaākana atoko, auinapanikana. Ikara atoko

hīkaminiā, hāpakapari Teoso sikakiti. Iua txīkitakai hāuapininiika hinini Teosokata.”

Ikara pisāpiretako
katxineirotenimoni.

Paoro Iōkatsopare Mapotōkire

²⁰Ari, Tximótxio, atāo pikamariko parīkatxi Teoso sikakiti pitemoni pikamini ikapani. !Pimaākatapiri

sākiretxi Teoso mapokaerekatakiniti. !Pimaākatapiri kākiti, “Kimaroreno nota,” inakari, kotxi !imarotari imaroretxi atāo inakari. ²¹Ninoa sākire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaāpotari Teoso sākire auikinina.

Teoso sikai ikinipoko erekari. Ameē.

2 TXIMÓTXIO

*Paoro Iokanatsopatakiti
Iuaikana Tximótxiomoni*

1 Tximótxio, nota Paoro iokanat-sopata pitemoni. Teoso mereëno nota, Kristo Xesosi iokanatinino ikapani, isäkire nisäpiretini ikapani. Käkiti Kristo Xesosi nakiti ininiäua, Teoso txikitakari ixinire auäki inini, kotxi Teoso kamaenetapekari ikara ikamini.

²Pite Tximótxio namarite nitiretakiti atoko pitxaua. Aïri Teoso, aäuïte Kristo Xesosi pakini sikai ikinipoko erekari. Iamonikaina. Ikamaerekaxiniretaina.

Paoro Ötäkikiniri Tximótxio

³Nota parïkauata Teoso ikapani. Nini-rimane kitxakapirïkarini parïkauatini atokokana nïparïkauata. Näkixinireë nimarotari maerekati nimakamakani, Teoso ikapani nïparïkauatakasaaki. Nota txari Teoso: “Erekapitikari pikamakiti Tximótxio ikapani,” nitxa. Nïmisäkiretapikari Teoso pite ikapani, ïkanöka, pokamara, ïkanöka, pokamara nitxapika. ⁴Nipiätai. Nixinikari pite txiapatini nitakanapakasaakii, ininiä ninirekari naökitinii iuaikana nïpoxokoniuatini ikapani. ⁵Nixinikari pite atão auikiniri Teoso säkire. Merepanika pakiro Aróitxi inakoro, pinoro Eonisi inakoro pakini atão auikari Teoso säkire. Nïmarotapitikari pite apaka auikiniri Teoso säkire ninoa auikiniri atokotxikana. ⁶Ininiäkara nótäkikai. Akoka niuako nitakasaakiri pikiiä, Teoso sikai parïkatxi iua ikapani pikamini. Iusaaki isikaposotiiretai ikara parïkatxi pikamini ikapani. Iteene pikamariko ikara parïkatxi iua ikapani. ⁷Teoso sikapekaua Erekarï Matamatakoti, ininiä !kapïkareua. Iua

Erekarï Matamatakoti sikataparatarï aäkixinire. Iua oerekaua atiraökiuatini. Oerekaua maerekati aïto nireëkiti amanirekakani.

⁸Ininiä !pipëtatapiri aäuïte säkire pisäpiretini. Apaka !pipëtatapeno nota, kotxi kateia äki naua Xesosi säkire nisäpiretini xika. Maätatsïrauata, Teoso iokanapirena erekari asäpiretini xika, kotxi Teoso sikataparataua amisiritiko amiteenekini ikapani. ⁹Teoso makatxakapekari amaerekani. Iua akiritapekaua inakitiakori aniniua ikapani. Aparïka kona txikitakari Teoso makatxakiniri amaerekani. Imakatxakari amaerekani, kotxi inirekari ikara atoko ikamini. Imakatxakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iusaaki imakatxakari amaerekani. Iusaaki akiritaua inakitiakori aniniua ikapani. ¹⁰Uatxa Teoso oerekari ikara erekari käkitimoni, kotxi amaerekani makatxakakari Xesosi Kristo apokapeka ïkorapokoritï. Iua xïpokapekari ipïkitxi. Isäpiretari Teoso iokanapirena erekari, käkiti mapinakani ikapani, Teosokata ätipirika auini ikapani.

¹¹Teoso mereëno nota ikara iokanapirenatxi säpiretakari nininiua tïkane. Imereëno iua iokanatakiti käkitimoni nininiua. Imereëno Xoteo minakaniua oereëkari nininiua. ¹²Teoso iokanapirena erekari nisäpiretini xika, natatsïrauata. Iuaritika !nipëtauata, kotxi nimarotari Xesosi. Iteene nauikari iua säkire. Nïmarotapitikari iua nïkatinino nota. Inïkatiniritikano ikanapiriäko. ¹³Teoso säkire pitemoni noerekakiti iaöka poerekako apanakini, kotxi noerekakiti atão. Pauïkapïkariko Kristo Xesosi säkire. Katiraöki pitxako, kotxi Xesosi nakiti atxaua. ¹⁴Pïmarotari Teoso iokanapirena

erekari. !Pauiritapiri ikoketiko. Teoso sikari ikara iokanapirena pitemoni, apanakini pisäpiretini ikapani. Erekari Matamatakoti auäitotaua. Iua posotiireë pinikatariko Teoso iokanapirena pitemoni isikakiti.

¹⁵ Pimarotari käkiti Xesosi säkire auiäkani Ásia tixine auakani takanapano nota. Aitariakori Pixero inakori, Emoxeni inakori pakini takanapano nota. ¹⁶ Onesíporo inakori !itakanapano. Ninirekari Teoso tretienina iua aapoko auakani. Itokata ikamapoxokonitano nota. !Ipëtatano kateia äki nauakasaaki. ¹⁷ Homa sitatxiti apokasaaki, initaäpotano nota, eereka apokano. ¹⁸ Pite imarotari iua iteene moianatinino nota, Épeso sitatxiti nauakasaaki. Ininiä nitxari Apiananiri: “Ninirekari piamonikini Onesíporo itixi xipokini öti manapisaaki.”

Misirikaretxi Miteenekiko

2 Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiä iua sikari ikinipoko erekari atemoni. Ikara erekari sikataparatarari axinire. ² Pite kenakotapekari nisäkire noerekakiti käkitimoni. Ininiä poerekariko ikara iaöka apanakinimoni atäo inakari kamakanimoni. Eereka ninoa posotari oerekiniri nisäkire noerekakiti apanakinimoni apaka.

³ Sotato erekari miteenekari imisiritiko. Kristo Xesosi sotatone atoko atxaua, ininiä pimiteenekariko pimisiritiko sotato erekari miteenekiniri atoko. ⁴ Sotato parikauatakasaaki, !ixinikaikari iparika mitxi ikamakiti sotato iminakanisaaki. Ixinikapikari sotato auite nireëkiti ikamini, iauite poxokotiniri ikapani. Ikaranokara ixinikanäta.

⁵ Ätepekana nisäpiretai. Miteëkari mitekaxi mapotökire merepanika apoäkari apakapari imitekini iki.

Mitekaxi paniätakari paniätini iaöka imitekiniä, apakapari imitekini iki.

⁶ Ätepekana nisäpiretai. Katakakeri poparikari nikari itakare merepanika, kotxi iteene iparikauata. ⁷ Pixinikariko ikara nisäkire. Apiananiri kamaimaroretai ikara.

⁸ Pixinikariko Teoso iokanapirena erekari nisäpiretakiti käkitimoni. Xesosi Kristo nisäpireta ikinimanemoni. Iua ipinaka atoko, iuaikana auäki itxikitakaäka. Iua Taviini apika mekaniri. ⁹ Natatsiirauata Teoso iokanapirena erekari nisäpiretini xika. Nota omanatakani iaxirikapekano kohëtxiä, kokaniri iaxirikinina atoko, nota masikani ikapani. Teoso säkire !iaxiriäka. Iaripireta ikini töpati. ¹⁰ Teoso mereëpekari käkiti, imaerekani imaktxakini ikapani. Ininiä nota miteenekari nimisiritiko Teoso iokanapirena ninoa kenakotini ikapani, imaerekanina Kristo Xesosi maktxakini ikapani, ätipirika Teosokata auinina ikapani. Iuasaaki peerekari. ¹¹ Nisäpiretaiko ia säkiretxi atäo inakari:

Xesosi Kristo ipina ate ikapani, ininiä amanirekakaniäri mitxi anireëkiti, Xesosi nireëkitinoka anirekiniä, ininiä aäupika iuakata ätipirika.

¹² Amiteenekiniäri amisiritiko Xesosi säkire aäukini xika, auitetxi atxauako iuakata. Akipatiniäri iua aimarotini, iua apaka kipatarai ate imarotini.

¹³ Atxiiti !akamari akamaenetakiti. Xesosi kamapitikari iua kamaenetakiti, kotxi iua !iposotari maerekati ikamini.

Teoso Nitiri Atäo Inakari

¹⁴ Ikara nisäkire pikamaxinikaretana Xesosi säkire auiäkani. Ninoa Apiananiri apisatoö apotiitakasaakiaua, pötäkikanako: “!Hixitakapeua

maxikatiika kākiti sākire xika, kotxi !erekari,” pitxako ninoamoni. Kākiti kenakotiniāri hūtxitakakiniua, ininiā !nirekaikarina Xesosi sākire auikinina.

¹⁵ Tximótxio, pite Teoso nitiri pitxaua, ininiā iteene papaiaōkariko isākire iōkatsopatakori Teoso apokaerekatinii ikapani. Ininiā !pipētauata, kotxi atāo poerekari Teoso sākire iōkatsopatakori apanakinimoni. Teoso sākire iōkatsopatakori atāo inakarinoka itxa. ¹⁶ Apanakini sākirauatakasaaki, isākiretarina sākiretxi Teoso mapokaerekatakiniti. Ikara atoko !pisākiretape. Kākiti ikara atoko inakani takanapaāpotari Teoso. ¹⁷ Ninoa oerekakiti sākiretxiti karōtxi arakakari atoko itxa. Ikara atoko inakari amianari iarikaāpota. Ikara amianari iarikini atoko, ninoa oerekakiti iarikaāpota. Itxikitakari kākiti maerekati ikamini. Imeneo inakori, Pireto inakori pakini oerekakiti sākiretxiti ikara atoko itxa. ¹⁸ Ninoa takanapapekari Teoso sākire atāo inakari. Ninoa sākire: “Teoso ōkitikapekana Xesosi sākire auiaākani ixinirena auāki inini ikapani. !Ōkitikapanina iitona itixi xipokini ōti,” itxana. Ikara ninoa sākire xika, apanakini !auikaikari Xesosi sākire.

¹⁹ Aapokotxi tsota paikori inakasaaki, itsota iriko paītanori inakasaaki, iua aapokotxi !irika. Teoso sākire ikara aāt-sota atoko. Auapika. !Ixipoka. Teoso sākire txari: “Apiananiri imarotari inakitiakori.” Apaka Teoso sākire txari: “Kāk-iti, ‘Nota Kristo nakiti’ inakari takanapariko imaerekani.”

²⁰ Ikini sereti tiitxi aua aapokotxi mitari āki. Aua apiata karonetakari oro kamakori, pirata kamakori pakini. Apaka aua poiāo īki aamina kamakori, kipatxi kamakori pakini. Apanakini ti-itxi āki kaapokori takari nipokori kiniri ikapani. Apanakini tiitxi āki itakari nipokori ikiniōtika kākiti nikini ikapani.

²¹ Ikara tiitxi atoko itxa kākiti. Kāk-iti takanapiniāri imaerekani, tiitxi apiata karonetakari atoko itxa iua. Teoso nirekari iua. Imereēri iua iparika erekari ikamini ikapani. Ininiā kākiti iua atoko inakani iposope Teoso parika ikamini ikapani.

²² Atokoripanika pinakasaakiaua, apanakini nirekiniāi maerekati pikamini, pimitekako, maerekati pimakamakani ikapani. Pinirekariko atāo inakarinoka pikamini ikiniōtika. Pinirekariko Xesosi sākire iteene pauikini. Pinirekariko iteene katiraōki pinini. !Pinirekapiri neenamati. Ikara atoko kākiti kaminiā, erekaxinireri. Iua akiritari Apiananiri imoianatiniri ikapani.

²³ Tximótxio, kākiti txitakasaakiaua sākiretxi miikiteti mimaroreti xika, !pikamapiri ikara atoko inakari, kotxi eereka ninoa neenamauata isākirena xika. ²⁴ Apiananiri nitiri atāo inakari ia atoko itxako: “!Itxitari āti. Itiretari ikinimane. Koerekareri erekari itxaua. !Katimari omanākarauatini. ²⁵ Ōtākikanako isākire mauikakani momanākaretika.” Ikara atoko Apiananiri nitiri ininiāua, atxiiti Teoso oerekana isākire mauikakani atāo inakari imarotinina ikapani, imaerekani itakanapinina ikapani. ²⁶ Ininiā iuaikana kiikitepeka itxana. Teoso sikakana ninoa txikatoro Satanasi takakitiā, kotxi mitxi Satanasi maikana, iua nireēkiti ikaminina ikapani.

Itixi Xipokini Ōti Apisa

3 Tximótxio, pimarotariko ia nisākire. Itixi xipokini ōti apisa pamonōkopianiriko. ² Iuasaaki kākiti ia atoko inakari: Kapotxinaniri iua. Txineiro tiretakani iua. Isāpiretari iposotiire ikinimanemoni. Iuikaua. Imisākirepiretari Teoso, kākiti pakini. !Ikamari iri paniātakiti.

Inoro paniätakiti apaka !lkama. Äti kamakasaakiri erekari iuamoni, !itxari: “Erekapitikari pikamakiti nota ikapani,” !itxari. !Inirekari Teoso. ³!Itiretari inirimane. !Ikamari ikamaenetakiti. Imisäkirepiretari äti maxikatiika. !Iposotari erekari ikamini. Paneenamari. Omanatana erekari kamakani. ⁴Imikapiritari äti. Ikamakiti ikamini apisa, !ixinikari ikamakiti tikane. Iuaka ixinikapikaua. Isarauatinokara itireta. !Itiretari Teoso. ⁵Iua säkire: “Nauikari Teoso posotiire. !Pauikapiri käkiti ikara atoko inakari säkire.

⁶Käkiti ikara atoko inakari ianapokota sitomoni oaäpokomoni. Sito ikara atoko inakaro miikiteto. Maerekatinoka okama. Oïto nireëkiti maerekati onirekapika. Iua ianapokotapika oamoni, ininiä oa auikaäpotari iua oerekakiti säkiretxiti. ⁷Sito ikara atoko inakaro nirekari oimarotiniiri oerekaretxi, txamari !oimarotari oerekaretxi atão inakari.

⁸Kitxakapirika Moisesi Exito tixine auakasaaki, Xani inakori, Xäpiri inakori pakini !nirekari auikinirina Moisesi säpiretakiti. Ninoa atokokana käkiti itixi xipokini öti apisa auakani, !nirekari atão inakari. Ixinikapikarina maerekatinoka. Teoso !nirekari käkiti ikara atoko inakari, kotxi iua käkiti !auikari Teoso säkire. ⁹Poiäonoka käkiti auikari ikara atoko inakari säkire, kotxi imarotari miikiteti iua. Iua atokokana kitxakapirika apanakini imarotari Xani, Xäpiri pakini miikiteni ininiua.

Teoso Nakitiakori Misiritiko

¹⁰Pitepekana, pimarotapitikari noereëkiti säkiretxiti. Pimarotari nikamakiti ikiniötika. Pimarotari ninireëkiti nikamini. Pimarotari iteene nauikiniri Xesosi säkire. Pimarotari

nimiteenekiniri nimisiritiko. Pimarotari nitiretiniri äti. Pimarotari !katimari nomanäkarauatini. ¹¹Pimarotari nimisiritiko. Pimarotari natatsiirauatini. Pimarotari nimiteenekiniri nimisiritiko Ätxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Itene natatsiirauata, iuaritika Apiananiri makatxakano ikinika nimisiritiko. ¹²Ari, ikininape käkiti nirekiniäri Kristo Xesosi nakiti ininiäua, inirekiniäri Teoso nireëkitinoka ikaminiä, atatsiitariko imisiritiko. ¹³Iuasaaki maerekati kamakani maerekani, kamisirienererini maerekani, apiaäpotako. Ninoa misirienetari apanakini. Apaka apanakini misirienetana ninoa.

Teoso Säkire Iökatsopatakori

¹⁴Pitepekana Tximótxio, pauikapikariko atão inakari poerekiko. Ikara pauikapitika, kotxi pimarotana pite oerekakani. Pimarotari atäonoka ninoa oerekakiti. ¹⁵Pite axapitipanika pinakasaaki, pimarotari Teoso säkire iökatsopatakori. Iua säkire iökatsopatakori txikitakaua kimatire anini. Isäkire iökatsopatakori oerekaua Teoso makatxakiniri amaerekani Kristo Xesosi säkire aäuikasaaki. ¹⁶Teoso oerekana isäkire iökatsopatakani atäonoka iökatsopatinina, ininiä ikinika Teoso säkire iökatsopatakori atäonoka. Ininiä apakata Teoso säkire iökatsopatakori oerekiniua atão Teoso säkire aäuikini ikapani. Oerekaua ikinipoko Teoso säkire iökatsopatakori atão inini. Isäkire iökatsopatakori ötäkikaua amaerekani atakanapini. Oerekaua atão inakarinoka akamini. ¹⁷Ininiä käkiti Teoso nakiti imarotiniäri Teoso säkire iökatsopatakori, iposotari ikinika parikatxi Teoso paniätakiti ikamini. Erekari iparika.

Tximótxio Õtākikiko

4 Tximótxio, nōtākikai Teoso apisatoō, Apiananiri Xesosi Kristo apisatoō apaka, kotxi āti ōti Kristo Xesosi kanapiriākasaaki, isāpiretari ikininape kākiti sinimoni. Isākire auīākani sari Teosomoni ikaikotinina ikapani. Isākire mauīākani sari kākiti misiritikomoni ikaikotinina ikapani. Isāpiretari kākiti auapanika inakani, kākiti mitxi ipīkani apaka. Xesosi kanapiriā ikininape auīte ininiua ikapani, ininiākara nipaniātai ia: ² Pisāpiretariko Teoso sākire kākitimoni. Iposope pitxako Teoso sākire ikiniōtika pisāpiretini kākitimoni, piīto tapara auakasaaki, pisāpakasaaki apaka. Pōtākikanako imaerekani itakanapinina, erekarinoka ikaminina ikapani. Pisikataparaxiniretanako, Teoso sākire poerekinina. Pisākirauatakasaaki, !katimari pomanākarauatini. ³ Āti ōti apokako. Iuasaaki kākiti !nirekaikari oerekaretxi atāo inakari ikenakotinina. Ninoaka nireēkitinoka inirekana, ininiā apotiīāpotana ninoakata koerekarerini ninoa potxitakiti oerekaretxiti oereēkani. ⁴ !Nirekaikarina atāo inakari. Auikarina sākiretxi atāo minakati.

⁵ Pitepekana, ikinika pikamako piiki-teritika. Pimīteenekariko pimisiritiko. Pikamariko piparīka Teoso iokanapirena erekari pisāpiretini kākitimoni ninoa auikiniri ikapani. Teoso nitiri pitxaua, ininiā pikamariko ikinika piparīka Teoso paniātakiti.

⁶ Notapekana, nipinini ōti manapi apokaāpotape. Nipinako Teoso ikapani. Pirātxi Teoso ikapani okiko atokokana, notaka sikauako Teosomoni. Niketo apokapeka itixi nosipikini ikapani. ⁷ Neenamatchi erekari inakari nikamapeka Satanasi ninaiatini. Miteēkari mitekatchi mapotōkire

apokini atokokana, nota apokapeka niparīka mapotōkire. !Nitakanapari Xesosi sākire nauikini. ⁸ Uatxa Teoso nīkatari niparīka īki nota kāiatakiti napakapini ikapani. Miteēkari merepanika mitekatchi mapotōkire apokakari apakapari imitekini īki. Apakapari saporīeta. Iua atokokana Apiananiri sikanoko niparīka īki, kotxi nota nirekari atāo inakarinoka nikamini. Apiananiri imarotari atāo, ininiā imarotari parīkatxi īki apakapakani. Imarotari imisiritiko apakapakani apaka. Niparīka īki isikano notamoni uai ikanapiriini ōtisaaki. Na notananini apakapari. Isikari parīkatxi īki ikininapemoni ikanapiriini nirekakanimoni.

Paoro Iōkatsopatakiti Mapotōkire

⁹ Piposotiniā, katima pitxako notamoni papokini. ¹⁰ Témasi inakori asikapekano, kotxi itiretari Xesosi sākire mauīākani nireēkiti. Isipeka Tesarónika sitatxitimoni. Kiresētxi inakori sari Karásia tixinimoni iparīkauatini ikapani. Txito inakori sari Taomásia tixinimoni iparīkauatini ikapani. ¹¹ Arókasinokara moianatano uatxa. Pakiritariko Marko. Piminari iua pitekata. Iua posotari imiparīkatinino, Xesosi sākire nisāpiretakasaaki kākitimoni. ¹² Txikiko inakori nipaniāta Épeso sitatxitimoni isini. ¹³ Tóatxi sitatxiti nauakasaaki, nitakanapari nimāka āti nimāka nopini nitakakiti. Nitakanapari iua nimāka Kapo inakorikata. Pite uai ikasaaki piminariko. Apaka piminariko atatsopari ninakiti aātsopa kamakori. Apia ninirekari pimininiri atatsopari ninakiti aamata kamakori.

¹⁴ Arexātri inakori iteene misiritano. Iua Arexātri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari

ia. ¹⁵Erepaniko iua. Pamonōkoniri iua, kotxi iua iteene misākirepiretari aōereēkiti sākiretxiti.

¹⁶Merepitipanika nota apoītakani anikasaakino auītetxiakori apisatoō, nisākire ikenakotinina īkapani, na āti nimoianari kaikota notakata iusaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷Ninoa takanapano, iuaritika Apiananiri kaikota notakata. Iua sikataparaxiniretano, ininiā niposotari Teoso iokanapirena ikinika nisāpiretinina ninoa Xoteo minakanuia ikenakotinirina īkapani. Ininiā ākiti namaā takote nauakasaaki, Teoso tokapakeētano nota. ¹⁸Nimarotapitikari Apiananiri tokapakeētapanikano nota ikini sereti maerekati auakasaaki. Iua

nīkatano. Anikano itixinemoni, iua auītetxi ininiātaāua. Ikinimane ātipirika sāpiretari iua: “Peerekai. Pitenokara erekari.” Ameē.

¹⁹Pisāpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰Erásito inakori kaikota Korīto sitatxiti. Tópimo inakori nitakanapa Mireto sitatxitiā, kotxi iua amianata.

²¹Tximótxio, piposotiniā, mitaā apisapanika papokako uaimoni. Eoporo inakori, Porotētxi inakori, Arino inakori, Karáotxia inakori pakini ikini aītariakorikata iokanapireta pitemoni ixinikamanapitiniina.

²²Apiananiri Xesosi Kristo ātipirika kaikota pitekata pākixinireē. Ikinipoko erekari isika pitemoni. Ameē.

TXITO

Paoro Iokanatsopatakiti Txitomoni

1 Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kăkitimoni Teoso mereĕkini auĭăkiti săkiretxiti nisăpiretini ĭkapani. Iokanatano kăkitimoni atăo inakari imarotnina ĭkapani. Atăo inakari imarotiko oerekaua Teoso nireĕkiti akamini ĭkapani. ²Aăuikari aăuapininiika anini Teosokata, kotxi kitxakapirĭka itixi kamiko apisa Teoso kamaenetari ikara. Ininiă apokapĭtikako, kotxi atăonoka iua săkire. !Iposotari atăo minakati isăpiretini. ³Iketotiniri manapi oerekari isăkire. Isăkire săpiretakani săpiretari isăkire. Ininiă Teoso săkire notamoni isikakiti nisăpiretai, kotxi Teoso amaerekani makatxakakari paniătano nota nisăpiretiniri isăkire.

⁴Niokanatsopata pite Txitomoni. Namarite atăo inakari atoko pitxaua, kotxi pite auikari Xesosi săkire nota auĭkiniri atokotxikana. Aĭri Teoso, aăuĭte Xesosi Kristo amaerekani makatxakakari pakini, sikari ĭkinipoko erekari pitemoni. Ninoa iamoniĭkai. Ikamaerekaxiniretaina.

Kôtăkikarerini

⁵Nitakanapai pite Kreta pokomiriĭti, kotxi aparĭka iuaătaă kona xipokapanika, ininiă ninirekari pite kaminiri ikara parĭkatxi. Pimereĕna kôtăkikarerini ĭkini sitatxitiă Teoso săkire auĭăkani ôțăkĭkakanĭ tĭkane. Pimereĕna mitxi nisăpiretakiti iaôka. ⁶Ia atoko inakari kăkiti pimereĕ kôtăkikarerini ĭkapani: Iua kamari erekari, ininiă maerekati auakasaaki, kona iua xikani maerekati apoka. Ătonokara ĭtanoro aua. Imiakori auikari

Xesosi săkire. Ninoa !neenamauata. Ikamarina iri paniătakiti iaôka.

⁷Teoso sikari iparĭka kôtăkĭkare-rimoni ĭkamini ĭkapani, ininiă kôtăkĭkareri kamari erekarinoka. Maerekati auakasaaki, kona iua xikani maerekati apoka. !Iuĭkaua. !Katimari omanăkarauatini. !Ipoăta. Kona kaneenamari. !Itiretaro txineiro. ⁸Kôtăkĭkareri atăo inakari potxitari apakapiniri kăkiti iua aapoko āki. Ipotxitari kăkiti erekari kamakani. !Katima omanăkarauatini. Erekarinoka ikama. !Ikamari maerekati. Erekarĭ imarotakiti !itakanapari ikamini. ⁹Kôtăkĭkareri atăo inakari oerekaăkapeka Teoso săkire. Imarotari Teoso kaminiri isăkire iaôka, ininiă iteene inĭkatari Teoso săkire. !Imamakari Teoso săkire. Ininiăkara imarotari ôțăkĭkiniri apanakini. Iteene imarotari Teoso săkire, ininiă imarotari oerekiniri apanakini Teoso săkire manirekakani, Teoso săkire auĭkinina ĭkapani.

Erepaniko, Atăo Minakati Oerekakani

¹⁰Kaiăopokori kăkiti kona nirekari Teoso nireĕkiti ikaminina. Maxĭkatĭĭka isăkirauatapika. Kamisirienererini ninoa. Ikara atoko inakani nirekari Teoso takaôtxĭkare Xoteo minakanĭua ĭtoă auini. ¹¹Matxĭkitakari ninoa iotokakiniri atăo minakati isăpiretinina, kotxi kăkiti aapoko āki auakani naiatakakaua ninoa oerekakiti săkiretxiti xika. !Apakata ninoa oerekakiti săkiretxiti. Iuaritika ninoa oerekari atăo minakati, txineiro apakapinina ĭkapani. ¹²Ninoa atokirini kitxakapirĭka, koerekareri, uai Kreta pokomiriĭti auakarini, txari: "Kreta auakani âtipirika misirienetari kăkiti. Maerekati kamakani itxauana. Kaneenamari ĭtopa auakari atoko ikamana. Iarinouatana. Paixonina," itxa iua.

¹³ Isāpiretakiti atāopitikara. Ininiā pitaparaxinireritika pipinitana ninoa imasāpiretakanirina ikara atāo minakati, Xesosi sākire atāo auikinina ikapani. ¹⁴ Ininiā pisāpiretana: “!Himaākatapiriko Xoteoakori kiomaneakorini sākire atāo minakati. !Himaākatapena atāo inakari manirekaākani paniātakiti.” ¹⁵ Kākiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kākiti imaerekani auapanika inakari, Teoso sākire iaōka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ākixinire, ininiā ākixinire !ōtākikari iua maerekati imakamakani ikapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiā !imarotarina Teoso. !nirekarina Teoso. Arakakani atoko itxana, maerekati ikamakitina xika. !ikamarina Teoso nireēkiti, ininiā !liposotarina erekari ikaminina.

Txito Ōtākikiko

2 Ininiā poerekariko ikinika atāo inakari Teoso oerekiko sākiretxiti.

Kiki Aneēkani Ōtākikiko

² Ia atoko pōtākikana kiki aneēkani: “!ixinikariko hikamakiti tīkane hikaminiri apisapanika. Erekari hikamako apanakini paxitinii ikapani. Kona hikamapiri hīto nireēkiti. Iteene himarotariko hāuiākiti. Iteene hītiraōkiuatako. Katima omanākarauataka !hītxape.” Ikara atoko pōtākikana kiki aneēkani.

Sito Aneēkani Ōtākikiko

³ Ia atoko pōtākikana sito aneēkani: “!hikamariko Teoso pikakani kamakiti atoko. Maxikatiika !hāpoitapiri āti.

Kona iteene hiātapiri iāriā kapoāro. Erekarinoka hōerekako.” Ikara atoko pōtākikana ninoa. ⁴ Apaka pōtākikana sito aneēkani ōtākikinina ātokoroakoro ia atoko: “!hitiretanako hītaniri, hamariteakori pakini. ⁵ Kona hīkīpitapiri hīto paniātakiti. Erekarinanira hikamako. Hikamariko hīparika haāpoko āki. Erekari hikamako apanakini ikapani. Hītaniri nireēkiti hikamako, ininiā iusaaki Teoso sākire mauīākani !imisākirepiretari Teoso sākire.” Ikara atoko sito aneēkani oerekanako ātokoroakoro.

Ātokoriakori Ōtākikiko

⁶ Ininiā iua atokokana pōtākikana ātokoriakori ia atoko: “!Apakata hikaminiri hīto nireēkiti.”

Txito Ōtākikiko

⁷ Txito, ikini pikamakiti pikamako kākiti erekari kamiko imarotini ikapani. Poerekarauatakasaaki, poerekari kākiti pitiretiniri atāo inakari sākiretxitinoka. Poerekanako Teoso sākirenoka apiari inini. Poerekarauatakasaaki, poerekariko kākiti pimakoketakaniri atāo minakati pisākirekata. ⁸ Poerekariko atāo inakarinoka, ininiā !auari papoītiko, kotxi !pikerokari pisākire. Ikara atoko ininiā, pimokaiakarini pētauata, kotxi !liposotarina imisākirepiretinii.

Nitiritxi Amotakoni Ōtākikiko

⁹ Ia atoko poerekanako nitiritxi amotakoni: “!hīkīpitariko hīpatrāote sākire. Hikamariko hīpatrāote apokaerekatakitinoka. Kapakapaenere !hītxape. ¹⁰ !hītirīkapiri hīpatrāote tii. Hōerekariko hīpatrāote pisākire atāo inini. Ininiā hīpatrāote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekarı Teoso Sikakiti

¹¹ İkinımanemonı Teoso oerekapekarı erekarı isıkkakiti kākiti maerekani imaktxakini. ¹² Teoso sikakiti erekarı oerekaua atakanapınırı Teoso manırekakınıtı. Teoso sikakiti erekarı oerekaua amanırekakanırı İkorapokoritı auakani İto nıreēkiti. Teoso sikakiti erekarı oerekaua aİto panıātakiti atakanapını, atāo inakarinoka akamini, Teoso nıreēkiti akamini İkorapokoritı aāuakasaaki. ¹³ İkorapokoritı aāuakasaaki, aiātaparı poxokonitxi ōti Apıananırı aTeosone apokini ōti. İuasaaki Xesosi Kristo, amaerekani maktxakakarı, motika atemonı. ¹⁴ İuaka sikaua Teosomoni ate İkapanı ipıksasaaki. İuasaaki İikıtxıtari Teoso, ininiā Teoso maktxakaua İkinika maerekanitxi sauaki. İkara atoko ininiā, ikamaerekataua ate. Ininiā itxıkitakaua inakitiakori aniniua, ininiā anırekarı erekarı akamini.

¹⁵ Auİtetxi pininiua atoko pipanıātariko kākiti kİpitinırı ikara nisāpiretakiti. Pōtākikana nisākire makİpitakani. Kona pauiritapırı kākiti sāpiretinırı pisākire atāo minakati inini.

Teoso Nıreēkiti Kamiko

3 Txito, ia atoko poerekarıko kākiti: “Hİpaxitarıko İkorapokoritı auİtetxiakori panıātakiti, poiāori auİtetxiakori panıātakiti apaka. İposope hİtxako İkinika erekarı hİkamini. ² Kona himisākırepıretapırı apanakini. !Hıneenamauatape. Merepanika hİxinıkarıko apanakini, eereka hİteka hİxinika. Hōerekarıko kākiti, hİxinıreē hinırekınırı erekarı hİkamini İkinımanemonı.” İkara atoko poerekana.

³ Teoso aimarotını apisapanika mİikiteni atxaua. Kona akİpitari kākiti sākire, Teoso sākire apaka.

İuasaaki ate misırienetaāka. İuasaaki akamari aİto nıreēkitinoka. İkini sereti maerekati akama apoxokonıuatını İkapanı. İuasaaki İkinıōtika axınıkarı maerekati akamini. !Apakata akamakiti. Kaxıkorerini atxaua İuasaaki. Ate omanataāka. Apaka ate omanatari apanakini İuasaaki.

⁴ İniniā eereka Teoso tiraōki, amaerekani maktxakakarı tiraōki, İua amonıkarı, apoka atemonı. ⁵ Ateka parıka erekarı !imaktxakarı amaerekani. İua amonıkarıenokara maktxakarı amaerekani. İuasaaki na atāo akama, İuarıtıka imaktxakarı amaerekani, kotxi itıretaua. İuasaaki İua arokarı aākıxınıre. İtxıkitakaua ate aponanıini İuaİkana. İuasaaki Erekarı Matamatakoti kamari İkinika amaneri axınıreē. ⁶ Teoso İokanatarı Erekarı Matamatakoti kaposotiİrerı atemonı, kotxi Xesosi Kristo, amaerekani maktxakakarı, İpına ate İkapanı. ⁷ İua sikarı İkinipoko erekarı atemonı, ininiā İkamaerekataua. Ininiā itxıkitakaua Teoso anaakori aniniua, ininiā aāpakaparıko İpotetakiti ate İkapanı. İua atoko ininiā, aiātaparı ātıpirıka Teosokata aāuını İkapanı. ⁸ Atāopıtıkarı İa nisāpiretakiti.

İniniā ninırekarı ātıpirıka pisāpiretinırı İkinika nisāpiretakiti Teoso sākire auıākanımonı. İkara atoko Teoso auıākanı İtaparaxınırerıtıka kamarıko erekarı apanakini İkapanı. Kona maxıkatıİka İkamarına erekarı. Teoso atāo İkıtıxıtariko kākiti. İkara atoko kākiti kaminiā, ininiā erekarı İkinımane İkapanı.

⁹ Kona pımaākatapırı mİikiteti sākire. !Hıtaparakıenatakakapeua kıtıxakapırıkarını uāka xıka. Kona hımaākatapenako kākiti kımātıxıakori oerekakiti xıka tsoatakani. İkara sākıretxıtı !İtxıkitakai erekarı hininiua. !İtxa İkara sākıretxıtı.

¹⁰Kākiti oerekiniāri atāo minakati Teoso manirekakiniti, pōtākikari iua ipikata. Iposo atoko !pimaākataikari. ¹¹Ikara atoko inakari atāo iikite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sāpiretakiti Mapotōkire

¹²Niokanatarari Atemasi inakori, atx-īiti Txíikiko inakori apaka pitemoni. Ni-noa apokasaaki, paiamata pisini ikapani, katimari notamoni Nikópori sitatxitiā hāpokino ikapani. Ninirekari ia mitaāti nikaikotini iuaā.

¹³Pimoianatarari Sena inakori, Aporo inakori pakini. Auītetxiakori paniātakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴Aītariakori Xesosi sākire auiākani apaiaōkariko erekari ikaminina, kākiti minakati mauakiniti imoianatinina ikapani. Makamaretika hinini !apakata.

¹⁵Notakata auakani xinikapikai pite. Pisāpiretanako ate tirketakani ereē Xesosi sākire auiākani nixinikamanapitana ninoa.

Ikinika erekari Teoso sikai hīte hīkinika. Ikara atoko niōkatsopata pitemoni. Ameē.

PIREMÕ

Paoro Iokanatsopatakiti Piremõmoni

1 Nota Paoro. Kateia äki naua, Kristo Xesosi säkire nauikini xika. Nota, aitari Tximótxiokata aiokanatsopata pitemoni Piremõmoni. Ate iteene tiretai pite. Atekata parikauatakari pitxaua. ² Aiokanapireta Xesosi säkire auiäkanimoni, paapoko apotiitakanimoni. Aiokanapireta aitaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³ Aïri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

Piremõ Tiraõkiuatini Pirena

⁴ Nitari Piremõ, Teoso nimisäkire-takasaaki, ätipirika nisäkirauata pite ikapani. Nisäpiretari Teoso ereka inini, kotxi iua kamaerekatai pite. ⁵ Ikara atoko itxa nisäkire, kotxi nikenakopiretari iteene pauikiniri Apiananiri Xesosi säkire. Nikenakopiretari ikinimane käkiti Teoso nakitiakori pitiretini. ⁶ Nimisäkiretari Teoso pite ikapani, kotxi ninirekari pisäpiretiniri pauikäkiti säkiretxiti ikiniõtika apanakinimoni, ininiäkara pimarotari ikini sereti erekari Teoso siäkiti Kristo nakitiakorimoni. ⁷ Ate poxokoniuata, kotxi pite tiretana käkiti Teoso nakitiakori. Pitiraõki iteene sikataparaxiniretaua ate. Pite aitari kamapoxokonitana Teoso nakitiakori äkixinire.

Paoro Amanaäkiti Säkiiretxiti

⁸ Kristo sikaposotiiretano, ininiä nitapararitika niposotapitikari nipaniätinii atão inakari pikamini. ⁹ Iuaritika nitapararitika na nipaniätai atão inakari pikamini. Nõtäkikai Kristo

tiraõkiä pikaminiri atão inakari. Nota Paoro kiomätxipekano. Kateia äki nauanäta, Kristo Xesosi säkire nauikini xika. Notakara ötäkikai pite atão pikamini. ¹⁰ Nota amanaäi pinitiri Onésimo inakori piamonikini ikapani. Namarite atoko inakari iua, kotxi iua kïpitari nisäkire uai kateia äki nauakasaaki. Uatxa iua auikari Xesosi säkire. ¹¹ Nimarotari iuäka poparikari uäka itxaua. Mitxi !parikauata, pitekata auakasaaki. Paiariniri. Uatxa poparikari itxapekua iuäka atokokana. Uatxa iparikauatapitikako pite ikapani, nota ikapani iparikauatini atokokana.

¹² Niokanatariko Onésimo, ikanapirini pitemoni. Ininiä papakapariko iua. Nitiretari iua nota niïto nitiretini atokokana. ¹³ Ninirekamari notakata uai ikaikotini, nota imoianatini ikapani, kotxi pite kona posotari pimoianatinino uai kateia äki nauakasaaki, kotxi pite auini maioakari. Nota uai aua Teoso iokanapirena erekari nisäpiretini xika. ¹⁴ Ninirekamari Onésimo uai, txamari !ninirekari nikaminiri pite mauritakiniti. !Ninirekari nitapararitika nipaniätinii pauiritiniri Onésimo notakata ikaikotini. Pite nirekiniäri, imoianatano.

¹⁵ Akokaxiti Onésimo miteka. Mapakanani itakanapai. Atxiiti Teoso auiritari poiäoka itakanapinii, ätipirika pitekata iuaikana ikaikotini ikapani. ¹⁶ Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekua, kotxi iua auikari Kristo säkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hïtxaua.

¹⁷ Nota pimoianari nininiäua, nota papakapini atokokana pitxariko papakapiniri iua. ¹⁸ Akokaxiti maerekati ikaminiä, itiriuatiniä, pisäpiretano. Nota ikitxitaiko. ¹⁹ Nota Paoro, uatxa

niuakoā niōkatsopatari ia sākirextiti. Notakarako ĩkitxitai pite. Pite imarotari pite xinire auāki inini, kotxi notara akokaxiti nisāpiretai Xesosi sākire pauikini ĩkapani. Ininiā atxiīti erekape pite ĩkitxitinino nota? ²⁰Ininiākara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nākixinire, kotxi Kristo nakitiakori atxaua. ²¹Niōkatsopatari pite ĩkapani, kotxi nimarotapitikari pikaminiri namanaākiti. Ari, nimarotari apiata pikaminano.

²²Apikomoni nitxai. Poeretari ereē nimakiniātaā ĩkapani. Hīte misākire-

tapekari Teoso kateia nitakanapini ĩkapani, ininiā nimarotari Teoso auiritano iuaīkana nikanapiriini hītemoni.

Itakapiretanapini Pirena

²³Epápara inakori notakata kateia āki aua, kotxi iua parīkauata Kristo Xesosi ĩkapani. Iua xinikamanapitai hīte.

²⁴Markoma, Arisitakoma, Témasima, Arókasima pakini notakata parīkauatakani, ninoa apaka xinikamanapitai hīte.

²⁵Aāuīte Xesosi Kristo sikari ikinipoko erekari hākixiniremoni. Ameē.

EPIROO

Teoso Ākiri Apiatini Pirena

1 Teoso kitxakapirika sāpiretari isākire kaiāokataikani, isākire sāpiretakanimoni. Ininiā ninoa sāpiretana aātokiriakorini Teoso sāpiretakiti. Kiriāpa Teoso misākiretana ninoa? Kaiāopokoriā imisākiretana ninoa: Itaponeēna, ixinireēna, isākire iōkatsopatakoriā, initiri itixine auakari sākireē, txaāpota imisākiretinina ninoa.

²Uatxa ikorasaaki, Teoso misākiretaua iua ākiri sākireē. Teoso mereēri iua ākiri ikinipoko apakapini ikapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³Iua iotximere Teoso iotximeretxikana. Teosotxikana iua. Kaposotiireri iua, kotxi isākireēnoka imaikari imakinika auini ikapani. Iuanokara makatxakari amaerekani. Amaerekani imakatxakasaaki, iuasaaki iitopāka ikinimane auite Teoso kikomoni itixineē.

Teoso Ākiri Apiata, Initiriakori Poiāoka

⁴Ininiā Teoso ākiri iteene apiaerekata. Apiananiri iua. Teoso nitiriakori iaxitiki poiāorini. Teoso mereēri iuāka apiari. Ninoa uāka poiāorini itxauana.

⁵Teoso lisāpiretari initiriakori ia isākire kitxakapirikari: Pite nota ākiri pitxaua. Uatxa pite iri nitxaua nota, !itxa initiriakorimoni.

Apaka Teoso lisāpiretana ninoa ia isākire kitxakapirikari: Nota iua iri nitxauako. Iua nota amarite itxauako, !itxa initiriakori itixine auakanimoni.

⁶Ātipekana. Teoso mikasaakiri iua ākiri imatonōkari ikorapokoritimoni,

iponaniini ikapani, iuasaaki Teoso txari initiriakori:

Ninitiriakori, hikapotoreēkauako iua apisatoō. Hiteosonetariko iua, itxa. Ikara atoko Teoso paniātari initiriakori.

⁷Teoso sākire iōkatsopatakori, initiriakori pirena txari:

Itxikitakana initiriakori matamatakoni ininiuana, itima atoko ininiuana. Xamina tirinakari atoko itxauana ninoa, kotxi kaposotiirerini ninoa, itxa. ⁸Iua amaritemoni Teoso txari:

Teoso pitxaua. !Ixipoka auitetxi pininiāua. Ātipirika pite atāo mikiikari pite auitetakani.

⁹Pite tiretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiua ikapani, pimoianariakori poiāorini ininiuana ikapani, kotxi apiata nikamapoxokonitai pite. Iitxiā nimereēkiti nopini nitakini atokokana, nitakari poxokonitxi pite nopini. Nimereēi pite auitetxi pininiāua.

Ikara atoko itxa Teoso kitxakapirika.

¹⁰Iuaikana Teoso sākire iōkatsopatakori txari:

Apiananiri, merepitipanika pite kamari itixi. Apaka pikamari iaxiti piuakoā.

¹¹Īkorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ikinika.

¹²Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. !Pixipoka.

Itxa Teoso sākire.

¹³Teoso txari imi:

Nota kikomoni piitopākiniritika nixipokariko pimokaikariakori. Nikamariko ninoa pikiti pitakiniātaā atoko ininiuana.

Ikara atoko !itxari initiriakori iaxitiki.

¹⁴Ininiã kipa Teoso nitiriakori iaxitikini? Ninoa erekari matamatakoni. Iparikauatana Teoso ikapani. Teoso iokanatana ninoa imoianatinirina kãkiti iua sãkire auiãkani, kotxi Teoso makatxakari ninoa kãkiti maerekani.

Erepaniko

2 Ininiã iteene mamixinikari ikinika atão sãkiretxiti mitxi akenakotakiti. Amakamakaniãri ikara atoko, kanaua tiokaãpotakari atoko atxaua. Ininiã iuasaaki !aimarotaikari atão. Maxinikari atão inakari. ²Kitxakapirika Teoso nitiriakori iaxitikini sãpiretari atão inakari ate apiko atokiriakorimoni. Kãkiti makamakaniãri ninoa paniãtakiti, ininiã ninoa kãkiti apakapari Teoso misirikare. Atão ninoa apakapiniri imisiritikona. ³Ininiã uatxa amitekini !auari, amanirekakaniãri amaerekani makatxakiko. Peerekari Teoso makatxakiniri kãkiti maerekani. Merepitipanika Apiananiri sãpiretari ikara maerekanitxi makatxakiko. Iua sãkire kenakotakani apaka sãpiretaua ate iua sãpiretakiti atokotxikana. ⁴Teoso apaka oerekaua ninoa sãkire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sãkire atão inini.

Xesosi Kãkiti Atoko Itxa

⁵Teoso !itxikitakana initiriakori iaxitikini itixi amaneriã auakani auiteakori ininiuana. Iua itixi amaneri ikari asãpiretai hite. ⁶Kitxakapirika Teoso sãkire iõkatsopatakori Xikari oitõãtaã txari: Kipa kãkiti? Kinirepa pite xinikana ninoa? Ate minakati. Kinirepa aitari iaxitikiri maãkatatari kãkiti?

⁷Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxikitakari iua auitetxi ininiua. Pitxikitakari iua kaiotximereri ininiua. Pitxikitakari ikinimane paxitiniri iua. Pitxikitakari iua ikinipoko auite ininiua.

⁸Pitxikitakari ikinimane kaminiri iua paniãtakiti. !Auari ãtika iua paniãtakiti makamakati.

Ikara atoko Teoso sãpiretaua ate itxikitakiniri ikinipoko auitetiniri iua. !Auari ãtika iua mauuitetakati. Txamari kona ate atamatapanikari iua ikinipoko auite ininiua. ⁹Iuapitikara aãtamatakiti Xesosi. Mapakananinoka Teoso txikitakari iua poiãori ininiua. Iuasaaki Teoso nitiriakori iaxitikini apiata. Teoso txikitakari iua poiãori ininiua, kotxi iuasaaki Xesosi atatsiirauata. Iuasaaki ipina. Uatxa Teoso txikitakari iua auitetxi ininiua. Itxikitakari iua kaiotximereri ininiua. Itxikitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakani ikapani. Iuasaaki Teoso oerekari ikinipoko erekari isikini kãkitimoni.

¹⁰Ikinika Teoso nakiti. Ikinika iua kamakiti. Apakata iua txikitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹Kãkiti kamaerekatakari iritxikana iua kamaerekatakini iri. Ikara atoko ininiã, Xesosi !ipetatar iua itariakori akiritiniua ate. ¹²Itxari Teosomoni:

Nisãpiretariko piuãka nitariakorimoni. Pitemoni apotiitakaniua sauaki nixikaretari ereka pinini.

¹³Iuaikana kitxakapirika Teoso sākire iōkatsopatakori txari:

Nauikariko Teoso sākire.

Iuaikana Xesosi txari Teoso:

Uai nota aua pamariteakorikata. Pite sikana ninoa notamoni. itxa.

¹⁴Kaitori Teoso anaakori. Ninoa aua ixini, iarēka pakini. Ininiā kaïtopekari Xesosi ninoa atokokana. Ininiā ipikasaaki ixipokari ipikitxi posotiire auakiti. Satanasi inakori iua.

¹⁵Ikara atoko inakasaaki, isikakari kākiti ipikitxi pikakani. Mitxi ninoa iaxirikakoni atoko itxana. ¹⁶Aimarotari, iusaaki !imoianatana initiriakori iaxitikini. Iusaaki imoianatana Apraão apika mekaniriakori. ¹⁷Ikara atoko ininiā, Xesosi txikitakaāka itiriakori atokokana ininiua, ininiā iposotari sasetotxi auite apiatakari ininiua kākiti ikapani. Iparikauatakasaaki Teoso ikapani, ikamari ikinipoko ikamaenetakiti. Maerekati kamakani kākiti, iuaritika iamoniakari kākiti. Kākiti itxapekaua Xesosi, ininiā iua ipina kākiti maerekani imakatsakini ikapani, iuaikana kākiti imikanapiriini Teosomoni ikapani. ¹⁸Ikrapokoriti Xesosi auakasaaki, imarotari Satanasi atamakaerekatini iua. Ininiā Satanasi atamakaerekatakasaakina kākiti, iua posotari isikataparatinina ninoa.

Xesosi Apiatakari, Moisesi Poiāori

3 Ininiā nitiriakori, Teoso mereēkini, hīte akiritaāka Teoso tixine hāuini ikapani. Iteene hīxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auite apiatakari itxaua. Iuara asāpiretari apanakini. ²Moisesi kamari ikinika Teoso paniātakiti inirimane apisatoō, Teoso aapoko aamata kamakori ikamakasaaki. Iua atokokana Xesosi kamari ikinika iua mereēkari

paniātakiti. ³Apiaerekata Xesosi, ininiā iua apakapari apiata ipaxitiko, Moisesi poiāo, kotxi aapokotxi kamakari apakapari apiata ipaxitiko. Poiāo aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴Ikinika kākiti aapokona kamakani auapitika, iuaritika Teoso ikinipoko kamakari itxaua. ⁵Moisesi Teoso nitiri itxaua. Iua ātipirika kamari ikinipoko Teoso nirekakiti inirimane apisatoō. Ikara erekari ikamakiti oerekari Teoso sākire iua sāpiretakiti atāo inini.

⁶Kristo Teoso ākiri itxaua. Iua ātipirika kamari ikinipoko Teoso paniātakiti Teoso aapoko inikatini. Teoso aapoko atoko atxaua ate, iteene aāuikiniāri iua sākire, apoxokoniritika ātipirika aiātapiniāri Xesosi kanapiriini ōti.

Erepaniko,

!Hitakanapapiri Hāuikakiti

⁷Ininiā Erekari Matamatakoti txari:

Uatxa ōti hikenakotakasaakiri nisākire,

⁸kona hīkamapiriko hīxinire paikori inini hātokiriakorini atoko hinini. Āparaā makipakaniātaā auakasaakina, iuaā ninoa !auikari nota sākire. !Ikamarina nipaniātakiti. Iusaaki ninoa ataerekatapikano nota.

⁹Koarētakanani, ikiniōtika hīte apika atokiriakori ataerekatapikano nota. Ninoa atamatari niposotiire. Txamari ikiniōtika ninoa ataerekatano nota. !Auikarina nisākire.

¹⁰Ikara xika nomanatana ninoa. Iusaaki nitxa: “Ātipirika ninoa sapika apanakini sākire tikini. !Imarotarina nixinikakiti, nikamakiti pakini.”

¹¹Nomanatakasaakina ninoa imaerekanina xika, iusaaki nitxako: “Atāo nisāpiretana ninoa.

Ninoa maïroãpekaniiarako
nikamakiti tomatikoãtaã,”

itxa Erekarî Matamatakoti.

¹² Ininiã nitariakori, erepaniko. Atx-
iïti âtikaka hïte aua hïxinire maerekati
mauikareti. Ikara atoko inakasaaki, hï-
takanapapekari Teoso âtipirika auãki in-
akari, maerekati tikini hïsinî ïkapani.

¹³ Ininiã ikiniõtika hïkamata-
paraxiniretakakauako. Uatxapanika
inakasaaki hõtãkikakauako. Ininiã
maerekanitxi kona misirienetai.
!Ikamari kaikoxinire hinini. ¹⁴ Aãuini
mapotõkire manapi iteene aãuikiniãri
Kristo sãkire merepitipanika aãuikiniri
atoktxikana, atão iuakata parïkau-
atakani atxaua. ¹⁵ Uatxa nisãpiretai
kitxakapirïka iõkatsopatakiti:

Uatxa ia õti hïkenakotakasaakiri iua
sãkire, kona hïkamapiriko hïxinire
paikori inini, hãtokiriakorini atoko
hinini, ãparaã makipakaniãtaã
auakasaakina. Ninoa !auikari nota
sãkire.

¹⁶ Ninoa kenakotari Teoso sãkire,
txamari !nirekarina ikaminirina isãkire
iaõka. Kïpa ninoa? Exito tixini Moisesi
maktxakakinira ninoa. ¹⁷ Kikãkititipa
kamari Teoso naiatiniua koarëtakanani?
Ninoa maerekati kamakani.
Ikara xika ninoa ipïpeka ãparaã
makipakaniãtaã. ¹⁸ Kirimonipa Teoso
txari ia? “Atão nisãpiretai hïte. Kona
himaïroãpekaniiarako nikamakiti
tomatikoãtaã.” Teoso sãpiretari ikara
iua sãkire mauikakanimoni. ¹⁹ Ininiã
aimarotari, ninoa !ïroã iuaã, Teoso
sãkire imauikakanina xika.

Tomatikoãtaã Aua Teoso Nakitiakori ïkapani

4 Auapitika Teoso kamaenetakiti
kãkiti tomatiniãtaã Teoso kamakiti
ãïroini tïkane, ininiã erepaniko.
Atão inakari hïkamako iuaã hïïroini
ïkapani. ² Teoso iokanapirena erekari

sãpiretaãka atemoni, kitxakapirïka
Moisesi auakasaaki auakanimoni apaka.
Txamari maxikatiïka ninoa kenakotari
Teoso sãkire, kotxi ninoa !auikari
ikenakotakitina. ³ Ate, Teoso sãkire
auiãkaniua, ïroã ikara Teoso kamakiti
tomatikoãtaã. Ininiã Teoso sãpiretakiti
iaõka auapeka. Ia atoko Teoso txari:

Nomanatakasaakina ninoa imaerekan-
ina xika, iusaaki nitxako:
“Atão nisãpiretana ninoa. Ninoa
maïroãpekaniiarako nikamakiti
tomatikoãtaã,”

itxa Teoso. Ikara atoko itxama, iuari-
tika ikara tomatikoãtaã iposope iparïka
ixipokasaaki, itixi ikamakasaaki. Ikara
atoko ikama ate ïkapani. ⁴ Teoso sãkire
iõkatsopatakori sãpiretari itomatini õti
pirena. Itxari:

Iparïkauata seisi õti, ininiã eereka
apikomoni ãti õti inakasaaki
itomata. Iusaaki itakanapari
ikinika iparïka,

itxa Teoso sãkire iõkatsopatakori.
⁵ Teoso sãkire iõkatsopatakori txari:

Ninoa maïroãpekaniiarako nikamakiti
tomatikoãtaã.

⁶ Iuaritika apanakini ïroãpanikako iua
tomatikoãtaã. Txama apanakini kitx-
akapirïka auakani !ïroã. Ninoa merepi-
tipanika sãpiretaãka Teoso iokanapirena
erekari, txamari !ïïroãna, kotxi !ikama-
rina Teoso paniãtakiti. ⁷ Ininiã Teoso ka-
mari iketo õti apanakini iuaãtaã apokini
ïkapani. Iusaaki Teoso akiritari iketo
õti “uatxa.” Ikara atoko Teoso misãkire-
tari Tavii:

Uatxa õti hïkenakotiniãri nisãkire, ininiã
kona hïkamapiriko hïxinire paikori
inini.

⁸ Aãtokiri kitxakapirïka auakari
Xosoe inakori, iuara anikari kãkiti
itixi Teoso sikaenetakitimoni. Txamari
!ïïroãna atão inakari tomatikoãtaã
Teoso sikakiti, kotxi eereka Teoso
sãpiretari ãti õti tomatikoãtaã ïroïko õti.

⁹Ikara atoko ininiā, auapanikako Teoso kamakiti tomatikoātaā inakitiakori ikapani. ¹⁰Ininiā kākiti iroākasaaki Teoso kamakiti tomatikoātaā, iotokakari iparika, Teoso iparika iotokakini atokokana. ¹¹Ininiā nitariakori makamariko ikinika atō inakari iua tomatikoātaā airoini ikapani. Erepaniko, kotxi apanakini !iroā, Teoso sākire imauikakanina xika. Ininiā !hikamapiri ninoa kamakiti atokokana.

¹²Teoso sākire kaposotiireri. Isākire auāki itxapika, kotxi Teoso ātipirika auāki inakari sāpiretakiti. Saasara ipi auanaro auakaro, iteene kauanaro, ininiā iposotari ikisauakiniri inirekiniātaā. Iposotari ikisauakiniri kākiti pakaki, iua āki auakari axīpe imaktxakini ikapani. Apiata Teoso sākire, kotxi Teoso sākire posotari apokini kākiti iikite kākiti xinirekata apotiitiātaāua. Teoso sākire imarotari ikinika axinikakiti, anireēkiti pakini aākixinireē. Teoso sākire atamakaerekatari ikara aākixinireē auakari. ¹³Teoso atamatari ikinipoko akamakiti, ininiā !uari iomaātakori. Ikinipoko !ipataāka. Aāuīte Teoso apisatoō ikinipoko kasarori.

Xesosi Sasetotxi Auīte Apiatakari

¹⁴Ininiā atemoni auari sasetotxi auīte apiatakari, Xesosi, Teoso ākiri. Apiananiri iua. Iua sari iaxiti Teoso auiniātaā. Ininiā iteene maūikari iua sākire. ¹⁵Ate nakiti sasetotxi auīte apiatakari imarotari ate ākixinire iōkapetini. Imarotari ate maposotakiniti. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶Ininiā ataparaxinireritika masa Teosomoni. Aāuīte topākiniātaā masa ikinipoko

erekari isikakiti aāpakapini ikapani, iamoniākiniua ikapani. Isikaua ikinipoko erekari. Isikataparataua amaxikiko auakasaaki.

Xesosi Sasetotxi Auīte Apiatakari Mereīko

5 Ikinimane sasetotxi auīte apiatakari mereeēka kākiti sauaki. Iua misākiretari Teoso kākiti ikapani. Isikari kākiti sikakiti iuamoni. Kitxakapirika iua okari pirātxi Teoso apisatoō kākiti maerekani iikixitini ikapani. ²Iamonīkari mimaroreni, Teoso takanapakani pakini, kotxi imarotari kākiti ākixinire iōkapetini, kotxi iua apaka kākiti itxaua. ³Sasetotxi apaka maerekati kamakari itxaua. Ikara xika merepanika iua okari pirātxi Teoso apisatoō iua maerekani iikixitini ikapani. Eereka iua okari pirātxi kākiti maerekani iikixitini ikapani.

⁴Kākiti paxitari sasetotxi, iuaritika ninoa kona mereēri sasetotxi parika. Teosonoka mereēri kākiti sasetotxi ininiua ikapani, sasetotxi Arāo inakori Teoso mereini atokokana kitxakapirika.

⁵Xesosi iuaka !ikamaua sasetotxi auīte apiatakari ininiua. Kona itxari: “Apakatapitika sasetotxi nininiua.” Iuaritika Teoso txari iua:

Pite namarite. Uatxa noerekariko kākiti nota pite iri nininiua, itxa Teoso.

⁶Iuaikana Teoso txari: Ātipirika sasetotxi pitxaua. Sasetotxi Meokisiteki inakori atoko inakari pitxaua,

itxa Teoso Xesosimoni. ⁷Xesosi ikorapokoriti auakasaaki, iua iteene misākiretari iri. Ipinini apisapanika iteene amanaāri iri imapinakani ikapani. Imisākiretakasaakiri iua, iteene itxiūta. Irinokara posotari itxikitaniri imapinakani. Iri kenakotari isākire, kotxi Xesosi txari: “Pinirekakitinokara

ninireka.” ⁸Xesosi Teoso ākiri, iuaritika atatsiirauatakasaaki, imaroāpotari Teoso nireēkiti iaōka ikamini. ⁹Iua kamari ikinipoko iri paniātakiti. Ikara atoko ininiā, kākiti maerekani makatzakakari itxapekua. Imakatzakari ipaniātakiti kamakani maerekani, ininiā ninoa auapininiika itxanako Teosokata. ¹⁰Teoso mereēri iua sasetotxi auite apiatakari ininiua, Meokisiteki inakori sasetotxi ininiua atokokana.

Erepaniko, Atāo Sākiretxiti !Hītakanapape

¹¹Aua apikomoni kaiāopokori ikara atoko inakari asāpiretinii hīte, txamari pamimari ikara asāpiretinii hīte, kotxi !katimari himarotiniiri Teoso sākire. ¹²Akokaxiti hīte auikari Xesosi sākire, ininiā uatxa apiaerekata Xesosi sākire oereēkani hininiua. Txamari hīte nirekari āti oerekinii iuaīkana merepitipanika atāo inakari Teoso sākire iōkatsopatakoriā auakari. Hīte eenetxi xapitikiri atoko. Hinirekari Teoso sākire tinitxiā atoko inakari. Teoso sākire nipokori atoko inakari !hīposotapanika hāpakapini. ¹³Teoso sākire imarotakari tinitxiānoka nirekakari atoko inakari, iteene !imarotapanikari Teoso sākire. !Imarotari atāo inakarinoka ikamini, kotxi iua eenetxi xapitiri atoko inakari. ¹⁴Kākiti aneēkari nikari xinitxi. Kataparaxinireri nirekari Teoso sākire, xinitxi aneēkari nirekini atokokana. Kākiti ikiniōtika kenakotiniāri Teoso sākire, ininiā imarotari atāo inakari. Imarotari atāo minakati apaka.

Maāpaiaōkarauata Apikomoni

6 !Apakata ikiniōtika merepitipanika Kristo sākire oerekakorinoka axinikini, kotxi aimarotapekari. Aimarotapekari atakanapiniri

maerekati akamakiti. Aimarotapekari ateka kamakiti txīkitakaua apinini. Aimarotapekari Teoso sākire aāuikini. ²Aimarotapekari apatxisarauatini. Aimarotapekari atakauakotiniua āti nopini. Aimarotapekari ipikani iuaīkana ōkitikiniua. Aimarotapekari Teoso misiritinina maerekati kamakani ātipirika. !Apakata ikara ātipirika aōerekinii. ³Apikomoni auapitika, ininiā maāpaiaōkarauata apikomoni. Teoso auiritiniāua, apikomoni maxinika.

⁴Kākiti takanapiniāri Teoso sākire auikini, !apakataika ikanapiriinina Teosomoni. Mitxi ninoa imarotari Teoso sākire atāo inakari. Mitxi ninoa imarotari erekari iaxitikiri. Mitxi imarotari Erekari Matamatakoti parīka ākixinireēna. ⁵Mitxi imarotarina Teoso sākire ereka inini. Mitxi imarotarina Teoso posotiire itixi amaneri apokasaaki. ⁶Ikara atoko ninoa imarota, iuaritika ninoa takanapari Teoso. Ininiākara !apakata iuaīkana ikanapiriinina Teosomoni, kotxi iuaīkana imisiritarina Teoso ākiri aamina ipiriāmitakari nopini imisiritiko atoko. Iuasaaki ninoa txīkitakari kākiti iuaīkana napetiniri Xesosi.

Kikio Atoko Anini Pirena

⁷Teoso takari erekari itixi ia atoko inakari nopini: Āparaā ikipa kaiāokatani iuaā, ininiā iminaua kienatxi katakareri nirekakiti. ⁸Txamari itixi inako, aanaia pakini auiniā, litxa. Ikara xika atxiīti imisiritaāka. Ininiā arikaākako. Ikara atoko inapeēkanako kākiti. Maerekati aniniāua, ininiā pamonōkoniri atemoni. Ikara atoko ininiā, imapotōkire ōti Teoso !nirekaikaua ate. Ixipokaua aanaia xipokiko atoko.

⁹Nitariakori, ikara atoko asāpiretai hīte, iuaritika ate imarotari kona hīte ikara atokoni. Aimarotari

hāpakapiniri erekari, kotxi Teoso makatxakapekari himaerekani.¹⁰ Teoso kamari ikinika atāo. Iua !imaxinikaretari hīparīka iua ikapani. Hītiraōki iuamoni !imaxinikareta, kotxi himoianatapekari iua nakitiakori. Uatxa himoianatapanikana ninoa.¹¹ Ate nirekari ikinika hīkaminiritika Teoso ikapani imapotōkire ōti manapi apokini. Ikara atoko ininiā, himarotari hīatapakiti apokapitikako hītemoni.¹² Kona apakata hīarinuati. Apanakini Teoso sākire auīākani kamakiti atoko hīkamako, kotxi ninoa iātapari Teoso sikaenetakiti apakapinina.

Teoso Sikapitkariko Isikaenetakiti

¹³ Kitxakapirīka Teoso sāpiretari isikaenetakiti Apraāomoni. Apiatakari Teosonokara aua. Āti apiatakari iua atoko inakari !uari, ininiā iuaka uākaā isāpiretari isikaenetakiti isikini Apraāomoni.¹⁴ Ininiā Teoso txari Apraāo: “Nitakapitikari erekari pitemoni. Nisikaiko itomaneri papika mekaniriakori,” itxa.¹⁵ Ininiā Apraāo kenakotakasaakiri ikara, iteene iātapari Teoso sāpiretakiti apokini. Eereka Apraāo apakapari Teoso sikaenetakiti.

¹⁶ Kākiti sāpiretakasaakiri isikaenetakiti āti kākitimoni, iusaaki ninoa apoka āti apiatakari apisatoō isikaenetakiti isāpiretinina ikapani. Ininiā iusaaki kākiti imarotapitikari isākire atāo inini. Ikara atoko ininiā, aāpirena !uari isikaenetakiti xika.¹⁷ Teoso nirekari inakitiakori iteene imarotiniri imatapanapaniniri isikaenetakiti isikinina ninoa. Ininiā isikaenetakiti isāpiretakasaaki, isikari isākire iuaka uākaā.¹⁸ Ininiā ipi aua: Teoso, Teoso sākire pakini. Teoso mitxi atoko itxapikako. Teoso sākire mitxi atoko itxapikako. Ininiā Teoso !iposotari atāo minakati isāpiretini.

Amiteka iuamoni, iua nīkatiniua ikapani, aiātapakiti aāpakapini ikapani. Ininiā asikataparaxiniretaāka.

¹⁹ Ikara atoko inakasaaki, aposotari iteene aāuikiniri Teoso sākire. Aiātapari ikinipoko iua sākire iaōka apokini. Teoso sākire aāuikini, minari maporo maīkakari atoko itxa. Maporo maīkakari !auiritari maporo tiokini. Teoso sākire aāuikini maīkari axinire. Isikataparatarari axinire. !Auiritaua atiokini maerekanitximoni. Teoso sākire aāuikini anikaua Teosonani Auini Pakitaātaā, mākatxi mata arōkakari apikomoni auakari pakitamoni. Kitxakapirīka sasetotxiakori auīte apiatakarinoka iroā iuaā.²⁰ Iuaā Xesosi iroā ate iroini apisa. Iuaā imisākiretari iri ate ikapani. Sasetotxiakori auīte apiatakari itxapekaua ātipirika ate ikapani. Meokisiteki inakori sasetotxi ininiua atoko itxa Xesosi.

Meokisiteki Pirena

7 Meokisiteki inakori Sareē tixini auakani auīte itxaua. Iusaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirīka Apraāo kamari neenamati āti tixini auakani auīteakorikata. Iua kanapiriākasaaki, aōkitari Meokisiteki. Iusaaki Meokisiteki takari erekari Teoso sikakiti iuamoni.² Iusaaki Apraāo sikari iua tiitxi imaktxakakiti ipixini. Tesi tiitxi auiniā, isikari āti Meokisitekimoni. Meokisiteki akiritaāka “Auītetxi Atāo Inakari Kamakari.” Apaka akiritaāka “Auītetxi Kākiti Kamaerekaxiniretakari.”³ !Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponaniini, ipinini pakini. Teoso ākiri atoko itxa. Sasetotxi ātipirika itxaua.

⁴ Hīxinikariko iua Meokisiteki. Apiatakari iua. Apraāo iteene paxitari

iaua, ininiã isikari ipixini tiitxi iua makatxakakiti iuamoni. ⁵Eereka äti öti Apraão tikini Teoso paniätari Arevii apika mekaniriakori, sasetotxiakori, apakapiniri ipixini kākiti apakapakiti, txineiro, tiitxi pakini. Ninoa apakapari kākiti sikakiti Teoso ikapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶Iua Meokisiteki Arevii nirimane !itxaua. Iua aua kitxakapirika Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari erekari Teoso sikakiti Apraõmoni, Teoso sikaenetakiti apakapakarimoni. ⁷Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸Ikinika Arevii apika mekaniriakori, Teosomoni kākiti sikakiti apakapakani, ipinanipeka. Ätipirika auakari atoko itxa Meokisiteki. ⁹Atxiiti aposotari asäpiretiniri ia atoko: “Arevii sikari isikakiti Meokisitekimoni Teoso ikapani, kotxi iua ina Apraão ito äki.” ¹⁰Kotxi Apraão aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão itoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniätakiti iökatsopatakori ninoamoni, isäkire kākiti imarotini ikapani. Iuaritika ninoa sasetotxiakori parika !oerekari kākiti kamaerekatiko. Ininiã ätião sasetotxi nirekaäka. Sasetotxi Arão atoko inakari !nirekaäkaika. Sasetotxi Meokisiteki atoko inakari nirekaäka.

¹²Ätião sasetotxi auakasaaki, ätião Teoso paniätakiti iökatsopatakori

aua iuasaaki. ¹³Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirätxi Teoso ikapani. Kona iparikauatana Teosomoni sikakori takikoätaã. ¹⁴Ikinimane imarotari aäuite Xesosi Xotaa nirimane ininiua. Moisesi iökatsopatakiti !auiritana ninoa sasetotxi ininiuana. ¹⁵Ate säpiretapekari Meokisiteki pirena. Aimarotari auapitika äti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶Kitxakapirika sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !ixipoka. ¹⁷Teoso txari Xesosi isäkire iökatsopatakoriã: Ätipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸Ininiã mitxi auakari sasetotxiakori parika !auaika, kotxi itapara !auari. Xipope ikara. ¹⁹Moisesi paniätakiti iökatsopatakori !ikamari kākiti ereka inini. Uatxa apiaerekatakari aiätapakiti apokapeka ikorapokoriti. Ininiã iua anikaua Teosomoni.

²⁰Teoso isäkireë txikitakari Xesosi sasetotxi ininiua. ²¹Teoso lisäkirauata ikara atoko kākiti sasetotxipeka inakasaaki. Teoso txikitakari Xesosi sasetotxi ininiua isäkireë, kotxi itxari Xesosi: Nota Apiananiri säpiretapekari nika-maenetakiti. Ikara nikamapitikako, ininiã ätipirika sasetotxi pitxaua, sasetotxi Meokisiteki atoko inakari pitxaua,

itxa Teoso. ²²Ininiã ikara Teoso säkireë, aimarotari Teoso kamapititariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari ātipirika iparīkauatinina, kotxi ikoriāpekana. ²⁴ Xesosi auapikako, ininiā ātipirika sasetotxi itxaua. ²⁵ Ininiā iposotari imaktxakiniri ikinika amaerekani, Teosomoni anikasaakiaua, kotxi ātipirika aua, ininiā ātipirika imisākiretari Teoso ate ikapani.

²⁶ Ininiā ikara atoko inakari sasetotxi auīte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireē !auari. Maerekati !ikama. Iaxiti apiko nopinixiti auakari, auītetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auīte apiatakani ikorapokoriti auakani atoko !itxaua. Ninoa ikiniōtika okari pirātxi, merepanika ninoaka maerekani makatxakiko ikapani. Eereka ninoa okari pirātxi kākiti maerekani makatxakiko ikapani. Kona ikara atokoni itxa Xesosi. Ātikatanokara Xesosi oxiketari iarēka kākiti ikapani. Iuaka ipina kākiti ikapani. ²⁸ Mitxipe sasetotxi auīte apiatakani mereēka Moisesi paniātakiti iōkatsopatakori iaōka. Ninoa tapara !auari. Moisesi sākire tikini Teoso mereēri imi ātipirika sasetotxi ininiua ikapani. Ātipirika ekerarinoka kamakari iua.

Xesosi Sasetotxi Auīte Apiatakari

8 Ia atoko asāpiretakiti: Atemoni auapitika atāo sasetotxi auīte apiatakari. Iaxiti iua topāka aāuīte Teoso kikomoni, auītetxi auiniātaā. ² Iuaā Teoso auiniātaā, imisākiretari iua ate ikapani. Iuaā aua atāo inakari Teoso aapoko, Apiananiri kamakiti. Kona kākiti kamakitini.

³ Ikinika sasetotxi auīte apiatakari auari iparīka. Isikari kākiti siākiti Teosomoni. Isikari pirātxi okakori Teosomoni. Ininiā Xesosi parīka apaka aua isikarauatini. Iuaka isikaua

Teosomoni. ⁴ Īkorapokoriti Xesosi auakasaaki, sasetotxi !itxaua, kotxi auape ikorapokoriti sasetotxiakori kākiti siākiti sikakani Teosomoni. Moisesi iōkatsopatakiti atoktxikana ikamana. ⁵ Sasetotxi ikorapokoriti auakani kamakiti atāo, txamari ninoa parīka !inirekaākaika. Ninoa parīka sanōkatxi atoko itxa, Xesosi parīka iaxitikiri aimarotini ikapani.

Kitxakapirīka Teoso paniātakasaakiri Moisesi Teoso aapoko aamata kamakori ikamini ikapani, Teoso txari Moisesi: Pikamariko naapoko nipaniātakiti iaōka ixirata auīte nopini aāuakasaaki noerekakiti. Ipinimoni inakari !pikamape, itxa Teoso.

⁶ Xesosi parīka Teoso sikakiti apiaerekata. Kitxakapirīka sasetotxiakori parīka poiāo erekari. Iua atokokana Teoso kamaenetakiti amaneri apiaerekata. Kitxakapirīka ikamaenetakiti poiāo erekari. Xesosi txīkitakari Teoso kamaenetakiti amaneri apokini kākiti ikapani, kotxi iua ipina kākiti ikapani. Teoso kamaenetakiti amaneri apiaerekata, kotxi ikamaenetari kaiāopokori erekari apiaerekatakari.

⁷ Teoso kamaenetakiti Moisesimoni apakatiniā maerekati imaktxakini ikapani, ininiā kona ikamari āti ikamaenetakiti apiatakari. ⁸ Txamari Teoso !apokaerekatari kākiti, kotxi kākiti kamapanikari maerekati. Ininiā Apiananiri txari kākiti: Āti ōti nisāpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹ Kitxakapirīka nisāpiretari mitxi nikamaenetakiti ninoa atokiriakorinimoni. Iuasaaki nota makatxakana ninoa imisiritikosaakina Exito tixiniā. Txamari ninoa !ikamari nisākire

iaōka. Ininiā nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Āti ōti ikari nikamaenetakiti amaneri nisāpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniātakiti kākiti iikiteē. Niōkatariko nipaniātakiti ninoa ākixinireē. Iuasaaki ninoa nota nakitiakori itxauanako.

¹¹ Iuasaaki kākiti kona oerekari āti imarotini Apiananiri. Kona kākiti oerekari itari imarotini Apiananiri, kotxi iuasaaki ikinimane imarotanoko nota. Poiāoka inakani, apiatakani pakini imarotanoko nota.

¹² Nimaxinikaretariko ikinika maerekati ikamakitina. Kona nimisiritakanako ninoa. Kona nixinikaikariko maerekati ikamakitina,

itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kākiti mitxi ikamaenetakiti Xoteoakorinoka ikapani ikamape, ininiā inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

Teoso Aapoko Aamata Kamakori

9 Kitxakapirika Teoso kamaenetakiti isāpiretakasaakiri Moisesi, Teoso oerekari Moisesi oerekiniri kākiti Teoso apisatoō apokini. Iua apaka sāpiretari kākiti iua aapoko ikorapokoriti ikaminina ikapani. ² Ininiā ninoa kamari Teoso aapoko aamata kamakori. Sasetotxiakori ĩroiniātaā aua tirikapi takiko tiitxiti. Iuaā aua apaka komiri Teosomoni siākori amesa nopini. Iua pakita ninoa takauākatari “Teoso Auini Pakitaātaā.” ³ Apanikaki mākatxi mata kasipiri arōkakari aua. Iua mākatxi mata apikomoni auakari pakita

ninoa takauākatari “Teosonani Auini Pakitaātaā.” ⁴ Iuaā aua kamariāro arikiko amesati oro kamakoro. Iuaā aua Teoso kaixane. Iua kaixa akiritaāka “Teoso kamaenetakiti kaixati.” Iua kaixa nopini mapara itaāka oronokara. Iua āki itakaāka kopitipaki oro kamakoro. Iua kopitipaki āki itakaāka xapitiri komiri manaa inakori. Iua kaixa āki aua apaka Arāo tsonareke. Īkora mitxi pitxaka iuaikana. Apaka iua kaixa āki aua ipi kaita. Īkora kaita nopini aua Teoso paniātakiti iōkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaāka Keropiī inakoni. Keropiī matameēkari imikita iua kaixa tore nopini. Iuaā Teoso maxinikaretari kākiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaātaā sasetotxiakori ĩroā ikiniōtika iparīkana ikaminina Teoso ikapani. ⁷ Sasetotxi auite apiatakarinoka ĩroā Teosonani Auini Pakitaātaā. Ātikanani ātikatika ĩroā. Iua anikari arēkatxi iuakata. Arēkatxi imanikakaniā, !ĩroā. Iua arēkatxi isika Teosomoni merepanika iuaka maerekani Teoso makatxakini ikapani. Eereka ikamari ikara apanakini kākiti maerekani Teoso makatxakini ikapani. ⁸ Iuasaaki Teoso kona auiritari kākiti ĩroini Teosonani Auini Pakitaātaā. Ikara atoko Erekari Matamatakoti oerekaua ate, kotxi kona Teoso oerekapanikari ikinimane kākiti ĩroini Teoso apisatoō. Teoso aapoko aamata kamakori auapanika inakasaaki, Teoso kona oerekari kākiti iuamoni apokini. ⁹ Ikara Teoso aapoko kitxakapirika auakari ate oerekiko itxaua uatxa. Oerekari ia. Kākiti sikakiti Teosomoni, pirātxi okiko Teoso ikapani apaka, kona posotari oeretiniri Teoso teosonetakani ākixinire. ¹⁰ Ikara Teoso oerekakiti kitxakapirika oerekari kākiti

iniäkiti atão inakari, iätakiti atão inakari pakini. Oerekari kākiti iīto arokiko, itii arokiko pakini Teoso apisatoō apokini iposope inini ikapani. Teoso kamaenetakiti amaneri apokasaaki, kona aka-maikari ikara mitxi Teoso oerekakiti.

Kristo Arēka

¹¹ Kristo apokapeka. Sasetotxi auīte apiatakari itxaua. Oerekaua erekari Teoso sikakiti. Iparīkauata Teoso aapoko apiaerekatakari āki. Iua Teoso aapoko kākiti makamakiniti. Iua aapoko !auari ikorapokoriti. ¹² Iua iroākasaaki iuaātaā, !anikari potxi arēka, kema auīte ākiri arēka iiroini ikapani. Iua iroākasaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti ikapani. Ininiā iikitxitari Teoso ātikatika kākiti maerekani iki, ininiā kākiti aua Teosokata ātipirika. ¹³ Potxi arēkaā, kema auīte arēkaā, kema auīte ākiri ariākori paniā pakiniā, kitxakapirīka sasetotxi tseētari maerekati kamakani Teoso apisatoō apokinina ikapani. Ininiā iusaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri aākixinire. Maerekati !auari Kristomoni. Iuaka sikaua Teosomoni Erekari Matamatakoti posoti-ireē, ātipirika auakari posotiireē. Iuara oeretari aākixinire. Imakinika akamakiti apinini txīkitakakari imaktxaka. Ininiā uatxa aposota aparīkauatini Teoso ātipirika auāki inakari ikapani.

¹⁵ Ininiā iua Kristo txīkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua anaakori ikapani. Kristo ipīkasaaki, isikakana ninoa imaerekanina itakanapinina ikapani. Iusaaki iikitxitari Teoso imaerekanina

iki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kākiti ipinini apisa, iōkatsopatari itii apakapakani uāka, ininiā ipīkasaaki itii apakapakani imarotaāka. Ininiā iua ipinini imarotiko tsopa auiniā, iusaaki itii apakapakani apakapari ipīkari tii.

¹⁷ Ipīkari tii apakapakani imarotiko tsopa nirekaāka kākiti ipīkasaakinokara. Ikara !nirekaāka ipinini apisa. Iua auākipanika inakasaaki, kākiti !apakapari itii. ¹⁸ Ininiākara mitxi Teoso sikaenetakiti isika kākitimoni, arēkatxi auakasaaki, ipīkari auakasaaki.

¹⁹ Kitxakapirīka Moisesi merepitipanika sāpiretari kākiti ikinika Teoso paniātakiti iōkatsopatakori. Eereka ikosekari kema auīte ākiri arēka, potxi arēka pakini. Ikara ikoketa āparaākata. Iposo atoko itseētari Teoso sākire aātsopate, ikinimane kākiti pakini isopo inakori poriā, soti auīte piti pōkamarariā pakiniā.

²⁰ Iusaaki itxari: “Ia arēkatxi oerekaua Teoso kaminiri ikamaenetakiti. Teoso paniātai hīkīpitiniri iua sākire.” ²¹ Iua atokokana Moisesi tseētari Teoso aapoko aamata kamakori, ikinika iua āki auakari pakini arēkatxiā. ²² Teoso sākire iōkatsopatakori paniātari kākiti, tiitxi pakini oeretiko arēkatxiā. Okakori mauakaniā, arēkatxi kitaākori mauakaniā, Teoso !imaktxakari kākiti maerekani.

²³ Ininiā Moisesi takari pirātxi arēka ikinika Teoso aapoko āki auakari nopini oeretiniri ikapani. Ikinika Teoso aapoko āki auakari ikorapokoritikiri, iaxitikiri oerekiko ikapani itxa. Sanōkatxi atoko itxa. Pirātxi arēka kona apakata iaxiti ikapani. Teoso nirekakari arēkatxi apiatakari.

²⁴ Kristo iparīka ikamakasaaki ate ikapani, kona iiroā Teoso aapoko kākiti kamakitiā. Ikorapokoriti kākiti

kamari Teoso aapoko atoko inakari, txamari na atão iua aapoko. Kristo iroã atão Teoso aapoko Teoso tixineë. Uatxa iuaãtaã Teoso apisatoõ iua misãkiretari Teoso ate ikapani. ²⁵ Sasetotxiakori auite apiatakari iroã Teosonani Auini Pakitaãtaã ikinikanani. Iuasaaki anikari pirãtxi arëka. Kristo !kamari ikara atoko. Ætikatika Kristo oxiketari iarëka. ²⁶ Iua ninoa atoko inaãkamako, itokata imisiritaãkamako itixi kamikosaakipekamako. Uatxa imapotõkire õti takote iua apokapeka maerekati ætikatika imaktxakini ikapani. Iuaka isikaua ipinini ikapani, amaerekani ixipokini ikapani. ²⁷ Teoso kamari ikinimane kãkiti ætikatika koriini. Eereka ikinimane sari Teoso apisatoõ. Iuasaaki apanakini apakapari imisiritiko. Apanakini apakapari iparíkana iki. ²⁸ Ininiã Kristo okaãka ætikatika kaiãopokori kãkiti ikapani, imaerekanina imaktxakini ikapani. Iuaikana iua kanapiriã. Iuasaaki !imisiritaãkaikako kãkiti maerekani xika. Iua ikasaaki, imaktxakariko iua iãtapakani, maerekani sauaki auakani. Anikana itixinemoni ætipirika Teosokata auinina ikapani.

Pirãtxi Arëka Kona Apakata

10 Kitxakapiríka Teoso paniãtakiti Xoteoakorimoni sanõkatxi atoko itxa. Ikara oerekari kãkiti iuasaaki auakani atão inakari apokini æti õti. Ikinipoko atão inakari !apokapanika ninoamoni. Ininiã pirãtxi okiko ætipirika kona txikitakari kãkiti iposope Teosomoni apokini. !Ikamaerekatana ninoa. ² Pirãtxi arëka makatxakiniãri kãkiti maerekani, ininiã ninoa takanapamariko pirãtxi okinina, kotxi Teosomoni apokakani oeretapeëkaika, ininiã imarotamarina ækixinireëna imaerekanina mauakani. ³ Txamari pirãtxi arëka !imaktxakari kãkiti

maerekani. Ininiã ikinikanani pirãtxi okakori oerekari kãkiti imaerekani auapanika. ⁴ Kema auite arëka, potxi arëka pakini kona posotari imaktxakini kãkiti maerekani.

⁵ Kristo apokasaaki ikorapokoriti, itxari Teoso:

Pirãtxi okakori pitemoni siãkori kona pinireka. Ininiã pite kamari itotxi nota ikapani.

⁶ Pirãtxi arikiko pite ikapani, pite !apokaerekatari. Kãkiti sikiniri isikakiti pitemoni imaerekani pimaktxakini ikapani, pite !apokaerekatari. !Ikamapoxokonitai.

⁷ Iuasaaki nitxai. “Uaikarano nota. Paãt-sopateë iõkatapeëkaika nota pirena. NiTeosone uai napoka pinireëkiti nikamini ikapani,”

itxa Xesosi.

⁸ Merepanika Xesosi txari iri: “Pirãtxi okakori pitemoni siãkori kona pinireka. Pirãtxi arikiko pite ikapani, pite !apokaerekatari. Kãkiti sikiniri isikakiti pitemoni, pite !apokaerekatari. !Ikamapoxokonitai,” itxa. Iuaritika

Teoso sãkire iõkatsopatakori kitxakapiríka paniãtari ikara kamiko.

⁹ Eereka Kristo txari iri: “Uaikarano nota. Uai napoka pinireëkiti nikamini ikapani,” itxa. Ikara atoko inakasaaki, Xesosi xipokari pirãtxi okiko, kotxi iua apoka uai Teoso nireëkiti ikamini ikapani.

¹⁰ Teoso nireëkiti iaõka ikamini ka-maerekataua ate, kotxi Xesosi Kristo ipina ætikatika ikinimane ikapani.

¹¹ Sasetotxiakori ikorapokoriti auakani sapika ikiniõtika Teoso apisatoõ iparíkana ikaminina ikapani. Ætipirika iua okari pirãtxi Teoso isikini ikapani. Itxama, ikara !iposotari maerekati imaktxakini. ¹² Iuaritika Kristo, ate sasetotxine, iuaka sikapekaua ikoriini kãkiti maerekani imaktxakini ikapani.

Ikamari ikara ātikatika. Iposo atoko, iitopāka Teoso kikomoni. Ikara atoko ininiā, ixipokari iparīka. ¹³Iuaā iātapari ikinika imokaiakari xipokini. Ikiti itakiniātaā atoko ninoa. ¹⁴Ininiā ātikatika okaāka kākiti ereka inini ikapani. Iua kamaāpotana ninoa erekaāpo ininina ikapani.

¹⁵Erekari Matamatakoti apaka txaua ate ikara atāo inini. Merepanika itxari:

¹⁶Apiananiri txari: “Ia nikamaenetakiti nikamako ninakitiakori ikapani āti ōti. Ia nikamaenetakiti: Nipaniātakiti nitakako ninoa ākixinireē. Nipaniātakiti niōkatakoko iikiteēna.”

Itxa Erekari Matamatakoti.

¹⁷Apikomoni itxa:

Kona nixinikaikari maerekati ikamakitina. Apaka nipaniātakiti ninoa takanapakiti, !nixinikaikako.

¹⁸Teoso makatxakasaakiri maerekati akamakiti, ininiā amaerekani makatxakaākapeka. Ininiā !auaika okakori kākiti maerekani makatxakini ikapani.

Maāpoka Teosomoni

¹⁹Ininiā nitariakori uatxa !hīpikarauatape hīiroini Teosonani Auini Pakitaātaā, kotxi Xesosi iikixitapekari aīroini ikapani iuaka arēkaā. ²⁰Xesosi ipīkasaaki, iua kamari kimapori amameri, maxipokati, Teosomoni asini ikapani. Ipīkasaaki, imakatxakari mākatxi mata Teosonani Auini Pakitaātaā arōkakari, Teosomoni aīroini ikapani.

²¹Atemoni aua sasetotxi apiatakari Teoso aapoko nīkatakari. ²²Ininiā maāpoka Teosomoni. Maāuiritari atāo inakarinoka kaikotini aākixinireē. Maāuikari ikinika iua sākire. Kākiti kitxakapirīkarini tseērauata arēkatxiā, maerekati makatxakiko ikapani. Ininiā maamanaāri Xesosi tseētiniiri aākixinire oeretiniiri ikapani.

Kitxakapirīka kākiti kipaātaua Teoso aapoko iroini ikapani. Iua atokokana maamanaāri Xesosi aīto arokini āparaā ereriā. Ikara atoko aniniā, maāpoka Teosomoni. ²³Iteene maāuikari aimarotakiti asāpiretakiti, kotxi Teoso kamapitīkariko ikamaenetakiti. ²⁴Maxinīkariko ia. Natokopa itxa aōtākikakakiniua atiraōkiuatini ikapani, erekari akamini ikapani apaka? ²⁵!Apakata atakanapiniri aāpotiitiniua Teoso ikapani. Apanakini litotaikari apotiitiniua Teoso ikapani. Masikataparaxiniretakakaua. Apiata masikataparaxiniretakakaua, kotxi aāuīte kanapiriini ikorapokoritimoni kaiamapeka.

²⁶Atāo inakari aimarotiniā, atāo inakari aāpakapiniā, eereka maerekati akamapika, kotxi anirekari maerekati akamini. Iuasaaki !auaika amaerekani ikitxitiko. Iuasaaki !auaika amaerekani makatxakiko. ²⁷Iuasaaki aimarotari kākiti ikara atoko inakani misiritaākako, kotxi Teoso mokaiakariakori itxauana. Arikatxi apiatakari xipokanako ninoa. Pīkaretxinoka aua ninoa ikapani.

²⁸Kitxakapirīka kākiti makīpitakaniāri Moisesi paniātakiti okapeēkaika. Ipi, atxiīti ipi āti pakini kākiti atamatiniāri iua kaminiri maerekati, ininiā okaāka. !Auiritaāka imitekini. ²⁹Ininiā natokopa itxa kākiti misiritiko Teoso ākiri sākire imakīpitakaniā? Apiata iua misiritiko, kotxi Teoso ākiri ikatxaratini atoko itxa imakīpitakaniri iua sākire. Iuasaaki !ipaxitari iua arēka amaerekani makatxakakari Teoso sikaenetakiti. Iuasaaki imisākirepiretari Erekari Matamatakoti, ikinipoko erekari sikakari. ³⁰Aimarotari ia sāpiretakari. Iua txari:

Notanoka xikatxirauata. Notanoka misiritanako ninoa imaerekanina xika,

itxa Teoso.

Apaka Teoso sākire iōkatsopatakori txari:

Apiananirinoka sāpiretari kākiti inakiti-akori misiritiko.

³¹ Kākiti maerekati kamakani apokasaaki Teoso ātipirika auāki inakari apisatoō, iusaaki pamonōkoniri, kotxi kākiti misiritakari itxaua.

³² Hīxinikariko merepitipanika Teoso sākire hāuikini ōti. Hīkrite iopinikiko atoko itxa iusaaki. Iusaaki himarotari Teoso sākire. Iusaaki iteene hātatsiirauata Xesosi sākire hāuikini xika. Iuaritika iusaaki hītaparaxinireritika hāua. Iusaaki !hītakanapari Xesosi sākire hāuikini.

³³ Iusaaki kākiti apisatoō apanakini napetai. Ninoa misākirepiretai hīte. Imisiritaina hīte. Iusaaki hīte moianatari apanakini Teoso sākire auīākani, kākiti misiritakini. Ininiā iusaaki hīte apaka misiritaāka.

³⁴ Hītiretana apanakini Teoso sākire auīākani kateia āki auakani. Apanakini mixirikari hīti Kristo sākire hāuikini xika, iuaritika hīpoxokoniuaata, kotxi iusaaki himarotapekari auapitika iaxiti hīti Teoso sikakiti. Īkora tiitxi kona xipoka. Apiaerekata tiitxi iuaxiti auakari.

³⁵ Ininiā kona hītakanapapiri hītaparaxinire, kotxi āti ōti Teoso iīkitxitai hītaparaxinire auiniāi. ³⁶ Hīmīteenekariko ikinika Kristo īkapani. Hīkamariko ikinika hītaparaxinireritika. Ininiā Teoso paniātakiti hīkamakasaaki, hāpakapariko isikaenetakiti. ³⁷ Teoso sākire iōkatsopatakori txari:

Apikomoni mokatanitika iua kanapiri-āko. Iketo ōti ikanapiriāpitika.

³⁸ Kākiti atāo inakari kamakari auini erekari, kotxi auikari nota sākire. Kākiti sipikapapiretiniāri nisākire, nota !apokaerekatari iua,

itxa Teoso. ³⁹ Ate kona sipikapapiretari Teoso sākire. Ininiā !axipokaāka. Teoso sākire auīākani atxaua ate. Iua makatx-akari amaerekani aākixinireē auakari.

Teoso Sākire Auikiko Pirena

11 Atāo aūikasaakiri Teoso sākire, iusaaki aimarotapitikari aāpakapiniri aiātapakiti. Atāo aūikasaakiri Teoso sākire, iusaaki aimarotari amatamatakiniti auapitika. ² Kitxakapiriāka Teoso apokaerekatana isākire auīākani, kotxi iteene auikarina isākire.

³ Teoso sākire aūikasaaki, aimarotari iua kamari itixi, iaxiti pakini isākireēnokara. Aātamatakitiā !ikamari itixi, iaxiti pakini. Isākireēnokara ika-mari ikinipoko.

Teoso Sākire Auīākari Apeo Inakori

(*Xénesisi 4.2-12*)

⁴ Apeo inakori auikari Teoso sākire, ininiā Teosomoni isikakiti apiaerekata, kotxi Apeo sikari Teosomoni Teoso sākire iaōka. Itari Kaiī inakori sikakiti poiāo erekari. Apeo auikari Teoso sākire, ininiā Teoso apokaerekatari iua sikakiti. Teosomoni atāo inakari kamakari itxaua Apeo. Kitxakapiriāka Apeo koriā, iuaritika iua auikiniri Teoso sākire oereka-panikaua Teoso turetiniiri kākiti isākire auīākani.

Teoso Sākire Auīākari Enoki Inakori

(*Xénesisi 5.21-24*)

⁵ Enoki inakori apaka auikari Teoso sākire. Ininiā Teoso anikari iua iaxiti. Kona ipina. Mapīkatipanika anikaāka Teosomoni. Iusaaki kākiti !apokaikari iua, kotxi Teoso anikapekari iua. Isini apisa kākiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauikakaniā, kona akamapoxokonitari Teoso. Kākiti Teosomoni apoākari,

merepanika auikariko Teoso auini. Apaka ninoa auikariko Teoso sikiniri erekari kaiäopokori iua nitakarimoni.

Teoso Säkire Auiäkari Noe Inakori

(Xénesisi 5.28–9.29)

⁷Noe apaka auikari Teoso säkire. Teoso säpiretari iua käkiti mimarotakiniti monökoni. Iuasaaki iua pikarauata, ininiä ikamari maporo mitari iua aapoko äki auakani mapinakani ikapani. Noe auikari Teoso säkire, ininiä isäpiretari Teoso misiritiniri käkiti imaerekani xika. Teoso txikitakari iua atão inakari ikamini, kotxi iua auikari Teoso säkire.

Teoso Säkire Auiäkari Apraão Inakori

⁸Apraão apaka auikari Teoso säkire, Teoso paniätakasaakiri iua ätiätaã isini. Iua kīpitari Teoso säkire, ininiä iua sari, txamari kona imarotari isinimoni. ⁹Iua auikari Teoso säkire, ininiä iua aua Teoso sikaenetakiti tixitiä. Iuaä iua aapoko aamata kamakori, kotxi äti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰Apraão iätapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaäka kaikori nopini, ininiä lixipoka.

¹¹Apraão auikari Teoso säkire. Iua imarotari ikiomaneēpeka inini. Apaka imarotari itanoro Sara kona posotaikari keene onini. Iuaritika auikari Teoso säkire irītxi ininiua ikapani. Imarotari Teoso sikapitikariko isikaenetakiti. ¹²Ininiä iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itxanako. Ikipatxite atoko itxanako apika mekaniriakori. Kaiäopanina ninoa.

Teoso Säkire Auiäkani Iätapakiti

¹³Ikinika ninoa käkiti Apeo, Enoki, Noee, Apraão pakini auikari Teoso säkire. Ikoriäkasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ötakopanikari apokini tīkane. Ninoamoni ikorapokoriti kona atão ninoa tixine. Maparakini atoko itxauana. ¹⁴Käkiti ikara atoko inakani oerekari ninoa nitiniri ninoaka tixine. ¹⁵Itixi itakanapakitina ixinikaäkamanako, ininiä iuaikana ikanapiriämanako iuaätaã. ¹⁶Ninoa kona kanapiriä, kotxi inirekarina apiaerekatakari itixiti, iaxiti auakari. Ininiä Teoso lipētauata ninoa Teosone ininiua ikapani, kotxi iua kamapekari sitatxi ninoa ikapani.

Apraão Okaaritiniri Imi

¹⁷Apraão auikari Teoso säkire, Teoso ataerekatakasaakiri iua. Iuasaaki iposope okiniri Isaki Teoso ikapani. Teoso sikaenetakiti apakapakari iua Apraão. Iposope imatonökari imi okini Teoso ikapani. ¹⁸Teoso säpiretapekari iua: “Isakimoni auako pimekaniriakori, papika mekaniriakori pakini,” itxari. ¹⁹Iuasaaki Apraão xinikari Isaki ipininiä, Teoso ökitikari iua iuaikana. Iuasaaki Isaki ipinaarita, ininiä käkiti ipīkari iuaikana ökitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Säkire

²⁰Isaki apaka auikari Teoso säkire, kotxi itakari erekari imi Xakoo, Isaoo pakinimoni, Teoso nireëkiti iaōka ikaminina tīkane. ²¹Xakoo apaka auikari Teoso säkire. Ikoriiini apisa itakari erekari Xosee anaakorimoni. Iuasaaki isäpiretari Teoso iua ereka inini. Iuasaaki iioitekaua itsonarekeë.

²²Xosee apaka auikari Teoso sākire. Ipinini apisa isāpiretana Isaeokini Exito osipikinina ikapani. Ininiā iua paniātana ninoa anikiniri iua api Teoso siākiti itixitimoni.

Moisesi Auikiniri Teoso Sākire

²³Moisesi iri, inoro pakini auikari Teoso sākire. Iponaniāka atoko, ninoa kipatari iua ipi āti pakini kasiriti. Iuasaaki imarotarina Moisesi kona āti eenetxi atokoni. Ipinimoni itxa. Ninoa imarotari Paraoo paniātiniri amarini okiko, iuaritika !ipīkarina Paraoo paniātakiti.

²⁴Moisesi auikari Teoso sākire. Mitapeka inakasaaki, kona inirekari kākiti akiritiniri iua Paraoo ākero ākiri ininiua.

²⁵Iua mereēri imisiritiko Teoso naki-tiakorikata. Ininiā iua sari ninoakata. !Nirekari poxokonitxi maerekati kamakiti, kotxi ikara poxokonitxi mokatani-tika xipoka. ²⁶Iuamoni apiaerekata ninoaxinitiniri iua Kristo sākire auikini xika. Kona iua nirekari katiiri ininiua Exito auakanikata, kotxi imarotari āti ōti Teoso sikiniri iua iparīka iki.

²⁷Exito ipotorikasaaki, iua auikari Teoso sākire. Iuasaaki Exito auakani auīte omanākarauata. Iuaritika !ipikari iua. Imīteenekari ikinipoko, kotxi auikari Matamatakoti sākire. Atamatakiti sākire auikini atokotxikana, auikari imatamatakiniti sākire. ²⁸Iua auikari Teoso sākire, ininiā ipaniātari kākiti okiniri soti auīte. Eereka ipaniātari itakiniri iarēka īronakikoōtaā tinikata. Ininiā Teoso nitiri ipikitxi mīkari iaxitikiri ninoa nopini inapaāpotakasaaki, kona okari Isaeokini merepanika auakani, kotxi atamatari arēkatxi.

²⁹Kākiti Isaeokini auikari Teoso sākire, ininiā ipiriātarina potxoari uiniti Pōkamarariā inakori sonākakari kimaporiti nopini. Kākiti Exitokini

apaka nirekari inapinina ninoa napini atoko. Txamari iuasaaki āparaā kanapiriāpe iua kimapori nopini, ininiā ikinika ninoani axāpoātape.

Teoso Sākire Auiākani Kāiatini

³⁰Isaeokini auikari Teoso sākire, ininiā Xerikoo sitatxiti iakirokana setxi pakini ōti. Iuasaaki pirikeri sitatxi ākitakari irikapoakata, kotxi ninoa kamari Teoso sākire iaōka.

³¹Haapi inakoro kanokarero otxaua mitxi. Eereka oāuikari Teoso sākire, kotxi oāpakapana kākiti iuaātaā apokakani, Teoso iokanatakini, ininiā kona okoriā kākiti Teoso sākire mauīākanikata.

³²Kiripa apikomoni nisāpiretai? Auapitika apikomoni itomaneri kākiti Teoso sākire auiākani. Kona apakata uatxa nisāpiretinii hīte Kitxiāo pirena, Paraki pirena, Sāsāo pirena, Xepitee pirena, Tavii pirena, Samoeo pirena, apanakini Teoso sākire sāpiretakani pirena pakini.

³³Ninoa kākiti auikari Teoso sākire. Ininiā inaiatakasaakina Teoso sākire mauīākani, ninoa kāiata. Ninoa kamari atāo inakarinoka. Iuasaaki apakaparina Teoso sikaenetakiti. Ninoa okaāka ākitimoni. Iuaritika kona ākiti okana. Ākiti nama totaāka iuasaaki. ³⁴Xaminamoni okapeēkana, iuaritika xamina !arikana. Kona apakata okikona iouata mitaroā. Ninoa mataparani, iuaritika kataparaxinirepeka itxana, kotxi auikarina Teoso sākire. Neenamatchi auakasaaki, pataparana ninoa, ininiā āti uāka sotatoakori miteka.

³⁵Sitoakoro Teoso sākire auiākani iuaīkana aua imiakori, kotxi Teoso ōkitikana ninoa ipikasaakina. Apanakini Teoso sākire auiākani noropataāka. Imatakanapakaniārina Teoso sākire auikinina, okaākana, iuaritika ninoa

!inirekarina itakanapinirina, kotxi ninoa imarotari āti ōti Teoso ōkitikana ninoa. Iuusaaki apiaerekata ninoa apakapakiti.

³⁶Apanakini Teoso sākire auiākani napetaāka. Inoropataākana aāpitsaā. Apanakini Teoso sākire auiākani iaxirikaāka, kateia āki taka inaākana.

³⁷Apanakini kiporonakaāka kai soroā. Apanakini kākiti sehotxiā kitxirākaāka apanikaki iitona, auākipanika inakasaakina. Apanakini okapeēka iouata mitaroā. Apanakini māka soti auīte mata, potxi mata pakini. !Kamākana. !Katiina. Maerekati kamakani nitana ninoa okinina ikapani. Imisiritapeēkana. ³⁸!Apakata ikorapokoriti ninoa ikapani, kotxi ninoa iteene erekari.

Ninoa miteēkata āparaā makipakaniā-taā, ōtanoxirataru auiniātaā apaka. Aariko itixiākiriā, kai iriko āki apaka apanakini Teoso sākire auiākani aua, kotxi aapokona !auari.

³⁹Teosomoni peerekana ninoa, kotxi iteene auikarina iua sākire. Iuaritika ninoa !apakapapanikari Teoso sikaenetakiti iuusaaki. ⁴⁰Teoso nirekari apiari erekari ate ikapani. Inirekana ninoa atekata aāpakapiniri isikaenetakiti.

Teoso Oerekari Atāo Iua Anaakori Aniniua

12 Ininiā kaiāopokori Teoso sākire auiākani itixine apokakani atamataua ate uatxa. Ininiā matakana-pari ikinika ate iomakotetakari. Matakana-pari maerekati akamakiti, kotxi ikara patimari iaxirikiniri axinire. Ataparaxinireritika maāuako. Mamiteenekari ikinipoko. Mitekakani mitekini atoko mamitekako Teoso oerekinimoni. ²Ātipirika maātamatari Xesosi. Maāuikari iua sākire, kotxi iuanoka amaerekani makatxakakari. Iua txikitakaua ate atāo aāuikiniri Teoso sākire. Xesosi xinikari poxokonitxi

apokini ōti, ininiā iuusaaki imiteenekari aamina ipiriāmitakari nopini ipinini. !Imaākatari pētatxi ikara atoko ipinini. Ikinipoko iposo atoko iitopāka iri kikomoni, kotxi iparika ate ikapani iposope. ³Hixinikariko Xesosi. Itene imiteenekari maerekati kamakani manirekakani iua. Hixinikariko iua, ininiā kataparaxinirei hite. Iuusaaki !hiōkapeta.

⁴Hiarēka kona xiketapanika maerekati hitakanapini xika. Ininiā hite kona naiatari maerekati iua Xesosi naiatiniri atoko. ⁵Atxiiti himaxinikaretari Teoso sāpiretakiti ate isikataparaxiniretini ikapani. Iua akiritaua iua anaakori aniniua. Ia isākire:

Namarite, Apiananiri auiritai pite atatsiirauatini atāo inakari pimarotini ikapani, ininiā kona pimatiniuatape iua misiritakasaakii pimaerekani xika.

⁶Kotxi Apiananiri misiritana itiretakini maerekati ikamakasaakina, imaerekani itakanapinina ikapani. Imisiritana ikinimane iua anaakori atāo inakari imarotinina ikapani.

⁷Ininiā himiteenekariko hiri iaxitiliri misiritinii himaerekani xika. Ikara himisiritiko oerekai Teoso anaakori hininiua, kotxi inikatai hite amarini irītxi nīkatini atokokana. Ikini irītxi ikorapokoriti auakari misiritari iua anaakori atāo erekari ikaminina ikapani. ⁸Teoso mamisiritakaniāi hite maerekati hikamakasaaki, ininiā iua anaakori atāo inakani !hitxaua. Teoso hiri !itxaua iuusaaki. Ikinimane Teoso sākire auiākani misiritaāka, maerekati ikamakasaakina. ⁹Akinika ate irītxi aua ikorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari āiri iaxiti auakari imisiritakasaakiaua ate, maerekati akamakasaaki, kotxi axinire

iri itxaua. Ininiã akamakasaakiri aĩri iaxiti auakari nireẽkiti, aãuapininiika atxako. ¹⁰ İkorapokoriti auakani irĩtxi misiritaua maerekati akamakasaaki. Mapakananinani ikara atoko ikamana. İmarotakitina iaõka ikamana. Teoso misiritaua maerekati akamakasaaki ereka anini ikapani iua atoko anini ikapani. ¹¹ Amisiritikosaaki, kona apoxokoniyata, kotxi patsiiri. İuaritika eereka akamari atão inakarinoka. İuasaaki erekaxinireua, kotxi Teoso oerekapekaua atakanapiniri amaerekani imisiritakasaakia.

¹² Ininiã hõkitikari hũuako sãpakakari. Hĩkamataratarari hĩpotoriki iõkapetakari. ¹³ Hõeretariko kimapori atão hĩsini ikapani. İkinika himaerekani hĩtakanapako. Ininiã hĩkamakiti atão inakari aua. Ininiã apanakini hĩte atamatakani !irika hĩte maerekani xika. Ininiã maerekati !ikamana, kotxi hĩte oerekapekana erekari imarotininina ikapani. Ininiã erekapekana ninoa.

¹⁴ İkinipoko hĩkamako apanakinikata himaneenamauatakani ikapani. İkinipoko hĩkamako erekari-noka hĩkamini ikapani. Kãkiti makamakanisaakiri erekari, kona atamatapaniri Apiananiri. ¹⁵ Erepaniko, kotxi atxiĩti kona hãpakapari ikinipoko erekari Teoso siãkiti. Kona hãuiritapiri kapixi inakari aneini hãkixinireẽ, kotxi ikara maxikari kaiãori kãkiti. İtxikotari ninoa ãkixinire. ¹⁶ Kona hãuiritapiri anokaretxi kamakani auini hĩtekata. Kona hãuiritapiri Teoso manirekakiniti kamakari İsaoo atoko inakari auini hĩte sauaki. Merepitipanika iponaniãkari iua İsaoo, txamari isikari iri sikaenetakiti itarimoni axapitiki nipokori apakapini ikapani. ¹⁷ Eereka iuaĩkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. İtxiapata, kotxi mitxi ikamakiti inirekari

imamakini, txamari iposope itarimoni iri sikaenetakiti isikini.

¹⁸ Kitxakapirĩka kãkiti İsaekini sari ixirata Sinai inakorimoni Teoso paniãtakiti apakapinina ikapani. İuasaaki ixirata arika. İpiã, ĩtima kataparari apaka aua iuasaaki. İkara atoko inakari ixiratamoni kãkiti maãtakakitimoni !haãpoka. ¹⁹ İxirata Sinai inakoriãtaã kãkiti kenakotari trõpeta. İkenakotari iaxitikiri sãkire. İuasaaki iteene ipĩkarena auana, ininiã !inirekaikarina inekotininrina apikomoni ikara sãkiretxi. ²⁰ Kotxi iuasaaki !imĩteenekarina ia Teoso paniãtakiti, kotxi iuasaaki Teoso txari: “Kãkiti, pirãtxipeka apaka maãtakiniãri oxiratari, ikiporonakaãkana kai sorõã ipininina ikapani.” ²¹ İua xirata auĩte kamari kãkiti pĩkarauatini. İuasaaki Moisesi txari: “Nititinanaka. İteene nipĩkarauata,” itxa.

²² Hĩte kona apoka oxiratari Sinai inakorimoni. Hĩte apokapeka ixirata auĩte iaxitikiri Sião inakorimoni. Hãpokapeka Xerosareẽ sitatxiti iaxitikirimoni, Teoso ãtipirika auãki inakari sitatxineãtaã. Hĩte apokapeka Teoso nitiriakori iaxitikini apotiitiniãtaãua. Ninoa iaõtiko !auari, kotxi kaiãopokori. ²³ Hĩte apopeka Teoso mereẽkini apotiitiniãtaãua. İpoxokoniuatana. Teoso anaakori itxauana. İuãkana iõkatsopatapeẽkaika Teoso aãtsopateẽ itixineẽ. Hĩte apopeka Teosomoni. İuara sãpiretari kãkiti misiritiko. Apaka iua ĩkitxitana atão inakari kamakani erekari ikamakiti ikapani. Hĩte apopeka erekari kamakanimoni. Teoso txĩkitakana ninoa atão inakari ikaminina. ²⁴ Hĩte apoka Xesosimoni. İuara txĩkitakari Teoso kamaenetakiti amaneri apokini. Xesosi arẽka xiketakasaaki, hĩte apoka Teosomoni. Apeo oxiketari pirãtxi arẽka imaerekani makatxakiko ikapani.

Kristo oxiketari iuaka arēka ātikatika amaerekani imaktxakini ĩkapani, ininiā Kristo arēka apiaerekata.

²⁵ Ininiā erepaniko. Hĭkenakotariko Teoso sākire isākirauatakasaaiki. Kitxakapirĭka kākiti manirekakaniāri Teoso sākire sāpiretakari ĩkorapokoriti auakari, imisiritaākana. Imitekinina !auari. Teoso tixine auakari sākire amanirekakaniā, apiata amisiritiko. Amitekini !auari, ininiā erepaniko. ²⁶ Teoso misākiretakasakiri Moisesi, itixi iakeka. Uatxa Teoso sāpiretari ikamaenetakiti. Itxari: “!uaĭkana niōkokariko itixi. Niōkokariko iaxiti apaka,” itxa. ²⁷ Isākire “!uaĭkana,” kotxi iōkokariko ikinipoko ikamakiti. Ninoa makatxakaākako. Auapitĭkako maiōkokaēetakoni. Ikara kaikotako.

²⁸ Teoso auĭtetxi ininiātaāua, ate sinimoni, !iōkokaāka. !uaātaā ixipokini !auari. Ininiā mapoxokoniua. Masāpiretari iua: “Peerekai pite.” Atāo maparĭkauata Teoso ĩkapani. Makamari iua apokaerekatakiti. Mapaxitari iua. Mapĭkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

Iōkatsopari Mapotōkire Pirena

13 Ininiā hĭtiretakakauako. Itaritxi atoko hĭtxako, kotxi Teoso anaakori hĭtxaua. ² Ātiātaā ĩkani apokiniā, hāpakapanako ninoa haāpoko. Apanakini apakapakasaakina ātiātaā ĩkani, apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. ³ Hĭtiretanako Teoso sākire auĭākani kateia āki auakani. Kateia āki ninoakata hāuini atokokana, hĭxinikanako ninoa. Ininiā hĭtiretanako misiritakoni. Kākiti misiritiniāi hĭte, iuasaaki hinirekari apanakini

tiretinii. Iua atokotxikana hĭtiretanako misiritakoni.

⁴ Hĭpaxitaroko āti ĩtanoro. Hĭpaxitariko āto ĩtaniri. Pĭtanirikatanani pisirĭkako. Pĭtanorokatanani pisirĭkako. Teoso misiritanako ĩkinika kanokarero, kanokareri pakini.

⁵ Txineiro !hĭtiretape. !Hinirekapiri āti kākiti nakiti. Hĭpoxokotariko hĭteka tii, hĭteka txineirote pakini. Apikomoni !hinirekape, kotxi Teoso txari: Nimatakanapapekaniikaraiko hĭte. Ni-

masikapekaniikaraiko hĭte, itxa. ⁶ Ininiā ia Teoso sākire iōkatsopatakori aāuika:

Apiananiri nimoianari itxaua, ininiā kona nipĭkari kākiti kaminiri maerekati notamoni.

⁷ Hĭxinikariko hāuĭteakori Teoso sākire hĭtemoni sāpiretakani. Hĭxinikariko ninoa auini, ninoa ipinini apaka. Hāuikariko Teoso sākire ninoa auikiniri atokotxikana. ⁸ Xesosi Kristo kitxakapirĭka atokotxikana uatxa. Xesosi Kristo uatxa atokotxikana ātipirika.

⁹ Kona hāuikapiri apanakini oerekakiti atāo minakati, kotxi ikini sereti oerekakori atāo minakati auapitika. Hāuiritariko ikinipoko erekari Teoso sikakiti sikataparatiniri hākixinire. Anikakiti !isikataparitari aākixinire, ininiā !hāuikapiri kākiti sāpiretinii apanakini nipokori erekari hĭxinire ĩkapani, apanakini nipokori !erekari hĭxinire ĩkapani.

¹⁰ Sasetotxiakori Teoso aapoko aamata kamakori āki parĭkauatakani Teosomoni sikakori takikoātaā !apakaparinina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auĭte apiatakari anikari pirātxi arēka Teosonani Auini Pakitaātaā. !uaā isikari pirātxi arēka Teosomoni kākiti

maerekani Teoso makatxakini ikapani. Iua pirätxi ito anikaäka aapokotxi mapotökire. Iuaä arikaäka. ¹²Xesosi pirätxi okakori atoko itxa, kotxi anikaäka sitatxi mapotökire okiko ikapani. Ininiä iua arëkaä imakatxakari käkiti maerekani, ikamaerekatina ikapani. ¹³Ininiä masa iuamoni ipininiätaä. Iua napetiko atokokana maäpakapa. ¹⁴Ikrapokoriti kona aua sitatxi maxipoäkati. Aiätapari sitatxi iaxiti ikari.

¹⁵Kipa asika Xesosimoni Teoso ikapani? Ätipirika masikari asäkire erekari. Matxari: “Peerekari Teoso.” Ikara asikakiti Teosomoni, kotxi asäpiretari käkiti iua aäuüte ininiua. ¹⁶!Himaxinikaretapiri erekari hikamini apanakinimoni. !Himaxinikaretapiri himoianatakiniua. Ikara atoko akaminiä, Teosomoni asikakiti inireäkiti atoko itxa, ininiä ikara atoko inakari akaminiä, ikamapoxokonitari Teoso.

¹⁷Hikipitariko hïauüteakori säkire. Hikamariko ninoa paniätakiti, kotxi ninoa nikatari hïxinire. Teoso sikari ikara parikatxi ninoamoni, ininiä äti öti ninoa säpiretari Teoso ikamakitina. Ininiä hikamariko ninoa paniätakiti, ininiä iusaaki ninoa poxokoniuata iparïkauatakasaaki. Himakamakaniäri ninoa paniätakiti, ninoa matnaniuata, ininiä ikara atoko inakari !erekari hïte ikapani.

¹⁸Himisäkiretariko Teoso ate ikapani. Aimarotari aäkinire ereka inini, kotxi

anirekari ikiniötika atäo inakarinoka akamini. ¹⁹Iteene namanaäi himisäkiretiniri Teoso, iua paütiki iokanatinino iuaïkana hïtemoni.

Teoso Misäkiretiko

²⁰Nimisäkiretari Teoso, käkiti kamaerekaxiniretakari. Aäuüte Xesosi ipïkaripeka inakasaaki, Teoso ökitikari iua. Soti aüüte atoko atxaua. Soti aüüte nïkatakari apiari atoko itxa Xesosi, ininiä iua iteene nïkataua. Xesosi ipïkasaaki, iusaaki käkiti apakapari Teoso sikaenetakiti. Ätipirika Teoso sikari ikara isikaenetakiti käkitimoni. ²¹Nimisäkiretari Teoso isikiniri ikinika erekari hinireäkiti hïtemoni, iua nireäkiti hikamini ikapani. Namanaäri iua Xesosi Kristo uäkaä, ikaminua ate iua apokaerekatakiti. Ätipirika käkiti txari Xesosi: “Erekai pite.” Ameë.

²²Nitariakori, iteene hïkenakotariko ikara nisäpiretakiti. Ia niökatsopatakiti xapitinoka.

²³Ninirekari himarotiniri aïtari Tximótxio kateia äki auakari sikakaäka. Mokatanitika iua apokiniä uai, nota sari iuakata hïtemoni. ²⁴Hïsäpiretari hïauüteakori ate xinikamanapitinina ninoa. Hïsäpiretari ikinimane Teoso nakitiakori axinikamanapitinina. Xesosi säkire auiäkani uai Itária tixini auakani xinikamanapitai hïte. ²⁵Ikinipoko erekari Teoso sikakiti aua hïtemoni.

Ameë.

TXIAKO

Txiako Iokanatsopatakiti

1 Nota Txiako. Teoso nitiri nitxaua. Apiananiri Xesosí Kristo nitiri nitxaua apaka. Niökatsopatarí ia aátsopa hitemoni, Xoteoakori tosi nirimanetximoni Xesosí sákire auíákanimoni. Híte iarikape ikinika itixiti.

Ereékai híte.

Auíákori Ataerekatiko

²Nitariakori, ikini sereti maerekati apokasaaki hitemoni, hieneníkako, kotxi ikara ataerekatai híte. ³Kotxi himarotari háuiákiti ataerekatikosaaki, hítaparaxinireritika háua. Himíteenekari imakinika himisiritiko hípoxokoniritika. ⁴Ininiá imakinika himíteenekasaaki, híxinikakiti, híśákire, híkamakiti pakini erekari. Kona apikomoni pinireka ereka pinini íkapani.

⁵Himarore mauakanisaaki, hamanaári Teoso imarore isikinii íkapani. Ininiá isikaiko híte hamanaákiti. Itori Teoso sikakiti ikinimanemoni. !śápaka ate átipirika aamanainiri iua. !Itxitai. Isikapítikari hamanaákiti. ⁶Hamanaákasaakiri, háuikariko Teoso sikinii hamanaákiti. !Erekari híxinikiniri: “Atxiíti iua sikano namanaákiti. Atxiíti kona isikano namanaákiti.” Ikara atoko !híxinikape. Ikara atoko xinikakari, tsakati potxoari uinitikiri atoko itxa. Ítima anikari tsakati itano, eereka íxitika. Kákiti ikara atoko inakari, áti óti auikari Teoso sákire, áti óti kona auikari Teoso sákire. Itxaápota. ⁷Kákiti ikara atoko inakari kona xatiki apakapari Apiananiri siákiti, ⁸kotxi ipi ixinikakiti aua, ininiá apanakini !auikari isákire íkamakiti tíkane.

Matiiti, Katiiri Pakini Poxokoniuatini

⁹Pite áitari Teoso sákire auíákarii, atxiíti poióri pitxaua, iuaritika pipoxokoniuatoko, kotxi Teoso txíkitakai pite apiari pininiu. ¹⁰Pite katiirii, pipoxokoniuatoko, kotxi Teoso kamapoiáotakai pite, kotxi katimari pixipokini áui katimari xipokini atoko. ¹¹Atokatxi kaníkasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana kákiti katiiri xipokini. Paítiki ipinako, ininiá itakanapariko imakinika itii, iparíka pakini.

Misirikaretxi Míteenekakani

¹²Teoso takari erekari kákitimoni imisiritiko míteenekakarimoni, Teoso sákire matakanapakatimoni. Ikinipoko imíteenekasaaki, Teoso txíkitakari iua átipirika auini Teosokata. Apiananiri sikaenetari ikara iua tirketanimoni.

¹³Pinirekasaakiri maerekati pikamini, kona pitxapiri: “Teoso sikanireótano maerekati níkamini,” kotxi Teoso kamanireótiko maerekati íkamini íkapani !auari. Apaka kona Teoso sikanireótari kákiti maerekati íkamini íkapani. ¹⁴Kákiti sikanireótaáka maerekati íkamini, kotxi iua íto nireékiti kosekari iua maerekati íkamini. Iuasaaki iteene inirekari inireékiti íkamini. ¹⁵Maerekati píto nireékiti pikamakasaaki, maerekati itxaua. Ininiá eereka maerekati pikamapika. Eereka iua maerekati txíkitakari pixinire ipinini.

¹⁶Nitariakori nota tirketakini, kona háuiritapiri áti misirienetini. ¹⁷Ikinipoko sikakori erekari atáo inakari, íaxitikiri itxaua. Áiri sikakiti ikara. Iuara kamari atokatxi, kasiri, íóriki pakini ponikini. Iua átipirika kamari erekarinoka. Kita, uatxa, katana pakini, iua atokotxikana áiri Teoso.

¹⁸Aponaniã iuaĩkana aãkixinireẽ, kotxi aãuikari iua sãkire. Iua nirekari aponaniini ikara atoko. Teoso kamari ikinipoko. Ikamakini, merepanika iuaĩkana ponaniãkani, atxaua ate.

Teoso Sãkire Kĩpitiko Pirena

¹⁹Ininiã nitariakori nota tirketakini, iteene himixinikariko ãti sãkire. Eereka iteene hĩxinikariko hĩkenakotakiti, hĩsãkirauatini apisapanika. Katima !hĩtxape hinaiatinua. Hinaiatinua apisa hĩxinikariko hĩkamakiti tikane, ²⁰kotxi kãkiti omanãkarauatakasaaki, !ikamari atão inakari Teoso paniãtakiti iaõka. ²¹Ininiã hõkariko ikinika maerekati hãkixinire txikotakari. Hĩtakanapariko ikinipoko maerekati. Hãuikariko Teoso sãkire hãkixinireẽ takakori. Himarotariko iuanoka makatxakiniri himaerekani.

²²Teoso sãkire akenakotakanani atxa, !hĩtxape. Hĩkamariko isãkire iaõka apaka. Teoso sãkire kenakotakani makamakaniãri ipaniãtakiti, ninoaka misirienetaua. ²³Teoso sãkire kenakotakari makamakaniãri isãkire iaõka, kiki ãtakaãriã atamatoõtakari atoko itxa. ²⁴Iua itoõ atamataka atoko, isa. Iuasaakipeka imaxinĩkaretoõtapekaua. Isanõka !ixinikaika. ²⁵Ikinika Teoso paniãtakiti erekari. Maerekati kamakani iaxirikakoni atoko. !Iposotarina erekari ikaminina. Ininiã kãkiti kamakasaakiri Teoso paniãtakiti, Teoso paniãtakiti sikakari kãkiti erekari ikamini ikapani. Kãkiti iteene imarotiniãri Teoso paniãtakiti, imamaxinĩkaretakaniãri, ãtipirika ikaminiãri, ininiã Teoso takari erekari iuamoni, ikamakitimoni.

²⁶Kãkiti sãpiretiniãri: “Nota auikari Teoso sãkire. Nikamari iua sãkire iaõka,” txamari kãkiti nini iauĩte atoko itxa. !Iposotari iotokakiniri maerekati isãpiretini. Iuaka misirienetaua. Iua auĩãkiti na atão. Ikamakiti na atão apaka. ²⁷Kãk-

iti auĩãkiti atão inakari auakasaaki, ikamakiti atão inakari auakasaaki, aĩri Teoso apokaerekatari. Iua kãkiti kamari ia atoko: Itiretana imenõkariakori, tikinitakoni pakini, kotxi mauareni nino. !Auiritari ikorapokoriti maerekati txikotiniri iua ãkixinire.

Hĩpaxitana Ikini Kãkiti

2 Nitariakori, Xesosi Kristo aãuĩte Apiananiri itxaua. Iua sãkire atão auĩãkani hininiãua, ininiã hĩpaxitariko ikinimane kãkiti. !Apakata hĩpotxitakininani hĩtoretini. ²Maxinikariko. Atxiĩti hãpotiitakasaakiau, kiki apoka eremãkari. Iuakokiã aneo oro kamakoro au. Apaka iuasaaki apoka ãti kiki matiiti. Kitxakari imãka. ³!Apakata hĩpaxitiniri eremãkarinoka. Hĩsãpiretiniãri: “Uai iitopanatxi ereri nopini piitopãka,” pitxari. Txamari hĩsãpiretari matiiti: “Ikiraã pitima.” Atxiĩti hĩsãpiretari iua: “Uai ixiti nikititakote piitopãka,” pitxari. Ikara atoko hĩkaminiã, !apakata. ⁴Ikara atoko hĩkamakasaaki, hĩxinikari katiiri apiaerekatini, matiiti poião ereka inini. Iuasaaki hĩxiniãkiti na atão itxaua. Hãkixinire maerekati itxaua.

⁵Nitariakori nota tirketakini, hĩkenakotariko nisãkire. Teoso merepekari matiini ikorapokoriti auakani isãkire iteene auĩkinina ikapani. Ininiã nino Teoso tirketakani sariko Teoso auĩtetxi ininiãtaãua. Ikara isikaenetapeka iua tirketanimoni. ⁶Txamari hĩte kona paxitana matiini. !Apakata. Katiirinira misirienetai hĩte. Nino anikai hĩte kãkiti misiritiko mereekanimoni. ⁷Nino katiirini misãkirepiretari Teoso. Peerekari iua uãka, iuaritika nino kona paxitari iuãka. Nino misãkirepiretakiti nakitiakori hĩtxaua hĩte.

⁸Kitxakapirika Teoso sãkire iõkat-sopatakori txari:

Piteka pitiretiniua atokokanera, pitiretanako pite takote auakani.

Ikara ikinimane auïte paniätakiti hikaminiä, hikamari atão inakari. ⁹Hitiretiniäri hïpotxitakininani, maerekati hikama. Ikara Teoso paniätakiti oerekai maerekati kamakani hininiäua. ¹⁰Ikinika Teoso paniätakiti hikaminiä, txamari ätinoka Teoso paniätakiti himakamakaniä, ininiä ikinika ipaniätakiti makamakani atoko hitxaua. ¹¹Teoso txari:

Kona pisirïkape pïtanoro minakotokatika.

Apaka itxari:

Kona pokaniuatape.

Atxiïti kona pisirïka pïtanoro minakotokatika, txamari pokaniuata, ininiäkara !pikamari ikinika Teoso paniätakiti. Ätika Teoso paniätakiti pimakamakaniä, !apakata. Ikara atoko ininiä, Teosomoni maerekati kamakari pitxaua.

¹²Teoso säkire iaöka akaminiä, aposotari erekari akamini. Öpoïkakoni atoko atxaua. Maerekati !imaïkaikaua. Ininiäkara atão hïsäkirauatako. Atão inakari hikamako, kotxi Teoso kamariko hïtemoni isäkire iaöka.

¹³Himaamonïkaniäri äti, Teoso kona amonïkai hïte. Imereëri himisiritiko. Apiaerekata hïamonïkiniri äti, maerekati ikamakasaaki. Poiäo erekari himisiritiniri iua imaerekani xika.

Käkiti Säkire, Käkiti Kamakiti Pakini Pirena

¹⁴Nitariakori, käkiti txari: “Nota Teoso säkire auïäkari nitxaua,” itxamari, !ikamari Teoso nirekaäkiti. Atauako iua auikari Teoso säkire? Atauako, iua säkire posotari imakatzakiniri imaerekani Teosomoni isini ikapani? Konapitini. ¹⁵Atxiïti hïtari, atxiïti hïtaro Teoso säkire auïäkani imäkana !auari. Atxiïti nipokori !auari ninoamoni. ¹⁶Iuasaaki atxiïti hitxana:

“Hïsipiniikaua, erekaxinire hinini. Kamäkaiko. Iteene hinikako,” hitxana atxiïti. Txamari iuasaaki mäkatxi !hïsikana, nipokori !hïsikana. Ikara atoko hikaminiä, !apakata hikamakiti. Hïsäkirenanira hïsikiniä, ininiä maxikatiïka hïsäpiretakiti. ¹⁷Atxiïti ikara atoko atxa. Asäpiretari aäuikiniri Xesosi säkire. Txamari kona akamari ipaniätakiti. Ikara atoko aniniä, asäkire kona itxa. Aäuïäkiti säkiretxiti ipinakari atoko itxa. !Kakamareri iua.

¹⁸Käkiti atxiïti txari: “Pite auikari Teoso säkire. Nota parïkauata Teoso ikapani.” Piposotari atxiïti poerekinino pauïäkiti, Teoso paniätakiti pimakamakanisaaki? Kona piposota, kotxi atão pauïäkiti !auari. Notapekana, nota posotari noerekiniri nisäkire nauïäkiti nikamakitiä Teoso paniätakiti nikamakasaaki. Ikara atoko nininiä, käkiti imarotapitikari atão nauikiniri Xesosi säkire. ¹⁹Pite auikari ätinani Teoso auini. Ininiä erekapitikari pauïakiti. Txamari ikara !imatatzakari pimaerekani Teosomoni pisini ikapani, kotxi Satanasi nitiriakori apaka auikari ätinani Teoso auini. Iua xika ninoa titinanaka ipikarauatiniäna. Ninoa imarotari äti öti ixipokinina.

²⁰!Kïkïteï pite. Pinirekatari noerekinii !apakata pisäkireë pauikiniri Xesosi säkire, iua paniätakiti iaöka pimakamakanisaaki. Iuasaaki pisäkire na atão. Ipikari atoko itxa.

²¹Maxinïkariko ate apïka atokirini, Apraäo. Kitxakapirïka isikasaakiri amarite Isaki inakori Teosomoni sikakori takikoätaä, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isäkire, ininiä Teoso kamaerekatari iua. ²²Ininiä himarotari atão iua auikiniri Teoso säkire. Ikamakiti oerekari isäkire atão inini. Hïxinikari iua. Atão ikamari Teoso paniätakiti, ininiä atão iua

auikari Teoso sākire. ²³Ininiā Teoso sākire iōkatsopatakori apokapeka. Itxari:

Apraāo auikari Teoso sākire, ininiā Teoso txīkitakari iua atāo inakari ikamini, Teoso apakapiniri īkapani.

Ininiā iua akiritaāka Teoso moianari. ²⁴Ininiākara ia himarota. Teoso kamaerekatari kākiti ākixinire isākire iaōka ikamakasaaki. Kona Teoso kamaerekatari kākiti ākixinire, isākirenoka auakasaaki. Inirekari atamatiniri kākiti parīka apaka.

²⁵Āto atāo Teoso sākire auīkaro nisāpiretai hīte. Kitxakapirīka kanokarero Haapi inakoro aua. Teoso kamaerekatari oa ākixinire, kotxi oa apakapana Xosoe iokanatakini otixine apokasaakina. Oaāpoko okipatana ninoa. Iuasaaki oa oerekana āti kimaporiti imitekinina īkapani.

²⁶Kākiti ītoā ixinire mauakanisaaki, iua ipīpe. Iua !kakamareri. Ininiā iua atokokana iua sākire iua auīākiti ipinakari atoko, erekari imakamakanisaaki. Iua auīākitinani, isākirenani, !imakatxakari imaerekani.

Kākiti Nini Pirena

3 Nitariakori, !apakata itori hīte Teoso sākire oerekakani hininiua, kotxi ate Teoso sākire oerekakani maerekati akamakasaaki, apiata Teoso misiritaua ate. ²Amakinika ate kerokapanikari. Kākiti makerokakaniāri isākire, ininiā erekari iua. !Auiritari iito kaminiri maerekati.

³Anirekasaakiri kavaro kīpitiniri anireēkiti, atakari inamaā metaoke ipiriāketakari. Ininiā iuasaaki ikamariko anireēkiti. Ia metaoke axapitikeri, iuaritika aposotari akakiriokiniri kavaro, ininiā isari anirekinimoni.

⁴Apaka hīxinikaroko maporo. Maporo mitaro. Ītima kataparari anikaro.

Maporo oerekakire axapitiki, iuaritika kākiti kakiriokaro maporo oerekakireē, ininiā maporo sari kākiti nirekinimoni.

⁵Iua atokokana, aītoā auakari anini apaka axapitiki, iuaritika iposotari iteene maerekati ikamini. Hīxinikariko. Xaminaminiki axapitiki, iuaritika iposotari iotikiniri itori kikio. ⁶Iua atokokana ninitxi. Xamina tirinakari atoko itxa, ininiā kona erekari. Maerekati ninitxi sāpiretakiti. Iarika kākiti xinireē ikinika, xamina itopa iarikini atoko. Ininiā iua maerekatina itxa, ininiā ikinipoko ikamakiti maerekatina. Maerekani misiritikoātaā īkari itxa asākire maerekati. Xamina tirinakari iuaātaākiri atoko itxa asākire maerekati.

⁷Kākiti piratari ikini sereti kaxipiri itopakiri, kotipiriki, imini, iaā auakari pakini. Itori kākiti piratapeka. ⁸Txamari ninitxi paneenamari. Kākiti !iposotari imīkapiiritiniri inini. Kona ikamari anireēkiti. Imini katsiiri atoko itxa. Imini tsi posotari okiniri kākiti. Iua atokokana, kākiti sāpiretakiti posotari okiniri kākiti.

⁹Anini posotari isāpiretiniri erekari aīri aāuītemoni. Apaka iposotari maerekati isāpiretini kākitimoni. Īkora atoko !erekari, kotxi Teoso kamari kākiti iuaka atoko inakari īkapani. ¹⁰Anamaā potorika erekari, maerekati pakini. Nitariakori, ia koketakori na atāo. !Apakata. ¹¹Amomo !oposotari āparaā ponikoāri, posiāri pakini otxīkitakini. ¹²Nitariakori, atauako māka mina iritari iōpeta? Atauako iōpeta mina iritari māka? Konapitini. Apaka amomo āparaā ponikoāri !uari āparaā maxiāri pakini. Iua atokokana kākiti sākire. !Apakata kākiti āti ōti isākire ereka inini, āti ōti isākire maerekati inini.

Imaroretxi Pirena

¹³ Kiripa kimaroreri hīte sauaki auakari? Kākiti atāo kimaroreri inakari, oerekari imarore ikamakiti erekari ikamakasaaki. Erekari ikamakasaaki, !uikaua, kotxi atāo imaroretxi auiniā kākitemoni, !auiritari iua iuikiniua. ¹⁴ Txamari pinīkatiniāri xikoretxi papixiri pākixinireē, piteka nireēkitinani pinirekiniā pākixinireē, kona pitxape: “Kimaroreno nota.” Iuasaaki kona pikipatapiri atāo inakari. ¹⁵ Īkora pimarore !iaxitikirini. Īkorapokoritikirinokara ikara pimarore. Ikara pimarore pīto nireēkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireēkitinani pinirekini auakasaaki, ikara atoko inakasaaki, neenamatzinoka aua, ikini sereti maerekati aua apaka.

¹⁷ Imaroretxi iaxiti ĩkari kona ikara atokoni itxa. Iua imaroretxi imarotakari, erekarinoka ikama. !Inirekari neenamatzxi. Merepitipanika ixinikari apanakini kākiti nireēkiti. Apiananiri nireēkiti ikama. Iamonikari āti. Erekarinoka ikama ātimoni. Apiarimoni isākire atokotxikana isākire poiāorimoni. Ikamakiti isākire iaōka itxa. ¹⁸ Kauaīreri otākikari apanakini imaneenamauatakani, ininiākara itori kākiti kamari atāo inakarinoka.

Īkorapokoriti Auakani Nireēkiti !Hinirekape

4 Neenamatzxi auakasaaki hītemoni, hītxitakakasaakiua, nāpa ikara atoko inakari potorika? Hākixinireē ipotorika neenamatzxi. Hinireēkiti maerekati xika hineenamauata. ² Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītxitakakaua. Hineenamauata.

Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³ Atxiīti Teoso hamanaākasaaki, kona hāpakapari hinirekakiti, kotxi hamanaākasaaki, maerekati hīxinikapanka. Hinirekari hāpakapiniri hamanaākiti hītenani ĩkapani, hītenoka poxokoniatini ĩkapani. Ikara xika Teoso !isikai hinireēkiti.

⁴ Kanokarero, kanokareri pakini atoko hītxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iuasaaki homanatarari Teoso. Hinirekiniāri ĩkorapokoriti auakani nireēkiti, ininiā Teoso mokaiakari hītxaua. ⁵ Kona maxikatīka Teoso sākire iōkatsopatakori sāpiretaua ia atoko inakari:

Erekari Matamatakoti aākixinireē auakari nirekari iteene anirekiniri Teoso turetiniua. Iua !inirekari anirekiniri ĩkorapokoriti auakaninoka turetiniua.

⁶ Teoso sikari iteene erekari atemoni, kotxi Teoso sākire iōkatsopatakori txari: Teoso !apokaerekatari kākiti iuikakaniua. !moianatana ninoa. Kākiti miuikakaniua, ikinipoko erekari isika ninoamoni.

⁷ Ininiā hāuiritariko Teoso hāuīte ininiua. Iua nireēkitinoka hīkamako. Kona hīkamapiri Satanasi nireēkiti. Kona hīkīpitapiri iua sākire, ininiā eereka iua miteka. ⁸ Teosomoni hāpokako, ininiā iua apoka hītemoni. Maerekati kamakani hininiāua, hītakanapariko himaerekani. Kona hāuiritapiri hīuako kaminiri maerekati. Hītepekana, hīte sākire ipinimoni itxa. Hākixinire xinikakiti ipinimoni itxa. Ininiākara hīokanatariko maerekati hākixinire auakari, erekarinoka kaikotini ĩkapani. ⁹ Himatinaniuatako,

hĩtxiapatako iteene, maerekati hĩkamakiti xika. Hĩtakanapariko hĩsiroatini hĩtxiapatini ikapani. Hĩtakanapariko hĩpoxokoniuatini himatinaniuatini ikapani. Ikara atoko hĩkamako, maerekati hĩkamakiti xika. ¹⁰ Apiananirimoni hĩtxariko: “Nimaerekani xika !erekano nota. Minakati nitxaua. !Niposotari erekari nikamini. Piamonikano,” hĩtxariko Teoso. Eereka iua sikataparaxiniretai hĩte.

!Himisäkirepiretapiri Hĩtari

¹¹ Nitariakori, !himisäkirepiretakakapeua. Āti misäkirepiretiniāri āti, kona ipaxitari Teoso paniātakiti. Āti akiritiniāri āti: “Maerekati kamakarii,” akiritari Teoso paniātakiti: “maerekati.” Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹² Teosonokara atāo inakari imarotakari aua. Iuanoka posotari isāpiretiniri kākiti: “Pite kamakiti kona erekari. Pitepekana kamakiti erekari.” Iuanoka posotari ikara atoko ininii, kotxi iuanoka posotari kākiti maerekani imaktxakini. Iuanoka posotari iokanatiniri kākiti imisiritikomoni. !Apakata ikara atoko hĩte ininiri apanakini.

Katana Kamaenetakori

¹³ Atxiīti hĩte txari: “Atxiīti uatxa, atxiīti katana asa sitatximoni. Anapariko ātikanani iuaātaā. Aparikauata itomane txineiro aāpakapini ikapani,” hĩtxama. ¹⁴ Txamari kona himarotari katana auakari tĩkane. Kanatokopa itxa kākiti? Ianii atoko itxa kākiti. Ianii apoka, eereka patimari ixipokini. Ikara atoko kākiti auini. ¹⁵ Apiaerekata hĩsākire ia atoko hinini: “Teoso nirekiniāri, nauapanika ninakasaaki, nikamariko ikara parĩkatxi,” hĩtxako. ¹⁶ Ikara atoko himasäkirauatakaniā,

hĩuikaua, kotxi hĩuikari hĩkamakiti tĩkane. Maerekati ikara atoko inakari. ¹⁷ Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

Katiiri Pirena

5 Hĩkenakotariko nisākire. Ikinika katiirini kapotxinanirini hĩkenakotariko nisākire. Hĩtxiapatako. Hākiripoatako, kotxi itori hātatsiire apokako hĩtemoni. ² Hĩtii paiakapeka. Kapite nikapekari himāka. ³ Hinakiti oro kamakori, pirata kamakori pakini oereēkatapeka. Ikara oerekari hĩkamakiti !apakata. Hĩtii xipokini atoko, hĩte apaka xipokako. Apiata himisiritiko. Maxikatiika hāpotiitari hĩtii, kotxi itixi xipokini ōti apokanapanoka. ⁴ Himarotariko ia. Kākiti hĩte kikioteē parĩkauatakasaaki, himisirienetana ninoa. Na atāo hĩikixitana iparĩkana ĩki. Ininiā ninoa akiritari Teoso. Iuasaaki Apiananiri kaposotiireri kenakotari ninoa sākire. ⁵ ĩkorapokoriti hāuakasaaki, ikinipoko aua hĩtemoni. Hiamotari ikinika hĩito potxitakiti. Kākiti sikari kema auite ito kienatxi, okiko ōti manapi paĩperi inini ikapani. ⁶ Hĩte iokanatapekari kākiti erekarini ipininimoni. Hōkapekana ninoa maxikatiika. Ninoani kona naiatai hĩte, iuaritika hōkana ninoani.

Apiananiri Kanapiriini Hiātapini

⁷ Nitariakori, atxiīti hĩtemoni !katiimari Apiananiri kanapiriini, iuaritika hiātapariko hĩpoxokoniritika, kotxi himarotapitikari āti ōti iua kanapiriini. Hĩxinikariko katakareri. Iua iātapapikari itakare aneini, ikiena iposope inikini ikapani. Iātapari āparaā kipini itakare aneini ikapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hĩtaparaxiniriritika hiāta-

pari, kotxi Xesosi kaiamapeka ikanapiri-
ini. ⁹Nitariakori, kona h̄txitakakapeua.
H̄txitakakiniāua, h̄apakapariko himisir-
itiko. Kākiti misiritiko mereēkari ka-
iamapeka apokini h̄itemoni.

¹⁰Nitariakori, h̄ixinikariko Teoso
sākire s̄āpiretakani, kitxakapir̄ika
auakani, s̄āpiretari Teoso sākire Teoso
posotiireē. Ninoa misiritaāka, iuaritika
ninoa m̄iteenekari imakinika. Ninoa
oerekaua am̄iteenekiniri imakinika.
¹¹Ari, aimarotari Teoso takari erekari
misirikaretxi m̄iteeneēkanimoni.
H̄ixinikari Xo inakori. Iua iteene
atatsiirauata, iuaritika, !itapanapari
Teoso. Atatsiirauataka atoko, Apiananiri
sikari ikini sereti erekari iuamoni, kotxi
katiraōkiri, kaamonikareri itxaua iua.

¹²Nitariakori, “Ari,” hinakasaaki,
“Kona,” hinakasaaki, kona maxikatiika
h̄isākiraumatpe. H̄ikamariko
h̄isāpiretakiti iaōka. H̄ikamaenetakiti
h̄isāpiretakasaaki, kona h̄ākiritapiri
Teoso tixine auakani uāka, kona
h̄ākiritapiri itixi auakani uāka,
h̄isāpiretakiti apanakini atāo imarotini
īkapani. Na atāo h̄isākire ininiā, Teoso
misiritapitikai.

Teoso Misākiretiko Kākiti Īkapani

¹³Hātatsiirauatakasaaki, himisākire-
tariko Teoso. H̄ipoxokiniuatakasaaki,
h̄ixikarauata Teoso īkapani. ¹⁴Āti
amianatakasaaki, h̄ip̄ikapiretanako

kōtākikarerini Xesosi sākire auiākani
Teoso imisākiretinina amianatakari
īkapani. Iuasaaki itakarina ītxi iua
amianatakari nopini Apiananiri
uākaā. ¹⁵H̄āuikiniāri Teoso posotiire
h̄imisākiretakasaakiri Teoso, iua
makananitapitikari iua amianatakari.
Ininiā Apiananiri ōkitikariko iua.
Maerekati ikaminiā, Teoso makatxakari
imaerekani apaka. ¹⁶Ininiā h̄ikerokakiti
h̄isāpiretakakauako. H̄imisākiretariko
Teoso āti īkapani. Ininiā apanakini
misākiretariko Teoso h̄ite īkapani.
Iua atokokana, Teoso tx̄ikitakari
h̄ākixinire ereka inini. Atāo inakarinoka
kamakari sākire kataparari, Teosokata
isākirauatakasaaki, kotxi Teoso
kamapitikari iua amanaākiti iaōka.

¹⁷Kitxakapir̄ika Erfasi inakori, ate
atoko inakari iua. Iua misākiretari Teoso
itapararitika āparaā makipakani īka-
pani. Ikara atoko inakasaaki, āparaā
!likipa ipi āti pakini anokanani, seisi
kasiriti. ¹⁸Iuaikana imisākiretari Teoso
āparaā iuaikana ikipini īkapani. Ininiā
āparaā kipa. Iuaikana itixi iriuata.

¹⁹Nitariakori, āti takanapiniāri atāo
inakari Teoso sākire, h̄ōtākikariko
iua Teosomoni ikanapiriini īkapani.
²⁰Maerekati kamakari takanapiniāri
imaerekani, iua pōtākikasaaki, ininiā
pite makatxakapekari iua ipinini.
Teoso makatxakari ikinipoko maerekati
ikamakiti.

1 PETRO

Merepanika Petro Iokanatsopatakiti

1 Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auiākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Āti uākakata hāuanāta.

²Aīri Teoso mereēi hīte iua nakitiakori hininiua ikapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parīkauata hāxixinireē Teoso nireēkitinoka hīkamini ikapani. Ininiā uatxa hīposotiire aua Xesosi Kristo paniātakiti hīkamini ikapani, kotxi Xesosi Kristo arēka xikepoata hīte ikapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti. ⁴Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini ikapani. Ikara ipotetakiti !ixipoka. !Oerēkata. Auapika. Teoso nīkatari ikara hīte ikapani.

⁵Hīte auikari Teoso sākire, ininiā iposotiire tokapakeētai hīte. Hīte itokapakeētinititika Xesosi kanapiriāko

xipokatxi ōtisaaki. ⁶Ikara himarota, ininiā iteene hīpoxokoniua. Uatxa atxiīti !erekaxinirei hīte, kotxi ikini sereti maerekati apoka hītemoni. ⁷Ikini sereti himaxikiko apoka hītemoni, kotxi iuaaaki Teoso imarotari atāo hāuikiniri iua sākire, himīteenekiniāri himaxikiko. Iuaaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko ikapani, oronoka kaikotini ikapani. Iuaaaki peerekaro. Pakaronero. Iuaritika āti ōti oxipokaākako. Erekaro oro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaki ikorapokoriti, Teoso sāpiretaiko hīte: “Erekari hāuikiniri nisākire, kotxi himīteenekari ikinipoko. Peerekai hīte,” itxaiko hīte. Iuaaaki hīto iotximere auape Xesosi iotximere atokokana.

⁸Hīte kona aōkitapanikari Teoso, iuaritika hītiretari iua. Kona hātamatapanikari, iuaritika hāuikari iua sākire. Ininiā hīte iteene poxokoniua. Kākiti sākireē !apakata hīsāpiretiniri hīpoxokoni. ⁹Hīpoxokoniua, kotxi himaerekani makatxakaākapeka. Ininiā hīxinire !ipinaika, kotxi hāuikari Xesosi sākire.

¹⁰Kitxakapirīka Teoso sākire sāpiretakani nirekamari imarotininina kākiti maerekani makatxakiko. Initarina ikara imarotininina Teoso sākire iōkatsopatakoriā. Iteene apaiaōkarauatana ikara imarotininina ikapani. Ninoa sāpiretari ikara erekari, Teoso āti ōti sikiniri kākiti.

¹¹Inirekarina imarotininina ikara erekari apokini ōti. “Kisaakipa apoka atxiīti? Natokopa itxa apokini?” itxanā-tana. Iuaaaki Erekarī Matamatakoti oerekana ninoa ākixinireēna Kristo atatsiirauatini tīkane. Oerekana ninoa Kristo atatsiirauatini xipoka atoko, ikinimane auīte itxauako. Peerekari

iuaaaki. ¹²Kitxakapirika Teoso sãpiretari ikamakiti tikane isãkire sãpiretanimoni, kona ninoanoka imarotini ikapanini. Ninoa sãpiretari Teoso kamakiti tikane hite ikapani, kotxi uatxa apokaepka ninoa sãkire iaõka. Kitxakapirika Teoso sãpiretari ikamakiti tikane ninoamoni, ate uatxa imarotini ikapani. Teoso iokanapirena erekari sãpiretakani sãpiretapekai uatxa ikara Teoso sãpiretakiti kitxakapirika. Teoso paniãtari Erekar Matamatakoti potorikini itixine uai apokini ikapani. Erekar Matamatakoti posotiireẽ ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotinirina hite imarotakiti.

Ereka Hixako

¹³Ininiã iposope hixako hixinikini atão inakari hikamini. !Hikamapiri maerekati hiito nireekiti. Itene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴Amarini kaminiri iri paniãtakiti atokotxikana, hikamariko Teoso paniãtakiti. Xesosi sãkire himimarotakanisaaki, hikamari maerekati hinireekiti. Uatxa !hikamapinikariko. ¹⁵Hite akiritakari kamari erekarinoka, ininiã iua atokokana erekarinoka hikama ikiniõtika. ¹⁶Teoso sãkire iõkatsopatakori txari: Erekarinoka hikamako, kotxi nota kamari erekarinoka, itxa Teoso kitxakapirika.

¹⁷Himisãkiretari hiri iaxiti auakari. Atãonoka ikaminana ikinimane kãkiti iparikana atamatakasaaki. Ininiã kãkiti kamakasaakiri maerekati, aãri misiritiniri ãti atokotxikana, imisiritari ãti. Himitekini !auari. Hixinikariko, haãpoko atão inakari ikorapokoriti !auari. Teoso tixineẽ aua haãpoko. Ininiã ikorapokoriti hãuakasaaki,

iteene hãpaxitariko Teoso. Hãpikariko iua manirekakiniti hikamini. ¹⁸Mitxi !apakata hãuini, kotxi iuaaaki hikamari hãtokiriakorini sãkire iaõka. Uatxa Xesosi oerekai ãtião hãuini, kotxi iamotai hite, iua nakitiakori hininiua ikapani. Himarotari iamotinii. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹Kristo arẽkaã iamotai hite, kotxi ipikasaaki iamotai hite. Peerekari iua arẽka, kotxi iua arẽka makatxakari amaerekani. Soti auite erekari atoko itxa Kristo. Kona maerekati aua iuamoni. ²⁰Itixi kamiko apisa, Teoso mereeri iua. Iua apoka uai himaerekani imaktxakini ikapani. ²¹Xesosi txikitakai hite auikiniri Teoso auini, kotxi Teoso iuaikana õkitikari Xesosi ipikani sauaki. Iuaaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²²Erekar Matamatakoti oerekaepkai atão inakari, ininiã uatxa hikamari atão inakari. Ikara atoko ininiã, hãkixinire erekari. Ininiãkara atão hitiretari hitariakori. Ininiã iteene hitiretakakauako hãkixinireẽ.

²³Hite xinire iuaikana iponaniãpeka. Teoso sãkireẽ hixinire iponaniã iuaikana. Teoso sãkire auapika. !Ixiipoka. Ininiã iua anaakori hixxaua. Hiri ikorapokoriti auakani xipoka. Hiri iaxiti auakari !ixipoka, ininiã hite iua anaakori !ixipoka apaka. ²⁴Teoso sãkire iõkatsopatakori txari:

Kãkiti katsotati atoko itxa. Katsotati paõtiki ipinini. Iua atokokana patimari kãkiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵Iuaritika Teoso sãkire auapika. !Kaxiporeri,

itxa Teoso sākire iōkatsopatakori. Teoso sākirepitikara sāpiretaākapeka hītemoni, hīkenakotakasaakiri Teoso iokanapirena erekari.

2 Ininiākara hītakanapariko ikinipoko maerekati hīkamakiti. !Himisiriene-tapiri āti. Hīkamariko hīsākire iaōka. !Hīxikotapiri āti. !Himisākirepiretapiri āti. Ikini sereti maerekati kākiti kamakiti hītakanapako.

² Hīnīrekariko Teoso sākire makoketakoti. Tinitxiā imi axapitiri nirekini atokokana, hinirekariko Teoso sākire. Teoso sākire hāpakapakasaaki, himaroāpotari iua, ininiā apiaāpota hāuikiniri iua sākire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiā hīsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kākiti !inirekari iua. Iuaritika Teoso mereēri iua. Teoso tīretakiti itxaua Xesosi. ⁵ Hīte apaka kai atoko hītxaua Teoso aapoko īkapani. Itxīkitakari hīxinire auāki inini, kotxi iua nakitiakori hītxaua. Ininiā, Teoso aapoko atoko hītxaua. Ininiā iua aapoko āki sasetotxi hītxaua, iua īkapani hīparīkauatini. Ininiā hīsikariko iua amanaākiti, iua nireēkiti. Iua apakapariko hīsikakiti, kotxi Xesosi Kristo makatxakepekari himaerekani. ⁶ Teoso sākire iōkatsopatakori txari:

Hātamata. Nitakari kai Siāo sitatxitiā. Iua kai apiari, Teoso mereēkiti. Api-aerekata iua. Iua kai atoko inakari sākire auīākani !ipētauata, itxa Teoso sākire.

⁷ Iua kai atoko inakari itxaua Xesosi. Peerekari Xesosi hītemoni, kotxi hīte auikari iua sākire. Āti iua atoko inakari !auari. Txamari isākire makīpitakani !inirekari iua. Teoso sākire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaāka aiko kamikosaaki, apanakini kai soro maīkakari ininiua īkapani.

⁸ Iuaīkana Teoso sākire iōkatsopatakori txari:

Iua kai xika kākiti mākitita. Iua kai xika kākiti irika,

itxa Teoso sākire. Imākītitana, kotxi !auikarina Teoso sākire. Teoso txīkitakana ninoa irikini, kotxi !auikarina iua sākire.

⁹ Hītepekana, Teoso mereēkini hītxaua. Sasetotxi hītxaua. Hīparīkauata Apiananiri īkapani. Hīte makatxakaāka maerekani sauaki erekarinoka hīkamini īkapani. Teoso nakitiakori hītxaua. Imereēi hīte iua ereka inini kākiti hōerekini īkapani, kotxi ipiā hāuakasaaki, iuara akiritai hīte ipiā hītakanapini īkapani. Itakai ikamaraā atāo inakari himarotini īkapani. Peerekari iua kamara. ¹⁰ Mītxi Teoso nakitiakori !hītxaua. Uatxa Teoso nakitiakori hītxapekaua. Mītxi Teoso !amonīkapanikai. Uatxa Teoso amonīkapekai.

Teoso Nitiriakori Iamotakoni Pirena

¹¹ Nitiretakini, uai itixi hāuakasaaki, āti tixinikini atoko hītxa. Atāo hāapoko Teoso tixine aua. Īkorasaaki hīsaāpota hāapokomoni. Ininiā ikini nixiniriritika nōtākikai hīte himakamaniri maerekati hīito nireēkiti. Hīito nireēkiti hīxinire mokaiaakari atoko itxa. Hīito !inirekari hīxinire nireēkiti. ¹² Teoso sākire mauīākani sauaki hāuakasaaki, ikiniōtika erekarinoka hīkamako. Atxiīti ninoa maxikatīka apoītai maerekati hīkamini, iuaritika iusaaki ninoa imarotari erekarinoka hīkamini. Ininiā Teoso ketotini ōti manapi iua oerekariko atāo inakari ninoamoni. Ininiā iusaaki ixinikarinako erekari

hīkamakiti. Ininiā itxarinako Teoso: “Peerekai pite,” itxana.

Hīkamariko Hīauīte Paniātakiti

¹³Hīkamariko kākiti auītetakini paniātakiti, kotxi Apiananiri nirekari ikara atoko hīkamini. Ikinimane hīauīteakori paniātakiti hīkamako. Hīauīte apiari paniātakiti hīkamako. ¹⁴Hīauīte poiāori paniātakiti apaka hīkamako, kotxi hīauīte apiari paniātana hīauīte poiāorini maerekati kamakani imisiritinina īkapani. Ipaniātana ninoa isāpiretinina erekari kamakani: “Erekapitikari hīkamakiti.” ¹⁵Teoso nirekari hīkaminiri erekari, ininiā iusaaki miīkiteni !ipositari imisākirepiretinii hīte. !Kasākirena iusaaki, kotxi apanakini imarotari erekarinoka hīkamini. ¹⁶Hīpositari ikinipoko hinireēkiti hīkamini, kotxi Teoso sikakai hīte. Iuaritika kona hinirekapiri maerekati hīkamini. Teoso nitiriakori hītxaua, ininiā iua paniātakinoka hīkamako. ¹⁷Hīpaxitariko ikinimane. Hītiretanako ikinimane aītariakori Teoso sākire auīākani. Hīpīkariko Teoso. Hīpaxitariko hīauīte apiari.

Hīkamariko Hīpatrāote Paniātakiti

¹⁸Nitiritxiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. ¹⁹Erekapitikari himīteenekiniri kākiti misiritinii maxikatīika. Himīteenekiniāri, Teoso nireēkiti hīkamini īkapani, erekapitikari. ²⁰Erekari hīpatrāote misiritinii hīte, maerekati hīkamakasaaki. Iusaaki himīteenekiniri himisiritiko kona txīkitakari Teoso apokaerekatinii. Erekari hīkamakasaaki, himīteenekiniāri himisiritiko, iusaaki Teosomoni erekapitikai.

Kristo Misiritiko

²¹Teoso akiritai hīte inakitiakori hininiua īkapani, himisiritiko himīteenekini īkapani. Kristo misiritaāka hīte īkapani, ininiā iua nirekari amīteenekiniri amisiritiko iua misiritiko imīteenekini atokokana. ²²Maerekati !ikama. !Imisirienetari āti. ²³Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴Aamina ipiriāmitakari nopini Xesosi īto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekari anireēkiti maerekati ipīkari atoko inini. Itxīkitakari axinire auāki inini atāo inakaranoka akamini īkapani. Xesosi karo txīkitakaua erekape anini. ²⁵Xesosi himarotini apisapanika, soti auīte pīpinanakakani atoko hītxa. Uatxa hīkanapiriāpeka hīpitikirimoni. Hīxinire nīkatarakimoni hāpokapeka uatxa.

Taniritxi, Tanorotxi Pakini Ōtākikiko Pirena

3 Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Amatakasakirina erekari hīkamakiti, ninoa auikari Teoso sākire. Hīkamakiti erekari txīkitakana auikininina Teoso sākire. Hīsākirenoka !itxīkitakana auikinirina. ²Maerekati himakamakanisaaki ikiniōtika, Teoso iteene hīpaxitiniā ikiniōtika, iusaaki ninoa auikari Teoso sākire atāo inini.

³Apanakini sito xinikapikari oiāko oōeretini, oro oiōā otakini, omāka

ereri oieretakini, oïto ere inini ïkapaninani oxinika. Sito erero !oxinikari ikaranani. ⁴Sito erero oäkixinire ereri apaka. Häkixinire ereri inakasaaki, ikara ereri !ixipokapani. Häkixinire ereri inakasaaki, !hïtxitapiri hïtaniri. Hïkamari iua nireëkiti. Teosomoni apiaerekata häkixinire ereri inini.

⁵Kitxakapirïka sitoäkini ererini, Teoso säkire auïäkani, ikara atoko inakani. Ninoa äkixinire erekari, kotxi ikïpitarina ïtanirina säkire. ⁶Sara inakoro kamari Apraão säkire iaöka. Oa kamari Apraão paniätakiti, kotxi oamoni oa auïte itxaua Apraão. Sara anaakoro atoko hïtxaua atäonoka hïkaminiä, himapïkarauatakaniä.

⁷Hïte taniritxi, iua atokokana hïxinikariko erekari hïkaminana hïtanoro. Hïpaxitaroko hïtanoro, kotxi !katapararo. Oa apaka hïtekata apakapariko Teoso sikakiti erekari. Iua txïkitakai häuapininiika hinini iuakata. Hïtïretaroko hïtanoro, ininiä Teoso kenakotariko himisäkiretiniri iua.

Himisiritiko Pirena

⁸Ia nisäkire mapotökire nisäpïretai. Hïxinikakiti ätika xinikakiti atoko hïtxako. Hïamonïkakauako. Hïtïretariko äti, hïtari hïtïretini atokotxïkana. Hïkamariko erekari ätimoni. !Hïuïkapeua. ⁹Äti kaminiäri maerekati hïtemoni, !hïkamapiri maerekati iuamoni. Äti misäkïrepïretakasaakii, kona hïte misäkïrepïretapiri iua. Äti kaminiäri maerekati hïtemoni, iuasaaki hamanaäri Teoso sikiniri erekari iuamoni, kotxi Teoso paniätai ikara atoko inakari hïkamini, erekari Teoso sikakiti hïte apaka apakapini ïkapani. ¹⁰Teoso säkire iökatsopatakori txari:

Pinirekiniäri pauini ereka inini, pinirekiniäri ikiniötika pipoxokoniuatini, !pauiritapiri pisäkire

maerekati inini. !Pimisïrienetapiri äti.

¹¹Pinirekiniäri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko käkiti auini ereka inini.

¹²Apïananiri nïkatari käkiti atäo inakari kamakani. Teoso imisäkïretakasaakina, Teoso kenakotapitïkari isäkïrena. Txamari Apïananiri misiritari maerekati kamakani, itxa Teoso säkire kitxakapirïka.

¹³Erekari hïkamakasaaki, käkiti !nïrekari imisiritinii. ¹⁴Atäo inakari hïkamakasaaki, käkiti misiritiniäi, häpakapariko erekari Teoso sikakiti. Ininiä !hïpïkapena ninoa. Maerekaxiniretinoka !hïtxape. ¹⁵Häkixinireë hïtxako: “Teosonoka nïauïte. Apïananiri itxaua. Iua nireëkitinoka nikamako.” Ikara atoko hïtxako. Häpaiaökari Teoso säkire, isäkïre iteene himarotini ïkapani. Ininiä käkiti pimainiäi: “Kinirepa häuïkari Teoso säkire?” Iuasaaki himarotari häpakapapïretiniri iua. Häpakapapïretakasaakiri iua, !hïtxitapiri. Hïpaxitariko iua iuasaaki.

¹⁶Hïsäkïrauatakasaaki, !hïsäpïretapiri häkixinire manïrekakiniti. Hinïrekariko erekari häkixinire nireëkiti hïkamini. Apanakini misäkïrepïretai. Ninoa atamatakasaakiri erekari hïkamakiti Kristo paniätakiti, ipëtari imisäkïrepïretinii. ¹⁷Teoso nïrekiniäri hätatsïrauatinerekarini hïkamini xika, ininiä erekari, kotxi iuasaaki hïkamari erekari. Txamari hätatsïrauatinäi himaerekani hïkamini xika, !erekari, kotxi iuasaaki hïkamari maerekati.

¹⁸Xesosi Kristo ipina käkiti maerekani imaktxakini ïkapani. Iuasaaki iposope imaktxakiniri käkiti maerekani. Iuaïkana !atatsïrauataika käkiti maerekani imaktxakini ïkapani.

Erekarinoka kamakari ipīpe maerekati kamakani ikapani. Ipīpe, Teosomoni ate anikini ikapani. Iito ipīpe, iuaritika Erekar Matamatakoti txikitakari iua iuaikana auāki inini. ¹⁹Iuasaaki Erekar Matamatakoti posotiireē isari ipīkani auiniātaāmoni. Iuaā kateia āki ipīkani aua. Iuaā isāpiretana Teoso misiritinina ninoa, kotxi iuaka kāiata. ²⁰Kitx-akapirīka ninoa ipīkani, auākipanika inakasaakina, !inirekarina Teoso paniātakiti ikaminina. Iuasaaki Noee kamanātari maporo. Teoso iātapana imaerekanina itakanapinina ikapani. Txamari !itakanaparina. Iuasaaki poiāonoka !ipina. Oitonoka !ipina, xirataātxi apokasaaki. Teoso nikatana ninoa imapinakani ikapani. ²¹Ikara xirataātxi hīpatxisatiko atokokana. Hīpatxisatiko oerekari kākiti, Teoso makatxakapekai himapinakani ikapani. Hīpatxisataāka hītoākiri txiko makatxakiko !ikapanini, kona maerekati hīkamakiti makatxakiko ikapanini. Hīpatxisatikosaaki, hītxari Teoso: “Nākixinireē ninirekari nikaminiri ikinika pite nireēkiti iaōka,” hītxariko. Xesosi iuaikana ōkitikasaakiaua, imaktxakai himapinakani ikapani. ²²Iua kanapiriā Teoso tixinemoni. Uatxa iri kikomoni iitopāka. Iuaā Teoso nitiriakori, auītetxiakori, kaposotiirerini pakini auīte itxaua. Ninoa ikinika kamari Xesosi paniātakiti.

Hīkamariko Ikinipoko Teoso Nireēkiti

4 Xesosi atatsiirauata iitoā hīte ikapani. Ininiā hinirekariko Xesosi xinikakiti iaōka hīkamini. Ikara atoko hinirekiniā, hīxinikakiti sikataparatarī hākixinire. Kākiti atatsiirauatakasaaki iitoā, !inirekaikari maerekati ikamini. ²Ininiākara ikorapokoriti auakasaaki, !inirekaikari maerekati iito nireēkiti ikamini. Ikamari Teoso nireēkiti

iaōka ikiniōtika. ³Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikini sereti maerekati hīkama iuasaaki. Iuasaaki hīkamari ikini sereti hīto nireēkiti. Hinirekari āti kākiti iito. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteesonetari kākiti kamakiti, Teoso mauiritakiniti.

⁴Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰Hīkinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iuasaaki Teoso nitiriakori erekarini hītxaua. Hīsikariko ātimoni ikini sereti erekari Teoso sikakiti. ¹¹Hīsākirauatakasaaki,

hīsāpiretariko Teoso sākire kākitemoni. Himoianatakasaakiri āti, himoianatariko Teoso posotiireē, ininiā iusaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹²Nitiretakini, Ihītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³Iusaaki hīpoxokoniuatoko, kotxi Xesosi atatsiirauatape, ininiā hīte apaka atatsiirauatako. Xesosi kanapiriākasaaki, peerekari iusaaki. Hīte atamatariko ikara, ininiā iusaaki iteene hīpoxokoniua. ¹⁴Kākiti xinitakasaakii hīte, Kristo nakitiakori hininiua xika, hīpoxokoniuatoko, kotxi iusaaki himarotari Teoso aua hītekata. Himarotari Erekarī Matamatakoti aua hākixinireē. ¹⁵Kokaniri, kiitiriri, maerekati kamakari, aāpirena kamakari pakini !hītxapeuako. Ikara atoko inakari hininiāua, apakatapitika hātatsiirauatini, kotxi hātatsiirauata maerekati hīkamini xika. ¹⁶Iuaritika hātatsiirauatiniā Xesosi sākire hāuikini xika, ininiā iusaaki erekapitikari. !Hīpētauatape. Hītxariko Teoso: “Peerekai pite, kotxi Xesosi nakiti nitxaua,” hītxako. ¹⁷Apokapeka Teoso anaakori misiritiko ōti. Merepanika Teoso misiritari iua anaakori imaerekanina xika. Teoso misiritiniāua ate isākire auiākani amaerekani xika, ininiā Teoso iokanapirena erekarī manirekakani mitekini !auari. Iteene imisiritana ninoa. ¹⁸Kitxakapirīka Teoso sākire iōkatsopatakori txari: Pamimari atāo inakari kamakani sini Teoso tixinemoni. Ininiākara

Teoso manirekakani mitekini, maerekati kamakani mitekini !auari. Imisiritaākapitikanako, itxa Teoso sākire. ¹⁹Apanakini atatsiirauata, kotxi Teoso nirekarī atatsiirauatini. Ikara atoko hātatsiirauatiniā, iuaritika erekarī hīkamapanikako. Hāuikariko ikinipoko kamakari sākire, kotxi iua kamari ikinipoko isākire iaōka.

Kōtākikarerini, Ātokoriakori Pakini

5 Kōtākikarerini nitxaua nota, ininiā nōtākikai hīte kōtākikarerini. Nota atamatarī Kristo misiritiko. Ikanapiriākasaaki, natamatarī iua iotximere ikinimane auīte inakasaakia. ²Ininiā nota ōtākikai hīte. Hinīkatanako Teoso sākire auiākani ereē. Soti auīteakori ipitikiri nīkatini atokokana, hinīkatana. Hīsāpiretanako Teoso sākire, kotxi ikara sikakienatarī ninoa ākixinire. Teoso sikana ninoa hītemoni hinīkatinina īkapani. Atāo hinirekariko hinīkatinina ninoa. Kona hītxape hākixinireē: “!Ninirekarī ninīkatinina ninoa, iuaritika ninīkatana, kotxi ikara nīparīka.” Kona hīxinikapiri ikara atoko inakari. !Hīparīkauatape txineiro hāpakapini īkapani. Hīparīkauatako apanakini himoianatini īkapani. ³Ninoa auīte atoko !hītxapeua. Teoso sikana ninoa hītemoni hinīkatinina īkapani, soti auīteakori ipitikiri nīkatini atokokana, ininiā erekarī hīkamako, hīte kamakiti iaōka ninoa kamini īkapani. ⁴Ininiā ipitikiri apiari apokasaaki, Xesosi apokasaaki, hāpakapariko hīparīka īki. Iusaaki hāpakapariko saporīēta atoko inakari. Ikara Teoso sikakiti peerero, ininiā ikara apakapakani auapininiika. Atamatapikarīna Teoso iotximere. Iusaaki erekarī hāpakapakiti !ixipoka. ⁵Hīte ātokoriakoripekana, hīkamariko aneēkani paniātakiti. Hīkinika, himoianatakakauako.

!Hüikapeua, kotxi Teoso säkire iökatsopatakori txari:

Teoso iotokakari iukakaniua kaminiri inireëkitina. Iua sikari ikinipoko erekari miukakanuamoni.

Itxa Teoso säkire. ⁶Ininiã hîteka poiãotakauako, kotxi Teosonoka kaposotiireri. Iketo manapi Teoso iukai hîte, erekari hikamakiti isäpiretiniri ikinimane. ⁷Maerekaxiniretinoka hinakasaaki, imakinika himaerekaxinire hisäpiretariko iua. Hisikariko himaerekaxinireni iuamoni, kotxi iua tiretai.

⁸Kona hikamapiri hiito nireëkiti. Araökire hitxako, kotxi himokaiakari Satanasi inakori äkiti monökori atoko itxa. Isaãpota initiniri ikiena. ⁹Satanasi apokasaaki hitemoni, iteene häuikariko Teoso säkire. Iuasaaki hitaparaxinireritika häuako. !Himitekape. !Hikamapiri inireëkiti. Himarotari hitariakori ikini itixiti auakani atatsiitiniri imisiritikona hîte atatsiirauatini atoktxikana. ¹⁰Hîte atatsiirauatako poiãonoka, eereka Teoso parika häkixinireë iposope ikamini. Iua sikataparaxiniretai. Itene häuikari Teoso säkire iuasaaki. Satanasi

liposotari itxikitakinii maerekati hikamini iuasaaki. Teoso, ikinipoko erekari sikakari, kamari ikara atoko inakari hîte ikapani. Iua akiritai itixine hisini, ätipirika häuini ikapani, iua iotximere ätipirika hätamatinii ikapani, kotxi Kristo Xesosi nakitiakori hitxaua. ¹¹Ätipirika ikinimane txari iua: "Peerekai pite." Ätipirika ikinimane auite itxaua. Ameë.

Petro Takapiretanapini

¹²Sírası moianatano ia niökatsopatakiti axapitiri niökatsopatini hîte ikapani. Iua aítari. Iua iteene auikari Xesosi säkire. Niökatsopata hîte nisikataparaxiniretini ikapani. Ninirekari himarotiniri atão asäpiretinii erekari Teoso sikakiti pirena. !Hitakanapapiriko erekari Teoso sikakiti hitemoni. ¹³Teoso nakitiakori, Papirónia sitatxiti auakani, xinikamanapitai hîte. Teoso mereëna ninoa hîte imereini atoktxikana. Marko, namarite atoko inakari, xinikamanapitai hîte apaka. ¹⁴Haökítakakasaakia, himaratakakauako, kotxi hitiretakakaua. Teoso kamaerekaxiniretai hîte Kristo Xesosi säkire auiäkani. Ameë.

2 PETRO

Petro Iuaikana Iokanatsopatakiti

1 Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hitemoni, kotxi hite auikari Xesosi Kristo sākire, ate auikiniri atokotxikana. Peerekari iua sākire aauikini. Aauikari iua sākire, kotxi atāonoka kamakari itxaua. ATeosone, amaerekani makatxakakari itxaua Xesosi Kristo.

²Himaroāpotakasaakina Teoso, aauite Xesosi pakini, hāpakapari ikinipoko erekari ninoa sikakiti. Itori hāpakapa. Ninoa iteene kamaerekaxiniretai hite.

Erekari Akamini

³Teoso posotiireē isikaua imakinika anireēkiti ikorapokoriti aauini ikapani, Teoso paniātakiti akamini ikapani. Aāpakapari iua posotiire, iua aimarotakasaaki. Iua akiritaua iua nakitiakori aniniua ikapani. Aāpoka iuamoni akiritakasaakiaua, kotxi peerekari iua. Aāpoka iuamoni, kotxi erekarinoka ikama. ⁴Ikara atoko ininiā, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminaua. Teoso nirekari ikara atoko ikaminiāua, atāo inakarinnoka akamini ikapani, atāo inakarinnoka Teoso kamini atokotxikana. Kristo sākire mauiaikani nirekari maerekati iitona nireēkiti ikaminina. Hite !nirekaikari ninoa nireēkiti iaōka hikamini, ininiā ikara maerekati !nokai hite.

⁵Ininiā ikinika hākixinire taparaā hāuikariko Teoso sākire. Hāuikiniāri Teoso sākire, hikamariko erekarinoka. Erekarinoka hikaminiā, hinirekariko Teoso sākire iteene himarotini. ⁶Iteene himarotiniāri Teoso sākire,

hiito auite hitxauako. Hiito auite hininiāua, himiteenekariko himisiritiko. Himisiritiko himiteenekiniā, hikamariko erekari Teoso kaminiri atokokana. ⁷Hikaminiāri erekari Teoso kaminiri atokokana, hitiretanako hitariakori, Teoso sākire auiaikani. Hitariakori, Teoso sākire auiaikani, hitiretiniā, hitiretari ikinimane. ⁸Ikara atoko hininiā, ikara atoko apiaāpotiniā, aauite Xesosi Kristo himarotakasaaki, erekari hiparika iua ikapani. Iuasaaki makamareti atoko !hitxapeuako. Himinariko ito kākiti Kristomoni isākire auikinina ikapani. ⁹Ikara erekari mauakaniā hitemoni, mōsiāreni atoko hitxaua. !Himarotari atāo inakari. !Hixinikari Teoso kamakiti katana. Himaxinikaretapekari Xesosi makatxakiniri himaerekani mitxi hikamakiti.

¹⁰Ininiā nitariakori, ikara atoko !hitxapeko. Hikamariko ikinipoko Teoso paniātakiti, ininiā iteene himarotari Teoso akiritinii inakitiakori hininiua ikapani. Iuasaaki himarotari Teoso mereinii hite iua anaakori hininiua ikapani. Ikara atoko inakari hikaminiā, !hikamari maerekati. ¹¹Ikara atoko hikaminiā, Teoso ipoxokoniritika apakapai hite aauite Xesosi Kristo auitetxi ininiātaāua hāuini ikapani. Iuaā Xesosi, amaerekani makatxakakari, ātipirika ikinimane auite itxauako.

Atāo Inakari Teoso Sākire

¹²Ninirekari ikara noerekakiti ātipirika nisāpiretini. Himarotapekari ikara noerekakiti, iuaritika iuaikana nisāpiretai. Hite imarotari ikara noerekakiti atāo inini, iuaritika kona nitakanapari ikara nisāpiretini. ¹³Nota auapanika ninakasaaki, notamoni atāopitika nitxikitakinii hite ikara noerekakiti hixinikini. ¹⁴Kotxi nimarotari paṭitiki nipinini.

Aãuïte Xesosi Kristo oerekepekano païtiki nipinini. ¹⁵Ininiã uatxa Teoso säkire nisäpiretapikai, ininiã kona himaxinïkaretari noerekakiti nipïkasaaki.

¹⁶Asäpiretai aãuïte Xesosi Kristo posotiire. Asäpiretai iua iuaïkana kanapiriini. Ikara asäpiretakiti hïtemoni kona kãkiti säkireni. Kona kãkiti kimarorerini xinikakitini asäpiretai. Atão inakari ate säpiretai hïte, kotxi ateka atamatari Xesosi ikinimane auïte ininiua. ¹⁷Aïri Teoso oerekari iuikini iua. Oerekari iua ereka inini, kotxi itxari iua: “Ere namarite, nitiretakiti. Iua iteene kamapoxokonitano,” itxa Teoso kaposotiireri. ¹⁸Ateka kenakotari ikara Teoso säkire, itixineë isäkïrauatakasaaki. Iuusaaki ate aua Xesosikata õtanoxiratarari Teoso nakiti nopini.

¹⁹Ininiã aimarotapitikari Teoso säkire säpiretakani säpiretakiti kitxakapirïka atão inini. Himixinïkariko ninoa säpiretakiti. Ninoa säpiretakiti tirikapi ipiã iopinikini atoko itxa, kãkiti sinimoni atamatini ïkapani, kotxi axinïkasaakïri ninoa oerekakiti, aimarotari atão inakari, atão minakati pakini. Teoso säkire säpiretakani säpiretakiti hïxinïkiniritika Xesosi kanapiriãko. Iuusaaki iua txïkitakai Teoso iteene himarotini. Iuusaaki atokatxi ponikini atoko itxa Xesosi apokini. Iõriki ïkanõkapanika pokïkini atoko itxa iuusaaki Xesosi apokini. ²⁰Merepanika ninirekari iteene himarotiniri Teoso säkire säpiretakani säpiretakiti Teoso säkire iõkatsopataroriã. Kona ninoa säkireni. Kona ninoa xinikakitini. ²¹Kitxakapirïka Teoso säkire säpiretakani kona iõkatsopatarari kãkiti nireëkiti säkiretxiti. Erekari Matamatakoti txïkitakari kãkiti Teoso nakitiakori säpiretiniri atão inakari Teoso säkire.

Atão Minakati Oerekakani

2 Kitxakapirïka Teoso säkire säpiretakani auakasaaki, auari apaka atão minakati oerekakani. Iua atokotxikana uatxa aua atão minakati oerekakani hïte sauaki. Kãkiti mimarotakanisaakïri, oerekari atão minakati. Kona erekari ninoa oerekakiti. Na atão ninoa oerekari Teoso säkire. Ninoa !auikari Apiananiri ipinini kãkiti ïkapani Teoso ïkitxitini ïkapani. Ikara xika mokatanitika Teoso xipokanako ninoa. ²Itori kãkiti aukari isäkïrena, ininiã ikamarina ninoa kamakiti atokokana. Ikamarina maerekati iïtona nireëkiti, maerekati ninoa kamini atokotxikana. Ininiã ikara xika, apanakini misäkïrepiretari Teoso säkire atão inakari auikiko. ³Kapotxinanirini ninoa atão minakati oerekakani. Isäkïrena atão minakati xika, imisirienetai. Ninoa nireëkiti iaõka ikaminiina hïte. Kitxakapirïka Teoso säpiretapekari imisiritinina ninoa imaerekanina xika. Ixipokinina õti païtiki apokapitikako. Teoso !imaka. Ninoa xipokini õti apokapitikako.

⁴Teoso nitiriakori iaxiti auakani kamakasaakïri maerekati, imisiritana. !Auiritana imitekinina. Iokanatana maerekani misiritikoãtaã. Iuaã itakana kateia äki ipiã. Iuaã iãtaparina Teoso misiritinina ninoa imaerekanina xika.

⁵Kitxakapirïka Teoso xipokari ikinimane kãkiti iua nireëkiti manirekakani xirataãtxiã. Teoso !auritana ninoa mitekini. Noe, apikomoni setxi kãkitikata nïkataãka. Ninoanoka !xipokaãka. Iua nïkatari Noe, kotxi atão inakari säpiretakari itxaua.

⁶Apaka ixipokari Sotoma sitatxiti auakani, Komoha sitatxiti auakani pakini arikatxiã. Atapaninoka kaikota iuusaaki. Ininiã ikara pinitari kãkiti

Teoso nireēkiti manirekakani. ⁷Iuasaaki Teoso makatxakari Aroo inakori imapinakani ikapani, kotxi erekari kamakari itxaua. Maerekati kamakani txikitakari Aroo matinaniuatini, kotxi ikiniōtika iua atamatari maerekati ninoa kamakiti, maerekati ninoa ito nireēkiti. Itxiko atoko itxa ninoa kamakiti. ⁸Aroo, atāo inakari kamakari, aua ninoa sauaki. Ikiniōtika atamatari maerekati ninoa Teoso paniātakiti manirekakani kamakiti. Ikiniōtika ikenakotari maerekati ninoa sāpiretakiti. Ininiākara ākixinireē Aroo maerekaxiniretinoka itxa ninoa maerekani xika, kotxi iua ākixinireē inirekari atāo inakarinoka ikamini.

⁹Ikara atoko ininiā, Apiananiri imarotari iua nireēkiti nirekakani imaktxakini imisiritikosaakina. Iua apaka imarotari imisiritiniri atāo minakati kamakani uatxa. Apaka imarotari imaikinina ninoa, kākiti misiritiko sāpiretiko ōtisaaki imisiritinina ikapani. ¹⁰Iteene Teoso misiritari kākiti, maerekati iito nireēkiti kamakani. Ninoa maerekani txikotari ninoa ākixinire. Apaka iteene imisiritari auītetxi paniātakiti makamakani.

Ninoa atāo minakati oerekakani iteene iuikaua. !Ipaxitarina āti. !Ipikarina imisākiirepiretinirina iaxiti auakani. ¹¹Teoso nitiriakori iaxitikini iteene kaposotiireni. Apiataparatanana ninoa. Iuaritika Teoso nitiriakori !apoitana ninoa atāo minakati oerekakani. !Imisākiirepiretana Teoso apisatoō.

¹²Ninoa atāo minakati oerekakani misākiirepiretari ikinika imimarotakininitina. Kaxipiri itopa auakari atoko itxana, kotxi ikamarina iitona nireēkitinoka. Kaxipiri itopa auakari iponaniā, eereka imaikaāka, oka inaāka. Iua atokokana ninoa atāo minakati

oerekakani xipokaākako imaerekanina xika.

¹³Ininiā ninoa misiritaāka, kotxi na atāo ninoa kamakiti. Kona ikanōkananini ikamarina maerekati. Ipotxitarina maerekati iitona nireēkiti ikaminina pokamara, ikinimane atamatini ikapani. Ninoa kamapikari maerekati, iuaritika apotiitauana hitekata kiiniri Teoso ikapani hika-makasaaki. Ininiā apanakini !auikari hite sākire ninoa maerekani xika. Itxiko mākatxi kasarori nopinikiri atoko itxana ninoa. Karōtxi kākiti toōā auakari atoko itxana ninoa. ¹⁴Inirekapikarina sito itanoro minakotokatika isirikinina. Kona iposotarina iotokakinirina maerekati ikaminina. Anikarina kākiti mataparaxinireni, maerekati ikaminina ikapani. Kapotxinanixinirena ninoa. Ininiā Teoso misiritapitikanako ninoa. ¹⁵Ninoa osipikari kimapori atāo inakari. Ipīpinanakana. Ikamarina maerekati Paraāo inakori maerekani atokokana. Iua Paraāo, Peoo inakori ākiri. Kitxakapirīka aua. Iua nirekaro txineiro maerekati ikamini ikapani. ¹⁶Txamari ipira txitari iua imaerekani xika, kotxi Teoso txikitakari poho sākirauatini kākiti sākirauatini atokokana. Ininiā ipira iotokakari iua atāo minakati sāpiretakari kaminiri maerekati miikiteti.

¹⁷Ninoa atāo minakati oerekakani !liposotari ikaminirina ikamaenetak-itina. Aariko āparaā mauakiniti atoko itxana. Kākiti nirekari āparaā, txamari !uari. Katxiāri itima anikakiti atoko itxana ninoa. Kākiti nirekari āparaā kipini, txamari !ikipa. Teoso mereēri ip-iaātaā ninoa ātipirika kaikotini ikapani. Kākiti atamarauatini iuaātaā !uari. ¹⁸!Kiikiteri ninoa sākire. Iuikauana isākirauatakasaakina. Isāpiretarina kākiti, erekari akaminiri aīto nireēkiti. Ininiā isikanireōtari kākiti ikara

maerekati ikamini. Imisirienetarina Teoso sākire poiāopanika auīākani. Ninoa !okananipanikani auikari Teoso sākire. !Okananipanikani imarotarina atāo inakari. Atāo minakati oerekakani sikanireōtana ninoa ikara maerekati ikaminina.

¹⁹ Itxana: “Kateia āki auakani atoko hītxaua. !Erekari ikara atoko hinini. Hīkamariko hinirekakiti. Ininiā ikara atoko hīkaminiā, hisikakaāka,” itxana. Txamari ninoaka kateia āki auakani atoko itxauana, kotxi ninoa !iposotari itakanapinirina imaerekanina. Imaerekanina iauītena itxaua, kotxi ikamarina imaerekanina paniātakinoka.

²⁰ Mitxi ninoa imarotari Apiananiri Xesosi Kristo sākire, kākiti maerekani makatxakakari sākire. Iuasaaki ninoa iotokakari ikaminirina Xesosi sākire mauīākani kamakiti, kākiti xinire maerekati inini txīkitakakari. Txamari eereka iuaīkana ikamarina ikara maerekati. Eereka !iposotaikarina ikara maerekati itakanapinina. Ininiā uatxa apiata imisiritikona.

²¹ Erekamariko atāo inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso paniātakiti, iua iokanatakini sāpiretakiti. Uatxa ninoa misiritiko apiata. ²² Atāopitikara kitxakapirīka sākiretxiti:

Anāpa kanapiriā okanakakitimoni onikiniri ikapani. Irari ipitikiri arokakito kanapiriā iāropemoni osirīkini ikapani.

Ininiā iuaīkana ninoa atāo minakati oerekakani kamari maerekati, mitxi ninoa takanapakiti.

Apiananiri Kanapiriini

3 Nitiretakini, mitxi niokanat-sopatapeka hītemoni. Iuaīkana niōkatsopatari ia aātsopa. Imakinika niōkatsopata, kotxi ninirekari hīte

iuaīkana hīxinikiniri erekari mitxi himarotakiti. ² Ninirekari hīxinikiniri Teoso sākire sāpiretakani sākire kitxakapirīka, kotxi Teoso nakitiakori itxauana. Apaka ninirekari hīxinikiniri ate paniātakiti, kotxi Apiananiri iokanatakini atxaua. Kākiti maerekani makatxakakari iokanatakini atxaua.

³ Merepanika himarotariko ia: Imapotōkire ōti takote auako kākiti Teoso sākire napetakani. Ninoa kamari maerekati iitona nireēkiti. ⁴ Ia atoko itxanako: “!tapani iua? ‘Nikanapiriāko,’ itxa iua. Txamari kona apoka. Aātokiriakorini ipīkasaakipanika, itixi kamikosaakipanika iuatxikana. Mitxi itixi, uatxa iuatxikana,” itxana.

⁵ Ninoa nirekari imaxinīkaretinirina Teoso kamakiti kitxakapirīka auakari, kotxi Teoso txīkitakari iaxiti apiko nopinixiti auini isākireē. Apaka ikamari itixi āparaā kamakori. Ikamari itixi āparaā sauaki. ⁶ Apaka ninoa maxinīkaretari ia: Teoso iokanataru iua āparaā, ininiā xirataātxi xipokari itixi mitxi auakari, ikinimane kākiti iuasaaki auakani apaka. ⁷ Uatxa isākireē inīkatari iaxiti apiko nopinixiti, itixi pakini arikatxi xipokiniri ikapani. Imakinika inīkatiniritika Teoso manirekakani misiritiko isāpiretako. Iuasaaki ninoa xipokaākako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinīkaretapiri ia nisākire: Teosomoni āti ōti, mio anokanani atokotxikana itxa. Iuamoni mio anokanani, āti ōti atokotxikana itxa.

⁹ Apiananiri kamapitikari ikamaenetakiti. Apanakini kākiti xinikari !kati-mari ikaminiri ikamaenetakiti. Kona ikara atokoni. Iātapari kākiti auikiniri isākire, kotxi !inirekari kākiti sini imisir-itikomoni. Inirekari ikinimane takanapiniri imaerekani.

¹⁰ Apiananiri kanapiriākasaaki, kiītiriri ikanōka apokini atokokana.

Iua apoka kākiti mimarotakanisaakiri. Iuasaaki iaxiti apiko nopinixiti ereēkoka itaparakieneritika. Iuasaaki ikinipoko xipokaāka arikatxiā. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiākara natokopa itxa hāuini ikiniōtika ereka hinini? Erekarinoka hīkamako ikiniōtika, kotxi iua nakitiakori hītxaua. Teoso nireēkitinoka hīkamako ikiniōtika.

¹² Iuasaaki hiātapari hīpoxokoniritika Teoso keto apokini. Iteene hinirekariko ikara ōti apokini. Iuasaaki iaxiti apiko nopinixiti xipokaāka arikatxiā. Ikinika iākokako kapatakari xika. ¹³ Iuaritika aiātapari iaxiti apiko nopinixiti amaneri, itixi amaneri apaka atāo inakari kamakani īkapani. Ikara atoko inakari Teoso sikaenetakiti.

¹⁴ Ininiā nota tirketakini, hinirekasaakiri Xesosi kanapiriini ōti apokini, iteene hīparīkauatako maerekati himakamakani īkapani. Ininiā iua kanapiriākasaaki, iua imarotari himakamakaniri maerekati. Iuasaaki imarotari hīkerokiniri !uari. Iuasaaki imarotari erekaxinire hinini. ¹⁵ !Katimari iua kanapiriini, kotxi iātapari kākiti takanapiniri maerekati ikamakiti, imisiritiko

mapokakani īkapani. Iua atokokana aītari atiretakiti Paoro iōkatsopata hītemoni Teoso imaroreē. ¹⁶ Ikinika Paoro iokanatsopatakitiā isāpiretari Apiananiri kanapiriini ōti Teoso imaroreē. Ipixini iua iōkatsopatakiti pamimari kākiti imarotiniri īkapani. Aua kākiti mīkiteni. !Apakata aūiukiniri ninoa sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoa sāpiretakiti. Ipinimoni ninoa oerekakiti. Imamakarina Teoso sākire, ininiā ikara xika ixipokaākanako.

¹⁷ Nitiretakini, himarotapekari pamonōkoniri ninoa atāo minakati oerekakiti. Ininiā araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakani itxauana. Kona hītakanapapiri Teoso sākire atāo inakari, uatxa iteene hāuikakiti.

¹⁸ Ikiniōtika himarotariko ikinipoko erekari aūiute Xesosi Kristo sikakiti hītemoni, amaerekani makatxakakari sikakiti hītemoni. Ikiniōtika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi “Teoso Säkire” Inakori

1 Nota iökatsopata hïte ïkapani, iua “Teoso säkire” inakori asäpiretini ïkapani. Ätipirika auakari itxaua. Itxikitakari ïkinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoä amaätakari iua. Ininiä atäopitika ate imarotari iua. ²Iua ïkinipoko auäki inikitaäkari. Iuaka oerekaua atemoni. Ate imarotapekari iua, ininiä asäpiretai aätamatakiti, akenakotakiti pakini. Ate säpiretai hïte iua ätipirika auakari, käkiti auäki inikitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Aätamatarï iïto. ³Ate säpiretai hïte aätamatakiti, akenakotakiti pakini, amioanatakakiniua ïkapani. Atäo nisäpiretai. Amioanatakakaua Teosokata, Xesosi Kristo pakinikata. ⁴Ia säkiretxiti aiokanata hïtemoni, iteene hïpoxokoniuatini ïkapani.

Teoso Pokamara Atoko Itxa

⁵Teoso pokamara atoko itxa, kotxi maerekati !ikama. Ipiä !auari Teoso auiniätaä, kotxi maerekati !ikama. Ikara iokanapirena imi säpiretaua ate. Ininiä ate säpiretai hïte. ⁶Maerekati akamakasaaki, ipiaä auakani atoko atxa. Iuasaaki, “Teoso amioanata,” aniniä, paxirari asäkire. Kona atäo akamakiti iuasaaki. ⁷Teoso aua ikamaraä, kotxi erekarinoka ikama. Ate ikamaraä aäuniä Teoso atoko aniniä, erekarinoka akaminiä, ininiä ate Teoso säkire auiaäkani moianariakori atxaua, ininiä amioanatakakaua.

Ikamaraä aäuniä, Teoso arokaua Xesosi arëkaä. Imaktxakari ïkinika maerekati akamakiti, kotxi imi Xesosi Kristo ipina ate ïkapani. Iarëka xikepoakata ate maerekani imaktxakini ïkapani.

⁸“Na nota kamari maerekati,” aniniä, ateka misirienetaua. Ikara atoko aniniä, ate !imarotari atäo Teoso säkire aäixinireë. ⁹Amaerekani Teosomoni asäpiretiniä, iua maktxakapitikari amaerekani. Oeretari ate äkixinire. Imaktxakari ïkinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atäo. ¹⁰“Uatxapiima maerekati !nikama,” pininiä, pitemoni Teoso säkire paxirari atxiïti? Kotxi Teoso txapekari käkiti: “Maerekati kamakari käkiti.” “Maerekati !nikama,” pininiä, !pimarotari Teoso säkire päkixinireë. !Pikamari Teoso säkire iaöka iuasaaki.

Käkiti Teoso Atäo Imarotakari

2 Namariteni nota tïretakini atoko hïtxaua hïte. Ikara niökatsopata, maerekati himakamakani ïkapani. Maerekati akamakasaaki, masäpiretari Xesosi Kristo. Äiri Teoso misäkiretakari itxaua Xesosi. Atäo inakarinoka kamakari itxaua iua. Iua misäkiretari Teoso ate ïkapani, amaerekani imaktxakini ïkapani. ²Iua maktxakari maerekati akamakiti. Kona ate maerekaninani imaktxaka. Ipina ïkini itixiti auakani maerekani imaktxakini ïkapani.

³Teoso paniätakiti akïpitiniä, atäo aimarotari Teoso. ⁴Teoso paniätakiti makïpitakati, “Nota imarotari Teoso,” inakari, paxirari isäkire. Äkixinireë !imarotari atäo inakari Teoso säkire. ⁵Teoso säkire kïpitakari iteene tïretari Teoso. Kininiäpa aimarotatari iua nakiti aniniäua? ⁶Akamakiti ïkiniötika Xesosi

kamakiti atokokana akaminiã, iusaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakakaua

⁷Nitiretakini, Apiananiri paniãtaua atiretakakiniua. Ia paniãtxi niõkatsopatakiti hitemoni, kona amaneriikani. Hikenakopiretapekari ikara paniãtxi merepitiapanika Xesosi säkire hikenakotakasaaki. Iusaaki hikenakotari ikara paniãtxi hõtiretakakiniua tükane. Ikara paniãtxi kitxakapirükari itxaua. Hikenakotapekari ikara paniãtxi. ⁸Iuaritika ikara paniãtxi amaneri itxaua. Xesosi kípitari ikara paniãtxi, kotxi itiretari kãkiti. Hite apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso säkire. Atão inakari kãkiti imarotakasaaki, pokamarari atoko itxa kãkiti äkixinireë.

⁹“Pokamara naua,” pininiã, txamari iusaaki pomanatari pitari Xesosi säkire auiaãkari, ikara atoko pininiã, uatxapiima ipiãã pauapanika. ¹⁰Pitari Xesosi auiaãkari pitiretiniã, pokamara pauapitika. Ininiã erekari päkixinire, ininiãkara päkixinireë auakari kona txük-itakai maerekati pikamini. ¹¹Pitari Xesosi säkire auiaãkari pomanatiniã, ipiãã auakari atoko pitxaua. Iusaaki pitipokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

¹²Namariteni nota tiretakini, niõkatsopata hite ikapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

¹³Hite irõtxiakoripekana, niõkatsopata hite ikapani, kotxi hite iteene imarotari Xesosi, itixi kamikosaaki auapeka inakari.

Hite ätokoriakoripekana, niõkatsopata hite ikapani, kotxi homitikapekari Satanasi hõtapararitika.

Namaritenipekana, niõkatsopata hite ikapani, kotxi himarotari aïri Teoso.

¹⁴Hite irõtxiakoripekana, niõkatsopata hite ikapani, kotxi himarotari Xesosi. Itixi kamikosaaki auakaripeka itxaua.

Hite ätokoriakoripekana, niõkatsopata hite ikapani, kotxi pataparari häkixinire. Teoso säkire auapika häkixinireë. Homitikapekari Satanasi hõtapararitika.

!Hinirekapiri Itixi Auakani Nireëkiti

¹⁵Itixi auakani nireëkiti atoko inakari !hinirekape, kotxi ninoa nirekari maerekati ikaminina. Hõtiretiniãri ninoa kamakiti, !hõtiretari aïri Teoso.

¹⁶Maerekati kãkiti kamakiti ia atoko itxapaniko: Inirekarina maerekati iitona nireëkiti ikaminina. Inirekarina maerekati okina nireëkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ikorapokoriti. Kona Teosomonikirini ikara. ¹⁷Itixi xipokako. Ikinipoko tiitxi kãkiti nireëkiti apaka xipokako. Kãkiti Teoso nireëkiti kamakarirako !ixipoka. Auapininiika Teosokata.

Kristo Omanatakani

¹⁸Namariteni nota tiretakini, itixi xipokini õti katanapanoka apoka. Kristo omanatakani auite apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini. ¹⁹Ninoa Kristo omanatakani, mitxi atekata apotiitaua, Teosokata aãpotiitakasaakiua. Txamari ninoa !auikari Xesosi säkire ate auikiniri atokokana, ininiã ninoa sipe. Ninoa atão

Xesosi sākire auikaākamako, atekata ikaikotapikamanako. Itakanapaua, kotxi ate auikari Xesosi sākire. Ninoa !auikari.

²⁰Teoso, erekarinoka kamakari, sikapekai hīte Erekarī Matamatakoti himoianari tīkane. Ininiā hīte imarotari atāo inakari Xesosi sākire. ²¹Hīte imarotari atāo inakari Xesosi sākire, iuaritika niōkatsopata hītemonī. Niokanatsopata hītemonī, kotxi himarotari atāo inakari. Paxiene kamakari !imarotari atāo inakari sākiretxiti.

²²Natokopa itxa iua paxiene kamakari? Paxiene kamakari txari: “Xesosi kona Teoso mereēkitini.” Kākiti ikara atoko inakari Kristo omanatakari itxaua iua. Iua !inirekari aīri Teoso. Imi apaka !inireka. ²³“Xesosi kona Teoso ākirini” inakari, na kaikota Teosokata. “Teoso ākiripitikara Xesosi” inakarirako kaikotapitikako Teosokata.

²⁴Hāuiritariko merepitipanika Xesosi sākire hīkenakotakiti kaikotini hāixinireē. Ikara kaikotiniā hāixinireē, Teoso ākirikata hīkaikotapikako. Aīri Teosokata hīkaikota apaka. ²⁵Xesosi sikaenetapekua aūapininiika anini Teosokata.

²⁶Niōkatsopata hīte nōtākikini īkapani, kotxi aua kākiti Xesosi hītakanapini nireēkani. ²⁷Erekarī Matamatakoti, Xesosi sikakiti, auapanika hīte ākixinireē, ininiā hīte na nirekari āti korekareri. Iua Erekarī Matamatakoti oerekai ikinipoko. Iua oerekakiti atāopitika. Kona paxieneni iua. Ininiā hīkaikotako Xesosikata, Erekarī Matamatakoti oereēkiti hīkīpitini.

²⁸Ininiā namariteni nota tiretakini, himoianatapikariko Xesosi. Ininiā uaimoni ikanapiriākasaaki, hīpīkarauatini !uari. Ininiā na hīpētauata haōkitakasaakiri iua. ²⁹Xesosi kamari atāo inakarinoka. Ikara himarotapeka. Ininiākara himaro-

tari, kākiti atāo inakarinoka kamakani Xesosi anaakori ininiuana.

Teoso Anaakori

3 Aīri Teoso iteene tiretaua ate. Hīxinikariko iua tiraōki. Iua iteene tiretaua ate, ininiā, “Namariteni,” itxaua ate. Ari, atāopitikara Teoso anaakori atxaua. Ninoa Teoso anaakori minakanuia !auikari Teoso anaakori aniniu, kotxi ninoa !imarotari Teoso. ²Nitiretakini, Teoso anaakori atxapekua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iusaaki aātamatariko iua. ³Kākiti ikara auiākani, !inirekarina maerekati ikaminina, kotxi Xesosi !ikamari maerekati.

⁴Maerekati kamakari !ikamari Teoso paniātakiti. Amakamakanisaakiri Teoso paniātakiti, iusaakipeka akamari maerekati. ⁵Himarotari Xesosi apokapeka ikorapokoriti maerekati akamakiti imaktxakini īkapani. Xesosi !ikamari maerekati. ⁶Kākiti Xesosi ātipirika moianatakari !inirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷Namariteni nota tiretakini, !hāuiritapiri apanakini misirienetini hīte. Atāo inakarinoka kamakari kamapitikari Teoso nireēkitinoka, Xesosi kaminiri atokokana, kotxi Xesosi kamari atāo inakarinoka. ⁸Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokatapitiporiri maerekati. Uatxa ikamapanikari. Teoso ākiri apoka ikorapokoriti maerekati Satanasi parīka ixipokini ikapani.

⁹Teoso anaakori !inirekaikari maerekati ikaminina, kotxi Teoso

aua äkixinireëna. Ininiä !liposotarina maerekati ikamaãpotinina, kotxi iritarina Teoso. ¹⁰Ininiä kipa Teoso anaakori txataua? Atão inakarinoka kamakanira Teoso anaakori txaua. Äti tirketakanira Teoso anaakori txaua. Ininiä kipa Satanasi anaakori txataua? Erekar! makamakanira Satanasi anaakori txaua. Äti matiretakanira Satanasi anaakori txaua.

Käkiti Tirketakiniua Pirena

¹¹Matiretakakaua. Merepitipanika Xesosi säkire hikenakotakasaaki, hikenakotari ikara ötäkipirenatxi, hitiretakiniua. ¹²Kaii inakori atoko !hixape. Maerekatnoka kamakari nakiti itxaua iua Kaii. Satanasi nakiti itxaua. Kaii okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaii kamari maerekatnoka.

¹³Nitariakori, Xesosi säkire mauiakani omanatakasaakii hite, !hitsorikaãtapeko. “Kixikapa ninoa omanataua ate?” !hixapeko, kotxi ikara atoko inakari apokapitikako. ¹⁴Atiretiniäri äitariakori Xesosi säkire auiakani, aimarotari !apinaika. Aãuapininiika Teosokata. Matiraökiti äkixinire ipikari atoko itxa. ¹⁵Käkiti itari omanatakari, Xesosi säkire auiakari omanatakari, kokaniri atoko itxaua. Himarotari kokaniri !auari ätipirika Teosokata.

¹⁶Xesosi Kristo ipina amaerekani imaktxakini ikapani, ätipirika Teosokata aãuini ikapani. Ikara oerekaua atão tiraökkitxi. Ininiä erekari äitariakori atiretini. Xesosi tiretiniua ate atokokana, erekari atiretiniri äitariakori. Atxiiti apina äitari mapinakani ikapani. ¹⁷Pitii, pikiena pakini auiniäi, pitari, Teoso säkire auiakari tii, ikiena pakini mauakaniä, pisikariko iuamoni.

Pimasikakaniäri iuamoni, Teoso tiraökki päkixinireë !auari. ¹⁸Namariteni nota tirketakini, “Apanakini ate tireta,” atxaua, txamari kaamoni inakasaakina na asikana minakati, ininiä na atão atiretana. Atão matiretana apanakini. Kaamoni inakasaakina, masikana ninoa amonitakitina.

Teoso Säkire Kipitakari

¹⁹Ikara atoko akaminiä, aimarotari Teoso anaakori aniniäua. Aimarotari atão inakari säkiretxiti äkipitini. Ikara atoko akaminiä, erekapitikari ääkixinire. Ikara atoko akaminiä, !apikari Teoso amisäkiretini. ²⁰“Kona erekano,” pininiä päkixinireë, mitxi pimaerekani pikamini xika, !pipikarauatape, kotxi Teoso iteene imarotai, iuaritika iteene iamoniäi. Poiäoka aimarotari ääkixinireë auakari. Teoso imarotari ikinipoko.

²¹Nitiretakini, päkixinireë: “Namanaäpekari Teoso imakinika nimaerekani imaktxakini,” pininiä, kataparaxinirepitikai Teoso pimisäkiretini. ²²Ininiä iua sikaua aamanaäkiti, kotxi ate kamari ipaniätakiti iaöka. Iua apokaerekatakitinoka akama. ²³Teoso paniätaua ate: “Häuikariko namarite Xesosi Kristo säkire.” Apaka Teoso paniätaua: “Hitiretakakauako.” Teoso paniätaua ikara akamini. ²⁴Teoso säkire iaöka kamakari kaikotapika Teosokata ätipirika. Teoso kaikotapika iuakata ätipirika apaka. Aimarotari Teoso kaikotini atekata, kotxi iua sikaua Erekar! Matamatakoti ääkixinireë auini ikapani.

Atamakaerekarauatini

4 Nitiretakini, !häuikapiri ikinimane käkiti säkire, “Erekar! Matamatakoti aua nota äkixinireë,” inakani. Hätaerekatanako ninoa. Atão Erekar! Matamatakoti auatana atxiiti

ākixinireēna? Atxiīti matamatakoti ākixinireēna auakari kona Teosomoni ikarini. Itomaneri kākiti, “Nota Teoso sākire sāpiretakarino,” inakani, txamari na atão ninoa sākire. Kākiti ninoa atoko inakani aua ikini itixitika. !Isāpiretarina atão Teoso sākire. Imisirienetarina kākiti. ²Kākiti sāpiretiniāua: “Teoso ākiri Xesosi Kristo apokapeka ikorapokoriti. Kākitipeka itxaua,” ininiā iusaaki aimarotari Erekar Matamatakoti auapitika iua ākixinireē. Ikara atoko aimarotari Erekar Matamatakoti Teoso sikakiti auaitotiniri kākiti. ³Kākiti sāpiretiniāua: “Xesosi na atão kākiti !itxaua,” ininiā iusaaki aimarotari Erekar Matamatakoti !uari iua kākiti ākixinireē. Matamatakoti iua kākiti ākixinireē auakari Satanasi nakiti itxaua. Kristo omanatakari nakiti itxaua. Iua Erekar Matamatakoti Teoso nakiti itxaua. Hīkenakopiretapekari: “Maerekati Matamatakoti Kristo omanatakari iokanatakiti apokapitikako ikorapokoriti,” itxa. Uatxa apokapeka.

⁴Hīte namariteni, Teoso nakitiakori hītxaua. Ininiā hīte !auikari atão minakati sāpiretakani sāpiretakiti, kotxi Erekar Matamatakoti hīte ākixinireē auakari apia posotiireri itxaua iua. Maerekati matamatakoti, Xesosi sākire mauīākani ākixinireē auakari, kaposotiireri itxaua, iuaritika Erekar Matamatakoti hīte ākixinireē auakari apia sikaimaroretai hīte. ⁵Ninoa atão minakati sāpiretakani xinikakiti, itixi auakani xinikakiti atokotxikana, ininiākara itixi auakani auikari ninoa sākire. ⁶Atepekana, Teoso nakitiakori atxaua. Teoso imarotakari auikari asākire. Teoso nakiti minakatiua !auikari asākire. Ininiākara aimarotari kākiti Erekar Matamatakoti auaākixiniretakini. Iua Erekar Matamatakoti atāonoka isākirauata. Aimarotari kākiti āti

matamatakoti auaākixiniretakini. Iua āti matamatakoti kamisirienereri itxaua.

Teoso Tiraōki

⁷Nitiretakini, matiretakakaua, kotxi tiraōkitxi Teosomoni potorikakari itxaua. Katiraōkirini Teoso anaakori itxauana. Ninoa atão imarotari Teoso. ⁸Matiraōkiti !imarotari Teoso, kotxi Teoso tiraōkiuatapika. Tiraōkitxi Teosomoni potoriākari itxaua. ⁹Teoso iokanatar imatonōkari imi atemoni, Teosokata ātipirika aūuni ikapani. Ikara atoko ininiā, Teoso oerekaua itiretiniua. ¹⁰Ikara tiraōkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiā iokanatar imi atemoni ipinini ikapani, maerekati akamakiti imakatzakini ikapani.

¹¹Nitiretakini, ikara atokorako itxa Teoso turetiniua, ininiā matiretakakaua. ¹²!Auari Teoso atamatakari, iuaritika Teoso auari aākixinireē, atiretakiniāua. Ininiā Teoso oerekaua atão atiraōkiuatini.

¹³Aimarotari Teosokata akaikotini ātipirika. Aimarotari Teoso ātipirika kaikotini atekata. Aimarotari ikara atoko inakari, kotxi iua sikari Erekar Matamatakoti atemoni. ¹⁴Aāmatapekari Xesosi kamakiti. Akenakotapekari isāpiretakiti. Ininiā asāpiretari ikinimane, aīri Teoso iokanatar imi kākitimoni, amaerekani makatzakakari ininiua ikapani, kākiti ātipirika Teosokata auini ikapani. ¹⁵“Xesosi Teoso ākiripitikara,” ina sākiretakani, Teoso kaikotapika ninoakata. Apaka ninoa kaikota Teosokata ātipirika. ¹⁶Aimarotari Teoso turetiniua. Aūuikipiretapitikari Teoso turetiniua.

Teoso tiraōkiuatapika. Kākiti katiraōkiri kaikota Teosokata ātipirika.

Teoso kaikota ātipirika iuakata apaka. ¹⁷Teoso oerekapekaua atāo atiraōk-
 iuatini iua tiraōkiuatini atokokana. Ininiā kataparaxinireua Kristo apisatoō
 aāpokasaaki, kākiti misiritiko ōtisaaki. Aimarotari !imisiritaua iuasaaki, ininiā
 kataparaxinireuako, kotxi ikorapokoriti aāuakasaaki Kristo atoko atxaua.
¹⁸Atiraōkiuatakasaaki, !apīkarauata. Atāo atiraōkiuatiniā, !auari apīkare.
 Apīkarauatakasaaki, amaākaua.

¹⁹Atiretari Teoso, kotxi mitxipeka iua tiretaua ate. ²⁰Iua itari omanatakari,
 “Nota tiretari Teoso” ina sākiretakari, paxirari isākire. !Itiretari itari iuakata
 auakari. Ininiā !iposotari itiretiniri Teoso imaōkitakiniti. ²¹Ininiā Teoso
 paniātaua: “Teoso tiretakari tiretariko itari apaka.”

Teoso Ākiri Auikiko

5 Xesosi Teoso mereēkiti itxaua. Ikara
 auīākani Teoso anaakori itxauana. Aīri Teoso atiretiniā, aītariakori
 apaka atireta, kotxi Teoso anaakori ninoa apaka txaua. ²Teoso atiretiniā,
 inireēkiti iaōka akaminiā, aimarotari Teoso anaakori apaka atiretini. ³Teoso
 atiretiniā, akīpitari ipaniātakiti. Aposotari akaminiri ipaniātakiti,
 kotxi na kamimari ipaniātakiti. ⁴Aposotari akaminiri iua paniātakiti,
 kotxi iua anaakori atxapekaua, ininiā isikataparataua, maerekati itixi auakani
 nireēkiti amakamakani ikapani. Kininiāpa isikataparataua maerekati
 ninoa nireēkiti amakamakani ikapani? Isikataparataua, kotxi Xesosi sākire
 aāuika. ⁵Kipa posotari maerekati itixi auakani nireēkiti imakamakani?
 Kākiti auikiniāri Xesosi Teoso ākiri ininiāua, iuanokara posotari maerekati
 imakamakani.

⁶Xesosi Kristo Teoso ākiri itxaua. Teoso oerekapekaua Xesosi iua
 ākiri ininiāua. Kāuaāriā Xesosi

patxisatikosaaki isāpiretaua. Iuaīkana Teoso sāpiretaua Xesosi iua ākiri
 ininiāua, Xesosi ipīkasaaki iarēka ixikepoatakasaaki. Teoso sāpiretaua
 kona Xesosi patxisatikosaakinanini. Iua oerekaua Xesosi Teoso ākiri ininiāua
 ipīkasaaki apaka. Erekarī Matamatakoti sāpiretaua Xesosi Teoso ākiri ininiāua.
 Iua atāonoka isākire. ⁷Teoso tixini auakani ipi, āti pakini oerekaua Xesosi
 Teoso ākiri ininiāua, aīri Teosoma, “Teoso Sākire” inakorima, Erekarī
 Matamatakotima pakini. Naia ipi, āti pakini ātinoka. ⁸Ikorapokoriti
 auakani ipi, āti pakini, Erekarī Matamatakotima, Xesosi patxisatikoma,
 Xesosi ipininima pakini oerekaua Teoso ākiri ininiāua Xesosi. ⁹Kākiti erekarini
 sāpiretakiti aāuikapitika, ininiā apiata maāuikari Teoso sāpiretakiti, kotxi
 atāonoka isākire. Iuara sāpiretaua Xesosi iua ākiri ininiāua. ¹⁰Teoso
 ākiri auīākari ākixinire imarotari ikara Teoso sāpiretakiti atāo inini.
 Teoso sāpiretakiti mauīākati txari: “Paxirari Teoso sākire,” kotxi !auikari
 Teoso sāpiretakiti Xesosi iua ākiri ininiua. ¹¹Kiripa Teoso sāpiretaua? Iua
 sāpiretaua: “Nitxīkitakai auāki hinini notakata hāuapininiika hinini tīkane.
 Ikara atoko nitxīkitakai namarite nakitiakori hinakasaakiaua.” ¹²Iua Teoso
 ākiri nakiti Teosokata ātipirika auako. Iua Teoso ākiri nakiti minakatiua,
 !auapani ātipirika Teosokata.

Aūuini Ātipirika Anini Tīkane

¹³Hīte auikari Xesosi Teoso ākiri ininiua. Niokanatsopata
 hītemoni, Teosokata ātipirika hāuini himarotini ikapani. ¹⁴Teoso nireēkiti
 atokotxikana aamanainiāri Teoso, aimarotari ikenakotari amisākiretiniri,
 ininiā kataparaxinirepitikaua amisākiretiniri, kotxi aimarotari
 iua apakapapiretapitikaua. ¹⁵Ikara

atoko aniniã, aimarotari ikenakotari aamanaãkiti, ininiã isikapitikaua.

¹⁶Himarotakasaakiri pitari kaminiri maerekati, himisäkiretari Teoso iua ikapani. Ininiã Teoso makatxakari maerekati ikamakiti. Teoso kamari iua ätipirika iuakata auini ikapani. Ikara maerekati makatxakiko auapitika, ininiã kona itxikitakari iua xinire ipinini. Ätiã maerekati kãkiti kamakiti aua. Ikara maerekati makatxakiko !auari, ininiã itxikitakari kãkiti xinire ipinini. Nota !õtãkikai himisäkiretiniri Teoso ikara atoko inakari maerekati kamakari ikapani. ¹⁷Teoso paniätakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati !itxikitakari kãkiti xinire ipinini.

¹⁸Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso äkiri nãkatana ninoa. Ininiã maerekati auite Satanasi !iposotari imisiritinina.

¹⁹Ikini itixiti auakani auite itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰Aimarotari, Teoso äkiri apokapeka ãkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxikitakaua iuakata ätipirika aãuini.

²¹Namariteni, nota tirketakini, !hĩ-teosonetapiri Teoso minakatiua. Ameã.

2 XOÃO

Iuaĩkana Xoão Iokanatsopatakiti

1 Nota Xoão, mitxipe Xesosi imarotakarino nota. Niokanatsopata hĩte Xesosi sãkire auĩakanimoni, hamariteakorimoni apaka. Teoso mereẽpekai hĩte inakitiakori hininiua ikapani. Nitiretai, kotxi hitiretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ²Atiretai hĩte, kotxi atão inakari aua aãkixinireẽ. Atão inakari kaikotapika atekata atipirika.

³Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴Iteene nioxokoniua, kotxi nimarotari apanakini hĩte kĩpitapikari Teoso sãkire. Atão inakarinoka hĩkama, kotxi aĩri Teoso paniãtaua ikara atoko inakari akamini. ⁵Nota tiretakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika

pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misrienetari kãkiti. Kristo omanatakani itxauana ninoa. ⁸Erepaniko. !Hãuikapiri isãkirena atão minakati, kotxi ninoa nirekari ixipokini-rina hĩparĩka Teoso ikapani. Hinirekapitikiari Teoso sikinii ikinipoko hĩparĩka ĩki.

⁹Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti atipirika auikiniãri Kristo oerekakiti, imoianatari aĩri Teoso, imi pakini. ¹⁰Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹Iua apakapakari apaka kamari maerekati iuakata, kotxi auiritari atão minakati isãpiretini.

¹²Ninirekari ito nisãpiretinii, txamari !ninirekari aãtsopaã nisãpiretakiti nitakini. Ninirekari naõkitinii hĩte. Iusaaki asãkirauatako aãpisatoõtakakiniua, ininiã iteene apoxokoniua iusaaki.

¹³Hĩtariakori Teoso mereẽkini uai auakani iokanapireta hĩtemoni. Ixinikamanapitaina hĩte. Ameẽ.

3 XOÃO

Iuaĩkana Xoão Iokanatsopatakiti

1 Nota Xoão, mitxi Xesosi imaro-takarino, niõkatsopata pite nitiretakiti Kaiomoni. Nitiretai pite, kotxi pite turetari atão inakari Teoso sãkire.

²Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piõto ereka inini pimamianareni ikapani. ³Aĩtariakori mitxi hitemoni nota iokanatakini, apokaþeka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴Namariteni atoko hitxaua, ininiã nikenakopiretakasaakiri ikiniõtika hikaminiri atão inakari Teoso sãkire iaõka, nipoxokoniuaata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶Ninoa aĩtariakori sãpiretãpekari pitiraõki Xesosi sãkire auiaĩkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷Ninoa takanapari aapokona Xesosi sãkire isãpiretinina ikapani. Xesosi sãkire mauiaĩkani !isikana iamonitakitina ninoamoni. ⁸Ininiãkara maãþakapana Xesosi sãkire sãpiretakani

aãuapokoã. Ininiã amoianatana Teoso sãkire atão inakari iaripiretini ikapani.

Txiótepi, Temétxio Pakini

⁹Niõkatsopataþeka Xesosi sãkire auiaĩkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰Iua kamapiretapikaua ate. Kona ikarananini ikama. Apaka !apakapana aĩtariakori, hitemoni sikani. Apaka !auritana apanakini apakapinina ninoa. !Auritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iusaakiko nisãpiretai hite iua apisatoõ ikinika maerekati ikamakiti.

¹¹Nitiretakiti, !pikamapiri maerekani kamakiti atoko. Erekarini kamakiti atoko inakarananira pikamako. Erekarini kamakari Teoso nakiti itxaua. Maerekati kamakari !imarotari Teoso.

¹²Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakaranoka asãpireta.

¹³Ninirekamari ito nisãpiretinii, txamari !ninirekari aãtsopaã nisãpiretakiti nitakini. ¹⁴Ninirekari paĩtiki naõkitinii pite. Iusaaki asãkirauatako aãpisatoõtãkãkauako.

¹⁵Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoa.

XOTA

Xota Iokanatsopatakiti

1 Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kăkitimoni, Teoso akiritakinimoni, Teoso airi tirketakinimoni. Xesosi Kristo nıkatakiniimoni niokanatsopata.

²Teoso iteene amonıkai. Iteene ika-maerekaxiniretai. Iteene itiretai.

Atăo Minakati Oerekakani

³Hite nota tirketakini, Xesosi makatxakapekari himaerekani, nota maerekani apaka. Ninirekamari niokatsopatiniri amaerekani makatxakiko pirena hitemoni. Iuanoka ninireka niokatsopatiniri, txamari nixinikari erekape atiao niokatsopatiniri. Ninirekari nôtăkikini. Teoso oerekakiti săkiretxiti inakitiakorimoni isikakiti hinikaenatariko. Teoso oerekakiti ikinika isikapekari inakitiakorimoni. !Hăuiritapiri apanakini koketiniri ikara ninoa oereekitıkata. ⁴Hite Xesosi săkire auiăkani sauaki aua Teoso mapaxitakani. Merepanika ninoa apotiitakasaakiaua hitekata, !himarotari kamisirienererini ininiuana. Ninoa koketari isăkirena Teoso săkirekata. Ninoa săkire: “Ate sirika anireekitokata, kotxi Teoso katiraokiri, ininiă iua !imisiritaua.” Ikara atokora itxana ninoa. Xesosi Kristonokara aăuite. Apiananiri itxaua. Iuaritika ninoa !nirekari Xesosi. Kitxakapirika Teoso săkire iokatsopatakori săpiretari Teoso misiritiniri kăkiti ninoa atoko inakani.

⁵Kitxakapirika Exito tixini auakani misiritana Xoteoakori. Himarotapekari ikara inakari. Ninirekari iuaikana hixinikiniri ikara inakari pirena. Teoso moianatana Xoteoakori, ininiă ninoa

miteka, Exito tixini osipikinina ikapani. Hixinikariko ia: Teoso makatxakana ninoia iusaaki imapinakanina ikapani, iuaritika mapa kasiriti napa atoko Teoso okana ninoia iua săkire mauiakani.

⁶Atipekana nisăpiretai. Hixinikariko Teoso nitiriakori iaxitikini kitxakapirika. Teoso txikitakana ninoia auitetxi ininiuana, txamari linirekaikarina Teoso paniatakiti ikaminina, ininiă itakanaparina auiniătaăna Teoso tixinee. Hixinikariko ia: Teoso paniătana ninoia ipiaă ikaikotinina atipirika. Itixi xipokini otisaaki Teoso misiritanako ninoia.

⁷Atipekana nisăpiretai. Hixinikariko Sotoma sitatxiti, Komoha sitatxiti, apanakini sitatxiti apaka iuaătaă takote auakari. Iuaă auakani !nirekari Teoso paniatakiti ikaminina, ninoia Teoso nitiriakori atokokana. Maerekatinoka inirekapikana, kiki sirikini ati kikikata. Ininiă Teoso xipokari iuaă auakari sitatxiniri. Ninoa maerekani xika Teoso iokanatana ninoia arikatxi maxipokatimoni. Iuaă imisiritaăkapikana. Ikara otăkikaua maerekati amakamakani tikanee.

⁸Ninoa maerekati kamakani, kamisirienererini hite sauaki auakani, kitxakapirikarini atokokana itxana. Ixiniăkitina maerekati xika ninoaka ito imisiritauana. !Nirekarina Teoso ninoia auite ininiuana. Imisăkirepiretarina Teoso nitiriakori iaxiti auakani. ⁹Mikeo inakori Teoso nitiriakori auite itxaua, iuaritika !imisăkirepiretari ati Teoso nitiri iaxitikiri. Kitxakapirika iua Mikeo Satanasikata itaparakienatakakaua, kotxi Mikeo nirekari Moisesini ito ikatini, txamari Satanasini nirekari Moisesini ito iua inakiti ikapani. Iusaaki Mikeo !imisăkirepiretari Satanasini. Ianoka isăkire: “Teoso misiritapanikaiko pite,” itxari Satanasini. ¹⁰Txamari ninoia kamisirienererini

hīte sauaki auakani misākirepiretari ikinika imimarotakinitina. Ninoa iikite kaxipiri itopa auakani iikite atokokana, kotxi ikamarina iitonani nireēkiti. Ikara iikitea xipokanako ninoa.

¹¹ Teoso misiritanako ninoa. Kitxakapirīka Kaiī inakori kamari maerekati. Iua maerekani atokokana ninoa maerekani. Kitxakapirīka Paraão inakori kamari maerekati txineiro apakapini ikapani. Iua maerekani atokokana ninoa maerekani. Kitxakapirīka Koree inakori !nirekari Moisesi iauīte ininiua. Iua atokokana ninoa !nirekari Teoso iauītetini. Ininiā ixipokaākanako Koree xipokiko atokokana.

¹² Hāpotiitakasaakiaua hinipokotini ikapani, ninoa kamisirienererini apaka nipokota hītekata. !Ipētauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Ītima anikari katxiāri iaxitikiri, ininiā katxiāri napiniātaā āparaā kipa, takari aneini ikapani. Txamari ninoa kamisirienererini katxiāri āki āparaā mauakiniti atoko itxa. !Erekana kākiti ikapani. Mitaāsaaki aua txipokori, txamari ninoa kamisirienererini mitaāsaaki aamina mariti atokokana ninoa. Aamina mariti ipikari atoko, kotxi !iminua. Ninoa iua atokokana, kotxi !ikamari erekari. Aamina mariti tokaāka. Ikotsa maporokaāka, ininiā atāo ipikari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ātipirika.

¹³ Potxoari uiniti tsakati pamonōkoniri atoko itxa ninoa kamisirienererini. Tsakati sori txiko atoko itxa ninoa maerekani. Iōriki atoko itxana. Iua iōriki sinimoni !kimarotikori. Ninoa sariko ipiāmoni ātipirika ikaikotinina ikapani. Teoso

mereēri ikara ipiaātaā ninoa auini ikapani.

¹⁴ Kitxakapirīka Enoki inakori sāpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari:

Hätamatariko. Apiananiri apokako itximonī itomaneri inakitiakorikata. Mio, apikomoni mio, apikomoni mio, itxaāpokata inakitiakori iuakata ikani.

¹⁵ Iua ikinipoko misiritiko sāpiretakari itxaua. Iua apokasaaki, isāpiretanako maerekati kamakani misiritiko, Teoso manireēkani misiritiko, kotxi Teoso !ipotxtitari ninoa kamakiti. Ninoa misākirepiretapikari Teoso. Ninoa maerekani xika, Teoso imanirekakanina xika, imisiritaākanako,

itxa Enoki sāpiretakiti kitxakapirīka.

¹⁶ Ninoa kamisirienererini ātipirika tsoatapika. Ātipirika apoītapikana apanakini. Iitona nireēkitinanira ikamana. Iuikauana. “Peerekai pite,” itxana ātimoni inireēkitinani apakapinina ikapani.

Ōtākipirenatxi

¹⁷ Nitiretakini hīxinikariko aauīte Xesosi Kristo iokanatakini sāpiretakiti akokaxiti. ¹⁸ Ninoa txai: “Xipokatxi ōti kaiamapeka inini manapi apokanako kikiakori hīte napetakani tīkane. Ninoa kamariko ninoaka nireēkiti, Teoso manireēkitini,” itxana Xesosi Kristo iokanatakini sāpiretakiti. ¹⁹ Ninoa maerekani xika kākiti txitakakaua. Ninoa kamisirienererini kamari iitona nireēkitinoka. Erekari Matamatakoti !auinana ninoa.

²⁰ Hītepekana nota tiretakini, iteene hāuikapikariko Teoso oereēkiti. Ikara atoko hininiā, kataparaxinireiko hīte. Hāuikariko Teoso oereēkiti, kotxi Teoso

sākire itxaua. Himisākiretariko Teoso. Erekarī Matamatakoti oerekai atāo hīsākirauatini īkapani. ²¹Maerekati kamakanii, iuaritika aāuīte Xesosi Kristo !imisiritai. Iua anikai ātipirika iuakata hāuini īkapani. Ikara hiātapakasaaki, ātipirika hīxinikapikariko Teoso tiraōki hīte īkapani. !Hītakanapapiri iua.

²²Apanakini !auikapanikari ikinika Teoso oereēkiti, iuaritika !hītxitapena. Himoianatanako ninoa iteene auikiniri īkapani.

²³Pamonōkoniri, kākiti kamakasaakiri maerekati. Xamina tirinakari atoko itxa imisiritikona imaerekanina xika. Ininiā hīsāpiretanako Teoso sākire, imisiritikona apokini apisapanika. Xamina tirinakari āki katxakakari pimakatxakini atokokana itxa, pisāpiretakasaakiri Teoso sākire ninoamoni. Apanakinipekana hiamonīkako. Hiamonīkasaakina,

erepaniko, kotxi pamonōkoniri ninoa maerekani. Homanatariko maerekati ninoa kamakiti, hīte makamakaniri īkapani.

Peerekari Teoso

²⁴Teoso kaposotiireri nīkataua maerekati amakamakani īkapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. ²⁵Āti Teoso !uari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuīte Xesosi Kristo ipina ate īkapani. Iua iotximere aua, kotxi imaerekani !uari. Auītetxiakori auīte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ātipirika Teoso. Ameē.

APOKORÍPISI

Xesosi Kristo Iuaka Oerekiniua Pirena

Ia Aätsopa Oerekaua Xesosi Kamakiti

1 Ia aätsopa oerekari Teoso nakitiakori Xesosi Kristo päitiki kamaenetakiti. Teoso iokanitari inítiri iaxitikiiri Xoõomoni Xesosi Kristo kamaenetakiti oerekini íkapani. ²Ikinika Xoõo atamatakiti, ikinika ikenakotakiti pakini isäpireta ia aätsopaã. Ikara atoko isäpiretaua ate Teoso säkire, Xesosi Kristo säpiretakiti iuamoni. ³Ia aätsopa atatsopatakani Teoso takariko erekari ninoamoni. Teoso takariko erekari ia isäkire kenakotakanimoni, ia isäkire kípitanimoni, kotxi ikinika Xoõo iökatsopatakiti okatapaniri apokini.

Xoõo Iökatsopare

⁴Nota Xoõo. Niokanitari ia niökatsopare Teoso mereëkinimoni. Setxi sitatxiti Ásia inakori tixini auakanimoni niokanata niökatsopare.

Teoso sikari ikinipoko erekari hitemoni. Ikamaerekaxiniretai hite. Uatxa iua aua. Merepitipanika kitxakapirika iua aua. Iua ätipirika auapikako. Setxi matamatakoni iaxitikini Teoso topäkiniätaã apisatoõ auakani sikari erekari hitemoni. ⁵Xesosi Kristo apaka sikari erekari hitemoni. Atão inakarínoka säpiretakari itxaua iua. Iua merepitipanika ökitikaua ipíkani sauaki. Apaka itixi auakani auíteakori auíte itxaua iua.

Iua ate tirketakari. Ipinä ate íkapani amaerekani imaktxakini íkapani, ininiã isikakaua erekari akamini íkapani. ⁶Itxíkitakaua auítetxiakori aniniua. Itxíkitakaua sasetotxiakori

aniniua, kotxi asäkirauata Teosokata. Ininiã atxari Xesosi:

“Ätipirika peerekai pite. Ätipirika pitenokara kaposotiireri. Ameë.”

⁷Hätamata, Xesosi napani. Iua inako katxiärikata. Iuasaaki ikinimane käkiti atamatariko. Aamina ípiriämitakari nopini iua tokakitakani apaka atamatariko iua. Iuasaaki ikini uäkati käkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameë.

⁸Apiananiri txari:

—Iökotxi merepitipanika auakari Aopa inakori atoko nitxaua. Iökotxi imapotökire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoõo Atamatari Aítari Iaxitikiri

⁹Nota Xoõo, hítari. Nikamari Xesosi Kristo nireëkiti, ininiã himoianari nitxaua, kotxi ätipirika nimíteenekari nimisiritiko, hite misiritiko himíteenekini atoko. Ikara misirikaretxi apokapitika atemoni, kotxi aäuíte Xesosi Kristo nakitiakori atxaua. Nota aua Patamosi inakori pokomiriiti. Nitakaäka uai, kotxi Teoso säkire nisäpireta apanakinimoni. Ikinipoko nimarotakiti Xesosi Kristo pirena nisäpiretini xika käkiti takano nota uai. ¹⁰Käkiti Apiananiri xinikini ötisaaki, Erekari Matamatakoti sikaimaroretano nota. Iuasaaki nikenakotari säkiretxi nitikinimoni. Säkiretxi apiaenetakari, tröpeta atoko nikenakota. ¹¹Itxari:

—Käkiti apisapanika naua nota. Nota auapanika ikinipoko xipokaäka atoko. Piökatsopata aätsopaã patamatakiti tükane. Eereka piokanitari iua aätsopa käkiti Teoso mereëkinimoni setxi sitatxiti auakanimoni Ásia tixineë.

Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹² Ininiã eereka nikirioka notakata sãkirauatakari natamatini ikapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatate atoko oro kamakoro aua itorotamoni. ¹⁴ Iãko iteene kasarori mapoa atoko itxa. Xamina tirinakari atoko itxa oki. ¹⁵ Ikiti mēkorĩka pirõsi xamina ãki imēkorĩkini atoko. Isãkire ene ãparaã torõkani atoko. ¹⁶ Iuako ikikomoni imaĩkaro setxi iõriki. Inamaã iouata mitari pokĩka. Iua iouata ipi uanaro aua. Atokatxi iotximere atoko itxa itoõ.

¹⁷ Natamatakasaakiri, nirika ikitimoni. Koriãkari atoko nitxa. Ininiã iusaaki itakari iuako ikikomonikiri nota nopini. Itxano:

—Kona pipĩkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸ Nota auãkipika inakarino. Nota koriãkaripekano, iuaritika hãtamatanano. ãtipirika auãki inakarino nota. Ameẽ. Kaposotiireno nota, kotxi nipaniãtari kãkiti ipinini. Niposotiire aua niokanatiniri kãkiti maerekati kamakani misiritikoãtaã. ¹⁹ Piõkatsopataritari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi noerekaiko katana itiximoni ikari. ²⁰ Kiripa ninoa iõriki setxi pakini niuako nikikomoni auakani? Teoso nitiriakori itxauana. Ninoa anikari nota sãkire nisãkire

auiaãkanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auiaãkani ninoa setxi sitatxi auakani itxauana —itxa Xesosi Xoãomoni.

Xesosi Iokanapirena Épeso Auakanimoni

2 Xesosi misãkiretari Xoão: —Piokanatariko ia nisãkire Teoso nitirimoni, Teoso sãkire auiaãkanikata auakarimoni Épeso sitatxitiã:

Ninoa setxi iõriki maĩkakarino nota. Nimaĩkari ninoa iõriki niuako nikikomoni. Ninoa setxi tirikapi topãkini oro kamakori sauaki tĩpokotakarino nota. Ia nota sãkire. ² Nimarotari ikinika hĩkamakiti. Nimarotari itori parĩkatxi pamimari hĩkama. Parĩkatxi kamimari inakasaaki, kona hĩtakanapari. Maerekati kamakani apokasaaki hĩtemoni, kona hĩte apakapana. Apokapeka apanakini kãkiti hĩtemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hĩte auiritana ninoa kaminiri maerekati. Hĩte atamakaerekatana. Eereka himarotari kona atão ninoa sãkire. ³ Himisiritaãka nisãkire hisãpiretini xika, iuaritika himĩteenekari ikinipoko nota ikapani. Kona hisãpaka hĩparĩkauatini nota ikapani.

⁴ Ikara hĩkamakiti erekari, txamari hĩtakanapari hĩtoretinino. Merepanika hĩtoretano. ⁵ Hĩxinikariko merepitipanika hĩtoretinino. Uatxa poiãoka hĩtoretano. Iuaĩkana hĩkamariko merepitipanika hĩkamakiti atoko. Himatakanapakaniãri ikara himaerekani, patimari napokini hĩtemoni. Nimakatzakariko

hītirikapite topākini. Ininiã Teoso sãkire auiaãkani !auaika ereẽ, himatakanapakaniãri ikara himaerekani. ⁶Auapitika atão hīkamakiti, kotxi hīte omanatari Nikoraito inakoni kamakiti. Nota apaka omanatari ninoã kamakiti.

⁷Kakenakokii hīte, ininiã hīkenakotariko Erekarī Matamatakoti sãkire Teoso sãkire auiaãkanimoni. Maerekati makamakati nauiritako amãtiiri Teoso tixine apanikaki auakari itximini. Iua amãtiiri tximakari auapika ãtipirika Teosokata,
—itxa Xesosi Épeso auakanimoni.

Xesosi Iokanapirena Esimina Auakanimoni

⁸—Piokanatariko ia nisãkire Teoso nitirimoni, Teoso sãkire auiaãkanikata auakarimoni Esimina sitatxtiã:

Ikinipoko auini apisapanika nota aua. Ikinipoko xipokaãka atoko, nota auapanika. Nipīpe, iuaritika iuaãkana nõkitikaua. Uatxa !nipinaika. Ia nota sãkire. ⁹Nimarotari hãtatsiire. Nimarotari hīte minakati !auari. Iuaritika ikinipoko erekari aua hītemoni. Nimarotari apanakini misãkirepiretini hīte. Ninoã txa: “Xoteoakorira ate.” Txama kona atão Xoteoni !itxauana. Ninoã apotiitiniãtaãua Satanasi nakiti. ¹⁰Kona hīpikapiri himisiritiko ikapani ikari. Satanasi takari apanakini hīte kateia ãki ataerekatinii ikapani. Himisiritããkako tesi pakini õti. Atxiiti hīpina nisãkire hãuikini xika, iuaritika kona hītakanapapiri nisãkire hãuikini, ininiãkara nisikai ãtião saporieãta. Iua saporieãta apakapakari auapika ãtipirika Teosokata.

¹¹Kakenakokii hīte, ininiã hīkenakotariko Erekarī Matamatakoti sãkire Teoso sãkire auiaãkanimoni.

Maerekati makamakati kona iuaãkana ikoriãika,
—itxa Xesosi Esimina auakanimoni.

Xesosi Iokanapirena Pékamo Sitatxtiti Auakanimoni

¹²Eereka Xesosi iuaãkana misãkiretari Xoão:

—Piokanatariko ia nisãkire Teoso nitirimoni, Teoso sãkire auiaãkanikata auakarimoni Pékamo sitatxtiã:

Notamoni auari oa iouata ipi uana auakito. Ia nota sãkire. ¹³Nimarotari ikinika hīkamakiti. Nimarotari hãuiniãtaã. Ereẽ Satanasi kãkiti auite itxaua. Iuaritika hīte auikari nota sãkire. Kona hīte takanapari nisãkire hãuikini. ãtxipa inakori auama hīte sauaki. Iua sãpiretapikari nisãkire kãkitimoni. Ikara xika okapeẽka ereẽ Satanasi auiniãtaã. Iuaritika kona hãsikano. !Hītakanapari nisãkire hãuikini.

¹⁴Txamari auapitika hīkerokakiti. Aua kãkiti hīte sauaki Paraão inakori sãkire auiaãkani. Kitxakapirika iua oerekari Paraki inakori kãkiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kãkiti kaminiri maerekati iito nireẽkiti ãti kãkiti itokata. !Apakata kãkiti auikiniri Paraão sãkire. ¹⁵Hīte sauaki aua kãkiti Nikoraito inakoni sãkire auiaãkani. Nota omanatari ninoã auiaãkiti sãkiretxiti. ¹⁶Hītakanapariko ikinika himaerekani. Hīkanapiriãko notamoni. Ikara atoko himakamakaniã, patimari hītemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷ Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni. Maerekati makamakati nisikariko komiri iaxitikiri kīpatakori. Apaka nisikariko kai kasarori maerekati makamakanimoni. Iua kai nopini iōkataāka kākiti uāka amaneri apanakini mimarotakiniti. Apakapakarīnani imarotari iuāka amaneri,
—itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaīkana misākiretari Xoāo:

—Piokanatariko ia nisākire Teoso nītirimoni, Teoso sākire auīākanikata auakarimoni Txiatxira sitatxitiā:

Teoso ākirirano nota. Noki xamina tirinakari atoko itxa. Nikiti mēkorika pirōsi atoko itxa. Ia nota sākire. ¹⁹ Nīmarotari ikinika hīkamakiti. Nīmarotari hītiraōki. Nīmarotari iteene hāuikari nisākire. Nīmarotari iteene hīparīkauata nota īkapani, apanakini īkapani apaka. Hīparīka nota īkapani pasāpaniri inakasaaki, iuaritika hīkamapanikari nota īkapani. Uatxa apiaāpota hīparīka nota īkapani.

²⁰ Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki. Oa txa: “Teoso sākire sāpiretakarona nota.” Otxama, omisīrienetana nīnitriakori. Oa xika, nīnoa kamari maerekati iītona nīrēekiti apanakinikata isīrīkinina. Apaka nīnoa nīkari nīpokori teoso kamakori sikakori. ²¹ Nīātapani otakanapiniri omaerekani, txamari kona onīrekari otakanapiniri omaerekani. ²² Ininiā nota

kamariko oa amīanatini. Oakata sirīkakani matakanapakaniāro, iteene nīnoa atatsīrauata. ²³ Oa anaakori nokapitīkako. Ikara atoko inakasaaki, ikinimane Teoso sākire auīākani imarotariko nīmarotari ikinika kākiti ākixinire, ikinika ixinīkakiti pakini. Ininiā erekari nisīkako erekari kamakanimoni. Apaka nīmisīritari maerekati kamakani. Hīkamakiti iaōka nīīkītxitai hīte.

²⁴ Uatxa nīmisākiretai hīte apanakini Txiatxira sitatxiti auakani. Hīte auikari Teoso sākire. Hīte !auikari Xesapeo sākire. Hīte kona apaiaōkari Satanasi oerekakiti, iua imarore. Kona nīnīrekari nisīkinī apīkomoni parīkatxi nota īkapani, kotxi uatxa iteene hīparīkauata nota īkapani. ²⁵ Ianoka nīnīreka hīkamini. Hīte auikari nisākire, ininiā hāuīkīnīritika nisākire, nīkanapīriāko.

²⁶ Iua maerekati makamakati, ātīpīrika nīpanīātakiti kamakari, iuamoni nisīkariko nīposotiire itixi auakani auīte inīnīua. ²⁷ Teoso sākire kītxakapīrīkari txari:

Auītetxi itxauako. Itapararītika ipanīātana nīnoa inīrēekiti ikaminina. Imakamakaniārīna inīrēekiti, imīsīritana nīnoa, tītxi kamakari tīi imanīrekakīnīti ipakauanakini atoko.

Nīri posotiire napakapakiti atoko iua apakapa. ²⁸ Apaka nisīkariko iōrīki īkanōkapanīkero iuamoni, ininiā notaka nisīkaua iuamoni, kotxi iua iōrīki atoko nītxaua. ²⁹ Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni,
—itxa Xesosi Txiatxira auakanimoni.

Xesosi Iokanapirena Satxi Auakanimoni

3 Iuaíkana Xesosi misákiretari Xoão: —Piokanatariko ia nisákire ninitirimoni, Teoso sákire auiákanikata auakarimoni, Satxi sitatxitiã:

Notamoni aua ninoa setxi Matamatakoni Teoso nakiti. Notamoni aua ninoa setxi iõriki. Ia nota sákire. Nimarotari hîparîka. Apanakini sâpiretai hîte auãki hinini hîxinire, txamari Teosomoni koriákanipekarai hîte. ²Himereka. Araõkire hîtxapaniko. Hîsikataratari erekari hâkixinireẽ auakari, kotxi iua erekari ipinaariãpota. Ininiã hîtxîkitakari iua erekari auãki inini iuaíkana. Notamoni hîparîka Teoso apisatoõ na atão. ³Hîxinikariko hâpakapakiti, apaka hîkenakotakiti. Hîkîpitariko hîkenakotakiti. Hîtakanapariko maerekati. Erekari hikamako, kotxi kiitiriri apokini atoko napokako uai. Kâkiti kona imarotari kiitiriri apokini manapi. Ikara atokokana nitxako nikanapiriãkasaaki.

⁴Hîte Satxi sitatxiti auakani sauaki auapanika apanakini maerekati makamakani. Ninoa auikapitikari nisákire. Ninoa kâkiti imãka matxikotakani atoko itxana. Ininiã notakata isanako. Imãkana kasarori. Ikara atoko nikaminana, kotxi ninoa kamari erekari nipaniãtakiti.

⁵Maerekati makamakani ieretakariko mâkatxi kasarori. Kona noakapaniriko iuãkana naãtsopateẽ. Kâkiti iuãkana ikara aãtsopaã auakani âtipirika auapikako Teosokata. Ikara atoko ininiã, nisâpiretari iuãkana nirimoni, initiriakori iaxitikini

pakinimoni. Nitxana: “Nota nakitiakori itxauana ninoa.”

⁶Kakenakokii hîte, ininiã hîkenakotariko Erekari Matamatakoti sákire Teoso sákire auiákanimoni, —itxa Xesosi Satxi auakanimoni.

Xesosi Iokanapirena Piratéopia Auakanimoni

⁷Iuaíkana Xesosi misákiretari Xoão: —Piokanatariko ia nisákire Teoso nitirimoni, Teoso sákire auiákanikata auakarimoni Piratéopia sitatxitiã:

Nota maerekati makamakatarano. Atão inakaranani sâpiretakarikarano nota. Kaposotiireri auítetxi Tavii inakori atoko nitxa, kotxi nota matakakakiti, kona âti totari. Nota totakiti kona âti matakakari. ⁸Nimarotari hîte parîka. Hâtamata. Hîparîka nota îkapani aapokotxi tore matakakakori atoko itxa. Kona âti posotari iseretiniri. Ininiã kâkiti liposotari iotokakinii hîte nisákire hîsâpiretini. Ikara atoko nikaminii hîte, kotxi kona kataparai hîte. Ikara atoko nikaminii hîte, kotxi hîkîpitari nisákire. Kona hîkîpatari nisákire apanakini apisatoõ. ⁹Apanakini txari: “Atão Xoteoakori atxaua.” Txamari Satanasi nakitiakori itxauana. Paxirari ninoa sákire. Nikamariko ninoa kapotoreëkiniãua hîte apisatoõ. Iusaaki ninoa txako: “Atãopitikara Xesosi tiretapitikai.”

¹⁰Hîkîpitapekari nisákire. Kamonõkoniri inakasaaki, kona hîtakanapari nisákire, ininiãkara apia maerekati ikini itixiti apokasaaki, iusaaki ninîkatakoi hîte. Iua maerekati kona misiritai hîte. Iua maerekati apokako itixi auakani atamakaerekatini îkapani.

¹¹Erepaniko, patimapaniriko napokini ereẽ. Âtipirika hikamariko

erekari. Hítakanapapikariko maerekati. Ininiã iuasaaki äti kona posotari imaktxakiniri auítetxi saporietane hitemoni nisikakiti. !Imaktxakarina ikara hïparïka ïki. ¹²Nikamariko maerekati makamakati itïkare mina atoko inini niTeosone misäkiretiko aikoti äki. Auapika Teoso misäkiretiko aikoti äki, ininiã !itakanapari Teoso säkire. Niökatariko niTeosone uäka iua nopini. Apaka niökatariko Teoso sitatxine uäka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niökatariko apaka nota uäka amaneri.

¹³Kakenakokii hïte, ininiã hïkenakotariko Erekari Matamatakoti säkire Teoso säkire auïäkanimoni, —itxa Xesosi Piratëopia auakanimoni.

Xesosi Iokanapirena Araotxiséia Auakanimoni

¹⁴Iuaïkana Xesosi misäkiretari Xoão: —Piokanatariko ia nisäkire Teoso nitirimoni, Teoso säkire auïäkanikata auakarimoni Araotxiséia sitatxitiã:

Niuäka “Ameë.” Nota atão säkiretxiti säpiretakarikarano. Nikamari ikinika nisäpiretakiti. Merepanika nikamari ikinipoko. Ininiã ikinipoko auíte nitxaua nota. ¹⁵Nimarotari ikinika hïparïka. Hïtxari: “Nauikapitikari Xesosi säkire.” Txamari kona iteene hinirekari hïkaminiri nipaniätakiti. Apaka kona iteene hinirekari hítakanapiniri nisäkire. Kona kapatakari atokoni hïtxaua hïte. Kona katxïkareri atokoni hïtxaua hïte. Poomari atoko hïtxaua. Notamoni apiaerekata kapatakari

atoko hininiua hïte. Iuasaaki iteene hinirekari hïparïkauatini nota ïkapani. Itene himanirekakaniãri hïparïkauatini nota ïkapani, apiaerekata katxïkareri atoko hininiua hïte, nisäkire ikinika hítakanapini. ¹⁶Notamoni hïte äparaã poomari atoko hïtxa. Ininiã kona äparaã kapatakaãri atoko !hïtxa. Apaka kona äparaã katxïkareëri atoko !hïtxa. Ikara atoko inakasaaki !nïnïrekai. Ininiã mapara nikanakai hïte. ¹⁷Hïte txa: “Katxineiroteua ate. Katiiua ate. Apikomoni anïrekakiti !auari,” hïtxa. Txama kona himarotari hïkixinireë iteene himatinaniuatini. Hïkixinireë minakati !auari. Hïkixinireë mokiri atoko hïtxaua. Kasarari atoko hïtxaua hïkixinireë. Ikara atoko hininiã, kona himarotari Teoso. ¹⁸Nõtäkikai hïte hiamotiniri notamoni auakari oro atoko inakari. Oa oro xamina oeretakito. Ikara atoko hïkaminiã, ikinika hinirekakiti auako hitemoni. Hiamotariko mäkatxi kasarori notamonikiri hïeretakini ïkapani, ininiã kona hïpëtauata kasara hinini xika. Ikara atoko hïkaminiã, hïkixinire !auari maerekati. Hiamotariko apaka pinïtxi notamoni auakari hïki ïkapani, ininiã atão hïposota hätamarauatini.

¹⁹Nïtïretakini nõtäkika, apaka noerekana. Ininiã ikinipoko atão hïkamako maerekati hítakanapini ïkapani. ²⁰Hätamatako. Hïkixinire toreë nota auapeka. Nota haãpoko maparakiri akiritakari atoko. Hïkenakotiniãri nakiritinii, hïserëiniãri hïkixinire tore, niïroã hïtekata nikaikotini ïkapani. Iuasaaki ninipokota hïtekata. Hïte nipokota notakata.

²¹ Nauiritari maerekati makamakati topākini notakata auītetxi topanere nopini. Iua auītetxi topanere nota nakiti. Iua atokotxikana nota topāka nirikata auītetxi topanere nopini iua nakiti nopini, kotxi maerekati makamakati nota apaka txaua. ²² Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni, —itxa Xesosi Araotxiséia auakanimoni.

Iaxiti Auītetxi Topanere

4 Eereka natamatari iaxiti tore. Itore imatakakaāka. Merepanika nikenakotari trōpeta atoko inakari. Kākiti sākire atoko itxa. Imisākiretano: —Uai pīna notamoni. Noerekaiko katana auakari tīkane.

² Iuasaakipeka Erekarī Matamatakoti anikano. Iuasaaki natamatari auītetxi topanere iaxiti. Topākakari aua iua nopini. ³ Iuaā topākakari kai peereri pomēkoriri atoko itxa. Iua kai satōnia inakori atoko. Apaka āti kai sātchio inakori atoko itxa iua topākakari. Kisi ākitari iua auītetxi topanere. Iua kisi kai esimerāota inakori atoko itxa.

⁴ Iua ītinikata aua vītxi koatro pakini topaneretxi. Vītxi koatro pakini totiakori topāka iua topaneretxi nopini. Nino māka kasarori. Ikiina aua saporīēta oro kamakori. ⁵ Auītetxi topanereātaā atamataāka ito mēkokari. Iotxira, iokaamori aua iuaātaā. Iteene poenexitiri. Iua auītetxi topanere apisatoō aua setxi tirikapi. Setxi Matamatakoni Teoso nakitiakori itxauana nino setxi tirikapi.

⁶ Iua auītetxi topanere apisatoō ipoa ātakaāri atoko itxa. Auītetxi topanere ītinikata aua koatro Teoso tixine auakani. Nino okītchinoka xāpokaītotakini. Auana okina ikini iītoāna. Itorotaāna aua okina. Iporikiāna apaka

aua okina. ⁷ Okītchinoka xāpokaītotakiti āti, ākiti atoko itxa. Ātipekana kema auīte atoko itxa. Ātipekana aua kiki toō atoko. Ātipekana kokoi araākari atoko itxa. ⁸ Nino ikininape aua imīkitana seisi pakini. Imīkitana nopini, ipatapi apaka okina aua. Kona itomatana. Ikini pokamarariti, ikini ikanōkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Ātipirika auakarii. Kitxakapirīka auakarii. Uatxa auakarii. Katana apaka pite auapanika,”

itxana ātipirika.

⁹ Nino okītchinoka xāpokaītotakini xipoātakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ikapani erekarinoka. Peerekari iua auītetxi topanere topākakari, ātipirika auapika inakari.” Nino xikaretari ikara Teoso ikapani. ¹⁰ Nino vītxi koatro pakini totiakori xikarauatakasaaki, ikapotoreēkauana ixitimoni iua auītetxi topanere nopini topākakari apisatoō. “Ateosone,” itxana iua ātipirika auapika inakarimoni. Itakarina isaporīētane Apiananiri apisatoō, kotxi Teosonokara ikinimane auīte. Iuasaaki itxana:

¹¹ “Apiananiri, aTeosone pitxaua. Erekai pite, ininiā apakatapitika apaxitinii. Apakatapitika ikinimane sāpiretinii: ‘Peerekai.’ Apakatapitika pite apakapiniri ikini posotiiretxi. Ikara atāo, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana nino vītxi koatro pakini totiakori.

Aātsopa Iapiriākori Pirena

5 Iuasaaki natamatari aātsopa iapirikakori iua auītetxi topanere nopini topākakari uakoā. Iuako

ikikomunikiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamëkakaniri ïkapani. ²Iuasaaki natamatari ãti Teoso nitiri iaxitikiri. Kataparari iua. Itapasãkিরeritika itxa:

—Kiripa apakata imaktxakiniri ia popitari? Kiripa posotari ikatamëkiniri ia aãtsopa? —itxa.

³Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamëkakari !auari. Ninoa !iposotari ikatamëkinirina iua aãtsopa. !Iposotarina atamatinirina iua aãtsopa ãki.

⁴Ininiã iteene nitxiapata, kotxi iua aãtsopa iapiriãkori katamëkakari !auari. Erekaru kamakari !apokaãka ikatamëkiniri ïkapani, atatsopatiniri ïkapani. ⁵Iuasaaki ninoa totiakori ãti txari notamoni:

—Kona pitxiapatape. Patamata ikiraã. ãkiti atoko inakari iua. Xotaa apika mekaniriakori auite iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamëkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

⁶Iuasaaki natamatari soti auite okakori atoko. Iua itima iua auitexi topanere apisatoõ. Ninoa ipi ipi pakini okïtxinoka xãpokaïtotakini, ninoa totiakori pakini ãkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷Iua soti auite atoko inakari sari iua auitexi topaneremoni. Imaïkari aãtsopa topanerexi nopini topãkakari uakoã auakari. Iuako ikikomunikiriã aua.

⁸Imaïkasaakiri, ninoa koatro okïtxinoka xãpokaïtotakini, ninoa vïtxi koatro totiakori pakini patimari ipamakinina soti auite apisatoõ. Ikinikana auari

arpa inakori xikari ikaminina ïkapani. Imakinikana auari kopitipaki oro kamakori. Naia kopitipaki xãpoka koria atoko inakari peeremari. Ia kamariãro Teoso sãkire auiaãkani sãkire iuamoni.

Amaneri Xikariti

⁹Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aãtsopa iapiriãkori. Pitenani apakata pimaktxakiniri popitari, kotxi pitenanira erekari. Pite okaãka. Piarëkaã piamotaua ate Teoso ïkapani. Piamotapekaua ikini uãkati kãkiti sauaki. Ikini ãti uãka sãkire sãkiretakani sauaki piamotapekaua. Ikinika itixiti auakani sauaki piamotapekaua ate.

¹⁰Pite txïkitakaua ate auitexiakori aniniua, sasetotxiakori apaka aniniua, Teoso ïkapani aparïkauatini. Ininiã itixi auakani auite atxauako ate.”

¹¹Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Seï mio, apikomoni seï mio, apikomoni seï mio itxaãpokatana. !Apakata ninoa iaõtiko. Ninoa ãkitari iua auitexi topanere, okïtxinoka xãpokaïtotakini, totiakori pakini. ¹²Itapasãkিরeritika ixikarauatana. Itxana:

“Soti auite okaãka kãkiti ïkapani. Ininiã atipirika apakata iua apakapiniri posotiiretxi, ikinika erekari, imaroretexi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³Ikara eereka nikenakotari ikinika iaxiti auakani, ikinika ïkorapokoriti auakani, ikinika itixi patapi auakani, ikinika potxoari uniti nopini auakani,

ikinika potxoari uiniti āki auakani pakini xikarauatini. Itxana:

“Ikinika erekari ātipirika aua iua auītetxi topanere topākakarimoni, iua soti auīte pakinimoni. Ikinika ātipirika paxitana. Ikinika ātipirika txari: ‘Peerekana ninoa.’ Ikinika taparātxi ātipirika aua ninoamoni.”

¹⁴ Ininiā ninoa koatro, okītxinoka xāpokaītotakini txana:

—Ameē.

Iuasaaki ninoa vītxi koatro totiakori patimari pamakini.

—ATEosone pitxaua —itxana iua ātipirika auakarimoni.

Soti Auīte Makatzakari Popitari

6 Natamatari soti auīte makatzakiniri āti popitari. Ikara natamatakasaaki, nikenakotari okītxinoka xāpokaītotakiti sākire. Isākire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiā. Iua tapotxi aua. Auītetxi saporietane sikaāka iuamoni. Iua sari ikini itixitimoni kākiti auīte ininiua ikapani.

Āti Popitari Makatzakiko

³ Eereka soti auīte makatzakari āti popitari aātsopaā, ininiā ipi auape. Iuasaaki nikenakotari ātipekana, okītxinoka xāpokaītotakiti sākire:

—Uai pinako. Patamata —itxa.

⁴ Ikara eereka natamatari kavaro pōkamarari. Kiki aua oporikiā. Iua kiki sikaāka posotiiretxi neenamatzixi ikamini ikini itixitiā, ininiā neenamatzixi mauakaniātaā !auari. Itxīkitakari kākiti okakakiniua. Isikaāka iouata mitapoari ineenamauatini ikapani.

Āti Popitari Makatzakiko

⁵ Eereka soti auīte makatzakari āti popitari, ininiā ipi āti auape. Iuasaaki

ātipekana, okītxinoka xāpokaītotakiti txari:

—Uai pina. Patamata —itxa.

Ininiā iuasaaki natamatari kavaro pomamari. Kavaro nopini topākakari aua minari iaōtiko iuakoā. ⁶ Eereka nikenakotari āti sākirauatini okītxinoka xāpokaītotakini sauaki. Itxa:

—Ipixini kiro triko iki, āti ōti kākiti parīka ikītxikana. Āti, ipixini pakini kiro atarokiri atoko inakari iki, āti ōti kākiti parīka ikītxikana. Iītxiā iki, ovaā iki pakini poiāpanikako.

Āti Popitari Makatzakiko

⁷ Eereka soti auīte makatzakari āti popitari, ininiā ipi ipi pakini auape. Iuasaaki nikenakotari imapotōkirekiri, okītxinoka xāpokaītotakiti sākire. Itxari:

—Uai pina. Patamata —itxa.

⁸ Iuasaaki natamatari kavaro posētakari. Inopini topākakari uāka “Ipīkitxi” inaāka. Āti iua tikini sa. Iua akiritaāka “Maerekani Misiritikoātaā” inaāka. Isikaākana posotiiretxi kaiāopokori itixi auakani okiniua ikapani, ininiā koatro kākiti auiniātaā āti okaāka. Ninoa okana kākiti neenamatzixi, natxiā, amianariā, kaxipiri kaneenamariā pakini.

Āti Popitari Makatzakiko

⁹ Ininiā soti auīte iuaīkana makatzakari āti popitari, ininiā ipi ipi āti pakini auape. Iuasaaki natamatari Teosomoni sikakori takikoātaā patapi kākiti okakoni. Ninoa okaāka Teoso sākire isāpiretinina xika. Kona itakanaparina isāpiretinina Teoso kamakiti ninoa ikapani, ininiā ikara xika okaākana. ¹⁰ Itapasākireritika akirikatarina Teoso. Itxana:

—Apiananiri, ātipirika erekari kamakarii pite. Atāonoka pisākire. Kirisaakipa pimisiritari itixi auakani?

Kirisaakipa pixikatxitaua ate, kotxi ninoa okaua ate? —itxana.

¹¹ Ininiã mākaxi kasarori sikaāka ninoamoni. Eereka isāpiretaākana:

—Hiātapariko apikomoni. Teoso nirekari apanakini hītariakori, iniritiakori okiko hīte atoko iniko. Hītariakori okaāka atoko, Teoso xikatxitai hīte. Hiātapariko ikara ōti —itxa.

Āti Popitari Makatxakiko

¹² Eereka nitikari soti auīte makatxakiniri āti popitari, ininiã seisi pakini auape. Iuasaakipeka itixi iteene iakeēkata. Atokatxi mamāka, sako mata pomamari potxi iāko kamakori atoko. Kasiri kamarāka arēkatxi atoko.

¹³ Iōriki itori iaxiti auakaro irika ikorapokoritimoni. Amātiiri ĭtima iokatxaākiti atoko otxa. ¹⁴ Natamatari iaxiti aātsopa iapirikiniua atoko. Ikinika ixirata mitari, ikinika ipokomirīi pakini makatxakaāka. Ātiātaā itakaāka.

¹⁵ Iuasaaki ikorapokoriti auītetxiakori, kākiti kaposotiirerini, katiirini, sotato auīteakori, kākiti katapararini, nitiritxi amotakoni, nitiritxi minakanuia pakini kipataua aarikoā, kai mitari sauaki ixirataā. ¹⁶ Iuasaaki itxana ixirata auītemoni apaka kai mitarimoni:

—Hīrikako ate nopini. Hīkipataua, kotxi topanerexi nopini topākakari, soti auīte pakini nirekari imisiritiniaua ate. ¹⁷ Soti auīte misirikare ōti manapi apopeka. Kona kākiti mīteenekari ikara misirikaretxi.

Sēto Koarēta Koatro Mio Teoso Nitiriakori Itixi Auakani

7 Eereka natamatari Teoso nitiri iaxitikiri timini atokatxi pokīkinimoni, āti atokatxi ereēkokinimoni, āti atokatxi kimapore sanaremoni, āti atokatxi kimapore kikomoni. Ininiã ipi ipi pakinipe ninoa. Ninoa maīkari ĭtima ipi ipi pakini

itixi auakari ĭtimati. Ininiã ĭtima kona inapaika itixiā. Kona kāuaāriā !inapaika ĭtima. Kona aaminaā !inapaika ĭtima. ² Natapari āti Teoso nitiri iaxitikiri ināāpotini atokatxi pokīkinimoni. Teoso ātipirika auakari takaōtxikare aua iuamoni. Itaparasākireritika akiritana ninoa ipi ipi pakini Teoso nitiriakori. Ninoa parika itixi, potxoari uiniti pakini imisiritinina. ³ Iua Teoso takaōtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaōtxikare iniritiakori itixi auakani teētaā.

⁴ Eereka nimarotari Teoso takaōtxikare apakapakani. Itakaōtxikaākana sēto koarēta koatro mio kākiti. Ikini uāka Isaeo tixinikini takaōtxikaāka.

⁵ Tosi mio Xotaa apika mekani takaōtxikaāka.

Tosi mio Hopē apika mekani takaōtxikaāka.

Tosi mio Katxi apika mekani takaōtxikaāka.

⁶ Tosi mio Asee apika mekani takaōtxikaāka.

Tosi mio Natarii apika mekani takaōtxikaāka.

Tosi mio Manasee apika mekani takaōtxikaāka.

⁷ Tosi mio Simiāo apika mekani takaōtxikaāka.

Tosi mio Arevii apika mekani takaōtxikaāka.

Tosi mio Isakaa apika mekani takaōtxikaāka.

⁸ Tosi mio Seporō apika mekani takaōtxikaāka.

Tosi mio Xosee apika mekani takaōtxikaāka.

Tosi mio Pēxamiī apika mekani takaōtxikaāka.

Itomaneri Käkiti Teoso Apisatoõ

⁹Ikara eereka natamatarì itomaneri kākiti apotiitakaniua. !Apakata kākiti iaõtiniri ikinikana. Aua kākiti ikini itixitiki, kākiti ikini sereti. Aua ikini uāka sākire sākiretakani. Ikinikana ninoa timanāta Apiananiri apisatoõ, soti auĩte pakini apisatoõ. Ninoa māka kasarori. Aātape aua iuakoāna. ¹⁰Itapasākireritika itxana:

—ATEosone topāka auĩtetxi topanere nopini. Iuara, soti auĩte pakini makatxakapekari amaerekani.

¹¹Iuasaaki ikinika Teoso nitiriakori iaxiti auakani tima. Ninoa ākitana auĩtetxi topanere, totiakori, ninoa ipi ipi okĩtxinoka xāpokaĩtotakini pakini. Ikapotoreēkauana itoõna xitimoni, auĩtetxi topanere apisatoõ. “Ateosone pite,” itxana Teosomoni. ¹²Ixipoātana Teosomoni:

—Ameẽ. Ātipirika ikinimane sāpiretai ereka pinini. Peerekai. Kimarorei. Erekarì pikamakiti ate ikapani. Ikinimane paxitai. Kaposotiirei. Pataparai. Ātipirika ikara atoko atxai. Ameẽ.

¹³Ininiā eereka ninoa totiakori āti pimaāno nota:

—Kiripa ninoa kākiti mākatxi kasarori ieretakakani? Namonipa inana ninoa? —itxa iua.

¹⁴Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auĩte makatxakapekari imaerekanina. Ininiā imākana soti auĩte arēkaā arokakori atoko itxauana. Uatxa kasarori imākana, kotxi itxiko !uari. Soti auĩte makatxakapekari kākiti maerekani ipikasaaki, ininiā mākatxi kasarori atoko itxa ninoa ākixinire.

¹⁵—Ininiā ninoa aua Teoso topanere apisatoõ. Imisākiretiko aikoti āki

iparĩkauatana Teoso ikapani ikiniõtika pokamara, ikanõka pakini. Ininiā iua auĩtetxi topanere nopini topākakari auapikako ninoa sauaki. ¹⁶Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷Kotxi soti auĩte auĩtetxi topanereātaā auakari nĩkatanako ninoa. Iua anikana ninoa sotoārimoni. Iuaā auakari sotoāri iātakani ātipirika auapikako. Teoso makatxakariko ikinika iātsaāna. !Itxiapataikana.

Imapotõkire Popitari Makatxakiko

8 Imapotõkire popitari imakatxakasaaki, ikinipoko tsorĩkaxitita Teoso tixineẽ. Ikara atoko ipixini oara. ²Eereka natamatana setxi Teoso nitiriakori, iua apisatoõ timakani. Isikaākana setxi xikari kamiko trõpeta inakori.

³Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini ikapani, ikinika Teoso nakitiakori amanaākiti sākiretxitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auĩtetxi topanere apisatoõ. ⁴Ininiā iuakoā kamariāro txiā, Teoso nakitiakori amanaākiti sākiretxitikata kanĩka Teoso apisatoõ. ⁵Ininiā eereka iua Teoso nitiri kosekari okoana. Ixāpokakari xaminaminiki mẽkorĩkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mẽkokari pakini. Apaka iuasaaki itixi iakeēkata.

Koatro Trôpeta Pirena

⁶Ininiã ninoa setxi Teoso nitiriakori setxi trôpeta auakini iposope itrôpetane ixôkinina ikapani.

⁷Ininiã ninoa Teoso nitiriakori âti xikarauata itrôpetaneë. Iuasaaki katxikareri kai soro atoko inakari, apaka xaminaminiki mëkorîkakari arêkatxiã koketakori okaãka itiximoni. Ikara xika apanakini aamina itixi auakari arika, ininiã ipi âti pakini aamina auiniãtaã âtika arikaãka. Ikinika katsotati arika apaka.

⁸Eereka âti Teoso nitiri xikarauata itrôpetaneë. Ininiã ixirata auïte atoko inakari arikatxikata okaãka potxoari uinitimoni. Ininiã ipixini potxoari uiniti arêkatxi itxapekaua. ⁹Ininiã apanakini potxoari uiniti âki auakani ipïpe, ininiã ipi âti pakini potxoari uiniti auakani auiniãtaã âtika ipïpe. Iuasaaki apanakini maporoni apaka xipokaãka, ininiã ipi âti maporo auiniãtaã âtoka xipokaãka.

¹⁰Eereka âti Teoso nitiri xikarauata itrôpetaneë, ininiã ipi âti pakini iniritiriakori xikarauatape. Iuasaaki iôriki mitari iaxitikero katxaãkata. Otirika tirikapi atoko. Oïrika ipixini uini nopini. Oïrika ipixini sôtoãri nopini apaka. ¹¹Iôriki uãka, “Kapixiro,” otxaua. Ininiã ipixini âparaã kapixiã. Ipi âti pakini sôtoãri auiniãtaã, âtinoka sôtoãri kapixiã. Ito kãkiti iãtari iua âparaã, eereka iko-riãna, kotxi kapixiãri âparaã.

¹²Ininiã âti Teoso nitiri xikarauata itrôpetaneë, ininiã ipi ipi pakini iniritiriakori xikarauatape. Iuasaaki atokatxi ponikare, kasiri, iôriki pakini kona iteene !iponikaika. Imamãkapeka. Ininiãkara pokamara ipi ipi pakini oara atokatxi !iponikaika. Iua atokotxikana îkanôka ipi ipi pakini oara kasiri, iôriki pakini !iponikaika. ¹³Ininiã eereka nitikarauatakasaaki, nikenakotari âti

Teoso nitiri sãkire. Iua araaãpota Teoso tixine. Itapasãkireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, âti pakini trôpeta Teoso nitiriakori xôkini ikapani.

Âti Trôpeta Xôkiko

9 Ininiã âti Teoso nitiri xikarauata itrôpetaneë. Iuasaaki nitikari âto iôriki iaxitikero katxakini itiximoni. Iôrikimoni osikaãka xavi aariko mamapotôkire irikoti tore ikapani. ²Ininiã iôriki atoko inakari mataakari iua aariko. Eereka katxiãri kaiãopoko pokika. Katxiãri tokori arikikosaaki atoko itxa. Eereka iaxiti, atokatxi pakini piãka itxiã xika. ³Iposo atoko txïtxiri atoko inakari pokika itxiã. Posotiiretxi isiãkana, ininiã kaxipiro itixi auakari posotiire atoko aua txïtxirimoni, kãkiti ioãkini ikapani. ⁴Ipaniãtaãkana katsotati imokakanina, apaka takari, aamina pakini imokakanina. Ipaniãtaãkana imisiritinina Teoso takaôtxikare iteëtaã mauakini. ⁵Kona isikaãkana posotiiretxi kãkiti okinina ikapani. Sïko kasiritinanira ninoa paniãtaãka imisiritinina ninoa. Imisiritarina kaxipiro ioãkini atoko. ⁶Iuasaaki kãkiti nirekariko ipinini. Itxama, kona iposotarina ikoriinina. Initarina ipïkitxi, txamari iuasaaki ipïkitxi mitekapeka.

⁷Iua txïtxiri kavaro atoko itxana. Kavaro neenamtxi kamakani atoko itxana. Ikiãna aua saporieãta atoko oro kamakori. Itoõna kãkiti toõ atoko itxana. ⁸Ninoa iãko sito iãko atoko itxana. Itsiriãna ãkiti tsiriã atoko itxana. ⁹Itorota ipatinina koana metao kamakori atoko. Imïkitana ene kavaro itomaneri miteëkani ene atoko. Mitekaï ene atoko itxana. ¹⁰Ninoa xipi kaxipiro xipi atoko itxana. Oko aua ixipiãna. Ninoa posotari kamatsiitini kãkiti sïko kasir-

iti. ¹¹ Ninoa auíte aua. Iua Satanasi nitiri. Mitxi aariko mamapotókire irikoti áki auakari iua. Xoteo sákiree iua uáka Ap-ató itxaua. Kreko sákiree iua uáka Ap-orioó itxaua. Popíkari sákiree “Íkinipoko Xipokakari,” itxaua.

¹² Áti misirikaretxi napapeka. Txama auapanikako apikomoni ipi misirikaretxi.

Áti Trôpeta Xókiko

¹³ Áti Teoso nitiri xikarauata itrôpetaneë. Iuasaaki seisi trôpeta xókapeëkaika. Teosomoni sikakori takikoãtaã oro kamakori aua ipi ipi pakini iko. Ikara Teoso apisatoó. Nikenakotari iko takote auakari sákirauatini. ¹⁴ Ininiã iua txari Teoso nitiri iua trôpetaã xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasir-iti, ia ôti, ia oara manapi íkapani. Ininiã ninoa sikakaãka kaiãopokori kãk-iti okinina íkapani. Ininiã ipi áti pakini kãkiti auiniãtaã auritaãka átika okinina. ¹⁶ Áti sãpiretano ninoa sotatone kavaro nopini auakani tosétosi mirão aua. Kaiãopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pókamarari xamina tirinakari atoko itxa. Apanakini poporeri. Apanakini posétakari êxópiri atoko. Ikiina ákiti kii atoko. Inamaãna ipokíka xamina tirika, katxiãri, êxópiri pakini. ¹⁸ Ikara xamina tirinakari, ikara katxiãri, ikara êxópiri pakini inamaãna pokíkakari, okari kaiãopokori kãkiti itixi auakani. Ininiã ipi áti pakini kãkiti auiniãtaã ninoa okari átika. ¹⁹ Kavaro posotiire inamaã, ixipiã pakini aua.

Ninoa xipi imini atoko itxa. Ixipiãna aua ito kiiri. Ninoa kii misiritari kãkiti.

²⁰ Ininiã itomane kãkiti koriã ia misirikari xika. Iuaritika kãkiti mokakoni maerekati kamakani linirekari itakanapinirina imaerekani. Ninoa kapotoreëkapanikaua Satanasi nitiriakorimoni. Ikamapanikarina ninoa amanaãkiti. Iteosonetari aamina kamakori, oro kamakori, pirata kamakori, pirósi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itípokotinina. ²¹ Ninoa kãkiti okapanikari apanakini. Ikamapanikarina miíti paríka. Isirikapanikana apanakinikata. Ítirikapanikarina apanakini kãkiti tii. Kona inirekarina maerekati itakanapinina.

Aãtsopa Axapitiri Iapirikakori

10 Iuasaaki natamatari Teoso nitiri iaxitikiri katxakini íkorapokoritimoni. Kataparari iua. Iua katxiãri iaxitikiri áki. Katxiãri imãka atoko itxa. Kisi ikii nopini aua. Itoó atokatxi atoko itxa. Itapike aãtsota tirinakari atoko itxa. ² Imaïkanãtari aãtsopa iapirikakori axapitiri. Iuakoã aãtsopa ikatamëka. Itakari ikiti ikikomonikiri potxoari uiniti nopini. Isanaremonikiri ikiti itakari imirií. ³ Akiripoakata ákiti atoko. Iuasaaki setxi iokaamori kenakotaãka. ⁴ Iuasaaki niókatsopaaritari ninoa setxi iokaamori sákire. Txamari nikenakotari áti iaxitikiri sákire. Itxano:

—Kona piókatsopatapiri ninoa setxi iokaamori sákire —itxa iaxitikiri.

Aãtsopa Axapitiri Nikiko

⁵ Iuasaaki Teoso nitiri aua áti ikiti imirií. Potxoari uiniti nopini áti ikiti aua. Iua ôtanókari iuako iaxiti. ⁶ Iuasaaki itxa:

—Uatxa nisäpiretakiti Teoso ätipirika auakari säkire. Ikamari ikinika iaxiti, iaxiti auakani pakini. Ikamari ikinika ïkorapokoriti, ïkorapokoriti auakani pakini. Ikamari potxoari uiniti, ikinika iua äki auakani pakini. Teoso misiritinina maerekati kamakani !okananiikari apokini. ⁷Apikomoni äti tröpetä xikarauatapanika. Iuasaaki kitxakapirika Teoso kipatakiti oerekaäkako. Teoso säpiretakiti initiriakori ïkorapokoritimoni, isäkire säpiretakanimoni päitiki oerekaäkako —itxa Teoso nitiri.

⁸Eereka iuaïkana nikenakotari iaxitiki säkirauatini:

—Pisa. Papariko aätsopa iapirikakori, Teoso nitiri uakoã auakari. Iua äti ikiti imiriï, äti ikiti potxoari uiniti pakini aua kititakari.

⁹Ininiä nisa iuamoni, ininiä nitxari iua:

—Pisikano ere aätsopa iapirikakari.

Iuasaaki itxano:

—Papakapariko, nika pitxari ia aätsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰Ininiä nimaïkari ïkora aätsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aätsopa ninikakiti. ¹¹Iposo atoko isäpiretano:

—Iuaïkana pisäpiretariko apikomoni Teoso säkire, kaiäopokori kãkitimoni, kaiäopokori äti uãkamoni, kaiäopokori äti uãka säkire säkiretakanimoni, kaiäopokori auëtetxiakorimoni pakini pisäpiretariko nisäkire —itxano.

Ipi Teoso Säkire Säpiretakani

11 Aäke niaörauatinini ïkapani nisikaäka. Iuasaaki Teoso nitiri txano:

—Pisa. Piaötariko Teoso misäkiretiko aikoti. Piaötariko Teosomoni sikakori

takikoätaã. Piaöтана Teoso misäkiretakani iuaã auakani. ²Kona piaötapiri Teoso misäkiretiko aikoti pirikere, kotxi Xoteo minakanuia apotiitiniätaãua iuaã. Iuaã ninoa ïkapani. Ninoa misiritariko Teoso sitatxine koarëta toisi kasiriti. Ikara Teoso sitatxine, Xerosareë inakori. ³Nisikaposotiiretanako ipi kiki. Teoso säkire säpiretakanini ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiä mio tosëtosi sesëta öti pakini ninoa säpiretariko nisäkire.

⁴Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani auïte apisatoõ, Teoso apisatoõ ninoa aua. ⁵Kãkiti nirekasaakiri imisiritinina ninoa, iuasaaki xamina tirinakari pokïka inamaãna. Ininiä iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶Teoso säkire isäpiretakasaakina, iposotarina iaxiti itotini. Ininiä iuasaaki äparaã kona ikipaika ïkorapokoriti. Ninoa posotari äparaã arëkatxi inïkitakini. Iposotarina itxïkitakiniri ikini sereti maerekati apokini ïkorapokoriti auakanimoni. Inirekasaakina, ninoa posotari ikara ikinika ikaminina.

⁷Teoso säkire isäpiretinina xipoka atoko, monökori aariko mamapotökire irikoti äki potoriäkari pokïka. Iuasaaki iua kamari neenamati ninoa ipi Teoso säkire säpiretakanikata. Eereka iua okapena ninoa. ⁸Ininiä ninoa ïto sirikako kimaporïätaã, mitari sitatxitiã. Iua sitatxitiã Apiananiri tokakitaäka aamina ïpiriãmitakari nopini. Iua sitatxi akiriuäkataäka Sotoma, Exito pakini, kotxi Sotoma, Exito pakini atoko itxa Xerosareë. ⁹Ininiä iuaã ikini kãkiti, ikini inirimane, ikinimane äti uãka säkire säkiretakani, ikini äti uãka atamatanako ninoa ïto kimaporïätaã. Iuaã

ikaikotanako ipi ôti, âti ôti, ipixini ôti pakini. Kâkiti kona auiritari ikatikona.¹⁰ Ininiâ ikini kâkiti atamatariko ninoa koriâkani îto. Ininiâkara ikinimane enenîkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini îkapani. Ninoa kamariko ikara atoko inakari, kotxi ninoamoni naia ipi Teoso sâkire sâpiretakani misiritana ninoa. Ininiâ ninoa enenîka, kotxi Teoso sâkire sâpiretakani koriâpeka.

¹¹Uaritika ipi ôti, âti ôti, ipixini ôti pakini napaka atoko, Teoso txîkitakana ninoa iuaîkana auâki ininina îkapani. Ôkitakauana. Iuasaaki kâkiti atamatana, ininiâ ipikarauatana.¹² Ikara eereka ninoa ipi Teoso sâkire sâpiretakani kenakotari iaxitikiri sâkirauatini:

—Uaimoni hina.

Ininiâ ninoa kanîka katxiârîâ Teoso tixinemoni. Ninoa mokaiakariakori itikana ninoa kanîkaâpotini Teoso tixinemoni.¹³ Iuasaakipeka itixi iteene iakeêkata. Ininiâ iua sitatxitiâ kaiâopokori aapokotxi irika. Tesi aapokotxi auiniâtaâ âtika irika. Iuasaaki setxi mio kâkiti ipina. Kâkiti auapanika inakani pîkarauata. Iuasaaki itxana:

—Teoso iaxiti auakari apiatakari itxaua —itxana.

¹⁴Îkora misirikaretxi xipopeka. Iuasaaki ipi misirikaretxi apiari napapeka. Uaritika erepaniko, kotxi paîtiki âti misirikaretxi apiari apokapanikako.

Trôpeta Imapotôkirekiri Xôkiko

¹⁵Iuasaaki Teoso nitiri mapotôkirekiri xikarauata itrôpetaneê. Itomane iaxiti auakani iteene akiritari:

—Ikini itixiti auakani auîte itxapekaua aâuîte Teoso, Kristo pakini. Âtipirika iua ikinimane auîte itxauako —itxana.

¹⁶Iuasaaki vîtxi koatro totiakori Teoso topâkiniâtaâ apisatoô topâkakani pamaka Teoso apisatoô. Itxana:

¹⁷“Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirîka aua. Katana âtipirika pauapika. Erekapitikai, kotxi kaposotiirei, ininiâ âtipirika ate auîte pitxaua.

¹⁸Kâkiti ikini itixiti auakani omanâkarauata. Uatxa piteka omanâkarauatini manapi apope. Uatxa apokapeka ipîkani misiritiko mereîko ôti. Pinitiriakori, pisâkire sâpiretakani, apaka pinakitiakori pite paxitakani pakini ikitxitiko ôti apokapeka. Ikinimane kâkiti poiâorini, kâkiti kaposotiirerini pakini apakapariko ikamakitina îki. Iuasaaki pixipokariko îkorapokoriti xipokakani,” itxana.

¹⁹Eereka natamatari iuaâ Teoso tixineê imisâkiretiko aikoti tore imataakaâka. Iua aiko âki natamatari Teoso kaixane, iua apokiniâtaâ. Iuasaaki natamatari ito mêkokari. Nikenakotari ito okaratxirari, ito iokaamori pakini. Itixi iakeêkata. Ito âparaâ kai soro katxîkareri atoko katxaka.

Imini Mitapoari, Sito Pakini

12 Eereka nitaponeê nitikoka. “Kîpa atxiîti?” nitxa nâkixinireê. “Natokopa itxa Teoso oerekiniri kâkiti?” Kotxi sito tokiâ Teoso tixine. Atokatxi iotximere iakirokaro oa omâka atoko inakari. Kasiri aua okiti patapi. Okiiâ aua auîtetxi saporîetane, tosi iôrîki kamakori.² Oa kamixiro. Oa akiripoakata oâtatsiirauatini xika, kotxi kaiamapeka amarini oâuâkitakini.

³Eereka iuaîkana nitikoka, kotxi imini mitapoari tokiâ Teoso tixineê. Pôkamarari. Iua setxi ikii aua.

Aua tesi iko. Ikininape ikii aua auítetxi saporíetane. ⁴Ixipiã ikosekari kaiãopokori iõriki iaxitikero, uai ixiti oka itxaro iõriki. Itima oa sito apisatoõ, kotxi paítiki amarini oãuãkitaka. Inirekari iixirãkiniri amarini, amarini auakasaaki. ⁵Eereka oa sito auãkitakari amarini, kiki. Oa sito ãkiri aneãkasaaki ikini itixiti auakani auíte itxauako. Auítetxi kataparari itxauako iua amarini. Auakasaaki, imini !ixirãkari amarini. Patimari maíkiko iua amarini. Teoso auinimoni anikaãka amarini. Iuaãtaã Teoso topãkanãta auítetxi itopanere nopini. ⁶Oa sito miteka ãparaã makipakaniãtaã. Teoso oerekatapekari iuaã okaikotini ikapani. Iuaã oinikataãkako mio tosëtosi sesëta õti. Ipi anokanani, ãti anokanani ipixini pakini itxa.

⁷Eereka aua neenamtxi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸Teoso nitiriakori tapara api-ata, ininiã imini initiriakorikata !auiri-taãkaika Teoso tixine ikaikotinina. ⁹Iua imini mitapoari iokanataãka maparamoni. Iua imini kitxakapiríkaripekara. Iua Txiapo inakori. Iua Satanasi inakori. Iua misirienetari kãkiti ikini itixiti auakani. Maparamoni iokanatikosaaki, iua, initiriakori pakini okaãkana uai ikorapokoritimoni.

¹⁰Eereka nikenakotari Teoso tixinekiri sãkire kataparakieneri:

—Kãkiti maerekani makatxakiko apokapeka uatxa. Teoso makatxakari kãkiti maerekani. Uatxa Kristo posotiire oerekaãka. Uatxa oerekari ikinimane auíte ininiua. Teoso mereëkiti ikinimane auíte itxaua uatxa, kotxi aítariakori kamapiretakari iokanatapeëkaika mapara. !Ikaikotaika Teoso tixine. Mitxi ikamapiretari aítariakori Teoso apisatoõ. Pokamara,

íkanõka ikamapiretana. ¹¹Aítariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auítene ipina ninoa ikapani. Iarëka xiketa ninoa ikapani. Ninoa posotari Satanasi iokanatinina, kotxi ninoa sãpiretari atão inakari Teoso sãkire. Ninoa iposope okikona Teoso ikapani. ¹²Híte Teoso tixine auakani hipoxokoniuatako. Txamari híte itixi auakani, potxoari uiniti auakani, erepaniko, kotxi Satanasi apopeka ereë híte sauaki. Iua iteene naiataua, kotxi imarotari paítiki Teoso !auiritaikari iua maerekati apikomoni ikamini —itxa iua Teoso tixinekiri sãpirena.

¹³Uai itiximoni okikosaaki, imini mitapoari asikatikinitaro oa sito amarini auãkitakakaro okiniro ikapani. ¹⁴Oa osikaãka ipi mikitatxi kokoi mitari míkita, oãraini ikapani. Oa araã ãparaã makipakanimoni. Teoso oerekinimoni osa. Iuaã Teoso nĩkataro oa ipi anokanani, ãti anokanani, ipixini pakini. Iuaã imini mitapoari !iposotari oamoni apokini. ¹⁵Oa araãkasaaki, imini mitapoari koporikaãtari ãparaã inamaãkiri oa tikini. Uini atoko itxikitakari ãparaã, oa sito axãpoãtini ikapani. ¹⁶Kipatxi !auiritari ãparaã sini oamoni. Ixoreka. Ixorekasaaki, ikinika ãparaã imini namaãkiri kipatxi ãki isa. ¹⁷Ininiã imini iteene omanataro oa sito. Ininiã asikatikinitana apanakini oa anaakori inaiatinina ikapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auíãkani oa anaakori itxauana.

Monõkori Potxoari Uiniti Pokíkaãtakari

13 Ininiã nitaponeë nitima ikipatxite nopini. Iuaã nitikari monõkori potxoari uiniti pokíkaãtini, kaníkíiita itxa. Iuamoni auari iko tesi pakini. Apaka ikii setxi aua. Ikinika

iko aua auítetxi saporietane. Ikini ikii aua uákatxi Teoso misákiropiretakari. ²Iua monókori nitikakiti ákiti kaiókari atoko itxa iíto. Ikiti oso kiti atoko itxa. Inama ákiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiá iua auítetxi itxaua. Imini auítetxi ininiua atoko itxa. Imini txíkitakari iua potxoari uinitikiri sákiroposotiire inini, isákiroposotiire kákiti auikini íkapani. ³Nota atamatariki ininiri. Ikii áti ipípe ikaro mitari xika. Eereka ikaro tximóka. Iuaíkana auáki itxa ikii ipinakari. Kákiti ikini itixitikini atamatakasaakiri, itsořikaátana. Ininiá auikarina isákiroposotiire. Ikamarina iua nireékiti. ⁴Ikinimane auikari imini mitapoari sákiroposotiire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sákiroposotiire. Ninoa teosonetari iua apaka. Ninoa sákiroposotiire:

—Áti kaposotiireri potxoari uinitikiri pokíkaáatakari atoko inakari !auari. Kákiti !liposotari inaiatiniri iua —itxana.

⁵Iua potxoari uinitikiri auiritaáka isákiroposotiire maerekati sákiroposotiire. Imisákiroposotiire Teoso. Auiritaáka auítetxi ininiua koaréta toisi pakini kasiriti. ⁶Iua misákiroposotiire Teoso. Imisákiroposotiire Teoso uáka. Imisákiroposotiire Teoso auiniátaá. Imisákiroposotiire Teoso tixine auakani. ⁷Iua auiritaáka inaiatiniri kákiti Teoso nakitiakori. Apaka auiritaáka ninoa imaíkini. Auiritaáka kákiti ikini uákati auíte ininiua, ikini itixiti auakani auíte ininiua, ikini kákiti sákiroposotiire sákiroposotiire auíte ininiua. Ikinimane auítetari iua maerekati kamakari. ⁸Ikini itixiti auakani, Teoso nakitiakori minakanuia, auikariko iua potxoari uinitikiri pokíkaáatakari sákiroposotiire, kotxi iteosonetarina iua. Itixi kamiko apisapanika ninoa uáka !iókataáka Soti Auíte okakori aátsopateé. Iua aátsopaa

auauákatakani auapikako Teosokata mapíkaninoka ininina.

⁹Híte, ia atatsopatakani kakenakokii, ininiá híkenakotariko nisákiroposotiire. ¹⁰Teoso nirekiniári kateia áki pitakiko, ininiá erekapitikari kateia áki pauini. Teoso nirekiniári pokiko iouata mitariá, erekapitikari pokiko. Ininiá pokaáka iouata mitariá. Ininiá híte Teoso nakiti inakanuia himíteenekariko himisiritiko. Kona hitakanapapiri Teoso kimapore. Átipirika híkamariko Teoso nirekakiti.

Monókori Itixiákiri

¹¹Eereka nota itikari áti monókori. Itixiá ipokíka. Aua ipi iko. Soti auíte ákiri iko atoko itxa, iuaritika isákiroposotiire imini sákiroposotiire atokokana. ¹²Potxoari uinitikiri pokíkaáatakari nitiri itxaua iua itixiá pokíkaakari. Potxoari uinitikiri sikaposotiiretari iua, ininiá isari ikini itixitimoni. Itxíkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximóka. ¹³Iua itixiá pokíkaakari kamari posotiiretxi mitxi mimarotakoti. Ipaniátari xamina tirinakari iaxiti auakari íkorapokoriti apokini ikinimane atamatiniri íkapani. ¹⁴Iua potxoari uinitikiri auiritari itixiákiri kaminiri posotiiretxi iua íkapani. Posotiiretxi xika itixiákiri misirienetari ikinimane itixiá auakani. Itxíkitakari kákiti kaminiri potxoari uinitikiri íto atoko inakari kai kamakori. Ikara atoko ipaxitarina potxoari uinitikiri, kotxi ikarotaáka iouata mitariá, iuaritika iuaíkana auapanika ikii. ¹⁵Itixiá pokíkaakari auiritaáka itxíkitakiniri potxoari uinitikiri pokíkaáatakari atoko inakari kai kamakori kosekasinaniretiniua, ininiá iua kai kamakori posotari isákiroposotiire kákitikata. Ipaniátari kákiti okiko imanirekakanisaakiri iteosonetiniri iua. ¹⁶Itixiá pokíkaakari paniátari ikinimane

kákiti apakapiniri Satanasi takaõtxikare iuakoãna ikikomoni, minakaniã iteëtaãna. Ipaniãtari ikinimane kákiti auõttxi inakaniua, auõttxi minakaniua, katiini, matiini, nitiritxi, nitiritxi minakaniua pakini, apakapiniri Satanasi takaõtxikare. ¹⁷ Kákiti iua takaõtxikari mauakiniti !auritaãka iamotiitinina. !Auritaãkana ivëtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸ Kimarore hïtxako, ikara himarotini ïkapani. Kimarore hininiã himarotari potxoari uinitikiri nomerone kiki uãka itxa. Nómero 666.

Soti Auïte Sëto Koarëta Koatro Mio Kãkitikata

14 Eereka nionakaãta nitaponeë. Natamatari Soti Auïte. Ôtanoxiratarari nopini auanãta. Ixirata uãka Sião inaãka. Kákiti sëto koarëta koatro mio pakini aua iuakata. Kaiãopokori kákiti. Iteëtaãna Soti Auïte iri uãka iõkatsopatapeëkaika. ² Eereka nikenakotari ninoa xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kákiti sëto koarëta koatro mio pakini tima auõttxi topanere apisatoõ, okïtxinoka xãpokãitotakini ipi ipi pakini apisatoõ. Totiakori vïtxi koatro pakini apisatoõ apaka itimana. Ninoa sëto koarëta koatro mio xikaretari xikari amaneri. Apanakini !imaïkari iua xikari amaneri. Ninoa sëto koarëta koatro mio ïkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki !sirïkana sitokata. !Auritarina iïtona kaminiri maerekati. Soti Auïte sinimoni ninoa apaka sa. ïkorapokoriti auakasaakina, Teoso amotana ninoa. Ninoa

merepanika sikaãka Teosomoni, Teoso Soti Auïtene pakinimoni. ⁵ !Ikamarina maxikatiïka isãkirena. Atão inakarinoka isãpiretana. !Ikerokarina isãkirena Teoso iauïtena apisatoõ.

Ipi ãti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. ãti uãka sãkire ipinimoni. ãti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni.

⁷ Itaparasãkireritika itxari:

—Hïpïkariko Teoso. Hïisãpiretariko, iua Apiananiri ininiua. Apokapeka kákiti maerekati kamakani misiritiko õti. Hï-teosonetariko Teoso, kotxi iua kamari iaxiti, ïkoraxiti, potxoari uiniti, sõtoãri pakini —itxa iua Teoso nitiri araãkari sãkire.

⁸ Iua sãkirauataka atoko, ãti Teoso nitiri txari:

—Papurõnia sitatxiti xipokapeka. Iuaã auakani kaposotiirerini, iuaritika ixipokapena. Papurõnia sitatxiti auakani paniãtari imakinika itixi auakani maerekati ikaminina, maerekati itotxi nireëkiti. Ininiã ninoa kamari maerekati Papurõnia auakani paniãtakiti.

⁹ Ninoa Teoso nitiriakori ipi sãkirauataka atoko, ãti Teoso nitiri txari itaparasãkireritika:

—Teoso misiritanako kákiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kákiti Satanasi takaõtxikare iteëtaãna takakani, iuakoãna takakani. ¹⁰ Kákiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako

ninoa, ininiã atatsiirauatana xamina tirinakariã. Exópiri arikanako ninoa. Teoso nitiriakori erekarini, itixine auakani, Teoso Soti Auítene pakini itikariko ikara kãkiti misiritiko. ¹¹Iua xamina txikitakari kãkiti atatsiirauatini. Iua xamina tirinapikako. Ixipoka. Itirinapika. Itxiãkapika. Ninoa misiritiko !iotoka. Pokamara, ìkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka iitoãna auaitotakini misiritaãkako ikara atoko —itxa iua Teoso nitiri sãkire.

¹²Ininiã hïte Teoso nakitiakori, hïte ipaniãtakiti kïpitakani, hïte Xesosi nireëkiti ãtipirika kamakani, kataparaxinire hïtxako. Himïteenekariko kãkiti misiritinii.

¹³Eereka nikenakotari Teoso tixine auakari sãkire. Itxano:

—Nisãpiretakiti piõkatsopata. Kãkiti ipikasaaki Apiananiri ikapani iparïkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mïtxi pasãpaniri Teoso parïka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴Eereka nitaponeë nionakaãta iaxiti. Iuasaaki natamatari katxiãri kasarori iuaã. Aïtari iaxitikiri atoko inakari topãka iua katxiãri nopini. Ikiãa aua auïtetxi saporïëtane oro kamakori. Iuakoã saasara ãtoião aua. Pauanaro. ¹⁵Iposo atoko ãti Teoso nitiri pokïka Teoso aapoko. Iua itapasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶Ininiã iua katxiãri nopini topãkakari isaasarateë isauakari ikini itixiti nopini auakari. Amari takari imakinika.

¹⁷Iposo atoko nitikari ãti Teoso nitiri pokïka Teoso aapoko Teoso tixineë. Iuamoni apaka aua saasara ãtoião iuakoã. Pauanaro.

¹⁸Iuaïkana ãti Teoso nitiri apoka. Teosomoni sikakori takikoãtaã ipotorika iua. Inïkatari xamina tirinakari iuaã. Iua itapasãkireritika akiritari Teoso nitiri saasara auakiti:

—Pimaïkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹Ininiã Teoso nitiri isaasarateë isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. ²⁰Ova ori kãkiti kitiã iopetikoãtaã sitatxi mapotõkire. Txamari na ovapeëni ikara atoko itxa. Arëkatxiãra ikara atoko itxa. Iua arëkatxi uini panaã atoko itxa. Tresëtosi kirómetro arëkatxi aua. Arëkatxi ipanaã kavaro namaãpeka apoka arëkatxi. ãti metro ipixini ipanaã arëkatxi.

Teoso Misirikare Mïkani Setxi

15 Eereka nitaponeë nitikoka iuaïkana.

—Kipa atxiïti? —nitxa iuaïkana nãkixinireë, kotxi natamatari Teoso nitiriakori setxi itixineë.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

²Eereka natamatari ipoa atoko inakari. ãtakaãri, xamina tirinakarikata koketakori atoko itxa ipoa. Kãkiti tima ipoa ïtinikata. Ninoa iokanatapekari Sa-

tanasi sini, kotxi !ikamarina iua potxoari uinitikiri paniātakiti. Iua potxoari uinitikiri atoko inakari kai kamakori paniātakiti !ikamana. !Apakaparina Satanasi takaōtxikare, iuāka nomerone. Ikininape aua viorāo atoko inakari Teoso sikakiti. ³Ninoa xikaretari Moisesi xikare, Teoso nitiri uai itixi auakari xikare. Ixikarenā-tari Teoso Soti Auītene xikare. Ia ixikare-tana. Itxana:

“Teoso Apiananiri, ikini posotiiretxi auakiti pite. Peerekari piparīka. Pite kaposotireri. Pite atāonani pikamakiti. Ikini uākatu auīte pitx-
aua pite.

⁴Ikinimane paxitaiko pite ipīkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kākiti ikini uākatu apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵Eereka natamatari Teoso aapoko āki. Natamatari iua auiniātaā. ⁶Iposo atoko ninoa Teoso nitiriakori setxi, misirikaretxi setxi mīkani, pokīka Teoso aapoko. Ninoa māka katsopiri, pomēkoriri. Ninoamoni aua oro kamakori. Itinimaī nopini inapa. ⁷Ninoa ipi ipi pakini okītxinoka xāpokaītotakini iuaā aua. Okītxinoka xāpokaītotakiti sikari iātatxi setxi pakini oro kamakori nino setxi Teoso nitiriakorimoni. Teoso auapininiika inakari xāpokakapekari iua setxi pakini iātatxi omanākareē. ⁸Teoso iotximere xāpoka iua aapoko āki. Katxiāri kasarori atoko itxa. Iuasaaki kākiti !auritaāka Teoso aapoko īroni, ninoa Teoso nitiriakori, misirikaretxi mīkani setxi pakini, misiritakasaakina kākiti.

Iātatxi Teoso Omanākare Auakiti

16 Eereka nikenakotari Teoso aapoko āki auakari sākire. Itaparakieneritika imisākiretana ninoa Teoso nitiriakori setxi. Itxana:

—Hīsa. Hikitakari Teoso omanākare iātatxi āki auakari itixi auakanimoni — itxa.

²Ininiā ninoa Teoso nitiriakori sari. Merepanika ātika initiri kitakari iātatxi ākikiri itixi auakanimoni. Iuasaaki kim-iti mitari, katsiiri, apoka kākiti Satanasi takaōtxikare auakini itomoni. Potxoari uinitikiri atoko inakari kai kamakori teosonetakani itomoni apoka ikara atoko inakari amianari.

Āti Iātatxi

³Iposo atoko ātipekana Teoso nitiri kitakari iātatxi ākikiri potxoari uinitimoni. Iuasaaki āparaā arēkatxi itxapekava. Kākiti ipīkari arēka atoko itxa iuasaaki. Ininiā ikinipoko potxoari uiniti auakani iuasaaki xipoka.

Āti Iātatxi

⁴Iposo atoko ātipekana Teoso nitiri kitakari iātatxi ākikiri uinimoni, sōtoāri pakinimoni. Iuasaaki āparaā arēkatxi-noka itxapekava. ⁵Iuasaaki nikenakotari Teoso nitiri āparaā nikatakari sākire. Itxari Teosomoni:

—Pite maerekati makamakatii. Ātipirika auakarii pite. Atāo pikamakiti pimisiritinina maerekati kamakani ikora atoko. ⁶Kotxi ninoa okari kākiti pite nakitiakori. Okarina pisākire sāpiretakani. Ninoa oxiketari ninoa arēka. Ininiā uatxa pite sikana arēkatxi iātinina. Atāo imisiritikona kotxi maerekati ikamana —itxa Teoso nitiri.

⁷Iposo atoko nikenakotari āti sākire. Teosomoni sikakori takikoātaā auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakarinoka pikama —itxa.

Ãti Iãtatxi

⁸Eereka ãtipekana Teoso nitiri kitakari iãtatxi ãkikiri atokatximoni. Iuasaaki atokatxi apiata patakata. Auiritaãka kãkiti arikini itaparapatakaã. ⁹Ininiã kãkiti arikaãka atokatxi patakaã. Iuaritika !nirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaã akiritari Teoso uãka.

Ãti Iãtatxi

¹⁰Ininiã ipi ipi pakini Teoso nitiriakori kitakapekari iãtatxi ãkikiri itiximoni. Eereka iuaãkana ãti Teoso nitiri kitakari iãtatxi ãkikiri auãtetxi topaneremoni iua potxoari uiniti pokãkaãtakari topaneremoni. Iuasaakipeka iua potxoari uinitikiri auãtetxi ininiãtaãua patimari ipiãkini. Kãkiti iuaãtaã auakani akatsaninitaua itsii xika. ¹¹Iuaritika !nirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Ãti Iãtatxi

¹²Eereka iuaãkana Teoso nitiri ãti kitakari iãtatxi ãkikiri mitari uunitimoni Eoparaxi inakorimoni. Iuasaaki uini auaã. Isonãka. Kimapori itxaua, auãtetxiakori atokatxi pokãkinimoni ãkani inapinina ãkapani. ¹³Iposo atoko nitikari maerekani matamatakoni ipi ãti pakini. Atiniro atoko itxana. ãto pokãka mitapoari imini namaã. ãto pokãka iua potxoari uiniti pokãkaãtakari namaã. ãto pokãka iua itixi pokãkakari

namaã. Iua itixi pokãkakari iua Satanasi sãkire sãpiretakari itxaua. Na atãoene isãkire. Poxirari ikama. ¹⁴Ninoa maerekani matamatakoni ipi ãti pakini Satanasi nitiriakori. Ninoa kamari posotiiretxi. Isana auãtetxiakorimoni, ikini itixiti auakanimoni. Akiritana kãkiti apotiitiniua ineenamauatiniua ãkapani. Teoso kaposotiireri naiatanako ninoa itixi xipokini õtisaaki.

¹⁵Hite ia atatsopatakani, Apiananiri txai hite:

—Erepaniko. Napokako kiãtiriri apokini atoko, kãkiti mimarotakinipinika. Napokasaaki ereẽ, pikoatiniã, kamãka pininiã, pipoxokoniua. Ikara atoko pininiã, kona kasarai ikinimane apisatoõ pisini, ininiã kona kapẽtai —itxa Apiananiri sãkire.

¹⁶Eereka ninoa ipi ãti pakini Satanasi nitiriakori maerekani matamatakoni, apotiitari auãtetxiakori Amaketõ inakoriãtaã. Iuaãtaã akiritaãka Amaketõ Xoteo sãkireẽ.

Imapotõkire Iãtatxi

¹⁷Ninoa setxi Teoso nitiriakori, seisi kitakapekari iãtatxi ãkikiri. ãtinoka !kitakapanikari. Iuasaakiia iua kitakari iãtatxi ãkikiri ãtimamoni. Iuasaaki nikenakotari auãtetxi itopanereãtaã auakari sãkire:

—Ixipokapeka —itxa itaparakieneritika.

¹⁸Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi !auari itixi iakeẽkatini ãkora atoko inakari. Iuasaakiikarako apiatako. ¹⁹Iua sitatxi apiari Papirõnia inakori xoreka. Ipikata ixoreka, ininiã ipi ãti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso !imaxinãkaretari Papirõnia sitatxiti auakani kamakiti, ininiã iteene imisiritana ninoa, kotxi iteene omanãkarauata imaerekanina

xika. ²⁰Iuasaaki ikini ipokomirií !auaika. Ótanoxiratari ikinipoko xipoka iuasaaki. ²¹Katxíkareri iaxiti auakari, kai mitari atoko inakari, katxaka itiximoni. Apanakini kai minani koarêta síko kiro. Iua irika kâkiti nopini. Ikara katxakakari pamonôkonipaniri. Iua xika kâkiti iteene misâkirepiretari Teoso.

Sito Potxoari Uinitikiri Nopini Topâkakaro

17 Ninoa Teoso nitiriakori setxi pakini iâtatxi setxi auakini, seisi kaikota. Átika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topâkanâta uini itori nopini. Iuaã auakani misiritiko noerekaiko pite. ²Auítetxiakori ikini itixiti auakani kamari maerekati iua sitatxiti auakanikata isiríkinina. Iua sitatxi auakani txíkitakari kâkiti ikini itixiti auakani maerekati ikaminina. Kapoôroã poâtakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³Eereka iua Erekarí Matamatakoti paniâtano iua Teoso nitirikata nisini. Iua Teoso nitiri anikano âparaã makipakaniâtaã. Iuaã natamataro sito topâkanâta iua potxoari uinitikiri nopini. Pôkamaraïtori iua. Ítoã aua iôkatakori kaiâopokori Teoso imisâkirepiretini iôka. Ikii setxi aua. Iko tesi aua. ⁴Oa sito mâka pomamari ipixini. Pôkamarari itxa omâka. Pakaroneri omâka. Oïtoã aua oro, pérora, kai soro pomêkoriri pakini aua. Omaïkari iâkoanatxi oro kamakori. Iua iâkoanatxi âki aua maerekati okamakiti itxiko atoko inakari. Maerekati oïto kamakiti ikara atoko itxa. ⁵Oteêtaã aua sâkiretxi iôkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri.

Maerekati kamakani inoro itxaua Papirónia.” ⁶Nitikaro oa sito opoâtini, Teoso nakitiakori arêka oâtini xika. Xesosi sâkire auikinina xika, okaâkana. Natamatakasaakiro nitikoka.

—Kipa atxiíti? —nitxa.

⁷Iua Teoso nitiri txano:

—Kininiâpa pitikoka? Nisâpiretaiko oa sito pirena. Apaka nisâpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisâpiretai, kotxi kona pimarotari. ⁸Iua potxoari uinitikiri patamatakiti mitxi aua, txamari uatxa !auaika. Iua eereka ipokíkapanikako aariko mamapotôkire irikotiã. Eereka anikaâkako ixipokikomoni. Ikini itixiti auakani Teoso aâtsopateẽ iuâkana maiôkatakoni tikokako iua potxoari uinitikiri atamatakasaakinako. Itixi kamiko apisa iuâkana liôkatsopataâka Teoso aâtsopateẽ. Iua aâtsopãã iôkauâkatakatoninoka âtipirika auapikako Teosokata. Kâkiti tikokako iua potxoari uinitikiri atamatakasaakina, kotxi mitxi auâki itxa, eereka !auaika, eereka iuaikana auâkipeka itxa.

⁹—Ikara inakari pimarotini íkapani, iteene pimixinikariko. Kinirepa ikii setxi aua? Kotxi ótanoxiratari setxi apaka aua. Oa sito topâkanâta iua ótanoxiratari nopini. ¹⁰Kinirepa ikii setxi aua? Kotxi auítetxiakori setxi apaka auako. Auítetxi !itxauakana ninoa síko. Átinoka auítetxi txapanikaua. Áti kona apokapanika. Iua apokasaaki mapaôtinoka auítetxi itxauako. ¹¹Iua potxoari uinitikiri mitxi auâki inakari, iposo atoko !auaika inakari, iua apokako. Iuara auítetxi txauako. Iua mitxi apotitaua ninoa setxi auítetxiakorikata. Áti ôti iua xipokaâkako.

¹²—Patamatarí iko tesi pakini. Kinirepa iko tesi aua? Kotxi auítetxi tesi aua. Ninoa auítetxiakori kâkiti

auíteakori !itxapanikauana. Ninoa sikaposotiiretaākako auítetxi ininiuana iua potxoari uinitikirikata. Ninoa auítetxi itxauanako āti oaranoka. ¹³Ikininape ninoa tesi auítetxiakori parīkauata iua potxoari uinitikiri ikapani. Iposotiireēna, itaparaāna iparīkauatana iua potxoari uinitikiri ikapani. ¹⁴Inaiatarinako Teoso Soti Auítene. Teoso Soti Auítene iokanatanana ninoa isinina, kotxi iuanani Apiananiri itxaua. Auítetxiakori auíte itxaua. Ātipirika iuakata sikani, iua akiritakini, imereēkini, ātipirika iua nireēkiti kamakani, ninoa moianatari iua Soti Auíte ineenamauatini —itxa Teoso nitiri sākire.

¹⁵Iua Teoso nitiri apikomoni txari notamoni:

—Píte atamataro oa kanokarero topākanāta kāuaāri nopini. Kinirepa kāuaāri nopini oāua? Kotxi iuaātaā kākitipokoni, ikini uāka, ikini itixiti auakani, ikini āti uāka sākire sākiretakani pakini. Iua kāuaāri mitari atoko itxana. ¹⁶Iua potxoari uinitikiri, ninoa tesi auítetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinaroko omāka. Kasarapeka otxako. Oxini inikanako. Ninoa xipokaroko oa xaminaā. ¹⁷Teoso txīkitakari Teoso nireēkiti ikaminina, kotxi ninoa auítetxiakori parīkauata iua potxoari uinitikiri ikapani Teoso nireēkiti iaōka. Ininiā Teoso sākire mitxi auakari auapeka. Isākire iaōka ikamana. Ininiā ninoa nirekari iparīkauatinina iua potxoari uinitikiri ikapani. Ininiā ninoa auítetxiakori itxauana iua potxoari uinitikiri ikapani.

¹⁸—Oa sito kanokarero patamatakito kona atāo sitoni. Sitatxi miramanerīā auakani oa sito kanokarero atoko itxana, kotxi iua sitatxiā auakani paniā-

tana ikini auítetxiakori itixi auakani maerekati inireēkitina ikaminina.

Papirónia Sitatxiti Xipokini

18 Ikara inaāka atoko nitikari āti Teoso nitiri Teoso tixine auakari katxakaāpotini ikorapokoriti Teoso tixine potoriākari. Iua kaposotiireri. Iotximere iopinikari imakinika itixi. ²Iua sākiraauata itaparasākireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaā. Ikini sereti maerekani matamatakoni aua iuaā. Araākari ikini sereti arakakari nikakani, kākiti mapokaerekatakiniti, iuaā apoka. ³Oa sito kanokarero atoko itxa iua sitatxi, kotxi iua sitatxi auakani txīkitakana ikini itixiti auakani maerekanitxi ninoa kamakiti iaōka ikaminina. Papirónia sitatxiti auakani kamari maerekati iītona nireēkiti. Itixi auakani nirekari ikara maerekati ikaminina kapoāroā poātakari nirekini atokokana. Auítetxiakori ikini itixiti auakani kamari ikara maerekati Papirónia sitatxiti auakanikata. Tiitxi vēxitakani apakaparo txineiro kaiāopokoro, kotxi Papirónia sitatxiti auakani amotari tiitxipokoni —itxa Teoso nitiri sākire.

⁴Eereka nikenakotari āti Teoso tixine auakari sākire. Itxari:

“Híte nota nakitiakori inakani takanapariko iua sitatxi. !Hīkamapiri maerekati ninoakata. Ininiā !himisiritaāka ninoakata.

⁵Kotxi maerekati ninoa kamakiti api-āpota. Tiitxi tsorinatakori atoko itxana ninoa maerekani. Iaxitipeka apokaāpota ninoa maerekani. Teoso xinikari ninoa maerekani, ininiā iua misiritanako ninoa.

⁶Himisiritanako ninoa. Híte imisir-itinina atokokana, híte misiritana

ninoa. Ipikata himisiritanako nino, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷Hĩtxĩkitakanako ninoa atatsiirautinina. Hĩtxĩkitakanako ninoa maerekaxiniretinoka ininina. Ikar atoko ninoamoni hĩkaminiã, atãopitikara hikamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa sãkire: 'Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,' itxana ãkixinireẽna.

⁸Ikarã isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako nino, kotxi Teoso iuasaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,"

itxa iua Teoso tixine auakari sãkire.

Kãkiti Txiapatini Sitatxi Xipokini Xika

⁹Auĩtetxiakori ikini itixiti auakani, Papirõnia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auĩtetxiakori txiapata iua sitatxi arikasaaki, xamina txiã itikasaakina. ¹⁰Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirõnia sitatxiti !auaika. Kãkiti kaposotiirerini xipokapeka. ãti oaranoka arikatxi xipokapena ninoa imaerekanina xika.

¹¹Ikini itixiti tiitxi vẽtxitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? — itxana.

¹²Mĩtxi ninoa vẽtxitari oro, pirata, kai soro pomẽkoriri, kai soro kasarori pẽrora inakori. Mĩtxi ivẽtxitarina mãkatxi mata arnio inakori, mãkatxi mata seta inakori, mãkatxi mata põkamarari, mãkatxi mata pomamari pakini, ivẽtxitana. Ivẽtxitarina ikini sereti aamina eremari inakari. Ivẽtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³Ivẽtxitarina kanera, koketxi pakini. Ivẽtxitarina kamariãro miha inakori. Ivẽtxitarina kamariãro pirãkĩsẽsi inakori. Ivẽtxitarina iãriã, aseitona iĩ, triko, triko pani pakini. Ivẽtxitarina kema auĩte, soti auĩte, kavaro, mitekaĩ kavaro anikakiti pakini. Kãkiti apaka ivẽtxitana, nitiritxi ikapani. Kãkiti ito, kãkiti xinire apaka inirekana ivẽtxitinina. ¹⁴Ninoa tiitxi vẽtxitakani sãkire sitatximoni:

—Ikinika hĩtii erekari hinireẽkiti xipokaãkapeka. Ikinika hĩtxineirote !auaika. !Auaika hãpokaerekatakiti. Hĩtii arikapeka —itxana ninoa sãkire.

¹⁵Ninoa tiitxi vẽtxitakani katxineiroterini itxauana, kotxi kãkiti iua sitatxiti auakani mĩtxi amotari ninoa tii. Iua sitatxi xipokasaaki, ninoa tiitxi vẽtxitakani timanãta õtakoxiti, kotxi ipĩkarina sitatxi arikini. Itxiapatana. Imatina niuatana. ¹⁶Itxana:

—!Erekari. Sitatxi miramaneri !auaika uatxa. Mĩtxi ia sitatxi peerepokori sito erero atoko itxa. Oia sito mãka pakaroneri, pomamari, põkamarari pakini. Oĩtoã aua oro, kai soro pomẽkoriri. Pẽrora pakini aua. Oia sito atokokana ia sitatxi. ¹⁷ãti

oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo äki sikani, maporo äki parïkau-atakani apaka ôtakoxiti atamatarina iua sitatxi arikini. ¹⁸Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

¹⁹Iuasaaki itakarina atapani ikiiãna imatinaniuatiniãna. Itxiapatana iuasaaki. Imatinaniuatana iuasaaki. Itxarina:

—!Erekari. !Erekari. Kamatinanip-itikari sitatxi miramaneri xipokini. Mitxi iuaã inikinane maporo auakini apakapari kaiãopokoro txineiro, kotxi iuaã auari txineiropokoni. Eereka äti oara napaka atoko ixipokapeka ikinika —itxana isãkirena.

²⁰Hïtepekana Teoso tixine auakanii hïpoxokoniuatoko iua sitatxi xipokiniã. Hïte Teoso nakitiakori hïpoxokoniuatoko. Hïte Xesosi moianariakorii, hïte Teoso säkire säpïretakanii pakini hïpoxokoniuatoko, kotxi Teoso arikapekari iua sitatxiã auakani hïte imisiritinina xika.

Kai Miramaneri Potxoari Unitimoni Okiko

²¹Eereka äti Teoso nitiri kataparari maïkari kai meraminapoari. Kai triko kamiriãkari atoko itxa iua kai. Okari potxoari unitimoni. Iua txari:

—Itapararitika kai nokini atoko, Papirônia sitatxiti miramaneri xipokini. !Atamataãkaika sitatxi iuaã —itxa isãkire.

²²Itxari iua sitatximoni:

—Xikari !ikenakotaãkaika ereë. !Auaika xikari viorãokata, koitxikata, tröpeta pakinikata. Ereë kãkiti parïkauatini !auaika. Atarokiri kamiko ene !kakenakotikoikari. ²³Tirikapi kamara !katamatikoikari

ereë. Taniriuatakani kiinirite ene !kakenakotikoikari. Ereë mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereë auakani misirienetana ikini kãkiti ikini itixiti auakani, kotxi ninoa säkire maerekatinoka —itxa Teoso nitiri säkire.

²⁴Papirônia sitatxiti misiritaãka, kotxi iuaã auakani okapena Teoso säkire säpïretakani kãkiti Teoso nakitiakori. Ikinimane kãkiti itixi okakoni xika Papirônia sitatxiti xipokaãka.

Areroia, Peerekari Teoso

19 Eereka nikenakotari kãkiti säkire, kaiãopokori kãkiti Teoso tixine auakani. Itapasãkireritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotiireri. ²!Ikerokari ikamakiti, kotxi atão inakarinoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirônia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati itotxi nireëkiti ikaminina. Teoso misiritana Papirônia auakani, kotxi okana Teoso nitiriakori itixi auakani —itxana ninoa säkire.

³Iuaïkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ätipirika —itxana.

⁴Iuasaaki ninoa totiakori vïtxi koatro pakini, ninoa okïtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso

topākanāta auítetxi topanere nopini. Ni-noa misākiretari iua:

—Pite aTeosone. Peerekai pite. Ameē, areroia —itxana ninoa.

Soti Auíte Ītanorouatini Kiiniriti

⁵ Eereka nikenakotari Teoso topanereē auakari sākire. Itxari:

—Híte Teoso nitriakori ikini itixiti auakanii, “Peerekari aTeosone” hīt-xako. Híte auítetxi inakanii, auítetxi minakanii apaka, hīpikiniāri Teoso, “Peerekari aTeosone,” hīt-xako —itxa.

⁶ Iposo atoko nikenakotari itomaneri kākiti sākire ene atoko itxa, āparaā kai auiniātaā auakari ene atoko itxa, ikarokirauatini ene atoko itxa. Nike-nakotari ninoa sākire:

—Areroia, peerekari Teoso, kotxi aTeosone, Apiananiri, kaposotiireri, ikinimane auíte itxaua —itxana ninoa.

⁷ —Mapoxokoniua. Apoxokoniritika masākirauata. Matxari: “Peerekari Teoso.” Teoso Soti Auítene Ītanorouatini iketo apokapeka. Ītaniriuatakarō iua ĩkapani oāiamatapeka. ⁸ Osikaāka mākaxi ereri, kasarori oieretaākiti tĭkane —itxana ninoa sākire.

Teoso nakitiakori kamakiti atāo in-akari oa māka atoko itxa.

⁹ Iposo atoko iua Teoso nitiri txano nota:

—Ia piōkatsopata. Iua Soti Auíte ĩtanorouatini kiiniriti kemaĭtxitakoni poxokoniua —itxa notamoni.

Iuaĭkana itxano:

—Ia nisāpiretakiti Teoso sākire atāo itxa.

¹⁰ Ikara nikenakotakasaaki nipamaka iua Teoso nitiri apisatoō, Teoso apisatoō pamaākarino atoko nitxaua. Txamari iua txano:

—Kona pipamakape nota apisatoō. Nota Teoso nitiri pite atoko, pitariakori Xesosi sāpiretakiti auīākani atoko. Teoso apisatoōnani pipamakako. Xesosi sāpire-

takiti iopinikari Teoso sākire sāpire-takani ākixinire. Ininiā ninoa sāpiretari kākiti atāo Teoso sākire —itxa.

Kavaro Kasarori Nopini Topākakari

¹¹ Eereka natamatari Teoso tixineē auakari. Natamatari kavaro kasarori. Iua kavaro nopini topākakari ikamaenetakiti kamakari itxaua. Isākire atāonoka. Atāo imereēri kākiti misiritiko imaerekani xika, kotxi iua imarotari ikinipoko kākiti kamakiti, ininiā ikamari atāo. Inaiatana maerekati kamakani, kotxi iua kamari atāo. ¹² Oki xamina tirinakari atoko itxa. Ikiiā ito auítetxi saporietane aua. Iuāka iōkatakori iitoā aua. !Kimarotikori iua uāka. Iuanoka imarotari iuāka. ¹³ Arēkatxinoka imākaā aua. Iua akiritaāka, “Teoso Sākire” inakori. ¹⁴ Isotatoneakori, Teoso nitriakori Teoso tixine auakani, saāpota iuakata. Iua ĩkiika. Ninoa apaka topāka kavaro kasarori nopini. Imākana peereri, kasarori. ¹⁵ Iua “Teoso Sākire” inakori namaā opokĭka iouata mitaro neenamati ikamini ĩkapani. Kuanaro. Iua iouataneē okanako imokaiakarini ikini āti uāka, ininiā ikini āti uāka auíte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanākare ova katxaratiko atoko itxako. Teoso iteene omanākarauata iusaaki kākiti maerekani xika. ¹⁶ Iua “Teoso Sākire” inakori mākaā, itapikeē apaka iōkataāka: “Auítetxiakori auíte. Apiananiri,” iōkataāka.

¹⁷ Iposo atoko natamatari āti Teoso nitiri. Atokatxi iotximereē ĩtima. Iua ita-parakieneritika akiritari ikinika itano araākani:

—Hina. Hāpoka Teoso kiiniritemoni. Mitari ikiinirite —itxa.

¹⁸—Hina. Auítetxiakori xini hinika. Sotatoakori auíteakori xini hinika. Sotato xini apaka hinika. Kavaro xini hinika. Hinikari kikiäkini kavaro nopini topākakani xini apaka. Hinikari ikini kākiti xini, nitiritxi iamotakoni xini, nitiritxi minakanuia xini, kākiti apiatakani xini, kākiti mapiatakani xini apaka hinika —itxari itano araākani.

¹⁹Eereka nitikari iua potxoari uinitikiri. Iuakata aua itixi auakani auíteakori, isotatoneakori apaka. Ninoa apotiitaua, iua kavaro kasarori nopini topākakari isotatoneakorikata inaiatinina ikapani. ²⁰Iua neenamtxi xipoka atoko, iua potxoari uinitikiri maikaāka. Isäkire säpiretakari, atāo minasäkiretakati, imaikaāka apaka. Mitxi iua kamari posotiiiretxi iua potxoari uinitikiri ikapani. Ikara posotiiiretxi xika imisirienetana ninoa potxoari uinitikiri takaõtxikare auaĩtotakini. Imisirienetana ninoa iua kai kamakori teosonetakani. Iua potxoari uiniti pokikaātakari, isäkire säpiretakari pakini, auākīpanika okaāka ipoa atoko inakarimoni, ēxópīri arikiniātaā. ²¹Isotatoneakori okapeēka iouataā, kavaro kasarori nopini topākakari namaākeroā. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

Mio Anokananisaaki

20 Eereka nitikari Teoso nitiri katxakaāpotini Teoso tixine ikari. Iuakoā iua minaro xavi iua mamapotōkire irikotimoni. Apaka iminari kohētxi mitari. ²Iuasaaki imaīkari iua imini mitapoari. Kitxakapirīkarikara iua imini. Iua maerekani matamatakoni auíte, Satanasi inakori. Iua maīkari Satanasi. Iaxirikari kohētxiā, mio anokanani imatīpokotakani tīkane. ³Iua Teoso

nitiri okari Satanasi iua aarikoā, tota itxari itore. Ikakiriokari oa xavi itore sonaā, ininiā !apakata itore matakakiko. Ininiā mamapotōkire irikoti āki ikaikota Satanasi. !Iposotaikari imisirienetini ikini itixiti auakani. Mio anokanani auako iriko āki iua Satanasi. Mio ano napaāka atoko auiritaāka ipokīkini. Mapaõtinoka auiritaāka mapara auini.

⁴Eereka natamatari auítetxiakori topanere. Kaiāopokori auari iuaā. Natamatari iua topaneretxi nopini topākakani. Ninoa txikitaāka auítetxi ininiuana. Iuasaaki natamatari apanakini kākiti. Mitxi sauakanopitakoni. Okapeēkana Xesosi iokanapirena, Teoso säkire pakini isäpiretinina xika. !Iteosonetarina iua potxoari uinitikiri. Iua kai kamakori liteosonetana. Iua potxoari uinitikiri takaõtxikare litakana iteētaāna, iuakoāna pakini. Iuaīkana auapekana. Auítetxi itxapekauana Kristokata. Mio anokanani auítetxi itxauana. ⁵Ikara ipīkani õkitikiko merepanika ipikani õkitikiko. Iua mio anokanani napaāka atoko apanakini ipīkani õkitikaāka. ⁶Ipīkani merepanika õkitikiko iuaīkana auāki ininina ikapani, Teoso nakitiakori itxauana ninoa. Teoso sikari erekari ninoamoni. !Atatsiitarina ātiāo ipīkitxi Teoso misiritakasaakina maerekati kamakani. Sasetotxi itxauana, kotxi Teoso nireēkiti ikamana. Kristo nireēkiti apaka ikamana. Mio anokanani auítetxi itxauana Teosokata.

Satanasi Xamina Mitapoarimoni Okiko

⁷Mio ano napaāka atoko, Satanasi kateia āki auakari, sikakaākako. Ipokīka mapara. ⁸Iuasaaki Satanasi ipirixititari itixi kākiti ikini āti uāka imisiriene-tini ikapani. Iua misäkiretari āti uāka Koki inakori, Makoki inakori pakini. Txamari na atāo isäkire. Inirekari ni-

noa neenamauatini iuakata. Apitiitana ninoa Teoso nakitiakori inaiatinina ika-pani. Itori kãkiti Satanasi apotiitakini. Uini ikipatxite atoko itxana.

⁹Ípirixititarina itixi. Iakirokarina Teoso tiretakiti sitatxiti, kãkiti Teoso nakitiakori auiniãtaã. Iuasaaki xamina iaxitikiri katxaka. Ixipokana ninoa ikinikana. ¹⁰Iuasaaki Satanasi, kãkiti misirienetakari, okaãka arikatxi mitapoarimoni ëxópiri arikikoãtaã. Iua potxoari uinitikiri, isãkire sãpiretakari pakini okapeëkaika iuaã. Iuaã ninoa atatsiirauatapikako pokamara, ikanõka ätipirika. !Ixipoka ninoa atatsiirauatini.

Ipinakani Apakapari Iparíkana Ìki

¹¹Eereka natamatari auítetxi topanere kasarori mitari. Natamatari iua inopini topãkakari. Iuasaaki patimari iaxiti, itixi pakini ereëkokini iua topãkakari apisatoõ. Iaxiti, itixi pakini kona katamatikoikari. ¹²Iposo atoko natamatari kãkiti mitxi ipinakani timini Teoso topanere apisatoõ. Kãkiti apiarini, kãkiti poiãorini pakini tima Teoso apisatoõ. Iposo atoko itori aãtsopa katamëkitataãka. Iua aãtsopaã aua ikinika kãkiti kamakiti. Apaka äti aãtsopa katamëkaãka. Kãkiti uãka aua iua aãtsopaã Teosokata auakani ikapani. Iuasaaki ninoa mitxi ipinakani apakapari ikamakitina ìki uai itixiã auakasaakina. ¹³Ninoa mitxi potxoari uiniti äki ipinakani apoka iuaã. Mitxi kipatxiã ikatakoni apaka apoka iuaã. Ikini kãkiti ipíkani auiniãtaã auakani apoka iuaã. Ikinika apakapari ikamakitina ìki, ikamakitina itixiã auakasaakina. ¹⁴Eereka ipíkixi, ipíkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaikana kãkiti ipina ätião ipíkixi maxipokatimoni. ¹⁵Kãkiti ätipirika Teosokata auakani uãka aua Teoso aãtsopateë. Kãkiti

iuaã mauauãkatakani okaãka iua arikatximoni.

Iaxiti, Itixi Pakini Amaneri Txapekaua

21 Eereka natamatari iaxiti amaneri, itixi amaneri pakini. Iaxiti mitxiri ereëkokape. Ìkora itixi mitxiri ereëkokape. Potxoari uiniti !auaika. ²Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniätari iua sitatxi ìkorapokoriti apokini. Natamatari ikatxakaãpotini. Iua sitatxi peereri. Sito itaniriuatakasaaki, omãka peereri oitanirimoni osini ikapani. Oa sito erero atoko itxa iua sitatxi. ³Nikenakotari Teoso topanereë auakari sãkire. Itapasãkিরeritika itxari:

—Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴Iuasaaki iua kaxipokariko ninoa oki ätsaã. !Itxiapataikana. Ipíkixi !auaika. Matinanitxi !auaika. Ätsaãtxi !auaika. Katsiiri !auaika. Ikinipoko mitxiri ereëkokapeka uatxa —itxa.

⁵Iua auítetxi topanere nopini topãkakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piökatsopitari nisãkire, kotxi nisãkire atão. Nisãpiretakiti apokapitikako.

⁶Apikomoni itxano:

—Uatxa niparíka xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotökire iõka Ómika inakori atoko nitxa, kotxi ikinipoko mapotökire nitxaua apaka. Nisikari kãkiti posonatakani iätini ikapani. Na ninirekari ìki. Iätarinako äparaã amomoãkiri. Iua äparaã

txíkitakari kākiti ātipirika Teosokata auini. ⁷Nisikariko iua āparaā kākiti Satanasi nireēkiti makamakanimoni. Ninoa Teosone nitxaua nota. Nota anaakori itxauanako ninoa. ⁸Kākiti mataparaxinireni okaākako xamina mitarimoni. Teoso sākire mauikakani apaka okaākako iua xaminamoni. Maerekati potxitakani, kokanirini, maerekati iitoāna potxitakiti kamakani apaka okaākako xamina mitapoarimoni. Mīiti apaka okaākako iuamoni. Teoso kamakori teosonetakani okaākako iuamoni. Ikinika kākiti maxikatiika sāpiretakani apaka okaākako xamina mitarimoni. Ninoa kākiti ikinikana misiritaākako arikatxi mitariā, ēxópiri arikikoātaā. Iuaā kākiti iuaīkana ipina, ātiāo ipíkitxi maxipokatimoni —itxa iua auítetxi topanere nopini topākakari sākire.

Xerosareē Sitatxiti Amaneri

⁹Ninoa Teoso nitiriakori setxi, iātatxi setxi auakini, āti ina notamoni. Iua txari: —Uai pina. Noerekaiko pite iua Soti Auíte tīretakito itanoro īkapani —itxa.

¹⁰Iua Erekarī Matamatakoti anikano nota. Itxíkitakari Teoso nitiri anikinino oxiratarī nopini. Mitaxiratarīā oerekano sitatxi Teoso nakiti Xerosareē inakori. Natamatari iua sitatxi Teoso tixine potorikakari katxakaāpotini īkorapokoritimoni. ¹¹Teoso iotximeretxikana aua iua sitatxi. Kai pomēkoriri kakaroneri xásipi inakori mēkorīkini atoko itxa iotximere. Iua sitatxi iotximere peereri. Kristao mēkori atoko itxa. ¹²Pirikeri kai kamakori piriketari iua sitatxi. Iua pirikeri mitapoari, paītanori. Iua pirikeri tosi itore aua. Teoso nitiriakori iaxitīkini tosi nīkatari iua tosi itore. Ikinika itore nopini iōkataāka Isaeo anaakori uāka, kotxi Isaeo tosi imiakori aua. ¹³Ipi āti pakini iua itore atokatxi pokīkinimoni. Ipi āti pakini iua itore atokatxi pokīkini

sanaremoni. Ipi āti iua itore atokatxi pokīkini ikikomoni. Ipi āti pakini iua itore atokatxi ereēkokinimoni. ¹⁴Iua sitatxi pirikere tosi kai mitari nopini ika-maāka. Ikinika iua kai nopini Soti Auíte moianariakori uāka iōkataāka, kotxi Soti Auíte moianariakori tosi aua.

¹⁵Iua Teoso nitiri notakata sākirauatakari aua aāke oro kamakori iuakoā. Iua aāke iua sitatxi, itore, ipirikere pakini iaōtiko. ¹⁶Sitatxi tore atokatxi pokīkinimoni ipotorika. Itore atokatxi ereēkokinimoni apaka. Iaōtari ipi mio, koatrosētosi pakini kirómetro. Maioakari. Iuaīkana ipotorika sitatxi itore atokatxi pokīkini sanaremoni. Itore atokatxi pokīkini ikikomoni apaka. Iaōtari iua atokotxikana ipi mio, koatrosētosi pakini kirómetro. Eereka iaōtari sitatxi itano timakari. Iua atokotxikana ipi mio, koatrosētosi pakini kirómetro. Iua Teoso nitiri iaōtari iua sitatxi iua aākeē. ¹⁷Iua Teoso nitiri iaōtari pirikeri timakari. Sesēta metro itano. Teoso nitiri iaōrauata kākiti iaōrauatinī atokokana. ¹⁸Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹Iua kai mitari pirikeri patapi auakari ipataāka ikini sereti kai soroā. Pomēkoriri, kakaroneri iua kai soro.

Āti iua kai mitari aua kai soro xásipi inakori.

Āti iua kai mitari aua kai soro sapira inakori.

Āti aua ákata inakori.

Āti aua esimeráota inakori.

²⁰Āti kai mitari aua kai soro satónia inakori.

Āti kai mitari aua kai soro sátxio inakori.

Āti aua krisórito inakori.

Āti aua periro inakori.

Āti aua topásio inakori.

Āti aua krisópraso inakori.

Āti aua xasīto inakori.

Āti aua ametxísita inakori.

²¹Iua tosi itore tosi kai kasarori kamakori. Iua kai kasarori pérora inakoro. Iua itore ātika, pérora ātoka kamakori. Oro kamakori itxaua kimapori. Peereri. Pomēkoriri. Kristao atoko itxa ahoa.

²²Kona natamatari Teoso misākiretiko aikoti. !Auari iua aiko iua sitatxiā, kotxi Teoso Apiananiri kaposotiireri, iua Soti Auīte apaka iuaā auapikana. ²³Iuaā !nirekaāka atokatxi, kasiri pakini sitatxi iopinikini ikapani, kotxi Teoso iotximere iopinikari ikinipoko. Iua Soti Auīte sitatxi tirikapite atoko itxaua.

²⁴Kākiti maerekanitxi mauakini ikini āti uāka auari iua kamaraā. Kākiti ikini itixiti auakani auīteakori apokako iuaā Teoso ipaxitinina ikapani, inirekakitina Teosomoni isikinina ikapani. ²⁵Iua sitatxi tore imatakakaākapika. Īroāpikana kākiti. !Itotaāka, kotxi ikanōkari !uari iuaā.

²⁶Kākiti ikini itixiti auakani anikariko ikinipoko erekari iua sitatximoni Teoso ipaxitinina ikapani. ²⁷Kākiti maerekati kamakani !auritaākana iroinina. Ītotxi nireēkiti kamakani !auritaākana iroinina. Atāo masāpiretakani apaka !auritaākana iroinina. Kākiti Teoso iōkauākatakini aātsopateē, ninoanokara auiritaāka iroinina iua sitatxitiā. Iua Soti Auīte aātsopateē auauākatakani auapikako Teosokata.

Iua Āparaā Iātakari Aua Teosokata Ātipirika

22 Eereka iua Teoso nitiri oerekano sōtoāri. Iua sōtoāri mapotōkire ikiitaā Teoso itopanere aua. Apaka iua Soti Auīte itopanere aua iuaā. Iua āparaā peereēri. Kristao mēkori atoko itxa iua āparaā. Iua āparaā iātakari !ipina. Ātipirika auapika. ²Iua sitatxi apanīkaki aua ahoa mitapoari. Iua sōtoāri sa ahoa

apanīkaki. Sōtoāri ĩtinikata aua amāti-irinape. Iua amātiiri tximakani !ipina. Auapikana. !Ipinakana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaikana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tsopa sikataparatarī kākiti ĩto, ikinimane kākiti itixi auakani ĩto.

³Teoso misiritiniri kākiti !auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴Ninoa atamatariko itoō. Teoso uāka iteētaāna auako. ⁵Īkanōka !auaika iuaxiti. Kākiti iuaā kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶Eereka iua Teoso nitiri txari notamoni:

—Atāo nisākire. Ia iaōka apokapitakako. Teoso Apiananiri sikari Erekarī Matamatakoti isākire sāpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sākire.

Xesosi Kanapiriini Pirena

⁷—Hīkenakota —itxa Xesosi. —Patimariko napokini ereē. Ia aātsopa sāpiretari ereē nikanapiriini pirena. Kākiti auikiniāri Teoso sākire ia aātsopa sāpiretakiti, apakapari erekari Teoso sikakiti —itxa Xesosi.

⁸Nota Xoāo sāpiretai hīte nitiāk-iti. Nikenakotakiti apaka nisāpiretai hīte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri apisatoō, kotxi iua oerekari ikinipoko notamoni. Nipamaka iua apisatoō Teoso apisatoō nipamakini atokokana. ⁹Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sákire sápiretakani Teoso nitiriakori itxauana. Ninoa atokokana nitxa nota. Ikini kákiti ia aátsopa sápiretakiti auiákani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniã atão —itxa Teoso nitiri sákire.

¹⁰ Iuaĩkana itxano nota:

—Ia aátsopa sápiretari Teoso kamakiti apokini apisapanika. Na pikipatapiri ia aátsopa sápiretakiti, kotxi paítiki Teoso sákire iaõka apokapítikako.

¹¹ Maerekati pikamapanika pinakasaaki, ininiã apikomoni maerekati pikama. Maerekati piito nireékiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireékitinoka pikaminiã, ininiã apikomoni Teoso nireékitinoka pikama —itxa.

¹² —Hikenakota —itxa Xesosi. —Patimapaniriko napokini ereë. Niminariko ikinimane parika iki ninoa apakapini ikapani. ¹³ Iõkatxi merepítipánika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireékiti kamakanimoni. Ninoa kákiti auiritaãkako Teoso amãtiirite itximinina auapika ininina tĩkane. Auiritaãkanako ñroinina Teoso sitatxineë. ¹⁵ Kákiti maerekati iĩtona nireékiti kamakani !auiritaãka ñroinina iua sitatxitiã. Miĩti, iñanoro minakatokatika sirĩkakani, kokanirini pakini !auiritaãka ñroinina iua sitatxitiã. Apaka kákiti ikamakítika teosone-

takani !auiritaãka ñroinina iua sitatxitiã. Aãpirena potxitakani, atão minasákiretakani pakini !auiritaãka ñroinina iua sitatxitiã.

¹⁶ —Nota, Xesosi txaua. Nota paniãtari ninitiri nitixine auakari sápiretiniri ia nisákire pitemoni, ininiã ikara pite sápiretanoko Teoso misákiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ikaro atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hite ia nisákire kenakotakanii, hĩtxariko:

—Uai pina.

Hite posonatakani, uai hina. Hinirekiniãri, ia ãparaã hiãtako, kotxi ia ãparaã kákiti auapininiika inĩkitaãkari. Ia ãparaã Teoso sikakiti kãkitimoni. Na piĩkĩtxitari.

¹⁸ Nota, Xoão, õtãkikari kákiti ia Teoso sákire iõkatsopatakori kenakotakani. Ia Teoso sápiretakiti apokini apisapanika, isãpiretaua. Ia aátsopa sápiretari kákiti misiritiko. Ninoa misiritiko atokotxikana Teoso misiritai hite, hikoketiniãri hiteka sákire Teoso sákirekata. ¹⁹ Kákiti kipatiniãri ipixini ia Teoso sápiretakiti iõkatsopatakori, Teoso !auiritari iua tximiniri iua amãtiiri kákiti auapininiika inĩkitaãkari. !Auiritari iua ñroini isitatxineë. Ia aátsopa sápiretapekari iua amãtiiri, iua sitatxiti pakini.

²⁰ Xesosi txari:

—Ia niokanapirena atão. Iposopeka napokini tĩkane.

Atxari iuamoni:

—Ameë. Ari, uai pina Xesosi, Apiananiri.

²¹ Xesosi Apiananiri sikari ikinipoko
erekari ikinimane Teoso nakitiakori-
moni. Ameë.